





th. Polem - 79.

\* Verum Auctoris nomen  
Muratorius est.

cf. Jöcher's Gelehrten Lexicon  
litt. M.

Solemn. 1915.



# LAMINDI PRITANII

## DE INGENIORUM MODERATIONE

In Religionis negotio

LIBRI TRES,

UBI QUÆ JURA , QUÆ FRÆNA FUTURA  
sint homini Christiano in inquirenda, & tra-  
denda Veritate, ostenditur : & Sanctus Au-  
gustinus vindicatur à multiplici  
censura

JOANNIS PHEREPONI.



*Juxta Exemplar*

PARISIIS Impressum ANNO M. DCCXIV.  
cum Approbatione.

---

*Prostant Francosurti*

Apud WILHELMUM METTERNICH Bibliop.  
Anno M.DCCXVI.

BIBLIOTHECA  
REGIA  
MONACENSIS.

VIRO ILLUSTRISSIMO  
DD. JOANNI PAULO  
BIGNON,

ABBATI SANCTI QUINTINI,  
REGALIS ET COLLEGIATÆ S. GERMANI  
ANTISSIDORENSIS

DECANO,  
COMITI CONSISTORIANO,

Utriusque Academiæ Inscriptionum & Scientiarum  
Præsidi, &c.

P R Æ F A T I O.

**A**Nte aliquot annos ad umbilicum mihi per-  
ductus est meus iste *de Ingeniorum Modera-  
tione* Liber. Cur is tam diu apud me dor-  
mierit, & tam serò in lucem prodeat, non  
optimum Horatianum consilium in causa  
fuit, sed exemplaris diu vagi, ac tandem deperditi, non-  
nullorumque aliorum eventuum series, in quibus expli-  
candis non est, cur ego Lectores molestâ & fortassis in-  
utili narratione detineam. Illud quidem, & altâ voce,  
mihi prodendum, nempe tuâ unius humanitate, ILLU-  
STRIS- & CLARISSIME VIR; denique fa-  
ctum, ne Liber iste adhuc dormiat, atque delitescat. Fe-  
lices temporibus nostris Literæ, quæ LUDOVICUM  
MAGNUM Galliarum Regem habuêre Patronum, e-  
jusque liberalitatem adeo sensere, ejusque aspici tan-  
tùm crevêre, ut nulla unquam ætas oblitura sit magnani-

## P R Æ F A T I O.

nam curam consiliūque optimi Regis. Sed non minus felices, quod Te idem Princeps, eximius ingeniorum æstimator, constituerit Regiæ Scientiarum & Artium Academiæ Præfectum, quo in munere nulli labori, nulli diligentiae pepercisti, ut in integrum Regnum, immo extra ipsius Regni fines propagaretur Disciplinarum omnium utilitas, & curaretur incrementum. Propterea & me, licet longè positum, tua beneficia invenerunt, quorum postremum non est, mea hæc, qualiacumque sint, è tenebris tandem erepta emergere in publicum diem. Nulli igitur æquius quàm Tibi meum hujusmodi factum dicatum velim, quo si non eruditionis, certè mei erga Te grati animi monumentum aliquod apud posteros extet. Sed priusquam Te ac Lectores deducam in argumentum mihi susceptum, juvat nonnulla præfari, originem & scopum Libri ipsius aperitura.

Jam fluxere aliquot anni, ex quo cœpti sunt in Officinis Batavis prælo iterum committi, vulgarique per totam fere Europam, præclarissimorum virorum Libri, quorum exemplaria rarissima aut frustra conquirere, aut magno redimere necesse jam erat. Et magnopere quidem, fateor, mihi suum consilium ille probaverat, qui non eam tantum Typographis Amstelodamensibus injecerat mentem; sed & suam conferebat operam, ut si non omnibus purgata mendis, elegantissime saltem omnia formis æneis rursus describerentur. Nam cur hujusmodi beneficium, in aliquod bonarum Artium commodum, & in Eruditorum utilitatem cedens, non amem & laudem à Batavis profectum, laudaturus & amaturus in nostris? Verum non hîc stetit ejusmodi cura; quippe nonnullis optimis Libris appositæ quædam lacinie fuere, seu Notæ Censoriæ, non parum quandoque fellis & veneni continentes, dum lucis præferendæ alienis tenebris, aut errorum tollendorum unica prætextitur causa. Qua in re cum modica interdum modestiæ ratio fuerit habita, ipsæque

# P R Æ F A T I O.

que Religionis sacratia impetita fuerint ; utique dicendum, pro beneficio levi Scriptoribus nuper editis iniuriam gravem esse illatam, & quod est ad Catholicæ salutem Professionis viros , malè de iis meritum fuisse Censorem huiusmodi.

Omnium autem vice memorandæ mihi sunt *Animadversiones*, quas ille sub e mentito *Joannis Phereponi* nomine in *S. Augustini Opera*, ann. 1703. Antverpiæ, sive Amstelodami evulgavit. Quanta, & quàm justa huc usque homini, & ingenio & pietati sanctissimi huius viri existimatio & veneratio accesserit, tot seculorum auctoritate, & tot Scriptorum non Orthodoxæ solùm, sed & Heterodoxæ Familiae consensu firmata, nemo est nescius, Augustini doctrinæ assurgebant, assurgunt adhuc fere omnes, contententibus hinc nobis, inde Protestantibus, suffragio tanti Magistri positas tueri sententias. Quando quidem placuit & satius visum est ab Augustini mente recedere, id certè ita factum, ut nequaquam ejus famæ ac securitæ in reliquis sententiis officeretur. Qui verò ex toto pudore omni dejicere Augustinum de acquisiti splendoris & dignitatis culmine conati sunt, nihil minus quàm consuetari hucusque habiti. At nulla res Phereponum deponere poterat, quominus Augustino diem diceret, atque illam impune debacchetetur contumeliis & flagris. Non illius dicta quædam, non aliquæ tantùm sententiæ ipsi ipsum improbatæ, sed generale Augustini gloriæ indictum est bellum, nihilque prætermissum, quo cum illius ingenium, si Superis placet, sophisticum, & captiosum, & imbecillum, tum ejus animus à malis etiã artibus quodammodo non abhorreas, atque in Religionis principem pene conjuratus incautis Lectoribus exhiberetur.

Atque hinc Proborum atque Ernditorum querelæ adversus Phereponum, sanctissimo Episcopo adeo intensæ, simulque flocci facientem in uno Augustini con-

## P R Æ F A T I O.

temptu tot hominum iudicia Augustino faventia. Et quanquam persuadere sibi aut aliis fortasse is possit, se veritatis unius amore, quæ omnibus præferenda est, in Augustinum irruisse; vix tamen erit, ut persuadeat, se non excessisse in eo agone modum ac moderationem honestæ Censuræ. Et minimè id mirum multis visum est. Nempe famam aucupanti nulla occurrat ratio faciliior, quàm Censorem agere, & potissimum in Scriptores diuturni temporis, ut ita dicam, auctoritate sacratos. Quod enim est ad Criticos non paucos, ubi errores in magnis viris deprehendisse sibi visi sunt, tum sibi tacitè gratulantur, quasi ingenio aut iudicio præstantiori polleant ipsi, & aliqua saltem ex parte vincant tot ingeniorum victores. Vicissim verò, ut Tacitus ait Lib. 5. Ann. *Obtrectatio & livor pronis auribus excipiuntur*, & à Lectoribus plerisque amantur chartæ dentatæ, & summorum virorum ludibria. Nam interdum quidem Censura aliena iudicio nostro prodest, semper autem nostræ ambitioni blanditur, quippe depressis proceris arboribus, vel ipsa virgulta sibi crescere confestim videntur. Quid, si cum celebratissimi Auctoris Operibus Censura ipsa jungatur? Tum profectò certissimus ad famam captandam Censori est gradus; velint enim, nolint, si Libros illos comparare sibi Eruditi in animum inducant, auctarium quoque emanare oportet, & hominem noscant inclarescentem ex inimicitiiis magnorum virorum.

Quod est ad me, ut primùm in manus meas Phereponi opus pervenit, illudque legi; non potui, fateor, quin improbarem, simulque dolerem consilium ac laborem, Scriptoris adeo confidentis. Neque sanè is ego sum, qui in *Artem Criticam* odio ullo ferar. Immodò ipsam tanquam necessarium eruditi hominis ornamentum plurimi facio, ejusque scientiam, rectumque usum in aliis suspicere, mihi verò optare non desino.

desino. Loquor de arte illa, cujus ope ac regulis in re literaria vera à falsis, recta à pravis dijudicamus, & quæ omnium fere Artium atque Scientiarum ita comes esse debet, ut sine illa ad perfectionem vix assurgere valeant; non quæ cum satyra atque obtreptione confusa, nostris temporibus molesto nomine traduci solet apud ignarum vulgus. Id etiam præ oculis mihi positum, & Religionis divinitatem causam esse non debere, ut nobis Censura quævis continuò displiceat. Solent autem nonnulli sine discrimine fastidire ac improbare, quidquid ab alienæ Religionis homine scribitur, atque illis perinde est Librum averfari, ac nomen Auctoris A catholicis novisse. At mihi impia quidem Hæreticorum dogmata perpetuò displiceant; sed nunquam displiceat veritas vel in Hæreticorum ore. Numquid enim quæcumque ab Heterodoxis dicuntur, ea omnia continuò pro falsis ac impiis habenda? Præterea ne eo quidem nomine Pherepono succensendum, quod is malè sanctum Augustinum habuerit, virum nempe illum; cujus fama neque laudibus crescere nostris, neque alieno livore imminui jam queat. Quanquam enim Augustinum supra quam plurimos Ecclesiæ Catholicæ Patres veneremur, supra illum tamen veritatem esse colendam constat. Nimirum sancti Patres, singillatim sumpti, potius testes quàm Magistri veritatis sunt appellandi; & si quidem Magistros appellare placet, nunquam tamen eos falli nescios reputabimus. Quare si ster à Censore veritas, cur illi irascamur, nos, & Augustinum meliora docentis? Unum ergo fuit, quod Phereponianum Opus ingratum mihi fecit, nempe veritas, ut mihi videbatur, atq; videtur, ab ipso interdum oppugnata, interdum etiam exagitata & onerata conviciis. Cùm verò injuriæ veritati uni illatæ palam, ad omnes pertineant veritatis amantes; & obfistendum sit morbis pejora minantibus: hinc mihi natum consilium texendæ Apologiæ, quâ consulerem tum Augustini famæ, tum veritati laceratæ.

## P R Æ F A T I O.

Sed ne hîc quidem consistendum mihi arbitratus, in ampliorem agonem sensim pertractus sum, cujus rationes significatum nunc pergo. Uti nemo non videt, atque ab experientia edocemur, esse potest; immo sæpe est, *Critica*, alioqui laudabilis atque utilissimæ Artis, perversus usus: & quemadmodum Medicina, Eloquentia, Dialectica atque aliæ Artes Dei immortalis munere hominibus datæ, nocere interdum solent, non suâ, sed abutentis culpâ; ita hominum vitio veritati nonnunquam officit *Critica*, quanquam in ipsius præcipuè veritatis præsidium exagitata. Et sane dum Literarum studiosus laxatis habenis ad inquisitionem veri se confert, nullumque ambizioso ingenio limitem præscribit: quid mirum, quòd tot ac tam pertinaces Hæreses atque errores sobolescant, latiusque serpent in dies? Qua de re tandem dolendum magis est nobis, sollicitique esse debemus, quàm de Augustini fortuna. Neque contumeliosè agam in tot populos ab Ecclesia Catholica eorum matre per teterrimum Schisma hucusque divisos, si dixerò, nullam aut antiquitùs excogitatam fuisse, aut excogitari nunc posse opinionem perversam atque impiam, cujus non sit, aut fuerit apud illos Patronus aliquis, ac superbissimus Præco. Non id quidem, inquit ipsi, vertendum est vitio Reipublicæ. Verùm, quando sentire quæ velis de fidei dogmatis, & veritatem inquirere, nullis adhibitis salutaribus frenis, aut licet, aut impune apud eos licet, aut saltem ex eorumdem sententia licuit suarum Sectarum Conditoribus: & cum ex iis nunc nemo sibi minus quàm olim Luthero & Calvino, licere credat, ac velit: cur tantæ licentiæ, tantorumque malorum non postulemus ipsam quoque Protestantium Rempublicam?

Integram tamen hanc pessimam gloriam non occupant A catholicis. Numerare & nos possumus naufragia in pelago nostro. Ut enim quisque ingenii viribus supra vulgum pollere se sentit, tum cupidine laudis abreptus



## P R Æ F A T I O

reptus consentire opinionibus cum Eruditorum vulgo vile ducit , molestè fert atque recusat , omnémque spem gloriæ collocat in sola novitate doctrinæ. Ac etiam si id genus hominum eò usque non prolaberetur plerumque , ut ab arce Fidei & Ecclesiæ Catholicæ deficiant , plurimæ tamen turbæ eorum audaciam consequi solent , à quibus abstinere viro prudenti expediat , & probo sit necessarium. Quæ cum ita sint , nullo negotio intelligimus, quale onus & cura amatoribus veræ sapientiæ incumbat: nimirum non tam scientia quærenda, quàm scientiæ modus ac terminus. Si enim hos negligimus, veram quidem scientiam semper investigabimus, rarò inveniemus. Et quoniam in Religionis negotio nostra potissimum versatur oratio , quippe in eo sita est Christianæ Vitæ summa , eoque tendere debet disciplinarum omnium postrema linea. Hîc insistendum est , hîc erudiendus est animus , atque in primis intelligendum , quæ sint inquirendæ veritatis confinia , quæ adhibenda sit in tanta re *Ingeniorum Moderatio*. Quare impetrare tandem à me non potui , quin ad recolendas eas regulas me conferrem , quas à Pherepono contentas potius quàm ignoratas doleo , & quas perpetuò ante oculos sibi sistant ceteri Eruditi necesse est , si volunt in officio continere intemperantia ingenia , & ad veritatis sacraria tutissimè , ac sine periculo famæ aut animæ , contendere. Has autem leges dari , & si dentur , omnino discendas ac servandas nemo neget. Qualem enim secundum exitum expectemus à studiis nostris , & ab anxia inquisitione veritatis , nisi ante omnia sit exploratum , quousque meditationis nostræ conatus progredi debeat, & ubi consistendum sit ingeniis plerumque ambitiosis. Tolle istas leges, aut flocci pende , senties *Artem Criticam* non minus perniciosam quàm gladios , morborum quidem curatores in Medici prudentis manu , at in furiosi hominis funerum auctores. Igitur huiusmodi consideratio in

## P R Æ F A T I O

causa fuit , cur susceperim *de Ingeniorum Moderatione in Religionis negotio* utilissimam , quantum mihi videtur , disputationem , quam utinam pro merito suo , & appositè ad nonnullorum indigentiam pertractare possem.

Sed ne tanto quidem spatio meus animus contentus esse aut potuit , aut debuit. Irascerentur mihi non pauci , quasi compedes novos excogitarem , novaque vincula ingeniis injicerem , quando jam tot injecta videntur , ut de veteribus potius minuendis , quàm de novis adjiciendis cogitandum foret. Quorsum enim ( insusurrarent mihi in aurem Catholici quidam ) tu inter nos commendare , diligentèrque suadere *Moderationem Ingeniorum* , non solum legibus bene multis in Ecclesia Catholica constitutam , sed etiam ( & fortasse ultrà quàm velle-  
mus ) diversis rigidisque pœnis procuratam ? Si quid apud nos peccatur , nihil minus peccatur , quàm sentien-  
di & scribendi licentiâ. Contrà verò cùm ingenia interdum erumpere præ metu non audeant , & ab amplifi-  
cando Regno eruditionis & veritatis nimium cohiberi videantur : cur non potius *de Ingeniorum Libertate* instituitur sermo ? Cur memorantur fræna , quibus calcaribus est opus ? Atque hæc quidem è Catholicorum parte audire mihi videor. Tum longè gravioribus querelis ac dictæis nobis insultaret Protestantium Chorus. Nam quid , rogo , illis tam familiare est , quàm aut dolere , aut ridere Catholicorum sortem in Literis excolendis , & in sententiis de Religione proferendis , plane , ut ii arbitrantur , abjectam atque infelicem ? Nos è filiis evasisse vilia mancipia passim clamant ; supremos verò Ecclesiæ pastores tyrannidem usurpasse in ingenia , in conscientias , neque ferendam inertiam nostram ; uti neque eorum crudelitatem. Plura ante paucos annos efferebat in hanc rem Joannes Alphonsus Turretinus Academiae Genevensis Rector Oratione edita. Postquam  
multis

## P R Æ F A T I O

multis ille contendit, ne umbram quidem apud nos esse libertatis, hæc addebat: *Et unde fieri existimatis, ut tot tantæque Europæ gentes quibus tamen nec cælum inclemens, neque noverca est natura, nihil fere bonæ frugis ad Literarum augmentum proferant, nisi quod immane illud Inquisitionis Tribunal, vel inquisitionis amula Leges, omnem plane vim, omnem industriæ conatum frangant?* Contrà, unde fit, ut non alibi plura ingenii monumenta existant, quàm in Boreali-  
bus quibusdam Regionibus, nisi quod ibi majori tum corpora, tum ingenia, libertate utantur? Etenim quis Literas promoveat, quis veritati querendæ incumbat, quis inventam publicare ausit, dum pro laudibus convicia, pro commendatione dedecus, pro mercede pœnas ac supplicia suis laboribus parata videt, si vel tantillum à calcato tramite recedere sustinuerit? Et quis erit, qui suadeat (ut scitè Darius apud Curium L. 6. 3.) si suasisse periculum erit?

Ita ille, ita reliqui ejusdem gregis. Quorum quidem querelas, si in hoc Opere dissimulare velimus, & eorum confirmabitur sinistra de nobis opinio, & ipsam veritatem ingenti beneficio fraudabimus. Sunt sua non veritati minus, quàm ingenii jura inter homines, quæ bene nosse ac tueri ad neminem magis pertinet, quàm ad Catholicos viros. Jus autem inquirendi veri, & palam enuntiandi à natura nobis insitum, omniumque Majorum exemplo atque auctoritate commendatum, latissimè patet, neque à nobis sine injuria negligi potest. Quamvis enim ab immoderata inquisitione veri, multa in Ecclesiam Dei manarint incommoda, quibus præcipuè occurrendum est hæc nostrâ lucubratione; ea tamen vicissim, atque adeò evidentia bona sunt, quæ quotidie importat moderata, vereque christiana inquitendi veri libertas, ut non senius ad hanc laudandam, & populis suadendam, quàm ad illam incusandam, atque è medio tollendam,  
fit

# P R Æ F A T I O.

fit incumbendum. Et meâ quidem sententiâ, si bonarum Literarum augmentum si Christianæ Philosophiæ, atque Ecclesiæ dignitatem amamus, continuò intelligere possumus, quanti nostra intersit, cùm nos & reliquos omnes incitare ad cultum scientiamque cujuscumque honestæ veritatis, tum etiam probè noscere, quousque, & quomodo, & quando, aut liceat, aut expediat, aut etiam necesse sit veritatem investigare, atque proferre. Quamobrem, quanquam facilius sit animo concipere utilitatem hujusce argumenti, quàm rem ipsam deinde perficere, attamen dabo operam, ut quantum ego meditatione assequi poterò, jura & fines inquirendi veri explicentur. Scilicet pro virili parte efficiam, ut honesta ineatur naturali *ingeniorum libertati* cum *Christiana Moderatione* concordia, ne, dum nimis priorem constringimus, animi generosi, & ad Artes ac veritatem illustrandam pròni languescant; aut, dum alteram contemnimus, effrænata mentium libido susque deque vertat beatissimum *veritatis* Regnum & *Ecclesiam Dei vivi*, quæ *columna est, & firmamentum veritatis*.

Augustino autem, qui primus meæ menti obversabatur, meque in has cogitationes impulit, suus identidem ac præcipuè in Lib. III. locus erit, ubi illius defensionem suscipiam contra Phereponum; sed ita ut in me recipere nolim respondere singulis Phereponianæ Censuræ Capitibus. Sunt ibi minuta quædam, quæ si refellere velim, sim temporis prodigus. Sunt etiam alia quædam pauca, in quibus me non livoris quidem communionem, sed amore veritatis Censori ipsi tacitus adjungam. Quotus enim quisque est, qui non aliquando fallatur, nisi divino peculiari afflatu mentem manumque scribentis regat veritatis magister Deus? Erat Augustinus ad miraculum usque acutissimo ingenio instructus: at homo erat. Cum eximia Litterarum peritiâ conjunxerat ille præcipuum pietatis studium: at homo erat. Quare non est cur miremur,

# P R Æ F A T I O.

mor, si aut interdum dormitanti, aut etiam vigilantī exciderit aliquid quod libentiùs excuses, quàm probes. Verùm quæ in illo notanda videantur, ejusmodi non sunt, ut vel tantillum gloriam incomparabilis viri minuant, multòque minus Catholicæ veritati obsint. In reliquis autem majoris momenti quæstionibus, ubi ad dicendam causam, & ad ferulam subeundam Augustinum Phereponus trahit, vires mihi opto, & porro illas à Deo optimo maximo enixè peto, quibus cum Augustinum, tum Ecclesiam ac veritatem à Pherepono vindicem. Qua in re illud mihi in votis est, ne qua in Phereponum ipsum ira, ne qua in Augustinum assentatio, me ab officio deducat honesti ac sinceri Scriptoris. Quòd si fortè contingat, ut videat interdum asperius quàm velim excepisse Phereponum, non hominis odio id factum fuerit, sed ardore protegendī veri, quod ab eo læsum non paucis in locis demonstraturum me esse confido. Nam etsi illius consiliū in rigidè insectando, contemnendòque Augustino minimè probem, & ejus sententias, in quibus à Catholica Religione dissentit, vehementer exhorream; ejus tamen eruditionem & ingenium aliunde etiam mihi nota non aspernor, cujus specimina & ego, si res posceret, laudaturus essem candidissimo judicio.

Atque hæc sunt, BIGNONI PRÆCLARISIME, quæ in hunc Librum jam tuum, quia tuo nomine inscriptum, præfari opportunum duxi. Nunc restat, ut ejus Auctorem Tui obsequentissimum, Tibique fausta omnia è Cælo precantem, perpetuò ames, ut facis, tuoque patrocinio dignari pergas. Vale.

Dabam Mutinæ IV. Kalend. Novembr. M. DCCXII.



# I N D E X

## C A P I T U M,

Quæ in hoc Volumine continentur.

---

### L I B E R P R I M U S.

#### C A P U T I.

**V**eri & Boni præstantissima natura. Nullum Verum est, quod quarere suapte naturâ non liceat, & discere non sit honestum. Quæ sententia ab objectionibus liberatur, & S. Augustini auctoritate firmatur. Veritatum duplex genus: alterum scientiam, alterum persuasionem parit. Ordo quidam inter veritates. Quæ potissimum ad Religionem spectant, investiganda. pag. I.

II. Ut Religio vera nascatur, an à dubitatione sit instituendum iter. Dubitandi necessitas, ut error evitetur; & pericula ne veritas amittatur. Prudens dubitatio commendata, temeraria verò repudianda. 11

III. Non omnibus dubitandum de veritate suæ Religionis Ratio & Auctoritas in Religionis negotio, earumque pondus. Quæ quærenda sint, ut constet, an vera sit aliqua Religio. Prudenter possunt immò debent de veritate suæ Religionis dubitare Ethnici, Judei, Muhammedani. Justa apud eos dubitandi cause. 16

IV. An Christiano Homini dubitandum de suæ Religionis veritate. Æquum id videtur sed gravibus periculis obnoxium. Dubitatio & hic licita, & quando, & quomodo, ne fidei donum perdatur. Ratio & Auctoritas statuunt veritatem Christianæ Religionis. Cur Christianorum vulgus acquiescere prudenter possit in Religione sua, sitque ab onere dubitandi exemptum. In Ecclesia Catholica Pastoribus potissimum scientia Religionis expetita. 23

V. An

V. *An ad inundā Religionem veram Auctoritas praesedere Rationem debeat.* Manicheorum jactantia exploditur, Sancto Augustino sententia hac de re absurda à Pherepono afficta. Rationes extrinseca seu motiva credibilitatis adhibenda ante Fidem, nec exigenda Rationes Dogmatum demonstrativa. Usus Catholica Ecclesia hic laudatus, à qua nemo sine ratione credere jubetur. Scire & credere quantum differant. Miracula, extrinseca rationes. Alia Phereponi somnia putantis, Catholicos olim sine rationibus exegisse Fidem. 28

VI. *Infirmetas humana mentis, atque rationis, & errandi in homine facilitas* Ejus causa. fuga discipline, recordia in inquisitione veri, corpus male compactum, & pessimi affectum; penuria atque abusus subsidiorum ad inveniendam veritatem; memoria exilitas: phantasia impotens, & precipue dum affectus in animo regnant: voluntatis perversa indoles: mentis ipsius angustia. ignorantia, obliuio, & prava electio principum, quibus ad recte judicandum uti necesse est. 45

VII. *Rationis humana imbecillitas experientia teste.* Ad ipsius medicinam ut Religio vera noscatur, necessaria est humanitas, & exposcenda a Deo vires atque sapientia. Quid scientia, quid persuasio, siue credulitas prudens. Prima principia quibus ratio & prudentia reguntur in inquisitione Religionis vera qualis est unica Christi Religio, ratione & auctoritate in ipsis probationem confluentibus 55

VIII. *Qui noscenda vera Christi Religio inter tot ejus sectas.* Scriptura sacra primum veritatis promptuarium. Sed viribus nostris difficile intelligenda vera doctrina. Aliquem veritatis visibilem interpretes sua Religionis Deus dederit oportet. Ecclesia vera verax, & ab errore immunis; atque hac una est Catholicorum Ecclesia. 63

IX. *Ecclesia Catholica perperam negata ab Hæreticis* immunitas ab errore. Protestantium Methodus in inquisitione vera Doctrina quam temeraria, & quot Hæresum

*sum origo. Catholicorum Methodus quàm laudanda. Non ingenio privati cujusque hominis dimittenda sacrarum Literarum interpretatio in dogmate. Vox Ecclesie vera hic audienda, Deo id præcipiente.* 69

X. *Auctoritas Ecclesie Catholica in Fidei doctrina à Pherponi objectionibus vindicata. Ei non sine ratione credimus. Fallaci auctoritati Protestantes addicti, & incerta apud eos veritatis consecutio. Antiquitas doctrinae in Christi schola, & credentium multitudo robusta veritatis argumenta. Novitas & paucitas erroris indicium extra Catholicam Ecclesiam. Pherponi in hanc rem animadversiones confutatae.* 76

XI. *Socinianorum pestifera Hæresis Deo nos quadam edocenti credendum, quamvis credenda superent captum humani intellectus. Ingenii temeritas quàm hic impia. Loca Theologica, unde veritas doctrinae Christiana petenda. Traditionis auctoritas, ac necessitas in Ecclesia Dei. Quibus principiis nitatur. Laus Theologiae dogmaticae, & Petavii V. Cl. quem Pherponus pluris facere debuit.* 86

XII. *Ingeniorum libertas quàm ab hominibus expedita. Doctrina ad Christianum pertinens triplex. Semper considerandum, revelata ne an secus à Deo fuerit. Dogmatis existentia, significatio, & rationes distinguenda. Quid in his liceat aut non liceat hominum ingeniis.* 97

XIII. *Pericula imminencia scribentibus de auctoritate. Inspiciens zelus quid pariat, & quàm laudanda hic sit prudens moderatio. Ecclesie nunquam fallax in dogmatibus sanciendis, duplici conditione posita. Dogmatum, quae alia in mera contemplatione versantur, alia actionem quoque exigunt. Quae possint aut non possint, quae etiam debeant aut non debeant statui. Quid de quaestione, utrum Angelis corporei, an incorporei sint, credendum, & an eam Concilia sustulerint. Inter rationes dogmatum quaedam semper ad fidem spectant, sed non omnes. Quid hic liceat ingeniis.* 103

XIV. *Jus Ecclesie in dogmatis stabiliendis à Pherponi objectionibus liberatum. Falsum est, ipsum à S. Augustino negari.*



*gari. Multitudo in Conciliis Catholicorum qua commoda pariat. Factionis nomen iniqui adscriptum legitimis Conciliis Catholica Ecclesia. Non crimen, sed laus ac necessitas ibi est judicare ex anticipatis opinionibus, hoc est, secundum Traditionem. Vindicatum nonnullorum dictis Concilium Tridentinum.*

117

**XV. Disciplina Ecclesiastica quid complectatur. Qui differat à dogmate. Que in disciplina mutare, aut non mutare, sequi, aut non sequi liceat. Consonare in dogmatibus omnino necessarium. Varietas in Disciplina rebus modò laudanda, modò toleranda. Constantia Catholicorum in Hæresi Iconoclastica damnanda commendatur, à Calviniano quodam injustè subsannata. Quid Ecclesia egerit, eique sit agendum in disfidis de Disciplina. Contra Phereponum ostenditur auctoritas Ecclesiæ in præcipiendis nonnullis ad Disciplinam spectantibus sub pœna peccati.**

126

**XVI. De Historia Religionis agitur. Ejus duplex genus, Historia Divina, & Historia Ecclesiastica. Illa divinam Fidem à Christianis exigit. Quid juris illic sit hominum ingenium. Ecclesiastica Historia documentis non debetur supranaturalis Fides. Rationes istius sententiæ. Ecclesiæ non immunis à periculo errandi in judicandis personis, Auctoribus Librorum dignoscendis, in Sanctorum gestis narrandis, & in aliis id genus factis.**

**XVII. Ut aliquod factum fide supranaturali credendum statuatur, quæ conditiones requirantur. Revelationes quarundam sanctarum mulierum ad fidem non spectant; neque Canonizatio Sanctorum. Traditio necessaria, ut aliquod factum tanquam pertinens ad fidem decernatur. An immaculatam Deiparæ Conceptionem statuere possit Ecclesiæ.**

148

**XVIII. An immediatè, an potius mediatè ad fidem referendum sit credere, hunc vel illum esse Romanum Pontificem. Etiam si ponas, hoc & alia hujusmodi facta non esse credenda fide supranaturali, hæc tamen fides debetur Decretis Conciliorum & Apostolica Sedis in materia fidei & morum ab Ec-**

clesia receptis. Evidentia naturalis & moralis in his casibus sufficit & nos credere ac obtemperare cogit. Quam temerarium & pœnâ dignum revocare in dubium ejus generis effata.

155

XIX. In Judiciis Ecclesiasticis tria consideranda nempe doctrina, persona seu inrentio docentis, & voces seu phrasæ, quibus doctrina exprimitur. In doctrina damnanda siue probanda est ab errore immunis Ecclesia, non autem in judiciis de persona. An Judicia Ecclesiastica de vocibus supernaturalem fidem postulent. Tum solum postulare videntur, cum ad fidei doctrinam aut statuentiam aut defendendam necessarius est in Ecclesia Spiritus sanctus afflatus, & cum de Traditione colligenda à Patribus & de sensibus Canonum, & de personibus sacra Scriptura d. gunt.

165

XX. Ecclesiastica Judicia de privatorum hominum Libris verbis & sensibus, ad fidem pertinere minime videntur. Et tamen doctrina in us aut probata, aut damnata fide supernaturali credenda. Ipsa illa judicia quando nam certa quoque credenda sint, quanquam non assensu divinæ fidei. Quid hic disciplina precipiat. In fœnensis causa quid prestandum.

178

XXI. In profanis Artibus, Scientiis ac Historiis magna ingeniorum libertas. Sed & hæc ab Ecclesia tunc coerenda cum per eas sententias aliqua ex parte leditur fidei doctrina, aut sacrosancta Litera erroris siue mendacis suspitione asperguntur. Sublato hujusmodi periculo, liberum est in his sentire quæ velis. Regula nonnulla in hanc rem. Sacrarum Literarum scopus. Quando nam sit, aut non sit, evidens Scriptura mens in rebus ad salutem minime spectantibus.

187

XXII. An Scripturis sanctis repugnet Astronomorum sententia de telluris motu diurno. Sacra Litera phrasibus vulgi ac figuris usa, ut verum quodpiam significarent. Exempla in eam rem. Quid totus orbis in Scripturis, ex-  
tra

188

# I N D E X.

trémitates cœlorum solem incalescere, aliaque ad cœlôs, stellas ac solem spectantia. Quando proprium literalem sensum in Scripturis sacris retinere cogamur, & quando sit locus aliis interpretationibus. 199

XXII. *Traditio & evidentia exiguntur, ut in his ad salutem minime spectantibus documentis statuatur, aliquid ceriò esse credendum. Concilii Tridentini laudandum de ratione interpretandi præceptum. Evidentia in his raro desiderata. Quid de Antipodum existentia olim creditum, & quam prudenter ab ea questione dirimenda abstinnerit Ecclesia. Scriptura non detorquenda ad profanorum dogmatum tutelam. Petavii & sancti Thomæ sententia de stylo Moysis.* 212

XXIV. *S. Augustini consilia, cum de interpretandis sacris Scripturis agitur in rebus physicis, astronomicis, & aliis ad genus. Quid S. Thomas hic sentiat. Quam literis sacris nonnulli abutantur ad suas privatas opiniones tuendas. Judicium Ecclesiasticorum munus in hisce controversiis, & quæ eruditio in ipsis exigatur. Cartesii de naturâ corporis doctrina an fidei dogmatibus adversetur.* 223

## LIBER SECUNDUS.

### CAPUT I.

*Amplum jus ingeniis in prodenda ac annuntianda veritate: sed ita ut justitia, caritas & prudentia nunquam ab isto jure ladantur. Heretici in suæ Religionis doctrina annuntianda, quippe de illius veritate non satis certi, & sine missione legitima Evangelium prædicantes, justitia defuncti.* 233

II. *Caritas quando obftet, ne veritas evulgetur: ejus leges. An, & quando, & quomodo evulgandi errores Procèrum Ecclesiasticorum. An aliorum errores & vitia, & quando id liceat, aut necesse sit. Abusus, & excessus in hisce. An mordacitas styli ferenda.* 239

# I N D E X.

III. Calumnia nunquam adhibenda. Convitiis temperandum. Non imputandi errores nisi bene perspecti. Placide quantum fieri potest pugnandum. Et quando secus deceat. In confutandis erroribus ad Religionem minimè spectantibus qua libertas ingeniis. Caritati ac moderationi Et hic suus esse debet locus. Quando vitia morum adversariis obijcere liceat. 45

IV. Errores in sanctorum Patrum scriptis non diffimulandi; sed modeste agendum, Et excusandi errantes. Prudentia in proferenda veritate, Et erroribus insectandis habenda ratio. Quot modis in hanc virtutem peccetur. Scandalis ac seditionibus non apperendus aditus. 252

V. Quando, Et quibus de causis, damnare Et configere Libros, Pastoribus Ecclesia liceat, aut sit opus. Et hic à Censoribus Ecclesiasticis in justitiam peccari potest in caritatem, Et in prudentiam. Qui abusus Et excessus in salvari ista auctoritate exercenda fugiendi sint. 58

VI. Prudentia cõsilia ad Ecclesiasticos Censores. A novitate vocum Et sententiarum timendum; sed non omnia nova aut noviter dicta damnanda. Quàm necessarium superstitionis faciẽ habere perspectam, ejusq; excessus procedere. An laudandum votũ sanguinis profundendi pro tuenda immaculata Beata Virginis Conceptione. Scrupuli cavillationes, Et asperitas à sacris Censoribus absutura. Bona procuranda, sed ita ut mala graviora non inde fluant Sanctorum Patrum Libri non mutilandi, cum per typos evulgantur. Cavei hac de re accusatio repulsa. Qui, Et quando vitia Ecclesiasticorum literis consignare deceat. 66

VIII. An ad Religionem veram compellere quemquam summis Magistratibus liceat. Id jus Ecclesia ac Regibus in Hæreticos Phereponi hac de causa in S. Augustinũ ira, ac injusta censura. Manifesta Religio aliqua evidenter credibilis danda est, atq; hæc est catholica. Donatistæ phre-  
necicis comparati neq; injuria, a S. Augustino. Plerq; ex iis non ficto animo catholicam communionẽ amplexi. Legimus  
error

terror rationibus additus fraude ac utilitate nō caret. Exemplū Dei hanc in rem iuste ab Augustino adhibitū. 278

VIII. Hæretici Catholicam Ecclesiam persequuntur. Augustinus & Africani Episcopi perperam insinulati impotentia atque ambitionis in Donatistas. Eorum christiana caritas, ut schismati finis fieret. Cur mortis Donatista quidam damnati. An, & quomodo piam Dei severitatem cum Afrorum Episcoporum severitate composuerit Augustinus. Non omnis persecutio mala. Recte id ab eodem Augustino demonstratum variis Literarum sacrarum documentis & exemplis. 288

IX. Quod Augustinus de Rogatistis, & de vexatione Hæreticorum, sententiā mutatā scripsit, non imitemur, neque Protheum arguit. Hipponensis civitas credenda est non ficto animo schisma ejurasse. Inter Catholicorum & Muhammedanorū persecutiones quā magna differentia. Sententia Augustini de divina gratia non excludit utilitatem pœnarū in Hæreticos pertinaces. Nullo jure culpatus à Pherepono Augustinus, culpans Donatistam asserentem, neminem cogendum esse ad bonum. 301

X. Non infamatur ab Augustino Ecclesia triumphorum seculorum, neque eidem affingitur aliqua dissimulatio iniqua. Non omnis persecutio improbatā à veteribus Christianis, sed ea tantū quæ pro errore contra veritatē exercebatur. Neque Ethnicis criminari jure potuissent pœnas moderatas in aversos à Religione vera statutas. Augustinus erga Manicheos mitis, sed non idcirco incusandus, quod salutes Hæreticorum vexationes deinde laudavit. 310

XI. Donatista multorū criminum rei, & puniendi quoque ex legibus politicis. Probata ab ipso Deo moderata Hæreticorum vexatio. Inepta declamatiuncula à Pherepono afficta veteribus Christianis, qui persecutionem ethnicam ideo injustam vocabant quia pro impietate erat. Maxima disparitas inter Ethnicos & Catholicos Imperatores, quod est ad vexationem subjecta gentis. Ad summas potestates

pertinet coërcere impios, & à vera Religione devios. 319

XII. Posito in Regibus jure vexandi impios, nulla Christianis aut saltem Catholicis imminere debent incommoda apud Ethnicos & Muhammedanos. Religio Christi manifestè vera, tamque tueri pertinet etiam ad Reges. Pœna utiles, ut Hæretici in veritatem attentius oculos convertant. Quam sanctitatem in subjectis exigere debeant civiles Leges. Dissensiones in Religione politico quoque regimini noxia. Lactantii locus explicatus. Ecclesia Catholica aperta veritas, & potissimum in controversia cum Donatistis. 325

XIII. In Judæos, Ethnicos, & Muhammedanos minus asperè agendum Catholicis Regibus. Rigidius habere Hæreticos fas est: & in eos tamen spiritus lenitatis est retinendus. Hæretici meri, Hæretici seditiosi, Postremi pœnis gravibus digni, sed non fingenda crimina. Hæreticos alienæ ditioni subditos plectere non licet. Errantes alii pertinaces, alii dociles. Inter primos mitius habendi, qui cum lacte biberunt errorem, quàm qui ultro errorem adsciverunt. Attamen & hic audienda caritatis voces, & misericordia futurus locus. In errantes non pertinaces clementius agendum. Quæ regula Judicibus Catholicis hic futura. 335.

XIV. Zelus ineruditus, & nimia licentia in fidei & disciplina negotiis. Quos pessimos effectus ille pariat. Scientia & prudentia si à zelo absint, quid sequi inde possit. Zelus ineruditus Novatorum. Quomodo regendus zelus. Licentia opinandi in Religione nimis nocet. Ejus exempla in Pheroponi Libris.

## LIBER TERTIUS.

### CAPUT I.

Quid de Peccato originali sentiant Remonstrantes ac Sociniani. Nulla injustitia Deo tribuitur per Catholicorum sententiam de originali Peccato. Cum potuerit Deus ab initio condere naturam hominis talem, qualis nunc nascitur, potuit etiam ex Adami peccato sinere mala in hominum genus effluere.

re. Auctoritate sacrarum Literarum confirmatur dogma de originali peccato. Apostoli locus ab interpretatione Phereponi vindicatus.

pag. 359

II. Infantes causâ unius Adami peccantis, Baptismus eis necessarius ex Traditione probatur. Antiquitas Sponsorum pro infantibus in Baptismo contra Phereponum ostenditur auctoritate Tertulliani, qui necessitatem Padobaptismi agnovit: & in veteri Lege parvulis profelytis adhibitus Baptismus, & varia apud Judeos baptismatum genera. S. Cyprianus peccati originalis assertor perperam à Pherepono negatus.

367

III. Concupiscentia non bonum, sed malum homini. Quid Libidinis generale nomen interdum apud Augustinum sonet. Libido carnis, qualis nunc est, malum pœna, & non peccatum proprium est. Non venit ab institutione naturæ innocentis, sed peccati primi pœna fuit. Differt ab appetentia cibi & potûs. Perniciosa homini, ut is animal rationale est. Pudor nuditatis in statu naturæ innocentis locum non habuit, sed post Adami lapsum effluxit, & insitus nunc omnium naturæ. Fuiſſet & in terrestri Paradiso voluptas carnis, sed non inimica & infesta rationi. Nisi Adamus peccasset, neque Libidini turbide, neque alijs malis obnoxium foret genus humanum Scripturâ teste.

379

IV. Phereponus Pelagii Patronus. Episcopi Catholici propter damnatum pelagium perperam injustitia accusati. Liberum arbitrium revera à Pelagianis inflatum. De qua gratia Dei disputaretur inter Catholicos atque Pelagium. Post Augustinum non adoptata in Ecclesia Catholica Pelagii opiniones. Consectaria quadam dura à Pelagianis & à Pherepono objecta, minimè admissa in Augustiniana Sententia de gratia & libero arbitrio. Quam gratiam negaret Pelagius. Africani Patres à Semipelagianismi nota liberati, & aequitas in eorum judicijs contra Pelagium ac Cœlestium minimè desiderata.

397

V. *Qua gratia Dei negaretur à Pelagio, olim notissimum. Gratia Calviniana ac necessitans ubique à Pherepono perperam afficta Augustino & Patribus Carthagenensibus. Apostoli loca varia ab iis Patribus rectè adhibita contra impia Pelagii dogmata. Phereponi interpretationes varia, & accusationes repelluntur. Evangelii nuda predicatio est quidem gratia, sed non gratia, de qua S. Paulus & Patres Africani agebant.* 407

VI. *Orandi quidem Dei utilitas in hominibus, sed non necessitas, à Pelagio admissa. Alia Phereponi accusationes confutantur. Non omnia Dona Evangelica Pelagius confessus est. Gratia Dei, cum opponitur Legi in sacris Literis, non semper Evangelium merum significat, ut Phereponus & Hammondus putant, sed etiam beneficia Dei per Evangelium collata, & praesertim fidem & caritatem. Deum impossibilia non jubere, Augustini & Ecclesia Catholica sententia est. Pelagiani inimici gratia Dei.* 419

VII. *Voluntarium & liberum Phereponus putat ab Augustino confusa. Quid sint libertas essentialis, & libertas accidentalis humani arbitrii. Quid necessitas essentialis, quid accidentalis, quid antecedens, quid consequens. Arbitrium hominum semper liberum ab antecedenti necessitate, semper pradtum essentiali libertate. In hac sententia semper fuit S. Augustinus, uti ex multis eius locis ostenditur. Nulla in Deo antecedens necessitas, eique etiam tributa à quibusdam libertas in amore sui atque virtutis. Praescientia futurorum in Deo non tollit arbitrium homini liberum. Deus praevidet, libere homines peccatores. Idem in Deo sunt praeteritum, praesens ac futurum; quare ejus praescientia non ladir arbitrii humani libertatem.* 432

VIII. *S. Augustinus cum deperditum in homine liberum Arbitrium ait, solum de Libertate accidentali & consequente ad bonum faciendum loquitur, neque essentialem, seu antecedentem necessitatem ad malum homini tribuit, sed accidentalem & consequentem. Quid sint haec necessitates ac libertates, ostenditur. Afferuntur & explicantur varia Augustini loca. De libertate*



tate tantum accidentali ad bonum inter Catholicos & Pelagianos lis fuit. Potestas, non Libertas operandi boni in hominibus deperdita post peccatum Adami. Quae similitudo incedat inter hominem factum in bello servum, & hominem peccato additum. Arbitrium tunc liberum ad Bonum, si liberetur à Deo. Correptio ac Oratio utiles ac necessaria in sententia quoque Augustini. 447

IX. Sententia de descensu Christi ad Inferos ad fidem spectans à Pherepono improbata. Quid hic certo credendum, quid sit dubium Psalmi XV. locus à Sancto Petro laudatus, Catholicorum sententiam probat. Phereponus eum Psalmi locum absone interpretatus. Davidis verba ad unum Christum referenda. Vox Hebraica Scehol Inferos etiam, & loca animarum post corporis mortem significat. Talem ejus esse sensum in Psalmo laudato vox Græca Hades à Sancto Luca adhibita evincit. Alia argumenta in hanc rem. Sententia Hebraeorum de infernis animarum sedibus; & Scehol, eodem sensu ab Interprete Syriaco usurpata. 461

X. Non Apostolicâ Fide, sed Apostolicâ Sede legendum in quodam Augustini loco. Phereponi somnia varia hic nobis obtrusa. Alia Auctoritas veritatis, alia jurisdictionis. Quid commune cum ceteris Ecclesiis Catholicis, quid supra ceteras habeat Romana Ecclesia. Eo in loco Augustinus à Pherepono minime intellectus. Episcoporum continuata successio in Cathedra Romana inter Notas vere Ecclesia computata, ab Augustino aliisque vetustioribus sanctis Patribus. Tertullianus ejusdem sententia fuit. Consensus & judicium Christiani Populi suum quoque robur habet in controversiis de Religione. 477

XI. Miracula in Ecclesia Dei patrata, à Novatoribus & à Pherepono in dubium revocantur. Excessus prudenti Catholico fugiendi in iis credendis. Miracula quadam certissima fuisse. Stratagemata & fucus iniquè appellantur à Pherepono, cujus Sophismata in hanc rem exploduntur. Augustinus mendacio insensissimus; & Phereponi calumnia contrarium insinuantis. Nulla impostura nota, & omnia veritatis signa

# I N D E X.

confluunt in miracula ab Ambrosio & Augustino narra-  
ta. Cæci Mediolanensis sanati ad Reliquias sanctorum  
Gervasii & Protasii Historia expeditur ab aëreis Phere-  
poni objectionibus. Ambrosius in ea narratione fide dig-  
nissimus. Demones ab obsessis corporibus revera depulsi.  
Phereponus sacras Litteras per latus oppugnat. 486

XII. Cultus religiosus Angelis ac beatis hominibus ad-  
hibitus, contra Phereponum defenditur Superstitionis su-  
spicio frustra hic à Pherepono injecta. Precos pro piis defun-  
ctis auctoritate Scriptura sancta. Traditionis (que nuncun-  
tur Non aliter sentit S. Cyprianus, cui Tertullanus prae-  
vit. Votum sacra virginitatis præstantius, quam nuptia.  
Phereponi objectiones repelluntur. Apostoli apertum suf-  
fragium pro Dogmate isto. 501

XIII. Mendacium semper malum: ejus patrociniū à  
Pherepono susceptum, positum quibusdam circumstantiis;  
sed sine ullà validda ratione. Feci nonnulli è mendaciorum  
familia excludendi. Phereponi calumnia dictitantis, Pa-  
tres tam rigide fuisse infensos mendacio, ut ipsi postea tu-  
tius mentirentur. 511

XIV. Critica artis abusus non unus, & Pherepono potis-  
simum familiaris. Quae de conversione sua ad Deum Au-  
gustinus narrat, superstitionis ac fraudis iniquè insimulan-  
tur ab eodem Censore. Depulsa ab Augustino inanis gloriæ  
quæsitæ accusatio, à Pherepono in ipsum concinnata prop-  
ter Libros Confessionū. Ejusdem Augustini virtutes & san-  
ctitas variis Phereponi calumniis & sophismatibus crepta.  
In Mallio Theodoro laudando an excesserit Augustinus. Sin-  
ceritas ejusdem vindicata ab objectionibus Phereponi.  
Non in controversia cum S. Hieronymo, non in coopratio-  
ne sua ad Episcopatum, non in declarando Heraclio suc-  
cessore suo, Augustinus peccavit. 516

XV. Nihilius sui amor falsò objectus à Pherepono S. Au-  
gustino, cuius conatus in Pelagiū ejusq. errores fluncrunt  
ab amore unius Catholicae Veritatis. Ficta mansuetudo in  
hereticos perperā affecta Catholicis Episcopis. Comprimen-

de Hereses vix orta, neque erroribus concedendus nimia lenitate aditus. Convicia & contumelia varia Phereponi in S. Augustinum. Quàm hac hominem christianum & criticum dedecent. Quanto contemptu feratur ille in omnes sanctos Patres.

534

XVI. In sanctorum Patrum Libris distinguenda Scientia dogmatum, Legumque moralium, ac pietatis, à Parergis, hoc est, à rebus ad artes profanas spectantibus. In his nihil interest, an interdum defecerit, imperitique deprehendantur. At in illa præcipua Scientia eximii fuere, ideoque veneratione ac laude digni. Allegorica sacrarum Literarum interpretationes non vituperanda apud sanctos Patres, & quando utiles illa aut inutiles sint. Phereponi artes, ut Augustinum deprimat. Lumen à Cælo rogandum, ut veritas capiatur, errores evitentur. Hebraica Lingua peritia an & ubi necessaria Theologia cultoribus. Drusii & Grotii exempla Catholica Religioni veritatem confirmant.

544

XVII. An loquentibus de divinis rebus novas voces adhibere liceat, ac licuerit. Necesse compulsi Ecclesia Patres tot quaestiones pertractarunt, ut ab Hæreticorum technis ac erroribus Catholicam veritatem liberarent. Injusta criminatio Phereponi contra Augustinum tribuentem Monica matri sua quadam in Libris de Ordine. Iidem Libri à Pherepono nullo jure contempti. Ad Ordinem politicum spectat in Urbibus tollerare Meretrices, ne pejora mala subsequantur. A Fanatismo ac Enthusiasmo quàm longè absuerit Augustinus. Quibusdam hominibus non necessarii Codices sacra Scripturae Sapientie Liber cur Salomoni adscriptus, & nihilominus Canonicus reputatus. Augustinus de Gothis agens in vastationes Urbis nihil dissimulavit. Alia Phereponi tela in sanctum Augustinum repulsa.

557.

F I N I S,



*Approbatio Regii Censoris.*

**E**X Mandato Illustriſſimi Gallia Cancellarii,  
Ego ſacrae Facultatis Pariſienſis Doctor Theolo-  
gus, ac librorum Cenſor Regius, legi & exploravi dili-  
genter libros tres ſub nomine *Lamindi Pritanii de Inge-  
niorum moderatione in Religionis negotio, ubi quae jura, quae  
frana futura ſint homini Chriſtiano in inquirenda & traden-  
da veritate, ostenditur; & ſanctus Auguſtinus vindicatur à  
multiplici cenſura Joannis Phereponi*: Opus, meo quidem  
judicio, eximium ac multum utilitate multiplici com-  
mendandum; in quo ſuſpexerint æqui omnes rerum æ-  
ſtimatores literariſſimi & candidiſſimi Scriptoris ſince-  
rum veritatis ac Religionis amorem, variam & ſummam  
eruditionem cum modetiâ ſummâ, gravem ſermonis e-  
legantiam, lucidum rerum tractandarum ordinem, me-  
ditatam in tradendis ſcribendi, ut par eſt & incumbit  
hominibus chriſtianis, legibus ſapientiam, exquisitæ &  
temperatæ Criticæ ſpecimen, & exemplum omnibus  
probandum, nervosæ Cenſuræ laudabilem æquitatem  
adverſus Cenſorem iniquum, & Criticum non ſatis  
temperantem, &c. Quapropter luce & laude publicâ  
digniſſimum mihi videtur. Datum Pariſiis, die decimâ-  
nonâ Junii 1713.

ANQUETIL.



D E  
INGENIORUM  
MODERATIONE  
IN RELIGIONIS  
NEGOTIO.  
LIBER PRIMUS.

---

CAPUT I.

*Veri & Boni præstantissima natura. Nullum Verum est, quod  
querere suapte naturâ non liceat, & discere non sit hone-  
stum. Quæ sententia ab objectionibus liberatur, & sancti  
Augustini auctoritate firmatur. Veritatum duplex genus:  
alterum scientiam, alterum persuasionem parit. Ordo  
quidam inter veritates. Quæ potissimum ad Religionem  
spectant, investiganda.*

**D**E Vero ac veritate locuturis in hoc opere,  
nulla nobis erit quæstio de veritate illa,  
quæ inter morum virtutes connumerata,  
justitiæ in hominum commercio retinen-  
dæ plurimum conducit: Veraçitatem pec-  
culiari & commodiori nomine appella-  
mus; cæque sita est in concordia enuntiationis externæ  
cum interno judicio nostro, nempe cum lingua menti re-  
sponderet, & fallere nolumus alios, quamvis fortasse nos in-  
scii

scii vel judicando, vel loquendo fallamur. Aliorum sit de hujusmodi virtute disputare. Nos illius usum retinentes, de vero agimus, sive de veritate, quæ rebus ipsis inest, & Philosophiæ, Theologiæ, Eruditionis, aliarumque Scientiarum & Artium est scopus. Atque de isto vero, cujus ditio latissimè patet, ità hìc agendum est nobis, ut omìssis supervacaneis utiliora solùm ac necessaria tractentur. Erit igitur nobis ista divisio. Primò investigabimus, quæ futura sint jura & frena quærentibus verum; tum quæ tradentibus, sive alios veritatem docentibus.

Quærere autem verum alicujus rei, nihil aliud est ex eruditorum sententia, quàm utrùm, & qualis aliqua res sit, investigare. Verum invenire, nihil itidem aliud est, quàm utrùm, & qualis sit aliqua res, deprehendere. Quorum quidam primum nobis ratione utentibus unicè consentaneum est, alterum verò planè jucundum. Imò tota ratio beatæ vitæ ac felicitatis, ad quam à natura instituti, volentes nolentèsq; contendimus, & per solam Christianam Fidem per venire possumus, in cognitione veri, atque amore boni consistit. Bonum enim & verum in Deo veluti in suo centro existunt, sive ut congruentiùs loquamur, Deus est ipsa veritas ac bonitas, quippe de ipso ait: *Ego sum via, veritas, & vita*, Joan xiv. 6. Cùm autem æterna Dei clementia mundum condere voluerit, hominèmq; constituere tam admirabilis operæ spectatorem, verum quoque, & bonum, effudit in cunctas creaturas, ut quidquid esset, verum esset; & quidquid verum esset, saltem quatenus est verum, bonum etiam esset. Deinde humanos animos stimulis ingenitis ad quærendum verum & bonum incitavit: ac proinde quemadmodum in illud motu perpetuo intellectus fertur, ità & in istud humana voluntas. Hinc Tullius lib. 1. Tuscul Quæst. *Inest, inquit, mentibus nostris insatiabilis quadam cupiditas veri videndi; & lib. 1. Offic. In primis est hominis propria veri inquisitio atque investigatio.* Quod cùm invenire nobis contingit secundùm regulas à Christiana Fide præscriptas, tunc in terris felicitatem illam nobis inchoamus, quæ summa perfectà, atque æternùm duratura aliquando speratur in cœlis.

Inquirendum igitur esse verum, & natura suadet, & ratio docet. Nullum autem verum esse arbitror in tanta varietate humanarum divinarumq; rerum, quod generatim loquendo quærere nobis non liceat, & invenire non sit honestum. Paradoxum id primâ fronte nonnullis fortè videatur animo volventibus, quæ & quanta mala passim  
fluant

## IN RELIGIONIS NEGOTIO. Lib. I.

fluant è notitia quâundam veritatum. Sed non secus statuendum ostendit veritatis ipsius natura. Nani quodcumque verum est, si mente percipiatur, intelligentiam vel scientiam parit in nobis, animûmque nostrum, luce suâ modò parum, modò multum, sed semper aliquântulum, illustrat: quod certè homini semper est optimum. Et quis amabo neget, ignorantiam inter mala perniciofa referendam? At istud malum, cuius nemo est expers, ab una intelligentia ac scientia depellitur, hoc est à veri cognitione. Promde necesse est, veritas ejusque possessio, bona sint maximè expetenda. Et sanè quando nobis contingunt, ad sapientiam instruunt animum, propiorésque nos faciunt (quantûm licet post tantam primi parentis rûinam) illi beatissimæ conditioni & mentis vivacitati, quam & nos consecuturi fuissèmus, nisi unus ille peccasset. Quod etia n evidentiùs elucet ex eorum beatitate, quos cœlo Deus donavit. Quidquid enim mortalium genus intellectu consequi frustra cupit, immortalibus iis spiritibus apertum est in Deo; beatamque illorum sortem mirum in modum augeat ac perficit. Neque miseræ, ut est apud nos, ignorantia, ullus esse aut excogitari locus potest in tranquillissimo illo scientiæ & veritatis Regno.

Non defuturos tamen puto, qui hac in re hæsitent, nobisque occurrant his fortasse rationibus. Bona quoque sunt omnia, quæ sunt; & boni amor non Deo solum naturalis, sed etiam homini ipsi est insitus, nostramque potissimum in æternæ vitæ felicitatem constituet. Nihilominus multa sunt delectabilia, atque utilia bona, quæ amare homini in terris sit nefas, & fugere atque execrari honestissimum. Vicissim igitur veritates occurrere possunt, imò etiam occurrunt, rectis probèque instructis mentibus omninò evitandæ, utpote quæ nihil aliud, si percipiantur, adferre possint, quàm perniciem animis ad sublimiora tendentibus. Et cui, quæso, tam parum cordi sit pudor, ut honestum censeat, tot vera facta, ac probra discere, quæ umquam peregit ingeniosissima in vitiis hominum quorundam luxuria? Malè procul dubio secum ageret, qui facultate oblatâ noscendi, quæcunque in secessu Capreenti abs Tiberio Cæsare perpetrata fuerunt, menti suæ committere vellet, neque avversaretur noscere *sellariam sedem arcanarum libidinum*, ut Suetonii verbis utar, & *monstruosos concubitus à spintriis* excogitados, & omne genus libidinis, in quod se effudit impurissimus ille Princeps. Non esset hoc illustrare, sed sedare legentis intellectum, & quisq; bonus

## 4 DE INGENIORUM MODERATIONE

nefandæ hujus veritatis potius ignorantiam quam scientiam sibi optet. Ad hæc, multa quidem mendacia, & fallaciæ innumeræ, sed aliquæ tamen fortassis veritates in magica arte veneficiorum cantionumque magistra habentur. Eas verò discere, imò vel attingere, justissimis legibus ventantur homines: quod & de aliis hujusmodi rebus dicendum succurrit. Itaque nihil minus verum videatur, quàm quòd nulla sit veritas, ad cujus inquisitionem convertere animum, ad cujus inventionem lætari nobis non liceat.

Sed hic distinguamus oportet jura veri & boni, quantum spectat ad humanam naturam, & ad honestæ felicitatis consecutionem. Veri commercium cum solo intellectu nostro esse potest; boni verò cum voluntate, ut cum Peripateticis loquar. Ejus natura poscit, ut intelligatur; istius, ut ametur. Et quanquam intelligamus ipsum bonum, tunc etiam non aliud, quàm verum intelligimus, h. e. animo percipimus veritatem alicujus rei, prout verè est aut honesta, aut utilis, aut delectabilis. Rursus amamus verum, sed illud amamus sub specie boni, & prout bonum est. Cùm igitur naturale sit homini verum intelligere, & bonum appetere, seu amare, nullum est verum, quod noscere; nullum est bonum, quod amare ex natura sua nobis non liceat. Sed postquam in calamitatem maximam, quam nemo non sentit, conjecta est hominis natura, tum factum est, ut duo turbarent, perverterentque sæpius nobilem cursum intellectus & voluntatis nostræ. Ista duo sunt, falsum & malum, quorum uno intellectus, ut ita dicam, corrumpitur, ac læditur, altero voluntas. E falso in intellectum error manat, cùm nempe vera pro falsis, falsa pro veris accipimus, & credimus. E malo in voluntatem profluit peccatum, cùm videlicet bonum tanquam malum fugimus, malum verò tanquam bonum amplectimur, & amamus. At sicuti affirmare cogimur, cum noticia veri nunquam mentis adesse errorem, ita nihil dubitandum est, quin & inde abesse possit voluntatis peccatum. Nam quando alicujus malæ, ac inhonestæ rei veritatem discimus, non continuò malum eligimus, sive diligimus; sed illius rei veritatem, ejusque veritatis cognitionem amare in nobis possumus, simulque rei malitiam, deformitatem, ac vitiositatem voluntate aversari & odisse in aliis. Quare non ex natura sua verum nocere potest, sed ex pravitate tantum hominis bono abutentis; atque eâ ratione, & nos concedimus, esse posse quasdam circumstantias, quibus positæ nefas sit homini quasdam veritates perquirere, cum



cum videlicet istæ in pravum finem perquiruntur, aut verisimile periculum subest, ne infirmitatem animi discen-  
tis percepta veritas ad malum trahat, aut etiam sollicitet.  
Ita & bona sunt, quæ positis quibusdam circumstantiis  
malè ab homine eliguntur, & rectè à ratione vetantur. At  
id non accidit, quod verum & bonum mala unquam sine  
ex natura sua, sed quod concupiscentia nostra iisdem ab-  
uti possit, aut abutatur contra ordinem à Deo constitu-  
tum, & à ratione, libiisque nobis significatum.

Nihil est ergo, quod libidinosa voluptatis flagitia in  
medium advocemus, ut ex eorum foedissimo aspectu ve-  
ritatem interdum sordere ostendamus. Certè ista curio-  
sè rimari aut periculum, aut crimen erit. At ne in istis  
quidem mala dicenda est spectata in se veritas, quæ sem-  
per honesta, semperque utilis esse potest, five sit, & co-  
gnoscat in vitiis, & ab iis fugiamus, five in rectis operi-  
bus, ut ad ea imitanda festinemus. Quippe in his, uti & in  
cognitione cuiusque aliûs rei nefariæ flagitiosæque, duo  
attendenda sunt, verum, & malum. Istud, quia voluntati  
perniciosum, perpetuè abhorrendum, nobisque evitan-  
dum: illud, quia erudiendo intellectum scientiam parit,  
namquam, si spectetur in se, improbandum. Quanquam  
igitur nemini auctor sim, ut sine discrimine & moderatio-  
ne in cuiuscumque veri inquisitionem incumbat, attamen  
affirmandum reor, quidquid mali nonnunquam impor-  
tat cognita veritas, non veri naturæ optimæ tribuendum  
esse, sed corruptioni humanæ naturæ, quæ sibi parum ca-  
veris medicinas in venena convertit. Idque exemplis eti-  
am constat. Nam si libidinis, quam de nobis opposuimus,  
arcana cognoscere nefas esset, ratioque interdiceret, pessimè  
profectò de nobis mererentur, gravemque honestis  
legibus inferrent injuriam, qui disciplinam morum pro-  
secuti, Latinis literis tot experimenta luxuriæ consignâ-  
runt, omniumque vitiorum, ut ita dicam, latebras excu-  
sare. Deinde sibi malè prospicerent, quicumque Catho-  
lico in Clero aures quotidie commodant poenitenti po-  
pulo suacrimina accusanti. Ingenti demum periculo ob-  
noxium foret eorum munus, qui magicis artibus, aliisque  
criminibus evertendis præsumunt; neque enim fieri potest,  
quin plurimum scelerum veritatem discant, dum damnant.  
Sunt quidem, quibus non satis probatur institutum & ze-  
lus Theologorum quorundam proferentium in lucem  
tot probra luxuriæ, cum in eorum libris non improbi-  
minus ad malum, quam probi erudiantur ad bonum. Sed

ad propositum nostrum scire hoc sufficit alia utique esse discendi veri, alia tradendi jura. At certè Sacerdotes & Magistratus in Ecclesia Dei constitutos ad audiendas piorum Christianorum confessiones, & ad eliminandas magicas artes, aliàque populorum flagitia, nemo sanæ mentis infimilet eo nomine, quod veritates quasdam ediscant, quas ignorare præstet, quàm scire. Discunt ii medicorum more vulnera & vitia, quæ in aliis sanent, in se non admittant; & dum alienæ profunt voluntati, non metuunt suæ.

Quæ hætenus deduximus ad commendandam veritatis indolem, semper in se honestam, & nostræ solùm vitii interdum perniciosam, multorum auctoritate confirmari possunt. Unus tamen instar omnium erit mihi Sanctus Augustinus. Quærit ille Cap. 1. lib. 1. de lib. Arb. num quid mali esse possit disciplina, seu discere, quod discipulorum est, uti Magistrorum doctrina, siue docere. *Quis audeat, respondet Evodius, dicere malam esse disciplinam? Mibi bonum videtur.* Cui Augustinus: *Benè sanè, siquidem scientia per illam datur aut excitatur; nec quisquam nisi per disciplinam aliquid discit.* Ubi verò addidit, se arbitrari, nulla mala, immò nihil nisi bonum, per disciplinam percipi, frustra quærendum ait, à quo malè facere discamus; siquidem non discuntur mala; aut si discuntur, vitanda, non facienda discuntur. Cùm tamen Evodius dubitare videretur, aliam esse disciplinam, per quam benè facere, aliam, per quam malè facere discamus; *Saltem, inquit Augustinus, intelligentiam non nisi bonam putas.* Istam planè, reponit Evodius, ita bonam puto, ut non videam, quid in homine possit esse præstantius, nec ullo modo dixerim aliquam intelligentiam malam esse posse. Hinc Augustinus dicere pergit: *Si ergo omnis intelligentia bona est, nec quisquam, qui non intelligit, discit, omnis, qui discit, benè facit; omnis enim, qui discit, intelligit; & omnis, qui intelligit, benè facit.* Dum autem intelligentiam quamlibet Augustinus laudat, utique intelligentiam, disciplinamque veri significat; neque enim falsum disci intelligi proprie dicitur. Itaque perspectâ institutione naturæ ambigendum non est, quin generaliter loquendo liceat homini verum quodvis in dagare, sibi quæ etiam de illius inventionem gratulari, dummodò altè in animis nostris hæreat semper effatum istud: *Bonum quidem esse omnia scire, sed non omnibus uti; & veritatum earum non esse nobis curiosè comparandam notitiam, quæ illustrare quidem intellectum possint, sed voluntati perversæ faces simul ministrare ad flagitia.*

Nunc progrediamur. Amplissima boni veri familia in quamplurimas classes dividitur. Nos cæteris divisionibus dimissis, & de solo vero loquentes, veritatem nunc dividimus in duas acies. Siquidem altera est veritas, quæ scitur; altera, quæ creditur. Priorem in nos immittit accuratus usus externorum sensuum, ubi ad eorum fidem accedat examen, atque consensus rationis, aut quando illam ipsa ratio detegit, adhibitis in consilium & præsidium artibus, omnibusque Logices & Scientiarum documentis. Alterius veritatis, quæ creditur, compotes nos faciunt probabiles & verisimiles rationes, aliena auctoritas, seu famæ traditio non temeraria, ad nos transiens per Historias germanas, per majores & æquales nostros fide dignos, perq; alia humani commercii subsidia. Ut autem posterioris hujus veritatis notitia solet appellari persuasio, cujus tamen interdum ejusmodi est vis ac pondus, ut firmitatem assensumq; in intellectu non minorem, quam altera obtineat & exigit; ita prioris veritatis cognitio strictiore vocabulo scientia nuncupatur. Nihil enim moramur, quid Arcefilas, quid Carneades, & Pyrrho cum toto Scepticorum, Academicorumq; grege obloquantur, qui cum cæterorum Philosophorum cautissimi esse vellent, aut videri affectarent, omnium ineptissimi evaserunt, pejora deliria amplexi; nam sublata protervè omni scientiâ, ne hoc quidem, quod certè par erat, fateri cum Socrate amârunt, se hoc unum scire, quod nihil scirent. Horum sententiam & tempus exarmavit, & ratio recta dudum confecit, nostrisque præcipuè temporibus ridendam exhibent tot artes, disciplinæque latæ regnantes. Et sanè, ut cum Lactantio loquar lib. 3. c. 6, div. Inst. *Nos omnia scire non possumus, quod est Dei; at neque omnia nescire, quod pecudis. Est aliquid medium, quod est hominis, id est scientia cum ignoratione conjuncta & temperata.* Illud quidem, sed non sine dolore, fatendum est, in comparatione ignorantia perquam curtam fuisse, semperque fore, hominibus suppellectilem scientiæ. Quemadmodum enim honesta bona, quæ amanda sunt nobis, facile noscuntur, difficile amantur; ita & verum, quod noscendum, sciendumque nobis esset, facile ab omnibus appetitur, ac amatur, at difficile invenitur, & noscitur. Nihilominus multas veritates hinc intelligi & sciri, nemo nisi inverecundæ frontis neget, nisi mentis infirmæ non sentiat. Latius longiùsque etiam patet earum veritatum campus, quas non scimus quidem, sed credimus, opinione scilicet, non scientiâ ducti. Medium verò inter persuasionem, & scientiam,

### 3 DE INGENIORUM MODERATIONE

tenere locum, & cum utraque participare videtur fides, quæ Religionis veræ firma persuasio est. Accedit ista ad prioris naturam, robore verò vel ipsam superat scientiam, quippe è coelo delapsa, divinæque auctoritate nixa, animos hominum beatissimè allicit & vincit, ibique tali insidere vi solet, qualem nulla hominum violentia, nullus mortis terror vincere aut infirmare deinceps possit. Ut verò in dilectione bonorum, ita etiam inter tam diversas veritates hic ordo constitutus est, ut infimum pretium, & locum obtineant, quæ ad corpus pertinent infra nos positum; medium, quæ ad rationalem animam; supremum verò, quæ ad beatam immortalitatem animæ corporisque olim resurrecturi spectant. Et cum nihil sine ordine aut pulchrum, aut perfectum esse possit, tum præceptis suis Deus conditor, tum ratio magistra, & natura nutrix internâ pulsatione nos ad hunc ordinem in veritatis investigatione servandum quotidie impellunt atque hortantur. Nempe ante omnia, ut in Evangelio præcipitur, *quærendum est Regnum Dei*. ad quod studium refertur in primis veritatum illarum inquisitio & cognitio, quibus ad regnandum cum Deo aptissimi efficitur. Deinde eruditio animi, scientiarum splendor, atque humana sapientia præ cæteris diligenda atque æstimanda sunt, ne qui ratione bestias superamus, miserabili ignorantia nos ad illarum conditionem demittamus. Postremò comparandæ veritates, per quas corporeæ vitæ creari possit incolumitas, ornamentum, atque honesta voluptas. Sed quota pars hominum est, queis eximius iste ordo servetur? Eorum plerique toti sunt in inquirendis infinis veritatibus, nihilque solliciti de illustrando benèque informando per sapientiam animo, totam felicitatis rationem collocasse videntur in scientia & usu voluptatis corporeæ, commodisque terrenæ vitæ. Alii verò ita se quibusdam scientiis, disciplinisque liberalibus tradunt, atque ita iniis habitant, ut, si non contemnere, at oblivisci certè videantur potissimum humanæ vitæ negotium. Si Græcarum, Romanarumve Antiquitatum peritos, si humani Juris, aut Physicæ, aut Geometriæ se scientissimos, si in mitioribus literis se ingeniosos, & in disputationibus acutos efficere & prodere possunt: tum sibi mirificè plaudunt, facileque seponunt omne studium veritatum illarum, quarum scientia, & meditatio probos in hac vita, beatissimos in altera homines facit. Ab utrisque igitur peccatur, non propterea, quòd infimis aut mediis veritatibus dent operam,

(verum

(verum enim discere ex sua natura malū non esse jam constituimus) sed quod in sumis quoq; addiscendis, & contemplandis, parem, siue maiorem non ponunt operam, ordinemque divinitus constitutum aut tantā socioriā posthabent, aut tantā ambitione evertunt. Hinc Aug. in lib. de util. credendi, cap. 11. *Intelligere, inquit, semper sine vitio est. Intelligere magna, & honesta, vel etiam divina, beatissimum est. Intelligere autem superflua, nihil nocet, sed fortasse discere nocuit, cum tempus necessariorum occuparent.*

In tanta ergo veritatum copia distinguendæ præsertim sunt delectabiles à necessariis. Nam delectabilium quidem veritatum ignorantia laude sæpè careat, nunquam culpa censeatur; ignorare verò necessarias veritates, non culpæ tantum datur, sed etiam in maximas misérias hominem devolvere solet. Quare à nemine prudente vituperabitur, qui canendi, pingendive, ciborumque apiciā industria parandorum scientiam negligat, tametsi multa inde corpori obvenire possit delectatio; contra verò desipere dicatur quodammodo, qui quid corpori noceat, quid valetudini sit necessarium, quæve pericula imminuant, planè ignoret, & discere nolit. Quis non sentit, quantopere corporis nostri curam nobis natura commendet? Ejus profectò societatem odisse, & sine gravi consilio, aut sine veræ fidei virtutisque conservandæ causâ, nos ab ipso liberare, infirmi nimium & aberrantis animi est, legibusque adversatur à Deo, atque à natura positis. Simili ratione vitio nobis nequaquam vertatur, si à Mathematicis Disciplinis, si ab Artibus liberalibus, si ab Historiæ prophanz, Physicæque studio abstinemus, quamvis ingentium delectatione hisce adminiculis excolatur animus, & amplificetur rationis regnum. Et contrà nemo nos excusatos habeat, ubi ignoremus, & cognoscere nolimus; quæ officia, quæ virtutes, qui mores exigantur à legibus, tum ad prudenter honesteque vivendum, tum ad continendam societatem humanam. Ex quo enim nos natura fecit, non bruta, sed ratione utentia animalia, neque solitarios esse voluit, sed propinquis, amicis, civibus, cæterisque mortalibus per domos, per urbes, per diversa jura & commercia conjunxit: tunc imposita nobis necessitas ea noscendi atque intelligendi, quæ honestatem vitæ alant, quæ prudentiam adferant, quæ nos in omni officiorū genere peritos expeditosque efficiant.

Nihil autem hominibus magis futurum est cordi, quam ea perspecta habere, quibus erudimur in veri Dei reli-

gione. Ad beatam æternitatem nos perducere potest una religio, nimirum credere, quæ de Deo credenda sunt, & Deum colere ac amare eo cultu & amore, quem ipse nobis præscripsit. Itaque cum religio vera, tum singulæ istius religionis veritates præ omnibus inquirendæ sunt nobis, inter quas tamen aliæ necessariae, aliæ utiles tantum & delectabiles. In comparatione istius veritatis quidquid splendoris, quidquid utilitatis in humanarum disciplinarum curriculo habetur, inane est, & flocci faciendum, ut non injuriâ insipientissimos omnium & infelicissimos appelles tot veteres Philosophos ac Sapientes, quos æterna quidem fama nobis commendavit, ignorata autem sive contempta religio vera abjectissimos in oculis Dei constituit. Quod sit tantum est religionis negotium, ut cætera præ illo negligenda, & posthabenda videantur, dubium non est, quin omnem ad illius veritatem assequendam convertere debeamus cogitationem & curam, atque aded sit enitendum, ut ne cum totam literis & veritatis inquisitioni vitam dederimus, id unum adhuc nobis restet ediscendum, quod unice scire juvat, & probè tenere necesse est. Atque hoc quidem nobis de veritate scribere volentibus in primis ante oculos erit. Nam religionem veram, aut quod illam satis non inquirent, atque aded ex inertia, ignorare solent homines innumeri; aut quod nimium inquirent, & ingenii ambitione in transversum agantur, perdere interdum possunt. Quid itaque juris habeat, & quos fines habitura hinc sit humanorum ingeniorum meditatio, in posterum differetur; & si quid proditum fuerit, quo non solum ad necessarias religionis veritates credendas, sed etiam ad reliquas ejusdem utiles & delectabiles veritates eruditè pertractandas, tutior ac planior via demonstretur: neque nos suscepti laboris, neque alios lectionis adhibitz fortasse poenitebit.



## CAPUT II.

*Ut Religio vera noscatur, an à dubitatione sit instituendum iter. Dubitandi necessitas, ut error evitetur, & pericula, ne veritas amittatur. Prudens dubitatio commendata, temeraria verò repudianda.*

**A** Peruimus amplissimum campum humanis ingeniis, cum nullum esse verum diximus, quod honestum ex sui natura non sit investigare & cognoscere, simulque posuimus, verum, quod ad Religionem pertinet, non honestè solum posse queri, sed necessariò querendum, sciendumque esse. Quod si querere veram religionem oportet, consequens est etiam, ut adhibere liceat ac oporteat rationem querendi omnium aptissimam, per quam quæsitæ inveniuntur. Jamque nonnulli accedunt, quibus nulla fortasse opportunior occurrat ratio, quam à dubitatione instituere inquisitionis iter. Quo enim modo veram religionem querere, & assequi possint homines, nisi primum dubitare incipiant, utrum religioni veræ nomen jam dederint, an in errore versentur, & dubitando investigent, inter tam varias à populis usurpatas religiones quænam sit falsa, quænam sit vera religio? Et ista sanè inquirendæ veritatis ratio, quæ mens humana omnibus anteceptis opinionibus valedicens, nulli rei, nisi perspicuis argumentis probatæ assentitur, à Socrate manavit, & ab Academicis, aliisque Philosophis summopere laudata, proximèque præcepto sæculo à Cartesio potissimum instaurata, ac temperata, nunc utramque recentium Philosophorum paginam implet, quippe quæ ad verum inveniendum, aut saltem ad errorem evitandum, non parum conducatur. Ex horum ergo sententia consequi videretur, nefas non esse religionem suam in dubium revocatam expendere. At aliis secus videbitur, nam ubi de religione omnibus relinquatur dubitandi facultas, mirum est, quot religioni veræ excidia creari possint, & quot erroribus janua aperiatur. Qui dubitare incipit, animoque statuit, non nisi evidentibus & perspicuis rebus assensum dare, & ubique ne fallatur timet, aut æternum de omnibus dubitaturus est, quod Scepticorum filiis accidit, aut multum quidem falsi, sed unâ cum eo multum etiam veri excindet ac repudiabit; quod ambitiosis ingeniis non sine ingenti infelicitate

plerumque contingit. Præterea quicumque in religione veratitubare cœpit, & de sua fide incertus esse, jam infidelis est, & certo bono renuntiat, ut incertum exquirat. Quæ cum ita sint, & cum unicuique persuasum sit, veram esse religionem suam, cæteras autem falsas: nemo proinde sibi licitum arbitrabitur, fidem suam in dubium revocare, bellumque erroribus indicere, quostamen convellere non possit, si religioni sibi ducat, incipere de ipsa religione dubitare.

Itaque in ipso argumenti suscepti vestibulo jam nobis gravissima impedimenta occurrunt, à quibus nisi nos expediamus, omnis progrediendi spes sublata videatur. Id autem præstitum facilius ibimus, postquam nonnulla præmiserimus utilissimæ quæstioni dirimendæ perquam necessaria. Primò igitur ex omnium consensu liquet, naturale ac universale hominibus desiderium esse, & jus evitandi erroris, aut expellendi, cum illum incautè induerint. Etenim errare, & falsum credere, ex ipsa naturæ institutione contrarium est homini, eumque in maximas, atque etiam æternas calamitates protrudere potest. Secundò dicimus, ex hoc iure aliud effluere, nempe licere cuicumque iis uti subsidiis, quæ tum ratio, ac natura, tum honestæ artes à sapientibus doctisque viris excultæ tradiderunt, ut per illa vitari, deponive possit error. Imò scientiæ artésque ipsæ nihil aliud ferè sunt, quàm huiusmodi subsidia. Ipsæ tamen artes ac scientiæ aliis indigent peculiaribus subsidiis, quibus se suosque cultores arctius regant. Si secus fecerint, interdum erroris, non veritatis, magistræ evadunt, & infida ad verum dignoscendum, errorémque auferendum, subsidia fiunt. Criteria veritatis nuncupamus huiusmodi peculiaris subsidia, eorumque scientiam appellare Criticam possumus, si hoc nomen latius, quàm soleat, usurpare placet. Excurrunt autem criteria per quamlibet scientiam, & artem, eorumque ope quid certum, quid probabile, quid dubium, quid fictum ac falsum sit. ubique rimatur, & non rarò cognoscimus. Nimirum iis præcæntibus, sollicitoque examine singula pensantibus, & secermentibus, sæpè discimus, quos errores invexerit, & invehat aut perversa ratiocinatio, aut vis præjudicatæ opinionis, & imperium affectuum in nobis regnantium, aut nimium erga antiquitatem obsequium, nimiumve recentiorum temporum amor, aut immodica fides habita nostris sensibus, Præceptoribus, Majoribus, Historiis, aliisque humanæ vitæ fallacibus documentis. Dicam uno  
ver-



verbo: faciunt hujusmodi præsidia, ne temerè credamus, ne falsa aut dubia pro veris aut certis, certa & vera pro dubiis & falsis habeamus. Quocirca cùm & ratio prodiderit, & sapientissimi viri passim commendent, ac adhibeant horum subsidiorum apparatus in insectatione erroris, & inquisitione veritatis: neque dubitari, quin rectus illorum usus cùm maximè honestus ac utilis, tum etiam interdum necessarius sit omnibus, errorem fugere, & verum assequi optantibus.

Tertiò, inutilia planè forent ista ad errorem evitandum ejiciendùmque subsidia, si de rebus ac sententiis, in quibus verum exquirimus, dubitare prius nequaquam liceat. Imò nullius errandi finis, nulla veritatis hauriendæ spes erit, ubi nefas sit in dubium vocare & expendere tot opiniones, rerùmque notiones, per cogitationem, aut per sensus corporeos in phantasiâ, animùmque nostrum immisissas; quarum tamen complures vel falsæ, vel parum firmæ deprehenderentur, quoties de iis dubitare, easque ad criteria opportuna exigere vellemus, atque possemus. Igitur ad ipsius naturæ, errorem ubique refugientis, principia & jura pertinet, posse de propositis, aut animo jam perceptis sine prævia consideratione rebus, primùm sibi dubitationem aliquam movere, tum laudata adhibere subsidia, ne fallamur, neve in antiquo errore diutius perstemus.

Quartò, præter hæc insita homini jura, insitæ etiam sunt quædam leges, quas nemo sciens sine culpa levi aut gravi; nemo inscius sine magna aut aliqua saltem infelicitate violare potest. Nam sicuti institutioni rectæ rationis convenit, ut quisque contendat ab errore, aut falsitate sibi cavere, ita & eidem rationi repugnat, ut homo veritati renuntiet, noceat, atque obsistat. Quapropter qui unice de fugiendo errore sollicitus est, tantùmque hujusmodi studio insistit, ut veritati ipsi fidem adjungere neget, aut illam sibi insectandamumat, ubique fallaciam sibi metuens: aliâ quidem viâ impingit, sed tamen impingit in errorem. Dubitare autem possumus, utri miseres sint, an qui errorem contrahunt ob cautionis defectum, an qui veritatem repudiant ob ejusdem cautionis excessum. Id certè experientiâ constat, illis ignorantiam veniâ aliquâ dignam, istis intolerandam superbiam hujusmodi mala plerumque creare.

Quintò, si igitur à recta ratione jubemur, veritatem non impugnare neque perdere, sed ejus præstantissimum recipere & custodire lumen, necesse quoque erit eam adhibere

hibere curam, eisque uti subsidiis, quæ nos à lædendi & respuendi veri periculo avertant; & contra singulis, quantum per nos licet, renuntiare impedimentis, quæ remorentur in regione veri progressum nostrum. Neque ista lex juribus dubitandi supra constitutis opponitur, sed cum iis consentit, modò intra æquos limites, ratione præeunte, contineatur illorum usus. Jam enim peccant, aut miseri sunt, qui nimium dubitationi se tradunt, quàm qui nimis facile credunt, utrique nimio aut erroris fugiendi desiderio, aut veritatis improbandæ timore abrepti. Ipsamet subsidia, & criteria veri, per quæ diximus errores ab humanis mentibus arceri, nisi utentibus adsit prudentia cum humilitate conjuncta, non minùs ad errores evitendos, quàm ad ipsum verum sejiendum, inservire possunt. Quare opus est, ut dubitandi jura, in effrenem audaciam interdum assurgentia, perpetuò temperet alia comes dubitatio ac timor, ne scilicet unà cum erroribus veritatem ipsam incautè excindamus. Quæ autem sint impedimenta, ne verum perspiciatur, quæ subsidia ut percipiat, nos infra, quantum ad rem nostram pertinet, ostendere conabimur.

Interim ex his legibus sequitur, commendari à recta ratione prudentem dubitationem. improbari vero temerariam. Neque enim propterea quod nobis natura dubitandi jus dederit, ut falsum declinemus, verumque assequamur, ideo sine discrimine cuiumque, & de quibuscumque rebus, dubitari fas est. Certis quibusdam terminis omnia naturæ jura coërcentur, ultra quos excedere peccare est in ipsum naturæ conditorem. Sic humanorum affectuum innata jura suos habent fines, modumque suum. Nihil etiam efficacius natura nobis commendat, quàm amorem usumque virtutum; sed ejusdem naturæ documentis prohibemur lædere ordinem limitésque virtutibus positos. Una prudentia tum affectuum tum virtutum omnium dux & moderatrix futura est. Ejusdem consilio & imperio indigent reliqua omnia, sed potissimum dubitationis jura, ut rectus, non pravus, fiat inter homines illius usus.

Quamquam verò nihil difficilius occurrat, quàm constituere, quando, & cui, & quibus de rebus prudenter dubitare liceat (nam prudentia, ut ajunt Philosophi, circa particularia, quæ innumera sunt, versatur) attamen monere juvat, quasdam etiam universales haberi leges, quibus ferè semper singularia reguntur. Has inter eminet illas.

*De primis principiis per se notis , & de rebus certâ experientiâ , aut omnium hominum omnîumque temporum consensu probatis , aut evidentissimis , ne imprudenter dubitato. Tum altera : De veritate rerum, aut sententiarum, quas doctissimi viri tradunt ac probant , rudes atque omnino imperiti ne licet moveant. Certè quicumque , vel acutissimi viri ne de primis principiis quidem se certos prodidere, sæpè temeratis, raro prudentiæ famant sibi compararunt. Quis autem rationis compos prudenter dubitet, an vivat, an cogitet, an edat , an loquatur , & scribat , cùm evidentissimè hæc singula sentiat? Quis dubitationem sibi prudens moveat, num aridum lignum combustibile flammis injectum comburi possit , num corpus grave, impedimentis sublatis , ex alto in imum sit ruiturum? Deinde quàm prudenter ille agat , qui tot rebus ; quas aut scientiæ atque Artes liberales tradunt , aut Historiæ à doctis viris commendatæ concorditer referunt , ipse omnium ignarus atque imperitus adungere fidem neget, earumque veritatem pro libidine sua, & sine ulla ratione, revocare velit in dubium?*

In primis verò animadvertendum est hic, duplicem esse dubitationem, alteram quidem multum, alteram parum consentaneam rationi. Utriusque differentia in fine , & causa dubitandi se prodit. Quidam enim de rebus vel evidentissimis dubitant, non quòd sibi earum rerum veritas dubia sit atque suspecta, sed ut veritatem ipsam dubitando ac disputando in meliori collocent lumine , atque ut aliis, non sibi, dubitationem eximant. Nemo sanè huiusmodi dubitationis genus improbet, imò non laudet; non enim propriè id dubitare est , sed dubitantis dumtaxat personam induere. Quapropter præstantissimis viris nunquam non licuit dubitantis specie inquirere , *utrum sit Deus , utrum vera sit Christiana Religio, & num certa, reliquæ plurium seculorum & hominum consensu stabilita sint tot primæ principia.* Quod rudibus utique licet, illud est , ut à sapientioribus referant lumen, quo & ipsi alacriores fiant in credendis altissimis abditisque rebus. Contra verò rationi adversatur illorum confidentia, qui non alium dubitando sibi finem statuunt , quàm acutissimi sui ingenii periculum facere : & tum sibi videntur cordati sapientesque viri , cùm unius suæ mentis vocem ac iudicium audiunt , aliorum contemnunt; & ad destruendum quàm ædificandum aptiores , aut nihil probant, aut id solum probant , quod animi sui appetitibus blanditur, & quod suæ tantum meditationis aciei perspicuum firmissimumque apparuit.

## CAPUT III.

*Non omnibus dubitandum de veritate sua Religionis. Ratio & Auctoritas in Religionis negotio, earumque pondus. Quærenda sunt, ut constet, an vera sit aliqua Religio. Prudenter possunt imò debent de veritate sua Religionis dubitare Ethnici, Judæi, Muhammedani. Justa apud eos dubitandi causa.*

**F**Acile nos in vastam planitiem argumentum perduceret, si animus foret singula nunc differere ad dubitationis fines modumque spectantia. Sed per brevem hanc orationis excursionem præcipua fundamenta detexisse contenti, quibus inicitur æqua dubitandi ratio, jam ad castra regrediamur. Nostra ante omnia refert, quæ semita in itinere ad religionem veram servanda sit, diligenter inquirere. Atque in primis, cum errore capi ac detineri in re tanta homo possit, imò cum satis constet, innumerabilem hominum copiam errasse, ac errare in amplectenda religione, quam plerumque non ulla ratio primum persuadet, sed educatio & parentum, populorumque exempla tenellis mentibus inspirant: dubitari non potest, quin generatim loquendo, non honestum dumtaxat, sed & necessarium sit de suæ religionis veritate sibi aliquam dubitationem movere. Et sane quæ unquam fiat, ut Muhammedanus, ut Ethnicus, ut Judæus, aliæque hujusmodi Sectarum genera, quas religioni falsæ, aut à cælo improbatæ addictas esse non tam credimus, quam dolemus, se revocare, aut per alios revocari possint à perversa opinione, inolitoque errore, si prudentis dubitationis jure uti unusquisque renuat, & piaculum arbitretur?

Prudentem autem dubitationem ideo commendamus & suademus, ne à legibus æquissimis discedatur, quibus constringuntur, ut diximus, ipsa dubitationis jura. Sed ita me Deus amet, paucos invenias, qui eadem uti aut sciant, aut velint. Ut enim quisque religioni alicui ab ineunte ætate nomen dedit, reliquas contemnere, & fallacibus ac falsis accensere, earumque cultores imprudentes ducere, unam verò suam cum ratione & veritate consentire, seque non nisi imprudenter facturum putare, si opinionem suam in periculum dubitando adducat. Restat igitur, ut ad inquirendum nostra festinet oratio, quinam in tanta religio-

num

num diversitate prudenter de sua dubitare debeant, & qui minimè debeant. Hic rei maximæ cardo vertitur; hic si sapere incipiamus, meliora quæque speranda sunt nobis, tum ad firmandos homines in veritate stantes, tum ad excitandos in errore stertentes. Cum autem religionis nomen tot gentium sectarumque superstitioni tribuimus, hoc quidem *καταχρηστικῶς*, siue abusive, facimus; una quippe non multiplex esse potest vera religio sed non sine divinarum Scripturarum exemplo facimus, apud quas falsa quoque numina sub Deorum appellatione sæpè memorantur, intacta nihilominus semper unius Dei fulgentissimâ veritate.

Dicimus ergo à dubitatione illi esse temperandum, qui suam religionem facile perspicit certissimis principiis, & fundamentis innixam. Duo autem sunt huiusmodi fundamenta, ratio, & auctoritas. Rationis nomine hoc loco intelligimus vim & lumen intellectûs ad dignoscendum verum & falsum, bonum & malum, simulque eam vim, per quam rationalis anima è certis sibi que notis præmissis certum aliquid argumentando deducens, sibi illud aut alijs persuadet. Auctoritatis vocabulo vim illam significamus, quam habet ad aliquid persuadendum alterius narratio, verbis, aut scriptis menti nostræ communicata. Quod firmiora sunt hæc fundamenta, eò fortius veritas stat illis innixa, & clariùs effulget, & faciliùs homini persuadetur. Utraque autem ad persuadendam religionem veram collateralis signis, quanquam diverso pondere, conspirant.

Vix autem negare possumus, quin humana ratio semina quædam contineat veri & boni insita ab ipsa natura, nam & nullo docente pueri sua se sentire malè facta pudore testantur, & dolent se fuisse deceptos. In primis autem huiusmodi semina deprehenduntur, dilucidèque nobis apparent, cum attenta meditatio excutit penetralia rationis, & cum optimorum librorum, eorumque hominum consuetudine utimur, qui istas veri bonique ideas, jam sibi perspectas, aut in nobis excitant latentes, aut, si ità dicere amamus, in nos immittunt peregrinas & novas. Excitatis in homine istis boni & veri seminibus ac ideis, progredi multum potest, quamvis pluribus morbis laborant, humana ratio ad naturam qualitatèsq; non visibilibus tantummodo, sed & invisibilibus rerum intelligendam. Cujus progressus tot sunt exempla, quot veterum Philosophorum meditamenta sunt litteris consignata. Nimirum solo rationis lumine ducti illi in plurima pene-

trârunt, quæ certissima esse lux melior subinde nobis patefecit.

Quantùm etiam ponderis habeat auctoritas in usu vitæ atque in aliquibus disciplinis, & in historia potissimum, nemo non sentit. Si nihil aliud credere, quàm quod ratio in se invenit, animum induceremus, magna non solum humanæ scientiæ sive eruditionis portio periret, sed etiam infinita homini, atque hominum regimini impenderent incommoda. Aliorum ergo narrationibus, & fidei, fidem habeamus oportet, nisi inter somnia computare velimus, quidquid habent libri & fama de præteritis sæculis, immo & de præsentis ævo: quod profectò non faciat, nisi verus somniator & amens. Duplex autem auctoritatis est genus. Altera à Deo est, altera ab hominibus; illa nunquam, ista sæpè ac sæpius fallax. Inter prima rationis evidentissima præcepta illud omnium consensu præcipue probatur: *Certum esse, verum & inconcussum, quidquid revelat, ac narrat prima Veritas Deus.* Etenim, ut agebat Salvianus lib. 3. *Dei sermo ipse sibi testis est, quia necesse est, quicquid incorrupta Veritas loquitur, incorruptum sit testimonium Veritatis.* Ut autem hominum est falli & fallere, decipi & decipere, ita eorum auctoritati non continuò fidendum. Sola ratio, si ve prudentia, advocatis experientiæ, & critices, & aliarum artium in suam opem documentis, feliciter ostendere potest ac solet, quando neganda, quando habenda sit fides hominum dictis. Ad ipsam quoque rationem pertinet expendere, an fallantur, aut fallant homines, cum voce aut scriptis aliquid referunt ac nuntiant tanquam à Deo revelatum & proditum; tunc enim non in Deum, qui æternum est verax, sed in hominem, qui facile vel propter ignorantiam, vel propter improbitatem, est fallax, prudens dubitatio nostra atque suspicio convertitur. Quamobrem sapientissimè Joannes Apostolus in Epist. I. 4. suis discipulis injungebat, ne cuicumque crederent divina dogmata se afferre dicenti. *Nolite, inquit, omni spiritui credere, sed probate spiritus, si ex Deo sint; quoniam multi pseudopropheta exierunt in mundum.* Præterea cum falli ac fallere possint homines in intelligenda, exponenda, interpretanda auctoritate, quam alioqui divinam meritò credant: hinc est, quòd iterum consulenda est ratio, ut percipiatur, an hic homines errent. Statuendus itaque videtur hic ordo. Primò quærendum, an rectæ rationi adversetur religio, quam quisque amplexus est. Si adversatur, planè de ipsius veritate non solum dubitandum est, sed in ipsam pro-

tinus dicenda sententia. Si nequaquam repugnat, querendum secundò est, num à Deo processerit, an verò ab hominibus tantum, hoc est, utrùm divinà, an humanà auctoritate inducta sit illa religio. Si homines solos auctores habuit, de ipsius veritate dubitandum est; sin Deum, nulla dubitatio occurrere potest, quin vera sit; siquidem divinà auctoritas supra ipsam rationem valet, atque ab omni fallaciæ suspitione immunis est. Adhuc tamen inquirendum restat, & tertio dubitandum, an quæ Deum tradidisse credimus, rectè à nobis intelligantur & exponantur: quod ubi præstiterimus, vel ratione duce, vel regulis tutioribus; si quæ sunt, à Deo præscriptis, tum prudentis erit conquiescere, ne inconsultà dubitatione nobis majoris periculi simus auctores.

His præmissis, dicimus, Ethnicos tum veteres, tum recentiores potuisse ac posse prudenter, immò etiam debuisse & debere de veritate suæ religionis movere sibi dubitationem. Vix enim secum sincero animo reputare possunt, quibus principiis nitatur inspirata sibi à teneris unguiculis opinio, quin illam evidenter nutare statim deprehendant. Non prima rationis edicta, non divina auctoritas, quæ unice firma ac certa est, iis occurrere, mentemque ab ulteriori hæitatione & inquisitione retrahere possunt; sed hinc recta ratio pluribus modis læsam se exhibet, & inde sola fallax hominum auctoritas se pròdit, cui non citò, neque inconsultè, habendam esse fidem, ratio ipsa efficacissimè clamat. Et quid quæso rationi evidentiùs adversatur, quàm plures credere Deos, atque inter se discordes; quàm debitum uni Deo cultum, in homines, in sidera, in elementa, atque in vilia aut naturæ, aut hominum opera transferre, quàm ineluctabili fato humanas voluntates subjectas opinari; quàm rationali animæ, ut quidam censuerunt, ac censent, nullam ultra corporis mortem tribuere vitam; quàm ignorantiam, libidinem, impotentiam, atque alios aut defectus, aut ipsis hominibus indigna facinora in Deo excogitare? Hæc atque alia complura in oculos meditantium faciliè incurrunt, ne de reliquis in disciplina morum vitiis loquamur, quibus Ethnicorum religio aut consentit, aut etiam laudem & præmia pollicetur. Accedit, quòd eorum opinionem non divina Auctoritas, seu prima Veritas Deus, invexit, sed aut Poetæ argutis mendaciis ludentes, aut incerta, inconstans & fallax hominum, immo & anicularum, rudisque popelli traditio,

cui certè finè ratione , finè prævio examine adjungere fidem,desipientiam potiùs,quàm insipientiam appelles. Jure itaque dubitare possunt ac debent gentes de suæ religionis veritate:quod si præstent, eamque cum Christiana demum componant,nisi rationis & prudentiæ legibus renuntietur , intelligent , hanc unam esse veram ac perfectam ; reliquas verò idolorum cultui addictas, in crassissimis atque intolerandis erroribus versari. Vel ante Christum natum id perspexere non pauci Philosophi , solum rationis lumen sectati. At nunquam id melius patuit , quàm ubi christianæ doctrinæ majestas & veritas longè latèque effulgens totum terrarum orbem permeavit,ejusque cultores,per tormenta,per ignes invicti,fortitudine suâ suaserunt , quod ratio sola persuadere poterat. Tunc enim non vi tormentorum adhibitâ ; non armorum terrore ac metu compulsi Ethnici,sed vi veritatis devicti sese Christo adjunxere,atque ii ipsi potissimum populi,qui ingenio , & litterarum culturâ cæteris præcellebant.

Quod est ad Judæos,nihil in eorum religione occurrit, quod recta ratio improbet. Traditam verò eorum legem ab ipso Deo fuisse,tot ac tanta argumenta ostendunt,consentientibus hinc Muhammedanis,inde Christianis ipsis, ut imprudenter sanè illud in controversiam adducas. Quæ sint hujusmodi argumenta à luculentis aliorum libris præstat petere , quàm hîc leviter attingere. Verùm ne his quidem contenta esse jure potest Hebræorum natio. Ulteriùs etiam progrediendum , prudentia & ratio movent. Scilicet illi dubitandum est,num rectè intelligat , atque interpretetur divinarum Scripturarum oracula ; in hoc enim contingere potest,ut imbecilla ratio fallatur.Eò autem magis Judæo suboriri hæc suspicio debet , quòd audiat,tot nobilissimas nationes,ingenio,judicio,& litterarum omnium scientiâ illustres, doctioresque sine comparatione , quàm Judaica gens , æquè saltem ac Judæi de religionis veræ negotio sollicitas , neque minorem quàm Judæi venerationem ac honorem habentes divinis Judæorum libris,concordi voce clamare , certumque habere , nostris temporibus in interpretandis atque assequendis eorum librorum sensib. quemlibet Judæum turpissimè cœcutire Quid,quod nihil in sacris litteris tam apertè reperitur,quàm venturum Messiam, idque fatentur Judæi? Nonne prudentia poscit.ut seriò inquirant,an fortè venerit,qui à tot populis non ex fama temeraria , sed ingenti rationum ac miraculorum pondere,jam venisse perhibetur?



tur? Justam dubitandi causam augere debet præsentis sortis & conditionis consideratio. Omnium abjectissima gens Prophetis, Sacerdotibus, Templo destituta, neque à paucis annis, sed fermè à septemdecim sæculis, invisa hominibus ac Deo, vix alia de causa ad tantam infelicitatem excogitari potest adducta, nisi quod Messia contempto & legibus perperam intellectis defuerit esse Dei viventis populus. Fac autem, sincero docilique animo Judæus de suæ legis intellectu dubitet, & christianæ religionis originem, documenta, rationesque sedulò expendat: Si adhuc priori in sententia persistet, neque videat tot Prophetarum oracula in Christo ejusque religione evidentissimè completa, miseræ cœcitatæ aut perviciæ notam apud cordatos prudentesque viros haudquaquam effugiet.

De Muhammedi Sectatoribus multa dicenda forent. Sed rem paucis expediemus. Difficile à Muhammedanis impetrare possis, ut dubitent, an aliquid in suis legibus occurrat rectæ rationi contrarium. Neque nos molesti peruncinatores esse nunc volumus. At cum auctoritatem divinam suæ religioni ubique prætendant, præcipueque huic argumento inhæreant: Prima prudentiæ & rectæ rationis principia prorsus exigunt, ut non temerè credant cuicumque se esse Messiam dicenti, & de lapsa è cœlo dogmata, sive scripta jactanti. Ne ipsi quidem negent, ab impostoribus cavendum esse; & saltem nullus inter eos habeatur, modò sit prudentiæ legibus imbutus, qui ad novam ab homine promulgatam religionem continuò se conferat, tametsi nihil rectæ rationi iste legislator repugnet, immo pietatem multam redolet, & quarto quoque verbo exclamet, se nuntium veritatis è cœlo demissum, nisi etiam dogmata, fidemque suam probet veris miraculis, sanctissimis moribus, oraculis præcedentibus, optimâ doctrinâ, aliisque divinæ legationis testibus signis. Gravior quoque subest dubitandi causa de Muhammedo. Ex ejus enim apertissimâ confessione cum veteris, tum novi Testamenti Scripturæ divinitus traditæ fuerunt, religionemque veram attulerant Moyses & Christus, atque istius lex & doctrina sub finem usque sæculi Æræ Christianæ Sexti (quo tempore ipse Muhammedus vivere cœpit) germana veritatis magistra fuit. Qua igitur prudentia fidem habeas statim & sine dubitatione homini abroganti, immo postea damnanti religionem suâ confessione prius optimâ atque à Deo traditam, nisi evidenter se id facere ex ipsius Dei imperio probet, lignisque certissimis se verum esse Prophetam

phetam cœlique nuntium ostendat? Certè non est, cœt diuturnius regnum sibi polliceantur Alcorani ipsius dogmata, ubi tam facili credere liceat novam è cœlo religionem se advehere solùm testanti.

Quod si convenit in Muhammedi fidem suspicio, & ratione monente in examen est advocanda auctoritas, quam ille divinam dictitabat: nullo tunc negotio, quantum quidem arbitror, de sua opinione dejicietur Muhammedanus, & singulari cum utilitate suâ vincetur, dum vinci velit. Tum, inquam, facile patebit, nullum ab impostore Muhammedo certum signum divinæ suæ legationis productum, nullum ab ipso miraculum fuisse patratum, quo novæ doctrinæ fides conciliaretur; obstat enim nonnullorum famæ ac traditioni de miraculis per Muhammedum factis evidens Alcorani, seu ipsius Pseudoprophetæ, & sapientiorum Moslemorum contraria confessio. Lectis autem sacris Judæorum & Christianorum Scripturis, palam continuò fiet, nihil minus esse verum, quàm quod affirmabat Muhammedus, se nempe, suamque doctrinam in iis libris sæpius fuisse prædicta, seque nil aliud in Alcorano docere, quàm quod Moyses & Christus tradiderant. Itidem intelligent, fieri omnino non potuisse (quod commentus est ille Impostor) ut à Judæis & Christianis divinæ literæ per totum terrarum orbem vulgatæ, & in plures linguas translatae ex industria & ex concordia at secretissimâ tot populorum conspiratione corruptæ & depravatæ fuerint, ne ea loca apparerent, quibus prænuntiabatur illius adventus atque doctrina, & quæ tamen ipse ignorasse convincitur, dum ea non recitat, recitaturus certè in suæ causæ beneficium, si illa novisset. Constabit etiam, quantum infra sanctitatem & perfectionem Christianæ legis sit Alcorani doctrina, & disciplina moralis, cum illa spiritum ubique, & ista ubique carnem sapiat; illa pacem, ista bellum suadeat; illa ad veram animorum beatitatem, hæc ad corporeas vilisquæ delicias totam fermè referat doctrinam suam. Quare nulla excogitari potest ratio, cur Deus immutatam voluerit, ut Muhammedus contendit, perfectam Christi religionem in minus perfectam, immo in admodum imperfectam, & vitiis non paucis scatentem, tum in disciplina morum, tum in dogmatis tradendis à divina sacrarum Scripturarum revelatione penitus alienis; quæ non ratione sed gladio nititur, quæ vi armorum, non suasionem veritatis inuenta & propagata est, atque etiam per vim amplificanda traditur, interdictâ omni disputatione  
de

de religionis negotio, ne qua sit via detegendæ fraudis, ne qua spes deponendi erroris. Tandem luce meridianâ clariùs apparebit, non alia de causa Muhammedum tanta fuisse commentum, nisi ut suæ libidini atque ambitioni consuleret; librûmque illum, quem ex præconcepta opinione Muhammedani divinissimum censent, innumeris iisque putidis fabulis, mendaciis, & superstitione ita abundare, ut neque Deum auctorem habuisse, neque ullam hominum fidem mereri faciliè cognoscatur, dummodo adhibeatur in consilium ratio recta, aut cum Alcorani tenebris conferatur lux Evangelii.

## CAPUT IV.

*An Christiano homini dubitandum de sua Religionis veritate.*

*Æquum id videretur, sed gravibus periculis obnoxium. Dubitatio & hic licita, & quando, & quomodo, ne fidei donum perdatur. Ratio & autoritas statuunt veritatem Christiana Religionis. Cur Christianorum vulgus acquiescere prudenter possit in religione sua, sitque ab onere dubitandi exemptum. In Ecclesia Catholica Pastoribus potissimum scientia Religionis expetita.*

**A**D Christianos demum accedamus. scrutaturi, an & ipsi prudenter de veritate suæ religionis dubitare possint, immo etiam debeant. Equidem præsentio, quorundam animos adeò delicatos esse, ut horrorem concipiant vel ex hoc solum, quod dubitem, an de re tam nobis certa sit dubitandum. Sed quæso ne patiantur se inani- bus umbris & solis nominibus terreri. Omnes imprudentem dubitationem refugimus, omnes prudentem amplectimur; nam ut à prima sibi nolle cavere, temerarii est, atque irreligiosi, ita alteram quocumque pacto rejicere atque improbare est insipientis. Quodcumque autem de proposita quæstione statuatur, negari non potest, quin multis incommodis obnoxium appareat. Si enim Christiano viro fas esse dicamus in dubitationem adducere suæ religionis veritatem: quomodo stabit illius fides? Frustra illum tam eximio dono dignatus fuerit Deus, ut sine ulla dubitatione veram crederet esse Christianam religionem. Et certè jam fidem perdidisse videtur, qui dubitare cœpit, num falsa credat an vera; atque idcirco, ut in C. J. de Hæreticis habetur, dubius in fide, Infidelis est. Periculosæ insuper plenum opus est alex

de re tanta dubitare. Quamquam enim nulla sit religio, quæ rectæ rationi præstantiâ, & sanctitate, & veritate se tantum commendet, quantum Christiana Religio: infirmitate tamen humanæ mentis contingere potest, ut qui de illa dubitare cœpit, dubitare in posterum non desinat, aut etiam iudicio deceptus & cupiditate in transversum actus, ad alterius religionis castra deficiat: quod quidem aliud non est, quam de certo bono in certum malum inconsultâ curiositate velle se præcipitem dare.

Contrà verò si de suæ religionis veritate nequaquam esse christiano homini ambigendum pronuntiemus, quàm æquo jure actum erit cum Ethnicis, Judæis, & Muhammedanis? Exigent & illi à nobis, quod nos meritò ab ipsis exigimus. Si recusabimus eo nomine, quod veritatem à nobis: ab illis errorem stare, certò cognoscimus: iisdem verbis se à nobis expedient, quoties iis esse de sua religione dubitandum indicimus. Aut etiam repōnent: certi equidem esse potestis, omnes vos Christiani, de fide illa, hoc est persuasionē, qua veram esse religionem vestram creditis; at certi esse non potestis omnes religionem istam verè esse, qualem vos creditis, nisi prius illam cum reliquis religionibus composueritis, vobisque constet, eam à ratione minimè abhorrere, atque insuper auctoritate divina fuisse constitutam. Et cur tantum vobis à dubitatione timetis, si tam firma est ac aperta religionis vestræ veritas? Illi paveant, qui in errore versantur, eoquē stultitiæ devenerunt, ut grave ducant, se ab erroris servitute liberari, & ad regnum veritatis perducī.

Ut isti controversiæ fiat satis, simulque investigandi veri jura servantur atque avertantur perdendi pericula, memoria repetendum est, quod præcedenti Capite disseruimus; nempe rudes atque ignaros dubitare non debere de veritate rerum, quas doctissimi & sapientissimī viri semper tradiderunt ac tradunt. Secundò posse quemlibet honesto fine sibi dubitationem creare vel de evidentissimis rebus, non quòd earum veritatem suspectam habeat, sed ut earum causas & rationes & veritatem clariùs respiciat. Hoc autē nō doctis solum & ingeniosis hominibus, sed & imperitis ac rudibus facere licet, modò primi ingeniū contineant intra limites concordī prudentū consilio statutos, reliqui verò ad fideles sapientesque Magistros dubitationem suam conferant, seq; illis erudiendos tradant Licitum inquam est aliquo, modo dubitare seu per-

perscrutari, quàm firmè rationis atque auctoritatis principiiis innitatur sua lex, dummodo id homines præstent, intellectus sui illustrandi gratiâ, atque dum id præstant, à se certitudinem illam nondum rejiciant, quam de legis ipsius veritate ante conceperant, & dummodo instrumenta ad rectè judicandum necessaria in id opus adhibeant. Ità fiet, ut nobilissimum fidei donum, quo à Deo per sacrum Baptisma donantur Christiani, vel in ipsa dubitationis specie servetur intactum, & Christianæ Religionis veritas magis eluceat, & fortiùs confirmetur in hominum mentibus.

Neque dicant Ethnicì, aut Judæi, aut Muhammedani, levia nos à nostris petere, postquam gravia ab ipsis petierimus. Volumus æquis rationibus cum illis agere: non alium in finem, non aliis conditionibus eos de sua religione dubitare volumus, quàm dubitaturi sint Christiani. Nam vel ex hujusmodi cauta dubitandi forma, certum nobis est, consecuturos esse contrarios quidem, sed optimos effectus utrinque, quando sinceris animis examen habeatur, & media stet ratio liberum prolatura judicium. Scilicet Christianus quilibet tunc arctiùs in sua religione firmabitur, atque ad eam contra inimicos tuendam aptior validiorque efficietur; quod sanè omnibus Christianis suadet S. Petrus in Epist. I 3. ità scribens: *Parati semper ad satisfactionem omni poscenti vos rationem de ea, qua in vobis est spe.* Reliqui verò hucusque à Christo alieni, aut mentem victam ad Evangelii leges convertent, aut tacitè ostendent, se ab una pervicacia seu terrena cupiditate, aliisve parum honestis causis, detineri, ne sanctæ Christianorum religioni suum dent nomen, & animum.

Atque hoc profectò est peculiare istius legis decus ac prærogativa, ut ipsa sit, non dicam credibilis supra cæteras, sed una sit evidenter credibilis, & consentanea æquitati naturæ atque rationis. Quamobrem inquirantur, ut lubet, ejus fundamenta ac principia. Nullum planè ibi dogma occurrat, quod rectæ rationis suffragio non comprobetur, atque laudetur. Nonnulla quidem Mystèria ibi traduntur de natura ac voluntate divina, quæ aut captum humani intellectus excedunt, aut perfectè intelligi, dilucidèque exponi non possunt. Verùm hæc ipsa non contra rationem, sed supra rationem esse, omnes intelligent. Neque mirum, quod finitâ potentia in infiniti Dei capienda atque explicanda natura aliquantum deficiat. Illud præterea omnino exploratum est, nos ista credere, cò quòd

ab ipso Deo de se testimonium ferente revelata sunt , & novimus à Deo revelata fuisse : & quandoquidem rationi minimè ista repugnant , propterea quoque à ratione recta incunctanter probantur.

Quod est ad auctoritatem divinam, tantis signorum rationumque concentus in Christianam Religionem confluit, ut illam nisi impudenter negare nequeas à Deo constitutam. Etenim ejus fundator Christus compluribus Prophetarum oraculis prædictus antea fuerat, eaque prostant in libris, quos Judæi, inimica Christianorum natio, à tot sæculis venerantur. Accedunt planè cœlestis vita, ac mores Christi , & manifesta atque innumerabilia miracula, quibus tum ille, tum ejus sectatores virtute ab ipso acceptâ istius religionis veritatem confirmârunt. Ad hæc puritas & sanctitas dogmatum, legumque ad mores spectantium rectitudo, quibus nulla alia Religio, æquè ac Christiana, homines ad cuncta virtutum officia impellit, atque à terrenis ad cœlestia & spiritualia perducit, docetque non solum credere digna de Deo, sed etiam dignè colere Deum optimum, maximum. Prætereà non ad instituentium commodum, aut emolumentum & gloriam proposita fuit; non vi propagata per totum ferme terrarum orbem; sed ab idiotis viris primum deprædicata, tum immenso rationum pondere, tormentorumque incredibili tolerantia à doctissimis viris, fortissimisque Martyribus propugnata fuit : quibus tamen ardua quædam rationi humanæ proponentibus, & voluntati non sensuum oblectamenta, voluptatésque, sed legem crucis, excidiumque cupiditatum indicentibus, nihilominus tandem cessit non paucorum Judæorum pertinacia, & immanis aliorum populorum numerus. Hæc atque alia complura signa, seu motiva credibilitatis, ut vocant, satissimè ab iis pertractata, qui de Christianæ Religionis veritate agunt, nisi illam à Deo esse, illique prudenter esse credendum, evidenter probant, fortiterque persuadent : quid aliud exspectes ? Certè nulla alia religio tanto signorum consensu Deum sibi vendicet auctorem : & siquidem habenda est aliqua religio (utì procul dubio habenda est) certè Christianam, cujus *testimonia credibilia facta sunt nimis*, longè esse reliquis præferendam, qui non videt, nihil videt.

Cùm verò à tot sæculis floruerint, ac florent apud nos accurata omnium doctrinarum, & præcipuè divini cultus, veræque religionis studia, & cùm quidquid unquam Theologia & recta ratio docuit, cùm ad veteris novique Testamenti

menti interpretationem & confirmationem, tum ad morum disciplinam, atque intellectus voluntatisque humanæ perfectum regimen, totum id non minori pietate quam eruditione ac ingenio ab eximiis Christianis pertractatum, literisque etiam consignatum fuerit, & etiamnum ex instituto pertractetur, ac disputetur in eorum Scholis atque Ecclesiis: hinc est, quod rudè Christianorum vulgus eximatur à præcepto, quod prudentia unicuique injungit altius inquirendæ veritatis in potissimo religionis negotio, hoc est perpendendi prima illius fundamenta & principia. Imprudenter sanè & crudeliter exigas, ut quilibet è populo Theologiæ, linguis variis, atque aliis compluribus disciplinis det operam, quæ necessariae sunt ad explicandas divini Instrumenti Scripturas, & ad instituumdum exquisitum de religione examen. Fecerunt id studiosissimè, & quotidie faciunt innumerabiles Ecclesiæ Pastores, atque Doctores. Igitur dum tot, ac tales antesignanos (ut alia omittam nobis, non aliis faventia) Christiana plebs sequitur, imprudens sit, qui illam imprudentiæ accuset.

Sed non idcirco omnes Christianos ab hujusmodi onere eximimus. Arbitramur enim, sacros Ecclesiarum Ministros & omnes, quibus erudienda creditur plebs Christi, debere diligenter inquirere & noscere Christianæ Legis fundamenta ac principia, neque hujus tantum veritatem, sed & reliquarum falsitatem habere perspectam. Tum etiam magis id necessariū ducimus, cum Christianus populus in gentiliū, aliarumque sectarum vicinia constitutus est, & aut occasio fert, aut caritas suadet, pugnandum sæpè numero esse non minus contra superstitionem, quam pro religione legitima. Quando enim, ut diximus, populo Christiano fas est conquirere in sapientia, fide, pietate tot Majorum suorum, doctrinam à Deo revelatam, rationisque suffragio probatam tradentium, si fortè populo eidem dubitationes injiciantur, sive occurrant, aut si ab hostibus impugnetur Christianæ Legis veritas: quis hæreditatem sanctam in tuto collocabit? Est id Pastorum procul dubio, quibus cura gregis demandata fuit. Ac qui periculum à grege avertent, ubi præ ignorantia ne se quidem expedire possint ab instantibus lupis? Quocirca cum non in alium finem magistri & Duces dati sint populo Dei, nisi ut illum doctrinâ sanâ imbuant, & in veritate confirmant, & ab erroribus arceant: vires etiam sibi parent necesse est, quibus muneri institutòque suo respondeant.

Mani.

Manifestum autem est in hanc rem Apostostoli præceptum. *Oportet enim, inquit ad Tit. cap. I. ut Episcopus potens sit exhortari in doctrina sana, & eos, qui contradiscunt, arguere. In II. verò ad Tim. cap. 4. Prædica, inquit, verbum, in sta opportune, importune, argue, obsecra, increpa in omni patientia & doctrina &c.* In eandem sententiam loquuntur SS Patres & Concilia. Quam certè legem, si ad omnes cujuscunque gradus Pastores in Christiana Republica extendemus, nimis severi non erimus. Singulorum enim est gregem pascere ac tueri. Quod quidem præstari etiam posse per subsidarios & mercenarios non negaverim. Sed tum demum laudabiliter præstabitur, cum Pastores diligendis optimis mercenariis sint apti, ac intenti; & ipsi quoque ad curam gregis conferant diligentiam suam, doctrinam, sapientiam. atque pietatem, ne si solo Pastoris nomine & honore contenti sint, ex ignorantia & desidia mentem frustrentur summi omnium Pastoris Christi.

## CAPUT V.

*An ad ineundam Religionem veram Auctoritas precedere Rationem debeat. Manichæorum jactantia exploditur. S. Augustino sententia hac de re absurda à Pherepono afficta. Rationes extrinsecæ, seu Motiva Credibilitatis adhibenda ante Fidem, nec exigenda Rationes Dogmatum demonstrativæ. Usus Catholica Ecclesiæ hic laudatus, à qua nemo sine ratione cedere jubetur. Scire & credere quantum differant. Miracula, extrinsecæ Rationes. Alia Phereponi somnia putantis, Catholicos olim sine rationibus exegisse Fidem.*

**E**X hætenus dictis consequitur, rationem atque auctoritatem consulendas esse, easque confluere, ut quisque prudenter aut susceptam server, aut amplectatur religionem veram. Quòd cum plerique non animadvertant, aut negligent, & ab una hominum fallaci auctoritate se duci sinant; hinc fit, ut tot Provinciæ in antiquis erroribus persistent, & ad verum Dei cultum nunquam convertantur. Omnium autem maximè Christiana religio auctoritate & ratione se niti proficetur; cæteris verò aut unum ex istis funda-



fundamentis, aut utraque deesse invictis argumentis contendit. Apostoli, eorumque successores, & SS. Patres, & reliqui Christianæ Reipublicæ Doctores legem hanc non aliis artibus in toto ferè terrarum orbe propagarunt, quam ostendendo divinitus revelatam, & rationi conformem, idque rationibus probando, quibus humana prudentia prorsus acquiescat, nisi carnem audire malit, quàm spiritum. Proinde primâ fronte videatur non injustâ censurâ à Joanne Pherepono argui S. Augustinus, quippe qui in libro *de utilitate credendi* persuadere nititur, Christianam religionem sine ratione priùs veram esse credendam, ut illius veritas ratione postea percipiatur. *Vera religio*, inquit ibi Augustinus Cap. 9. *nisi credantur ea, quæ quisque postea si se bene gesserit, dignusque fuerit, assequatur atque percipiat, & omnino sine quodam gravi auctoritatis imperio iniri rectè nullo pacto potest.* Augustini sententiam Phereponus in animadversione ad eundem librum pag. 596. his verbis infectatur: *Quo argumento probare poterat, priùs esse quædam sine ratione (nam hoc debet intelligi) credenda, quæ postea perciperentur? Quis mendaciorum & fabularum Propola non potuit similia exigere: & postea dicere, si quis commenta ejus rejecisset, eum fuisse indignum, qui ea adsequeretur? An non Judæi & Ethnicis Christianis, contra se ratiocinantibus, talia reponere poterant; esse credendum, non ratiocinandum?* Tum ostendere pergit, non injuriâ petere posse homines ad Christi fidem convertendos, ut hujus fidei veritas rationibus ante vera probetur, quàm vera credatur. Aliter præpostere agi; nullamque superstitionem esse, ad quam pertrahi non possunt homines, si obtineat opinio Augustini.

Verum enim verò Phereponus ineptam Augustino sententiam affinxit, eique contigit, quod reliquis, qui cùm in hoste quærant, quod crimentur, errores & culpasprehendunt, quas tamen non hostis sæpè admittit, sed Censoris livor incautè somniavit, atque creavit. Nos æquiore animo Augustini mentem investigantes palam faciemus, nihil æquius ab Augustino suaderi atque exigipotuisse, quàm quod ipse à Manichæis exigebat; & simul quodnam sit rationis pondus, & quæ ratio procedere debeat in religionis negotio, ostendemus. Ut diximus, religio vera ab auctoritate, sive revelatione divina, descendere debet. Cùm Deus nolit singulos per se alloqui homines, eisque religionem veram mirandum in modum communicare; necesse est, ut isti ad rationis consilium, & ad auctoritatem quoque humanam confugiant, per quæ subsidia de divinæ

reve-

revelationis veritate certi efficiantur. Ipsa humana auctoritas, quanquam multum polleat, ad rationis tribunal & examen trahenda est, nosque è rationis consensu, sive dissensu, illius vim, aut infirmitatem dignoscimus. Rursus ratio duplici viâ nos ad cognoscendam veritatem divinæ revelationis perducere potest; vel per demonstrationem, & argumenta intrinseca, vel per credulitatem, & persuasionem prudentem, hoc est per extrinseca argumenta.

Manichæi magnificis verbis homines ad religionem invitabant, polliciti se omnia illius mysteria & dogmata demonstraturos esse evidenter cum veritate concordia, priusquam ab aliquo fidem exigerent. Scilicet, si pollicitationem sequebatur effectus, poterant homines primò per rationem, sive per intrinsecas rationes, intelligere, veram esse illam religionem, quam subinde per fidem credituri erant, ita ut fidei fundamentum foret ipsa ratio. Contrà Catholici contendebant, priùs esse credendum per fidem, ut postea per rationem, & per intrinseca argumenta, intelligi ardua quædam religionis mysteria & dogmata possent. Quam quidem rationem pertrahendæ gentis ad veram sapientiam ambitiosissimè deridebant Hæreticorū omnium stultissimi Manichæi, non aliter ad tantam rem procedendum rati, quàm nihil credendo, nisi rationi priùs intrinsecè constaret veritas per explicationem omnimodam, atque evidentem demonstrationem omnium dogmatum, atque mysteriorum.

Totus est Augustinus ut ostendat, quàm injusta flagitarent Manichæi, quàm justa Catholici. Primò, quia ne ipsi quidem hæretici promissa præstabant. *Plus enim*, ut ait cap. 1. Lib. de Util. cred. *in r. sellendis aliis desertis & copiosi erant, quàm in suis probandis firmi & ceri.* Et cap. 6. affirmat, eorum Auditores *falsa pollicitatione rationis inaudia millia fabularum credere & colere fuisse coactos.* Ipsos item Magistros ineptissimos fuisse in reddenda ratione, suisque doctrinis confirmandis, tradit lib. contra Epist. Manichæi cap. 5. & cap. 14. Immo id ostendit in reliquis suis adversus eos Hæreticos lucubrationibus. Secundò, quia & ipsi Manichæi ante omnia hortabantur auditores suos, ut Christo crederent, atque in hoc sequerentur auctoritatem Ecclesiæ Catholicæ. Quo facto, pollicebantur se exposituros, verumque esse demonstraturos, quidquid dixerat Christus, & in Scripturis habebatur Manichæo calculo probatis. Tertiò, cum divina quædam Mysteria & Dogmata vim & caprum intellectus humani

sedant, & sint non quidem contra rationem, sed supra rationem : ideo Catholici aiebant, per fidem sternendam esse viam rationi, ut hæc in alta atque obscura, impetrato per fidei obedientiam cœlesti auxilio, postea penetraret. Quartò, ostendebant Catholici, etiamsi Myſteria divina & sacræ Scripturæ humanis viribus intelligi possent, paucorum tamen hominum esse rationes intrinsecas capere, quibus mens ad certam cognitionem rerum omnium divinarum perducatur. Num ergo cæteris hominibus, qui tam sereno ingenio, tam vivido intellectu, præditi non sunt, idcirco neganda aut differenda religio, neque per fidem ad verum credendum sunt ii pertrahendi? Si hoc statuamus, tunc rudes & crassâ minervâ afflati, arbitantes non sine rationibus & demonstrationibus esse credendum, nunquam ad veram religionem pervenient, quia nunquam obscura & ardua quædam religionis arcana satis sint intellecturi. Tandem, ut alia præteream Augustini argumenta, Christus ipse non aliâ ratione homines ad se pertraxit, nihil prius, nihil fortius exigens, quàm ut sibi crederent, cùm tamen illi nòdum essent idonei ad divina percipienda secrata. Neque secus ad nostra usque tempora actum fuit in Ecclesia Catholica; & porro secus agere periculosum est, aut certè exiguum afferet fructum. *Hæc est, inquit Aug. cap. 10. de Util. cred. providentia vera religionis. Hoc jussum divinitus. Hoc à beatis majoribus traditum. Hoc ad nos usque servatum. Hoc perturbare velle atque pervertere, nihil est aliud, quàm ad veram religionem sacrilegam viam querere. Quod quis facit, nec si eis concedatur, quod volunt, possunt quid intendunt pervenire. Cujusmodi enim libet excellens ingenio, nisi Deus adsit, bumi repunt. Tunc autem adest, si societas humana in Deum tendentibus cura sit. Quo gradu nihil firmitus in cælum reperiri potest.*

Sed hæcenus deducta dubitationi lectoribus eximendæ satis non sunt. Nondum argumenta Phereponi dejecta, nondum ejus error detectus. Cùm audiunt lectores, veterem Chrtistianorum Rempublicam, & Augustinum poscere, ut ad veram religionem accedentes primùm sine ratione credant, facturi sibi gradum etiam ad intelligenda religionis myſteria non continuò opinentur, iis imperatam esse fidem sine ulla omnino ratione. Exigebatur, ut veram crederent Christi legem? sed simul credendi rationes exponebantur, quibus ducti homines prudentissimè veram crederent. Rationes autem istæ erant, quæ nunc in Scholis signa seu motiva credibilitatis,

appellantur, extrinsecæ quidem rationes, sed proposita fortissimè probando omnium consensu idoneæ. Nos aliqua ex his argumentis suprâ attigimus. Proponebantur infideli unâ cum divinis utriusque Testamenti libris mysteria & dogmata Christi, atque etiam explicabantur. At parcebatur intrinsecis rationibus, quæ difficiles plerumque sunt, ac intelligi nequeunt, nisi post longum studium, & peculiari auxilio Dei, quod per fidem divinitus infusam, & per Baptismatis gratiam sperare deinde fas est. *Ego, ait Augustinus cap. 14. credere antea rationem, tum percipiendæ rationi non sis idoneus, & ipsa fide animum excolere excipiens seminibus veritatis, non solum saluberrimum iudico, sed tale omnino, sine quo agris animis salus redire non possit.* Sacerdotibus Christi fidem prædicantibus inter Infideles, non Theologiæ Baccalaureos, ut barbaro utar vocabulo, sed Christianos facere animus erat. Præviis igitur argumentis efficacibus credibilitatis movebantur Infideles ad credendum, veram esse Christi religionem. Quo fundamento posito: cognitaque veritate revelationis divinæ, quidquid postea ab ista cœlesti religione propositum erat atque explicatum, etsi non intelligeretur, etsi intrinsecæ causæ & rationes non afferrentur, aut satis non caperentur, verum credebatur, & credendum erat, quippe à Deo mentiendi impotentē in ea vera religione traditum. Ita extrinsecæ rationes animum instruebant ad fidem; misericordia autem Dei animum ita instructum ad baptismum, & ad cœleste fidei salutaris donum perducere solebat, Animus tandem divinâ gratiâ imbutus, ad obscura & abdita mysteria & dogmata intelligenda, quantum creatæ menti licet, efficiebatur aptissimus.

Quod itaque in Catholicis criminabantur Manichæi, nihil aliud erat, quàm istud præcipere fidem sine prævia demonstratione, sine rationibus intrinsecis, evidentiusque dogmatum omnium atque mysteriorum probatione. Id importune à Manichæis exigi, quin etiam parum piè, atque imprudenter exigi, Augustino præeunte, didicimus. Satiùs enim erat, ac tutius & expeditius, ad religionem adducere homines per motiva credibilitatis, hoc est, per extrinsecas rationes. Ad hæc animū Phereponus non advertens, ubi audiit, Manichæos rationem petere antè fidem, Augustinum verò in contraria esse sententiâ, tum censuit sine ullis rationibus præviis impositum ab Ecclesia Catholica credendi jugum futuris fidelibus. At amabò, quid aliud Augustinus in Manichæis damnat, quàm quòd autè

ante fidem rationem se de obscurissimis rebus polliceantur reddi-  
turos, uti Cap. 9 ait: Secundò, quòd credendum negant, nisi  
indubitata ratio reddita fuerit &c. Et nisi apertissimam ratio-  
nem stultus de Deo protulerint, nihil credendum esse contendant?  
Nihil ergo aliud probare Augustinus contendit, quàm  
prudenter credi posse ac debere, vel antequam ratione, &  
certâ cognitione, divina quædam secreta & ardua quæ-  
dam ac obscura mysteria intelligantur. Nónne ad ritè pru-  
denterque veram religionem ineundam, satis est, si exter-  
nis argumentis, quæ multa atque efficacissima habet sola  
Christi religio, ad credendum ducaris? Ubi enim tibi con-  
stitit, veram esse aliquam religionem, tibi etiam constat,  
nonnisi vera in ea contineri, tamen si per demonstrationem  
Veritas singulorum tibi nondum perspecta fuerit. Augusti-  
nus ipse, quibus rationibus permotus fuerit, & quibus re-  
liqui permoverentur ad amplectendam Christi legem,  
prodit in ipso libro de Utilitate credendi Cap. 14. dum si-  
gnificat; se Christi moram in terris credidisse populorum at-  
que gentium confirmata opinioni, ac famæ admodum celeberrimæ.  
Famæ, inquam, celebritate consensione, vetustate roboratæ. De-  
indè Cap. 16. partim admirandis Christianæ religionis  
prodigiis, quæ nemo nisi impudens neget, partim creden-  
tium multitudine, quæ Augustini tempore se latissimè per  
ingentia terrarum spatia effundebat, moveri nos ad cre-  
dendum ait: *Homini non valenti verum intueri, ut ad id fiat*  
*idoneus, purgarique se finat auctoritas præsto est, quam partim*  
*miraculis; partim multitudine valere, nemo ambigit.* Sequenti  
autem capite pleraque credibilitatis motiva enumerat,  
quibus Infideles adducti prudenter credere jubebantur,  
nostrisque etiam jubentur temporibus. *Hoc factum est, in-*  
*quit, divinâ providentiâ per Prophetarum Vaticinia, per huma-*  
*nitatem doctrinamque Christi; per Apostolorum itinera, per Mar-*  
*tyrum contumelias; cruces, sanguinem, mortes, per Sanctorum*  
*prædicabilem vitam, atque in his universis, digna re-*  
*bus tantis, atque virtutibus, pro temporum opportunitate miracula.*  
En argumenta, en rationes, quæ ab Infidelibus fidem im-  
petrabant, priusquam certâ & internâ demonstratione, si-  
ve cognitione, intelligerentur omnia divinæ legis docu-  
menta atque mysteria. Hinc Augustinus dicere pergit:  
Cum igitur tantum auxilium Dei, tantum profectum, fructumque  
videamus, dubitabimus nos ejus Ecclesiæ condere gremio, quæ usq;  
ad confessionem generis humani ab Apostolica Sede per successiones  
Episcoporum frustra Hæreticis circumlatrantibus, & partim ple-  
bis ipsius judicio, partim Conciliorum gravitate, partim etiam mi-  
racu-

*raculorum majestate damnatis, culmen auctoritatis obtinuit? Asia hujusmodi argumenta extrinseca, quæ Augustinum in Ecclesiæ Catholicæ gremio tenerent, luculentius ab ipso recensentur in lib. contra Epist. Manichæi Cap. 4.*

Nunc ergo accedat Phereponus, & dicat pag. 596. *Animadv. Quis mendaciorum & fabularum Propola non potuit similis exigere? An non Judæi & Ethnici Christianis contra se ratiocinantibus, talia reponere poterant: esse credendum, non ratiocinandum? At quis mendaciorum Propola, quis Ethnicus, aut Judæus tot ac tanta motiva credibilitatis afferre poterat, aut possit, quibus probet suam religionem divinitus institutam, aut à Deo semper in pristinis legibus & ritibus conservatam, quot & quanta producere potuit, & potest Christi religio? Non ergo sibi timere debebat Augustinus, immo Catholica Ecclesia, si credendum prius esse monebat, quàm intimè evidentè omnia intelligerentur; nam reliquæ religiones tantâ vi, tanto numero & concentu argumentorum carent, quibus fidem exigant ante rationem. Propterea extra oleas Phereponus fertur, cùm in reliquis animadversionibus suis Augustino minatur, & flagra intentat, quasi hic nullâ ratione prolatâ, Christo, ejusque religioni, & Sacerdotibus, credendum esse moneat. Qui credit (sunt Phereponi verba pag. 597.) veram aliquam esse Religionem, seu Deum coli velle ab hominibus, sine ulla omnino ratione; aut insanit, aut ita bebes est, ut ab insanis non multum distet. Qui fidem habuit tibi sine ratione, idem etiam sine ratione, cùm videbitur, tibi fidem detrahet, adsentieturque a què facile Arianis, si rerum potiantur, aut etiam, quod deterius est, Muhammedanis, quod revera fecerunt Afri post Augustini tempora. Non vacat inquirere, cur in Muhammedanam superstitionem concesserit unâ cum Asia & Græcia, ipsa quoque Africa. Hoc unum dicam, temerè pronuntiari, Afros sine ratione olim credidisse Christo, & ejus religionem sine ratione didicisse, & per aliquot etiam sæcula sine ratione servasse. Neque in animo est perpendere, quot exceptionibus subsit, & quot explicationibus indigeat regula illa: Qui tibi fidem sine ratione habet, facile etiam sine ratione tibi fidem detrahet. Siquidem & Judæorum, & Moslemorum filii sine ratione plerumque credunt parentibus, & majoribus suis, religionem propriam tradentibus; neque tamen facile de sua se fide atque opinione dejici patiuntur. Quod si id illis contingit, quantò magis id Christianis continget, & porro contingere debeat? Qui enim vel sine ratione Christo credit, & per Baptismatis lavacrum reli-*

religioni veræ conjungitur , dum id ex animo faciat, & non fictè credat , eâ cœlesti virtute profectò donatur , quæ illum vel finè ratione in fide constantissimum continere possit.

Hæc, inquam , missa faciamus, & certa sit undequaque Phereponi sententia, imò non aliud sit, quàm quod habetur Cap. 19. Ecclesiast. *Qui cito credit, levis corde est.* At quid rei hæc habent cum Ecclesiæ Catholicæ disciplina, quæ à Christo ad nostram usque ætatem sanctissimam religionem propagavit, tot rationibus, causisque propositis, cur Sacerdotibus suis, & Christo credendum foret ? Bardos planè stupidòsque necesse est , faciat existimètque Phereponus tot populos ingenii famâ alioqui celebres, qui sese ad Christum hucusque adjunxerunt , si aliter eos censet Christianæ religioni consensisse , neque iis, antequam crederent, fortissimè persuasum putat, jure fuisse credendum. At, inquit Phereponus, non rationi, sed Sacerdotibus fidem exigentibus credendum esse Augustinus monet. Id juris si sibi arrogent Sacerdotes Ethnici, & eadem , quæ Augustinus habet de utilitate credendi , Christiano occinant , quid responsi dabimus ? Intoleranda ab iis peti , Christianus exclamabit. *Ne ergo, subdit Censor, bona ratiocinatio habeatur in Africa Christiana , quæ Paralogismus fuisse ad ortum Euphratis.* Si finè ullis omnino rationibus Christiani Antistites sibi adhibendam fidem dixissent : ferri utcumque posset ista Phereponi percunctatio. Verùm, ut vidimus , aliter sese res habuit. Præter animum non fictum adferebant Christiani Sacerdotes rationum pondus, quibus evidenter credibilem esse religionem suam probarent , vel non intellectis evidenter singulis ejus dogmatibus atque mysteriis. Manichæi verò ità obfirmatis animis pugnabant, ut neque Sacerdotibus Catholicis, quamlibet sincerè agentibus , neque extrinsecis argumentis , quamlibet fortissimis, eorum ex parte productis adjungere fidem vellent , & adjungendam præfraçtè negarent, nisi certâ cognitione atque intrinsecis rationibus prius intelligerent , & vera esse evidenter cognoscerent omnia divinæ legis mysteria atque documenta. Itaq; spontè evanescit inter Christianos atque Ethnicos Sacerdotes instituta comparatio.

Cùm verò Augustinus Cap. 12. lib. de Utilit. cred. quæ fuisset : *Quomodo, si quod nescitur, credendum non est, serviant parentibus liberi, eosque mutuâ pietate diligant , quos parentes suos esse non credant?* Phereponus insurgit, & hæc planè dissimilia

milia esse pronuntiat. *Nam parentes, ita scribit, & alii scire possunt, & revera sciunt, quinam sint sui, & certorum hominum liberi; nec ullâ utilitate ducuntur, saltem plerumque, ad supponendos sibi alienos liberos. Sed Sacerdotes, qui volunt sibi credi de religione, ejus veritatis non sunt magis consci, quàm alii homines, si rationibus sunt destituti, & plerumque non sine magna utilitate sua suum gregem augebant. At hoc ipsum exemplum dilucidè ostendit, quod hætenus de quæstione ista non perspexit Phereponus, qui tamen criticæ artis magister moneri se patiatur, ut quando ad aliorum censuram fertur, diligentius eorum opera legat, mentemque scrutetur. Tria esse dixerat Augustinus Cap. II. *Intelligere, credere, opinari. Intelligere idem esse ac scire, seu aliquid mentis certâ ratione tenere statuit. Tum hæc addit: Quod intelligimus, debemus rationi, quod credimus, auctoritati, quod opinamur, errori. Ut autem ostendat, falli Manichæos, qui dicunt, nihil esse credendum, nisi quod scimus, liberorum exemplum adducit, qui procul dubio mentis certâ ratione & per demonstrationem scire ac intelligere nequeunt, suos esse parentes, quos ut tales diligunt & colunt, & tamen piè prudentérque tales esse credunt, quia auctoritate, hoc est, argumentis & rationibus extrinsecis ad ita credendum atque agendum moventur. Credimus, inquit, & sine ulla dubitatione credimus, quod scire non posse confitemur.**

Quid nunc rei tam certæ objicit Phereponus? *Parentes, ait, & alii scire possunt, & revera sciunt quinam sint sui liberi. At ut præteream, ne ipsos quidem parentes id scire interdum posse per scientiam certamque mentis cognitionem, quo sensu Augustinus hîc scire accipit: numquid liberi per rationes intrinsecas, & per scientiam noscunt parentes suos? Non hercle. Non enim ratione (ut ipsis Augustini verbis utar) ullo pacto scripi potest, sed interpositâ matris auctoritate de patre creditur; de ipsa verò matre plerumque nec matri, sed obstetricibus, nutricibus, famulis. Nam cui furari filius potest, aliusque supponi, nonne potest decepta decipere? Sed, inquit Phereponus, hoc exemplo probare vult Augustinus, credendum quoque esse Christiano Sacerdoti sine ratione, cum tamen hæc sint planè dissimilia. At quando nam somniavit quicquam, liberos sine ulla omnino ratione credere, hunc aut illum esse parentem suum? Illud ergo exemplum in eum tantummodo finem Augustinus adfert, ut ostendatur, nihil omninò humana societatis incolumiter remanere, sed nihil credere statuerimus, quod non possumus tenere perceptum, hoc est, cujus certa non habeatur scientia. Nimirum inter Augustinum*



& Manichæos vertebatur ista quæstio, utrùm scilicet credi quædam prudenter possent, atque deberent per sola credibilitatis argumenta, an verò necesse foret earum rerum scientiam prius habere, ut prudenter deinde crederentur. Nemo neget, quin liberi verisimilibus rationibus ducti prudenter credant, & credere debeant parentes suos. Nemo etiam negare audeat, quin Infideles auditis dumtaxat motivis, ut ajunt, credibilitatis, credere prudenter possint ac debeant Sacerdoti Christiano, quamvis internas quorundam divinorum dogmatum rationes nequaquam proponenti. Dissimilia autem sunt hujusmodi exempla, sed contrariâ atque aliâ ratione, quàm Phereponus censet. Liberi enim facili in credendis parentibus suis, ut liquet, falli possunt; Infidelis verò in credendo Sacerdoti tot credibilitatis argumenta adferenti, si rationem cõsulat, sentit se falli non posse, etiamsi Sacerdos ille ad utilitatem quoque propriam eo in negotio respiceret: quod tamen quàm modestè, quàm verè, à Pherepono Christianis Sacerdotibus assignatur, ipse viderit. Tanta quippe est eorum argumentorum vis, quibus credenda ostenditur Christiana religio, ut eam non solum prudenter, & sine difficultate credere quisque possit, sed etiam difficillimum sit homini iis auditis temperare à credendo. At Phereponus sibi temerè persuadet, sine ullis omnino rationibus olim Sacerdotes fidem præcepisse, dum nequaquam intelligit, quid *scire* hoc loco sit Augustino. Poterat tamen ipse ex iis, quæ retulimus, abunde perspicere, & partim etiam perspexit in eodem Cap. 14. sed qui extra orbitam cucurrerat, se in viam revocare non valuit.

Disciplinam Ecclesiasticam de exigenda fide ante rationes intrinsecas exemplo Christi confirmabat Augustinus, inquiens eum nihil prius, neque fortius, quàm credi sibi voluisse. *Fide, ait, ille stultus ducebat; vos ratione ducitis. Laudabat credentes ille; vos objurgatis, &c.* Hic Phereponus suas obtrudit notas, ostensurus egregia morum præcepta & miracula duas graves fuisse rationes, quibus divinus ille Magister sibi conciliabat fidem, quamvis Judæi non intellexerent, quæcumque dicebat. Atrogo quid novi adfert eruditus Centor? Nõne & Augustinus ibidem hæc habet: *Quid enim aliud agunt tanta & tam multa miracula, ipso etiam dicente illa fieri non ob aliud, nisi ut sibi crederent?* Quare ergo non intellexit aliquando Phereponus, satis esse posse ad prudenter credendum religioni Christianæ argumenta credibilitatis, eaque argumenta antiquis Christianis in

credendo, & in prædicando Infidelibus Evangelio familiaria fuisse? Ipse Christus causas & rationes intrinsecas altissimorum quorundam dogmatum non attulit; & tamen ut sibi crederetur, instabat. Sola miracula, quæ nemo alius fecerat, pro ratione erant, eorumque gratiâ prudenter assentiri Christo poterant immo debebant Judæi. Miracula autem non intrinsecas esse, sed extrinsecas rationes, ad probandam doctrinæ veritatem, manifestè constat. Prætera Phereponus hinc discere debuit, excipiendum cum risu fuisse exemplum Christi à Catholicis adhibitum, si isti non solum sine intrinsecis, sed etiam sine extrinsecis rationibus postulassent, ut sibi crederetur, quando ipse Deus Filius non aliter fidem præceperit, quàm præmissis ingentibus prodigiis, hoc est gravissimis rationibus extrinsecis, quibus tutò deducerentur Judæi ad credenda illa etiam, quæ satis non intelligerent. Videat igitur Censor, quàm rectè in hæc verba concludat: *Itaque non potuit Augustinus exemplo Christi uti, ut probaret Ecclesiam Catholicam jure sibi sine ratione credi postulare.*

Idem ex aliis quoque Augustini Libris, quæ Catholicorum atque ipsius Augustini mens & consuetudo foret, colligere Phereponus poterat, nisi figmentum suum nimis amasset, ex quo exercendi ingenii censorii tam bella occasio suboriebatur. Inquit autem Augustinus in Lib. de vera Religione cap. 34. *Ipsa quoque anima medicina, qua divinâ providentiâ & ineffabili beneficentiâ geritur, gradatim distincteque pulcherrima est. Distribuitur enim in auctoritatem atque rationem. Auctoritas: [videlicet argumenta credibilitatis] fidem flagitat, & rationi præparat hominem. Ratio ad intellectum cognitionemque perducit. Quanquam neque auctoritatem ratio penitus deserit, cum consideratur, cui sit credendum; & certè summa est ipsius jam cognita atque perspicua veritatis auctoritas.* In Ep. 120. cap. 1. aliàs 222. apertius exprimit, quæ sententia foret Ecclesiæ Catholicæ. *Absus sunt ejus verba) ut ideo credamus, ne rationem accipiamus, sive quæramus, cum etiam credere non possemus, nisi rationales animas haberemus.* Ut ergo in quibusdam rebus ad doctrinam salutarem pertinentibus, quas ratione nondum percipere valeamus, sed aliquando valebimus, fides præcedat rationem, quâ cor mundetur, ut magna rationis capiat & perferat lucem; hoc utique rationis est, Quæ verba Phereponus veritatem prorsus consentientem habere & ipse adnotavit atque affirmavit; quamvis postea fateatur se non intelligere, quomodo hæc in concordiam redigi possint cum iis, quæ alibi de auctoritate ab Augustino traduntur.

At nihil homini facilius erat , quando ad ejus libros accessisset amanti potius quàm inimici animo , & non infectandi , sed illustrandi tanti viri causâ in eum commentarios sibi conscribendos suscepisset.

Cæterum lepidus mihi videtur Phereponus, cùm veras divinare vult causas, cur Augustini tempore Fides, ut ille somniat, sine ratione exigeretur. Prima est, quòd Christiani non satis erant in *Philosophia Criticâ*que exercitati, ut *Scripturam* contra objectiones Manichæorum, aliorumque defendere commodè possent. Altera, quòd revera sibi conscii essent, non pauca à se dici planè contraria rectæ rationi; qualia erant tam multa, quæ de gratia & prædestinatione, aliisque dogmatibus iis adnexis, quasi capite fidei credenda ab Augustino proponebantur. Deniq; is sermo fuit partium jam vires suas sentientium, & multitudine sua frætarum; quam sapè jactas hic Augustinus, contemnâ paucitate aliter sentientium. En quot criminum postulet Ecclesiam Catholicam suis hisce divinationibus Phereponus noster. Sed ad primam causam quod attinet ab eo excogitatam, negamus, ita Critices & Philosophiæ scientiâ destitutos fuisse veteres Christianos, & potissimum Augustini tempore, ut commodè interpretari tuerique non possent Scripturas sacras. Prostant eorum libri, quibus vindicârunt ab Ethnicorum, Manichæorum, aliorumque hostium censuris veritatem, & sanctitatem divinorum codicum. Multi è Manichæis, plures ex aliis Sectis, innumeri è Paganorum superstitione ad veram Christi Religionem perducti (nisi omnes illos inter pecora stipitesque referre volumus) argumento sunt, non infeliciter neque segniter versatos esse veteres Ecclesiæ Catholicæ Præsules & Pastores in sacris voluminibus protegendis & rectè explicandis. Secundò dicimus, peculiarem illam Criticâ & Philosophiâ, quam expetit Phereponus, ne necessariâ quidem olim fuisse, neque adhuc esse, ut quis jure ad Christianâ & Catholicam Religionem advocetur, atque impellatur. Satis superque sunt argumenta, quibus prudenter credibilis, imò evidenter credibilis, ostenditur Christi Religio. Non aliis usus est ipsemet Christus; non aliis ferè semper in prædicatione Evangelii usi sunt ejus Apostoli, atque Apostolorum Successores. ceterique Ecclesiæ Catholicæ Doctores. Non aliis utendum contendit Origenes lib. 1. contra Celsum, hominem nempe, qui Pherepono in hujusmodi accusatione præiverat. Curæ tot agricolarum, quanquam Philosophiæ & Criticæ, si Phereponum auscultamus,

ritorum, quanta messis responderit, ac respondeat, nulla non loquitur historia. An multos ad Christum adducere possit, atque adducat præscripta à Pherepono via, tantumque ab eo commendata Ars Critica, vident alii. Illud quidem affirmari posse reor, si homines induxissent, aut inducant in animum, cum solum credendum esse Christo, cum sublatae evidenter fuerint omnes in divinis Scripturis dogmatibusque occurrentes difficultates, eos aut serius quam par est, aut nunquam futuros fuisse, & fore Christianos. Rationi feroci, atque admodum curiosæ, siue etiam infirmæ, nunquam satis est neque est ulla gens tam discordiarum ferax, quam quæ enixam dat operam Criticæ, & de omnibus dubitat, nihilque credendum ducit, nisi quod est evidenter probatum. Unusquisque in suo sensu abundat, unusquisque supra alium se sapere arbitrat, & uni sibi credere novit. Quamobrem tutior, & laudabilior semper fuerit ratio prædicandi & persuadendi Evangelii, quam Christus, quam nostri Majores hujusque servarunt, & quam fortasse non impugnasset ipse Phereponus, si Augustini concilium sententiæque hac de re (quod facile fuit) melius percepisset. Sed alibi de Criticæ usu, abusu & necessitate & de scientia Patrum quædam commentabimur.

Quod est ad alteram causam, nempe ideo à rationibus reddendis se abstinuisse veteres Christianos, & Catholicos, *quod revera sibi consci essent, non pauca à se dici contraria rectæ rationi: à veritate omnino abhorret.* Nonnulla quidem diximus in Catholica Religione tradi, quæ supra humanam rationem sunt, qualia sunt à Christo revelata de Dei natura. At aliqua ibidem tradi, quæ sint, si Superis placeat, planè contra rectam rationem, & id non ignorari à nobis, nullus unquam Catholicus, nisi errans, sibi persuasit; nullus nisi stultus, somniavit. Et quæis, rogo, auctoribus tam deformem sententiam Ecclesiæ Catholicæ imponit Phereponus? Hæreticos forsitan cum antiquos tum recentes, quibuscum & ipse sentit & facit, sui dicti daturus est testes. Verùm quonam ex Canone Critico didicit ille, credendum esse hostibus nostris affirmantibus, quod nos constantissimè negamus? Quandoquidem tamen virgustinus ipse accersitur in hanc eandem causam, ostendat quæso Phereponus, eum sibi conscium fuisse, adversari rectæ rationi, quæ de gratia & predestinatione à se proponebantur. Mihi nullū dubium est, quin Augustinus hac de re interrogatus nō solum se tam absurda opinionis consciū

negasset, sed etiam invictis rationibus ostendisset, sententiam suam cum recta ratione penitus consentire, ut saltem ab illa non abhorrere. Pro ipso luculenter respondere adhuc possunt editi ejus Libri, in quibus unice probat, nullam aliam, quam suam, & Ecclesiæ Catholicæ, de gratiæ & prædestinatione sententiam habere consensum scripturæ atque rationis. Si ille (signamus rem à vero longè alienam) in ea fuit opinione, quam Calvinii Sectatores eidem tribuunt, non inficiamur, quin contra ipsum recta ratio pugnaret. Sed, hoc etiam posito, certissimum est, non advertisse Augustinum, quantopere hujusmodi sententia adversaretur rectæ rationi: Nam & ipsi Calviniani, qui revera in hisce quæstionibus contraria rationi docent, induci non possunt ut credant, se rationi contraria tradere, atque in tam misero errore versari. Deinde prodit ipse Liber de Utilitate credendi, qualia Augustinus sentiret. *Credere*, inquit is Cap. 11. *tunc est culpandum, cum vel de Deo indignum aliquid creditur, vel de homine facile creditur.* Utique fatemur, nihil indignius excogitari de Deo posse, quam quod Augustino Calvinus adscribit: nempe à Deo creari homines, qui antecedenti necessitate non secus ac fato compellantur ad bonum & malum, & subinde ab ipso Deo propter delicta puniantur, quæ illi non coacti quidem patrarunt, sed electione & resistendi facultate sine sua culpa destituti evitare nullo pacto potuerunt. Talia Deum prorsus dedecent, nimiumque rationi adversantur. Si verum foret, eam fuisse Augustini sententiam in Gratia & Prædestinationis negotio, quam tradidisse ab hæreticis recentioribus dicitur, & conscius ille sibi fuisset in quot à ratione absona atque indigna Deo, se sua opinio conjiceret: adeone mentis inops fuisset, ut tunc esse culpandum hominem diceret, *cum de Deo indignum aliquid creditur*? Sed Augustinus à Calvino perversè explicatus, neque indigna Deo tradidit, multoque minus sibi conscius fuit, se aliquid credere contrarium rectæ rationi.

Denique idem ille est Augustinus, qui Epist. 143. olim 7. hæc scribit non ignorata Pherepono, immo aurea jure ac merito ab ipso appellata: *Si ratio contra divinarum Scripturarum auctoritatem rediditur, quamlibet acuta sit, fallit verisimilitudine, nam vera esse non potest.* Rursus si manifestissima certaque rationi velut Scripturarum sanctarum objicitur auctoritas, non intelligit, qui hoc facit; & non Scripturarum illarum sensum, ad quem penetrare non potuit sed suum potius obicis peritatis; nec quod in eis, sed quod in seipso velut pro eis invenit opponit. Idem

etiam Lib. 4. de Trin. Cap. 6. præclarissimè inquit : *Contra rationem nemo sobrius, contra Scripturas nemo Christianus, contra Ecclesiam nemo pacificus senserit.* Similia habet aliis in locis. Nunc ergo à Pherepono petimus, quâ fronte affirmare possit, reverà sibi conscium fuisse Augustinum à se tradi contraria rectæ rationi in quæstionibus *de Prædestinatione & Gratia*. Nisi censeat Augustinum, virum ingenio & memoriâ ad invidiam præstantissimum, supinè admodum delirâsse, aut virum summè pium impostorem fuisse mendacissimum, qui aut ignoraret, quæ in animo certa & statuta habebat, aut quædam intimo corde crederet, contraria verò alios decepturus deprædicaret : Hæc, inquam, nisi devorare velit Phereponus, fateri tandem cogatur, Augustinum, qui contra rectam rationem sentiendum esse negat, sibi conscium non fuisse, à se proponi quædam, quæ ipsam rectam rationem inimicam haberent ; sive, si ità Pherepono placet, errâsse quidem Augustinum contra ipsam rationem, sed ipsum se errare non cognovisse.

Facile verò nobis foret ostendere, ne errâsse quidem Augustinum, neque à ratione absona prodidisse in controversiis de Prædestinatione & Gratia. Sed occupata jam fuit ista provincia à doctissimis inter Catholicos viris, quorum etiam curâ atque eruditione palam factum est, quantum Augustini dogmata à Calvinianis dissent. Illud in præsentia adnotâsse sufficiat, ab Augustino adhuc Presbytero conscriptum fuisse Librum de *Utilitate credendi*. Eo autem tempore, cum inter ipsum & Pelagianos, quippe nondum ab ovoeductos, nullæ quæstiones de Gratia intercessissent : ineptè dicitur Augustinus aliena à recta ratione in Gratia & Prædestinationis argumento proposuisse. Immo tantum abest, ut id contigerit ; ut nihil prius neq; antiquius tum Augustino esset, quàm liberum hominis arbitrium à Manichæis defendere, quod postea in reliquis contra Pelagium scriptis ab ipso læsum nonnulli perperam opinantur. Testis etiam est ipsemet Augustinus, se tum temporis incautè adhæsisse opinioni de initiis fidei meritò hominis, non gratia Dei, tribuendis, quam postea adoptârunt Semipelagiani. Quamobrem cum liquidò constet, eo saltem tempore, quo Librum illum scribebat Augustinus, ab ipso proposita non fuisse aliena à recta ratione in argumento divinæ Gratia: Co istabit etiam, nihil magis abs re produci à Pherepono potuisse, quàm quòd Catholici ideo fidem ante rationem exigèrent, quia conscii sibi erant, tradi à se quædam planè contraria rectæ rationi. Idem quod

quod de dogmatibus ad Gratiā spectantibus dictum est, dici & de aliis potest, quæ in Catholica Religione rationi rectæ repugnare Phereponus credit, & quæ libenter, ut opinor, hîc quoque memorasset, nisi fortasse conterraneis suis non omnes illius sententias, non ejus ubiq; licentiam æquo animo ferentibus, parcere consultius duxisset.

Tertia causa, quare postulabant Catholici, ut rationi anteverteret fides, Pherepono divinante, ea fuit, quod ii suas jam vires sentirent, suâque multitudine freti, aliter sentientium paucitatem contemnerent. *Ejusmodi partes, inquit is, ac ingenia pati non possunt sibi obloqui pauciores sed volunt fidem loquentibus continuo haberi.* Nescio, an hîc Dordracenam Synodum tacitè carpat ingeniosus Censor. Hoc quidem novi, ipsum, quanquam minimè falsa de Catholicis hîc narret, multitudinem suam Manichæorum gregi obicientibus non minus tamen quàm antea in nos contumeliosè agere. Amplissima quippe Catholicorum respublica sibi fidem ab Ethnicis habendam esse contendebat, non quod tantummodo loqueretur, sed quod, ut vidimus, evidenter credibilia vel linè rationibus intrinsecis, loqueretur. Nunquam hûc respicere Phereponus didicit. Ubi autem in Hæreticos disputatur, multitudo quoque ipsa validum præbuit semper argumentum dignoscendæ Religionis veræ. Cùm enim quæritur, quæ inter tot Sectas, quarum unaquæque sibi veram Christi Religionem tribuit, Orthodoxa sit, & germana Religio: præter alia *Credibilitatis argumenta*, quæ unis Catholicis favent, illud quoque favet, quod isti re & nomine Catholici sint, semperque fuerint ab Apostolorum ætate. Hoc est, quod per universum terrarum orbem diffusa sit, & adhuc ex divino munere latissimè pateat una Catholicorum Religio: quod hucusque Hæresi nulli contigit, neque continget ante ultimi judicii dies, & quando etiam contingere posset (quod non concedo) nihil Religionis, quæ hucusque Catholica fuit, veritati officeret, ut nemo non intelligit. Hæc etiam tessera ad reliquas accedit, quibus in unum collectis vera Christi Ecclesia à falsis atque Hæreticis distinguitur, eamque sapientissimè in sacris Symbolis, in œcumenicis Conciliis, in Patrû scriptis constitutam habemus, & ab Hæreticorû oppugnantibus efficacissimè semper adhibitam scimus. Sed commodiùs hac de re in sequentib. Capitib. habebitur sermo.

Præsentī finem faciemus, simul ac monuerimus, Lectorem non hîc tantùm sed & aliis in locis Phereponum Augustino loquenti de *Utilitate credendi* bellū indixisse. Atta-

men cū tam imparatus ad accusandum venerit, ut quod maximè opus erat, ne statum quidem quæstionis intellexerit; nullo negotio patebit, quàm imbellia sint in ista contentione illius tela, & quàm incautè pugnet, si memoriâ repetantur, quæ hætenus conscripsimus. Quapropter nulla mihi ampliùs cura refellendi ejus animadvertiones in cap. 7. Libri de quantitate animæ, & in cap. 2. lib. 1. de libero Arbitrio. Tamen omittendum non est, quod ille habet in hunc postremum locum. Culpat nimirum, aut potius deridet Augustinum, quod ex Isaïæ cap. 7. hæc verba citarit: *Nisi credideritis, non intelligetis*, iisque probare contendat, prius esse credendum, quàm intelligendum. At ista Prophetæ verba nihil ad rem facere novus Censor exclamat, quippe ab Hieronymo aliisque rectè translata, diversum reddunt sensum, nempe *Nisi credideritis, non permanebitis*, ità ut Prophetici sermonis series ab Augustini mente longissimè abscedat. Pro sententia Prophetæ, inquit Phereponus, *laudat bonus vir signum Græcorum Interpretum, &c. Credidit enim hunc esse sensum Scriptura antequam scires, an LXX. Interpretibus per omnia fidere literet, aut hunc locum bene esse ab ijs versum constaret.* Lectorem nolo diu detinere disputando, an sustineri aliquà ratione possit LXX. Interpretum versio, cujus sensum in his verbis usurpârunt alii doctissimi Patres, & Hieronymus ipse non improbat. Quæcumque sit germana eorum verborum sententia, certum est, Augustinum rem veram, ut vidimus per ea probare voluisse. Verum autem dogma, etsi inutilia ad illud confirmandum congerantur, verum certumque esse non definit. Imò regula est, quando ex diversis interpretationibus diversi sacræ Scripturæ sensus emanant, iis licere nobis uti, non ad fundandum quidem, sed ad illustrandum aliquod dogma; nihil enim periculi subest, ut ille sensus, quamquam alioqui non profit, dogmati noceat, quod veritati congruere ex aliis Scripturarum locis evidentioribus ostendi potest. Augustinum autem non expectâsse, ut à Pherepono de diversa illius versione certior fieret, constat à lib. 2. cap. 12. de Doctrina Christiana, quem ab ipso conscriptum novimus duos annos post libros de libero Arbitrio.





## CAPUT VI.

*Infirmetas humana mentis, atque rationis, & errandi in homine facilitas. Ejus causa. fuga disciplina, socordia in inquisitione veri; corpus malè compactum, & pessimè affectum; penuria atque abusus subsidiorum ad inveniendam veritatem; memoria exilitas; phantasia impotentia, & præcipuè dum affectus in animo regnant, voluntatis perversa indoles, mentis ipsius angustia, ignorantia, oblitio, & prava electio principiorum, quibus ad rectè judicandum uti necesse est.*

**H**Actenus dictum est, quousque in inquisitione veri, quantum ad religionem ineundam spectat, humano ingenio sit procedendum hominique prudenter agentì sufficere, imò necessarium esse, diximus, ut argumentis credibilitatis contentus fidem suam religioni veræ prius accommodet, quàm omnia illius dogmata atque mysteria per evidentem rationis intuitum perspicere atque intelligere velit. Sed non desunt, qui Manichæorum pervicaciam imitentur adhuc, suæque mentis ambitione fascinati rerum omnium veritatem assequi se posse suis viribus temerè confidunt, & rationis humanæ vires ultra æquum exaggerent. Ut perniciosa hæc opinio funditus concutiat, invadendum nunc est in artem errorum omnium, hoc est aperienda sunt homini, quàm brevissimè poterimus, tum infirmitas, tum stultitia creaturarum mentium. Hinc leges, hinc præcepta moderandi ingenii petamus oportet. Nos noscere ante omnia nosmetipsos, ab ipsis quoque sæculi sapientibus jubemur. Neque sanè ullus ad veri Dei cognitionem, atque amorem sperandus est progressus, nisi prius præcefferit imbecillitatis nostræ cognitio, & nisi humilitas ab ipso Deo in nos descendens nos ad ipsum convertat, animùmque superbientem castigans, efficiat idoneum ad majora è cælo dona aut excipienda aut impetranda.

Cùm dicimus, infirmam esse atque imbecillem hominis mentem atque rationem, significare volumus, hominem licèt ratione præditum, suis tamen viribus difficilè ad verum inveniendum, rectèque judicandum pervenire, facile

verò

verò in errorem rapi, atque in errore jacere. Duplici & causa manare videtur huiusmodi infirmitas atque impotentia. Prima est, quòd homo veritatem quærere non vult, & adhibere subsidia ad veritatem inveniendam idonea. Altera, quòd etiam si verum quærat, invenire sæpè non potest ex ipsius difficultate veritatis, aut ex inepto rationis usu. Has causas sigillatim explicabimus, ut sua humanæ rationi vulnera evidentius constent, & ingenia nostra tandem pudeat suæ ambitionis, atq; proterviæ.

Sentiunt omnes, nemo negat, rationale animal ab utero matris crassissimam secum asferre ignorantiam omnium rerum. Mox ista ignorantia paulatim depelli solet, ubi sensibus, & meditatione pollere, iisque uti homo cœpit. Idæ rerum an nobis ingenitæ sint, adveniãtne peregrinæ in mentem nostram, Philosophi disputant, nos in medio relinquimus. Illud constat, necessarium esse meditationis & sensuum usum, quo aut in animo domesticæ excitentur, aut in animum novæ importentur rerum idæ. Hinc Seneca in Ep 95. *Omnium, inquit, honestarum rerum semina animi nostri gerunt, quæ admonitione excitantur, non aliter quàm scintilla flatu levi adjuta ignem suum explicat.* Meditari autem dicimus, cùm anima vegeto corpore, & ut ità dicam, ipsa vigilans aciem suam in res, & earum essentiam, causas, effectus, & qualitates acutè intendit. Usus sensuum, experientia, parentum & æqualium consuetudo, atque alia humanæ vitæ instrumenta, rudem intellectum, velit nolit, sensum informant, & aliquam veri notitiam in ejus penetralia inferunt. Sed quota pars hæc veri immensi dici potest? Quot etiam erroribus & falsis opinionibus permixta non est, atque infecta? Sola plerumque rerum vulgarium, & sensibus obviarum notitia hinc fluit; imò sola ipsarum superficies cognoscitur. Quare nisi ulterius homo procedat, & quærere velit immanem reliquarum veritatum copiam, atque intimè perpendere, quæ jam didicit: interdum bipes à quadrupede, nisi ex habitu corporis externo, dissimilis non videatur. Quidam igitur socordiâ atque odio laboris, & affectibus pravis impediti: quidam nimio ardore incitati erga humanæ vitæ negotia, & vilia quæq; commoda, quibus unice inhiant; alii, quòd invenire scientiam desperent; alii, quòd se opinentur scire quod nesciunt (& si quæ sunt aliæ causæ) verum quærere nolunt, negliguntq; subsidia homini ad inveniendum verum necessaria atque opportuna. Quot autem erroribus id hominum genus serviat, & pateat, nemo nescit. Infantes planè appareant, cùm

cùm de rebus agitur, quæ vulgarem humani commercii usum aliquantum excedunt, eorùmque mens in angusto sensibilibus quarundam rerum gyro constricta, latius explicare volatum non solet, erratura, si faciat. Vigente igitur in istis primævâ adhuc ignorantia, quam expellere fortasse potuerunt, at certè noluerunt: nil mirum, si imbecillima est eorum ratio, si stultis falsisque opinionibus se abripi quotidie sinunt, si vetera deliria nunquam abjiciunt, & se impares sentiunt ad abdita rerum noscenda, ad arduas & invias quæstiones dirimendas, ad ritè meditandum, falsumq; in casibus innumeris à vero distinguendū?

Longè gravior altera infelicitas est, quod nempe homines, etiam si verum, & scientiam, & semitas ad utrumque perducentes quærant, reperire tamen sæpè nequeunt. Hujusmodi impotentia triplex in medium adferri causa potest, corpus videlicet, instrumenta sciendi, & animæ ipsius facultates internæ. Et quod est ad corpus, præter organa malè animorum indoli respondentia, quæ nullo neque studio, neque voto emendare valemus in nobis, innumeri morbi bellam corpori quotidie indicunt, atque ideo conflictantur cum animo ipso. Sui carceris dolores atque incommoda non sentire animus nequit, ac proinde nemo non sentire cogitur, quantum imbecillitatis è corpore imbecilli, infirmo, & malè affecto inferatur in mentem, quantumque tenebrarum tenebrosa hæc massa corporis lucidissimæ rationi creet. Certè hac de causa hominum plerique in pristina ignorantia perdurant, & ad nobiliores disciplinas, quanquam velint, conscendere nequeunt; neque fas est obtusis crassisque ingeniis & nullâ memoriæ tenacitate præditis se immiscere parum obviis atque reconditis veritatibus, suumque interponere judicium in arduis non vulgarium rerum quæstionibus.

Ad impotentiam humanæ rationis veniamus, quæ nobis obvenit ex inopia & fallacia instrumentorum, per quæ verum colligitur, falsum evitatur. Et hinc suos patitur manes mortalium conditio. Multis desunt ejusmodi adminicula atque instrumenta sciendi. Quot adhuc populi sunt, quibus liberales disciplinæ tradantur, quibus sint præsto Doctores? Utique pauci. Apud complures ne minima quidem earum artium vestigia offenduntur, per quas ad verum conscenditur, & eruditus atque excultus animus cavere sibi aliquo pacto ab immensa errorum colluvione potest. Respice Africam, Asiam, Americam, & quæcumque sunt in ipsamet Europa nimium Hyperboreo septem subjecta

Trio-

Trioni. Immo hanc ipsam omnium Beatissimam terrarum Europam intuere. Quotæ hominum parti tam bene vult natura, ut doctoribus affluant, & disciplinis? Quotæ, etiam amfiadsint, iis operam navare solent; aut cupiunt? Quibus profectò perinde est carere optimis artibus, earumque magistris, ac ab iis addiscendis propter impedimenta & negotia vitæ perpetuò removeri. Nemini autem dubium est, quin tanta barbaries, tanta doctrinæ, linguarumque inopia, naturalem insciant foveat; innúmerisque etiam erroribus januam aperiat.

Deinde ipsa hæc sciendi adminicula, sæpè veritatis, ac non raro etiam erroris instrumenta sunt. Ut est hominum genus præ improbitate ad mentiendum ac ad fallendos alios proclive, præ mentis verò infirmitate falli ac decipi facilius potest: ita necesse est, ex aliorum hominum consuetudine, ipsorumque doctorum commercio ad errandum pertrahamur. Hinc parentes, hinc nutrices inde majores, & inde æquales, nos ab ipsa inette ætate fabulis imbuere; perversisque judiciis teneram occupare mentem, quam deinde, novis illatis errorum testibus, ita docti eruditique suis interdum scriptis ac voce deformant, ut longè priore ignorantia deteriorem rerum scientiam si ve intelligentiam habeamus.

Attamen gravioribus etiam causis humanæ mentes à vero percipiendò avertuntur, aut impediuntur. Quod facile patet, ubi consideremus interiores animorum recessus, atque impedimenta veri, quæ ipsi animo sunt aut propiora aut etiam intrinseca. Primæ errorum causa tribui potest hominum phantasie, & memoriæ, Nam simul ac aliqua rerum vivacissima imago in phantasiam irruit, atque in ea fortiter inscribitur, tum difficile anima sese abstinere potest ab ea imagine contemplanda, quam sibi vel nolenti passim ingerit, atque objicit potentissima illa facultas. Dum autem tanta vi ante oculos animæ internos obversantur hujusmodi altè impressa phantasmata, ita liberos animæ motus usurpant ac impediunt, ut ipsa impar eo tempore fiat contemplandis recipiendisve alijs phantasmatis, quorum tamen ad rectè judicandum necessaria meditatio foret. Ad hæc anima occupata à nimium præsentē aut urgente imagine aliqua, satis auscultare neque solet, neque interdum valet rationes aliarum rerum, & placido consilio verum à falso dirimere, bonum, & non malum, eligere. Atque adeo quò fortior est phantasie vis, quò frequentius, aut ferocius in ipsam imago aliqua illabitur,

bitur, eò debilior efficitur animæ virtus in inquisitione atque inventione veri. Ita fit, ut quæ facultas à natura instituta fuit in auxilium dominaturæ rationis, eandem rationem non raro servam efficiat, atque impotenter in homine regnet.

Sed phantasia ac memoria tum maximè rationis confilio nocent, cum unà cum animi perturbationibus, sive affectibus, in nos penetrant imagines rerum tam sensibiliū quàm intelligibiliū. Non solent istæ in penetralia homines ingenti cum impetu deferri, ibique altè insigi, atque internum animæ intuitum in se pertinaciter convertere, quotiescumque ea, quæ à sensibus nuntiantur, aut ab intellectu excogitantur sive percipiuntur, nullum aut etiam levem creant in anima affectum, sive perturbationem. Multa quotidie aspicimus, multa audimus, quæ perinde quasi assiduitate viluerint, ad phantasiam quidem perveniunt, ibique habitant, sed sine ullo, aut summum sine aliquo gravi animæ ipsius motu. Contrà quæ excogitata, seu sensibus accepta, amorem, odium, metum, spem, stuporem, dolorem, aliàsque huiusmodi affectiones in animo excitant, concitatus phantasiam aggrediuntur, profundiusque in ipsa cōsignantur. Hinc fit, ut quoties phantasmata ita conformata mens contemplatur (quod sæpè ultro facit, immo sæpè facere penè cogitur), toties animæ obicitur non solum ipsum phantasma, sed ipsa etiam conjunctæ affectionis notio. Nunquam ferè alicujus hostis imago exhibetur animæ, quin & odii vestigia renoventur in anima. Nunquam latronum avarus meminit, quin timeat. Nunquam amantis animo obversatur conquistæ pulchritudinis species, quin amoris etiam flammæ excitentur. Porro si animi affectus cohibere atque ad normam rectæ rationis redigere, arduum opus est; si nihil verius est, quàm paucorum esse, insidias omnes cuniculos, & abdita machinamenta suorum affectuum detegere, atque eludere; si certum est, importune à conjuncta Phantasia animam vel recusantem rapi ad intuendas & contemplandas imagines rerum, quas alicujus ferventis affectus notio continuò sequitur: quis non intelligat, cum phantasiâ ac memoriâ tum animi perturbationes non solum ad veritatem percipiendam sæpè impedimenta esse, verum etiam complurium errorum fontes esse dicendas. Quod malum cum frequens fit in humanæ vitæ negotiis, frequentissimum tamen est in litterarum studiis, & in eruditorum Republica. Nam, ut alia omittam, ubi alicujus phantasiam occupavit imago,

puta Platonis, aut Epicuri, aut Aristotelis, eorumque opiniones & sententiæ ad animæ nostræ notitiam pervenire. Si admiratio, si amor, si reverentia imaginem huiusmodi consecrata sunt, ita exinde pulsatur atque agitur animus ab ista imagine, & ab istis affectibus, ut sola Platonis, Epicuri, atque Aristotelis dicta magni æstimet, reliquorum contemnat. Contrarium accidit, si pro amore odium, pro admiratione contemptus erga scriptorem aliquamve sententiam concipiantur. Tandiu autem erroribus obnoxia est anima, quamdiu in phantasia ac memoria impotenter dominantur adeò vivida phantasmata, & pergunt sine freno interius regnare priores affectus, quos sola recta ratio diligenter excutiens, eorumque pensans justam injustamve originem, in ordinem cogere & moderari potest.

Voluntatis etiam perversitate fit, ut sæpe ac sæpius erratur. Omnium hominum est, se velle esse beatos. Ex hoc naturali appetitu varia affectuum familia voluntate nascitur. Nihil enim aliud sunt animi affectiones, quam voluntatis motus, vel in bonum acquirendum, aut acquisitum, vel pro bono acquisito, vel propter bonum deperditum, aut nondum acquisitum. Amamus, dum uniri bono, aut in ejus unionem permanere volumus. Dum bonum quærimus, desideramus. Dum non longè à consequendo sumus, speramus. Consecuti, gaudemus. Solliciti ne amittamus, metuimus. In rapientem aut rapere volentem odio & irâ movemur. Propter amissum bonum, dolemus. Idem de reliquis affectibus dicendum. Cæterum si erga unum verum bonum perpetuo moveretur voluntas, semperque prudentiam adhiberet suorum motuum dñcem, nihil voluntati succedere, nihil inde sibi timere intellectus posset. At cum corrupta hominum voluntas plerumque feratur in apparentia bona, quæ mala profectò sunt, quotiescumque animum à vero bono avocant, & arcent: hinc ipsemet intellectus in servituten, miserrimamque conditionem devolvitur, & erroribus innumeris subest. Ruit voluntas in corporeas voluptates, in divitias, in fluxos honores, terrenæ hominis parti, cui arctissimo vinculo & amore conjuncta est, beatitatem, ut sibi persuadet, paritura. Illâ occupat aut gloriæ appetitus, ejusque soboles novitatis ardor, aut dominandi libido, aut aliæ cupiditates huiusmodi, quæ uno concupiscentiæ nomine designantur in sacris Scripturis. Ita imperio delirantis & in varios affectus dissipatæ voluntatis abreptus intellectus, delirare & ipsâ cogitur. Neque enim, dum tam malè

se habet voluntas, & dum corpori nimium servit, menti vacat veritatem perscrutari, atque errores detegere; quippe quæ cum unico studer rationibus, quibus voluntati cõparentur illa apparentia bona. Et siquidem vacat, in irritum sæpe cedit mentis conatus, nõ finente malè sano affectu, ut sincerè mens judicet, & apertè aut subdolè agente voluntate, ut suæ cupiditati faveat & cõsentiat intellectus infirmus.

Tandem ad ritè ac tutò judicandum duo impedimenta supersunt. Primum in eo fitum est, quòd creatæ mortali-um mentes, quanquam latissimè excurrere posse sibi videantur, admodum tamen angustis concludantur limitibus, & spatiis, si cum angelicis mentibus conferantur, ne Deum huc advocem, cujus comparisonem humanæ mentes nullo pacto sustinere possunt. Sunt quamplurima, ad quæ circumscripta vis intellectus nostri, donec in isto mortali corpore versatur, penetrare nequit, quantacumque demum adhibeatur meditationis intentio & ingenii solertia. Multa ex his habet Phisica, plura habet Astronomia, Medicina, ut de aliis artibus taceam. Eo redit mentis conatus, ut probabilia tantum, & verisimilia de his percipiat atque excogitet, non autem certa atque intrinsecus evidentia humanæ rationi. In eundem sensum ferè veniunt, quæcumque credi, non cognosci, dicuntur, qualia sunt tam multa, quæ solam historiam, & famam habent testem, Cùm creatæ hominum mentes omnibus temporibus, omnibusque locis non adfuerint, neque adesse potuerint, aut possint, quod solius est Dei, si tamen cupido subit ea noscendi, quæ præteritis temporibus, & non præsentibus locis, non necessariò contigerunt, atque fuerunt, aut etiam non necessariò sunt, atque contingunt: frustra cogitationis aciem illuc intendimus, quòd per sensus nostros pervenire non licuit, siue non licet. Quamobrem in iis percipiendis dubiæ & fallaci aliorum hominum librorumque fidei necesse est intellectus omnino fidat. Quamvis autè sæpe ista quoque ratione veritas attingatur, non ea tamen certitudine & securitate pedem figere ratio solet, ut omnis prorsus tollatur errandi suspicio. Idem incommodum manifestius recurrit, quoties internas aliorum hominum cogitationes perscrutari lubet, & arcana cordium nocere cupimus. Ab externis quidem signis interna conjicias, sed se novisse, quid in animis alienis interius agatur, quis certò plerumque sciat?

Verum quæ sit angustia humanæ mentis, nunquam melius intelligas, quàm ubi devenitur ad alicujus rei contèpla-

tionem, quæ aut infinita sit, aut aliquid infiniti præse ferat. Tum videas vacillare aciem intellectus, tum occurrere tenebras, & ingens chaos, tum deficientes oculos mentis fateri impotentiam temeritatèque suam. Frustra velit finita potentia rem infinitam metiri, atque complecti. Terrarum orbis mensuram ineas vel uno cubito, atque ulnâ quantum satis est repetitâ, quia suos terra habet fines. At cùm ad infinitum accedimus, quæcumque mensura finita ad illud adhibeatur, nihil proficit; neque tantum unquam dimetiendo progrediamur, quin semper longè major, immo ut melius dicam, quin infinita pars adhuc dimetienda supersit. In Phycis ac Geometricis id genus quædam occurrunt, quorum quidem ideam aliquam ratiocinando nobis comparamus, sed quæ nunquam rerum interminatæ amplitudini respondere possit. Aliis tamen omissis, unum est revera omni ex parte infinitum, Deus optimus maximus, & quicquid in Deo est, videlicet illius potentia, sapientia, providentia, bonitas, justitia, & reliquæ dotes, sive ut appellari solent, attributa infiniti Numinis. Nihil simplici hac veritate certius, nihil evidentius habet pars hominum sanior. Atqui si divinam naturam, si divinas dotes intimè perspicere, subque pede metiri velit humana ratio, duplex illam exitus manet. Aut enim imbecillitate suâ confestim deprehensa venerabunda, & immenso lumine victa subsistet, aut in mille absurdas opiniones, ineptiâsque temerario cursu rapietur.

Alterum impedimentum, à quo sese expedire mens in judicando difficile potest ac solet, proficiscitur ex ignorantia, oblivione, aut prava electione principiorum, quibus uti in judicando necessum est. Sunt quædam rerum ideæ, quædam rationis principia, quædam primæ veritates, vel à natura, vel à divinis humanisve legibus, vel à mutuo hominum consensu tanta vi constitutæ, ut iis nemo plerumque assensum obsequiûmve neget, aut negare possit, ac velit. Secundùm ista principia, rerûmque ideæ, ac veritates ab hominibus judicatur. Nihil autem aliud est judicare, quàm ad hæc principia, ad has veritates, ac ideæ universales, veluti ad regulam certamque amussim exigere singularia, & particularia quæque. Si proportio, æqualitas, similitudo comperitur inter has regulas, atque inter collatas seu comparatas cum his regulis res particulares: tum dicimus istas bene se habere, & veritati, aut rectitudini consentire. Sin secus, falsas aut perversas pronuntiamus *Omnis homo est animal*. En principiu, en regula. Varios homines ad hanc



hanc regulā admoveamus, & æquamus, putā Petrum & Joannem, statimque dignoscimus istos, qui sunt homines, rectè verèque animalia Dei. Quod si alicujus primi principii, seu idæ rectitudo & veritas in dubium vocatur, exploranda est ista adhibitis aliis certioribus magisque generalibus principiis & ideis, è quorum collatione istorum minus generalium, minusque certorum principiorum veritas aut etiam falsitas deinde colligantur.

Facile sibi multorum hominum superbia blandiatur existimantium, perspecta sibi esse quælibet principia, quælibet primas veritates atque ideas rerum, nihilque ob stare, quominus tuto pede ad judicandum properent. Qui tamen tantum sibi tribuunt, primum illud certissimū principium ignorare videntur, quod non à sacris tantum divinitusque traditis Libris, sed & ab ipsis inter Ethnicos Philosophis, atque à ratione edocti sumus: plura nempe semper esse, quæ homini cuicumque nesciantur, quam quæ sciuntur. Id quod homini meditati, & quotidie aliquid discere cupienti, sequæ cum aliis viris eruditione claris componenti, experientia ipsa suadere luculentius potest. Periculum igitur non rarè subest, ne hominem alicujus principii, alicujus primæ veritatis, atque idæ, hoc est alicujus regulæ ignoratio in judicia perversa deducat. Hac certè de causa saltem rudè vulgus sæpè ac sæpius in judicando delirant. Demus tamen liberaliter, acutos eruditosque viros nihil eorum ignorare, quæ futura sunt fundamenta rectis judiciis. Ipsi omnia axiomata, principia, certasque regulas didicerint, quibus judicatur: non idcirco tamen illorū mens omnem semper sustulit errandi causam. Nam quandoque non omnium, cum fert occasio, recordamur, quandoque unum principium pro altero malè eligimus, & regulam non suam aptamus propositæ rei. Et profectò, cum de re quæpiam ritè judicare volumus, opus est ex omni latere, intus, & exterius, rem propositam excutere, in ejus causas, effectus, qualitates, relationes, aliàsque diversas rerum modificationes & formas intendere aciem intellectus, tum circūspicere, ad quam regulam, ad quod rationis principium (quæ millia occurrere possunt, & millia consulere oportet) ea res tum sit exigenda, atque applicanda. Atqui non rarè accidit, ut neque singulas rerū circumstantias, modificationes, relationes, & causas perspiciamus, neque phantasia, memoria, & voluntas, seu deficientes seu ad agendū tardæ, intellectui rē reposcenti offerant, quæcumque principia, & axiomata necessaria ad illam occasionem forent. Quod si

offerunt, mens infirma & incauta, non raro alterum pro altero eligit, secundum quod judicans, cavere sibi ab errore non potest. Unaquæque res quid simile habet cum multis principiis, atque ideis; sed occasionibus datis cum uno tantum omnimodam integramque similitudinem, proportionem, & æqualitatem habet. Quare si pro isto rationis principio, cujus mensura unice adhibenda nunc est, alterum ex iis adsciscas minimè ad istam rem opportunis, similitudine recti & veri deceptus, prævum falsumque judicium pronuntiabis. Judicio, inquam, deficies, non quod malè sibi constet principium illud, sed quod ea in re illud, aut unum illud dumtaxat principium, ante oculos habuisti, inconsultis aliis rationis rectæ documentis tunc longè apertioribus.

Monet me rei dignitas, ut uno aut altero exemplo hîc utar Politicarum legum, ratione minimè dissentiente, axioma est: *Pœnâ capitis plectendum esse hominis injustum interfectorem* Cum hocce generali præcepto componens Judex alicujus sicarii facinus, integram sibi videtur deprehendere similitudinem, ac proportionem inter istud principium, seu inter hanc legem & rem propositam; quamobrem in interfectorem ultimo supplicio animadvertit. Nihilò tamen seciùs errat judex, si istius vitam servari tunc exigat publicum bonum, aut ejus mortem ingentia Reipublicæ damna sint consecutura Tunc enim altera lex, sive alterum principium priore opportunius respiciendum est, nempe: *Ob privatum delictum homini non esse tunc mortem afferendam, cum illum vivere plurimum Reipublicæ interest.* Itidem, *Reverentiam esse debitam locis Deo sacris,* Axioma est inter Catholicos probatissimum, & Religioni omnino conforme. Hoc respicientes non solum Episcopi, sed & ipsi Reges. statuerunt in iis locis immunitatem hominibus levium quorundam criminum reis; quam deinde in provinciis nonnullis extenderunt ad omnia propemodum scelera, arbitrati se rem gratam Deo præstituros, si quibuslibet locis Deo sacris & hoc privilegium accederet. Verùm aliis visum, tantam asylorum amplitudinem non esse ferendam; ad aliud quippe axioma rem retulerunt, nempe: *Deo magis gratam esse debere scelerum pœnam, publica que tranquillitatis ac justitiæ conservationem quam immunitatem Templorum;* imò in ipsorum Templorum recidere, quod scelerum omnium receptacula, & latronum speluncæ fiant, impediántque innocentium securitatem, & inanem efficiant justitiam, quam Deus principibus præcipit. Quamobrem ad hanc potius regu-

regulam, quàm ad superiorem, referendam esse Ecclesiastici azyli disciplinam contendunt. Hæc autem consideratio cum in Politicis, tum in Moralibus, & Phycis, & Theologicis rebus dijudicandis locum habet, atque aded in reliquis humanæ vitæ consiliis & scientiarum meditationibus, in quibus ratio tanquam magistra & moderatrix adhibenda est. Non enim tantummodò fallimur, cum falsa dubiisque principiis, quæ tamen vera & certa nobis esse videntur, singularia componimus, & à regula vitiosa rectam petimus realicujus dimensionem, sed etiam cum certum & verum principium, sed inopportunum, & abs re, tanquam opportunum usurpamus de singulari quapiam re judicaturi.

## CAPUT VII.

*Rationis humana imbecillitas experientiâ teste. Ad ipsius medicinam, ut Religio vera noscatur, necessaria est humanitas, & exposcenda à Deo vires atque sapientia. Quid scientia, quid persuasio, sive credulitas prudens. Prima principia, quibus ratio & prudentia reguntur in inquisitione Religionis vera, qualis est unica Christi Religio, ratione & auctoritate in ipsius probationem confluentibus.*

Quanta à rectè judicando arcere possint humanam rationem, ex istis, ni fallor, constare potest, quæ innuimus potius, quàm explicuimus. Postremæ dementiæ fuerit, nolle in homine aut agnoscere aut fateri multas errandi causas; ambitionis, nullam unquam in se velle credere aut suspicari. Accedat & ipsa experientia. Nulli provinciæ Religio unquam defuit, aut deest, sed compluribus aut defuit, aut deest Religio vera. Excogitari autem non potest delirium ullum, quod populus aliquis non adoptaverit, atque in suam Religionem invexerit. A recensendis tot monstris abstineo. At unde tanta errorum silva excrevit. totumque ferè mundum pervasit? Quæ causæ tam miserandi excidii, nisi quas hætenus oratione nostrâ complexi sumus?

Et ne quis arbitretur uni hominum socordix atq; ignorantix, non autem infirmitati mentis humanæ tribuendas esse tot populorum tenebras ac deliramenta, perinde quasi in investiganda veritate ii nullam unquam collocaverint curam, ingenitâsq; rationis vires aut stultè non senserint, aut ignominiosè neglexerint: præterita tempora expendâ-

tur. Suos olim Brachmanes & Gymnosophistas Indi habuere, suos Magos Persæ, suos Druidas Galli, literis artibusque nobilioribus excultos. Ægyptii, Chaldæi, ac præcipue Phœnices scientiarum gloriâ floruerunt. Quantum autem in disciplinis olim Sinenses processerint, nostra etiam tempora testantur. Ne exceptis quidem Scythiis, qui admirabilem virum Anacharsim dedere nobis, pauci aut nulli populi in vastissimo Asiæ sinu possunt numerari, apud quos antiquitus non habitaverint scientiæ. Immo ex iis ipsis barbaris, ut latè ostendit Clemens Alexandrinus Lib. 1. Stromatum in Europam fluxit quidquid scientiarum in Græcis & Latinis, postea demiratus est orbis. Jam quid in literis præstiterint Græci, & Latini Veteres, paucis ignotum. Divina ingenia, præstantissimos Philosophos, omnium disciplinarum ad miraculum peritos, eo numero, eo pondere antiqua ætas tulit, ut parem proventum nesciverit reliqua posteritas ad finem usque sæculi à Christo nato decimi quinti. Diceres, tum proditum, quid natura possit, & quousque humana ingenia contendere valeant.

Non igitur stipes, non infantes, non homines rationis nescios aut incuriosos ante Christum reperimus, sed viros omni scientiarum laude insignes, atque admirabiles, & unâ saltem in re nobis præferendos, quod ii scientias & artes potius fecerint, quam acceperint, nostramque ætatem suo ingenio etiamnum illustrent, non futuram aded in literis eminentem, nisi eorum lux præcessisset. Sed ut talium ingeniorum felicitas nota est nobis, ita & eorum infelicitas in assequenda omnium nobilissima veritate Religionis veritatem intelligo, tametsi æquè constet, ex antiquorum perpetuis in re literaria dissidiis, multam veritatis partem eos fugisse cum in Physicis, tum in Moralibus, Astronomicis, Geographicis, Historicis, aliisque ejusmodi studiis. Enixè quidem perscrutati sunt divinam naturam, providentiam, ac potentiam, & investigarunt, quicollendus foret Deus, & quæ ipsi debeat mortalium natura, quidquid homo homini debeat. Sed bone Deus! in quot absurdas atque impias opiniones prolapsi non sunt? Nunquam magis revelata est humanæ rationis imbecillitas. Nam aut indigna Deo senserunt, aut indigna homine, & omnium una Religio fuit idolorum cultus. Qui sibi omnium acutissimi videbantur, ii aut ipsum Deum sustulere, aut animæ immortalitatem, in teterrimum propterea scelus miseriamque devoluti. Alii verò suæ Religionis falsitatem rectè

rectè argumentando noverunt. Sed nota Ciceronis vox est: *Visum iam facile vera invenire possem, quàm falsa convincere.* Quare nesci quidem factum est, ut assecuti sint Religionem veram. *Impugnata sunt*, aiebat Lactantius Lib. 2. cap. 3. *divin. Institutionum, à prudentioribus falsa Religiones, quia sentiebant esse falsas; sed non est inducta vera, quia qualis aut ubi esset, ignorabant.* Itaque sic habuerunt, tanquam nulla esset omnino, qui veram non poterant invenire; & eodem modo inciderunt in errorem multò majorem, quàm illi, qui falsa tenebant. Veterum autem Philosophorum errores, atque insipientiam, ità Apostolus delineabat Cap. I. 21. ad Romanos scribens: *Cum cognovissent Deum, non sicut Deum glorificaverunt, aut gratias egerunt; sed evanuerunt in cogitationibus suis, & obscurata est insipiens cor eorum; dicentes enim se esse sapientes, stulti facti sunt.* Et mutaverunt gloriam incorruptibilis Dei in similitudinem imaginis corruptibilis hominis, & volucrum, & quadrupedum, &c. Similia scribit ad Ephesios. Cap. IV. 17.

Sed quorsum hæc disputatio, & cur tot rationibus & exemplis confirmare pergimus humanarum mentium calamitatem in investigatione veri? Ecquid amplius restat, nisi ut cum Academicis & Scepticis amicitia inita, nihil esse certi, nihil veri sub sole credamus? Absit à nobis tantæ insanix periculum; siquidem non insani mintus ii sunt ac deplorandi, qui omnia vi suæ rationis assequi posse sibi videntur, quàm qui nihil. Eò argumenta nostra attentum Lectorem non deducunt, neque porro deducere possunt. Non extinctum sed infirmum esse in homine rationis vigorem, & verum difficile posse ac solere inveniri diximus; non autem ejus inveniendi spem omnem sustulimus. Illud enim, quòd nostri intellectus aciem & capacitatem superat, dum animam mortale corpus alligat, & premit, si intelligere planè velimus, aut aptè intelligi posse opinemur, risum veris sapientibus moveamus. Itaque non ingenium, non rationem excludimus à perquirenda Religione vera, sed eorum suademus moderationem, omnibus utique in tanto negotio, si quidquam sapiunt, apprimè necessariam. In quo autem sita sit hæc moderatio, deinceps explicabitur.

Primò noscenda est homini suæ mentis rationisque imbecillitas, quo nihil facilius, dum secum in animo verset, quælia & quanta cognitionem veritatis impendant, & in errorem adducant. Sibi ante oculos sistat exempla tot excellentium virorum, quorum ingenio & eruditioni im-

parem se forſitan ſentiat, aut ſaltem, niſi ambitioſiſſimè ſecum agat, ſe non reputet ſuperiorem Cùm iſtis non contigerit, ut acie ſui intellectus religionem veram aut detexerint, aut ſatis intellexerint, aut intellectam ſuſceperint, immo etiam pateat in errores multos opinionèſque ridendas ipſos conſeſſiſſe : quid è viribus propriis ſperandum ſit, tandem agnoſcat. Præterea auctor eidem futura eſt ipſamet ratio, ne nimium ſibi arroget, ne nimium fidat. Nam qui tantum ſibi polliciatur ac tribuat, ut arbitretur, ſe optimo ingenio atque admirabili iudicio pollere, quibus nihil pervium non ſit? ſe nullis detineri falſis præjudiciis? ſibi omnia diſciplinæ ſubſidia, atque inſtrumenta ſciendi ad eſſe, ſeque iis ritè ſemper uti? nihil menti ſuæ atque iudicio officere inordinatos corporis motus & voluntatem ſuam, quæ ab univerſis pravis cupiditatibus, atque ab impotentia & fraude quorumcumque affectuum libera ſit oportet, ut rectè iudicetur? ſibi denique perſpecta eſſe, neque ſolùm perſpecta, ſed & præſentia quælibet principia, primæſque veritates atque ideas omnes, quibus iudicia recta niti neceſſe eſt, atque ex his principiis, quod opportunum & congruum pro rei propoſitæ dimenſione ſit, non verò alterum atque inopportunum, fuiſſe in iudicando ſemper electum? Qui tam magnificè de ſemetipſo ſentiat, ne ipſe quidem in interno ſuæ mentis tribunali, ubi ſincerè ſecum ineat rationes, ſe ab arrogantia ac temeritatis culpa abſolvat.

Secundò, poſt ſuperbiam in ſe deprehenſam, atque proſtigatam, ratio poſcit, ut humilitas & animi depreſſio ſubſequatur; hanc autem conſoletur auxilium, ſi quod eſt, deſiderium & ſpes. Et quoniam à nobis utpote infirmis hanc opem ſperare non licet, neque tutò ſemper ab aliis mortalibus, qui falli aut fallere poſſunt : reliquum eſt, ut ad Deum omnium parentem, omniſque boni auctorem, ſeſe convertat mens humilis, & ſapientiam atque intelligentiam ab ipſo depoſcat. Id quod Iacobus Apoſtolus prædicabat in Epiſtola ſua Cap. I. 5. his verbis : *Si quis autem veſtrū indiget ſapientiā, poſtulet à Deo, qui dat omnibus affluentia, & non impropert, & dabitur ei.* His poſitis principiis, ad Religionem inveſtigandam ſe alacriùs conferat humana ratio, ubicumque ſpes eſt eam inveniri poſſe. Sæpè etiam non quærentibus offeret divina clementia per pios Libros aut præcones veritatis ſuæ. Negari autem non poteſt, quin facilis & tutus ad Religionem veram aditus foret, ſi illam Deus ipſe homini immediatè revelaret Quid enim

enim ampliùs titubet humana ratio sub tanto præceptore hoc est ipsâ primâ veritate docente? Sed temerè postules, multò etiam magis temerè speres, Deum usitatis naturæ legibus à se stabilitis tui causâ renuntiaturum, quò te ipse per aliquod prodigium ad veritatem adducat. Illud potiùs sperandum, clementissimum Numen alicui ex hominibus verè piis, suisque Prophetis, tradidisse, quæ de ipso credenda sint, & qui cultus sit sibi ipsi adhibendus. *Scit enim Dominus cogitationes hominum quoniam vana sunt*, ut ait S. David in Psal. 93. 11. Cùm in eum præcipuè finem homines creâsse censendus sit, ut ab his amaretur, & glorificaretur, meritò quoque existimare juvat, aliquam ab ipso revelatam fuisse Religionem, per quam docerentur homines verum amorem veramq; gloriam suo reddere Creatori. Id præstare illius sapientiam & clementiam decuit, id subsidii habere nostræ imbecillitati necessarium fuit. Neq; in loco tam abdito veritatem suæ religionis constrinxisse credendus est Deus, ut nullus ad ipsam humanæ unquam rationi sit aditus. Sed potiùs ità constituisse censendus, ut si rectè uti velimus illius auxilio, & naturalibus rationis humanæ viribus, ad eandem veritatem pervenire tutò liceat. Ille ad se advocat homines ratione præditos, & per gratiam quidem suam, sed non sinè ratione vult ad se veniri. Sint licet oppido tennes humanæ mentis vires, dum ad sit divinus favor, multum valent, atque per eas cognosci revelatio religionis veræ à falsis atque confectis distingui potest. Igitur inter nimiam abjectionem sui, nimiamque ambitionem ingenia continenda sunt; utrinque enim periculum subest, ut aut nulli aut falsæ revelationi adhibeatur fides. Quæ autem hîc sint rationis humanæ vires, & qui rectus earum usus, nos ipsa ratio docebit.

Nos verum duobus modis attingi diximus, vel scientiâ vel persuasione, sive crudelitate prudenti. Primum contingit, cùm per demonstrationem & syllogismos, ex certis præmissis constantes, aliquid, quod necessariò sit, aut fuerit, aut esse debeat, sive debuerit, intelligimus. Id per rationem intrinsecam nos scire tum dicimur. Alterum fit, cùm aliis hominibus aliquid non necessarium, sed contingens narrantibus, fidem habemus, & verum ab ipsis narrari credimus, cùm ipsamet ratio per argumenta non quidem demonstrativa, sed verisimillima, atque evidentia extrinsecè nobis persuadet, eos neque falli in ea narratione posse, neque fallere velle. Id nos per prudentiam credere tum dicimur. Sunt autem regulæ quædam, per

per quas ad sciendum, aut prudenter credendum in hac vita perducere possumus ac solemus. Per multa ex his aut naturæ lumine, aut consensu hominum tum doctorum, tum indoctorum per omnes terras ita sunt pervulgata ac probata, ut nemo sanæ mentis aut ignoret, aut neget, aut auditis consentire nolit. Nam, ut Cic. ait cap. I. de Natura Deorum, *de quo omnium natura consensus, id verum esse necesse est.*

Nemo exempli causâ non cognoscat, aut si fortè nondum animadvertit, edoctus non statim intelligat, quàm vera sint & necessaria principia ista, videlicet: *debere esse primam aliquam omnium rerum & causarum causam; hanc esse ab homine colendam atque amandam; homines ex se ipsis, & sine Dei amicitia, esse non posse beatos; lumini natura adversari, plures esse Deos; nefas esse indigna & nefanda tribuere Deo, & creaturæ ipsius Des loco habere, & arbitrari; fato ac præcedenti necessitate hominum voluntates trahi ad bonum, & malum.* Contra verò nemo non fateatur, *honestum esse & bonum, nemini contumeliam inferre, suum cuique tribuere, alteri non facere, quod sibi quisque nolit fieri; aliâque sexcenta ejusmodi: suis itidem legibus prudentia regitur, quas unusquisque probat, quales sunt: Credendum est, verè contigisse, aut fuisse, aut esse aliquid, cum id ab hominibus narratur, qui recti iudices ea in re esse potuerunt, & quæ nulla verisimilis ratio aut erit, & esse aut imponere voluisse persuadet, cujusmodi est, aliquam urbem, aut montem, aut fluvium esse, vel fuisse, aliquod prælium commissum, apparuisse aliquem cometam, & olim regem, aut alium virum vixisse, & quædam egisse.* Item negandum non est, quin sit alicui Auctori Liber tribuendus, cujus nomen præfert adhuc, & cujus fœtum ab origine sua constat fuisse habitum, fidem hujus rei facientibus, aliis æqualibus scriptoribus, aut nemine contradicente, aut nullâ aliâ ratione verisimili in contrarium pugnante. Præterea sine rationibus admodum urgentibus adjungenda citò non est fides aliquid narranti, quod usitatas naturæ leges superet, atque in commodum narrantis apertè vergat. Nunquam verò fides adjungenda est novum aliquid tanquam à Deo sibi revelatum adferenti, & cœlestem legationem jactanti, si ab honestate ac pietate abhorreant illius dogmata, ac mores, & quando etiam non abhorreant, nisi ipse evidentibus signis doctrinæ suæ veritatem firmet. Hæc aliâque hujusmodi principia, quicumque ratione utitur, improbare nolit, ac nequeat.

Dum ergo religionis veritatem quærit humana mens, aut



aut eidem proponitur amplectenda religio, duo occurrunt, nempe, an reverà à Deo revelata fuerit illa religio, tum quid illa revelatio contineat exhibeatque sciendum, five credendum. Ad cognoscendum autem, revelata ne fuerit, necne, religio proposita, vel sola prudentia Deo adstante perducit, & perducere potest. Nam omnibus hominibus, dummodo non pueris, neque fatuis, prudentia sufficit communes illas regulas & leges, quarum subsidio unicuique intelligere fas est, num sit credenda, an rejicienda illa revelatio; & rursus adeò evidentia & multa sunt argumenta, quibus una Religio Christiana ad Judæicæ complementum à Deo revelata probatur, & reliquæ confictæ ab hominibus, five depravatæ ostenduntur, ut nemo futurus sit, qui à credendo absteineat. Subsequitur eorum inquisitio, quæ in Christiana Religione Deus revelaverit. Multa hîc sunt humanæ rationis viribus pervia. Sunt alia, quæ non rudibus tantùm, sed etiam acutis ingeniis impervia videntur, cujuscmodi sunt, Deum unum esse & trinum, Verbum divinum humanam carnem induisse, homines in postremo judicio iterum suo corpori esse restitutos, atque id genus alia. Igitur hîc modum habere debet inquisitio, suæque infirmitatis monenda est humana ratio. Quæ per syllogismos certos vera intelligi possunt, intelligantur; quæ verò non possunt, credantur. Hic est rectus humanarum virium usus, in quo nescias, utrum plus obsequii Deo revelanti præbeas, an prudentius imbecillitati tuæ consulas. Secus facere, ambitiosi, temerarii, atque insani ingenii fuerit. Etenim constat, divina esse supra humanæ rationis captum; ideòque mortalium menti, cum veneratione hæc esse accipienda, non autem ambitiosè nostro subjicienda judicio. Præterea quid absurdius excogitari potest, quàm nihil aliud credere velle de natura & voluntate divina, quàm quod tu intelligere possis? Debitne igitur infinitus Deus talis esse tantummodo, qualis finitæ menti videri potest, eaque dumtaxat velle, quorum tibi perspicuæ forent causæ, effectus, & ordo? Non effugiat miseræ amentię notam idiota, si falsa affirmare velit, aut vera credere nolit, quæ Philosophis, atque acutis viris certissima apparent, non aliâ ductus ratione, quàm quod ea capere ipse non valeat. Multò autem major illorum est dementia, qui à Deo veritatis fonte revelata, vera & certa reputare nolit, quod sui intellectus acumen excedant.

At isti continuò inquierent, sibi nullam de veritate Dei  
reve-

revelantis occurrere dubitationem ; solum se suspicari, num fallantur aut fallant, qui Deum hæc revelasse tradunt. Non facile credendum esse hominibus ex opinione quoque nostra. Auctoritati autem divinæ humanam quidem rationem submittere fasces debere , vel sine ratione accepta ; sed cum sine rationibus vult auctoritas humana fidem facere divinæ revelationis , auscultandam statim non esse quippe non raro fallacem. Si ergo istis credimus, etiam si quædam à Deo revelarentur, quæ intelligere humana ratio non valeret , adhuc tamen ab ipsis vera crederentur, dummodo certi sibi forent , eadem à Deo revelata fuisse. Nos autem diximus, adeo evidenter probari per homines, credibilitatis motiva adferentes, Christianam Religionem à Deo revelatam fuisse, ut homini prudenti integrum non sit eidem negare assensum. Quid ergo amplius expectant, ut vera itidem credant, quæ per tam evidenter credibilem religionem proponuntur certissime tradita à Deo ? Quod si nonnulla occurrunt in revelatione Christianæ legis, quæ menti humanæ impervia videantur, hæc tamen ea sunt, ut non sine ratione sint credibilia. Ratio enim docet, vera esse, quæcumque à Deo revelantur ; nihilque ideo esse falsum, quod captum superet humani intellectus, & divina esse supra rationem humanam ; eaque solum reputanda sine dubitatione falsissima, quæ sunt aperte contraria rectæ rationi. Dogmata autem religionis veræ, qualem nos dicimus esse unam Catholicam, nihil habere, quod rationi rectæ adversetur, jam luculentissime demonstratum est à viris doctissimis, & sentiet ac fatebitur quilibet æquus iudex, vel Christianorum sacris nondum initiatus. Siquidem patet, contradictoria, sive contraria non esse, quæ de Unitate, ac Trinitate in Deo prædicantur, cum illud essentiam, & substantiam, istud personas respiciat ; & hoc ipsum personarum nomen neutiquam accipiatur, quemadmodum in humanis, sed inventum sit atque usurpatum in divinis, loquendi & disputandi necessitate de ineffabilibus rebus. Cætera dogmata, si rectè conferantur cum omnipotentia, justitia, clementia, providentia, aliisque Summi Dei infinitis attributis, quanquam excedere vim intellectus creati atque finiti interdum sentiantur, manifestè tamen cognoscuntur non adversantia rectæ rationi. Atque hætenus vidimus, quæ ingenii moderatio hominem deceat nondum veram religionem affecutum. Nunc restat videndum, qui itidem se regere debeant hominum ingenia, ubi jam Christianæ Religionis dedere nomen. Quippe non minus periculosa

culosa est, immo etiam magis periculosa est nonnunquam ingeniorum libido in homine veram religionem amplexo, quam amplexuro. Saltem nihil differt medio in mari naufragium facere, & medio in portu, quando naufragum certa mors utrobique maneat.

---

## CAPUT VIII.

*Qui noscenda vera Christi Religio inter tot ejus sectas. Scriptura sacra primum veritatis promptuarium. Sed viribus nostris difficile intelligenda vera doctrina. Aliquem veritatis visibilem interpretem sua religioni Deus dederit oportet. Ecclesia vera, verax, & ab errore immunis; atque hac una est Catholicorum Ecclesia.*

**D**uplex eorum genus est, qui Christianam Religionem à Deo fuisse revelatam sentiunt & credunt. In alteros à teneris annis beata hæc & sanctissima persuasio irrepsit. Alteros jam adultos præveniens gratia Dei pertraxit per argumenta credibilitatis ad perspiciendam cum falsitatem reliquarum religionum, tum veritatem unius Christianæ legis. Sed ne sic quidem istorum ingenia conquiescere aut possunt aut solent, quoties occurrit hæc ipsamet religio in tot sectas divisa, & prope comminuta, quarum quælibet sibi veram Christi hæreditatem tribuit, cæteris improbat, & falsi postulat. Hinc est Catholica, quæ in singulis orbis partibus, & præsertim in Europa, Ecclesias ostendit. Illinc præter Schismaticos Græcos habet Oriens Nestorianos, Eutychianos, Monothelitas, aliósque complures vel antiquos, vel recentes Hæreticos. Numerat Occidens Lutheri, Calvini, Socini, Anabaptistarum, Bohemorum, Anglorum filios & sectatores, & mille alias vel sine nomine Christianorum sectas, quibus & ipsa Africa in Abyssinorum imperio abundat. Apud singulas hæc gentes Evangelium regnat, & Christi nomen cum veneratione sonat; cæterum in doctrina Christi explicanda mirum est, quantâ opinionum varietate & dissensione inter se digladiantur. Quid hinc faciat? quò se vertat humana ratio de invenienda veritate, vitandòque errore sollicita? Num cum jam posuerimus, à Deo profectam esse

esse religionem istam, Deus autem discordia, & contraria revelare nequiverit : sicuti fieri non potest, ut omnes istæ opiniones sint falsæ, ita certum est, nisi unam esse posse veram. Sive igitur quis alicui Christianorum sectæ sese adjungere velit, sive jam sese adjunxerit, necesse est anceps animi diu pendeat, donec intelligat, quæ sit lucis & veritatis, quæ tenebrarum & erroris regio. Hic autem suus quoque rationi esse debet locus, dummodo & hic suæ memor imbecillitatis intumescere nolit, séque regi patiatur quibusdam salutaribus regulis, quæ tutissimè ad veritatem perducunt. Age verò, quænam sint istæ regulæ dispiciamus.

E tam variis Christianorum sectis nulla fermè est, quæ divinas utriusque fœderis Scripturas non amplectatur. Eas esse primum veritatis canonem, ibique contineri fundamenta & præcipua saltem ac necessaria revelatæ religionis dogmata, quidque credendum, quidve agendum, ut quis verè Christi sectator dicatur, & sit, una omnium vox est. Quare hinc iter instituendum videtur; nam quî meliùs speres te assurrecturum ad veritatem, & in errores non declinaturum, si Scripturis sacris, hoc est divinâ voce & lumine, regaris? Et profectò maximum sacræ literæ sunt rationis humanæ subsidium, simul & frenum. Per illas intellectus mirum in modum proficere potest, dum certa illic se habere intelligit, & credere revelatis illic jubetur, & vanas cogitationes substernere certissimæ Dei revelantis veritati. Proinde suboritur prima hæc regula : *Firmissime credenda sunt, quacumque verè & evidenter sacris iis in libris habentur, & nihil credendum, quod iis verè & evidenter adversetur.*

Progreditur itaque ratio, & quid reapse divinis in litteris tradatur, & quid iisdem repugnet, inquit. Sed hic titubare incipit infirma potentia, rhodum & saltum videns. Nisi homo cæcâ temeritate agatur, & monita prudentiæ flocci pendat, hic subsistat necesse est. Nam primò qui certò sciat, quæ sint Scripturæ divinitus traditæ, cum de legitima quarundam origine dubitari & disputari intelligat? Quî deinde sibi polliceatur, se in legitimos omnes sacrorum librorum sensus ingressurum, quando linguas perfectè non calleat, quibus in origine sua descriptum fuit ex imperio divino Testamentum utrumque? quando nulla adsit versio, cui tutò fidendum cognoscat? quando tot obscura, & in speciem contraria occurrant, in quibus aut facile falli potest, aut iudicium saltem suspendere cogitur?

Testis

Testis autem S. Petrus in Epist. i. in interpretandis Pauli Epistolis multos errasse, eò quòd in iis sunt quædam difficilia intellectu, quæ indocti & instabiles depravant, sicut & cæteras Scripturas ad suam ipsarum perditionem. Et in hæc quidem & alia impedimenta evidenter impingat omnium rudium atque indoctorum hominum ratio. Quod est ad perspicaces eruditosque viros, ne ii quidem multum hîc habent, quod suis è viribus sperent, quamvis Orientalium linguarum peritiâ, & Critices, aliarumque artium & scientiarum subsidiis instructi. Si enim verè docti sunt & humiles, nusquam evidentius quàm illic perspiciant, quæ sit humani intellectus ægrotudo, & ardua quæstionum copia atque sublimitas. Sin ambitiosi accedunt, nullus controversiarum & difficultatum est modus; unusquisque enim facile in suo sensu abundat, & opinionibus anteceptis in transversum rapitur, & aut novitati, aut suis cupiditatibus studet, sive etiam totam operam in suo cœtu potius, quàm in ipsa veritate tuenda incautus impendit. Neque mentiri nos finit experientia ipsa. Meridiano sole clarius est, ab ipsis Religionis Christianæ incunabulis ad nostra usque tempora viros eruditione & ingenii acumine præstantissimos interpretandis sacris Literis, atque in statuendis earum ope gravissimis Christianæ fidei dogmatis, toto inter se cœlo dissensisse, & adhuc dissentire, nullamque esse tam impiam Hæreticorum sententiam, quàm non ipsi sibi videantur è divinis Literis depromere, atque inde confirmare. Quare idem periculi sibi imminere sentiant reliqua ingenia, licet pari literarum cognitione exculta, & acumine simili prædita. Quis igitur nisi superbus aut imperitus illud non videat: *Difficillimum, nempe, esse humanæ rationi viribus assequi propriis, quacumque dogmata verè habeantur in Scripturis divinitus traditis, quæve ipsis repugnent?* Atque hæc altera esto regula, quam ratio considerans necesse est, non solum ut ne nimium sibi fidat, sed ut etiam aliam, si qua est, commodiorem tutioremque eligat viam ad intelligentiam divinorum voluminum.

Hanc autem viam in terris haberi tum divinæ clementiæ consentaneum, tum humanæ imbecillitati necessarium est. Si enim tantopere, atque à tot sæculis, tot acutissimi ac solertissimi viri dissentiant in constituendo, non solum quæ sit vera sacrorum Librorum doctrina, sed etiam qui libri sint in Canonem Hagiographorum referendi: quid rudibus & infirmis facias, quibus non idem est mentis vigor, & eruditionis copia? Quid isti sperent, imò quid sperent

omnes, ubi expendere prius velint tot ardua loca, unumque cum altero conferre, & interpretes diversos perscrutari: ad quæ præstanda non solum temporis multum, sed immanis subsidiorum apparatus exigitur, iisque etiam præstitis ipsimet eruditi aut dubitare, aut in oppositas abire sententias hucusque perrexerunt. Igitur aut serò, aut nunquam, aut semper cum dubitatione aliqua, sibi persuadebunt homines, germana Scripturarum sacrarum dogmata, iisque contrarios errores se recte intellexisse. Misera planè veritas christianæ Religionis, ubi cognosci non possit inter tot & tam varias Christianorū sectas, nisi per hoc arduum, incertum atque etiam quodòque periculosum scripturarum examen. Fierine verò potest, ut cum omnes homines salvos fieri & ad agnitionem veritatis venire velit, omnibusque Evangelium prædicari mandaverit Deus, ita ab eo constituta fuerit Religio christiana, ut quæ vera sit inter tot falsas illius sectas dignosci facilius non queat.

Restat igitur, ut optimus & clementissimus Deus commodiore ac breviori via consuluerit hac in re mortalium generi. Ea autem via esse alia non potest, quam quæ superius homini præscripta est, ut facile ac tutò christianæ Religionis veritatem à non christianarum falsitate distinguat. *Extrinseca argumenta credibilissimis* hinc etiam præsto sunt ut evidenter comperiatur, quæ vera & germana sit inter tot Christianorum sectas hæreditas & Ecclesia Christi. Et sicuti cognitâ sanctitate Religionis christianæ, hæc una prudenter amplectenda est, cæteræ ejurandæ; idque credi prudentissime potest, & necesse est credere quod ab ipsa proponitur, etiam si aut intrinsecæ rationes non adferantur, aut superare captum humanæ mentis credenda deprehendantur: ita ubi evidenter patuit, quæ sit vera Christi Ecclesia, in hujus unius sinum, cæteris Christianorum falsis Ecclesiis repudiatis, prudenter confugere possumus, ac porro debemus, & quæcumque ab ipsa traduntur, quanquam ab Hæreticis in controversiam vocata, firmissime credere. Duo itaque cognoscenda sunt humanæ rationi (& hæc facile cognosci posse pronuntiamus) ut ritè prudenterque suum cursum in hoc negotio peragat. Alterum est; quæ sit hæc vera Christi Ecclesia; alterum, cur istius Ecclesiæ dogmatis acquiescere prudenter possimus, ac debeamus, vel nondum excussis tot obscuris divinorum codicum locis, & nondum perpensis tot quæstionibus inter Christianorum sectas vigentibus. A postremo incipiamus.

Vera à Christo constituta Ecclesia idem nobis sonat ac  
homi-

hominum Congregatio, ejusdem Christianæ Fidei, ejusdem veræ doctrinæ professione, eorundem Sacramentorum communione, & vinculo caritatis sub uno capite Christo unita, in qua legitimus sit ordo, ac regimen Pastorum. Ecclesiam istam usque ad finem seculi duraturam nullus Christianorum negat, & sacri Libri, unæque cum eis ipsa ratio, evidenter persuadent. Veritas autem ne ab ipso quiddam Deo mutari destruive potest. Quare quæ ipse Deus verissima revelavit, æterna sint oportet. Idem quæ ipsemet eventura esse pollicitus est, eadem necessario fiunt, non enim est fallax Deus, neque ex impotentia à præstandis promissis unquam impediri potest. At ille Religionem suam, atque Ecclesiam, & verissima dogmata per Moysen, per Prophetas, & postremo per Christum revelavit. Hanc etiam Religionem, & Ecclesiam suam promissit perpetuò regnaturam in terris, quippe institutam, ut ejus ductu homines verum salutare cognoscant & credant, & recta peragere discant. Neque mortalium scelera eò usque crevere unquam, aut crescere possunt, ut aut divinam transcendant clementiam, aut ejus voluntatem & promissa fraudent, sanctam illius Religionem & Ecclesiam evertendo penitus, & abijciendo. *Super hanc petram*, inquit Christus Matth. xvi. 18. *edificabo Ecclesiam meam, & porta inferi non prævalebunt adversus eam.* Ex Matth. ult. *Ego vobiscum sum omnibus diebus usque ad consummationem seculi.* Si igitur æternum duratura est Ecclesia, quæ sanctissimæ istius Religionis sit custos, necesse est etiam, ut ibi æternum veritas duret, & veræ, non falsa dogmata tradantur. Nam si Ecclesia errorem in dogmate rebusque fidei credat, erroremque alios doceat, jam vera Christi veracis desinat esse Ecclesia; quod tamen fieri non posse nobis constat.

Deinde si semel errorem in doctrinam Ecclesia invehere, invehitque probare possit, non erit, cui in posterum tutò fidat populus indoctus, immo & ipsa doctorum Republica. Nemo veram se tradere inquit Religionem, suumque cœtum verè Orthodoxum appellet, quando dubium suboriri perpetuò potest, an is cœtus errori obnoxius errorem hauserit, errorem doceat. Nemo sibi arroget germanam Scripturarum sanctarum interpretationem, nemo sibi persuadeat, se divina verba recte intelligere, ubi Ecclesia ipsa (cui Spiritum suum Jo. xiv. 16. Christus tradidit) deficere, erroresque adoptare possit. Quod si ad humanam rationem spectare ais postremò cognoscere, an Ecclesia errarit, & num recte, an secus, interpretata sit scripturas

à Deo nobis datas: utique ad infirmisissimum, ut vidimus, aut saltem non satis fidum tribunal me rapis. Præterea si rationem à se stare unusquisque contendat, quis litigandi finiserit? Certè hanc sibi militare quælibet Christianorum secta arbitratur. Restat igitur, ut aliâ tutiori viâ hominum necessitati Deus consuluerit, certumque aliud visibile tribunal constituerit, à quo fideliter divinarum Scripturarum mysteria explicentur, Fideique Christianæ atq; Orthodoxæ veritas perpetuò custodiatur. Hoc autem tribunal nullum aliud esse potest, quàm Ecclesia ipsa perpetuò duratura, *in qua*, ut ait S. Paulus, *posuit Deus Doctores, Pastores, Prophetas, & Apostolos ad consummationem Sanctorum in epus ministerii, in adificationem corporis Christi, donec occurramus omnes in unitatem fidei, & agnitionis Filii Dei, in virum perfectum & mensuram ætatis plenitudinis Christi.* Imò evidentissimè significat idem Apostolus 1. ad Tim. 3. Ecclesiæ veræ nos edocenti acquiescendum esse, cum ipsa sit *columna & firmamentum veritatis.*

Itaque prima & certa non errandi ratio sita est in veracitate revelantis Dei, sacrorumq; librorum æternâ veritate. Deinde accedit præsidium aliud visibile à Deo positum, quo certi siamus, utrum, quæ nobis credenda proponuntur, à Deo revelata verè fuerint, & an recta sit divini verbi interpretatio: & hoc in veracitate ac stabilitate proponentis Ecclesiæ situm est. His autem positis fundamentis, unum postremò humanæ rationi investigandum superest, nempe quænam sit hæc vera Christi Ecclesia. At homini ingenuo, & veritatis unius amanti, non est id cognitu difficile. Sunt enim quædam notæ ac signa, quibus Ecclesia vera à falsis ac fallacibus ita distinguitur, ut non ingenio magno sit opus ad eadem perspicienda, atque ad Ecclesiam veram ex iis dignoscendam. Unitas doctrinæ, fidei, caritatis, & mysteriorum; sanctitas & efficacia dogmatum, probitas morum, gloria miraculorum, antiquitas, amplitudo, origo ab Apostolis, & continuata successio Episcoporum in Ecclesiis, ac præcipuè in Apostolica Sede omnium magistra, aliæque huiusmodi, quæ cum apud veteres Patres, tum apud recentiores Theologos congeruntur: ea sunt, quæ nos de vera Christi Ecclesia certissimos faciunt. Et cum aut horum nihil, aut nonnulla quidem, sed non singula & omnia in nullo Christianorum ordine coeant, & verificentur, præterquam in Catholica Romana Ecclesia, facile etiam intelligimus, hanc unam, & nullam aliam præter hanc esse germanam Christi Ecclesiam. Quod si hæc ve-



in Christi Ecclesia est, ergo verum fuit semper, quod illa docuit, verum est, & erit, quod illa docet ac docebit; neque titubare, neque contraire, nisi temeritate intolerabili, potest hominum ratio, sed jure conquiescere debet, cum Ecclesia ista munere divino verax, visibilis æternumque duratura, quid sit in sanctissima Religione credendum proponit.

## CAPUT IX.

*Ecclesia Catholica perperam negata ab Hæreticis immunitas ab errore. Protestantium Methodus in inquisitione vera doctrina quàm temeraria, & quot Hæresum origo. Catholicorum Methodus quàm laudanda. Non ingenio privati cujusque hominis dimittenda sacrarum Literarum interpretatio in dogmate. Vox Ecclesie vera hic audienda, Deo id precipiente.*

**E**Quidem puto, non posse non probari ab hominibus ingenio pollentibus & æquitatis ac veritatis cultoribus traditum hætenus rationis iter in inquisitione veræ Religionis. Sed quid non exspectes ab immoderatis ingeniis, ubi plus sapere velint quàm oporteat sapere; ubi plus sibi tribuant, quàm hominis infirmitatem deceat, ubi turbidis ac effrenatis animi affectibus se rapi sinant? Primò nonnulli visi sibi sunt in Ecclesiæ dogmatibus errores deprehendere. Processerunt itaque ad negandam Ecclesiæ immunitatem ab erroribus. Deinde cum ea dogmata, quæ ipso- rum ingenio à veritate abhorreere videbantur, in Ecclesia Catholica Romana eorum matre aut traderentur, aut tradi putarentur: reliquum fuit, ut Ecclesiam istam à Religionis veræ custodia ac professione excidisse censerent. Denique unam statuerunt *veritatis Christianæ regulam divinas Scripturas*, in quibus omnia manifestè contineri ajunt Christiano populo credenda; nihilque porro credendum, quod istarum suffragio manifestè non probetur. Libentissimè exceperunt has voces complura alia ingenia, partim novitatis cupida, partim spe veritatis tutius assequendæ excitata; quodque facile fieri solet, ignaris quoque populis persuaserunt. Et altas aded radices in eorum animis egit ista persuasio cum lacte hausta, ut æquas amplius audiendæ veritati non præbeant aures, sed ex istis præjudicatis opinionibus singula dimetiantur.

Non hic repetenda, quæ à doctissimis inter Catholicos, iisque plurimis viris hucusque scripta, apertissime produnt, quàm malè confuta sit, & quàm facile evanescat huiusmodi fabula. Neque enim ullius erroris infimulari potest Ecclesia, uti patet ex istorum Libris: & ne cogitandum quidem est, eam in errores prolapsam, nisi Christum falsa promississe ejusque Apostolos falsa tradidisse concedamus: quod sanè dementis est vel suspicari inter Christianos. Tum ex iis dogmatis, quæ Ecclesiæ Catholicæ à Protestantibus tribuuntur, nonnulla eidem falsò tribuuntur, reliqua verò ab errore longè absunt. Nostrum est tantummodo investigare, num tutum ad veritatem iter arripuerint Protestantium ingenia; non arripuisse autem cum certum est Catholicis omnibus, tum reliquis certum esse deberet, si in considerationem veritatis oculos linceros sollicitosque intenderent.

Hæc est Protestantium methodus. Ex unis divinis utriusque Testamenti Libris veritas speranda est, & Christianæ Religionis dogmata haurienda. Tunc Ecclesiæ decretis standum non est, cum ea minimè consentiunt cum divinis Literis. Ità illi. At quisnam certò perspicere possit, quis sit germanus divinorum verborum sensus? quisnam certò decernere, quando Ecclesia cum scripturis consentiat, aut ab iis (si superis placet) etiam dissentiat? Una humana ratio, necesse est respondeant. Nonnulli quidem inter eos, Calvinistæ scilicet & Quakeri, cœlestem quemdam afflatum excogitarunt, quo ducti singuli Christiani germanam percipiant Scripturarum mentem. At postremam hanc insanam opinionem jamdiu exhibilarunt prudentes rerum judices. Inde enim prodit non una aliorum Fanaticorum familia. Cœlestem autem hunc afflatum tenere confingi patet in tanta Sectarum diversitate, in tanto opinionum bello: quod certè abesset, si in singulos homines ista vis intelligendæ divinæ Scripturæ à cœlo descenderet. Et quis inter errorem veritatemque dijudicet, quando unusquisque suas à Deo cogitationes accepisse se dicat? Deum potius ipsum irrisioni exponamus, ubi contraria ab ipso suggeri arbitremur. Igitur eò confugere coacti sunt inter Protestantes minus incauti, ut humanæ rationi supremum sive postremum tribuant decernendi jus in controversiis; & questionibus Christianæ Religionis. Ne verò ultra humanæ rationis vires excedere videatur huiusmodi facultas, adeò manifesta esse ac per se dilucidæ divinorum librorum verba & sensa, sibi persuaserunt, ut cœcutire nisi nisi volens ibi non possit ratio.

Sed

Sed duo sunt, quæ hanc methodum miræ temeritatis, & imprudentiæ arguant. Nempe hinc humanæ rationis explorata infirmitas, indeterminatè aperta omnium oculis sacerorum voluminum sensa & verba. Et quod est ad hominis rationem, jam supra vidimus, quàm debilis sit illius vigor, quàm periculosa sit illius fides, nisi coelesti lumine præcipuisque à Deo viribus juvetur. Et quod est ad sacras Scripturas, nemo est, qui non sentiat, plura ibi esse & ardua, & obscura, & in speciem contraria, quæ justissimas hærendi causas vel acutissimis viris ingerant, & quorum sensum ac mentem difficillimum sit decernere. Et sanè evidenti consilio suæ bonitatis videtur voluisse Deus illorum ipsemet confutare opinionem, qui tantam Scripturis sacris lucem, & sensum claritatem, rationi verò tantas vires inesse jactant. Eos enim permisit inter se omnino discordes esse, & perpetuis cernere litibus & odiis in statuendis tot Religionis Christianæ dogmatis. Eorum quilibet utriusque foederis libros intonat, rationem quoque sibi esse magistræ nemo ex iis non credit. Nihilominus aliter hic, aliter ille sentit, imò contraria sentiunt ac docent aut de attributis, & dotibus Dei, aut de ipso Deo uno ac trino, aut de Filii ac Spiritûs sancti divinitate, aut de gratia & libero arbitrio, de necessitate Baptismi, de Sacramento altaris, aliisque id genus. Præterea mirum est, quàm sæpè una eadèmq; sententiam mutaverit, & diversa de uno eodèmq; dogmate tradiderit. Itaque temerè vividum rationis lumen, & aperta scripturarum sensa jactantur, adeo ut non indocta solum plebs, sed ne ipsi quidem doctissimi viri habere pro certo possint, se ad veritatem perventuros, hæc adhibitâ methodo, quæ ad errorem æquè perducit.

Contrà Catholicorum methodus pedem certò figit, & homines cum doctos, tum indoctos errare non finit. Nam ubi ex aperto Scripturarum testimonio evidenter cognoveris, Ecclesiam à Christo fundatam fuisse, & nunquam inferorum machinas contra eam esse vim habituras, ipsamque esse *columnam, & firmamentum veritatis*, & sanctum Spiritum eidem perpetuò affuturum: si Christo fidem habere est animus, continuo hinc sequi intelligis, te eò rutiùs ad veritatem accessurum, quò arctiùs hujus Ecclesiæ sententias amplectaris. Neq; ulla rationi rectè inferatur injuria; omnium enim potentissima est ratio ista, videlicet: *Eidem tui ac sine dubitatione credendum esse, qui neq; falli possit, neq; fallere velit, cujusmodi esse constat veram Christi Ecclesiam, cum de Christiana veritatis doctrina fidem facis.* Quare nihil est, quòd nos

veluti mancipia arbitrentur, usumque rationis abjēcisse distitent Protestantes. Nam præter innumeras rationes præcipuas, quibus vel sepositâ auctoritate Ecclesiæ singula Catholicorum dogmata confirmantur, utpote quæ sacrarum Scripturarum, aut antiquissimæ Traditionis testimonio fulciuntur, nos ipsa ratio docet, nunquam magis pollere mentem nostram, & ratione uti in judicando verò, quàm quando se judiciis Ecclesiæ accommodat, quæ à Deo habet, ne unquam in dogmate fallatur, aut fallat. Catholici itaque non secus ac Protestantes, divinis Scripturis, & rationibus in fidei doctrina stabilienda, siue credenda, utuntur. Sed hæc inter utrosque differentia intercedit. Protestantes divini Verbi sensum, & religionis dogmata metiuntur è privato cujusque ingenio, uti ratio in consilium adhibita unicuique persuaserit. Scilicet in re tanti momenti judicem & consiliarium sibi adsciscunt infidelem, atque infirmum, uti quotidiana experientia docet, satisque testantur ferventes adhuc inter ipsosmet controversiæ Catholici verò cùm ingenium suum, tum Ecclesiæ vocem auscultant in exquirendo & statuendo Literarum sacrarum sensu. Ingenium autem suum, si fortè ab Ecclesiæ voce dissentiat, filere malunt, quàm loqui. Consilio utique saluberrimo, quippe non fallacem consiliarium, sed certissimum judicem à Christo ad dirimendas fidei controversias constitutum sibi petunt, Nemo prudens inter Protestantes Spiritum Dei sibi certò adesse jactet, per quem ab errore se prorsus immunem polliceatur. Et ne ullus quidem inter privatos Catholicos tantum sibi è cælo munus tribuat. Verùm ubi nos Ecclesiam audimus & sequimur, cui Spiritum suum Spiritum Veritatis ut Joannes Apostolus testatur cap. xiv. 10. usque ad consummationem sæculi nunquam defuturum, Christus spondit: quis non videat, nos tutissimam non errandi viam inire? Itidem unusquisque intelligat, ceteros ab Ecclesia Dei discordes ex eorum sententia incertos saltem in fidei controversiis esse debere; è nostra verò sententia, ubi à nobis dissentiant, eos certissimè errare.

Sed cùm hac ex parte se victos sentiunt Protestantes, aliò se convertunt, redeuntque ad ingenium suum. Quod animo olim perceperunt, Catholicam videlicet Ecclesiam eorum parentem prævis abundare opinionibus, & sacrilegiis operam dare, id ante illorum oculos iterumque recurrit. Hinc ex effectibus argumentantur ad causam, contententes, quandoquidem Ecclesia erravit, nullam eidem ab

errore immunitatem à Deo concessam. Equidem hic appellare iuvat eorum fidem, & rogare, ut de positis præiudiciis & affectibus anteceptis rationem diligentius auscultent, quàm iudicem sacrarum Scripturarum ipsi statuerunt, & nos non solum non abhorremus, sed hic ultro & enixe causam dicere volumus. Quis est, quod eos certos facit de Catholicæ Ecclesiæ erroribus? Scriptura divina, inquit. At Scripturam ipsam Catholici proferunt, & non tantum eandem à se stare credunt, & demonstrant, sed unam obstare pertinaciâ censent, ne ad Protestantes quoque videant. Ultra ex his partibus rectius interpretetur divinos codices, incertum fit. Quis litem dirimet, quis feret sententiam? Recta, inquit, ratio, adhibito disciplinarum omnium, & Criticæ linguarumque præsidio. At Catholicis quoque scientiarum, Criticæ, linguarumque præsidium adest, adest & enixum veritatis ac æternæ vitæ desiderium, & rectam in iis rationem desiderari, nullus inter Protestantes, ut credere juvat, sibi persuadebit. Quem ergo ulterius iudicem appellabimus, quæstionem adhuc vigentem postremo voto decisurum? Nullum alium puto, quàm Deum, cuius tamen sententiam nobis, nisi post exactos mortalis huius vitæ dies, audire licebit. Interim verò, cum saltem incertum Protestantibus æquis remanere debeat, num Catholica Ecclesia errorem fuerit amplexa, qui ex his incertis criminibus evertere volunt certam de minimè fallaci Ecclesia sententiam in Scripturis sacris evidenter fundatam, & rectæ rationis suffragio fortissimè comprobata? Cur certa iis quoque esse non incipit ista sententia, quando ne certam crederent, una obstabat antecepta persuasio, Ecclesiam nempe in quosdam errores jam fuisse prolapsam? Ratio profectò monet, propter id, quod incertum dubiumque est, ea non esse rejicienda, quæ certa sunt. Rursus ipsamet ratio Catholicos bono esse animo jubet, & veritatis possessores decernit. Evidentissime quippe promissum in Scripturis sacris legunt, Ecclesiam Dei nunquam à veritate defecturam, semperque veritatis futuram esse magistratam; deinde evidenter cognoscunt, Ecclesiam nihil tradere, quod Scripturis à Deo traditis repugnet, aut per ipsas dilucide non probetur. Quare sentiunt se falli non posse, dum auctoritate Ecclesiæ Catholicæ nituntur, quæ auctoritas præsidium simul est, & frenum rationis. Præsidium, ut rationi media pateat via, in qua verum sedet; frenum, ne ad extrema ratio declinet.

Porro ex effectibus diximus intelligi, quanti sit æstima-  
da Protestantium methodus, & num Deo probari possit,  
qui unam semper & concordem vult esse religionem suam;  
& num rationi ardeat tantopere ab erroribus abhorren-  
ti. Lutherus (ut veteres omittam Hæreticos) irarum ple-  
nus in Ecclesiam Catholicam parentem suam, adulterii ac-  
cessitum, insurrexit. Quæ ingenio suo, aut, si mavis, ratio-  
ni suæ visa sunt divinis conformia Scripturis, probavit;  
quæ deformia, rejecit, damnavit. Non exemplo suo tan-  
tùm, sed grandi etiam voce docuit, contemnendam esse  
Ecclesiæ vocem, unicæque respiciendam esse Scripturam.  
Quod necessariò consequeretur, fortasse tacuit, videlicet,  
pro Ecclesiæ voce rationis vocem auscultandam esse, &  
rationem divini verbi judicem adsciscendam, quasi ratio-  
ne Ecclesia ipsa non uteretur. Fallacissima hæc methodus  
continud Zvinglios, Oecolampadios, Carolstadios, Ana-  
baptistas, & innumeros alios religionis Doctores peperit,  
quibus nihil antiquius fuit, si ipsis fides, quam divinis hæ-  
rere libris, hoc est Scripturas sacras ex ingenio suo, suæque  
privatæ rationis consilio interpretari, & Catholicam inter-  
rim Ecclesiam collatis viribus oppugnare. Verùm hinc  
mille monstra sententiarum, mille Sectarii prodire, con-  
trariis opinionibus non minus inter se, quàm contra Ca-  
tholicam Ecclesiam pugnantes. Tulit eadem ætas Calvi-  
num alteram Europæ faciem, & Anglos invasit malè sanus  
idem ardor, qui reliquum Septentrionem in tot opiniones  
disperserat. Succelsere Sociniani, tum eorum, penè dixi,  
gregales Arminiani, Syncretistæ, Quakeri, aliique Fanatici,  
Independentes, Præadamitæ, & ut brevius dicam, non faci-  
le numeranda aliarum sectarum frusta. Singulos ex istis  
contraria ac diversa tradentibus interroga. In eorum, di-  
cant, castris divina Scriptura, veritas, & ratio militant; in  
reliquorum error & falsitas. Et tamen ne uni quidem è tot  
Christianorum sectis à Catholica Religione avulsis adsunt  
credibilitatis argumenta, qualia sunt antiquitas, unitas  
doctrinæ, Episcoporum successio ab Apostolis, miraculo-  
rum virtus, atque alia hujusmodi.

Quæ igitur incommoda è Protestantium methodo flu-  
ant, nullone negotio colligas Primò, ne doctis quidem & acu-  
tis hominibus facile erit in tanta opinionum diversitate  
cognoscere, quæ ad veritatem certò accedat; cum utrinq,  
Scriptura sacra, & rationum pondus jactetur, & æquè una  
pars ac altera se prævalere lumine rationis, seu rationum  
vigo.

vigore, emixtè contendat & credat. Secundò, multò minus id populis imperitis licebit, tum quòd eorum non sit, rectè de tantis libris inter Protestantés agutatis judicare, tum quòd nulla suppetant potentissima credibilitatis argumenta, quæ in hanc potius, quàm in alteram partem, inclinent in doctorum mentem, Tertio, novum dies emergent sectarum auctores, novæ sententiæ, nova deliria, dum quisque sibi sumit divinos Codices pro suo interpretari ingenio, nullumque frenum suæ rationi statuit. Neque temeritatis argui à cæteris Hæreticorum sectis quisquam poterit, quippe non aliter hîc se regat, ac se texerit Lutheri, Calvini, aliorumque Protestantium chorus, & ipse sibi idem nec jus, eandemque tribuat libertatem, quam sibi sumendam reliqui Novatores putarunt. Ita fiet, ut nulla sit insania, nulla perversa opinio, quam veluti Christi doctrinam invehere non audeant ac possint hominum ingenia. Continget etiam, ut nulla supersit ratio avocandæ ab errore, & convincendæ hujusmodi gentis, ubi ingenio, quod est difficile, hæc cedere aliis nolit. Et jam vidit Christianus orbis, in quas opiniones terribissimas depredicatum hoc rationis lumen trahere facile possit. In Religione Christiana dogma nullum est, quod ab aliquo homine, aut aliqua secta negatum, impugnatumque non fuerit. In Atheismum, aut Septicismum tandem ista opinandi licentia commodissime defert. Denique Lutheranis Calvinistas evertere nondum licuit; Remonstrantes nihil duxerunt minas, & Synodos Calvinianas; & inter tot sectas internecinum odium, aut æquè abominandum Syncretismum vigere adhuc cernimus.

Hic rogandi sinceri veritatis investigatores & recti amantes, quid eorum ratio suggerat, cùm hæc & alia plura, quæ hanc in rem adferri possunt, serio & affectibus tacentibus expendunt. Omnibus uique illa respondere deberet, non posse, ut per hanc periculosam methodum ad veritatem sine dubitatione perveniantur. Fieri itidem non posse, ut Christus, qui veritatem suæ doctrinæ non solum apud hominés æternum durare, sed etiam in omnem terram effundi, & facile ab hominibus cognosci posse vult, hanc unam tradiderit adeò fallacem regulam, quæ vera Scripturarum suarum mens innotescere possit. Nisi aliter ille cõsulisset religioni suæ, ac infirmæ rationi, qualis in hac misera natura deprehenditur, voti sui (dicere bonâ fide liceat) nunquam factus fuisset; hæretique compos. Immo hinc consequitur,

Religionem Christianam, ejusque auctorem Deum, deridendum Infidelibus exhiberi ab iis, qui nullum aliud præter rationem humanam institutum à Deo tribunal arbitrantur, cujus sit finem imponere controversiis quotidie in sacrarum Literarum interpretatione exurgentibus, & cujus sit tum certò proponere, quæ aut credenda aut neganda sint, tum frenum temerariis ingeniis injicere. Tandem nullam à Lutheri, putà, & Calvini sectatoribus adferri posse rationem contra ipsos æquè ac nobis detestandum Socinum, quæ in ipsorum caput non recidat, & tunc ipsos vinci ab Ecclesia Catholica meritoque damnari, cum Socinum ipsi vincere & damnare contendunt. Et certè Socinianæ pestis, aliorumque hujusmodi monstrorum ortum permisisse Deus videtur; ut Lutherani & Calvinistæ hinc etiam discant, quàm temerè ab Ecclesia Catholica ipsi priùs defecerint, quando ipsissima eorum methodus Socinum, Spinosam, & mille alias Hæreticorum sectas peperit, & armavit, novàsque in dies singulos parere & armare potest, exarmare autem aut expugnare non potest.

## CAPUT X.

*Auctoritas Ecclesia Catholica in Fidei doctrina à Phereponi objectionibus vindicata. Ei non sine ratione credimus. Fallaci auctoritati Protestantes additi, & incerta apud eos veritatis consecutio. Antiquitas doctrinæ in Christi schola. & credentium multitudo robusta veritatis argumenta. Novitas & paucitas erroris indicium extra Catholicam Ecclesiam. Phereponi in hanc rem animadversiones confutata.*

Invictæ sunt omnes Hæreticorum sectæ, ubi una in alteram insurgit, sed faciliè vincendæ ab Ecclesia Catholica, quoties ipsæ tum suam, tum Catholicorum methodum, ambarumque longè diversa consecutaria placidissimis mentibus simul conferant. Cum ergo demonstratum fuerit, quàm sit fallax, periculosa, & à mente Dei aliena illorum methodus, qui in una vi rationis seu ingenii sui statuunt veram divinarum literarum & Christianæ doctrinæ interpretationem: reliquum est, ut nulli privato homini in-

falli-



fallibilitatem tribuamus ; sed Ecclesiæ veræ, hoc est universali, in qua Spiritum Sanctum veracem sacrorum Codicum Interpretem semper adfuturum Christus pollicitus est. Necessariam autem esse, atque à Deo propterea Catholicæ Ecclesiæ datam istam auctoritatem, ratio cognoscit, ut tot absurda evitentur hætenus commemorata. Imò, ut vidimus, sacræ id testantur Scripturæ manifestis verbis, & SS. Patres, & antiquissima Traditio, & usus tot sæculorum apertissime probant.

Statutâ autem hujusmodi auctoritate, cum docti, tum indocti, prætermisso etiam examine controversiarum, conquiescere meritò possunt, utpote certi se ab errore abfuturos, quoties id credunt, quod Ecclesia Catholica Spiritu Dei erudita credendum proponit. Atque hoc ipsum illud est, quod S. Augustinus cap. 7. de Quant. Animæ agebat, nempe : *Auctoritatis credere magnum compendium esse, & nullum laborem, & animis tardioribus ac imperitioribus utilissimum esse excellentissimæ auctoritatis credere; & secundum hoc agere vitam.* Quæ tamen verba ita Phereponus in animadversionibus vellicabat : *Sed prius ipsa illa auctoritas expendenda est, quam ei fidem habeamus; ita ut ei per omnia credamus, quia nobis indubitatis argumentis constat, eam nec falli, nec fallere. Alioqui stultum esset ei credulitatem suam addicere, à qua verum dici nullâ ratione constaret. Sin minus, barbari omnes populi, qui Sacerdotibus, aut Majoribus suis tam multa temerè credunt, rectè facere dicendi essent. Compendiaria viâ etiam progrediuntur, sed ut ad omnis generis errores perveniant, ex quibus nunquam se expediunt.* Hæc quidem benè habent, modò is persuadere nolit, Catholicam Ecclesiam falli ac fallere posse, & Augustinum in ea fuisse opinione, ut Catholicorum Sacerdotum auctoritati sinè consilio, sinè ulla ratione, fidem adjungendam esse censeret. Augustini hac de re sententia aliis in locis, ut vidimus, expressa est. Sed quæ hic Censor dicere pergit, non sunt facile dimittenda : Itaque, ait, omnes cavere oportet, quibus cordi est Christiana Religio, ne idem ei fundamentum ponant, quo maximi & turpissimi quique errores nstuntur.

Si Catholicæ Ecclesiæ sententiam & usum hîc ille carpit, sicuti suspicari cogimur, nâ Phereponus collocavit optimum documentum. Nam, ut hætenus ostendimus, ideo Catholici Ecclesiæ auctoritati credunt, quia indubitatis argumentis ducti eam vident neque falli, neque fallere posse; & cuicumque poscenti auctoritatis hujus rationes parati sunt illas dare, priusquam exigant, ut Catholicæ doctri-

doctrinæ fides habeatur. Tantùm autem abest, ut posito hujusmodi fundamento Catholicis errandi periculum imminet, ut sine fundamento nemo de veritate sit certus, nemo errandi periculum effugiat. Quòd si Pherepono animus fortè fuit his verbis erudire suam gentem: laudandus est profectò illius zelus, comendanda prudentia Ejusmodi enim consilio nemo plus indiget, quàm Lutheri Calvinique familia. Ex his plerique omnes, etiamsi reliquorum hominum, suorumque etiam Pastorum auctoritati in religionis negotio prorsus renuntiandum, & uni Scripturæ credendum verbis affirmant: re tamen & usu nihil magis sequuntur, quàm sui institutoris, suorumve Pastorum auctoritatem, siue confidentiam. Siquidem quis è minuto rudique popello, quis (ne graviora dicam) & semieruditus, id studii, id linguarum Orientalium, id Critices & eruditionis secum attulit, ac affert, quod apprime necessarium est, ut exhauriantur controversiæ omnes inter ipsos & Catholicos, & rursus inter ipsos aliosque Hæreticos vigentes? Si non attulerunt (quod arbitror, sincerus quisque fatebitur,) ergo certa minimè est eorum ratio, se veritatem ebibisse, erroresque vitasse. Et quidem quando apud ipsos valere non debet authoritas, ratio poscit, ut unusquisque singula dogmata in quæstionem adducta perpendat, & rationes utrinque allatas sedulò examinet: ad quod præstandum incredibile dictu est, quot præsidia, quot anni, & quanta vis mentis exigatur. Catholicos à tanto labore eximit facilè cognita suæ Ecclesiæ veritas ac veracitas, cum qua sciunt se errare non posse. Cùm igitur è Christianis non Catholicis plerique auctoritatis contemptores & rationis unius præcones, in religionis tamen negotio se inconsulto duci sinant auctoritate suorum Pastorum, divinas Scripturas pro suo ingenio interpretantium: prudenter iis auctor est Phereponus, ne tali fundamento fidant, quod ex eorum sententia dubium est. ac errori æquè inservit, imò ex nostra quoque sententia fallacissimum est, nisi cùm Ecclesiæ Catholicæ auctoritati creditur, cui divinum Spiritum adesse, semperque adfuturum ostendimus.

Et sanè Pherepono liceat hisce consiliis erudire populos sui similes, hoc est Ecclesiæ Catholicæ rebelles, liceatque illi remonstrantes ab auctoritate Dordracenæ Calvinianæ Synodi eximere. Prædicet ille rationis iura, & pericula explicet iis immentia, qui auctoritati fallaci suam addicunt credulitatem. Sed vicissim patiat, ut sibimet ipsi rationem tantopere commendanti, paucis mutatis sua verba red-

reddantur. Ità ratio, ejusque vigor prius expendendus est, quàm ei fidem habeamus in rebus fidei, ità ut ei per omnia deinde credamus, quia nobis indubitatis argumentis constat, rationem nostram falli non posse. Alioqui stultum esset, eam arbitrari certam veritatis Magistram, quam talem esse minimè constaret, & quam sæpe falli, & in errores turpissimos labi exploratum foret. Atqui Christianæ omnes Sectæ, à Catholica Religione abhorrentes, rationem suam privatam constituunt sacrum Literarum certissimam interpretem, eaque vià tutò se progredi singulæ opinantur, sed ut ad omnis generis errores perveniant, ex quibus nunquam se expediunt. Ergo cavere omnes oportet, quibus cordi est Christiana Religio, ne privatum consilium rationis, hoc est, idem Religioni fundamentum ponant, quo maximi & turpissimi quique errores, & tot Hæreticorum deliria nituntur, & ne abjiciant Catholicam Petram, in cuius unius stabilitate humana ratio fixa sperare potest, se à lapsu immunem semper esse futuram. Quod est ad Catholicos, iù luculentissimè suis in libris ostenderunt, & ostendere iterum possunt, ad auctoritatem minimè fallacem Ecclesiæ Catholicæ nihil pertinere Phereponi censuram. Neque enim nos auctoritati sinè ratione credimus, neque rationem excludimus, sed cum auctoritate conjunctam volumus: quæ concordia tum demum rationi robustissimam facit, tutòque ad veritatem perducit. Verum quod est ad Protestantes, tunc ostendet Phereponus, eosdem nequaquam ubati rationis lumine, cum palam fecerit, tot tamque varias ac oppositas Hæreticorum sectas, tot errores, tot monstra opinionum, ex ista rationis humanæ superbia, tanquam ex equo Trojano, nequaquam prodiiisse.

Multò autem magis Catholicorum ratio in cognitione veritatis, quam amplexa est, confirmabitur, ubi tot notas contempletur, quæ nos docent, omnium Hæreticorum nunc vigentium sectas carere nomine veræ ac veracis Ecclesiæ. Nempe non originis solùm, sed etiam doctrinæ novitatem, turbas, & humanas artes, per quas inuenta plerumque fuerit hæc nova doctrina. Nulla miracula, nulla signa earum auctoribus fuisse, quanquam necessaria, ut veritatem suæ novitiæ doctrinæ testarentur è cœlo venire, ostenderentque Catholicam Ecclesiam ejusque auctoritatem esse repudiandam. Iis auctoribus (quippe neque

neque à Deo, neque à legitimis Pastoribus ad prædicandum missis) defuisse legitimam vocationem, legitimamque docendi auctoritatem, quam tamen Apostoli, recta politia, & ratio in Ecclesia Dei aperte exigunt, ne cuicumque liceat errores sub specie veritatis disseminare, & identidem novas condere religiones, easque incautis eo obtrudere titulo; quod vetus religio è suo jure & è veritate exciderit. Deinde nihil simile habere cum vera Christi religione inconstantiam doctrinæ, quam inter Protestantes facile est deprehendere. Tandem ab Ecclesia vera abhorrere, quæcumque intoleranda absurda sequuntur, quando vera esset excogitata ab Hæreticis Ecclesiæ Catholicæ in errores defectio; atque admittenda foret illa methodus, quam tantopere prædicant, & sequuntur Heterodoxi: Juvat etiam addere, quod Catholicis solatio sit, & reliquis incitamento, ut unam amplectantur Catholicam Religionem. Quocumque odio in istam Ecclesiam rapiantur præcipui ex recentioribus Hæreticis, fateri tamen non dubitarunt, neque dubitant, quin istius quoque sectatores, modò ad Evangelii normam & mandata suos mores componant, æternam salutem adipisci possint. Id in libris Lutherianorum, Calvinianorum, Syncretistarum, & Socinianorum legere est. Cum ergo ex consensu vel inimicorum certum sit, veritatem & salutem in Ecclesia Catholica haberi posse: contra verò, cum è Catholicorum sententia, cui Apostolorum, sanctorumque Patrum, & totius antiquitatis voces consentiunt, certum sit, inter Hæreticos, sive Luthero, sive Calvino, sive Socino, sive aliis addictos, æternam salutem obtineri non posse: Ratio manifestissima suadet, auctoritati Ecclesiæ Catholicæ standum, & non immorandum in Hæreticorum cœtu, sed in illius sinum esse volandum, à cujus unius communione speranda est communi suffragio salus. Tanti namque momenti salus æterna est, ut certo periculo (si vera est Catholicorum sententia) exponenda non sit in Hæreticorum castris, quando periculum omne in Catholica Schola vitare fas est.

Sed nos ad Phereponum regredientes exquiramus, quid sibi alio in loco is velit. S. Augustinus in Lib. de Util. credendi cap. 16. hæc de Christo pronuntiaverat: *Ergo ille afferens medicinam, quæ corruptissimos mores sanatura esset, miraculis conciliavit (sibi) auctoritatem, auctoritate meruit fidem.* (His verbis liberaliter adsentitur Phereponus, at non sequentibus) *fide contraxit multitudinem, multitudine obtinuit vetustatem, vetustate roboravit religionem.* Inquit enim Cen-

for:

for: *Quamvis Christus fide sibi facta apud multitudinem, Ecclesiam suam considerit, atque conditam auxerit: attamen ed non speravit, ut aliquando religionem vetustate roboraret, quasi vetustas argumentum quandoque futurum esset veritatis. Non id sentimur is, qui Christi dogmata sequuntur, quia antiqua est illorum fides, sed quia consentanea est veritati cœlesti, cui fidem Christus miraculis suis facit.* Strenuè suam causam hîc agit Phereponus, argumentum à vetustate petittum expendens, utpotè qui toties objîci sibi non tantùm à Catholicis, sed & ab ipsis Calvinî asseclis, sententiarum Arminianarum novitatem meminit. Et reverà vetustatem opinionum, ut ut veneratione fere semper dignam, non esse tamen certum argumentum veritatis, nihil veriùs est in opinionibus ad Physicam, ad Astronomiam, & ad nonnullas alias Artes spectantibus. Sed miror, Logicum, Criticùmque virum aut animadvertere nolle, aut nolle fateri, quantum ponderis sit vetustati in Theologicis, atque historicis rebus. Primi gēeris sententias nulla antiquitas opinantium veras esse persuadere potest; nulli quippè ex antiquis magister aliquis fuit falli nescius, qui eos de veritate hujusmodi opinionum certissimos efficeret. Ingenium suum cuique pro magistro erat. Cùm autem antiquis Philosophis interdum ingenio recentiores non cedant, immo isti illis nonnunquam antecellere possint, majore nempe studio, pluribùsque quàm antè ad miniculis suffulti; quis non videt, æquè in recentiorum quàm in veterum placitis veritatem haberi posse, nihilque esse, quod supra nos majores nostri sibi tribuere possint in hujusmodi veritatû inquisitione, nisi quodd ante nos inquisierint, nobisque faciliorem straverint viam ad veritatē ipsam inveniendam?

At longè aliter se habent secundi generis sententiæ. Si sit quæstio, utri ex duobus historicis in re quapiam discordibus adhibenda sit fides, & par sit utriusque fidelitas, judicium, ac eruditio, & utrinque verisimilia narrentur, nemo inter Criticos futurus est, qui non judicet, antiquiori potiùs quàm recenti credendum, multoque magis antiquissimo in comparatione ad modum novitii scriptoris. Accidit id quoque in Theologicis rebus. Disputatur inter Christianos, quænam sit vera Christi Ecclesia, & verane, an falsa sint dogmata quædam. Litem dirimere non licet, affirmantibus singulis, suâ doctrinam ideo verâ esse, quod consentanea sit veritati cœlesti, cui fidem Christus miraculis suis fecit. Potentissima ratio monet, secundum illos judicandum esse, qui vetustatem sententiæ, & Ecclesiæ

suæ , ad Apostolos usque & ad Christum perducunt reliquos verò longè à veritate recedere, quibus cùm Ecclesiæ, tum dogmatum novitas exprobari potest. Quis enim melius , quàm Antiqui , & Apostolorum æquales , sive discipuli audire , aut rescire potuerunt , quæ Christi mens & doctrina fuerit , quidve credendum , agendumve ipse proposuerit , cùm hæc ea sint , quæ non ex ingenio hominum , sed ex revelatione Dei & Christi pendeant?

Eoque magis valere id omnes intelligent , cùm de aliquo dogmate , sive scripturarum sensu , lis est inter quosdam recentiores ; quindecim aut sexdecim sæculis ab Apostolorum temporibus dissitos , & alios uno , duobus , aut tribus sæculis ab iisdem temporibus remotos , & potissimum si Ecclesia tota , & SS. Patrum consensus , & immemoralibus traditio militet contra paucitatem , & novitatem recentiorum. Enim verò hîc non agitur de constituenda Religione secundum arbitrium nostrum , aut intelligendis , atque explicandis Christi dogmatis , & Literis sacris , prout ingenio nostro magis arridet : quod ne ipsum quidem Phereponum velle arbitror , quanquam ipsa ejus dicta & facta nihil aliud velle præ se ferant. Sed agitur de retinenda Religione , quam Christus , certissimus veritatis magister , revelavit , & de intelligendis atque explicandis codicibus sacris , quemadmodum à Christo , ejusque Apostolis intellecti sunt , atque explicati. Nemo autem credendus est hîc magis scire , quàm qui aut Apostolos prædicantes , aut Apostolorum successores audire , & quæ falsa , quæ vera forent , probe callere potuerunt , atque debuerunt. Contrà nemo in hujusmodi controversiis minus audiendus est , quàm qui tot sæculis ab Apostolorum ætate remoti unum suum ingenium judicem faciunt in tanti momenti rebus , & sibi nuperis potius credi postulant , quàm antiquis , quibuscum Ecclesia Catholica consentit , semperque consensit. Quapropter nihil certè ideo verum est , quia antiquum : sed in controversiis inter Christianos agitatis robustum veritatis argumentum , sive ut melius dicam , indicium , antiquitas est. Et si alia accedant veritatis indicia , qualia habet una Catholica Ecclesia , certos homines efficere potest , ac debet de veritate doctrinæ. Indicium contrà atque argumentum falsitatis est novitas ; atque ab ista cavere quàm maxime oportere , & hinc etiã discerni Hæreses & pseudoprophetas Apostoli monuerunt. Hæc autem aded certa sunt , ut quicumque pejora etiam & falsissima dogmata duobus proximè præteritis sæculis commentus fuit , non nota se tradere

dere, sed antiqua, & Apostolis, eorūque successoribus probata, persuadere necessum duxerit. Qua in re quantum eos fallat sua eruditio atque conatus, apertissime patet ex Catholicorum Libris. Itaque non est, cur Phereponus in Theologicis inanem putet esse vim, & auctoritatem antiquitatis, non secus ac si de Philosophicis ageretur. Tolum hoc omnium consensu acutissimum est, sed tantummodo in Catholicorum manibus vim suam exercet. Multo minus fuit, cur Phereponus Augustino non adsentiretur, pronuntianti, Christū vetustate roborasse Religionē. Tuebatur Augustinus adversus Hæreticos veritatem ejusdem doctrinæ ejusdemque Ecclesiæ, quam & nos commendamus, & pro vivibus tuemur, hoc est, agebat contra illorum Christianorum genus qui novitatem cum originis, tum doctrinæ, & Ecclesiæ præferentes, ab antiquitate, Catholicam Ecclesiam atque doctrinam roborante, vincuntur. Propterea de Christo, inquit: *Vetustate roboravit Religionem, quam non solum Hæreticorum ineptissima novitas fraudibus agens, sed nec gentium quidem veteris error violenter adversans aliqua ex parte convelleret.*

Agnoscit hoc Phereponus, & tamen dicere pergit: Sed Augustino commodum erat talibus argumentis uti in Hæreticos ac Schismaticos, quibus passim novitatem, & paucitatem exprobat, quas olim Christianis exprobraverant Ethnici. Utrum à vetustate petatum argumentum vim habeat in Hæreticos, ac Novatores, jam vidimus. At nescio cur hic producendos sibi putet Ethnicos, eorūque exemplum Augustino objiciat. Si par fuisset Gentilium, & Christianorum causa, hoc est, si rationibus utrinque pugnatum æquè fuisset, & Christianis nullum succurrisset evidens veritatis argumentum, excusatione dignum fuisset hominum judicium, si Christianæ Religioni Ethnicam prætulisset, quam nimirum neque ulla gravior adversæ partis ratio vinceret, & contra vetustas ac amplitudo evidentiùs commendarent, quam Christi fidem. Sed hinc miraculorum splendor, Prophetarum oracula evidentissime completa, & sanctitas Legis Christianæ, inde verò vel ipsi Ethnico vulgò facile noscenda, atque eruditis ferè omnibus certè nota Religionis Idolatricæ impietas ac insania, tantum roboris addebant rationibus Christianorum, tantum detrahebant Religioni Gentilium, ut ipsa novitas & paucitas Christianæ gentis minimè obstare deberet, quin doctus quisque & indoctus ad castra Christianorum transfret. Quod autem est ad Catholicos, & Hæreticos, inter se pugnantes, utraque pars ra-

tiones, & scripturas pro sua sententia adferebat. Rationibus certè Catholici præstabant. Verùm id negantibus adversariis, par videri multis potuisset causa, & anceps istius contentionis exitus, nisi Catholicorum rationes evidenter juvisset sententiarum vetustas, & Ecclesiæ amplitudo. Jure ergo ad Catholicos inclinare debuit victoria; nam ii mentem Christi, verùmque sensum scripturarum melius ac certius novisse credendi erant, qui propius ad ipsum, ejusque Apostolos, antiquitate accedebant. Quamquam quid Phereponus ait de novitate Christianæ Religionis præ vetustate Ethnicæ superstitionis? Ne hoc quidem habebant Gentiles, quo se Christianis in ea controversia præferrent, immo hic etiam evidentissimè vincebantur. Et profectò ignorare non potuit ipsemet Phereponus, quod cuivis eruditorum patet: nempe Christianam Religionem eandem cum Judaica esse, & propterea ad Adamum usque contingere, & Religionibus reliquis antiquitate præire. Quid in hanc rem scripserint Clemens Alexandrinus, Eusebius Cæsariensis, ipse Augustinus, aliique SS. Patres, recentiores non pauci, præ omnium manibus est? & sat erit meminisse, Parum igitur opportunè, parùmque eruditè Phereponus huc adfert Ethnicorum exemplum, ut jura vetustatis, hoc est, Catholicorum arma, retundat.

Cæterum non hic tantum, sed & alibi Augustinum Phereponus irridet objicientem paucitati Hæreticorum Catholicæ Ecclesiæ amplitudinem. Non esse hoc veritatis argumentum, ille monet; alioqui Ethnicorum multitudine consideratâ, Christiana Religio falsi convincitur. Et sanè fatendum est ab Ethnicorum multitudine victos olim fuisse Christianos, & adhuc vinci. At nos in Ethnicos aliis evidentibus argumentis pugnamus, facimûsque, ut frustra suam nobis amplitudinem objiciant. Cùm verò controversia est inter Catholicos & Hæreticos, dicimus validissimum semper fuisse, ac fore indicium veritatis, credentium multitudinem, cum aliis indiciis & argumentis conjunctam. Ab ipso Religionis sanctissimæ exordio ad nostra usque tempora insurrexere *lupi rapaces*, & *viri loquentes perversa*, ut Apostolus prædixerat. Schismata etiam, & Hæreses invaluere. Quæsitum est, utrùm à Catholicis, an ab adversariis vera Christi Ecclesia, & doctrina staret, ea autem perpetuò sententia sedit; non alibi stare, quàm apud illos, qui Ecclesiæ & doctrinæ antiquitatem, atque constantiam, multitudine quoque, successione, & concordia credentium, probarent: quod de solis Catholicis



ficis olim potuit, & dici adhuc potest. Propterea in Concilio Nicæno statutum est, ut ea haberetur Ecclesia Dei vera, cui præter alia signa nomen *Catholica*, seu *Universalis*, conveniret. Quæ appellatio non tunc nata, sed Ecclesiæ veræ jam indita est vel ab ipsis Apostolorum successoribus, cum τῆς ἀγίας καθολικῆς ἐκκλησίας. sanctæ Catholicæ Ecclesiæ mentionem fecerint Smyrnæi in Epistola de Martyrio B. Polycarpi, & Ignatius Martyr in Epistola ad Smyrnæos. Sed quid hæc ad veritatem? iterum inquit aliquis.

Primò, sunt nonnulla cùm veteris, tum novi Testamenti oracula, quibus palam fit, Christi Religionem prædicandam esse *in omnes gentes*, incipiendo ab *Hierosolyma*, & *in omnem terram exivisse Apostolorum sonum*, & *in fines orbis terra verba eorum*. Hæc autem non de falsa, sed de vera Christi Religione prædicta sunt, & Prophetiam comprobavit effectus. Legitimum igitur veræ Ecclesiæ & Orthodoxæ doctrinæ indicium esse debuit amplitudo Catholicæ Ecclesiæ cum ejus antiquitate, concordia opinionum, & successione Episcoporum conjuncta. Hujusmodi prærogativam ipsi veræ Ecclesiæ, veræque doctrinæ, & nequaquam Ecclesiis malignantium, & erroribus Hæreticorum pollicitus est Christus. Secundò, cùm longè latèq; propagata fuerit germana Christi Religio, atque in singulis terræ partibus, diffitisque Provinciis fundatæ fuerint innumeræ Ecclesiæ, quæ ex Apostolorum præcepto noverant, nihil in Christi doctrina innovandum, & quod traditum fuerat tenacissimè servandum: ista amplitudo non custodiendæ solum, sed etiam indicandæ veræ doctrinæ aptissima fuit. Etenim fieri quidem potuit, ut una, aut plures etiam Ecclesiæ errarent, violarentque illatâ novitate documenta Christi; fieri autem non potuit, quin proximæ, atque innumeræ aliæ Ecclesiæ, piaculum istud animadverterent; quo deprehenso excogitari non potest, omnes Christianorum Ecclesias, & præsertim Episcopos sui muneris, veræque Religionis oblitos filere omnes & connivere voluisse. Et certè nunquam filuisse in hujusmodi casibus ex historicis Ecclesiasticis exploratissimum est. Quare postulat ratio, ut tantæ credentium continuatæ multitudini, & tot Ecclesiis sacri depositi custodibus, & antiquis, & concordibus, potiùs adhibeatur fides, quàm uni novatori, aut paucis ejus asseclis, heri & in angulo natis, & ex ingenio suo cœlestem doctrinam interpretantibus, & nulla signa adferentibus, quibus probent, aut sese à Deo missos, aut Ecclesiam à recta opinione descivisse, aut novitiam sectam suam

paucitate quidem cedere, doctrinæ verò sanitate Catholicis antestare. Ergo, quid faciat ad veritatis demonstrationem multitudo Catholicorum, & amplitudo Catholicæ Ecclesiæ, cum inter illam, & Hæreticorum Sectas, de veritate controversia agitur.

## CAPUT XI.

*Socinianorum pestifera Hæresis. Deo nos quadam edocenti credendum, quamvis credenda superent captum humani intellectus. Ingenii temeritas quàm hic impia. Loca Theologica, unde veritas doctrinæ christiana petenda. Traditionis auctoritas, ac necessitas in Ecclesia Dei. Quibus principis nitatur. Laus Theologia dogmatica, & Petavii V. C. quem Phereponus pluris facere debuit.*

**A**mplissimum inquirendæ veritatis jus, & mentis humanæ libido, jam accepit confinia. Primum & summum ingeniorum frenum divina Scriptura est. Alterum deinde Catholicæ, seu veræ Ecclesiæ, vox & auctoritas. Hic ergo innitendum, si certi esse volumus de fide nostra, & in Religione fortes, ac invicti stare. Si enim Ecclesiam veram, si minimè fallacem habemus, & probamus, omnes Hæreticorum pestes debellabimus. Sin minus, nobis perpetuum cum iisdem bellum erit, & nulla unquam utrinque victoria. Hos autem fines antiqui Hæretici, & proximè præteritis sæculis Novatores supergressi sunt. Quare aditus est factus ad tot schismata, aut vulnera Ecclesiæ, uno potissimum Luthero claustra frangente. Neque mirum, quòd pejora quotidie videat Hæreticorum tellus, quòdque ad impiissima tandem Spinofistarum deliramenta deventum fuerit. Cujuscumque rationi infirmæ ac judicio temerario apud illos derelicta est veritatis causa, & à duobus sæculis gloriosum sibi quisque ducit nova procudere, & ducem, non sectatorem esse. Inter eos autem, qui Christiani adhuc appellari gaudent, nemo infelicius, nemo foedius, nemo audacius impegit, quàm Sociniani. Deum isti, ejusque Religioni humanæ penitus subdidere rationi, ut nihil ampliùs apud eos credatur, credendumve putetur, quòd humanæ rationis captum superet. Hoc enim quaecumque est, ipsi rectæ rationi adversari ajunt, quasi hanc illæsam cæteri Christianorum non amarent. An ambitioso huic homi-

hominum gregi sit accensendus Phereponus noster, uti suspicantur & putant non pauci: ipse videat. Illud exploratum est, nihil in ejus Libris sonare frequentius, quàm ipsa met immodica rationis cœnomia. Huic non rarò conqueritur, Catholicos, & cæteros Christianos valedicere, eamque opprimere, ut divina revelatio extollatur. In sententiam verò Socinianorum sensim concedere Calvinianos, dolemus quidem, sed nequaquam miramur. Etenim fatendum est, Socini scholam, licet omnino detestandam, arctius & ingeniosius iisdem ipsis insistere & superædificare principiis, quæ reliqui Hæretici, & Calvinus potissimum, statuerunt, tanquam fundamenta suarum Sectarum, suæq; ab Ecclesia Catholica defectionis. Et cum Calvinianis, cæterisque Hæreticis in oppugnando Socinianismo arma valida prorsus defint, unice à Catholicorum armamentario petenda; cumque nulla fortasse Hæresis dulcius quàm ista blandiatur ambitioni rationis humanæ; quid mirum, si despecto Calvino tandem Socinus suscipitur?

Contrà verò, qui æquè ac nos Sociniana commenta execrantur, mirum est, si in eorum damnatione suam quoque non legunt. Mirum, si denique non intelligunt, quàm necessaria sit, & quàm æquitati & Christi verbis consona Catholicæ Ecclesiæ stabilitas, infallibilitas, & auctoritas, & quàm improbanda Lutheri & Calvini conspiratio fuerit. quibus non alia umbratica causa fuit deficiendi à Catholicis, quàm quæ Socinum, Arminium, & tot alias sectarum sectas à Calvino, & Luthero distraxit. Quod est ad Socinianos, ubi temeraria ipsorum methodus eligenda foret, brevè nullam Religionem haberemus. Nam quæ monstra ingenio humano non placeant? Quæ revelata veritas nobis non displiceat, si quidquid inconstantibus, variis & oppositis hominum ingeniis placet, aut displicet, verum falsumve dicendum est? Et quis tandem certò statuatur, ubi hominum ratio erret, ubi sapiat, & quæ sit recta, quæ perversa Literarum sacrarum interpretatio? Cur non poterunt novæ quotidie procudi sectæ, quarum quælibet sibi rationem vendicet? Cur non explodi quædam è Scripturis Canonicis? Deinde nihil intolerabilius est, quàm nihil aliud velle Deo credere, quàm quod ipsi intelligere possimus, rationiq; seu ingenio nostro, accommodatū sentiamus. Repetere autem hîc juvat sub rectæ rationis nomine obtrudi sæpè ab Hæreticis vim, & captum, & ideas peculiare ingenii sui. At religio vera ab hominibus ingenio pendere non debet. Non enim ipsi eam fecimus, si Deus eam fecit,

Deus eam revelavit. Liceat in Phisicis sibi effingere systema aliquod In Religione idem velle præstare, summæ temeritatis est, immo insanix.

Itaque ea in primis definit esse recta ratio, quæ in Religionis negotio, atque in divinorum dogmatum interpretatione, nullis ingenium frenis teneri patitur, & quæ non intelligit, multa in Deo, & apud Deum esse; multa ab ipso potuisse & posse fieri; multa ipsum potuisse & posse velle, quæ captum exsuperent humani intellectus corporeis tenebris obfiti. Hinc celeberrimus & acutissimus Philosophus Cartesius id apprimè statuebat. *Deum ejusque opera non esse humano p. se metiendâ.* Fallebantur, qui Antipodas olim negârunt, quod animo concipere non possent, homines pedibus suis in nostros obverfis ambulantes. Stultus foret à nativitate cæcus qui ideo colores rerum & magnetem esse negaret, quod eorum naturam & aspectum mente assequi non posset, paritèrque sit demens, qui in Honcinis, aut mundi opificio quædam inveniens, quæ rationi suæ aut superflua, aut incommoda, aut melius efformanda videantur, intelligere nesciat, & negare velit tantarum rerum effectricem divinam Sapienciam, & moderatricem Providentiam. Omniû porro dementissimus sit, qui Deo aliquid de se, vel de sua voluntate, ac potentiâ revelanti, adjungere fidem nolit, eò quia revelata vulgaribus humani intellectus ideis nō satis respondeant. Ista demissis oculis adoranda sunt, non impiâ temeritatē abjicienda. Etenim Deus revelavit, Deus fecit, Deus veracissimus, omnipotentissimus, cujus judicia, cujus mysteria, cujus facta, etiam si incomprehensibilia interdum sint nobis, minus tamen vera, minusve sapienter facta non sunt. Hinc Augustinus Lib. 9. Cap. 1. de Trinitate agebat: *De credendis nullâ infidelitate dubitemus; de intelligendis nullâ temeritate affirmemus. In illis auctoritas veniendâ est, in his veritas exquirendâ.* Egregiè quoque scribebat Cassianus Lib. 4. Cap. 6. de Incarn. *Rationem dicti quæris? Non reddo. Interim Deus hoc dixit De hoc locutus est mihi. Verbum illius summa ratio est. Removeo argumenta, removeo disputationem. Sola mihi ad credulitatem sufficit persona dicentis. Non licet mihi de fide dicti ambigere, non licet deliberare. Quid mihi quærere, quomodo verum sit, quod Deus dixit, cum dubitare non debeam, quin verû sit, quod Deus dixit?* In eamdem sententiam loquuntur alii Patres, Scriptorésque Christiani, cum antiquissimi, tum recentes. Et sanè Christianorum Fides secundum Apostolum nihil aliud est, quàm *sperandarum substantia rerum, argumentum non apparentium, & videmus*

nunc

*nunc per speculum in enigmate, & per fidem ambulamus, non per speciem; neque fidei nostræ natura sinè obscuritate consistere potest. Quare, ut cum eodem Apostolo loquamur, deijcienda est omnis altitudo extollens se adversus scientiam Dei, & in captivitatem redigendi sunt omnes intellectus in obsequium Christi. Jure autem stultos vocat idem Apostolus I. ad Cor. 1. Judæos & Græcos, quorum sapientiæ & rationi minimè consonare videbatur humilitas & mors Christi. Placuit Deo (sunt ejus verba) per stultitiam predicationis salvos facere credentes. Quoniam & Judai signa petunt, & Græci sapientiam quærunt. Nos autem predicamus Christum crucifixum, Judæis quidem scandalum, gentibus autem stultitiam. Tum pergit sapientiã hujus mundi irridere, in cujus conspectu stultitia videbatur, quidquid apud Deũ sapientia est.*

Quapropter illorum deploranda est audacia, qui eam reprobandi alicujus Christiani sive Catholici dogmatis causam adferunt, quod rationis, hoc est ingenii sui, peculiariibus ideis non placeat. Eoque magis deploranda est, quòd isti, ut trahant in sententiam suam divinas sententias. Scripturarum Canoniarum verba eludere, invertere, subvertere cogantur, reclamante eorumdem verborum perspicuitate, & tot sæculorum consensu, & tot Christianorum ratione; necesse enim est, quando eorum ingenium, & hypothesis conformari nescit sacris Literis, sacras Literas aliquo pacto accommodari ad illorum hypothesein, atque ingenium. Hæc noverunt, qui in eorum scriptis versati sunt, simulque noverunt, antiquissimam Catholicæ Ecclesiæ sententiam & consuetudinem Socino adversari, uti ex auctoribus vetustissimis patet, atque in primis ex antiquo Scriptore expositionis fidei, quæ Justino Martyri tribuitur, ubi inquit, divinarum rerum notitiam, summo studio indagandam esse; cum autem eam præ imbecillitate manus assu-qui poterimus, venerari eam nos oportere, ut comprehensione majorem, ne evacuetur fides nostra. Quòd si ed redit quæstio, ut perspiciatur revelatane fuerint, an secus, Ecclesiæ Catholicæ dogmata, alioqui credenda, etiamsi humanæ rationis captum excedant: tu responde, id certò atque indubitanter perspicui non posse per unum ingenium nostrum, ut vidimus; & reliquum propterea esse, ut Ecclesiæ Traditio, & auctoritas in consilium adhibeantur, quibus tandem acquiescendum, non solum prudentia, sed etiam necessitas inonet.

Nunc autem progrediendum est; adhuc enim Christianæ veritatis investigatori quærere fas, imò necessum est,

quæ & qualia sint Ecclesiæ veræ dogmata, & unde certò sint ediscenda. Qua in re multos ex antiquis atque etiã recentibus Hæreticis sua fefellit opinio. Minimè dubitabant ii, quin Ecclesiæ Traditio & auctoritas suspicienda foret, eiq; in controversiis concedendum. Sed ipsam Traditionem sibi militare arbitrati, confidenter promebant, pertinaciter tuebantur doctrinam, quæ tamen ipsius Ecclesiæ Traditioni adversabatur. Inter ipsos Catholicos præteritis temporibus fuere nonnulli (& utinam adhuc nemo esset, aut nemo in posterum esset futurus) qui sententias quasdam absurdas venditârunt, quòd eas putarent cum Ecclesiæ veræ sententia consentire, aut saltem ab ipsa non esse alienas. Igitur tum ut veritas certò contingatur, errorèsq; evitentur, noscenda sunt loca, unde Catholica dogmata haurire liceat, & probare, aut confirmare, adversaque refellere: noscendi sunt alii fines, ultra quos ingenio humano vagari aut nefas, aut periculosum est. Præter divinas Scripturas & Traditiones, Concilia sacra, & præsertim Oecumenica, Romanorum Pontificum Epistolæ & Decreta, sanctorum Patrum Libri, probatæ veterum Historiæ, Theologorum, aliorumque Orthodoxorum scripta, sunt ii fontes, & loca, unde Ecclesiæ Catholicæ doctrina est haurienda. Et istis quoque addere juvat rationem humanam, & auctoritatem Philosophorum, modò nemo sibi persuadeat, sinè ratione consulenda esse, & sinè ratione vim habere inter Catholicos priora loca. Verùm tot fontes promiscuè non sunt accipiendi, non enim par iis auctoritas est, neque eadem habenda est fides. Primò quod attinet ad sacra Catholicorum Concilia, ex institutione divina certam Orthodoxæ doctrinæ fidem faciunt; Generalia quidem, modò legitima sint; Provincialia verò & Episcopalia, modò ab universa Ecclesiæ probatæ fuerint eorum de fide definitiones. Secundò, certi quoque Judices Catholicæ doctrinæ sunt Rom. Pontifices, quibus eadem consentit Ecclesia, Terriò, nulli reverà ex iis, quos sanctos Patres appellamus, ex institutione divina auctoritas est certò statuendæ atque instar Judicis proponendæ Catholicæ doctrinæ. Communis autem Patrum consensus in exponendis sacre Scripturæ dogmatis certissimum nobis veritatis argumentum præstat, eò quòd Ecclesiæ universæ, quæ errare à Deo non sinitur, sententiam nobis exhibeat. Reliqui itidem fontes probabilia quidem præstabunt, sed non firma & inconcussa argumenta.

Atque hæc certa sunt apud Catholicos. Protestantes verò,

verò, eorúmque filii magnam in his litigandi segetem inveniunt. Revelatam quidem & scriptam in sacris Literis doctrinam se suscipere dicunt; at improbant traditiones, sive doctrinas à Christo atque Apostolis, ut nos contendimus, sinè scripto per prædicationem traditas. Ecclesiam, Romanos Pontifices, sanctos Patres errori obnoxios, & infidos veritatis testes appellant. Sed quid in tanto dissidio decernendum sit, facile æqui judices animadvertent. Duæ de traditionibus institui possunt quæstiones. Prima est, utrum Apostoli aliquid ad Religionem Christianam pertinens vivâ tantùm voce, & sinè scriptis, tradiderint; an verò omnia scriptis mandârint, quæcumque vivâ voce, exemplo, aut aliâ ratione prædicârunt. Altera est, utrum sententiæ illæ, quæ à Catholicis sub Traditionis nomine censentur ab Apostolis emanâsse, eandem vim atque auctoritatem habeant, si re ipsâ traditæ sunt, quæ Apostolorum scriptis debetur. Posterior quæstio non à Christiani modo, sed etiam à cujuscumque hominis ingenio penitus aliena est, & incredibilem contendendi pruriginem sapit. Cur enim iisdem Apostolis Christi nomine scribentibus credamus, loquentibus non credamus? Deinde quæ ab Apostolis scripto mandata sunt, eadē antea ab ipsis vivâ tantùm voce tradita fuisse constat, & pari obsequio à Fidelibus accepta.

Priorem controversiam nihilò plausibiliùs pertractant Hæretici. Nemo est, qui nesciat illustrem locum secundæ Epistolæ ad Thessal 2. 14. ubi Paulus ait: *Tenete traditiones, quas accepistis per sermonem, seu per Epistolam nostram.* Celebrissimum idem est alter ex Epistola 2. ad Tim. 2. 2. desumptus, ubi hæc leguntur: *Qua audisti à me per multos testes, hac commenda fidelibus hominibus, qui idonei erunt & alios docere.* Hinc saltem evidenter colligitur, eadē veneratione Apostolorum doctrinam ab Ecclesia Dei suscipiendam, colendam, & servandam esse, sive scriptis, sive verbis tantùm eam tradiderint. Verùm etsi eadem evidentiâ non colligeretur, quæ Apostolus voce tantùm prædicârat, scriptis postmodum, vel ab ipso, vel ab aliis Apostolis, non fuisse consignata; siquidem saltem constat, post Pauli obitum Joannem Apostolum suos confecisse, aut evulgâsse Libros. Attamen solo Ecclesiæ testimonio id exploratum fieri potest, & per ejus sententiam hujusmodi controversia dirimi. Nónne ex Ecclesiæ unico testimonio, ac traditione certissimè noverunt ipsi quoque Hæretici, quæ scripta ab Apostolis, vel profecta, vel probata sint, & quinam legitimi, quinam adulterini sint fœtus Apostolis adscripti?

Cur

Cur ergo Ecclesiæ de Apostolorum scriptis testanti credamus, de reliquis eorum documentis testanti non credamus? Ad hæc inter ipsos Hæreticos plerique sententias nonnullas, aut ritus aliquot probant, atque tuentur, quos tamen sola Ecclesiæ Catholicæ traditio commendat. Istorum igitur confessione Traditionibus Ecclesiasticis veneratio, non contemptus, debetur; & ubi pateat alia dogmata, aliósvē ritus ex vetustissima traditione descendere, & in Ecclesia Dei communi Christianorum consensu celebrata ac servata fuisse, pervicax & injustus fuerit, qui non alia de causa repudiet, quàm quòd in Apostolorum scriptis nulla de iis mentio occurrat.

Jam verò quantum Scripturæ divinæ suffragio probeatur, quàmque Religioni Orthodoxæ necessaria sit Ecclesiæ auctoritas, pluribus persecuti sumus. At hinc etiam traditionis necessitas dignoscitur. Ubi sacras Literas Ecclesia interpretatur, ubi dogmata explicat, & excitatas in Christiana doctrina lites suo decreto componit: quid aliud illa præstat, quàm interpretari, & exponere, quæcumque per traditionem antea sibi innotuerant? aut ex iis consequentia & necessariò connexa colligere, aut repugnantia aperire? Neque Ecclesia, neque sacra Concilia quidquam novi statuunt, aut condunt in suis de dogmate Canonibus. Quod accepit à Majoribus Ecclesia, scilicet quod ab Apostolis eorúmque successoribus ad nos usque permeavit, eorúmque traditioni consentaneum est, hoc dumtaxat in suis sententiis Ecclesia profert, ac proficitur. Quapropter cum de Paschatis celebrandi tempore disputatum est, Nicæni Patres scripsere: S. Athanas. de Synodis Arimini & Seleuciæ, tom. 1. ferè initio Epist. *Visum est nobis & Spiritui sancto.* Cum verò actum de fidei doctrina pronuntiârunt in hunc modum: *Credet Ecclesia Catholica;* ut pateret, non sua ab eis decreta, sed Apostolorum documenta promulgata fuisse. Proinde semper fuit Ecclesiæ consuetudo, ut subortis in doctrina Christi quæstionibus Scripturas sacras, veterúmque Christianorum, & SS Præsulum ac Patrum concordem traditionem consuleret. Hæc ad manum statim erat, opponenda novitati dogmatum, quam inferre conabantur Hæretici. Rationibus isti contendebant, & loca etiam proferebant è sacris codicibus in speciem suæ novitati faventia. At Ecclesia Catholica primò rationibus in sui tutelam agebat, tum suæ sententiæ & victoriæ robur in eo collocabat, quòd antiquissimam traditionem à se stare evidentissimè sentiebat, sibi que perspectum erat, qui semper antea



antea fuisset sensus verus Scripturarum sanctarum ad illam controversiam pertinens. Innititur autem hujusmodi consuetudo inconcussis quibusdam principiis, quæ multis probare facillimum foret, sed indicare tantum contenti erimus.

Primum est, Christum Apostolos vivâ voce docuisse aut iis revelasse, quæcumque necessaria atque utilia in sancta Religione credenda forent, & agenda ad salutem; tum Apostolos ad eadem ubique vivâ voce prædicanda missos esse à Christo, & nonnullos ex iis atque ex Discipulis vitam Christi & alia permulta scriptis consignasse. Cumque Apostoli ex Christi præcepto hæc aliis traderent, ipsos liquidò, ac dilucidè, & sine ambiguitate proposuisse doctrinam Christi, ita ut exempli causâ, cum Verbum ipsi appellabant Deum, cum Spiritum sanctum nominabant, cum à Christo agebant pronuntiata super pane quædam verba: Auditores intelligerent, probèque perspicerent, quid iis nominibus, illòque dogmate significaretur.

Secundum est, hanc doctrinam non paucis tantum hominibus, sed toti terrarum orbi, atque innumeris Ecclesiis per Apostolos & Discipulos Christi, eorumque Successores innotuisse; & Fideles in omni verbo, & omni scientiâ salutarî divites fuisse factos, ut Paulus testatur; & Ecclesias potissimum Apostolicas, scil. ab ipsis Apostolis fundatas, & diu præsentia Apostolorum cultas & instructas, hujusmodi documenta uberius clariùsque, quàm reliquas hausisse.

Tertium est, Apostolos nihil sæpius & enixius commendasse atque inculcasse, quàm ut Fideles quod ab initio acceperant, constanter tenerent, & nemini vel homini vel Angelo fidem haberent, contraria aut alia ab iis nuntianti, quæ jam ipsi nuntiarent.

Quartum est, Christi Fideles, & Ecclesias omnes, & præcipuè Ecclesiarum Pastores, perspectum in primis habuisse, nihil per ipsos posse aut debere adjici, aut detrahi doctrinæ ab Apostolis traditæ; id qui auderet, summi sceleris rem esse habendum, & gravissimis Ecclesiasticis pœnis multandum, nisi ritè admonitus resipisceret, cum hoc sit, Christum aut Apostolos ignorantia aut invidentia accusare, qui homines aliquid ad salutem necessarium, aut utile minimè docuerint.

Quintum est, Episcopos, & Ecclesiarum Pastores id sibi muneris injunctum cognovisse, ut hujusmodi mutationibus atque erroribus obliterent, vel damnando, vel confundendo, persecutiones pro veritate tolerando, vel etiam fugien-

fugiendo errorum auctores & patronos, neque dissimulare in his casibus licuisse aut pacis causâ , aut propter meritum, aut propter debitum superioribus obsequium.

Sextum est, reverâ nullam in doctrina Christi novitatem & mutationem unquam disseminari cœptam fuisse, quin se aut Romani Pontifices, aliique Episcopi, aut Scriptores Ecclesiastici, aut SS Patres, aut etiam populus fidelis, & denique, si necessitas postulabat, Ecclesia universa opposuerit Novatoribus, & contemptroribus antiquæ traditionis. Omnes verò Synodos, & Episcopos, Romanosque præsertim Pontifices, & SS Patres, inter quos Chorum ducunt Sancti Ignatius, Polycarpus, & Irenæus, à primis Christianæ Fidei sæculis ad nostra usque tempora, nihil magis de prædicâsse, quàm traditioni Majorum receptæ, antiquæ & concordie esse standum, omnésque Hæreses ab ipsis eo præcipuè titulo fuisse damnatas, quòd novitatem saperent, & hujusmodi traditioni repugnarent. Atque ideo sicuti à similitudine veri apertissimè abhorret, tot ac tantos viros, tot ac tantas Ecclesias, novitati & mutationi in doctrina Christi infensissimas, aliud tradidisse, ac proposuisse, quàm quod antiqua traditio habebat, ità certum est, nullum ex Hæreticis defendere sententiam suam potuisse antiquitate traditionis. Addam etiam, paucos ex antiquis Hæreticis fuisse, qui traditionis vim atque auctoritatem non fuerint confessi. Potius ipsam à se stare clamabant. Et si quis flocci faciebat ipsam traditionem, ille primis etiam Ecclesiæ sæculis temeritatis ac insanix notam subiit. Juvat hic referre, quæ S. Irenæus habet Lib. 3. Cap. 2. de Gnosticis: *Unusquisque ipsorum omnimodo perversus, semetipsum, regulam veritatis depravans, prædicare non confunditur. Cum autem ad eam iterum traditionem, quæ per successiones Presbyterorum in Ecclesiis custoditur, provocamus eos, adversantur Traditioni, dicentes se non solum Presbyteris, sed etiam Apostolis existentes superiores, sinceram invenisse veritatem.*

En fundamenta, quibus innixa est Ecclesiæ consuetudo in Hæreticorum placitis hucusque damnandis. Satis ipsi semper fuit perspicere, imò hoc præcipuè attendebatur, num proposita nuper dogmata dissentirent à Traditione constanti Majorum, & ab antiquissimo Ecclesiæ universæ consensu. Dissidentibus nota statim inusta atque inurenda fuit ex Apostoli præcepto, qui nos monuit, ut à novitate opinionum caveremus, & quod traditum est, diligenter servaremus. Vel nullis aliis redditis damnatoriæ sententiæ rationibus, ea erat potentissima & invictissima ratio,

ratio,

ratio, quod hujusmodi recens doctrina, five novitia Scripturarum interpretatio, deprehendebatur contraria interpretationi, five dogmati in tota Ecclesia Dei ab antiquissimis temporibus concorditer vigenti, ac propterea ex Apostolorum Traditione descendenti. Præterquam quod falli in dogmate universa Christi Ecclesia secundum ejus promissa non potest, errandi etiam suspicionem auferebat ista facile cognita sæculorum præcedentium, & totius antiquitatis sententia in propositis quæstionibus. Non enim nostrum est, Christi doctrinam pro arbitratu nostro effingere, reformare, arque invertere, ut privatis & incertis intellectibus nostri ideis accommodetur; sed cum veneratione recipienda est, qualis à Christo Apostolis revelata, & ad nos derivata fuit per unanimem tot sæculorum traditionem, per tot Ecclesiarum, Conciliorum, Episcoporum, ac Patrum testimonia. Hos omnes incredibile est, simul conspirasse, aut ignorantiam, aut pravis artibus, aut formidine, aut silentio, ut sanctam Religionem perderent, five illam corrumpendo per novitatem, five corruptam tolerando. Sequitur ergo, apud omnes tum Criticos, tum cordatos homines, Traditionis fontes, h. e. Catholicorum Concilia, Romanorum Pontificum decreta, Sanctorumque Patrum concordia scripta, in iis, quæ ad doctrinam fidei & morum spectant, certissimum præbere veritatis argumentum. Nihil autem ferè à temerariis aut ignavis allatum est proximè præteritis duobus sæculis, aut afferri jam potest, quod longè antea improbatum non fuerit ab Ecclesia, à Conciliis, à Patribus; aut quod improbandum esse non pateat, quoties novitate suâ repugnare constet antiquæ Catholicorum Traditioni, & Dogmatibus, Constitutis, & Scripturis à Catholica Ecclesia hucusque aliter explicatis.

Moneret me locus, ut in illius Theologiæ laudes excurrerem, quæ Dogmatica apud nos appellatur; sed facile intelligatur ejus pretium: Munus nempe illius est, Catholicæ Ecclesiæ dogmata colligere à Conciliorum Patrumque monumentis, & prodere, quæ universæ Ecclesiæ probentur, quæve improbantur. Ubi id pateat, rationi, seu ingeniis humanis nefas est, hujusmodi sententias, tanquam errori adhuc obnoxias ad suam trutinam cogere. Quicumque Christianus esse amat, positusque hætenus principiis mentem adhibuit, hoc fateatur oportet. Quamobrem, quid ferat Catholici hominis indoles, parum se intelligere Phereponus prodit, cum in quodam suo Libro

Diony-

Dionysium Petavium incomparabilem virum, & de dogmatica Theologia supra omnes optimè meritum, appellat accuratissimum quidem veterum opinionum collectorem, sed mancum atque infirmum, quando agitur de obscuris illis Theologiæ & Philosophiæ quæstionibus, in quibus jus dicere debet ratio, & perspicuitas exigitur. Hoc est, si Phe-repono credimus, Petavius egregius fuit Historicus, non egregius Theologus: sed quantum celebris ille vir ingenio, & judicio, non minus ac eruditione polleret nemo est inter verè eruditos, qui nesciat. Quantum etiam ratione valuerit, neminem luculentiorē testem dabo, quàm ipsamet illius opera. Quanquam tamen in dogmatica Theologia à rationum usu Petavius temperasset, seu ut melius dicam, nullum argumentum, rationem nullam contulisset ad confirmanda Ecclesiæ dogmata; nihilominus integra ipsi staret gloria. Nervos omnes rationis intendere debet dogmaticus Theologus, ut detegat, quænam fuerint & sint Catholicorum dogmata, & quid verè sentiat, & senserit in iis Ecclesia. Hic ille præcipuus scopus. Detexisse solum, & evidenter indicasse Ecclesiæ veræ & universæ sententiam hoc ipsum est invenisse certissimum dogma Christi, saluberrimamque veritatem. Altera deinde se offert provincia, quam Scholasticæ potissimum, atque etiam Polemicæ Theologiæ cultores sibi vindicant, nempe fidei dogmata rationibus etiam, atque argumentis à ratione quoque naturali, & à Philosophia petitis probare, & adversus Infideles aut Hæreticos tueri. Qua in opera ineptire interdum solent homines incauti. Siquidem Rationi & Dialecticæ suæ nimium fidentes, aut de rebus altissimis, & de divinis Mysteriis intellectus nostri aciem vincentibus, rationes & explicationes adferre contendunt, quæ sibi quidem videntur excelsæ materiæ pares, re autem verâ nullius sunt ponderis, aut certa ipsa dogmata credere dediscunt, quòd ista privaræ ac temerariæ rationi suæ non satis congruere videantur. At dogmaticus Theologus ritè suo munere functus, tantum ab ineptiendo abest, quantum Ecclesia vera in suis dogmatis à periculo errandi abest, cum vel sine Philosophicis atque intimis argumentationibus, sive rationibus, certa sit illius doctrina, quippe à certo Magistro Deo revelata, & per fidos canales ad nos usque deducta.

## CAPUT XII.

*Ingeniorum libertas quam ab hominibus expetita. Doctrina ad Christianum pertinens triplex. Semper considerandum, revelatane, an secus à Deo fuerit. Dogmatis existentia significatio, & rationes distinguenda. Quid in his liceat aut non liceat hominum ingeniis.*

Atque hætenus de frenis salutaribus, & de necessaria ingeniorum moderatione in religionis negotio actum est. Alia in hanc rem dicenda superflua sunt. Verum de laudabili quoque ingeniorum libertate aliquid prius innuendum ducò. Quod argumentum, cum utile non minus sit, quam superius, illo tamen dulcius fortasse videatur legentibus. Quippe superba hominis mens, atque natura, cum in agendo, tum in sentiendo alienum imperium detrectat, suum tantummodo amat. Ac proinde nullum libentius, quam eorum tantum audimus, qui in libertatem agendi atque opinandi, quod volumus, mentem nostram se vindicatos esse pollicentur: quod non semel suis in libris facere Phereponum post tot alios sui similes video. At sicuti homini ratione prædito ipsa recta ratio effrenem in agendo libertatem negat, ita & hominem Christianum ipsa Christi religio non patitur immodica opinionum libertate ferri, quocumque placeat. Nos itaque humano ingenio eam libertatem proponemus, quæ hominem deceat rationis rectæ, Fideique Christianæ legibus addictum, ita ut neque sentiat se coerceri finibus iniquis, & hiniis compedibus, neque ultra metas à ratione & fide sanctissima positas evagari sinatur. Nimia opinandi licentia Hæreses parit, fidem & rationem temerè lædit. Rursus nimia ingeniorum servitus in superstitionem deducit, malum profectò teterrimum, & æquè ac Hæreses Religioni veræ formidandum. Ab utraque cavendum esse, ratio, & Catholica Ecclesia monet. Jamque vidimus periculum primum tolli, ubi in credenda divina revelatione cum Ecclesia consentiamus. Operæ pretium est, investigare quoque deinceps, quæ vitetur & alterum.

Prius ergo noscendum est, quotuplex sit doctrina, quæ ad hominem pertinet, & pertinere potest, quatenus est

Chri-

Christianus. Dicimus autem, triplicem esse. Prima complectitur quæcumque documenta revelata à Deo fuere, siue ad disciplinam, siue ad dogma referantur, siue necessaria, siue utilia, siue præcepta sint, siue consilia, ut homo religionem veram intelligat, & quæ in ipsa credenda sunt, credat, Deum diligat, eique seruiat, & beatam demum immortalitatem ab ipso obtineat. Secunda continet quæcumque non revelata à Deo Historiam Ecclesiasticam respiciunt, & admodum conferunt eruditioni tum Ecclesiæ, tum ejus filiorum, qua sunt Christiani. Tertia demum complectitur quaslibet profanas Artes ac Scientias, puta Phycam, Mathematicam, Historias profanas, & reliqua documenta opportuna ac utilia homini, terrenam siue corporis, siue animi, & rationis beatitatem quærenti. Postrema quidem ista doctrina nihil rei cum religionis & hominis Christiani negotio habere videtur. Sed cum à præstantissimo ejusdem religionis, ejusdemque Christiani hominis sine avertere nos, aut ad illum manu etiam ducere possit: necessum est, ipsam quoque in hujusmodi causa subire judicium nostrum

In hanc autem triplicem doctrinam ea semper consideratio cadere potest, nempe si ne à Deo revelata, nec ne; & num ad Ecclesiæ Catholicæ auctoritatem pertineat, an secus, illam sancire tanquam à Deo revelatam, aut rationi rectæ, & æquo congruam. Quippe ex ista consideratione altera cognitio effluit, scilicet quibus in rebus, & quando aut honesta servitus, & moderatio, aut honesta libertas christianis ingeniis conveniat. Ubi divina revelatio occurrit, ubi Ecclesia jus decernendi habuit, atque decrevit: tunc recta ratio monet, repudiandas esse ingenii nostri fallaces argutias, & audienda esse Dei & Ecclesiæ fideissima edicta. Cum verò & divina revelatio desideratur, & Ecclesiæ nullum sententiæ ferendæ jus fuit, aut nulla adhuc inde manavit sententia, liberum erit ingenio nostro iis in rebus sentire, quod veritati proprius videbitur.

Hiscè positis, primam doctrinæ speciem contemplemur, id est dogma, ac disciplinam. Illud nobis exhibet, quæ credenda sunt vel de natura, ac voluntate divina, vel de Incarnatione Verbi, vel de aliis Mysteriis, & Documentis Christianæ Religionis, & quæ agenda sunt homini Christiano, hoc est morum, & officiorum leges ad salutem consequendam vel necessarias, vel utiles. Disciplina autem tradit cum ritus ad Sacramenta, ad cultum ex-

ternum Dei, & ad reliqua Christianorum Myſteria conſideranda, tum leges, quibus Eccleſiæ ejusque Miniſtrorum, ac membrorum Hierarchia & regimen conſtat, quæ tamen & ipſa interdum referri aliqua ex parte poſſunt ad dogma, ut alio in loco videbimus. In dogmate potiſſimum ſita eſt Chriſtiani hominis eruditio. Quid enim aliud à nobis Religio expetit, quàm ut credamus, quæ credenda ſunt, & ad Evangelii normam ducamus vitam inculpatam; Deſque, & virtutum amore ferventem? Igitur eſt inſpiciendum, iſtane præcepta morum, reſque credendæ, an ad nos à Deo revelante veniant, an verò à rectæ rationis lumine, ſive potiùs à privatorum ingeniorum argumentationibus. Si Deum iſta auctorem habent, ſi rectam rationem: eadem vera & recta eſſe continuò intelligimus; ac proinde ingenio noſtro tunc eſt ſubſidendum, neque temere tantis auctoribus repugnandum, tametſi aliquid à Deo proponatur, quod ſatis intelligere, & capere nequaquam poſſimus. Sin à privatis ingeniis dogmata prodeunt, hiſce tum ſolùm conſentiendum erit, cum ad rationis & Logicæ leges ea exegerimus, & ab iis errorem evidenter abeſſe conſtiterit. Nam quid aliud habet ingenium alienum, ut noſtrum in ſua ſententiâ jure trahat; niſi rationes? Si infirmas hæc deprehendimus, ſi noſtras plus valere ſentimus: cur illi homini potiùs, quàm nobis adjungenda eſt fides? Cum verò, quænam dogmata Deus revera per Filium ſuum, per Prophetas, per Apoſtolos revelarit, tum ſolum certò conſtare poſſit, ut vidimus, cum ad iſta acceſſerit Eccleſiæ veræ teſtimonium: illa propterea nobis ob oculos ſemper verſabitur regula: nempe, *Auctoritatem ingenii noſtri cedere debere, ubi auctoritas Eccleſiæ intercedit, & contra vigeri poſſe, ubi non intercedit.* Multa enim ſunt, quorum ſanciendorum jus Eccleſia non habet; multa quoque ſunt, quæ illius auctoritati ſubſunt, neque tamen hujusque ſancita reperiuntur. In utriſque magna eſt ingeniis libertas, & injuſtè plerùmque agat, qui eam aut illuſenter in aliis ferat, aut etiam adimere velit.

Quò tutius autem & ex ordine procedamus, tria priùs conſideranda ſunt, quod attinet ad dogma: videlicet, exiſtentia dogmatis, modus explicandi dogmatis, ſive interpretatio, & ſignificatio doctrinæ, & rationes, quibus ipſum dogma ſi rectum eſt, probatur; aut improbat, ſi pravum. Hæc inter ſe planè differunt, neque inſtar unius habenda. Sunt autem dogmata complura, quæ

quod est ad existentiam, firmata jam sunt auctoritate, & decreto Catholicæ Ecclesiæ. Rursus eadem dogmata variis explicari possunt modis. Cum verò fieri possit, ut hujusmodi explicationes nondum receperit, rejeceritve Ecclesia, idcirco non idem erit eisdem interpretationibus robur, & eadem vis veritatis, ac est existentiae dogmatum jam stabilitæ. Tandem ipsa dogmata, quorum certa est existentia, & omnium consensu explorata significatio, sive explicatio, multis rationibus comprobari possunt. Attamen inconcussæ, ac certæ fortasse non erunt singulæ istæ rationes, quippe singulæ aperto Ecclesiæ suffragio nequaquam innitentur. Ergo secundum istam considerationem triplex suboriri quæstio poterit, nempe an dogma existat; quid per illud dogma seu per illius dogmatis verba Deus & Ecclesia significare velint, & quomodo hujusmodi dogma probandum sit.

Cognoscere existentiam dogmatis tum dicimur, cum certi sumus, Deum per eos Christi, Prophetarum & Apostolorum, Ecclesiâ definiente, illud revelasse & constituisse dogma. Ipsum Deum sacræ Scripturæ deprædicant omnipotentem, omniscium, æternum. Ex eisdem edocemur, in fine seculi judicandum à Christo universum genus humanum; justos in Regno Dei æternâ felicitàte donandos, improbos in igne æterno cum diabolis immani infelicitate plectendos. Hujusmodi dogmata in Christiana Religione existere, nullus Christianorum ignorat, aut negat. Ad hæc, nomine existentiae complectimur tum dogmatum substantiam, tum eorum consecutaria, & annexa, nam & singula ista sæpè tanquam dogmata considerantur, & de ipsis institui quæstio potest, an existant, hoc est an revelata necne fuerint, sive constituta per Ecclesiam. Multæ autem inter Catholicos & Hæreticos intercedunt controversiæ, his negantibus, illis affirmantibus, dogmata quædam à Deo revelata fuisse, aut ex jam constitutis dogmatis quædam consequi, aut non consequi, necessariò & ipsa credenda. Sed in hujusmodi quæstionibus pendere animi diu vel opinari illorum ingeniis nefas est, quibus firmissimum illud principium altâ mente fixum sedet, videlicet: *Ecclesiam in divinis Scripturis interpretandis, & in ipsis dogmatibus definiendis, ab errore immunem semper fuisse, semperque futuram.* Etenim cum nullo negotio postea constet, Ecclesiam Catholicam de iis jam tulisse sententiam, & ipsam reverà ita sentire compertum sit omnibus: statim etiâ Catholico ingenio occurrit,

quæ



quæ tum sit amplectenda opinio, & quibus in locis veritas certissimè habiter.

Sunt autem inter Catholicos & Protestantés, immo inter ipsos quoque Catholicos, aliæ de rebus Theologicis disputationes, & in neutram partem hucusque declinavit Ecclesiæ sententia, Libri Theologorum, qui Scholastici nuncupantur, abundant hisce quæstionibus. Utrunque pugnatur, utrinque Scripturarum loca, rationesque proferuntur, interdum etiam aliqua, aut utraque pars sibi auctoritatem Patrum, & Ecclesiæ vindicare contendit. Sed incertum adhuc utri opinioni Literæ divinæ, aut firma ratio, aut Ecclesiæ finè dubitatione faveant atque consentiant. Quid juris hîc habeat ingenium, nemo non intelligit. Fas ipsi est hujusmodi varias disputantium opiniones, rationesque excutere, easque confutare, aut iis demum suffragium suum adjungere, quæ ad veritatem propius accedere sibi videantur, & in alias abire sententias, quæ sibi magis arrideant. Talia quippe in dogmatum sensum minimè veniunt, & opinionum nomen iis potius congruit. Sed quanquam liberum sit ingeniis (modò periculum absit, ne dogmata certa lædantur) vires hîc suas exercere, atque exercere attamen in hisce non tam vituperationem effugiet, quàm commendatione majori dignus erit, qui tum ad normam Logicarum legum, Criticæ quæ melioris, tum etiam ad sacrarum Scripturarum, & Ecclesiæ mentem, ingeniosius & acutius sua inventa componet. Atque hæc est generalis regula, five libertas. Quâ nihilominus cùm ingenia non pauca abutantur, & abuti adhuc possint, ideo infrà subjiciendæ erunt necessariae quædam leges, & exceptiones, ut in temerariis & supra modum curiosis mentibus nimia licentia coerceatur.

Ad hæc, ubi dogmata existentia deprehendantur, diximus institui posse quæstionem de illorum germano sensu, five de mente Dei & Ecclesiæ in iis dogmatis proponendis. Multa sunt ad eò manifestis verbis concepta, adeoque rationis lumini, & reliquis Ecclesiæ documentis consentanea, ut nemo inter Christianos de illorum sensu & modo explicandi audeat disceptare. Sunt alia, quorum significatio in controversiam adducitur, adducivè meritò potest. Quod tum fit, cùm ista dogmata sub obscuris, aut æquivocis verbis proposita sunt, aut cùm certissimis aliis & evidentibus Religionis Catholicæ dogmatis non satis comòdè congruere posse videntur. Ipsæ sacræ Literæ,

ipsa Conciliorum decreta, ipsa SS. Patrum dicta, diversis obnoxia sunt interpretationibus. Proinde ex isto fonte emerferunt pleræque Hæreses, plerique Hæretici. Dum enim quisque divinam Scripturam, & Concilia, & Patres explicare vult atque interpretari secundum privatas ingenii sui vires atque ideas: humana ambitio & imbecillitas in varias distracta est opiniones, atque in errores perniciosissimos delapsa. Quidam Christum in sacris Literis minorem Patre appellatum animadvertentes, ipsum aut hominem duntaxat esse affirmarunt, aut ipsum negavere ejusdem naturæ & substantiæ cum Patre. Alii, quid verba significarent in postrema cœna à Christo pronuntiata super pane, investigantes, quod ingenio suo magis accommodatum videbatur, intellexere. Aliis ea sententia sedit, confusas esse in Christo divinam humanamque naturam. Nempe noverant ex universæ Ecclesiæ decreto, ambas hæc naturas in uno Christo unitas.

At in complurium dogmatum sensu inquirendo, modoque explicandi, non est, quod nunc diu multumve fatigetur ingenia. Hoc onere nos Ecclesia sæpè levavit, quippe non sua solum decreta & verba, sed divinorum etiam librorum sensum germanum lucidissime identidem explicavit. Id cum facile colligi possit, facile etiam caveantur errores. Quamobrem ingeniis nostris hæc ea tum restat libertas, ut quæ Scripturarum loca, & verba, aut Conciliorum Patrumque opiniones in ancipiti adhuc esse videntur, expendamus, & interpretemur, prout melius suadebit recta ratio, & Ecclesiæ, ac earundem Scripturarum mens ex aliis clarissimis dogmatibus, & Traditione Patrum cognoscenda. Præter hanc libertatem alia etiam patet. Quædam enim dogmata habentur, de quorum quidem sensu atque explicatione nulla occurrere inter Catholicos controversia potest, sed nondum constat modus, quo fiant, aut facta sint, quæ in iis dogmatis proponuntur. Nos docet fides, inferno igne torqueri damnatos. Qui autem id fiat, nos illa non docet. Nulla in hisce casibus lege universali prohibemur sententiam nostram dicere, & verisimilia afferre; & in explicandis his modis, alter ab altero, & sine Ecclesiæ injuria, dissidere potest. Ista tamen libertas nonnullis & ipsa indiget exceptionibus & frenis, de quibus infra sermo erit.

Tertio considerandæ sunt rationes, per quas dogmata Catholicorum firmanentur; infidelium & hæreticorum improbantur. Istæ desumuntur vel è divinis Literis, vel è Traditione, & Auctoritate Ecclesiæ. Ex ipsa quoque recta ratione,

ratione, & à Philosophiæ penetralibus argumenta deducuntur. In tanta rationum copia certissimæ quædam & invictæ se offerrent, iisque nullum dogma caret. Fieri tamen potest, ut aliquæ etiam infirmæ sint ac utiles, quædam etiam falsæ, quanquam verissimum alioqui sit ipsum dogma. Quapropter latè patet ex hac parte ingeniorum libertas. Non enim tantùm fas est meliora novæque proferre argumenta, sed aliena quoque elumbia repudiare & evertere licet. Veritas ut stet, mendacio non indiget. Imò ipsa refugit aded nutantibus fulcris innixa apparere, suo pondere jam stabilis, & aliis indubitatis principiis adhærens. Hinc inter Scholæ Theologos nemo sibi religione vertit rationibus novis cùm in errores Hæreticorum, tum pro veris fidei dogmatis decertare, & ipsis etiam aliorum Catholicorum rationibus indicare bellum, si illæ minus opportunæ, aut indignæ deprehendantur, quibus tutela veritatis commissa fuerit. Gregorius de Valentia Theologus celebris argumenta nonnulla, quibus Sanctus Thomas est usus ad existentiam Dei probandam, invalida esse ostendit; idemque alii quoque graves & pii Theologi fecerunt. Et hîc tamen sua sunt immoderatis ingeniis pericula. Sunt & rationes quædam, quas evidenter voto suo jam supra censuram nostram Ecclesia collocavit. Propterea infra dabimus operam, ut propositis quibusdam legibus generalis ista libertas intra honestos fines contineatur.

## CAPUT XIII.

*Pericula imminencia scribingentibus de auctoritate. Insipiens zelus quid pariat, & quàm laudanda hîc sit prudens moderatio. Ecclesia nunquam fallax in dogmatibus sancientis, duplici conditione posita. Dogmatum, quæ alia in mera contemplatione versantur, alia actionem quoque exigunt. Quæ possint, aut non possint, quæ etiam debeant, aut non debeant statui. Quid de questione, utrùm Angeli corporei, an incorporei sint, credendum, & an eam Concilia sustulerint. Inter rationes dogmatum quadam semper ad fidem spectant, sed non omnes. Quid hîc liceat ingeniis.*

**N**usquam firmiorem esse, magisque venerandam Ecclesiæ auctoritatem, quàm in dogmatis sancientis,

diximus. Ità se rem habere, ea omnia suadent & persuadent, quibus Ecclesiam à veritate deviare in salutis doctrina nunquam posse suprà ostendimus. Id Religionis æternum servandæ necessitas postulat; id humanæ rationis imbecillitas exigit; id Christus pollicitus est, id ubique, & semper, & concorditer credidit Ecclesia Dei, statuerunt Concilia, tradiderunt Patres. Et ista auctoritas ad tria illa, quæ in dogmate hætenus consideravimus, sese extendit; sed suis limitibus constringitur hæc ipsa facultas, magnâq; circumspeditione hîc opus est, uti jam explicatum pergo. Quod priusquam aggredior, quædam præfari juvat locum habituram tum hîc, tum in cæteris de auctoritate Ecclesiæ & ingeniorum libertate dicendis. Auctoritatem esse rem omnium delicatissimam, satis compertum est. Hinc illud ferè semper accidit incommodi, ut qui ipsam pertractare volunt, non solum obrectationibus contraria sentientium, sed etiam suspicionibus & odiis eorum sint obnoxii, de quorum auctoritate est sermo. Innatum quippe est cunctis prope hominibus dominationis & præcellentiæ desiderium, eoque concitatiùs in illud mens nostra fertur, quod manifestius sentimus aut credimus, istius auctoritatis tutelam & amplificationem pertinere ad Reipublicæ bonum. Nulla autem auctoritas, hominibus à Deo data, Ecclesiastica æquanda est. Reliquæ humanarum rerum perfectio regimini conducunt, finemque sibi statutum habent, nobilem quidem, sed brevem, qualis est terrena mortalium felicitas. At Ecclesiæ auctoritas nobilissimam ac æternam rem curat. Non enim solum ad beatam in terris vitam homines perducit, sed ad æternam quoque in cœlis beatitatem. Quocirca jure tolerari non solet, quicumque vel tantillum videatur imminuere de tam necessaria utilique auctoritate, quam tollere, aut non satis venerari, idem certè est, ac Hæresibus & erroribus innumeris claustra referare.

Verùm nimia religione hujusmodi auctoritas nonnunquam respicitur. Quæ causa est, ut immoderatè à quibusdam extollatur, & quod gravius est, immoderatè iis succenseatur, qui cum moderatione de ipsa loquuntur. Nimiram religionem appello zelum sine ratione exuberantem, zelum, ut Apostolus ait, non secundum scientiam, zelum superstitioni affinem. Enim verò non alio nomine deligendus est eorum inconsultus ardor, qui nullis penè finibus Ecclesiæ auctoritatem teneri opinantur, & ubi aliquid in Conciliis, in Breviariis, in Romanorum Pontificum Diplomatis, in SS. Patrum Libris descriptum comperiunt,

pro ipso, tanquam pro aris & focis, pugnant, & pugnandum contendunt. Nempe id hominum genus sine ullo discrimine illa omnia non secus ac fidei capita habenda esse censet; Ecclesiam quippe errare nusquam, & nunquam posse. & si quis contrariam opinionem ducatur, hunc procul dubio cum Hæreticis facere, gravibusque pœnis, & omnium odio mulctandum putat.

Fateor, laudanda est horum proba voluntas, sed non est dissimulanda aliqua in iis interdum scientiæ & prudentiæ inopia. Videlicet, nimium suspiciosi, & morosi sunt, & illi interdum timore trepidant, ubi non est timor. Atque utinam tantum Ecclesiæ sanctæ prodesse, quantum nocere possunt huiusmodi clamoribus, minis, atque Tragœdiis. Nam cum multa occurrant in Ecclesiastica eruditione aut verisimilia tantum, aut dubia, aut contraria, aut omnium vel Catholicorum consensu falsa: si unaquæque veluti certa & vera indiscriminatim accipienda sunt, apud Hæreticos & Infideles, imò & apud Catholicos, periclitabitur dignitas, sanctitas, & veritas præstantissimæ Religionis. Deinde ad tyrannidem accedet, qui minime credenda credi jubeat, aut se prodet erroris magistrum, qui in censum veritatis fabulas quasque referat. At ab utriusque incommodi vel minima suspitione abesse debet, & certè abest Ecclesia Dei. Pios hosce assentatores ipsa tandem refugit; rectèque intelligens, quousque sua auctoritas perungere debeat, ut deinceps constabit, non pluris juris sibi tribui amat, quàm quod Christus, publicæ utilitatis ratio, & omnium prudentum vota hucusque tribuerunt.

Cordati itaque viri, & præcipui Catholicorum Præsules, & quicumque veram Theologiam, & eruditionem Ecclesiasticam non à limine tantum salutârunt, si omnes neque Ecclesiæ auctoritati quicquam detractum, neque ultra æquitatis leges ei quicquam adjectum volunt. Utrunque excedere facillimum est, & utrumque vitium est. Et quamquam opinione vulgi si solum peccare videantur, solcantque ignominiosis nominibus traduci, qui Ecclesiæ jura elevare ac pessumdant. & pii contra censeantur, qui in amplificanda vel supra modum ejusdem Ecclesiæ auctoritate nervos omnes intendunt: æquè tamen sapientum Catholicorum opinione peccant, & obsunt, qui nihil antiquius habent, quàm ubique Ecclesiæ auctoritatem importunè exaggerare, contraria sentientibus ubique irasci, & eadem abuti auctoritate in cujusque suæ privatæ opinionis, affectionisque præsidium. Pietatem sapit horum facinus,

sed perniciosam pietatem, etenim si nullo negotio vincendam adversariis exhibent aliqua ex parte Catholicorum causam. Quis non videat, si in uno, quod verè ad Ecclesiæ judicium pertineat, deprehendantur. Ecclesiastici Judices aberrasse, necesse quoque esse, ut in reliquis omnibus errori obnoxiam confiteamur Ecclesiam? Summopere ergo conducit cum ipsi Ecclesiæ, tum Theologis omnibus, exquirere, perspectumque animo habere, quinam auctoritati Ecclesiasticæ limites præscripti sint, ne dum incerta & indebita jura sacris Pastoribus concedimus, certa & debita in periculum adducamus. Atque uti est modesti & non vulgaris animi, hominisque supra affectus suos regnantis, nil tibi arrogare, quàm quòd in publicæ rei commodum, & in justitiæ & veritatis tutelam redundet: ità pii simul & prudentis Theologi est, nihil Ecclesiæ tribuere, quod tributum in ipsius matris nostræ contumeliam, publicumque incommodum recadat. Ut eidem penè serviatur, & consulatur, non solus zelus, non sola pietas consulenda est, sed scientia quoque, & Logica perfecta, & Critica, & eruditio antiquitatis, & omnium maximè prudentia. Quòd si dubium quandoque post accuratam disputationem jus Ecclesiæ restet, tum certè commendabilius fuerit id ipsius auctoritati piè concedere, quàm pertinaciter negare. His autem præmissis, quibus si non meliores, certè infirmiores indigent, ne me adversus temeraria ingenia dimicantem ejusdem criminis reum temerè suspicentur, fidentiùs nunc in argumentum invado.

Quando quæritur, quousque pateat Ecclesiæ Catholicæ auctoritas in dogmatis sanciendo, generalis regula futura est nobis: *Ecclesiam sine erroris suspitione decernere posse, quacumque dogmata scitu necessaria sint aut utilia fidelibus, quoties ista per rectam interpretationem, aut per rectam argumentationem deduci possint tanquam præ existentia in revelatis, per Scripturas sanctas; aut per concordem & antiquam traditionem ad nos transmissa.* Dux autem conditiones exigi mihi videntur, ut Ecclesia Dei statuere dogmata sine erroris periculo possit, nempe: Fidelium necessitas ac utilitas; & divinorum verborum, sive scripto, sive per traditionem ad nos manantium, fundamentum. Harum altera causam decidendi respicit, altera causam non errandi. Utraque verò in judiciis Ecclesiæ præ oculis semper esse debet ac solet. Et ad postremam quod attinet, celebris est sententia Vincentii Lirinensis, ità de Ecclesia scribentis:

*Non*

*Non nova fidei dogmata statuis, sed vetera cruas.* Doctrina enim à Christo tradita perfecta atque integra fuit, & finè impietate ad illam aliquid adicere non possumus, ne veluti mancam & imperfectam temerè aut incautè accusamus. Scio, mulier illa Samaritana agebat, quia *Messias venit. Cum ergo venerit ille, nobis annuntiabis omnia.* Et ipse Christus omnia, quæ audivit à Patre, nota fecit nobis, jussitque Apostolis docere Gentes omnia, quæcumque ipse mandaverat. Nova itaque dogmata non procuduntur in Ecclesia, sed vetera repetuntur, obscura explicantur, defendunturque eadem, quæ Christus tradidit, & nihil propterea ab Ecclesia statui certissimè potest divinà Fide credendum, nisi quod Christi verbis, sive scriptis, sive non scriptis, nitatur, & inde per rectam interpretationem & argumentationem deducere liceat. Spiritus verò sanctus secundum promissa Christi semper adfuit, atque adfuturus est judiciis Ecclesiæ, non ut novæ revelationes fiant, aut nova revelentur per ipsius Ecclesiæ vocem dogmata, sed ut dum sacræ Literæ & antiqua Traditio diligenter consuluntur, tunc interpretatio recta, rectaque argumentatio ab Ecclesia instituantur, nullusque error in easdem subrepat.

Singillatim nunc inspiciamus, quæ appellentur necessaria & utilia Fidelibus, & ubinam certò interpretari atque argumentari Ecclesiæ liceat. Alia sunt omnino, alia sunt ex parte, Fidelibus necessaria. Prima appellamus, quæ qui jam adultus & mentis compos ignorat, à regno Dei arcebitur. Fidelibus ex parte necessaria nuncupamus, quæ ignorare quidem liceat, sed aut negare, aut in eis errare, nefas sit. Utilia, quæ homini Christiano conducunt, ut faciliùs cælum consequatur, infernasque poenas evitet. In duò autem genera dividuntur dogmata. Alia in mera contemplatione versantur, & fidem tantummodo postulant. Alia præter contemplationem & fidem, actionem quoque respiciunt, qualia sunt, quæ de moribus in religione traduntur. Et quidem populis expectantibus beatam spem, & adventum gloriæ magni Dei & Salvatoris nostri Jesu Christi, nihil magis necessarium est, atque utile, quàm scire, quæ in moribus actionibusque humanis Deo placeant, atque displiceant, ut abnegantes impietatem & sæcularia desideria sobriè, & justè & piè in hoc sæculo vivant. Cum autem in sacris Literis apertissimè descripta sunt præcepta vitæ, & potissima sal-

tem morum documenta, è quibus tanquam ex fontibus facile reliqua omnia singularia deduci possunt : hinc Ecclesiæ facillimum & necessarium sæpè est, certò decernere, quæ liceant, quæve non liceant, & illius sententiæ nolle acquiescere grave crimen fuerit, gravius adversari. Eò etiam pertinent Christi verba Matth. xxi. 1. 2. *Super Cathedram Moysi sederunt Scribæ & Pharisei. Omnia ergo quacumque dixerint vobis, servate & facite.* Proinde nihil apud Catholicos certius est, quàm ea finè dubio licere aut minimè licere, quæ suffragio suo comprobavit, aut improbavit Ecclesia.

Quod est ad dogmata in sola contemplatione sita, quædam sunt omnino necessaria scitu. Nisi quis sciat & credat Deum esse, & remuneratorem esse, de ejus æterna salute actum est, ut Apostolus monet. Unitatem quoque Dei, & Trinitatem personarum in unitate naturæ, Verbi Incarnationem, Christi mortem pro redemptione generis humani, ac resurrectionem, Christiano ignorare nefas. Alia sunt, quæ non opus quidem est omnibus scire ad salutem, sed omnibus incumbit, cùm illis annuntiantur. Verùm & ista etiam si ignorare interdum finamur, nunquam tamen, si percipiuntur, inficiari, aut in iis errare, liberum atque impune est nobis. Et propterea ipsa quoque Fidelibus quodammodo necessaria fiunt. Quippe si hæc, ubi animo percepta sunt, negentur, aut errando corrumpantur, tum homines à virtute avertuntur, ad vitia sollicitantur, aut aliquid indignum de Deo, oppositumve ejus revelationi sentitur. Exempli causâ, plurima habet Calviniana Hæresis, quibus positus homo, si probè argumentetur, ad vitia deflectere velit, virtutibusque valedicere; & nihilominus æternam vitam sibi eripiendam ideo ille homo non credet. Tale est arbitrari, justificationem & gratiam sanctificantem per nullum peccatum amitti posse, ità ut nemo in gratiam à Deo receptus, exinde quanquam graviter peccans, è gratia excidat. Justum quemvis firmiter credere debere, sibi regnum Dei ne à peccatis quidem gravibus eripiendum; & contra Justis impossibile esse divina mandata implere. Bona Fidelium opera, peccata esse apud Deum, & alia hujusmodi. Aliena pariter à dignitate ac natura Dei sensere cùm antiqui, tum recentes quidam Hæretici, cùm ab ipso dixerunt prædestinari ad culpam non electos ad gloriam, aut aliis sententiis temerè incautève ipsum constituerunt auctorem peccati.



Itidem innumera sunt, quæ ex officina mentis humanæ, quamvis lumine Evangelii illustrata, hucusque prodierunt, & prodire quotidie possunt, revelationi divinæ contraria. Paucos quidem invenire est inter Christianos, qui postquam sacras Literas divinitus conscriptas arbitrati sunt, aliquid subinde falsi in iis contineri asserunt, aut suspicentur. At non facile eorum numerus ineatur, qui pro non revelatis à Deo quædam habuerunt ac habent, quæ tamen revelata fuere, aut contrà inter revelata retulerunt, quæ revelatione carebant. Id singulas Hæreses perlustranti continuò pateat. Quoties igitur accidit, ut ejusmodi excitentur quæstiones, dubium nullum erit, quin utile sit unicuique Christiano, & ipsi Christianorum Reipublicæ necessarium, earum definitionem ab Ecclesia audire, ne quis errando aut virtutibus, aut naturæ divinæ, aut divinæ revelationi adversetur. Atque hic interpretationis & argumentationis jura exercere tutò potest ac debet Ecclesia, *ne simus parvuli fluctuantes, & circumferamur omni vento doctrinæ*, ut ait Apostolus ad Eph. 1 v. 14. Primum jus exercet ipsa, cum explicat, quid reapse Traditio fuerat in doctrina Christi, & quid significant Scripturarum verba æquivoca aut obscura. Alterum, cum dogmata probat aut improbat, quæ sacris Literis aliisve certissimis dogmatibus consecraria sunt, aut esse censentur. Verum Deum simulque verum & perfectum hominem esse Christum, Scripturis cum Traditione apertissimè consentientibus, Ecclesia Orthodoxa nunquam non credidit. Hinc ritè deduxit, ipsum non in speciem tantum, sed verè humanam carnem induisse; & quatenus homo est, è corpore animæque humanâ constare; & in ipso duas esse naturas minimè confusas, duâsque item voluntates. Ista dogmata per rectam argumentationem, è Scripturis (ubi abdita atque involuta erant) derivatâ, & constanti Ecclesiarum Traditione firmata, Marcionis, Apollinaris, Eutychetis, & Monothelitarum commentis opposita, errorem in hac parte omnem sustulerunt, certoque veritatem statuerunt. Eâdem ratione explosa est Novatorum opinio negantium debitam aut licitam Christi adorationem in Sacramento Altaris. Ibidem Christum verum Deum peculiari modo præsentem esse Ecclesia Catholica credit. Hoc posito, necessario sequitur, adorandum ibi esse Christum. Nihilque à ratione magis absolum videtur, quàm Idololatriæ crimen inferre Catholicis, adstantibus id, quod non adorare sit crimen.

Ex his autem, quæ hætenus commemorata sunt, nonnulla deducuntur perquam necessaria documenta. Et primò, cum oporteat, Ecclesiæ Catholicæ judicia, ut certissimum veritatis argumentum præstent, revelatione divinâ semper inniti, consequens est, ubi impleri ista conditio non possit, illic minimè habere locum datam à Deo Ecclesiæ auctoritatem. Secundò, non omnia, quæ ab Ecclesia, Conciliis & Patribus constituta aut probata, sive etiam improbata & rejecta videntur, eodem obsequii venerationisque genere suscipienda esse. Quæ enim per interpretationem, ac argumentationem in sacris Literis & Apostolicâ Traditione haberi, Ecclesia palam edixit, ea divinam Fidem à nobis postulant, fideique dogmata jure nuncupantur. At quæ nullo alio fundamento consistunt, quàm humanis rationibus, humanisve experimentis, humanam quidem exigere interdum fidem possunt, at nunquam divinam, neque fidei dogmatis accensenda veniunt. Quare si quis ejusmodi postremis rebus adjungere fidem nolit, stultus quidem interdum, interdum temerarius reputabitur: addam etiam, in eum quandoque Hæresis suspicio conveniet, & quandoque gravi castigatione coercendus erit; sed nunquam Hæreticus meritò dicetur, neque iisdem prorsus ac Hæretici damnabitur pœnis. Verùm de his suo loco tractandum fusiùs erit.

Tertiò, sunt & aliæ quæstiones ad dogma spectantes, quas absque errandi periculo dirimere Ecclesia potest, sed tamen ab iis dirimendis temperare prudenter debet. Non modica istarum copia, & præcipuè apud Scholasticos, occurrit, & enormem adhuc in numerum excrescere posset. Dirimere autem Ecclesiæ fas esse diximus, quia controversiæ hujusmodi aliquatenus contingunt revelationem divinam, & ex ista earum decisio peti deducique potest. Non solet dirimere, quia sive in unum, sive in alterum sensum, tamen si contrarium, inclinet Christianorum sententia, nihil officitur scientiæ morum à Christo traditæ, nemo à virtutibus idcirco revocatur, aut ad vitia tacitè allicitur, & præcipuis, expressis, ac receptis Scripturarum Traditionisque documentis, atque principiis, nulla vis infertur, nullaque ex parte repugnatur. Utique si Ecclesia in animum induceret, quibuscumque natis ac nascituris quæstionibus finem irrevocabili suo decreto imponere, & sibi supervacaneam incredibilèque crearet molestiam, & exiguum ingeniis immoderatè

curiosis beneficium deferret. Ecquando enim tantum opus illa absolveret? & quorsum tantos labores devorare, & in immensum proferre decreta fidei? Ambitionis, penè dixerim, aut saltem intemperantiæ hoc esset, non necessitatis. Neque sic deterreret ab excitandis novis quæstionibus gentem litibus & disputationibus unice addictam, iisque æternum pascendam. Ad hæc non pauca sunt tam levis momenti in disputationem adducta, aliæque etiam tam difficile referri possunt aut ad apertam Scripturarum mentem, aut ad Traditionis antiquitatem, ut præstet verisimilia relinquere, quàm vera aut falsa decernere. Sed illud in primis attendendum est, uti dicebamus, nimirum an disputantium sententiæ aut palam, & aperto bello, aut tacite ac per latus, in perniciem vergant alicujus jam statuti dogmatis, & expressæ in utroque Testamento veritatis, quæ ad hominum salutem, fidemque saluberrimam spectet. Ubi verò, & quando, & quæ censuram aut suffragium sinè mora postulent; quæve permittere, aut negligere, aut damnare, Christianæ Reipublicæ interfit, ad Ecclesiæ Maximorumque Pontificum prudentiam pertinet dignoscere.

Quartò, in iis etiam, quæ per Ecclesiam statui certissime possunt, non solum, ut diximus, multa occurrunt nondum ab ipsa in censum dogmatum ad fidem attinentium relata, sed aliqua etiam occurrere possunt, quæ quamquam in Conciliis & Patrum scriptis inveniantur, postremo tamen calculo probata aut rejecta fuisse continuò censenda non sunt. Id autem evenit, cum Concilia & Patres non ex professo hujusmodi sententias pertractant, sed obiter aliudque deliberando commemorant. Ex aliis Traditionis monumentis constare aliquando poterit, certissima esse, quæ in aliqua Synodo, & apud nonnullos Patres in transitu referuntur. Eaque tunc, etsi præter propositum dicta, vim dogmatis aut obtinebunt, aut retinebunt. Verùm quæ non aliunde firma ac rata apparent, non propterea, quòd ab ore aliud agentis exciderint, è vestigio naturam dogmatis induunt. Immo gravissimis ex adverso militantibus rationibus diversæ opinioni adhærere flagitium non erit. Nemo inter Catholicos negat, quin ad decernendas fidei quæstiones, & efformanda fidei dogmata, ipsis quoque Conciliis necesse sit, Scripturas, & Traditionem diligenter consulere. At quilibet, hujus conditionis rationem fuisse habitam, quando Patres obiter, atque aliò intenti, hujusmodi sententias ingerunt?

In VII. Synodo Oecuménica Act. V. Tarasius Constantinopolitanus; unus è Concilii Præsidibus, Joannis Thessalonicensis verba referens, affirmat, Angelos corpora quædam levia, aërea, vel ignea, sibi adjuncta habere. Ab hujusmodi opinione dissentire nequaquam videtur Synodus universa; & in eam, ne quid dissimulem, non pauci ex antiquis Patribus inclinârunt. Porro Innocentius III. in Concilio Lateranensi Angelos creaturas spirituales appellat, easque à corporeis manifestè distinguit. Visum est & aliis Patribus, Angelos planè esse materiæ expertes. At expedita est hujusmodi Antilogiæ conciliandæ ratio Neutra sententia à neutro Concilio definita reverà fuit, aut Catholicæ fidei dogmatis adscripta, obiter enim utrobique proposita est, cum de alia doctrina deliberatio foret. Nimirum Nicæna Synodus id solum tunc intendebat, ut Angelos, sanctorumque animas pingi posse statueret. Animus autem non erat etiam statuere, ntrum è corpore Angeli reverà constent. Itidem in Concilio Lateranensi id unum agebatur, ut Manichæorum Hæresis renata proscriberetur, cujus erat illud impium placitum, non omnia Deo auctore fuisse creata. Contrarium dogma rectè sanciunt PP. Professionem Fidei probantes ab Innocentio III, P. M. conscriptam. Utrum verò Angeli omnino materiæ sint expertes, nulla tum quæstio vertebatur, nullumque statuendæ hujus rei propositum Patribus fuit. Utraque igitur sententia, non dogmatis Christiani, sed opinionis nomine in utraque Synodo locum habuit.

Attamen unum hîc prætereundum non videtur. Si qua in Conciliis Oecumenicis vel obiter proferuntur, neque ibidem repudiantur, quanquam non inde statim sequatur, iis documentis dogmatum firmitatem accedere, semper tamen sequitur, aut illa esse præter fidem, aut non esse contra fidem. Scilicet aut ad eam doctrinæ partem referenda sunt, quam Ecclesia per sententiam certissimam sancire non potest, cujusmodi sunt nonnulla jam commemorata, & plura inferius indicanda. Aut si ad illam doctrinæ partem spectant, quæ judicio nunquam fallaci constitui possunt ab Ecclesia, tunc Synodi silentium argumento est, hujusmodi opiniones fidei dogmatis non repugnare. Eas ex professo & apertè non approbando, Ecclesia decretis fidei nondum intulit. Et rursus non refellendo, tacitè docuit, eas ab ipsa doctrina fidei minimè abhorrere. Dissimulare enim Conciliis licet, quæ ad fidem non pertinent, at fidei repugnantia dissimulare non licet. Neque Ecclesi-

am fugere potest, quid doctrinæ ab Apostolis & Patribus traditæ adversetur, & ab Ecclesiæ munere abhorret, sinere hanc doctrinam, se audiente, & dissimulante, violari. *Error enim, [ut habetur § 3. Dist. c. Error] cui non resistitur, approbatur;* nisi fortè ejusmodi dissimulatio inde oriatur, quod ad maturius examen controversia ipsa reservetur.

Qua propter proposita de Angelis controversia aut insensum, ut nonnullis placet illius doctrinæ venit: quæ neque ex Scripturis, neque ex Traditione componi potest; & proinde sentire fas est de illa quod veri videtur similis. Aut, si ad Ecclesiæ judicium spectat, neutrius Concilii judicio sublata est. Silentio tamen suo effecere Concilia illa, ut neutra opinio dicenda sit fidei doctrinæ contraria. At quomodo, inquit aliquis, verum simul sit, Angelos è materia corporea constare, & non constare? Respondendum, certè videri, eos omnino spirituales esse. Cum verò tenuissima corpora interdum induant, ut Angelicum munus eorum gratiâ exerceant, quibus se conspiciendos præbent: ideo corporei per accidens, ut dicitur, appellari pingique possunt. Incertum autem est, an istam ætheream vestem illic deponant, an retineant, qua in questione prudentis est continere judicium. Denique præstat horum Conciliorum verbis non admodum inniti. In Synodo Nicæna Tarasius è Joannis Thessalonicensis Oratione id unum arripuit (cui & reliqui Patres assentiuntur), nempe circumscriptos esse Angelos ad differentiam Dei incircumscripti, ipsosque humanâ specie fuisse conspectos, atque ideo fas esse illos pingere. Tacuit de eorum corporibus. Immo ipsos Act. iv. incorporeos appellaverat. In Lateranenfi Concilio, cum ab Innocentio III. Angeli dicuntur spirituales, ea vox omnem corporis societatem nequaquam excludit. Angelos incorporeos, & spirituales alii ex Patribus dixerunt, quod è crassa materia non constarent. Nihilominus iidem Patres constare ipsos censebant è subtilissima atque ætherea materia. Sed de his jam satis.

Nunc de rationibus, quibus dogmata probantur, agamus; ad earum quippe leges expendenda etiam venit proposita de Angelis controversia. Certè non alia de causa statuisse videntur Nicæni Concilii Patres licere Angelos pingi, quàm quod Joannis Thessalonicensis rationes gravissimæ apparuerant. Et quidem si in dogmatis sancendis nulli errori obnoxia est Ecclesia Catholica, necesse est eâ quoque prærogativam retineat in dogmatum rationibus inveniendis atq; edicendis. Nonne dogmatum fun-

damenta sunt rationes? Istis nutantibus, quomodo imposita moles non dehiscat, atque labatur? Igitur argumenta rationesque adhibitæ à Conciliis & Patribus ad dogmata comprobanda, erroresve rejiciendos, pari veneratione & fide, perinde ac ipsa dogmata, suscipiendæ erunt.

Verùm hîc majori, quàm in reliquis, cautelâ est opus. Etenim in Conciliorum Patrûmq; lectione planè sit hospes oportet, aut Logicæ, Criticæque oppido imperitus, qui eodem pede omnes ab iis adhibitas rationes dimetiatur, & dimetiendas arbitretur. Quare primò dicimus, nullum hucusque ab Ecclesia constitutum fuisse dogma, quod ratione quapiam invictâ non nitatur; & propterea aliquam semper esse rationem dogmatum, quæ & ipsa ad fidem non secùs ac dogma pertineat. Secundò addimus, non solum apud sanctos Patres, & in Scholis Theologorum, sed etiam in Conciliorum Actis quasdam occurrere posse dogmatum rationes, quibus obsequium quidem ferè semper à modestis hominibus debeat, sed nunquam divina fides. Primam conclusionem negabunt fortasse Heterodoxi. At quæ jus Ecclesiæ probant, illiusque infallibilitatem in decidendis dogmatis, ea quoque manifestissimè produnt, nunquam sinè aliqua ratione ad fidem spectante, & è sacrarum Literarum, Traditionisque documentis minimè fallacibus deducta, Ecclesiam devenire ad sententiam ferendam. Istæ autem appellari possunt fundamentales, & potissimæ dogmatum rationes.

Altera conclusio, nempe ejusdem non esse ponderis omnes rationes ad probanda dogmata adhibitas, primâ facie fortasse non arrideat imperitis jurium Ecclesiasticorum æstimatoribus. Inter peritos autem verèque doctos Theologos, non solum neminem contradictorem habeat, sed omnes habeat laudatores. Qui secùs arbitretur, præter experientiam sibi adversantem, rationes parum sibi faventes inveniet. Enimverò quid evidentius est, quàm veritates cujuscumque generis sint, sive Theologicæ, sive Philosophicæ, sive Morales, probari posse per argumenta, ut ajunt, demonstrativa; paritèrque per argumenta tantummodo probabilia, & verisimilia? Proinde quanquam plurima certa sunt, vel ex revelatione divina, vel ex lumine rationis, tamen ista non refugiunt societatem rationum probabilium & verisimilium. Harum quidem ope non indiget veritas, ut sibi constet, sed earum ferè semper subsidium amat, ut faciliùs persuadeatur: Deum esse, mundum ab ipso conditum, animas rationales non interire cum corpore,

re, atque ultra corporis mortem esse animarum poenas ac præmia: per lumen rationis certissimè cognoscimus, & revelatione divinà præeunte, firmissimè etià credimus Nihil verò prohibet, quin ad eò perspicuas veritates probabilibus quoque rationibus illustremus, ornemus, ac persuadeamus.

Id autem cùm interdum in Conciliis, tum sæpè apud SS. Patres locum habuit, & quotidie à præclarissimis Theologis atque Scriptoribus usurpatur, in pertractandis reliquis Christianæ doctrinæ capitibus. At argumenta verisimilia, rationesque duntaxat probabiles, divinam à populis fidem exigere non possunt, quippe non evidenti veritate nixà Imò cùm quidquid verisimile tantum est, si intimè, & severiori trutinà expendatur, falsum quoque deprehendi possit: quid mirum, si quandoque rationes, parum, immo nihil probantes, occurrant apud rerum divinarum interpretes & apud præstantissima Ecclesiæ lumina? Neque idcirco de firmitate dogmatum quidquam deperit; neque minori quàm antea mentis obsequio credenda sunt, ac suscipienda Ecclesiæ decreta. Satis est eorum stabilitati fundamentalium rationum virtus. Quibus cùm nullum, ut diximus, dogma careat, necesse est etiam populos Christianos ab iis victos ad stipulandi dogmati proposito.

At qui distinguantur à fundamentalibus istæ subsidiariæ rationes? Fateor, non id perinde facile omnibus erit, ac est piis simul & judiciosis hominibus. Et tamen plurimi inter est, unumquemque Theologum in iis discernendis ab errando cavere. Etenim cogitandum non est, eum tantummodo nocere Ecclesiæ, qui audeat in dubium vocare, aut rejicere fundamentales rationes. Error etiam est, excusatione quidem dignus, sed tamen error, atque incommoda non pauca gignens, argumenta solum probabilia majori quàm par est virtute donare, eaque non secus ac Fidei firmissima capita, sine dubitatione credenda proponere. Id ab Ecclesiæ ipsius consilio abhorret, quæ ideo verisimilibus interdum utitur, ut vera faciliùs persuadeat, ac roboret, non ut dubia ex his incertis certissima statuatur. Sed adhuc interrogamur, quid à subsidiariis & probabilibus rationibus rationes distinguantur fundamentales. Ergo non alià hinc utendum regulà censeo, quàm quæ discernere nos docet ab incertis certissima dogmata. Illæ igitur rationes ad fidem spectabunt, & fundamentales appellabuntur, quas aut SS. Patres ubique, & semper, & unanimiter pro certis atque evidenter acceptè, aut Generalia Concilia, Romanive Pontifices in suis fidei formulis, decretis, & judiciis ab uni-

versâ Ecclesia probatis concordî studio probârunt, & tanquam fundamenta dogmatum posuere. Quare si quis ex sanctissimis Patribus, si quis etiam ex Episcopis in Actis Conciliorum Generalium suopte ingenio rationes adferat, atque ad eas non accedat Ecclesiæ totius, hoc est totius Oecumenicæ Synodi, aut Romani Pontificis, aliorumve Patrum consensus: tum cohibere iudicium nostrum licebit, neque iis adjungere statim fidem nostram cogemur; incertum est enim, an per unum Episcopum, aut Scriptorem, Deus loquatur.

Deinde animadvertendum est, fundamentales dogmatum rationes esse debere verba ipsa Scripturarum sacram, aut ipsius Traditionis indubia monumenta. Humanæ, & Philosophicæ rationes Ecclesiasticis sententiis ponderis quidem aliquid adferre possunt, at minimè primum ac præcipuum fundamentum, nisi & istæ divinis Libris & Traditione innitantur. Immo ipsa Scripturarum loca, quibus tum Concilia, tum Patres, cæterique Theologi utuntur in dogmatum comprobationem, pro fundamentalibus semper certissimisque rationibus minimè omnia sunt accipienda. Allegorica quædam occurrere possunt, quædam etiam ex communi eruditorum voto obscurissima. Prudenter adjunguntur & ista clarissimis aliis divinorum Librorum, & Traditionis legitimæ testimoniis, non futura quidem dogmatibus constituendis fundamento, sed constitutis futura ornamento, atque præsidio. Quod ad Traditionem attinet, modò ritè ex antiquitate cõcordi sit deducta, & secundum regulas à Theologis præscriptas adhibita, solidissimum semper Ecclesiasticis decretis fundamentum præbet. Ipsamet sacram Literarum loca, Traditionis consensione indigent, ut iis tutò incumbat Ecclesiæ iudicium. Catholicorum nempe Respublica probè novit, eâ se teneri lege, ut nulla constitui debeant, aut possint dogmata, quorum veritas è Traditione, & è divinis Scripturarum oraculis, præstantibus veras fundamentales rationes, non effluat. Et Cùm sinè istis nullum reapse dogma Ecclesia unquam sanciverit, & sanciat, etiam si regiâ, ut ita dicam, auctoritate interdum locuta fuerit, aut loquatur, hoc est, etiam si dogmata, rationibus minimè propositis, credenda proponat: compertum tamen est, semper ipsius decretis Traditionem & Scripturas sacras causam & rationem dedisse; iisque positis, non est cur alias exigamus rationes.

Celebre est in hanc rem Stephani Romani Pontificis exemplum. Fervebat Africanam inter cetera; orbis Eccle-



*has controversia de Hæreticorum Baptismo. Cyprianus vir alioqui sanctissimus pro iterando Sacramento pugnat, ejusque novæ opinioni, ut cum Vincentio Lirinensi Cap. 19. loquar: Tanta vis ingenii adjuxit, tanta eloquentia flumina, tantus assertorum numerus, tanta verisimilitudo, tanta divina legis oracula, sed planè novo ac malo more intellecta, ut illa conspiratio nullo modo destrui posse videretur. Attamen Traditionem à se stantem contra Stephanus proferebat; atque his armis fretus, totâ demum consentiente & plaudente Ecclesiâ, causam obtinuit. Longo post intervallo fortissimus Catholicorum pugil Augustinus Stephani sententiam eâ rationum argumentorûmque vi tutatus est contra Donatistas, ut nunc vel rudibus appareat, longè Cyprianum à veritate tunc abiisse. De rationibus igitur humano ingenio excogitatis, id tandem statuendum esse videtur, eas videlicet, quantumlibet acutissimas, quantumlibet ingeniosissimas, nihil valere, & aliquo semper vitio laborare, quoties militant adversus dogmata, Traditione, divinisque Scripturis ab Ecclesiâ Dei firmata. Cùm verò pro istis faciunt, non uno eodem pede omnes esse dimetiendas. Certissimæ quædam, quædam probabiles tantum, verisimilesque erunt, quædam etiam nullius ponderis deprehenduntur. Quocirca & judicio in iis seligendis locus erit, & in quibusdam rejiciendis libertas.*

## CAPUT XIV.

*Jus Ecclesiæ in dogmatis stabiliendis à Pherèponi objectionibus liberatum. Falsum est ipsum à S. Augustino negari. Multitudo in Conciliis Catholicorum qua commoda pariat. Factionis nomen iniquè adscriptum legitimis Conciliis Catholica Ecclesiâ. Non crimen, sed laus ac necessitas ibi est judicare ex anticipatis opinionibus, hoc est, secundum Traditionem. Vindicatum nonnullorum dictæ Concilium Tridentinum.*

**Q**Uæ sint Ecclesiæ Catholicæ, ingeniorûmque jura in doctrinæ salutaris negotio, sensim cognovimus. At ii, quibus jugum excutere placuit, & unius Scripturæ sacræ vocem, quemadmodum sibi fingunt, sed uti res docet unus ingenii sui vocem auscultare constitutum est, ii, inquam,

nullum non movent lapidem , ut cœlo auctore stabilitam auctoritatem Ecclesiæ deiciant, quâ dejectâ, procul dubio ingeniorum crescit auctoritas. Phereponus igitur & ipse in hoc idem argumentum sæpè & lubentissimè invasit. Nunc opus est expendere , quid ille tandem huc afferat novi. In animadversione ad Augustini Lib. 2. Cap. 3. de Bab. adversus Donatistas , hæc habentur illius verba: *ad investigationem veri, in re præsertim obscura, undecumque ea obscuritas oriatur, multitudinem nihil facere, sed tantum peritiam eorum qui congregantur, & candorem.* Tum dicere pergit, omnes omnino, exempli causâ, Africæ Episcopos, utpote imperitissimos Hebraici Græcique sermonis, fuisse ineptiores ad iudicium ferendum de sensu loci veteris aut novi Testamenti, quàm vir unus utriusque Linguae peritus, cuiusmodi S Hieronymus fuit. Proinde Concilia, siue plenaria sint, ut Augustinus ait, siue minus plena ad spem inveniendæ veritatis, perinde nobis esse futura. Nec imperitæ multitudini pro imperio aliquid definiendi, & anathemata minitanti, nullasque rationes, aut eas pravas, suæ definitionis adferri, magis credendum, quàm pauculis, aut uni. Immo verò, inquit, uti viro docto, argumenta firma proferenti, continuò adsentiar, cùm ea intellexero, nec adversarios ejus unquam numerabo. Numerus enim nihil ad veritatem facit, & sæpè etiam quod plures congregantur ad eam definiendam, eò plures imperiti, eò plures falsi colliguntur; qui neque sciunt, quid sit verum, neque querunt, sed tantum quid sibi expediat, aut expedire videatur. Et quando quidem ex his, immo & ex Augustini auctoritate conficere sibi videtur, Concilia errori obnoxia esse, subinde infert, eorum decretis non esse sine prævio examine credendum. Addit etiam, Conventus Ecclesiasticos ad Civilium normam esse formatos. Sed jure in istis pauciora debere cedere pluribus suffragiis; in iis verò nequaquam debere. *Ubi enim cœlestis Veritas agitur, quam nemo nisi studio & attentione adhibitis novit, qua nulli mutationi obnoxia est, cujus nemo est dominus & cujus definienda majorem à Deo potestatem plures non acceperunt, quàm pauciores: non sunt numeranda suffragia, sed singulis expendenda suffragiorum rationes.* Ita ille.

sententia itaque Phereponi duo potissimum complectitur, nimirum Ecclesiam & Concilia nihil ampliùs habere juris in doctrina Christi stabilienda ac proponenda quàm privatum quemlibet hominem, cui rationes invictas adferrenti credendum sit; abrogandam verò fidem, si sine rationi-

tionibus, aut cum pravis rationibus loquatur. Deinde revera non esse Conciliis hucusque peractis obtemperandum, quippe à gente sæpe imperita, factiosa semper conflatis, & in statuenda Christi doctrina affectuum potius concilia quàm veritatem spectantibus. Qua in re ipsum cum aliis Hæreticis & Socinianis potissimum, consentire video qui Conciliis nullis, nulli Ecclesiæ visibili in rebus fidei auctoritatem esse docent; atq; adeo tacitè Dordracenam ille Synodum carpit, ubi Majores suos Calvinianorum factione oppressos Arminiani quotidie conqueruntur. Sed Phereponus contra Calviniana conciliabula his argumentis optimè utitur; contra Ecclesiæ Catholicæ Concilia nihilum proficit, & splendide fallitur.

Antequam tamen id ostendo, considerare juvat an Augustinum rectè in sententiam suam Phereponus induxerit. Scribit S. Doctor lib. 2. cap. 3. de Bapt. contra Donatistas, singulorum Episcoporum Literas à peritioribus licere reprehendi, si quid fortè in iis à veritate deviatum fuerit. Tum addit: *Ipsa Concilia, quæ per singulas Regiones vel Provincias sunt, plenariorum Conciliorum auctoritati, quæ sunt ex universo orbe Christiano, sine ullis ambagibus cedere, ipsaque plenaria sæpe priora posterioribus emendari.* Si quisquam contendat, hinc Augustinum significare velle, generalia Concilia, quanquam legitimè habita, in dogmatibus exponendis ab erroris periculo exempta non fuisse: eum ad Phereponi scholam continuò traham, ut Criticam Artem edoctus subinde hæc Augustini verba sagaciùs expendat. Nullus autem dubito, quin ipsi aliqua hic interpolationis suspicio statim suboriat. Ità scribit Augustinus: *Quis nesciat, ipsa plenaria (Concilia) sæpe priora posterioribus emendari?* Hic interrogandi modus tantæ confidentiæ plenus, rem significat vulgo notam, immo jam experientiâ claram atque testatam. Si quid innuere voluisset Augustinus, quod nunquam factum fuisset, & fieri tantummodo in posterum posset, nequaquam dixisset: *Quis nesciat ipsa Concilia emendari?* multòque minus *quis nesciat sæpe emendari?* At si rem, ut certè verba sonant, jam usu tritam significat; quandonam, quæso, plenaria Concilia, eaque legitima, in fidei Dogmatibus à posterioribus emendata fuere? Nicænum I. Constantinopolitanum I. duo nempe tantum plenaria, seu generalia Concilia ad Augustini usque ævum habita fuerant. Sardicene quoque iis addere per nos liceat, (quanquam Augustino non satis notum) & Arelatense primum ipsi notissimum.

atque celebratissimum. Verum summa inter hæc Synodos in rebus fidei atque in dogmatibus concordia, nulla emendatio, nulla priorum correctio. Proferat, si quisquam potis est, hæc dogmatum antilogias, hæc emendationes. Ne ipse quidem Augustinus iis Conciliis propior quam nos proferre potuisset. Restat igitur, ut aliqua lacinia iis Augustini verbis affuta fuerit, locumque istum depravatum habeamus, aut aliter illius mentem esse explicandam fateamur. Et sanè quantum conjecturâ assequi licet, recensentur hîc ab Augustino cum legitimis spuria quoque Concilia, qualia fuere nonnulla ab Arianis habita, & quæ à posterioribus emendata fuisse nemo negat. Deinde potiori jure dico (& dissimulatâ quacumque interpolationis suspitione, ita dicendum contendendo) Augustinum hîc agere, non de fidei doctrina, sed de judiciis ad personas & dissidia privata spectantibus, & de compluribus disciplinæ capitibus, aliisque factis, in quibus, ut infra patebit, Catholici consentiunt, emendari sæpenumerò posse ipsasmet universales atque legitimas Synodos, earumque decreta mutari. Isti conjecturæ quàm maximum robur accedit ex sequentibus Augustini verbis. Ait enim, tum ipsa *Plenaria emendari, cum aliquo experimento rerum aperitur, quod clausum erat*; quod sanè de factis non de dogmatis verificari potest. Huc autem pertinent varia Augustini ejusdem loca, quibus prodit, quanta cœcumenicis Conciliis & totius Orthodoxæ Ecclesiæ consensu veneratio debeat. Ab istis quicumque dissentiunt in doctrina fidei, ipsius judicio, imò omnium, qui ante, & post ipsum in Christi Schola excelluere, Hæretici sunt, tales nequaquam futuri, nisi ab omni erroris periculo in sancendis dogmatibus abesse Ecclesiam unâ cum aliis Patribus consentiens arbitratus & ipse fuisset. Consultantur lib. 1. cap. 18, de Bapt. & lib. 2. cap. 1. 4. & 9. & lib. 4. cap. 6. itémque lib. 3. cap. 14 contra Maximinum, ut alia omittam. Quibus consideratis, facile quisque videat, prioribus Augustini verbis malè Pherèponum instituisse, aut iis saltem insistendum non esse, ut legitima Ecclesiæ Catholicæ Concilia in rebus fidei errori ostendantur obnoxia. Si quid aliud inde probare Pherèpono est animus, quod est ad hanc particulam, concordiam non difficile inibimus.

Cæterum ad confutationem Pherèponianæ sententiæ adeò Conciliorum Generalium auctoritatem deprimentis, multa non sunt opus. Eadem ratio, eadem potentissi-

ma causa, quæ Scripturis divinis habendam fidem persuadet, eadem Ecclesiæ credendum monet. Deo credimus, quia ipse ex natura sua falli ac fallere non potest: Ecclesiæ, quia illam Deus non errandi prærogativa donavit. Fucum verò nobis facere nititur Phereponus, cum ait, *ad investigationem veri multitudinem nihil facere, sed tantum peritiam*, & uni perito potius, quam imperitis innumeris credendum, quippe numerus nihil ad veritatem facit, sed quidem rationum pondus. Optimam ille sententiam alieno accommodat loco. Utique magnum pondus rebus in Concilio definitis præbet omnium, aut multorum Patrum consensus, ac præcipue Patriarcharum, Metropolitaram, atque Episcoporum. At probata inter Catholicos Concilia non eo tantum nomine fidem merentur, & veritatem assecuta creduntur, quod multorum suffragiis res illic paratæ sint, sed quod Episcopi Literas divinas, & germanam Traditionem eâ, quâ par est, diligentiam, fide, ac sinceritate consuluerint, examinârint, & secundum eas sententiam ediderint. Sexcentis Episcopis Ariminensè Concilium, trecentis Mediolanensè, Seleuciensè, aliæque Concilia ingenti Præfulum copiâ constitere, quæ tamen inter Conciliabula fide atque obsequio indigna referuntur. Præterea non minor Auctoritas Constantinopolitano primo & secundo, in iis, quæ ad fidem spectant, aut Ephesino primo, aut Tridentino, quam Nicæno primo & secundo, & Chalcedonensi, quanquam illa præ istis constata fuerint è longè minore Episcoporum numero. Immo, ne irrita sit spes, nobis à Christo facta, se in medio duorum aut trium, qui in suo nomine congregati fuerint, semper esse futurum, eadem est vis atque auctoritas, quod ad dogmata spectat, Provincialibus Conciliis, aut exiguo Episcoporum cœtui, ac generalibus Conciliis, dummodo ad ea palam accedat reliquarum Ecclesiarum suffragium. Quæ omnia manifestè indicant, Ecclesiam Catholicam non tantum numerare vota, sed etiam rationes expendere Episcoporum. Quod si pluris æstimantur ii Conventus Ecclesiastici, qui pluribus, quam qui paucioribus Episcopis constant, & demum Generalia Concilia Provincialibus præponuntur; id ad Traditionem commodius tutiusque colligendam, ad rationes concordie ac majore studio pensandas, ad unionem animorum & doctrinæ facilius ostendendam ac retinendam conducit, non autem ut sola multitudo sit primum aut maximum veritatis assequendæ argumentum.

At Phereponus verbis nostris adhibere fidem tam facile, ut suspicor, nolit, quippe qui ait, sæpè in Ecclesiasticis tum Catholicorum, tum aliorum Christianorum Conventibus, imperitiam, & pravos affectus omnia moderari. Ab indoctis autem & factiosis hominibus quid veri sperandum est, in rebus præsertim obscuris, & suprà vulgarem scientiam positis? Et de factionibus quidem vetus est querela in Hæreticorum castris. Sed omnium maximè hisce proximis sæculis illam Protestantes ad ravim usque repetierunt, quò legitimam Concilii Tridentini auctoritatem declinarent. Illic & ipsi non tantùm rationes suæ defectionis exponere, & disputationes inire, quod liberum iis erat, sed etiam iudicem agere volebant, & jura partiri cum Ecclesiæ veræ Pastoribus, iniquum reputantes, se à Catholicis tantùm, hoc est ab adversariorum, ut ipsi aiebant, factione judicari. Verùm hanc futilem querelam, & minimè æquam petitionem jamdudum explosere Catholici, tanquam hominum tricas potius quàm veritatem quærentium, & iudices legitimos nefario consilio averfantium. Ad Ecclesiam veram spectat jus dirimendi controversias in Religione excitatas. Hanc nisi quis audiat, ex Christi præcepto futurus est nobis velut Ethnicus & Publicanus. At quemadmodum in veteri Testamento Pontifices & Sacerdotes, & non singuli de populo, synedria peragebant, litæque in lege Dei explicanda exortas componebant: ita & in novo Testamento *Episcopes Spiritus sanctus posuit regere Ecclesiam Dei*, primùmque inter eos dignitatis & auctoritatis gradum Romano Antistiti contulit. Istos Pastorum etiam nomine donarunt Apostoli, eorùmque munus, ut habetur Hierem. III. situm est in ovibus scientiâ & doctrinâ pascendis. Quid est igitur, quod contra totius antiquitatis usum, contra Apostolorum verba, mentemque Christi, nunc oves iudicium legitimorum Pastorum aut detrectent, aut usurpare sibi velint, & ex æquo cum istis facere? Et profectò si honesta Protestantium, & Phereponi petitio est: nulla unquam Hæresis damnabitur, nullus Hæreticus ad meliorem frugem sese recipiet. Nam quid experienciâ manifestius est, quàm homines perinde in erroribus ac in veritate tuenda pertinacissimos esse, & à veritate devios nullis sæpè rationibus flecti posse? Certè constat, in tot publicis privatisve disputationibus inter Catholicos & Protestantes acri animorum contentione hucusque habitis, aut utramque partem Præana cecinisse, aut neutram alteri herbam porrexisse. Quare videant perduelles Eccle-

sive filii, quo jure litem intendant legitimæ Catholicorum Præsulum auctoritati.

Et hinc etiam perspicimus, odiosum factionis nomen iniquissimè Catholicis Conciliis ac Judicibus impositum in Lutherii, Calvinii, cæterorumque Novatorum Schola. Etenim, postquam statueris, uti statuendum est, Ecclesiam veram, ejusque Episcopos, & potissimum Petri successorum, Judices in Religionis controversiis esse à Christo institutos; simulque Ecclesiam universam, & Synodos ab Ecclesia probatas falli in judicando non posse: consequens etiam est, non factiones homines, sed legitimos Judices esse appellandos Ecclesiæ Catholicæ Episcopos. Cum verò Dordracenum, & reliqua id genus Conciliabula, hisce careant fundamentis (neque enim immunitatem ab errore secundum suæ sectæ principia, ullæ Protestantium Ecclesiæ arrogare sibi possunt, nullaque Protestantium pars majorem à Christo tributam sibi quam alteri auctoritatem ostendere potest,) factionis nomen quibusque illorum Sectis & Pseudosynodis justissimè convenit. Sed pravæ artes, inquit aliquis Phereponus, & turbidi affectus, atque anteceptæ opiniones in cœtibus tam Catholicorum quam Protestantium dominantur, & contemptâ ratione, ac veritate conculcatâ, jus illic pro arbitrio dicunt. Ultro concedimus & nos, atque affirmamus, posse Catholicos Episcopos in Conciliis suum oblivisci munus, & affectibus in transversum agi. Fatemur etiam, Christi opem, & Spiritus Sancti gratiam, quam Catholici Conciliis tribuunt, ut doctrinam Christi in suis definitionibus intactam servent, esse (ut scholarum verbo utar) hypotheticam, hoc est à quibusdam conditionibus ac legibus pendere. Hæc autem leges & conditiones in eo sitæ sunt, ut summi Pontifices & Episcopi nullâ vi, nullo metu, nullis illecebris, nullâ factione studiove partium corrupti, Traditionem Ecclesiarum, quas repræsentant, fortiter tueantur, neque ab ea volentes prudentesque recedant, eamque illâ sinceritate, quâ par est, & fide & diligentia à divinis Libris, & à probatis Traditionis Ecclesiasticæ monumentis hauriant. Hujusmodi conditionibus, suæque muneriri posse deesse Episcopos & Concilia nemo negat, & re ipsa interdum defuisse ex Ariminensi, Mediolanensi, & Ephesina II. aliisque Pseudosynodis constat.

Hæc, inquam, apud nos certa sunt Sed æquè certum est, immobilitatem Ecclesiæ in Christi doctrina, non hypothe-

potheticam, sed penitus absolutam esse, id est à nullis conditionibus legibusve pendere, atque aded ipsam Ecclesiam nunquam opiniones adoptaturam veræ fidei ac traditioni contrarias, & nullis diaboli artibus, nullâ suorum Præsulum incuriâ ac pravitate ipsam à germanis Christi dogmatibus credendis & confitendis posse ullo unquam tempore deduci. Quapropter quodcumque ritè peracta sunt Concilia Oecumenica: tum nulla dubitatio futura est, quin ibi Christus, & veritas adfuerint, & Spiritus S. ità humanam infirmitatem & cæcos, si quæ erant, affectus Episcoporum ibi compresserit, ut unius veræ doctrinæ habita fuerit ratio. Non sivisset divinum Ecclesiæ caput, ut sua sponsa exitiâlibus erroribus consentiret, quam puram, immobilem, & veritatis columnam ad consummationem usque sæculi esse voluit.

Ineptè insuper crimini vertatur Conciliis, quod ex anticipatis opinionibus omnia aut pleraque illic peragantur. Nihil enim apud Christianos magis inculcatum est, quam esse antiquæ Traditioni constanter inhærendum; & qui secus fecerit, Apostolorum præcepta violare. Neque aliâ ratione Concilia initio legitima atque Orthodoxa in turpia Conciliabula evasere, quam quod aliter, quam ex anticipata Majorum sententia fidem declarârint, atque sustinuerint, contra Hæreticos nova ferentes. Quod si Concilia quædam à Catholicis recepta, suspitione improbarum artium asperguntur à nonnullis: quis sanus unius aut alterius affirmationem præponat innumeris aliis contrâ affirmantibus, & æquè rerum consciis? Talia præterea aut à tacitis aut ab apertis hostibus Catholicæ Ecclesiæ conficta & somniata, sparguntur in vulgus, cæco consilio, audaciâ ingenti. Deinde considerandum est, nullum ferè constitutum fuisse Concilium, licet Orthodoxum, in quo, ut in reliquis hominum conventibus, aliqua opinionum & affectuum diversitas non habuerit locum. In conficiendis formulis decretorum, in ritibus, & factis, aliisque rebus ad disciplinam pertinentibus, atque in ipso ordine sedendi, judicandi, & disputandi, aliter hic, aliter ille sentit & cupit. Vix autem fieri potest, ut in tanta Judicium & Theologorum copia nemo sit, qui molestè non ferat, aliena potius quam sua probari consilia. Hinc unius aut alterius querelæ, hinc tædia, hinc malefani clamores, quibus & reliqua Concilia non caruêre neque in posterum carebunt. Verum talibus in rebus dissidere posse Patres citra fidei jacturam, & intactâ sanctitate Concilii, quis non videt?

Nihil,



Nihil, inquam, officit istud arci Religionis, hoc est doctrinæ, dogmatibusque fidei. Concordes exempli causâ in ipsius fidei professione fuisse Tridentinos Patres, & contra ipsam nihil peccatum, & ab ipsa prædicanda atque tuenda neminem absteritum, & neminem ad ipsam corrumpendam intellectum fuisse, Catholici quilibet affirmant, credunt, & certum habent. Si secus contigisset, si malis artibus actum fuisset: revelandi onus incubuisset quibuscumque Tridentini Concilii Patribus ac Theologis. Nam illud in primis apud Catholicos liquet, & Episcopis potissimum exploratum est, sine teterrimo crimine violari non posse doctrinam Christi; & si quis prudens Christianos populos in errorem vel prædicando, vel consentiendo, vel connivendo, induxerit, hunc sine publica confessione sui criminis decedentem vix aut nequidquam à Deo veniam sperare posse. Quis autem sibi persuadeat, tot Episcopos, ac Theologos in Tridentina Synodo conspirasse adversus doctrinam Christi, & neminem, quod sui muneris erat, ausum resistere corruptoribus; & nullum inter ipsos Episcopos tantæ fraudi, tantæque sceleris personam tandem detraxisse, & palam confessum, se minis aut artibus iniquis adactum ad veritatem Religionis insigni prodicione labefactandam? De tot honestis, & probis, & doctis hominibus ex universa Ecclesia in unum collectis, id ne excogitari quidem potest. Neque Deus, Ecclesiæ suæ stabilis æternum futuræ custos, tantum flagitium latere permisisset, neque unquam permisit, ut ex Historiis Ecclesiasticis patet, utpote qui populo verè Christiano in necessariis non deest. Quare minimè dubitandum, quin Tridentinis Patribus necessaria adfuerit libertas sentiendi & judicandi, quæcumque Catholicæ Fidei magis consona tunc videbantur.

Sin autem consultò non errarunt legitima atque probata Concilia, eò minus incautè falli potuere. Episcopi enim, & Ecclesiæ veræ addicti, & Christi nomine in unum congregati, dummodo debitam fidelitatem adhibeant atque industriam in haurienda à Scripturis aliisque Christianæ Traditionis monumentis, germanâ Ecclesiæ doctrinâ, ab omni erroris periculo, divino Spiritu opem ferente absunt, ut jam vidimus, atque ut constans dogma est in Ecclesia Dei. Quandoquidem tamen industria conjuncta postulat peritiam & scientiam; hanc autem peritiam Phereponus ait defuisse ac deesse quibusdam Conciliis, & ipsismet præstantissimis Ecclesiæ Patribus, & nominatim Augustino:

gustino : hanc utilissimam quæstionem infra discutiemus. Palam autem fiet , quænam scientia ac peritia in Christianis Ecclesiæ Judicibus exigatur & quam præter æquum & bonum agat Phereponus , qui ipsam Patribus antiquis , & Augustino , & Conciliis abjudicat. Nunc incepto itineri insistendum est rursus ; & quoniam de dogmatis fidei satis ad institutum nostrum hætenus egimus , ad disciplinam Ecclesiasticam tandem est transcendendum.

## CAPUT XV.

*Disciplina Ecclesiastica quid complectatur. Quæ differat à dogmate. Quæ in disciplina mutare aut non mutare, sequi, aut non sequi liceat. Consonare in dogmatibus omnino necessarium. Varietas in Disciplina rebus modò laudanda, modò toleranda. Constantia Catholicorum in Hæresi Iconoclastica damnanda commendatur , à Calviniano quodam injustè subsannata. Quid Ecclesia egerit, eique sit agendum in disfidis de Disciplina. Contra Phereponum ostenditur auctoritas Ecclesiæ in præcipiendis nonnullis ad Disciplinam spectantibus sub pœna peccati.*

**D**iximus Ecclesiasticam Disciplinam varia complecti. Ad illam spectat, quidquid aut à Christo, aut ab Apostolis, aut ab universa Ecclesia, sive ab Ecclesiis privatis, institutum fuit, ad externum Dei , servorumque ejus cultum, ad ritus Sacramentorum, aliorumque Mysteriorum , ad Ministros Ecclesiæ, & ad quædam pietatis, aliarumque virtutum opera externa Et propterea Disciplina nomine quàm latissimè sumpto designamus scientiam illorum rituum earumque legum, è quibus constat cum regimen membrorum Ecclesiæ, tum exercitium externum Religionis atque virtutum. Differt autem disciplina à dogmate, quòd istud præscribat quæcumque credenda, aut non credenda sunt Fide supernaturali, & quidquid homini Christiano facere nunquam non immutabiliter præcipitur, vel prohibetur ; disciplina verò tradit ritus & leges adhibendas, ut Ecclesia militans decenti ordine regatur, & ut palam, operibusque externis ritè peragatur , quod per dogma internus homo jam didicit.

Et quidem plurimi interest, bene perspectum habere, quid secernat disciplinam à dogmatibus; quia maximè necessarium est cognoscere, quid mutabile, quidque immutabile sit in Ecclesia Dei. Nam eorum, quæ ad disciplinam referuntur, multa mutari ex sui natura possunt; quæ verò ad dogma, eadem semper esse oportet, ac semel fuere. Ad hæc interdum dogma ac disciplina simul conjuncta incedunt. Cùm de aliquo novæ legis Sacramento agimus, puta de Baptismo, dicimusque ipsum conferre gratiam, delere peccatum originis, ejusque vim & effectum à Ministrantis merito nequaquam pendere, & alia id genus: dogmata hæc esse nemo non intelligit. Cùm verò dicimus ad Baptismum adhiberi asperisionem, aut mersionem trinam, salem, & unum duosve sponsores è sacro fonte initiatum suscipientes: tum aliqua significari cognoscimus ad disciplinam pertinentia. Quare una eademque res & ad dogma, & ad disciplinam sub diversa facie ac ratione referenda est. Sunt autem quædam à Christo, ejusque Apostolis præscripta, quæ in disciplinæ censum veniunt; sed quandoquidem ista immutabilia sunt inter Christianos, in dogmatum quoque jura per Analogiam transferunt. quod in Sacramentis præsertim animadvertendum occurrit. Alia quoque sunt, quæ ab Apostolorum successoribus instituta fuere, & illius naturæ fere omnia sunt, ut aliter institui possent, & recta nihilominus & æque laudabilia forent, si alia ratione ac forma indicta fuissent. Alios, inquam, ritus, alia tempora jejuniorum, alias precum formulas, criminum poenas, atque id genus quam plurima, eorum loco, quæ jam constituta habemus, poterat Ecclesia constituere.

En igitur quid inter disciplinam, & dogmata intersit. Dogmata ab ipso Deo omnia & singula procedunt. Eadem omnia Deus jam Ecclesiæ revelavit, isti que Libro jam pridè concluso nihil novi de suo ingenio addere Ecclesia potest, neque novam dogmatis alicujus inauditi revelationem à Deo sperare. Et porro nihil nobis deest ad plenam salutaris veritatis cognitionem. Quo argumento profligatæ olim fuere novæ Montani, Manetis, Muhammedi, aliorumque revelationes. Aliqua autem disciplinæ præcepta nunquam inmutanda Christus ipse reliquit. Aliqua etiam Ecclesiæ suæ jus dedit adjiciendi, eaque rursus mutandi pro locorum, pro temporum, pro hominum indole, ac necessitate, quemadmodum prudentiæ, pietatis, & optimi regiminis ratio identidem postulare. Sancti etiam  
Spi-

Spiritus suffragium hisce Ecclesiæ decretis minimè deesse, cum quidpiam statuitur aut immutatur, quod in mysteriorum decorem, populique Christiani utilitatem cedere possit, è Hierosolymitano Apostolorum Concilio didicimus.

Quid itaque ingeniis nostris agendum est in ista parte Ecclesiasticæ doctrinæ? Primò, honestum atque utile fuerit investigare, undè veniant Ritus & Leges, quæ disciplinam respiciunt. Si sacrarum Literarum, aut Traditionis, aut Ecclesiæ, aut Præsulum legitimorum auctoritate nequaquam innitantur, ea repudiare licet. Secundò, privatis hominibus nefas est, ea abdicare, aut immutare, aut vituperare, quæ communi Episcoporum consensu stabilia fuere. Pessum enim iret ordo in Christiana Republica à Christo, ab Apostolis, à Majoribus sanctissimè constitutus, & usurparentur ab ovibus non sinè gravi scelere jura Pastorum. Tertio, tunc etiam disciplinæ præceptis & ritibus legitimè introductis obedientiam negare licebit, cum aut consuetudo Pastoribus tacitè probata, aut novæ leges eisdem abrogarint. Quarto, multæ sunt disciplinæ leges, multique ritus, quos illa ratio, & antiquitas, & origo ab Apostolis usque arcessita commendat, is Patrum, totiusque Ecclesiæ consensus tuetur, ut vix ulla suboriri possit legitima causa, cur immutandi sint aut antiquandi. Et quænam, rogo, honesta unquam causa excogitari potest, propter quam tot vetustissimos ritus ad Eucharistiam, aliæque mysteria conficienda institutos, aut Hierarchiæ Ecclesiasticæ partem à majoribus nostris sapientissimè definitam abolere conducatur, aut quælibet Monasticæ vitæ genera atque instituta funditus exterminare? Fecerunt id quidem posteriorum temporum Novatores, sed post conculcata dogmata; post attritam, quantum sibi placuit, Ecclesiæ veræ faciem atque auctoritatem. Cæterum, dum stet Ecclesia Catholica (æternum autem stabit) in his aliisque disciplinæ capitibus poterunt quidem esse abusus, quos evellere juvabit, non erit causa, cur res ipsæ penitus & ubique sint evertendæ. Quod si causa cessabit, quæ Ecclesiæ antiquæ, ipsisque etiam Apostolis occasionem præbuit, ut ritum quempiam instituerent, & mores alios interdicerent: recentiori Ecclesiæ licebit diversa statuere, & priora abrogare. Certè sibi Religioni Ecclesia minimè duxit, sanguinis & suffocati usum concedere, quem tamen Apostoli prohibuerant locis & temporibus servientes; neque enim nos recentiorum Græcorum rigidam adhuc

adhuc in hujusmodi ritu praxim moramur. Alia omitto exempla. Nimirum ad ipsam Ecclesiam jus spectat agnoscendi, ac decernendi, utrum ad tempus, an perpetua sit Apostolica institutio.

Cæterum alia causa est, cur omnium maximè ingeniis nostris obversari semper debeat ea differentia, quæ inter fidei dogmata, & disciplinæ documenta intercedit. Etenim in disciplina aliter una Ecclesia, aliter altera sentire, atque agere interdum poterit, & contrariis etiam legibus regi neque tamen culpanda ista varietas, immo laudanda erit, & certè non excindendus propterea nexus Christianæ pacis atque unionis. Contrà in dogmate necesse est, singulas Ecclesias, omnesque Christianos idem sentire. Nemini hîc licet, pacis & caritatis intuitu cum eo communionem sacrorum, unionemque habere, qui ab Ecclesiæ Catholicæ sententia discedat, usque adeò ut supremos Ecclesiæ Magistratus infirmi possint ac debeant propter eam causam damnare, atque deserere. *Non possunt enim*, inquit S. Ambrosius, *esse inter eos jura pacis, inter quos est bellum fidei* Et sanè unica, non multiplex, esse debet Religio vera. *Unus dominus*, inquit Apostolus ad Ephes. IV. 5. *una fides, unum Baptisma, unus Deus & Pater omnium*. Deformis nempe ac ridenda foret Religionis Christianæ facies, ubi sentire in substantialibus, quæ vellemus, & revelationem divinam oppositis pugnantibusque opinionibus exponere singulis liceret. Uni dumtaxat sententiæ favere veritas potest. Necesse est oppositæ sint falsæ. At si coeant simul, pacemque observent tum Catholicorum, tum innumerabilium Hæreticorum Scholæ: quis non videat, jam de veritate actum esse quæ in tanta errorum colluvie ipsam veritatem simulantium non solum facile vitietur, sed nunquam certò deprehendatur? Et quare Apostolus ad Tit. 3. 10. *Hæreticum hominem post unam & secundam correptionem devotandum esse jubet*? Cur II. ad Tim. 2. 17. fugiendos sermones ait *Hymenæi & Phileti, qui à veritate exciderunt, dicentes resurrectionem esse jam factam, & subverterunt quorundam fidem*? Cur in I. ad Cor. 1. tam enixè obsecrat, *per nomen Domini nostri Jesu Christi, ut id ipsum dicamus omnes, & non sint in nobis schismata*? Hinc Apostoli ipsi, eorumque successores Episcopi, nullam unquam animadverterunt emergentem opinionem novam, divinis Scripturis, & Traditioni Christi apertè repugnantem, cui sese acriter non opposuerint, quam non proscripserint, diris non devoverint, ejus auctore damnato, & ab Ecclesia abscisso, nisi ab errore relipisceret. Alia

penè innumera incommoda ex hujusmodi Syncretismo consequerentur; eaque adeo mentem perculere semper vel ipsorum Protestantium, ut quanquam nihil vehementius ab iis optaretur, quàm componere sua dissidia, & aliquod inire inter se foedus, quo fortius Ecclesiæ veræ obfisterent: Lutheri tamen sequaces induci nunquam potuerint, ut à Calvinianis non semel oblatam pacem & concordiam discordibus adhuc sententiis, amplecterentur.

Contrà diversitas, & varietas in disciplina interdum laudanda, interdum toleranda est. In Mysteriis peragendis, in externis operibus pietatis, quòd uni Ecclesiæ, uni Regioni, ac Provinciæ, sint quidam ritus, alteri verò alii, dummodo sanctitas, & gravitas, & prudentia in utriusque partibus ritibus legatur, tantum abest ut deformitatem in Religione pariat, ut potius ejus pulchritudinem spectabiliorum efficiat. Neque diversis modis se coli à gente sua indignatur Deus, quando interna caritas ardens, & pura fides, & dogmatum concordia externi cultus honestati respondeat, atque is cultus Revelationi ac Traditioni minimè repugnet. Hinc olim Orientis Ecclesiæ ab Occidentalibus, & Occidentales ipsæ inter se differebant, & etiamnum differunt in ritibus, quibus conficitur incruentum sacrificium, in ministrandis reliquis sacramentis, in indicendis aut jejunii temporibus, aut pœnitentiæ gradibus, aut diebus festis, atque in aliis sacrorum cæremoniis. Elegantissima est in hanc rem Augustini Epistola 86. num. 36. contra Urbem, cum quemdam, quem malè habebat, quòd Jejunium Sabati Romæ observatum aliæ pleræque Ecclesiæ minimè amplecterentur. Deinde quanquam aliqua disciplinæ præcepta eximiâ quâpiam ratione vel auctoritate olim niterentur, aut in Provincialibus, immo in ipsis generalibus Conciliis firmata fuissent, omniumque Ecclesiarum, aut saltem plerarumque consensu recepta; attamen sæpè caritatis & unitatis amore, tolerata est eorū Canonū inobservantia. Siquidē una è præcipuis Catholicæ Ecclesiæ legibus ea est, ut quàm maxime fieri potest, retineatur animorum pax, & Ecclesiarum concordia; licitumque esse, eadem procurare, aut retinere, quandiu ab ipsa quærenda nos non avertant, aut ad ipsam infringendam nos non impellant virulenti errores, hujus doctrinæ oppositi. Et sanè omnis ferè Disciplinæ Ecclesiasticæ supellex, si demas revelata, ac præscripta à Christo, è legibus & rebus constat ex sui natura haud quaquā necessariis. Præterea humanæ infirmitati sæpe indulgendū: non rarò etiam suboriuntur rationes, quæ diver-

diversam disciplinam poscunt, aut severitatem legum saltem filere, ut ita dicam, jubent; & quando nulla alia succurrat, certè necessitas avertendi, aut sanandi schismatis, vitandique gravis alius in Ecclesia incommodi, opportuna & potentissima causa semper visa est disciplinæ mitigandæ, aut etiam solvendæ. Qua in re etsi crimine plerumque non careant, qui conculcatis legibus justissima de causa constitutis, eò Ecclesiam adigunt, ut de suo jure cedat; ipsa tamen Ecclesia cedens, non solum omni culpâ semper careat, sed prudentiæ quoque laude persèpè abundat.

Altero Ecclesiæ sæculo Asiæ minoris Episcopi suam de tempore celebrandi Paschatis disciplinam, ut à Joanne Apostolo acceptam, obfirmatis animis propugnabant. In diversa sententia erant reliqui Episcopi, & Romanus potissimum, suamque & isti tuebantur disciplinam, Traditione ab Apostolorum Principibus deducta. Eam ob causam minime scindendam pacem S. Irenæus, aliæque Ecclesiæ censuerunt, non repugnantibus ipsis demum summis Pontificibus, quanquam Victor severius aliquando agendum existimasset. Duos in una Sede Episcopos contra disciplinæ leges interdum etiam Ecclesia permittit; & celebris est Catholicorum Præsulum caritas in Africa, qui ut Donatistarum pertinaciam evincerent, ejusmodi conditionem obtrudere, ratamque habuere. Idem pacis amor, aliæque rationes ad prudentiæ normam exactæ, in causa fuere, cur Prælatum Constantinopolitani Episcopi post Romanum Ecclesia toleraret, & novi Episcopatus instituerentur, & ab una Ecclesia Episcopi ad alteram transferrentur, etiamsi disciplina secus exigeret. Ex iisdem fontibus ea ratio fuit, quare nonnullis Ecclesiis liberum fuerit, atque etiamnum sit, nolle interdum amplecti novos quosdam Canones ad disciplinam pertinentes, licet in ipsis Conciliis Generalibus promulgatos. Dum in dogmate consensus habeatur, concordia in reliquis rebus expetenda quidem, sed interdum non extorquenda. Idem videre est in nonnullis disciplinæ decretis à Florentino Consilio, & postremo Lateranensi confectis, quibus Galli obsequium adhuc negant. Imò ipsamet Tridentina Synodus non ita omnibus probavit aliquot suas de disciplina sanctiones, ut Ecclesiæ Gallica & Belgica ad eas recipiendas hucusque perductæ fuerint. Interim quæ in moribus, ritibus, legibusque disciplinæ varietas, atque etiam discordia, inter hæc Ecclesias versatur, concordiam non tollit aut minuit in præcipuo fidei negotio. Nulla, inquam, est Ecclesia, cui cum Romano Ponti-

fice & Ecclesiâ Catholicâ sit Sacramentorum communio , cui quoque non fit in dogmate consensus , atque hoc est , quod in citata Epistola 36. olim 86. ad Casulanum commendabat Augustinus. *Sit una fides*, aiebat ille, *universa, quæ ubique dilatatur, Ecclesia, tanquam intus in membris, etiamsi ipsa fidei unitas quibusdam diversis observationibus celebretur, quibus nullo modo, quod in fide verum est impeditur.*

Ex his autem, quæ hætenus disseruimus, habemus quid respondeamus declamatori cuidam Calviniano, irridenti Catholicorum ingenium , quod tot ærumnas olim ac mortes sub Imperatoribus Iconoclastis perpeti maluerint, quàm abjurare sacrarum Imaginum cultum. Nempe is animadverterat, non diffiteri Catholicos, quin Imagines ex iis sint rebus , quæ in Ecclesia Dei cùm indifferentes nuncupari, tum etiam removeri, salvâ Religione, possunt. Itaque rationem, aut saltem prudentiam desideravit ille in tanto Catholicorum numero, quibus pro Imaginum tutela perire contigit, nam & unionis amor, & obsequium Principibus debitum, à tot turbis concitandis, à tot tormentis devorandis abstinendum esse clamabant in re. quam repudiare nullum crimen Catholicis futurum fuisset, & omnem iræ aut etiam crudelitatis causam ab Imperatoribus potuisset auferre. Sed qui ista objicit, cum dogmate disciplinam confundit. Licitum esse venerari Imagines sacras, simulque earum cultum, si ad normam Christianæ Doctrinæ exerceatur, ab Idolorum adoratione distare nimis; Dogma est, Ratione & Traditione confirmatum. Habere autem, aut non habere easdem Imagines, easque collocare in Templis, à Disciplina pendet. At Iconomachi nō id solum contendebant, ut à Templis deturbarentur Imagines, earumque usus omnino aboleretur: quod tolerare profectò propter bonum Pacis disciplina poterat; sed in ipsum dogma Iconoclastica rabies ferebatur. Imaginum usum, omnemque earum cultum superstitiosum, impium, Deoque invisum ducebant: quo ex errore subinde manavit illud in ipsas Imagines atque earum cultores furiosissimum bellum. Non igitur mentis inopes ea tempestate fuisse Catholici, neque sine consilio & ratione profusus est sanguis. Nimirum pro dogmate vita dabatur, ipsaque fortiter danda fuit, quando nulla alia suppetebat ratio, quâ se incolumes, & doctrinam Christianæ Fidei sartam rectam servarent. Eadem causa reliquos Martyres fecit, eadem rursus factura est, quoties in discrimen adducitur dogmatum per-



persuasio, quorum uni renuntiâsse, totam fidem prodidisse est. Suos etiam Martyres habere interdum disciplinæ custodia potest, iisque Christi elogium conveniat: *Beati qui persecutionem patiuntur propter justitiam*, sed hos iusta potius, quàm necessaria causa, illos iusta æquè & necessaria ad perferendam mortem impellat.

Diximus, Ecclesiam tolerare potuisse, ut Imaginum usus proscriberetur, si de sola Disciplina controversia fuisset. Idque accuratè animadvertendum est, quo possimus, cum necessitas postulabit, & prudentia suadebit, animosius consulere dissidiis & scissuris Christianæ plebis. Tantopere enim amanda est pax & unitas inter membra Ecclesiæ, ut pro ea servanda, siue restituenda, fas sit ipsius disciplinæ leges interdum abrumpere, & rituum quorundam abrogationem concedere. Quamobrem si nostrorum temporum Novatores in dogmata Catholicæ Ecclesiæ consentire tandem velint, & ad matrem redire, extra cuius finem spes omnis æternæ salutis sublata est, nihil fortasse obstabit, quominus concordia statuatur. Multam illi spondere sibi debent indulgentiam ab Ecclesia Catholica in iis, quæ ad disciplinam pertinent. Dummodo, inquam, in doctrina consentiatur, & retineantur instituta quædam disciplinæ à Christo ipso manantia: in reliquis, Ecclesia veniam faciente, prout suæ prudentiæ & caritati opportunum & necessarium videbitur, tolerabitur disciplinæ diversitas. *Regula quidem fidei*, inquit Tertullianus in Lib. de velandis Virginibus, *una omnino est; sola immobilis, & irreformabilis, &c. Hâc lege fidei manente, cætera jam disciplina, & conversationis admittunt novitatem correctionis, operante scilicet, & proficiente usque in finem gratiæ Dei.* Quam in rem vide & Epistolam I. Leonis IX. Romani Pontificis. Et certè simul ac in Catholicorum sententiam concessere Græci recentiores, redintegrata fuit in Florentino Concilio pristina Occidentalis & Orientalis Ecclesiæ unio, neque Græcis Sacerdotibus (ut alia omittam) negata est retinendæ uxoris facultas, neque interdicta his populis communio Eucharistiæ sub utraque specie. Quid etiam non egit Basileensis Synodus, ut Bohemici schismatis pertinaciam vinceret? Bohemi enixè poscebant divini Calicis usum. Luce digna sunt, & lucem per me aliquando videbunt, quæ Æneas Silvius in Oratione publicè habita disseruit, hoc argumentum pertrahens. Et voti quidem compotes facti fuere Bohemi, quam

quam ne sic quidem eorum vulneribus inducta cicatrix. Similia quoque præstiturum fuisse Tridentinum Concilium, jure conjicimus, sed eâ conditione adhibitâ, quam Basileense proposuerat, ut nempe Sacerdotes itâ communicantibus inculcarent: *Debere eos firmiter credere, quòd non sub specie panis Caro tantùm, nec sub specie vini Sanguis tantùm, sed sub qualibet specie est integer Christus totus.* Quæ cautio adhibenda in alijs ejusmodi casibus.

Mirum etiam in modum nôsse conducit, quid inter dogma disciplinâque intersit, ne fratres gravioribus interdum notis aut pœnis oneremus, quàm æquitas & disciplina ipsa ferat. Hæresis culpa in eos ritè cadit, qui pertinaciter negant affirmantve dogma aliquod contra sibi notam Ecclesiæ Catholicæ mentem. Disciplina verò leges violare, & sacros piósque ritus ab Ecclesiâ receptos contemnere, grave sæpè flagitium, nunquam tamen Hæreseos crimen propriè appelletur. Certè non video, quî Hæreticus esse, dicere possit, nisi qui divinæ revelationi per Scripturas aut legitimam Traditionem propositæ adversetur intellectu animòque refractario. Verum pleraque inventa, leges, & ritus Disciplinae Ecclesiasticæ nequaquam proficiscuntur à revelatione divina. Fieri etiam potest, ut ipsamet disciplina pars, quæ à Christo non solum descendit, sed & ab ipso præcipitur, & potissimum consistit in Sacramentorum institutione & usu, violetur, intacta nihilo secius dogmatum fide, uti accadat, si quis ipsis Sacramentis abutatur, quæ tamen à Christo verè instituta & sancta credat. Quemadmodum enim à Christiana Fide non excidit alterum occidens, aut libidini, aut intemperantiæ serviens, cum & ipse intelligat, sibi non licere, quæ tamen perpetrare voluit: ita & peccare quispiam potest, in ipsamet instituta Christi, & nihilominus retinere Catholici dogmatis fidem. Quod igitur è violata Ecclesiastica Disciplina consequi jure potest, illud est, ut interdum reus suspicionem quoque moveat dogmatis violati, atque hæreticæ opinionis; eique suspicioni tale quandoque pondus erit, ut ægrè purgari possit. Nam qui sacras Imagines non insanus neque ebrius, concumeliis & flagris afficiat; Eucharistiæ Sacramento in publicum prodeunti adorationis signa neget; nunquam Sacrificio intersit, cum possit, aut nunquam ad ipsum Sacramentum communicaturus accedat, atque alia hujusmodi faciat: in eam facile opinionem nos rapit, ut videatur alicui ex istis dogmatis, & auctoritati Ecclesiæ

non

non adjungere fidem. Propterea ab Ordinariis, aut in locis, ubi viget Inquisitionis tribunal, à publicis fidei Quæstitoribus dies non injuriâ datur ejusmodi hominibus, interrogandi causâ, quid de fide sentiant, & ut Ecclesiæ, quæ merito magis virulentum vulnus suspicata est, satifiat.

Posceret locus, ut insuper explicarem, quomodo & quales disciplinæ leges Christianum populum ligent. Aliæ enim, sed perquam paucæ, quibuscumque fidelibus legitime non impeditis, aliæ tantummodo amplexis ex arbitratu suo quoddam peculiare vitæ genus, aut opus aliquod suscepturis, sub pœna peccati præcipiuntur. Aliæ verò solum commendantur aut singulis, aut certis quibusdam Christianis, neque imperantur, quippe quæ è consilio Majorum, non ex præcepto, descendunt. Per quasdam à vitiis & peccatis arcemur; per alias ad virtutem, & ad perfectius vitæ institutum, & pietatis exercitationem sollicitamur. Sunt & quæ à singulis Episcopis constitui possunt, aut proscribi, sive immutari. Rursus aliæ, quarum sanctio ad majores Ecclesias, aut ad Generalia Concilia, aut ad Romanam Sedem duntaxat pertinent. Ad hæc differendum foret, quæ, & quando populorum & Episcoporum consensus exigatur, ut vim habeat, gentemque obliget lex aliqua ad disciplinam spectans, aut ab uno Episcopo, aut à Concilio quoquam, aut à Romano Pontifice promulgata; & quando liceat, aut non liceat istum negare consensum. Ea enim, ut vidimus, semper Apostolicæ Sedi, Conciliisve ipsis Generalibus mens est, ut Schismata ac turbæ, quantum fieri potest, declinentur. Et nova disciplinæ decreta obligare nequaquam solent Ecclesias, non sine ratione ab iis recipiendis alienas, aut Provinciis aliis legibus & moribus jam pridem addictas, & novarum legum impatientes. Neque Regum, Principumque jura, Regnorumque consuetudines, modò Legi divinæ, & Religioni minimè contrarias, abrogare velle Episcopi censendi sunt. Atque hîc præsertim habenda ratio illius partis disciplinæ, quæ homines removel à vitiis, scandala avertit, aliæque opera in animorum ac Religionis perniciem tendentia vetat. Hujusmodi statuta vel à nolentibus Ecclesiis & populis obsequium exigunt, quando ab idoneis Auctoribus, Principibusque Ecclesiæ indicuntur; siquidem nulla plerumque legitima causa adferri potest, quare ab omnibus amplectenda non sint. Illa autem pars disciplinæ, quæ versatur in politicis legibus, &

prospicit rerum temporalium regimini ac distributioni , sæpè ut valeat, consensu indiget Principum, populorum, aliorumque Episcoporum. Sed si complecti singula atque enucleare instituiam, longiùs quàm velim excurrat oratio. Quare iuvabit ultimo loco ea dumtaxat referre, quæ Phereponus non tam contra Augustinum, quàm contra Catholicam Ecclesiam in huiusmodi argumento habet, communia tamen & reliquis nostrorum temporum Novatoribus.

Dixerat August. in Ep. 36. olim 86. ad Casulanũ de Jejunio Sabbati agens: *In his rebus, de quibus nihil certi statuit Scriptura divina mos populi Dei, vel instituta Maiorum pro lege tenenda sunt.* Et hæc sanè Patrum & Catholicorum omnium sententia fuit à vetustissimis temporibus ad nostram usque ætatem. Sed Phereponus ita commentatur: *Rectè, si modò Leges illæ non imponantur, quasi necessariae ad salutem; quod si fiat, merito oppugnantur, quia solus est Christus, ius claudendi cœli, ita ut nemo aperiat; & aperiendi, ita ut nemo claudat. Cujus legibus si alia quasi necessaria addantur, tum novum Evangelium conflat, quod ab omnibus discipulis suis rejici & Christus & Apostoli voluerunt.* Laudantur hinc à Pherepono, ut statim patet, verba Apocal. cap. III. 7. *Hæc dicit sanctus & verus, qui habet clavem David, qui aperit, & nemo claudit; claudit, & nemo aperit.* Alludere etiam potest ad Isaia XXII. & ad Job XII. Quæ quidem Scripturæ verba nihil obstare auctoritati Catholicæ Ecclesiæ, intellexisset ipse Phereponus, si ea rectè exposuisset, & cum aliis contulisset Scripturæ Sacræ documentis. Certè apud nos nihil magis ratum est, atque testatum, quàm solius Christi merito cœlum electis pate-re, iisque claudi, qui meritorum Christi suâ culpâ nequam participes sunt. *Non enim, ut ait Petrus Act. IV. 12, est in aliquo alio salus; neo enim aliud nomen est sub cœlo datum hominibus, in quo oporteat nos salvos fieri.* Et ipsi Christo data est omnis potestas in cœlo & in terra, ita ut nemo prædestinetur in adoptionem filiorum Dei, nisi per Jesum Christum (quemadmodum testatur idem Apostolus,) & nemo nisi per ejus gratiam salvus fiat. Quod si de potestate legum inter homines ferendarum agitur, quibus qui obtemperet, æterno regno sit dignus; qui secus, inde excludatur: ne unus quidem inficiatur, quin absoluta quoque potestas constituendi, quidquid sibi libuerit, & summa in Ecclesiam cœlorumque regnum auctoritas mediatori Dei & hominum Christo collata fuerit, Capiti æterno Ecclesiæ, & Legislatori supremo.

Verum non ita in se Christus concludit auctoritatem huiusmodi atque potestatem, ut nulli alii communicaverit, ut integram solus (quæ sententia Phereponi est) sibi met ipsi reservaret. Petro, & Ecclesiæ, & Apostolis cæteris, eorumque successoribus Episcopis, suæ potestatis atque auctoritatis partem Christus commisit: quod, qui ignorat, aut Christianus non est, aut nunquam legit divinæ Scripturæ Libros: *Quodcumque ligaveris super terram, erit ligatum & in cælis; & quodcumque solveris super terram, erit solutum & in cælis*: ita Christus ad Petrum agebat, Matth. XVI. 19. Et ne quis unquam eâ ratione leges & imperium Petri effugeret, quod soli Christo sint cœli claves, ipse divinus Præceptor prius dixerat: *Et tibi dabo claves Regni cœlorum*. Ampla quoque auctoritas Apostolis reliquis confertur, Matth. XVIII. 18. ut alia loca prætermittam. Quibus ex rebus videat Phereponus, quam idoneo argumento contra Leges Catholicæ Ecclesiæ ab Augustino laudatas ipse pugnet. Et sanè concideret tota disciplinæ ratio, totumque regimen Ecclesiasticum, si quibuscumque Ecclesiæ præceptis negare obedientiam liceret, iisque tantummodo parendum foret, quæ à Christi unius ore descendisse constaret. Deinde si non est in Ecclesiæ. sacrorumque Pastorum manu claudere cœlum. Cur Apostolus ad Hebr. XIII. tantopere commendat, ut obediamus Præpositis nostris, & subjaceamus illis: *Ipsi enim pervigilant tanquam pro animalibus nostris rationem reddituri*? Ergo in divinam indignationem incurrant, necesse est, qui Ecclesiasticis Legibus obedire detrectant, sibi que cœli fores occludunt, quippe Christo ipsi adversantes, dum Ministris ab ipso constitutis, & imperandi potestate ab ipso donatis nequaquam obtemperant,

Neque verò injustitiam in legibus à tota Ecclesia probatis excogitare possumus, cum nihil legi divinæ ac naturali repugnans facere ab Episcopis jubeamur. Numquid enim Ecclesia & Episcopi, Phariseorum more, *alligant onera gravia & importabilia, & imponunt in humeros hominum, digito autem suo nolunt ea movere*? Et hoc quidem falsissimum est, Ecclesiastica quippe præcepta, omnibus imposita (qualia ferè sunt, quæ respiciunt jejuniorum, festorum, & confitendi peccata, & Eucharistiæ suscipiendæ tempus) pauca numero sunt, & pondere levia; & cum justæ subsunt causæ, ad opus non obligant. Cætera verò præcepta quibusdam tantummodo operibus, & vitæ institutis illigata sunt, à quibus cum abstinere nobis liceat, ab eorum etiam

oneribus cavere liberum cuicumque est. Igitur hæc pauca etiam & levia præcepta omnibus imposita, eâ solùm ratione suspicari possumus injusta, quia naturalem hominum libertatem in agendo imminuunt, & jure æternæ gloriæ inobedientes privant. Verùm ineptè hoc dicatur, simul ac pateat, hac libertate naturali spoliari nos justissimè potuisse ac posse à Christo, & ab iis, qui auctoritatem potestatemque sibi à Christo creditam exercent: si tamen spoliari libertate ille dici potest, qui libertate ipsâ jubetur uti ad fugiendam gehennam, & ad comparandam sibi per opera salutaria æternam in cœlis vitam. Non enim ita liberi sumus, ut definamus esse servi justitiæ, (quemadmodum ait Apostolus ad Rom. vi.) & subjecti Legibus, ac Pastoribus nostris. Neque porro jus ullum ad gloriam esse potest homini, qui obsequi neget Christi Ministris, non injusta, non gravia, ejusdem nomine ac auctoritate præcipientibus, prout poscit necessitas ac utilitas gregis, cùm ut mala opera avertantur, tum ut bona peragantur.

Possunt, fateor, iniquæ leges & ab ipsis prodire Pastoribus. Suos quippe habet limites eorum auctoritas, neque importabilia onera sunt imponenda, neque sinè utilitate, aut necessitate gregis, aut sinè Traditionis & Majorum exemplo, aut interdum sinè aliarum Ecclesiarum consensu, novæ Disciplinæ leges omnibus indicendæ sunt, neque gravis peccati pœna non observantibus injungenda. At dubitare de justitia Legum Ecclesiasticarum tum certè nullo pacto sinimur, cùm per ipsas aliquid facere aut non facere peculiariter jubemur, quod generalibus legibus à Deo constitutis priùs præscriptum fuit. In suis nempe edictis nihil aliud Ecclesia tunc præstat, quàm certum constituere tempus, quo facienda sint, quæ generali edicto aut Deus, aut recta ratio antea facienda constituerant. Jejunia, pœnitentiam, dies festos, aliâque ejusmodi in utroque Testamento, Eucharistiæ perceptionem, aliâque in novo commendari & præcipi legimus. Hinc Apostoli, & Ecclesia tempus decrevere, quo peragenda hæc forent, institutis sacris Deo diebus, indictâ Quadragesimâ, aliisque jejuniorum temporibus, & compulsis per edicta sua signibus & oblitis sui hominibus ad Eucharistiam percipiendam, & ad purgandos animos per confessionem criminum. Hunc autem usum Ecclesiasticæ auctoritatis, atque hæc omnia per ipsam Ecclesiam constituta consensus universæ Antiquitatis, ac Traditio legitima, divinæ mentis Interpreter, & omnium Patrum Chorus, & Ecclesiæ omnes con-

concordi studio probant, atque amplectuntur. Quid est ergo, quod nostris temporibus nonnulli declamare audeant in quædam Ecclesiasticæ Disciplinæ præcepta? Quasi Christus conceptis verbis edixisset, ne Pastoribus à se datis pareremus, nisi cum ea merè præcipiunt, quæ in Evangelio expressa jam habentur, & quasi ejus lex foret Ecclesiæ legibus, vel cum utilia aut necessaria ad animarum salutem præcipiuntur, non esse morem gerendum; & quasi Apostoli, & Apostolorum auditores, & proximi successores, nihil faciendum aut non faciendum scripsissent, & porro nihil ipsi faciendum decrevissent, nisi quod aperte ac nominatim à Christo constitutum antea fuerit. Qui tam temerè de juribus & regimine Ecclesiæ judicant, necesse est, ut tria etiam priora Ecclesiæ sæcula Evangelio Antichristiano usa fuisse, & à fide vera defecisse pronuntient, cum leges ferè omnes, quas adhuc observandas sub pœna peccati contendimus, aliàsque etiam modò obsoletas, tunc in usu fuisse, & magna cum religione observatas legamus. Quod si Phereponus moderationem tantum exposcit in hujusmodi legibus indicendis, Catholicos quoque (quod supra innuebam) concordēs habebit; quippe, ut cum Thoma Aquinate loquar, 1. 2. Qu. 107. Art. 4. in hisce legibus etiam Augustinus Epist. 119. cap. 19. ait esse *Moderationem attendendam, ne conversatio Fidelium onerosa reddatur*; dicit enim ad inquisitiones Januarii de quibusdam: *Religionem nostram &c. serpsilibus premunt oneribus addo, ut tolerabilior sit conditio Iudaorum, qui legalibus sarcinis, non humanis præsumptionibus, subjiuntur.*

## CAPUT XVI.

De Historia Religionis agitur. Ejus duplex genus, Historia divina, & Historia Ecclesiastica. Illa divinam Eidem à Christianis exigit. Quid juris illic sit hominum ingenio. Ecclesiastica Historia documentis non debetur supernaturalis Fides, Rationes istius sententia. Ecclesia non immunis à periculo errandi in judicandis Personis, Auctoribus Librorum dignoscendis, in Sanctorum gestis narrandis, & in aliis id genus factis.

**A** Dogmate ac disciplina, quorum jura quanta potui brevitate expediui, ad res historicas me conféro.  
Non

Non modicam partem ex his Religio ipsa sibi adoptat; nam neque ipsa dogmata, ipsamque disciplinam, ut ita loquar, aliunde scimus, quàm ex Historia, quæ scilicet nobis narrat, quæcumque Deus revelavit, quæve Sacramenta atque Mysteria Christus instituit. Tum ipsa complectitur res gestas & vitam Christi, ejusque Discipulorum acta, ingentemque illam rerum hominumque seriem, quibus à sui exordio ad nostram usque ætatem cum Judaïca, tum Christiana Ecclesia abundarunt, quantum pertinet ad Religionem veram. De cæteris enim rebus gestis profanam Historiam constantibus nullus nunc nobis est sermo. Quid autem juris hic habeant ingenia nostra, investigandum est.

Duplicem in classem Historia Religionis dividitur. Exhibet prima classis, quæcumque Christus per se, vel Spiritus Sanctus per ora Prophetarum, & Apostolorum narravere, aut scribenda mandavere, facta ab ipso Deo, & à Filio ejus unigenito, & ab hujus Discipulis, & à populo, veraci Religioni addicto. Atque ista appellari potest Historia divina, aut Historia Revelationis divinæ. Altera classis versatur in referendis iis, quæ post Christum & Apostolos in Ecclesia contingere ad nostram usque ætatem, Concilia, Hæreses, Patrum scripta, Episcoporum edicta, sanctorum Hominum gesta, atque innumera alia, Religionis faciem, usum, abusum, eventus, & regimen exprimentia, non tamen à Deo revelata, neque Spiritus Sancti jussu & afflatu literis aut memoriæ consignata. Historiam Ecclesiasticam peculiari appellatione istam nuncupare liceat.

Ad Historiam divinam quod attinet, diu fatigandum non est, ut intelligant ingenia nostra, quomodo erga ipsam gerere sese debeant. Ejusmodi facta parem cum dogmatibus fidem & venerationem à nobis exigunt, cum non illa minus quàm ista ad mortalium genus erudiendum nuntiata fuerint à Deo, sive à Scriptoribus divinitus inspiratis, & ex Dei munere falli nesciis. Hic autem locum habet, non secus ac in dogmatibus, Traditio Ecclesiastica, quæ si legitimè deducta sit ab antiquitate, ab universitate, & consensu Majorum, hoc est, si à Christi & Apostolorum ore emanasse cognoscatur, hisce factis eandem fidem conciliat, quam Apostolorum scripta conciliarunt. Unde enim, nisi ex Traditione, perspectum habemus, tot divinarum Scripturarum Libros esse Spiritu Sancto jubente conscriptos, & germanos esse Prophetarum atque Apostolorum



lorum foetus? Deinde nihil manifestius est, quam Apostolos multa de se & de Christo in suis scriptis prætermis-  
sisse, quæ tamen suis auditoribus voce identidem signifi-  
care potuerunt. Quæ ergo de iis rebus Apostoli aut Aucto-  
res ab Apostolis probati, tradiderunt, divinâ Auctoritate  
niti certum est, cum, ut illa docerent, Spiritum Sanctum  
ipsis adfuturum, Christus ipse promiserit, & verbis divi-  
nis non minor vis infit, non minor veneratio debeat,ur,  
scriptis, quàm ore tantummodo traditis. Collocandi sunt  
in eodem gradu Judæorum Libri, quorum auctoritatem  
Christus & Apostoli confirmarunt.

Subsidat igitur necesse est ingeniorum nostrorum am-  
bitio, ubi sese nobis offerunt ejusmodi facta. De illis suspi-  
cari quidquam falsi, ipsum Deum mendacii accusare fue-  
rit. Attamen & hic est aliquid juris ingeniis nostris. Duo  
nimirum, aut cum laude, aut sine culpa, hic in quæstio-  
nem vocari interdum possunt. Primum est, utrum quæ-  
dam in Scripturis sacris enarrentur, tanquam verè conti-  
gerint, an tanquam Parabolæ, atque Allegoriæ. Is enim  
etiam mos fuit sacris Auctoribus, atque ipsi hominum  
Magistro Jesu, ut aliquam veritatem sive historicam, sive  
moralem, sub allegorico velo, & sub Parabolis, Poëticisq;  
figuris ingeniosâ gravitate referrent, quò illa documenta  
& dulcius haurirentur, & firmitus ab auditoribus retine-  
rentur. Qua in re sese consuetudini & ingenio Orientali-  
um populorum accommodarunt, quibus majori, quàm  
apud alios populos, in pretio fuere, imò sunt adhuc, talia  
eruditionis condimenta. Ità dubitare quis potest absque  
Dei revelantis injuria, vixerintne reipsa Job, Lazarus men-  
dicus, & Filius prodigus, atque alii quidam celebres in di-  
vinis Libris; an potius eorum vita & acta sint Parabolis  
sacris tantummodo accensenda.

Alterum est, licere inquirere modum, quo aliqua in u-  
troque Testamento acciderint, & facta fuerint; quod sal-  
vâ Historiæ fide præstari potest. Atque hinc magna quæ-  
stionum seges Interpretibus sacris enata, dum quisq; mo-  
dum istum congruentiorem menti divinæ Scripturæ ex-  
cogitat. Sed utrobique cavendum, ne longius quàm par  
est, excurrat ingeniorum libido. Traditio consulenda  
est, & Sanctorum Patrum terenda vestigia, & communis  
Ecclesiæ expositio ante oculos perpetuò habenda, sicuti  
sapientissimè statutum est in Tridentina Synodo, & Majo-  
res nostri ab ipsis Ecclesiæ primordiis commendavere. Ea  
de causa malè accepti sunt, non quicumque novas in expo-  
sitione

sitione divinarum Literarum opiniones adferunt, aut literalem sensum allegorico præferunt, sed qui jam receptæ in Ecclesia Dei interpretationes tanquam certas & unice veras, contrariis & enormibus sententiis propositis improbare. An ab hujusmodi semita aberrarint, qui Job, & Tobix gesta in Dramata, ac in Allegorias amandarunt, quæri posset. Certè non benè inter nostros audire quondam Thomas de Vio Cardinalis Cajetanus, vir nihilominus æternâ laude dignus, & alii quidam, quod nimia libertate in Genesi explicanda usi sunt, & à veteribus paulò nimium discessere. In his omnibus non scientia tantum, & eruditione, & ingenio opus est, sed etiam prudentiâ. Prudentiæ autem leges vix longo sermone expediri queunt, aut saltem hic non debent, cum ad alia sit festinandum.

Historia Ecclesiastica, quæ alteram classem rerum ac factorum complectitur, quorum memoriam ab Apostolorum voce aut scriptis non accepimus, alio fidere, aliis legibus regitur. Et ne diu evagemur, illud continuò statuentum est: *Nullum esse Factum, quod verum certumque divinæ & supernaturalis, ut ajunt, fide credendum sit, nisi quod à Christo revelatum fuerit, & Spiritu sancto jubente à Prophetis & Apostolis conscriptum, aut vivæ voce traditum posteris, & non fallaci, sed Ecclesiæ veræ testimonio uti tale nobis propositum.* Hujusmodi sententiæ veritatem partim ex iis, quæ hætenus dicta sunt, partim ex aliis argumentis apertissimè elicimus.

Sicuti Sanctus Thomas, & reliqua Theologorum cohors affirmat. Articuli Fidei temporis successione, quod est ad substantiam, crescere non possunt, sed solùm quod est ad explicationem. Nimirum quod olim Deus per Filium suum, Prophetas, & Apostolos revelavit, id unam Christianam Fidem constituit. Nihil addi, nihil inde detrahi potest. Explicare dumtaxat sine erroris periculo, quæ Deus revelavit, Ecclesiæ licet, immo ad eam pertinet: quæ certè explicatio non nova dogmata invehit, sed vetera majori luce donat, aut à perversis & novitiis interpretationibus vindicat. Lectores diu detineam, si quæ Apostolorum & Patrum loca certissimæ huic sententiæ fundamentum præbuerunt, recensere velim. Illud tantum dicam, communi omnium consensu tradi: Doctrinam Christi omnino perfectam, nulliusque additamenti, aut imminutionis indigam; & nefas esse, quidquam pro Fidei dogmate habere, quod non ab ipso Deo sive per sacras Scripturas, sive per Traditionem, quasi per manus ad nos usque transierit.

Novas

Novas revelationes expectandas aut suscipiendas non esse: & quamvis vel ab Apostolo, vel etiam Angelo quidquam novi, veluti revelatum nuper, & veluti Christianum dogma Fide supranaturali credendum, proponatur; sine hæsitatione illud repudiandum esse. Novitatem inter signa erroris habendam; & ideo Hæreticos damnandos, quod nova dogmata, novas revelationes in antiquam Christi doctrinam intrudere velint. Quocirca qui sibi facultatem arrogant proponendi nova de Fide Christi dogmata, exiguntque à Fidelibus illum assensum, qui certis Dei Revelationibus unice debetur: id sibi licere putant, quod Romani Pontifices, Concilia Generalia, & Apostoli ipsi nequaquam licere conceptis verbis fatentur. In hanc rem legendi præ cæteris Tertulianus & Vincentius Lirinensis, & Cœlestini ac Leonis Romanorum Pontificum Epistolæ, ut alios Pontifices Maximos, Concilia, ac Patres omit-  
tam.

Quæ cum ita sint, quis non intelligat, nulla haberi posse facta, præterquam enarrata in sacris Scripturis, aut per legitimam Traditionem vulgata, quibus adhibenda sit supranaturalis Fides? Si, inquam, ista facta ad Christi Revelationem, aut ad Apostolorum Traditionem per germana antiquitatis monumenta referri nequeant, & post ævum Apostolorum contigerint: certa quidem esse hominibus, & fide dignissimâ possunt, at nequaquam effragitare à Christiano populo divinam Fidem. Nam qui dicatur Christus ea revelasse, Apostoli ea tradidisse, quæ nondum acciderant, & occulta penitus Ecclesiæ fuere ad eum usque diem, quo in rerum universitatem emersere? Prædicando tantum poterat hujusmodi facta Christus revelare Apostolis. Sed ubinam istarum prædictionum vel unum vestigium in sacris Libris, in Traditione legitima?

Ab hisce propterea factis non revelatis dogmata Fidei revelata longè differunt. Scilicet dogmata ex natura sua jam revelata à Deo fuerant, & jam dudum aut expressa, aut non admodum obscure significata Ecclesiæ. Fortasse à multis ignorabatur aut minimè advertebatur, aut nequaquam credebatur ejusmodi Revelatio; at Revelatio, nihilominus firma per se constabat, tametsi variè de ipsa homines nonnulli sentirent. Quando ergo Ecclesiæ placuit de illa Revelatione certos facere Fideles, nihil illa novi, quo ad doctrinam ipsam, proposuit, sed dumtaxat quo ad homines quosdam ea de re antea aut incertos, aut ignaros. Ità Spiritum Sanctum à Patre Filioque procedere.

Animas Sanctorum, statim ut è corpore exierint, Dei visione donari; omniumque animas, non ex traduce esse, sed singulas in singulis corporibus creari, olim Deus revelavit. Diu à nonnullis de istorum revelatione dubitarum ac disputatum est, & licuit disputare, cum nondum Ecclesia veritatis custos ac interpretes quæstionem omnem suâ sententiâ sustulisset. Ecclesiæ autem sententia id tantummodo statuit, quod certissimè à divino Spiritu Prophetis & Apostolis revelatum jampridem fuisse sibi constabat, tum divinis Scripturis, tum Traditione consultâ. Verùm eò pertinere nemo dicat facta, de quibus cum certum est, nihil ab Apostolis scripto aut vivâ voce traditum, tum certissimū est, ipsa post Christum & Apostolos accidisse. Aut novâ hinc excogitare, aut falsam obtrudere, revelationem Dei necessum esset: quod & à Religionis veræ, & ab Ecclesiæ veracis natura, atque instituto nimis abhorret. Non igitur ista tanquam antiquitus à Deo revelata, Ecclesia definire potest; non igitur supranaturali Fide credenda sunt certa.

Alterum argumentum nobis experientia suppeditabit. Omni periculo errandi Ecclesia caret, & nunquam re ipsa erravit, cum de dogmatis aut factis definiendis agitur, quæ sibi divinitus revelata innotuere. In iis autem factis, quæ Apostolorum ætatem subsecuta sunt, aut per Traditionem à Christo atque Apostolis nuntiata fuisse non constat, Ecclesia, & summi Pontifices falli possunt, & re ipsa quandoque errarunt. Consequens ergo est, Ecclesiæ & successoribus Petri, non eam quoque à Christo adjunctam fuisse prærogativam, ut ejusmodi facta decernere possent, non secus ac fidei dogmata, certissimo calculo. Quocirca solemnem Apostolicæ Sedis regula est, Patrum ac Theologorum consensu firmata: omnia, quæ in Conciliis etiam Generalibus geruntur, exceptis fidei causis, retractari posse. Et huc referenda sunt Sancti Augustini verba Lib. 2. cap. 3. de Bapt. contra Donatistas à nobis superius expensa, quibus innuitur, ipsa Generalium Synodorum decreta sæpè à sequentibus emendari, dum aut experientiâ, aut novis documentis aliquid innotescit, quod antea latuerat. Deinde, licet hujus generis sententiæ ac judicia mutationi obnoxia sint, atque emendationi: id tamen vitio, aut dedecori verti non posse Ecclesiæ, sive Religioni, cum ea tantum firma ac immobilia fore Christus pollicitus fuerit, quæ ad doctrinam, & ad facta à se, vel suo jussu revelata spectant. Stetit hucusque in Ecclesia, & nunquam vacillabit hujusmodi doctrina, & factorum revelatio. Si  
in

in aliis à veritate declinabitur, erit hoc hominum infirmitati tribuendum, non Christo, qui sua promissa æternùm & fideliter implet.

Age ergo, nonnulla in hanc rem proferamus exempla, cùm & plura, & illustria, & obvia sint passim. Primò in judicandis personis ita se Apostolica Sedes, & Concilia, & Catholici semper gessere, ut judicia sua non arbitrarentur, aut esse vellent paria auctoritati. atque immobilitati divini Verbi. Nam & ea ad incudem rursus revocari, atque emendari siverunt, & melioribus documentis allatis in diversas à prioribus abière sententias. Paulus Samosatenus in primo Antiocheno Concilio absolutus, in altero damnatus est. Arius ipse & Ariani, post eorum damnationem à Nicæno Concilio promulgatam, innocentes quodammodo declarati sunt, & in communionem restituti, id tolerante Ecclesiâ. Innocentiam Athanasii, & Marcelli Ancyрани, Julius Romanus Pontifex, & Sardicense Concilium statuerant; eorum tamen causas iterum expendi, Patres, summique etiam Pontifices passi sunt. Marcellum reum esse atque hæreticum illustres viri postea contenderunt, & in primis Basilius Magnus. Neque minus celebris fuit Cæciliani Carthaginensis Episcopi causa. Lis eidem contra accusatores Donatistas adjudicata fuerat in Romano Concilio, præfidente Melchiade. Obtinuerunt victæ partis querimonix, & accusationes, ut in amplissimo Arelatenfi Concilio rursus audirentur, & quanquam pari successu pro Cæciliano pronuntiatum & ibi fuerit, adhuc tamen non recusarunt Africani Patres, ut eadem causa de novo Carthagine pertractaretur, damnaturi vel post mortem Cæcilianum, si crimina opposita vera deprehenderentur. Cur non & memorem Zosimi Romani Pontificis acta, qui à Pelagio Hæresiarcha circumventus, in ipsius auxilium, & pro illius innocentia, ad Africanos Episcopos rescripsit? Theodoretum, Ibam, Theodorum Mopsuestenum, Gothescalchum, aliosque celebres viros in quibusdam Conciliis damnatos, in aliis absolutos legimus, ut jam patere possit, Concilia & Ecclesiam in hujusmodi factis definiendis neque imperare velle, neque exigere posse certissimum à nobis Fidei divinæ assensum.

Secundò, immunia ab errore non sunt Concilia, licet Oecumenica, in auctoribus Librorum dignoscendis. Certè per multa sæcula ne dubitatum quidem est, quin Dionysio Areopagitæ Apostolorum æquali tribuendi essent Libri, qui sub ejus nomine circumferuntur. Nostrâ tamen ac

Patrum ætate usus Critices restauratus, si non omnibus literarum Professoribus, saltem omnibus viris emunctæ naribus persuasit, eos quidem libros plurimi faciendos, sed tantam antiquitatem non redolere, quanta hucusque vulgò tributa ipsiis fuit. Illustriores etiam majorique in pretio apud Latinos fuere plurimæ Clementis, aliorumque Romanorum Pontificum ad Siritium usque Epistolæ. Sed ita rudium sæculorum persuasio proximè præteritis temporibus profligata fuit, ut Isidorus Mercator, sive Peccator, nulli amplius imponat, & nemo sit cordatus, cui scripta illa supposititia non videantur. Idem dicendum de quamplurimis aliis Libris, aut suppositis, aut incautè tributis Ignatio, Athanasio, Augustino, Hieronymo, aliisque Patribus; & tamen hujusmodi Libros non provincialia tantum, sed ipsa quoque Oecumenica Concilia & septimum præsertim habitum Nicææ, Pontifices Maximi, & innumeri Scriptores tanquam legitima eorum Patrum monumenta olim adhibuere.

Tertiò, in sanctorum hominum gestis, reliquiis, atque miraculis recensendis, sive proponendis, plus quam humanam fidem Catholica Ecclesia exposcere non potest. Quæ enim monstra, quæso, non irrepsere in veterum Historias? Quæ conficta non fuere aut ab improbis, aut à piis impostoribus, ut sanctis Martyribus, Confessoribus, aliisque Religionis Christianæ illustribus Athletis major veneratio & fama apud posteros quæretur? Inauditi etiam antea Cœlites Ecclesiasticis Diptychis inscripti fuere. Simeonis Metaphrastis spissum opus legere juvat, fabulis uberrimè refertum. Neque iis carent Gregorii Turonensis, Gregorii Magni, Vincentii Bellovacensis, Antonini, aliorumque Hagiographorum volumina. Nam quò magis ignorantia & literarum obliuio obtinere inter Christianos cœpit, aut eò securior facta est impostorum audacia, aut minus cauta aliorum credulitas. A quorum erroribus cum satis sibi non caverint piiissimi alioquin & celebres viri, factum est, ut in ipsa Templà, in ipsas ad populum conciones, in precum libros, in Romanorum Pontificum Epistolàs, penetrarent nonnunquam hujusmodi commenta. Et quidem à doctis Viris, & à Baronio præcipuè, multum operæ collocatum est in purgandis Historiis, Martyrologiis, & Breviariis ab ista fœce. Sed quæ in immensum excreverat, nondum prorsus expugnari se passa est, & modò temeritas absit, modestisque Critices usus in consilium advocetur, nostris futurisque ingeniis erit hic, in quo se utiliter adhuc exercent.

Dèni-

Denique in cæteris capitibus Historiæ Ecclesiasticæ à Spiritu sancto non revelatæ, se ab erroris periculo divinitus immunem Ecclesia Catholica nondum censuit. Diutissimè illa opinio inter Christianos invaluit, non sinè divino prodigio à XXX. Interpretibus sacras Scripturas in Græcam Linguam fuisse conversas. Unus subinde Hieronimus omnium ferè antiquorum Patrum hac de re sententiam ita infirmavit, ut ab illa jam plerique prorsus discesserint, aut saltem de hujusmodi facto dubitandum consentiant. Ad hæc celeberrima olim fuere, & ab quæ hæsitazione ubique excipiebantur, quæ de S. Jacobi in Hispaniam adventu, de sancti Dionysii Arcopagitæ Episcopatu in Galliis, de gestis Martialis Lemovicensis, aliorumque Apostolorum & Martyrum, qui primi varias gentes Christi doctrinam imbuerant, confidentissimè narrabantur. Nemo dubitabat de splendidis tot Ecclesiarum, aut Religiosorum Ordinum originibus; de Lepra, Baptismo, & Donatione Constantini, de leunculis Beato Lucæ adscriptis, de tot sanctæ Ursulæ in Martyrio sociabus, de Veronica, de Marcellini Romani Pontificis lapsu, & Sinuesano Concilio, aliisque id genus innumeris. At ista nunc falsi coarguuntur à doctissimis viris, aut saltem non ea esse exploratum est, quibus tam facile sit fides adjungenda, cum Historici præstantiores, & veneranda antiquitas, & temporum series iisdem sive aperte sive tacite adversentur.

Restat igitur, ut ex istis, tum rationibus, tum exemplis colligamus, immutabiles non esse, neque esse divinam fidem certissimas de factis non revelatis in Ecclesiastica Historia sententias. Neque hisce factis eam, quæ suapte naturamarent, divinam auctoritatem, & inconcussam certitudinem communicare possunt vel Romani Antistites per sua diplomata, atque edicta, vel Synodi Oecumenicæ per sua decreta, vel quisquam alius quamvis doctrinam, veracitate, ac pietate conspicuus. Quocirca non Hæreticis illico agnoscendus non infamia, non pœnis justissimè ab Ecclesia in illos constitutis, qui fidei dogmata negant, aut à fide vera deficiunt, quisquam erit mulctandus, quod hujusmodi narrationibus eandem ipsam fidem præbere nescit, sive etiam recuset, quam præbet, & omnes novimus esse præbendum, narrationibus celo auctore traditis.

## CAPUT XVII.

*Ut aliquod factum fide supernaturali credendum statuatur , quæ conditiones requirantur. Revelationes quarundam sanctarum mulierum ad fidem non spectant : Neque Canonizatio Sanctorum. Traditio necessaria, ut aliquod factum tanquam pertinens ad fidem decernatur. An Immaculatam Deipara Conceptionem statuere possit Ecclesia.*

**U**T autem, quæ sint Ecclesiæ, quæ ingeniorum jura, cum de factis historicis agitur, manifestius innotescat, dicendum nobis videtur, duas conditiones planè exigi ad certam eorum definitionem. Sinè istis neque à nobis efflagitare Ecclesia poterit, neque nos adhibere supranaturalem fidem debebimus. Altera est, ut quæ definienda sunt ab Ecclesia, siue jam definita videntur, Christus revelare potuerit, siue, ut melius dicam, voluerit, aut ab Apostolis, dum in vivis erant, tanquam à Christo & Spiritu Sancto accepta, potuerint tradi & nuntiari populis, ejusdem Spiritûs Sancti jussu. Altera est, ut liqueat, quæ ità à Christo revelari, & ab Apostolis tradi potuere, reipsa revelata, aut ab Apostolis tradita fuisse : quod liquere non potest, nisi eorum legitima Traditio habeatur in Ecclesia Dei. Utraque conditio necessaria est. Nam si aliquod factum à Deo non revelatum adjungere liceret fidei dogmatibus, jam Christianæ Religionis doctrina novum quotidie incrementum acciperet, & novi indies fidei articuli creari possent : quod certè inter Catholicæ Ecclesiæ homines nemo licere arbitratur, & à veræ Ecclesiæ dogmate abhorrere omnes fatentur. Deinde, etiamsi à Christo atque ab Apostolis revelari facta potuerint, non continuò revelata fuisse constat. Ac proinde si desideretur eorum Traditio in Patrum monumentis, si ipsa Traditio Antiquitatis suffragio non comprobetur, immo si improbetur, aut si tempus certum assignari possit, quo ejusmodi facta antea inaudita cœpta sint venditari : quis ad auctores Apostolos talia referat ? quis ipsis eandem ac Evangeliiis fidem habeat, habendamve putet ? De Christi atque Apostolorum gestis præter ea, quæ  
in



in Canonicis Scripturis continentur, & ex antiquissima ac germana Traditione accepimus, quamplurima alia olim ferebantur. Evangelia quoque alia, & alii Apostolorum Actus emergere antiquitus. Quibus tamen quippe constanti ac legitimâ Traditione carentibus, aut ademit, aut nunquam addidit fidem Ecclesia vera.

Quæ cum ita sint : Primò, intelligimus, quascumque revelationes de Servatoris nostri, aut Deiparæ Virginis, aut Apostolorum gestis, aut etiam de quibusdam dogmatis, accidisse legimus, postquam vivere desierunt Apostoli, nunquam in censum divinæ doctrinæ referendos esse. Nonnullas quidem Revelationes, & Prophetias fidelibus interdum à Deo concedi potuisse post Apostolos, & adhuc posse, apud nos doctrina fidei est; eoque referri possunt verba Joëlis 2. 28. à sancto Petro citata in Actis Apostolorum 2. 17. *Post hæc effundam spiritum meum super omnem carnem, & prophetabunt filii vestri, & filia vestra; senes vestri somnia somniabunt, & juvenes vestri visiones videbunt.* Multas etiam ex his revelationibus, visionibus, ac prophetiis, exacto jam Apostolorum ævo, contingisse narrant sancti ac probatissimi Patres, easque experientiâ non inanes, non confictas subinde testata fuit. Verùm eas ad facta duntaxat peculiararia, & ad singulorum fidelium utilitatem ac solatium, non autem ad generalem Ecclesiam, neque ad certam dogmatum fidem pertinere constat. Veræ esse possunt; certæ penitus, & Ecclesiæ Dei necessariæ esse non possunt. Idcirco, et si revelationes quarundam sanctarum mulierum, Brigittæ, Catharinæ Bononiensis, & Catharinæ Senensis, Angelæ Fulginitis, Hildegardis, Gertrudis, & aliarum aut laudaverit, aut toleraverit Ecclesia: nemo tamen Theologiæ melioris conscius, hucusque fuit, qui certitudinem Fidei Catholicæ ipsis additam fuisse autumavit, immo non affirmavit. Concilia & Ecclesiam universam auctoritate carere similia decernendi, tanquam indubitata & certissima dogmata Christiano populo credenda. Neque alia de causa damnati olim Cataphryges, & Montanistæ, quàm quòd novas de tribus Quadragesimis celebrandis, de secundis Nuptiis abdicandis, de pace majorum criminum reis deneganda, aliisque de rebus revelationes instar necessarij dogmatis proponerent. Quare deinceps Cataphrygum nomine à sanctis Patribus non notati fuere, qui novas, non de aliquo peculiari facto (hoc enim cœlitus contingere posse, & quandoq, contigisse, exploratum habemus) sed de aliquo

dogmate revelationes inducerent. Quæ verò visiones ac revelationes de Christi ac Deiparæ gestis, dum in vivis essent, circumferuntur, ideo toleratæ, quòd nihil sacris Scripturis ac Traditioni antiquissimæ contrarium per eas adferebatur. Cæterum, ab iis in sacram doctrinam invehendis, atque adhibendis, perpetuò abstinuere sapientissimi Pontifices, ac sancti Patres, atque Scriptores eximii, qui etiam revelationes veras à falsis difficile distingui posse aiunt, & longe ab ea opinione fuerunt, ut id genus facta sine dubitatione accipienda crederent. Eam in rem omnium præcipue legendus magnus Ecclesiæ & Universitatis Parisiensis Cancellarius Joannes Gerson.

Secundò, ad Ecclesiam, ad Generalia Concilia, ad Apostolicam Sedem pertinet, in sanctorum Canonem referre homines consummatæ sanctitatis gloriâ, dum viverent, illustres & post mortem miraculis claros. Disciplinæ leges eorum cultum ita indicare possunt, & ad universam Ecclesiam extendere, ut non solum pium ac laudabile sit, huiusmodi sanctos invocare, & sibi adsciscere patronos apud Deum, sed etiam impietatem sapiat eorum cultum improbare, atque contemnere. Quare à suspitione Hæresis ille non absit, atque intolerandam, & pœnis dignam temeritatem ac impudentiam præ se ferat, qui rite Cœlitum Catalogo adscriptos explodat, & in iis, ut aiunt, canonizandis Ecclesiam reipsa, & Romanum Pontificem errasse dicat. Suspicionem Hæresis memoravi, non autem Hæresim formalem; quippe non video quæ conciliari possit cum certissimis regulis hætenus traditis eorum sententia, qui firmissimo assensu, divinæque fide credendum censent, Ecclesiam aut Romanos Pontifices talia deternentes falli nunquam posse. Videant ipsi, an non inde sequatur, novas revelationes, nova de factis dogmata in Ecclesiam induci: quod abhorrere à Catholica doctrina & ipsi non negant. Nam quæ argumenta pro sua opinione producunt, aut nihil, nimium in ista quæstione probare, facile cognitu est. Sunt verba Christi (aiunt nonnulli) apud sanctum Joannem XVI. *Cum venerit ille Spiritus veritatis, docebit vos omnem veritatem.* Verum non omnem procul dubio veritatem à divino Spiritu nobis revelandam, ex omnium interpretatione perspectum est; sed omnem tantummodo veritatem, quæ ad salutem hominum, & ad veræ fidei atque Ecclesiæ Catholicæ integritatem conservationemque necessaria sit quomodo Verò dicamus, necessarium hominibus, fidei, & Ecclesiæ esse

esse cultum novi alicujus sancti, fidemque de illius beati-  
tate cœlesti? Utile est, non necessarium, ista habere, ista sci-  
re. Innumeræ aliæ veritates sunt, quas novisse in utilita-  
tem Christianorum cederet; & illas tamen certò decerne-  
re, nunquam sibi tribuit, aut tribuere potest Ecclesia.  
Neque verò, etiamsi in re tanti ponderis ab errandi peri-  
culo immunes non credantur Synodi universales, & Ro-  
mani Pontifices, ejusmodi inde consequuntur incommo-  
da, ut oporteat inauditam antiquitus opinionem am-  
plecti.

Attamen inquit aliqui, ludibrio exponeretur Eccle-  
sia sancta Dei, atque à Spiritibus tartareis irrideretur,  
si quos perpetuò in inferis cruciandos, tanquam sanctos  
in terris colendos proponeret. Ad hæc absurdus error  
foret, eorum pascere patrociniū in cœlis, qui Deum  
iratum experirentur in inferis. Quæ tamen omnium il-  
lud solum suadent, Romanos Pontifices, & Ecclesiam,  
nulli diligentia parcere debere, quo fiat, ut Beatorum al-  
bo tantummodo inscribantur homines absoluta pietate  
& sanctitate, & miraculorum gratia verè conspicui, dimis-  
sis reliquis dubiæ sanctitatis. Ceterum si in his continge-  
ret error, (quem certe, modò rite peracta sit Canonizatio.  
contigisse nemo unquam ostendet, & contingere posse  
difficilimum putamus) nihil probi in Ecclesiam, aut in  
Romanum Pontificem recideret, cùm sacrorum Pasto-  
rum cœlestis prærogativa sita sit in immunitate non ab  
omnibus erroribus, sed ab erroribus in doctrina Christi,  
& in factis per Apostolorum calamus aut vocem traditis,  
Ecclesiam in aliis falli posse jam vidimus sine dedecore  
suo, sine fidei detrimento. Quis autem nescit, tot Sancto-  
rum Reliquias publico donari cultu, & Romanorum Pon-  
tificum, aliorumque Episcoporum, & interdum etiam an-  
tiquitatis diuturnæ auctoritate probari: quas tamen qui  
certo fidei divinæ assensu credendas esse affirmet germana  
eorundem Sanctorum Lipsana, plene à veritate absit. Præ-  
terea neque privatæ Ecclesiæ, neq; Ecclesia universa in tot  
Sanctis recipiendis, quorum nomina nunc in Martyrologi-  
is occurrunt, eam adhibuere diligentiam, quæ nunc Ro-  
mæ adhibetur, ut de eorum sanctitate constet. Et tamen  
hi palam coluntur, neque inde suspicamur grave malum  
in Ecclesiam effluere. Exempli causa licuit Ravennatibus,  
Mediolanensibus, Parisiensibus, Lugdunensibus suos co-  
lere aut Episcopos, aut Cives sanctos, cùm tamen Eccle-  
sia universa, aut Romanus Pontifex nondum de certa

eorum beatitudine judicasset. Nunc etiam cuicumque licet numerum ingentem Sanctorum colere in Romano Martyrologio descriptorum, quanquam non præcesserit Canonizatio sollemnis. Sanctam quoque feminam Veronicam, Virginum S. Ursulæ, Sociarum undecim millia, aliosque hujusmodi Sanctos Ecclesia olim toleravit, & adhuc tolerat, tametsi an unquam fuerint, nunc doctissimi viri non injuriâ dubitent, & de aliis nonnullis dubitare licitum putent. Similiter neque ad fidem spectat, in singulis Hostiis, quas adorandas populo Sacerdotes exhibent, contineri vivum Christi Corpus, & Sanguinem. Errores igitur, & incommoda ex his potuerunt, & possunt adhuc accidere. At non ea sunt, ut eorum causâ scèdari, aut deficere Religio vera, aut rugas inde contrahere possit. Isti sunt, ut Scholarum vocabulo utar, errores materiales, cavendi quantum fieri potest, sed nullum animabus periculum, nullam veræ Ecclesiæ infamiam creantes. Orationes autem nostræ, cultusque noster, vel cum rogamus, atque veneramur quempiam, quem cœlitem putamus, semper ad ipsum Deum feruntur in quo rogando, atque colendo fieri non potest, ut fides aberret. Quamobrem, si & in Sanctorum Canonizationem ejusmodi materiales errores illaberentur, nihil mirum foret. Sed tamen ritus iste ab Apostolica Sede eo nunc peragitur accurato diligentique studio, ut piè credendum sit, nullum ea in re errori locum fuisse, aut deinceps futurum. Non necessariò igitur, sed tamen piè credendum est, ut inquit S. Thomas, quodlibet. Lib. 9. art. 16. *quod nec etiam in his judicium Ecclesiæ errare possit.* Hæc nobis æquissima, hæc pia videtur sententia, & in hac ipsemet Sixtus IV. fuisse videtur, dum catalogo Sanctorum adscriptis B. Bonaventuram; inquit enim in Bulla; *Confidentes, quod in hac Canonizatione non permittat Nos Deus errare.* Altera sententia quibus firmissis rationibus, quibus Scripturæ & Patrum suffragiis fulciatur, nondum invenimus, & potissimum si verum est quod ab aliis didici, nempe existare in antiquo Ceremoniali Romano Lib. 1. Sect. 6. Cap. 2. formulam Canonizationis, in qua protestabatur olim summus Pontifex, se per actum Canonizationis non intendere aliquid facere, quod sit contra fidem, aut Ecclesiam Catholicam sive bonorem Dei.

Tertiò, verum quidem est, certo & minimè fallaci Ecclesiæ decreto sanciri posse nonnulla, quæ ante Apostolorum mortem evenère, cum ista revelari à Christo, aut Spiritus

Spiritus sancti jussu ab Apostolis tradi potuerint. Sed tum sine errore id fieri continget, si de factis agatur, quæ ad Historiam Christi & Religionis intimè spectent, & ad Ecclesiæ ædificationem conducant. Non enim veri videtur simile, Christum ejusque discipulos inutilia revelasse. seu tradidisse posteris, & Spiritum sanctum suæ Sponsæ adfuturum, ne in hisce supervacaneis erret. Deinde necessum est, ut ejusmodi factis constans antiqua, & legitima Traditio adstipuletur. Id quoque exigitur in dogmatis sanciendo, quanquam ista unum ex altero sæpè necessario pendeant; quantò ergo magis id exigatur in factis, quæ contingere vel non contingere æquè potuerunt, & reverà contigisse non aliunde haberi, quàm ex Historiâ ac Traditione potest? Illa porro legitima satis, & germana antiquissimæ rei Traditio minimè appellanda est, cum post secula multa à Christo nato res quæpiam narrari coepta est, totâ antiquitate silente, Patribusque, & Historicis omnibus ante illud tempus nullam ejus rei mentionem, vel cum possent, ac deberent, facientibus. Augerebit etiam falsi suspicionem, si primus ejus narrationis Auctor aut Græculus fuerit, aut alius quisquam rudium temporum Historicus, aut ineptus aliquis Scriptor, à quo hominum genere, utpote omni Critices præsidio sæpè destituto, tam facile plerumque fabulæ & nugæ, quàm ipsa vera adoptantur.

Quare, etiam si non pauca vulgò ferantur de Apostolorum peregrinationibus, & obitu, de parentibus Deiparæ, de Marthæ ac Mariæ Magdalenzæ post Salvatoris mortem gestis, de multis pertinentibus ad tres Magos ad adorandum Christum infantem olim profectos, & alia hujusmodi, quæ Apostolorum Traditione contineri poterant: quandoquidem tamen antiqua & probata non adferuntur hujus Traditionis monimenta, immo in ipsorum narratione fabularum vestigia sublucent: idonea Ecclesiæ fundamenta non suppetunt, ut ista sine erroris periculo vera statuere possit. Multa etiam sunt, quæ definire non debeat. Atque hæc fortè peti potest, an jus sit Ecclesiæ decernendi tanquam fidei dogma, beatissimam Christi Matrem sine macula originali fuisse conceptam. Tale jus ipsi esse, absque hæsitacione affirmandum est, si aut per legitimam argumentationem ea Virginis prærogativa è divinis Scripturis deduci, aut ex probatissimâ & constanti, & antiquâ Traditione Patrum comprobari possit, neque enim quisquam in Theologia peritus firmissimâ decretum

inniti posse arbitretur privatis quibusdam revelationibus, aut apocryphis Patrum scriptis, aut iis tantummodo argumentis, quæ à congruitate appellantur. Ità rectissime ab Ecclesia contra Helvidium & Jovinianum quarto vulgaris *Æræ* seculo constitutum est, pertinere ad fidei Catholicæ dogmata perpetuam ejusdem Deiparæ virginitatem, quam etsi divinæ Scripturæ aperte non affirmarent, vetustissima tamen totius Ecclesiæ Traditio ab Apostolis usque derivata certam faciebat. Ubi ergo par Traditionis Apostolicæ auctoritas adsit, & non potius stent contra plurimi Patrum: dubium nullum est, quin decreto divinitus certo stabiliri possit immaculata Virginis Conceptio, uti etiam quæ nondum satis certa de ipsius morte sive assumptione in cælum feruntur; cum utraque interim sit quidem Pietatis, sed non necessitatis, credere vera.

Sed jam dicat aliquis: Si certa non sunt Ecclesiæ de tot factis judicia, & error intercedere potest: ergo liberum nobis erit iis, dum talia proponunt, vel addere, vel demere fidem, credere, & non credere, & omnia quæ à Deo revelata fuisse non constat, in dubium revocare. Id si facere impune & iure possumus, quæ Historiæ Ecclesiasticæ pars à temerariis ingeniis jam sibi non timeat? Immo quid non timeat ipsa Religio? Nam facta quædam ostendere est, quæ quanquam à Deo revelata fuisse non appareat, attamen certa credenda sunt, atque creduntur, quorum unum præcipue est, *verum esse Petri Successorem Clementem XI.* qui tanta cum sui gloria, & Christiani gregis utilitate in Romana Cathedra nunc sedet. Id si negare fas est, qui etiam fas non erit negare, & tanquam dubia rejicere, quæ ab ipso Pontifice in fidei & morum doctrina sanciantur? Fac etiam, certo non constare, quænam Generalia Concilia legitima sint: eorum de fide Constitutiones illico nutent oportebit, neque credendæ erunt erroris prorsus expertes. Alia deinde incommoda consequentur, quæ totam Christianæ Religionis certitudinem, & Ecclesiæ regimen brevi susque deque vertant. Et hæc quidem maximi momenti obstacula sunt, in quibus removendis operæ pretium est diligentem ponere curam. Ita siquidem omnium sententiarum, sed earum in primis, quæ ad Religionem spectant, temperanda est tractatio, ut extrema utrinque posita sedulo evitentur. Hanc autem gravissimam simul & difficilissimam Quæstionem Capiti sequenti reservatam volumus.

## CAPUT XVIII.

*An immediatè, an potiùs mediatè ad fidem referendum sit credere, hunc vel illum esse Romanum Pontificem. Etiam si ponas, hoc, & alia hujusmodi facta non esse credenda fide supernaturali, hac tamen fides debetur decretis Conciliorum, & Apostolicæ Sedis in materia fidei & morum ab Ecclesiâ receptis. Evidentia Naturalis & Moralis in his casibus sufficit, & nos credere, ac obtemperare cogit. Quàm temerarium, & pœnâ dignum revocare in dubium ejus generis effata.*

**A** Non paucis annis recentiorum Theologorum ingenia exercet ea Quæstio, num ad fidem spectet hæc propositio : *Hic aut ille est verus Romanus Pontifex.* De illa altum silentium apud Patres, & antiquiores Theologos. Sunt qui immediatè, sunt etiam qui tantummodo mediatè fidei divinæ assensu credendam censeant. Neutram sententiam hucusque Ecclesiâ, aut Apostolica Sedes suo calculo firmavit. Quare fas erit nobis quæstionem adhuc incertam versare, quod tamen præstabimus eâ animi reverentiâ, quæ tam arduis & delicatis rebus debetur, itâ ut Apostolicæ Sedi non hæc tantum, sed omnia nostra humili obsequio subjiciamus, nullam aliam tueri sententiam parati, quàm quæ illi placuerit, & ideo ausi argumentum istud pertractare liberiori stylo, quòd Roma nondum suam hinc aperuerit mentem; & alioquin eam Pontificibus maximis esse mentem sciamus, ut in omnibus veritas vincat.

Dicimus igitur, multis Recentiorum videri immediatè pertinere ad fidem effatum istud : *Hic aut ille homo (verbi gratiâ Clemens XI.) verus est Pontifex Romanus.* Eâque solet adferri potissima ratio : videlicet, enuntiationem particularem contineri in universali; & cum universalem Deus revelârit, particularem quoque à Deo revelatam fuisse. Ut enim omnes in Adam peccavisse fides nos docet, atque in hoc effato revelatum quoque exempli causâ fuit *Salomonem peccasse in Adam*; itâ est in isto universali effato toti Ecclesiæ revelato: *Omnis homo ritè electus ab Ecclesiâ in Successorem Petri est verus Pontifex Romanus*, consendum est

est revelatum & illud particulare : *Hic aut ille est verus Pontifex Romanus.* Qua in re nemo non videt, quantæ curæ fit omnibus, ut hinc nova aliqua Dei revelatio excludatur, benè siquidem perspecta quilibet Catholicorum habet intoleranda incommoda, quæ sequerentur, si quidquam ad vetus doctrinæ depositum adjungi aliquando posse credatur, quod non revelârit Deus, antequam utriusque Fœderis Libri concluderentur morte Apostolorum.

Huic tamen sententiæ, impedire quædam possunt, ne assentiamur. Nam primò constare evidentiùs deberet, ad fidem spectare, hoc est à Deo revelatum fuisse, integrum universale effatum : *Omnis homo ritè electus ab Ecclesia in Successorem Petri est verus Pontifex Romanus.* Quale certè hic legitur, extra controversiam esse non potest. Ecquando enim aut in Scripturis sacris, aut per Traditionem revelatum est, ab Ecclesia eligi, aut eligendos esse Petri Successores? Imò Electores, & plerosque istius electionis ritus, ipsi Romani Pontifices pro sua prudentia ac arbitrio, & pro temporum opportunitate statuerunt, suo jure, suâ auctoritate usi. Hisce ritibus non servatis, & desideratis conditionibus quibusdam à jure positivo præscriptis, electio interdum inanis evadit.

Secundò, constare evidentiùs deberet, quomodo in illo universali effato, quod revelâsse Deus dicitur : *Omnis homo ritè electus in Petri successorem est verus Pontifex Romanus,* possit quoque dici revelatum particulare illud : *Hic aut ille est verus Pontifex Romanus.* Nam cum ista conclusio deduci firmissimè nequeat, nisi ex alio etiam effato, quo plenus conficiatur syllogismus, nempe si dicatur : *Sed hic aut ille ritè fuit electus;* quam propositionem ad fidem pertinere nemo dicit : quomodo quod inde consequitur, pertinebit ad fidem? Certè revelatum non fuit, hunc aut illum fuisse prius Baptismo sacro regeneratum, sacrisque Ordinibus ritè initiatum, & sinè vi, sinè pretio, sinè iniqua electorum conspiratione electum.

Tertiò, ostendendum foret apertiùs, quomodo nova aliqua dogmatum revelatio non admittatur, si credenda est tanquam à Deo revelata ista propositio : *Hic aut ille est verus Pontifex.* Etenim duplex tantùm revelatio excogitari potest, altera, quæ respicit æternas veritates, & facta Dei & hominum jam consummata, priusquam Apostoli decederent; altera respiciens facta quædam in Ecclesia Dei consummanda, quæ sinè dubio prædici à Spiritu sancto potuere. Ad priorem revelationis speciem nullatenus referatur



ratur illud effatum. Si ad alteram, oportet, ut Spiritus sanctus prædixerit, & revelaverit, hunc virum potius quam alterum à sacris Electoribus, ritè, & sinè errore, sinè vitio aliquo esse eligendum; & tunc ex revelatione constabit, hunc, & non alium virum, esse verum Pontificem Romanum. Cùm autem constet, Spiritum Sanctum neque revelasse olim prophetice, neque nunc revelatione peculiari aperire, hunc potius, quam alium in successorem Petri fuisse electum, aut eligendum: idcirco neque immediate revelata videtur enuntiatio illa (*Hic homo est verus Pontifex Romanus,*) neque ut certa per fidei divinæ assensum immediate credenda. Ad hæc si ideo ad fidem immediate spectat istud effatum, quia revelatum fuit in universali effato: in immensum abibit eorum numerus, quæ in posterum immediate pertinere ad fidem credenda erunt. Cur enim non revelatum quoque dicendum erit, hunc illumve Sanctum Virum Canoni Beatorum adscriptum, reverà in cœlis regnare? cur non & Archiepiscopum Parisiensem esse verum Episcopum? cur non & singulas hostias populorum adorationi propositas continere verum Christi Corpus? cur non & huic vel illi Regi legitime electo parendum à subjectis populis? Et innumera alia. Certè huiusmodi effata aliquo universali effato, quod Deus revelavit, & facto moraliter evidenti innituntur, sicuti nullo negotio quisque intelligat; certè & ex his multa credenda sunt populis, ne debita officia negent, & ne graviter peccent. Attamen quis hæc & alia ejusmodi immediate per fidem credenda pronuntiet, quamvis universali effato, quo innituntur, sit immediate supranaturalis assensus adjungendus? Hæc igitur cùm necessariò consequantur, & pendeant à facto, cujus veritatem à cœlo nequaquam edocemur, ne ipsa quidem tam certa reputanda videntur, quam certa nobis futura sunt Evangelica dogmata.

Præterea celebre est facinus Stephani VII Romani Pontificis, qui Formosum legitimum Romanæ Ecclesiæ Præsulem, ab universa Ecclesia susceptum, (eius cadavere ignominia & flagris affecto) è cathalogo Romanorum Antistitum expunxit; iterumque Ordinibus sacris, ut initiarentur ab eodem initiati, præcepit: eaque omnia solemnibus Romanæ Synodi votis firmavit. Nemo autem est, qui hîc non legat, falsi arcessitam, & inanem pronuntiatam à Stephano propositionem illam: *Formosus est, aut fuit verus Romanus Pontifex.* Ergo Stephanus aut à fide excidit, & Hæresim è Cathedra proposuit, aut ad fidem immediate illa

illa enuntiatio non pertinebat Primùm nemo veritatis amans, & Pontificiæ dignitatis studiosus dixerit; etenim Stephanus nefario quidem & inaudito sacrilegio Petri Sedem deturpavit, sed *in quaestione facti, non Juris, & malo exemplo non falsâ doctrinâ*, erravit, sicuti ait magnus Cardinalis Bellarminus. Restat igitur, ut à fidei dogmatis illud effatum excludatur, & excludendum quoque sit in posterum. Utcumque tamen capiatur Stephani exemplum, illud certum est, ab aliis Romanis Pontificibus, & ab ipsa Ecclesia, neminem hucusque tanquam Hæreticum fuisse damnatum hac una de causa, quod credere nollit, aut negare auderet verum Romanum Pontificem hominem quempiam in successorem Petri edictum. Id cernere est in tot Schismatum Historia, quibus afflicta fuit Ecclesia & Cathedra Romana. Quæ autem, quæso, esse causa potuit, cur nunquam ad fidem pertinere hujusmodi crimen, siue errorem, nemo statuerit, & nemo Hæreticis idcirco ob hoc unum fuerit accensus, cum tamen ea controversia tot motus animorum exciverit, & toties versata sit in ore & judiciis, tum universæ Ecclesiæ, tum Romanorum Pontificum; & qui negat aliquem ritè electum in Successorem Petri, ipsum quoque neget esse verum Romanum Pontificem? Non alia utique videtur ratio fuisse, quàm quod ista quæstio ad factum pertinere crederetur, non autem ad dogma, & immediatè ad fidem referri non posse.

Si dicas, ab hac censura ideo solum temperatum, quod ritè electus nondum ab Ecclesia universa ut talis receptus fuisset: nobis persuadere non facilè id possis, qui novimus tot aliis diris exceptos, tot pœnis damnatos à Pontificibus Maximis Canonicè electis, negantes impugnantésve legitimam eorum electionem. Ut autem aliis & rationibus & exemplis hac in re parcam, sufficere videtur Pauli IV. Pontificis Maximi sententia: *Si ullo unquam tempore apparuerit, (edicit ille Bullâ XIX. in Bullar. Rom. & hæc priora verba accuratè notanda) aliquem ante ejus in Romanum Pontificem assumptionem à Fide Catholica deviâsse, aut in aliquam hæresim incidisse, &c. Promotio seu assumptio de eo etiam in concordia & unanimi omnium Cardinalium assensu facta, nulla, irrita, & inanis existat, nec per ipsius Romani Pontificis inthronizationem, aut adorationem, seu ei præstitam ab omnibus obedientiam, & cujusvis temporis in præmissis cursum, convaluisse dici, aut convallescere possit.* Igitur fieri potest, ut quispiam non esse verus Pontifex aliquando appareat, licet Petri Sedem impleverit, sibi que omnes habuerit obediētes, dum olim Hæ-

res additus fuisse deprehendatur. Igitur supranaturalis fidei assensus exigi non potest, quo aliquis credatur verus Romanus Pontifex, etiam si ab Ecclesia universa receptus fuerit, quando Ecclesiam ipsam ab omni errore immunem in hoc negotio nequaquam arbitratur ipsemet Paulus IV. Atque in ista eadem sententia fuere antiquiores Theologi, quanquam obiter in ea versati. Progrediamur.

Sed qui certa per fidem credenda erunt Romanorum Pontificum decreta ad dogma pertinentia? qui non liceat eorum sententias contemnere, eorum electionem pro lubito revocare in dubium? qui evitari poterunt sexcenta alia incommoda, si certum aliquem hominem verum Petri successorem credere nunquam jubeamur? Et hæc quidem, fateor, in causa fuere, cur proximè præterito sæculo Scholastici quidam Theologi efflagitare cœperint immediatum divinæ fidei assensum in ista quæstione, repudiata opinione minus recentium. Nisi ita crederetur, visa est ipsis nutare Ecclesia, & doctrina Catholica, quod tamen antiquiores non extimescebant. Verùm nihil fortasse hinc sibi atq; Ecclesiæ timere debuerunt ingenia pusilla, nihilque hinc sibi ingenia temeraria blandiri. Quanquam enim immediate ad fidem ista referenda non sint, ea tamen credenda esse dicimus vera ac certa, & stare nihilominus potest dogmatum & decretorum robur, & nihil in legitimos Pontifices audere licet.

Quod ut liqueat, statuimus primò tanquam evidens, Deum revelasse olim, præter facta & dogmata quædam particularia, universales etiam quasdam regulas atq; sententias, quibus Ecclesia, & singuli homines in posterum regerentur, tum ut credenda crederent, tum ut facienda facerent, & non facienda vitarent. Universales autem illæ Regulæ atq; Sententiæ à Deo revelatæ, ut usu valeant, applicandæ sunt factis quibusdam particularibus non revelatis, idque fit aut à Romanis Pontificibus, aut à Conciliis, aut ab hominibus singulis. Applicationem faciendam tum novimus, cum evidentia aut naturalis aut moralis nos movet; istaq; evidentia sufficiens causa est, ut meritò aliquid agamus sive credamus, imò ita credere, aut agere sæpè cogit, ut secus facientes non terrenis tantummodo poenis, sed etiam æternis sint castigandi. Fides docet ac jubet, colendos esse parentes ac Reges legitimos; at simul non docet, hunc vel illum hominem esse certum parentem, & legitimum Regem nostrum. Attamen quia ex evidentia morali cognoscimus, qui sint isti parentes, & Reges, hujusmodi particulari facto applicare cœgimur universale fidei decretum, & hunc

hunc illūve hominem colere. Non colentes, cū in terris, tum post mortem, iusta pœna manebit. Ad fidem ergo immediatē pertinere non potest hæc enuntiatio: *Iste, vel ille mihi colendus est ut Pater, ut Rex.* Sed num obsequium iis negare idcirco liceat? Apage. Evidentia moralis ita me de peculiari hoc facto certiore facit, ut sinē gravi culpa atque ignominia debitam illi subtrahere reverentiam non possim, etiamsi revelatio divina de huiusmodi facto desideretur.

Ita & Episcopis nostris, & præcipuē Successoribus Petri, secundū divina mandata à Christiano grege parendum est, iisque, & potissimū congregatis in aliquo legitimo Universalī Concilio, aut Romano Pontifici aliquod decernenti dogma, cui assentitur Ecclesia universa, credendum est, divinæque fidei assensus huic dogmati accommodandus, prout sanctissimæ Legis instituta præcipiunt. Nam & si revelatum à Deo mihi non fuerit, hunc vel illum esse legitime electum, verūque esse Pastorem, aut omnes in hoc illōve Concilio congregatos, veros esse Pastores: negare tamen non possum, præeunte evidentia morali, & fidem de ista evidentia nobis faciente suo assensu ipsamet Ecclesiā, & populi multitudinem, quin ii sint legitimi Pastores Ecclesiæ Catholicæ, & quin mihi aliquid credendum in Religionis doctrina proponant. Noluit Deus, tot particularia facta prædicere, aut identidem suā revelatione aperire. Rationi, & conscientiæ nostræ usum dimisit universalium ab ipso revelatorum, quæ, cū evidentia poscit, applicaremus particularibus factis. Itaque ista facta conscientiæ nostræ satis per evidentiam nota certaq; fiunt, ut nulla sit excusatio peccati, si propterea obsequi & credere nolimus Pastoribus nostris. Alioqui, si divinam revelationem ubiq; necessariam putamus, & cū desideratur, fas est negare fidem salutaris doctrinæ, obedientiam præceptis, obsequium Majoribus: jam non Ecclesia solū, sed universi mundi Respublicæ evertentur; imò nihil credere cogemur, & peiores quàm Academici & Sceptici erimus. Nihil enim est, quod ab aliquo facto minimè revelato aliqua ex parte non pendeat, eique conjunctum non sit: idq; etiam in Religionis Catholicæ œconomia adverti potest. At propterea à credendo, atque agendo non excusantur homines.

Exempli causā neque revelatio, neq; Ecclesia certos nos faciant tot sacrarum Scripturarum editiones typis procuratas per Episcopos singulares aut Doctores orthodoxos purum putum continere verbum Dei, & omnibus carere mendis:

mensis : quæ tamen menda efficere dubium, & immutare etiam divinorum Librorum sensum possunt : Num idcirco nobis licebit fidem negare documentis inibi propositis? Nequaquam. Documenta ipsa divinæ Scripturæ immediate nobis non solent proponi à Deo, aut à Conciliis universalibus, h.e. aut à veritate ipsa, aut à veritatis custodibus falli nesciis, quos nunquam auribus nostris audivimus, sed quidem à singulis Episcopis, Parochis, aliisque hominibus errori obnoxiiis. Num satis id fuerit, ut assensum fidei supranaturalis quisquam neget doctrinæ, per hoc hominum genus propositæ, cum ipsam doctrinam immediate audire non possimus à Deo, aut à Conciliis Pastorum non errandi prærogativa donatis? Minimè sanè. Neque certum est divinæ certitudine, hunc illumve Librum esse foetus, sive SS. Patrum, sive Episcoporum, non confictos, non interpolatos : idque Ecclesia ipsa ita statuere nequit, ut ad fidem pertineat. Cum tamen ex his fontibus Traditionem Christianæ doctrinæ educi contingat, quis factum hoc uti minimè certum causari audeat, ne Traditioni ipsi, quæ inde derivatur, toto intellectus obsequio adsentiatur? Certè qui rem accuratè examinet, inveniat, non Traditionem tantum, ejusque monumenta, sed Codices etiam divinæ Scripturæ, quos nunc habemus, certissimique sumus germanos esse Prophetarum & Apostolorum Libros, à serie factorum quorundam pendere, quæ nobis per divinam fidem certa non sunt. Præterea nunquam ad fidem spectare poterit, Episcopos, è quibus generale Concilium conflatum fuit, sacro Baptismate, sacris Ordinibus ritè fuisse initiatos, & corde hæresim non confovisse. Quis nihilominus eum ferat, qui Nicæni aut Tridentini Concilii decretis morem gerere, & supranaturalem fidem eorum Canonibus accommodare nolit, adeò levi in medium excusatione prolata? Aliud id genus persequi non lubet.

Si ergo ista facta non revelata minimè impediunt, aut impedire possunt, quominus Christianæ doctrinæ, Conciliis, & Traditioni firmissimum fidei assensum demus : cur necesse putabimus ad fidem referre enuntiationem illam : *hic aut ille est verus Romanus Pontifex*, quasi liceat obedientiam Romanis Pontificibus, & obsequium negare definitionibus de dogmate ab Ecclesia universa recepris, si ad fidem immediate non spectet ejusmodi effatum? At, inquam ii, qui aliter sentiunt, quomodo divinitus certissima sint, ut non paucorum sententia habet, decreta Rom. Pontificis, nisi divinitus quoque pro certissimo credendum sit, hunc

illumve esse verum Romanum Pontificem ? Quomodo (nos quoque reponere possumus) per divinam fidem credendum est, hunc aut illum esse verum Pontificem Maximum, nisi per eandem fidem credatur, hunc aut illum fuisse rite electum in successorem Petri, & Baptismate, & sacris Ordinibus rite olim donatum, & nunquam cum Hæreticis sensisse; aut etiam post maximum munus adeptum in hæresim non declinasse, quod fieri posse similiter plerique affirmant? Sed his prætermis, hoc sibi responsum habeant. Necesse est, dogmata fidei certissima credere, atque obtemperare Maximis Pontificibus, quanquã eodem assensu non sit necesse eos credere veros Pontifices Maximos, & certa credere tot alia facta, de quibus nuper egimus. Ut enim dogmata per fidem amplectamur, certaque credamus, sufficit, ut facta illa, & legitima electio Romani Pontificis, nobis per moralem evidentiam innotescant. Conficitur autem argumentum istud *Quidquid à Deo revelatum est, verum certumque est; & quidquid per evidentiam nobis constat ab Ecclesia & à Romano Pontifice cum Ecclesia receptum aut statutum fuisse tanquam revelatum à Deo, certum quoque nobis per fidem divinam futurum est. Sed per evidentiam nobis constat, Ecclesiam, & Romanum Pontificem cum Ecclesia, hoc vel illud dogma recepisse, sive statuisse tanquam revelatum à Deo: Ergo id certum nobis esse debet per divinam fidem.* Et revera cum jubeamur à Deo credere Christianam Doctrinam, quæ ab ipso revelata, & ab Ecclesia & à Romanis Pontificibus simul cum Ecclesia asserta fuit: cur post tantam assertionis hujusmodi evidentiam ea dogmata credere nolimus? cur adhuc dubitare velimus? cur salutem nostram in periculum adducere non credendo? Sibi neget, si potest, conscientia nostra, Ecclesiam, aut Romanum Pontificem ista recepisse, aut decrevisse. Neget, hunc esse verum Pontificem Romanum, rite electum, rite ablutum baptismatis lavacro, nunquam hæresi addictum; hos vel illos Libros esse germanos sanctorum Patrum fœtus; hoc illudve Concilium è Catholicis Episcopis legitime coactum. Hæc adeo evidenter constant, (quamvis per revelationem divinam non constant) ut jure nemo negare velit ac possit. Et qui ista negare, aut in dubium revocare licitum sibi putat, non est cur negare etiam non possit ac velit plerique alia certissima & evidentia in hoc hominum rerumque temporario statu: quod tamen quantum à recta ratione legibusque divinis atque humanis abhorreat, non est meum ostendere hominibus ratione utentibus. Regitur hominum

vita variis evidentia generibus. Qui eis adversatur, aut demens est, aut temerarius, & poena dignus, si in re coeuriat, quæ in publicum malum, aut in Religionis, suæve privatæ salutis perniciem vergat. Hinc abjiciendæ cavillationes, & diverticula, dolo malo, & sine ratione quæsitæ. Credendum, faciendum, fugiendum est, quod Delis per Ecclesiam nos credere, facere, ac fugere docet, si nobis cordi est æterna vita & conscientia quies.

Evidentia autem, ut dixi, alia est naturalis, alia moralis. Utrique interdum id roboris est, ut si aliquod effatum negemus, quod non ex revelatione divina, sed ex evidentia solum constet, negemus simul aliquod effatum & dogma à Deo revelatum. Posteaquam, exempli gratia, evidentia naturalis me certum fecit, hunc aut illum esse hominem: si inficiari velim, ipsum illum peccasse in Adam, non possum, quin simul negem effatum ad fidem pertinens, hoc est omnes homines in Adam peccasse. Aut ergo me delirum, aut impium prodam, si hoc affirmare, illud negare pergam. Hoc patere potest in aliis sexcentis exemplis, tum quod est ad licitè agendum, tum quod est ad necessariò credendum. Igitur qui has evidentes enuntiationes negare audeat, etiamsi non immediate, mediate tamen fidei dogmata lædit, ac illud præsentim, quod Christus peculiari providentiâ suam regit Ecclesiam eique non deest in necessariis.

Quod saltem esse extra omnem dubitationis aleam, mecum omnes censeant, illud est: Si quis Romanum Pontificem pacifice electum, pacifice regnantem, & ab universa Ecclesia receptum, non credat verum Romanum Pontificem, eique idcirco obsequi & obtemperare nolit iusta præcipienti, hac una excusatione fretus, quod non sit certum, ut aiunt, de fide, illum esse verum Romanæ Ecclesiæ Antistitem: homo tam temerarius utpote gravi crimine obstrictus meritò coercendus erit severissimis poenis, & communione Ecclesiastica privandus. Eadem dicas de legitime habito Concilio. Etenim, quamvis fidei assensu immediate credere legitimum hoc esse Concilium, nullo Ecclesiæ decreto cogamur: cogimur tamen propter manifestas fidei regulas Concilio generali ab Ecclesia recepto morem gerere, & fide divinâ credere dogmata ab eo definita, cum evidentia simul ita agendum præscribat, & satis conscientiam nostram ab errore tueatur, & ad credendum impellat. Hinc iustis castigationibus repressi olim Theologastri quidam fuere, qui, cum ab Apostolica Sede damna-

tum iri præsentirent nonnullas suas absconas à doctrina Christi sententias, sperârunt aut Romano Pontifici terrorem se incussuros, aut frustraturos damnationem, si hanc Thesim evulgarent ac propagarent: *Non est certum de fide, hunc numero Papam esse verum Pontificem Romanum.* Ridentum planè, & perquam temerarium consilium, quo Schismati præludatur, & omnia Ecclesiæ tribunalia eludantur; quasi aliunde evidenter non constet, qui sint veri Pontifices Rom. & quasi fatendum ipsis quoque non fuisset, hanc unam sufficere evidentiâ, ut Romani Pontificis, & Conciliorum decretis atque auctoritati parere deberent, si Catholici esse ac dici vellent.

Alia sunt facta, quæ in Ecclesia Dei constituta fuere tanquam certa, & constitui adhuc possunt, quibus etsi adiungendus non est supranaturalis fidei assensus (non enim illa referre inter dogmata licet,) nefas tamen sit non amplecti, & non credere vera; & qui credere sive amplecti recuset, Hæretici cordis suspicionem non levem contra se excitabit, aut saltem severitate legum ad meliorem sententiam pertrahendus erit. Hujusmodi sunt ea omnia, è quibus dogmatum unitas, & conservatio pendere videtur. Exempli causâ, nunquam Ecclesia constituere poterit, tanquam fidei dogma, hos illôsve Libros Hieronymo, Augustino, Chrysostomo, aliisque Patribus esse adscribendos. Id nos tamen novimus & credimus evidentiâ edocti, quæ & Aristoteli, & Ciceroni, & Virgilio, aliisque, Libro tribuendos esse edicit. Sublatâ hac evidentiâ, nefas non est de germanis hujusmodi Librorum auctoribus dubitare. At qui contra evidentiâ fidemque antiquitatis Libros à Patribus conscriptos suscipere & deosculari nollit, compellendus foret, pœnis etiam gravibus, ad opinionem hanc exuendam. Si siquidem Libri divinæ atque Ecclesiasticæ Traditionis promptuaria sunt, eorûmque veritas & conservatio mirum in modum conducit, Evangelicæ doctrinæ conservandæ atque explicandæ.

Similiter nunquam certissimum de fide, ut ajunt, erit privato cuicumque homini, se absque omni prorsus erroris periculo intelligere verba Librôsque Conciliorum & Sanctorum Patrum. Attamen, ubi is evidenter cognoscat, se eorum sensa intellexisse, quousque aliter ab Ecclesia non edoceatur, certam credere debet doctrinam, quam in iis verbis & Libris communi & constanti calculo assertam contineri cognovit. Tandem inter fidei dogmata nunquam referre licebit, hunc illûmve hominem Hæreticum esse



esse aut fuisse, puta Arium, Lutherum, Calvinum. Nemo tamen inter Catholicos ita insanit, ut id genus homines, Libris suis, & Ecclesiæ totius consensione damnatos, negare velit, aut credere nolit à fide vera devios, quod sibi per divinam revelationem non constet, eos Catholicæ doctrinæ reverà fuisse adversatos. Id aliunde apertissimè constat, hoc est ex ipsa rerum evidentia. Hujusmodi autem facta ad iudicium spectant Ecclesiæ, Maximorumque Pontificum, & aliorum etiam Episcoporum, nullumque dubium est, quin iis judicantibus reverentia maxima debeatur. Reverentia, inquam, maxima. & assensus humilis, non autem divina fides. Nam & ista iudicia nihil aliud respiciunt, quàm facta à Deo minimè revelata; quare neque per se immutabilia sunt, neque ab omni prorsus erroris periculo immunia.

## CAPUT XIX.

*In Iudiciis Ecclesiasticis tria consideranda, nempe doctrina, persona seu intentio docentis, & voces, seu phrasæ, quibus doctrina exprimitur. In doctrina damnanda sive probanda, est ab errore immunis Ecclesia; non autem in iudiciis de persona. An iudicia Ecclesiastica de vocibus & sensibus supernaturalem fidem postulent. Tum solum postulare videntur, cum ad fidei doctrinam aut statuendam aut defendendam necessarius est in Ecclesia Spiritus sancti afflatus, & cum de Traditione colligenda è Patribus, & de sensibus Canonum, & de versionibus sacra Scriptura agitur.*

**N**E tamen in iudiciis Ecclesiasticis, de quibus nuper facta est mentio, suscipiendis atque pensandis fallamur; utilissimum puto animadvertere, distinguenda ibi semper tria esse, nempe doctrinam, personam docentis, & voces seu verba, quibus doctrina exprimitur. Sub nomine doctrinæ venit id, quod significatur quibusdam vocibus, verbis, ac phrasibus, istaque doctrina iudicari potest sana aut perversa ab Ecclesiasticis iudicibus. Quod cum Ecclesia facit, certum est errorem intercedere non posse, tum quia fieri non potest, ut Ecclesia Dei in dogmate fallatur, & Christi pro-

nulla irrita efficiatur; tum quia sententiam de re profert, quæ à Deo ipso dicitur sive in sacris Literis, sive per antiquissimam Traditionem. Ideo immutabilia sunt ex institutione Christi, & ex natura sui, quod est ad hanc partem, Ecclesiæ iudicia, meritoque à Catholico grege supernaturalis fidei assensum exigunt.

Persona docentis tum judicari dicitur, cum iudicium fertur de mente animoque illius, qui doctrinam quampiam tradidit. Sacrorum iudicium & hic habent locum iura, non ita tamen ut eorum sententia (quod est ad hanc partem) nulli mutationi, nulli errori obnoxia sit. Humano more, humanis legibus, atque successu ista peraguntur. Ut enim vetus habet regula, Ecclesia non iudicat de internis. E solis autem externis, quantum fieri potest, interna iudicantur. Fieri igitur potest, ut qui prava scripsit, aut pronuntiavit, rectè animo senserit; nam & qui rectè sentiunt, non rectè semper loquuntur, aut disputant, & cor interdum aliud credit, cum os ex simulatione aliud pronuntiat, sicuti & qui à veritate aberrant, sæpè errorem suum verborum ambiguitate obtegere solent. Præterea multi ex infirmitate intellectus in errores labuntur, non ex pertinacia voluntatis; & cum errore suo conjunctam habent debitam erga Ecclesiæ iudicia reverentiam, prompti abjurare quidquid noverint ab Ecclesia damnatum, & amplecti quidquid illa constituat. Hi sanè inter certissimos Hæreticos non sunt computandi, quanquam eos uti Hæreticos Ecclesia de externis iudicans ritè damnaverit. Quæ autem plena firmitas esse in hoc genere potest Ecclesiasticis iudiciis, dum occultam feriunt mutabilemque hominum voluntatem ac mentem, & dum interdum è vivis sublato anathemate & diris feriunt, nullam suæ mentis rationem reddituros? Neque verò quidquam probri aut periculi in Ecclesiam venit, si hic erretur. Ad doctrinam Christi, in qua certè statuenda errare nequit Ecclesia, non spectant huiusmodi facta, hoc est, hunc aut illum auctorem privatum ejus erroris esse reum, de quo accusatur aut rectè scripsisse, cum secus animo sentiret. Sive hoc ille senserit, quod illi Ecclesia tribuit, sive non senserit, stat semper Catholica doctrina, errorisque in illo homine confixi nunquam desinunt esse errores, quanquam ab iis fortasse abfuerit ille, quem Ecclesia damnavit.

Nil igitur mirum, si uti quibusdam exemplis suprà ostendimus, huiusmodi iudicia iterum institui, & retractari & mutari Ecclesia patiatur. Imò cuicumque modestè curanti,

ranti, ut auctorem quempiam damnatum ab erroribus purget, succensere Ecclesia minimè consuevit; cum suæ esse pietatis ducat, omnibus filiis suis quocumque tempore locum vindicandæ innocentiae relinquere, dummodo scandala evitentur, & qui patroni munere funguntur, non sententias auctoribus iributas, & ab Ecclesia proscriptas, tueri, sed auctores tantummodo ab erroribus, quibus inquinati credebantur, liberare contendant. Sic Origenem, Theodoretum, Abailardum, Gothescalcum, Abbatem Joachimum, aliosque, in ipsis etiam Generalibus Conciliis damnatos, sacrilegium non fuit pro viribus tueri. Atque utinam nullum verè Hæreticum unquam habuissimus. Quosdam contrà aut absolutos, aut innocentes proclamatos, re melius compertâ, novis percutere censuris in more fuit. Illustria sunt, & hùc revocari jure possunt Innocentii III. verba in Cap. à nobis de sententia Excommunic. *Judicium Dei veritati, qua non fallit, nec fallitur, semper innititur; judicium autem Ecclesia nonnunquam opinionem sequitur,* (in definitionibus nempe factorum, nam quæ ad dogma & fidem spectant, veritate divinâ jam revelatâ innituntur,) *quam & fallere sæpè contingit & falli. Propter quod contingit interdum, ut qui ligatus est apud Deum, apud Ecclesiam sit solutus; & qui liber est apud Deum, Ecclesiasticâ sit sententiâ innodatus.* Attamen quamdiu error manifestè in sententiis Judicum non appareat, & quamdiu non constet Judices fuisse deceptos: Ratio poscit, ut inviolata sint & veneranda vel hujusmodi judicia. Quisquis levi de causa & futili aliquâ suspicione ductus ea amplecti nolit, Ecclesiæ, Romanorumque Pontificum auctoritati sanctissimæ obstitit, & gravi ac justâ castigatione plectendum se præbet. Sunt & ex his definitionibus, quæ immutabiles, certæque evaserunt, non quidem propriè ex Ecclesiæ auctoritate, sed ob nimiam rerum evidentiam, publicamque Hæreticorum pertinaciam, qualem qui in Joanne Hus, Hieronymo Pragenfi, Luthero, Calvino, aliisque ejusmodi Ecclesiæ Catholicæ hostibus non videt, mente oculisque cœcuriat, necesse est.

Ad voces venio, verba, phrasas, formasque dicendi, quibus uti solent homines ad explicandam doctrinam suam, eamque transferendam de sua in aliorum mentem. Et istas omnino necessarium videtur à doctrina distinguere; nam aut pravo consilio, aut ex ignoratâ possunt homines sub orthodoxis locutionibus perversas celare sententias, & rursus orthodoxas hæreticis vocib. cōvestire. Cognoscere

autem, & judicare, quid sonent voces phrasæ, formæ-  
quæ dicendi, est cognoscere, quis earum sit significatus,  
& sensus: qui itidem sensus, cum sententiam doctrinæ  
namve continere & significare possit aut orthodoxam aut  
hæreticam, pius propterea & sanus, aut impius & pravus  
sit appareatque ipse quoque, necesse est, nihil consideratâ  
Scriptoris mente. Quærimus igitur, an Ecclesia decernens,  
qualis sit, & utrùm Catholicus, an Hæreticus alicujus Li-  
bri non divini, sive alicujus dicti, ac propositionis sensus,  
falli unquam possit, & sitne illius judicio hîc adjungenda  
supranaturalis fides.

Et quidem gravissimæ rationes occurrunt, quæ hîc eti-  
am divinæ Christi Sponsæ immunitatem ab errore erro-  
risve periculo tribuendam esse admoneant. Illud enim  
primò constat, Ecclesiæ Pastores, non ex arbitratu cerebrò-  
que suo, neque divinando (quod in physicis ac profanis  
Historiis fieri interdum solet), sed ex Traditione majorum  
de Scripturarum sensu judicare debere, & Christi doctrinam  
exponere, atque adedò controversias in dogmate esse  
dirimendas secundum ea, quæ jam à Pontificibus Maxi-  
mis, Conciliis, & sanctis Patribus hucusq; accepimus. Quæ  
res quanquam confirmatione non egeat, nobis tamen est  
Vincentii Lirinensis viri gravissimi auctoritate confirmân-  
dâ Catholicorum hoc proprium, inquit ille, *deposita sanctorum  
Patrum & commissa servare, dum narèque profanas novitates.*  
*Id enim in Concilio Ephesino omnium Patrum una fuit vox, ut*  
*quod erat antiquitus traditum, teneretur; quod adinventum*  
*nuper, exploderetur* Superiùs verò Apostoli vocem interpre-  
tans, dixerat: *Deposìtum, id est; quod tibi creditum est, non*  
*quod à te inventum; quod accepisti, non quod excogitasti; rem*  
*non ingenio, sed doctrina; non privata usurpationis sed tradi-*  
*tionis publicæ; rem ad te perductam, non à te perlatam; in qua*  
*non doctus esse debes, sed custos; non institutor, sed sectator, non*  
*ducens, sed sequens, &c.* Unde autem colligi potest ve-  
tus ista neque novitia divinarum Scripturarum interpre-  
tatio, & Christianæ Doctrinæ explicatio, nisi è Concilio-  
rum, Romanorum Pontificum, sanctorumque Patrum  
monumentis ac Libris? Et rursus quî sine errore colligi  
poterunt huiusmodi interpretationes; quî novis Canonibus  
prisca stabiliri doctrina, si falli Ecclesia potest in asse-  
quendo sensu Canonum antiquorum, Librorumq; à Pa-  
tribus lucublatorum, quî certa erit doctrina, si sensum  
verborum, sub quibus doctrina latet, sine errandi periculo  
Ecclesia nequit educere? Immo necesse videtur, non  
solum

solum Librorum & Canonum sensum, sed mentem quoque & internum Sanctorum Patrum Consilium in iis vocibus ac phrasis usurpandis, Ecclesia cognoscat atque intelligat. Nam etsi ab errore abessent Ecclesiastici Judices in intelligendo sensu verborum, adhuc dubitandum restaret, num reverà id sancti Patres exprimere voluerint, quod eorum voces ac verba sonant, cum fieri possit, ut quæ homines animo sentiunt, & per verba apta prodidisse sibi videntur, aliter sonent, ac ipsi velint, aut aliter à lectoribus intelligantur. Ad hæc, nisi certissimum sit Ecclesiæ judicium, dum de verborum sensu judicat, quomodo profanas vocum novitates tutò declinabit? Neque firmo decreto comprobare ipsa potuisset vulgatam, seu Latinam, exempli gratiâ, sacrarum Scripturarum Translationem, & palam edicere, nihil inibi contineri, quod Verbo Dei adversetur, nihil, quod Græco aut Hebræo Archetypo non respondeat. Alia incommoda omitto, aut nunquam, aut vix evitanda, ubi dicamus, intercedere posse errorem in Ecclesiasticis judiciis de sensu Librorum, vocum, & phrasium.

Verum suis quoque iisq; molestissimis difficultatibus ejusmodi sententia laborat, affirmans, nulli errori obnoxiam Ecclesiam, de alienorum Librorum sensibus judicantem. Nam hujusmodi judicia feruntur in facta quædam non revelata, in quibus nulla ab errore immunitas Ecclesiæ Dei promissa fuit. Et ipsam quidem Ecclesiam novimus divinarum Scripturarum interpretem, falli nesciam, à Deo constitutam; reliquorum autem Librorum interpretem pariter certissimam non novimus. Neque porro ipsamet consuevit divinum assensum hujusmodi judiciis vindicare. Quanquam Honorii I. Romani Pontificis Literæ in Oecumenica Synodo VI. tanquam hæresicis sententiis scaten-tes proscriptæ fuerint, non defuere tamen Catholici subinde viri, qui Literas illas ab hujusmodi nota liberare, & Orthodoxas ostendere non dubitârunt. Ista de causa nemo hucusque succensuit, aut diem dixit præstantissimis Scriptoribus Baronio & Bellarmino Honorii Patronis. Nostris autem temporibus quanquam tot animorum seditiones excitârunt quinque Propositionum damnatio *in sensu à Jansenio intento*, & postrema hanc in rem habeamus Clementis XI. Pontificis Maximi oracula, nondum tamen sancitum apertè fuit, spectare ad fidem (quod est ad Jansenii sensum) Romanæ Sedis seu Ecclesiæ totius alioqui venerandam sententiam.

Equidem in hoc arduo negotio, uti & in aliis ejusmodi, illud in primis cavendum reor, ne miracula sine necessitate multiplicentur, h. e. ut tum solum in Ecclesia mirabilem divinumque afflatum, & supranaturalem opem admittamus, cum vera necessitas id poscit ad tutelam Catholicæ Doctrinæ, & ad avertendam Religionis perniciem in proponendis dogmatis, & profligandis erroribus. Si ea necessitas ablit, non video, cur sponte velimus excogitare miracula in iis casibus, in quibus se extraordinario auxilio adfuturum esse non est pollicitus divinus Spiritus. Deinde cavendum, ne defensione nostrâ Ecclesiæ ex se fortissimæ noceamus: quod tum fieri posset, si illa ei privilegia tanquam necessaria tribueremus, quæ postea casus aliquis ei defuisse ostenderet: quâ opinione nostrâ Ecclesiam ipsam ludibrio ac telis inimicorum improvidè atque incautè exponeremus. Quamobrem videndum est, an reverà necessum sit, ut Ecclesia Dei, sicuti in dogmatibus proponendis, & in sacris Scripturis interpretandis, ita & in Librorum non hagiographorum sensu assequendo sit ab omni errandi periculo divinitus secura. Quid hac in re mihi probabile videatur, afferam, humillimum semper erga sententiam meliorem obsequium præfatus.

Et primò, Ecclesiam, interpretantem verba & sensum Canonum, Librorumq; à sanctis Patribus conscriptorum, ut sanam inde Christi doctrinam hauriat, distinguere juvat ab eadem Ecclesia interpretante sensa & verba privatorum hominum, ut ea vel absolvat, vel damnet. Secundò, duæ conditiones considerandæ sunt in Oeconomia Christianæ Doctrinæ, quarum altera ad Ecclesiæ Procere pertinet, altera ad Christi fideles, utraque necessaria; illa, ut Pastores rectè proponant; ista, ut populi rectè credant, & credere debeant dogmata proposita. Prima conditio est, ut tunc solum se servandos ab omni erroris periculo immunes Ecclesiæ Pastores in proponenda cœlesti doctrina sperare & credere possint, cum debitam fidem & diligentiam ipsi adhibebunt in colligenda ipsa doctrina è sacris Scripturis, Conciliis, Patribus, aliisque Traditionis Ecclesiasticæ monumentis. Quæ Concilia huic muneri ac debito defuere, quanquam initio congregata fuerint optimis auspiciis, Conciliabula evasere, ut de Synodis Ariminensi, Ephesinâ Latrocinii, aliisque exploratum habemus. Quapropter tum Episcopi in Conciliis, tum Pontifices Maximi judicaturi, cum lis est de dogmate, non pro suo quique ingenio, suisve affectibus, sententiam ferre debent,

sed qualem Traditio diligenter explorata suppeditat. Tum verò diligenter explorata Traditio dicitur, cum ex Patrum, Theologorum, & Conciliorum documentis, Episcopi evidenter intelligunt, an doctrina quæpiam tradita, an potius improbata à Majoribus nostris fuerit. Qua in re evidentiâ moralis & requiritur, & sufficit, qualem prudentes viri in aliis humanæ vitæ gravissimis negotiis sequuntur, ut aliquid prudentissimè credant, aut non credant. Ubi præcessit isthæc evidentiâ, neque vis, aut pravi affectus intercessere, ad sententiam Ecclesiasticam certus est gressus; eaque doctrina, quæ tum proponitur, divino assensu à singulis Christi fidelibus credenda est vera, atque germana cœli doctrina. Impletâ enim conditione, quæ ex parte Pastorum exigebatur, sua quoque promissa Christus implet, & adest Petri Successoribus, Conciliisque Generalibus, ne à salutari veritate aberrant.

Altera conditio, Christi fideles respiciens, ea est, ut unusquisque, statim ac sibi perspicuum atque evidens sit, ejusmodi definitionem à legitimè habitis Conciliis summisve Pontificibus idipsum cum universa Ecclesia sentientibus, vel olim, vel recenter, prodixisse, iis fidem adjungere debeat supranaturalem. Evidentiâ moralis & hic locum habet, credendique necessitatem imponit. Nam quoties aliquid à Deo revelatum fuit, idque per Ecclesiam minimè fallacem constat reverà fuisse à Deo revelatum: cur diutius suspendere velimus fidem nostram? Perspectum habemus, credenda esse quæcumque dogmata habet vera Christi Religio. Si cordi nobis est æterna salus, & grave scelus effugere animus est, iis habenda est plena fides, simul ac evidenter innotescit, eadem pro dogmatibus ab Ecclesia proponi, tergiversatione omni, cavillationibusque submotis. Eodem modo, uti diximus, etiam si ex revelatione divina notum nobis non sit, Romanos Pontifices, aut singulos Conciliorum Patres legitimè electos, baptismate sacro ablutos, ab omni hæresi alienos fuisse; aut privatos homines, Parochos, & Episcopos, à quibus *ἀπό τῶν* ea dogmata Plebi Christianæ tradi solent, aut falli aut fallere non potuisse, atque alia id genus: ab iis tamen dogmatibus credendis abstinere non licet, ubi moraliter evidens sit, à legitimis Pastoribus legitimè propositam fuisse Christi doctrinam. In reliquis humanis negotiis & credimus, & agimus; & nisi agamus, meritò interdum punimur, solâ evidentiâ morali præeunte, mentemque nostram movente: cur in omnium maximo negotio æter-

æternum increduli esse, & moras ad credendum nectere velimus? Num omnia suo ore singulis nobis è cœlo revelare debet Deus? num omnem quæstionem per miracula evidentia dirimere? Præcepit ille, ut Ecclesiam audiremus; & qui Apostolos, eorumque Successores Episcopos audit, Christum audit, ut ipse ait Lucæ X. 16. Igitur, ubi conscientia nostræ patuit, quid de Christiano Dogmate legitima Romanorum Pontificum & Conciliorum, & Patrum auctoritas decrevit, id fortiter credendum; & nolle credere, aut insani, aut hæretici hominis erit.

His positis, si petatur, an Ecclesia falsi possit in intelligendis sensibus & verbis sacrorum Canonum, & sanctorum Patrum: respondemus, ipsam falli non posse, postquâ in iis expendendis curam debitam, & sinceritatem adhibuit, & evidentiam moralem secuta est. Quam tamen immunitatem ab omni errore tum solum tribuimus, cum de colligenda Traditione cœlestium dogmatum agitur, non autem in aliis rebus & factis neutiquam revelatis. Id è Christi promissis necessariò fuit. Nam si Christus Ecclesiam suam à saluti veritate dogmatum nunquam recessuram pollicitus est, uti aperte scimus pollicitum fuisse; & insuper si Dogmatum & Scripturarum vera interpretatio atque definitio haurienda est è sanctorum Patrum, Conciliorumque præcedentium documentis, uti hauriendam esse constat, necesse est, ut Ecclesiastici iudices hujusmodi monumenta eorumque sensus intelligere sine errore possint, quoties conditionibus sibi impositis rite defuncti fuere. Nam qui doctrinam sanam ac veritatem in Ecclesia sua Christus servet, & quo pacto Pastores tutò ipsam constituent, & ab hæreticis deliramentis tueantur, si errandi periculum subsit, vel post diligens Patrum examen, & evidentiam compertam, & proscriptos seculi affectus?

Peculiare igitur sancti Spiritus auxilium necessariò adesse dicimus Ecclesiæ, dum ejus Pastores monumenta Traditionis fideliter & sedulò consulunt. At illud adesse, aut necessarium esse nequaquam dicere audemus in singulorum Patrum Libris & sensibus examinandis, atque interpretandis, vel cum Traditio inde hauritur. Spiritus sancti ope, inquam, indigent & donantur Ecclesiæ Magistri, cum collective è sanctorum Patrum Libris dogmata petunt; non autem id certum, cum singillatim de unoquoque Patre judicant, ejusque sensa exponunt. Paradoxum id videatur, nam postquam dedimus Conciliis & Ecclesiæ, tanquam necessariam immunitatem ab errore in interpretandis



tandis omnibus, aut plerisque Patribus collectivè sumptis, si rursus in intelligendis singulis falli ii possunt, errori quoque obnoxia sit eorum auctoritas oportet in interpretandis omnibus, aut plerisque Patribus; universalia enim è singularibus constant, & singularium infirmitas in universalibus quoque transit.

Attamen mirari desinent, quicumque secum animo volunt certissimum illud Catholicæ Ecclesiæ effatum: nempe singulos sanctos Patres, & singulos privatos Præsules in doctrina Christi explicanda & tradenda, firmum veritatis argumentum præstare non posse; & contrà, omnes, aut plerisque in aliquo dogmate, & in sacrarum Literarum expositione concordantes, quod est ad fidem & mores, solidissimum atque divinitus certum suppeditare veritatis argumentum. Nempe singuli, quanquam summâ veneratione digni, errare tamen potuerunt, cum peculiari Spiritus sancti inspiratione singillatim sumptus caruerit in suis conscribendis Libris, & quibusdam phrasibus ac verbis adhibendis. At omnes simul sumpti errare nequaquam potuerunt; Ecclesiam quippe ipsi illi simul constituerant, quam nunquam in errores lapsuram pollicitus est Christus. Deinde non quod aliquis Vir sanctus hoc illudve senserit, ejus sententia sufficit ad stabiliendum aliquod Christi dogma, neque uno illius dicto niti Conciliorum judicia debent; sed opus est statuere & credere, quod omnes, aut plerique Patres & rationes, & alia Traditionis legitimæ documenta ad ita credendum impellunt. Quapropter, quamvis in quibusdam Oecumenicis Conciliis, & plerumq; à dogmaticis & Polemicis Theologis, loca sanctorum Patrum afferuntur in confirmationem sacrorum dogmatum, & Ecclesiasticarum sanctionum; eorum tamen singillatim sumptorum sensus ad fidem non pertinet, neq; divino assensu credendum est, singula ea verba & phrasas eum continere sensum, quem Episcopi & Theologi intelligunt. Sed interdum eâ, quâ par est reverentiâ, aliter aliqua interpretari licet, intactâ semper veritate doctrinæ. Id inter Theologos eruditione non minùs, quàm sinceritate conspicuos fieri sinit Ecclesia. Et in Oecumenica Synodo VII. ut alias Synodos prætermittam, occurrere ex his nonnulla possunt, uti, exempli gratiâ, minus aptè adhibitus est ad firmandum Imaginum cultum S. Basilii locus, ubi ille de Filio Deo loquitur, perfectâ & integrâ Dei Patris imagine. Nam quod de rationibus jam diximus, de effatis quoq; SS. Patrum dicendum est, quibus dogmata stabiliuntur atque probantur.

Pluri-

Plurimas tum rationes , tum sacrarum Literarum & Patrum sententias, Concilia, & Rom. Pontifices semper habent, & congerunt, cum dogma quodpiam ritè decernunt. Sunt autem inter istas multæ invictæ , & ab impiis tantum aut dementibus in controversiam adducendæ ; sunt & aliæ probabiles tantum, & verisimiles, quæ tamen invicem robur sibi dant, & accipiunt ; & aliæ quoque interdum possunt animadverti, quæ nihil ad rem propositam faciant.

Ista verò omnia simul conjuncta eam dogmatis ac Traditionis moralem evidentiam præstant, quæ necessaria est, ut Ecclesiastici Judices prudenter & tutò de doctrina credenda sententiam ferant. Qua in re patet, nihil novi à Deo tunc revelari, nullumq; novum factum divinitus statui ; sed divinam opem tantummodo adesse, ut quod jam ante revelatum fuerat, tunc à Judicibus sinè errore deprehendatur, atque ut ab examine religiosè ac sapienter instituto , & ab evidentia morali , omnis umbra humanæ fallaciæ avertatur, etiamsi ad fidem singula ea facta, singulæ Patrum Interpretationes minimè spectent. Et profectò Dei providentiæ ejusque promissis . pro Ecclesiæ Catholicæ & doctrinæ veræ incolumitate jam factis , tribuendum necessario est hujusmodi patrocinium, non autem in omnibus etiam singularibus. Eodem etiam modo ad peculiarem Dei providentiam pertinet, ne omnia sacrarum scripturarum exemplaria, aut omnes sanctorum Patrum libri in mundo pereant, nè omnes Episcopi in Synodis, ne omnes sancti Patres in dogmatis exponendis errent ; non autem pertinet, ut singula etiam Scripturarum, aut Patrum exemplaria serventur, atque ut singuli Episcopi, singuli sancti Patres nunquam in doctrina fidei hallucinentur.

Ex alia autem regula, quàm antea statuimus, certum est, unumquemq; fidelium, simul ac evidenter cognovit, dogma aliquod ab omnibus, aut plerisque Patribus tradi, consentire statim, illudque amplecti debere , etiamsi nulla Ecclesiæ definitio præcefferit. Si contra conscientiam & intelligentiam suam hic ille agat, & contraria tueri velit, ac venditare incipiat, facile se præbebit, aut puniendum aut coercendum tanquam temerarium. Et nullum quidem solemniter constitutum est Ecclesiæ Catholicæ dogma ; quod evidenter antea non apparuerit in Patrum scriptis, atque in aliis Traditionis Ecclesiasticæ præcedentibus monumentis memoriæ mandatum. Id cernere est in Conciliis Ephesino, Chalcedonenfi, Constantinopolitano II. III. & IV. In Lateranensi sub Martino, in Florentino, & cæteris fere omnibus, ubi

ubi è Traditione Patrum omnia fanciuntur. Id in Epistolis Maximorum Pontificum, Cœlestini, Leonis, Gelatii, Hormisdæ, Vigili, Gregorii, Agathonis, & aliorum deinceps. Pelagianam pestem Julianus tuebatur quibusdam pessimè intellectis Patrum locis. At Augustinus à se stare, h. e. cum Ecclesia Catholica sentire antiquos Patres in lib. 1 & 2. contra ipsum Julianum accuratissimè demonstrat, & Irenæum, Cyprianum, Reticium, Olympium, Hilarium, Ambrosium, Gregorium Nazianzenum, Basilium, Chrysostomum, Hieronymum suæ sententiæ faventes adfert. Sæculis autem proximè præteritis, quibus Socinus, ejusque gregales, Mysteria vel omnium augustissima in dubium revocârunt, Arminianis subinde à tanta temeritate parum abludentibus, intentata est Nicæno Concilio, illiusque decretis de vera divinitate Verbi credenda, quasi hæc vetustioribus Patribus (si Superis placet) aut ignota, aut etiam improbata fuerit. Verùm ab hujusmodi calumniis ita nunc liberata est Nicæni Concilii fides curâ hominum eruditorum, ac præcipuè Georgii Bulli, cui licet à Catholicorum cõmuniõne alieno multum tamen laudis debetur, ut jam nemo nõ videat trium priorum sæculorum Patres atque Scriptores cum Nicænæ Synodi Patribus in ea sententia apertè consensisse. Hanc itaq; evidentiam cum omnibus receptis Ecclesiæ Catholiæ dogmatis atque definitionibus perpetuò conjunctam, hanc, inquam, Patrum Traditionem atq; concordiam facile unusquisq; per se deprehendat, si fideliter ac accuratè veterũ monumenta perpendat, idq; satis esse potest, ut sinè alio Ecclesiæ decreto iis dogmatis Christiani adjungere aut tutò possint aut debeant fidem. Sed istam Traditionem evidentiorẽ, & divinitus certam Ecclesia deinde facit, dum dogmata ipsa statuit. Neq; dubitare ampliùs licet, quin Patrum chorũ Ecclesia probè intellexerit, & sinè errore sensa illorum interpretata fuerit, quando certum est, illi divinum Spiritum non deesse, dum Traditio sincerè colligitur, & doctrina à Majoribus tradita definitur.

Ad judicia ergo de sensu Canonum quod attinet, si agatur de generalib. Conciliis, aut etiam de particularibus ab Ecclesia tota probatis: videre nescio, qui admittenda non sit (vel quando singularium Canonum interpretationes fiant) in legitimis Ecclesiasticæ doctrinæ Judiciis eo ab errore irũnitas, quæ illis certè est, dum sensus singulares Bibliorũ & collectivè sanctorum Patrum sensus exponunt in fidei & morum doctrina. Cùm singularia hæc monumenta certissimas contineant Evangelicæ veritatis sanctiones, necesse

esse est, ut ad earum sensus intelligendos opem conferat Deus ne promissa Christi frustrentur, & ne in necessariis Ecclesia deficiat. Reliquorum Conciliorum Canones singulares, quos Ecclesia ritè nondum probavit, etsi auctoritate & pondere præstare soleant singulorum Patrum scriptis, attamen non aliâ lege eorum sensa intelliguntur, atque explicantur, quàm quâ singulorum Patrum Libri. Utrobique similes rationes atque argumenta militant.

In intelligendis & comprobandis versionibus sacrarum Scripturarum necesse itidem est, ab errandi periculo libera sit Ecclesia. Ideoque Vulgatam Latinam, quam Tridentina Synodus authenticam renuntiavit, non venerari, non divinæ veritatis fidam interpretem censere, piaculum foret, non quòd singulorum verborum ac phrasium usus in ea versione probanda divinitus Ecclesiæ revelatus fuerit; sed quòd eam versionem post tot sæculorum, & Ecclesiarum, & eruditorum consensum atque consilium, evidenter Oecumenica Synodus deprehenderit iis abundare dotibus, quæ ipsam persuadeant & reliquis Latinis versionibus præstare, & fideliter reddere divinum verbum, erudiendis in doctrina sana fidelibus nec essarium. Decreto post tantam evidentiam prudenter concepto quin adfuerit ope sua divinum Numen, dubitare nos vetat non una consideratio. Et necesse sanè est, ut Latinæ Ecclesiæ sit aliqua versio, unde Pastores & populi petere veram sacrarum Literarum doctrinam possint. Nam Græcè & Hæbraicè plerique nesciunt, & porrò scire nequeunt. Quænam ergo erit unquam hæc authentica, & fida & sinè fraude ac depravatione facta versio, si eam ne post accuratissimum quidem examen Ecclesia sinè periculo errandi statuere potest? Præterea divini Verbi interpret legitima à Deo constituta fuit Ecclesia, & tot hucusque ex ipsa habemus decreta vulgatæ Versionis sensibus innixa, ad erudiendos in vera fide Catholicos. Porrò ista Ecclesiæ auctoritas, atque ejus decreta suspitione erroris laborabunt, quando certum non sit, eam à Deo regi, ità ut in assequendis versionis alicujus sensibus minimè decipiatur. Divina autem providentia cum sapientissima & potentissima sit, ubi finem aliquem voluit, opus est, ut media quoque necessaria ad eum finem consequendum suppeditaret. Parco aliis intolerandis incommodis, quæ sequerentur, si Versionum, ac præsertim Vulgatæ, sensus certò intelligere non posse Ecclesia dicatur.

Cæterum, uti dicebamus, non ità statuendum est, ut singula

gula vulgatæ Versionis verba, immo omnia ejusdem puncta, & commata, existimanda sunt divino calculo confirmata, & quoddam generali constitutione ipsam versionem Synodus Tridentina probavit: quam nonnullorum opinionem piam potius, quam prudentem & veram putamus. Nam nulla vitia in ea versione deprehendi posse, nihilque illic haberi, quod aut Græcis aut Hebræis Codicibus penitus non respondeat, qui affirmare velit, aut in hujusmodi eruditione planè sit hospes oportet, aut nimio zelo rapiatur. Hos errores, si ita appellare placet, hæc menda, & hæc qualescumque discordias à Græcis aut Hebræis Libris, immo inter ipsa exemplaria Latina, sæpè notarunt viri Literarum scientiâ præstantes, Theologi, & Catholici, & in ipsa arce Religionis Roma; neque ignorarunt ipsi Tridentini Patres. Itaque authentica in iis solùm proclamata vulgata Versio, quæ ad fidem & morum doctrinam faciunt, in quibus dignoscendis & constituendis inconcussa sunt legitima judicia Ecclesiæ & Apostolicæ Sedis. Reliqua dissimulata sunt, & eruditorum arenæ relictæ, utpote non necessaria; neque enim in sensibus, rebusque minimè necessariis statuendis divinam opem sibi tribuit Ecclesiæ. Proinde ea tantùm mens Tridentinis Patribus fuisse videtur, ut vulgata Versio sine erroribus & fidelis esse credatur in doctrinâ ad fidem & mores pertinente; & sapientissimè decretum est, eam in disputationibus, & concionibus publicis, & sacris mysteriis adhibendam esse, tutoque adhiberi posse, reliquis versionibus posthabitis, in quibus tales prærogativas non agnoscit Ecclesiæ. Verùm ne alias quidem improbayit versiones, quæ bonâ fide concinnatæ fuerint, & quantum fieri potest, veritatem originalis textus & Traditionem doctrinæ verè expriment; multoque minus Hebræos Codices, & LXX. Interpretum versionem expolit. In hanc rem præter Sixtum Senensem, Andream Vegam Melchiorem Canum, Genebrardum, Marianam, Serarium, Bonfrerium & alios, consulendus est doctissimus Cardinalis Pallavicinus Lib.

6. Cap. 17 Hist. Conc. Trid.



## CAPUT XX.

*Ecclesiastica judicia de privatorum hominum Libris , Verbis , & Sensibus ; ad fidem pertinere minimè videntur . Et tamen doctrina in iis aut probata , aut damnata , fide supranaturali credenda . Ipsa illa judicia quandonam certa quoque credenda sint , quanquam non assensu divina fidei . Quid hic Disciplina præcipiat . In Jansenii causa quid præstandum .*

**A**Tque hætenus de Ecclesia interpretante verba , phrasas , & sensum tum Canonum , tum Librorum , quos conscripsere sancti Patres , cum de Traditione colligenda , & salutaribus dogmatis sanciendo agitur . Restat , ut de sensibus Librorum aut dictorum agatur , quorum auctores fuerint privati homines , aut Hæretici , aut alii ab Ecclesia proscribendi . In his utique judiciis quantalibet evidentiæ & curâ peractis , quantumlibet suspiciendis ac venerandis , eandem ipsam peculiarem divini Spiritus opem adesse non arbitror , quam in sanciendo dogmatis Ecclesiæ tribuendam esse credo . Potissima hujus asserti ratio est , quia non omnibus suæ Sponsæ judiciis se præsto futurum Christus pollicitus est sed iis tantummodo , quibus constituenda est , explicanda , ac proponenda salutaris doctrinæ veritas , & eliminandi errores . Hujusmodi verò judicia de privatorum hominum verbis ac phrasibus non doctrinam respiciunt , sive sanam , sive hæreticam , sed solos verborum sensus suapte naturâ mutabiles , aut intelligibiles secundum arbitrium atq; opinionem mortalium . Mutabiles quidem sunt , & æquivoci interdum , tum in Patrum , tum in Conciliorum monumentis verborum sensus . At cum necesse sit , illinc petere Traditionem , veramque doctrinam , necesse quoque est , ut Deus Ecclesiæ adlit sensus illos interpretanti , eamque ab errore tueatur , quando ipsam constituit columnam & custodem veritatis . A verbis autem , & phrasibus Scriptoris alicujus , hominisve privati , neque cognitio , neque conservatio Catholicorum dogmatum perdet . Jam aliunde sancita sunt , aut sanciri debent dogmata , & secundum illa expendendi sunt eorum Librorum sensus , non autem secundum sensus eorum Librorum sunt expen-

expendenda dogmata. Hoc est: quia ope divinâ certò Ecclesia cognoscit, quid Canonum & Patrum verba sonent, doctrinam fidei ad eorum sensuum normam constituit. Ac contra ideo de Librorum privatorum sensibus Ecclesia iudicat, quia ipsos iam constitutæ doctrinæ aut adversantes aut consonos animadvertit. Igitur, etiam si Ecclesia in huiusmodi Librorum sensibus intelligendis falleretur (quod tamen accidisse, nisi evidenter contrarium pateat, nunquam à piis fidelibus putandum est,) non ideo periclitaretur doctrinæ veritas, non ideo Ecclesiæ prærogativa in dogmatis statuendis quidquam læderetur.

Ubi ergo constat (constare autem facile potest) quam doctrinam probare aut damnare velit Ecclesia, dum effatum quodpiam privati alicujus hominis probat, aut damnat: necesse est, ut integro animi & cordis assensu eam cum Ecclesia amplectamur aut abominemur doctrinam. Nulla deinde est necessitas, ut eodem etiam assensu fidei credamus effati illius verba reverà sonare & significare id, quod Ecclesia probat, aut damnat, nòsq; cum illa probamus sive damnamus. Certè non apparet, cur dicendum sit spectare ad fidem peculiare hoc factum. Non illud olim revelavit Deus, ne nunc quidem Ecclesiasticis Iudicibus opus est, ut revelet, aut saltem ut extraordinarium conferat auxilium, ne in assequendo eorum verborum sensu erretur, quando sive ea Auctoris verba id significant, sive non significant, ratum certumq; stat de doctrina Ecclesiasticum iudicium, & Christiano gregi evidenter constare potest, de qua doctrina iudicium tunc fuerit pronuntiatum. Id ex obvio verborum sensu facile agnoscitur. Si dubius & æquivocus est ille sensus, ipsum per alia verba explicare & determinare solent Ecclesiastici Iudices, ut pluribus exemplis confirmari potest; donec fidelibus evidenter innotescat, quam doctrinam aut configere, aut commendare tum velit Ecclesia. Ità in Jansenii negotio dum Rom. Cathedra, aut Ecclesia congregata explicet (si opus est, meâ tamen sententiâ non est opus) atque statuât, quem sensum, & quam doctrinam ipsa damnavit, damnatâque velit in V. Propositionibus Jansenio tributis: dogma fidei tunc in tuto erit, atque errori præcludentur viæ, neque ulla necessitas amplius erit, credendi supernaturali assensu, eandem illam damnatam doctrinam in Jansenii verbis atque intentione fuisse, cum id scire, aut credere, nescire, aut negare, merum tantummodò factum respiciat, à quo doctrinâ fidei nequaquam pendet.

Sed alia quoque suppetit ratio, quare ad fidem pertinere non possint Ecclesiastica de privatorum hominum Libris, verbis, ac sensibus judicia. Hominum verba æquivoca, ut diximus, plerumque sunt tum ex institutione popolorum, tum ex usu scriptorum, metaphoris aliisque tropis utentium. Non unus itaque, sed diversus plerumque sensus subest. Neque impedire Ecclesia potest, quominus aliena dicta æquivocationibus scateant, & æquivocos sensus pariant. Neque hoc impedire miraculorum ope Deus voluit, aut vult, cum satis ipsi sit facere, ne in interpretandis explicandisque divinis Libris, & colligenda Traditione, & proponenda vera doctrina, errare possint legitimi Ecclesiæ Catholice judices. Hinc est, quod Ecclesia ita statuere non potest, unum quempiam sensum verbis alicujus Libri, five propositionis inesse, ut alius sensus subesse non potuerit, ac possit; quanquam simul ac statuit, quodnam dogma sub iis verbis ac sensibus claudi ipsa arbitretur, ipsumque damnat; dubitandum amplius non sit, quin recte & sine errore damnatum illud dogma fuerit. Experientia ipsa his suffragatur. Certè Ecclesia enumerationes easdem secundum varios sensus acceptas, nunc adprobavit, nunc improbavit, & eadem omnino verba modò adversata est, modò amplexa, prout ipsi visa sunt signare aut pravam aut rectam doctrinam. Ita celebris illa thesis: *Christus est unus & Trinitate. five unus de Trin. tate passus est*, ab Hormisdæ Romano Pontifice aliisque Catholicis rejecta primò fuit, quod ejus sensus ad Eurychianam Hæresim accedere crederetur, & ab ipsa significari, divinam naturam humanis doloribus ac infirmitatibus fuisse obnoxiam. At subinde eandem thesim uti Catholicam recepere Joannes II. & Vigilius Romani Pontifices, atque Oecumenica Synodus V. cum nempe in Catholico sensu accepta fuit, & credita veram Ecclesiæ Catholice sententiam sonare, atque exprimere. In Synodo Antiochena vocem *Homausion* Episcopi complures proscripsere, in sensu Pauli Samosatani acceptam, Nicæni verò Patres in sensu Catholico consecrârunt. Ita & tempus fuit, quo variaz circa incarnationem sententiæ secundum varias illarum intelligentias malè aut benè sonabant, Cum Pelagii Literæ, ac Cœlestii Libellus de gratia Dei coram Zosimo & Romana Synodo lectus fuisset, *Libellus ille Catholicus dictus est*, uti scribit S. Augustinus Lib. 2. ad Bonifaciû Papam Cap. 7. ita ut Zosimus, pro fama utriusque Hæretici sollicitus, non sine aliqua indignatione ipsos purgârit apud Africanos Patres, inquiens Ep. 4. *Est-ne ullus locus, in quo Des gratia, vel adjutorium præter-*



*nissum sit* ? Verùm Palagius nomine gratiæ non peculiare Dei donum animæ infusum, sed legem, doctrinam, exempla Christi, aliâq; externa adminicula intelligebas. De hoc sensu monitus Zosimus ab Africanis Patribus, ad probatos antè libros, eorûmq; Auctores anathemate ferit, ab Ecclesia ejecit. Multus sim, si alia in hanc rem exempla congerere velim quibus videas, in assequendis privatorum Librorum, verborûmq; sensibus tam certa non esse Ecclesiæ judicia, ut divinam fidem exigant, cùm tamen in eisdẽ semper sit divinitus certissimum de doctrina iudicium.

At inquit aliquis: Ergo, si erroribus obnoxia est Ecclesia in damnandis privatorum Librorum sensibus, nullam huiusmodi iudiciis fidem habere debemus. Ergo liberũ erit unicuique, aliter eosdem Libros, & privatorum hominum dicta ac verba non secundum Ecclesiæ interpretationem, sed pro intelligentia sua, explicare, adeo ut superflua quoque dici possint huiusmodi decreta. Ergo frustra tot ictibus Apostolica Sedes percusserit reluctantes adhuc Jansenianorum reliquias, immò parum æque præceperit, ut V. Jansenii Propositiones in sensu ab eodẽ Jansenio intento proscriptæ, non ore solùm, sed corde etiam à fidelibus ejurentur. Ita arguentur quidam, splendidã in speciẽ, sed fallaci planè ac temerariã consecutione. Dicimus igitur, nõ exigì certè, ut divinæ fidei assensu credamus, hominem quempiam ab Ecclesia, sive ab Apostolica Sede, tanquam Hæreticum damnatum, re ipsa talem quoque esse in conspectu Domini Dei, cuius unius est hominũ corda scrutari; aut revera alicujus Libri, sive Auctoris verba id sonare, quod damnatum ab Ecclesia fuit, eũque habere sensum, quem Ecclesia ipsis tribuere videtur. Fieri potest, ut ex aliis monumentis post iudicium primum detectis, & ex diligentiori locorum verborûmq; collatione ille qui antea pravè sentire putabatur, in recta sententia fuisse posteaprehendatur, ejusque verba commodiùs & accurasiùs explicata, ab impietate liberentur. Quod quoties secundum germanas Criticæ regulas, & sincero patrocínio præstetur, neque ab Ecclesia, neque ab eruditis molestè ferendum est. Major enim cura veritatis, & christianæ caritatis habenda, quàm proprii iudicii, quando ejus naturæ iudicium non est, ut necessariò veritas cum ipso conjuncta incedat: quod in Ecclesiasticis de doctrina, seu dogmate, iudiciis rite peractis semper fieri, est apud nos exploratũ. Ex adverso etiam contingere potest, ut re meliùs explorata atque discussa, qui Auctor, qui Liber antea ab Ecclesia aut probatus

aut absolutus fuerat, malè sensisse, & hæretica dogmata continere postea noscatur, & æquissimè tandem damnetur. Ex hac regula libæ Epistolam, atque Theodoretæ Capitula, quæ in Concilio Chalcedonensi censuram Patrum effugerant, eorum auctoribus Catholicæ communioni redditæ, deinde Oecumenica Synodus V. execrata est, impiisque sententiis atque erroribus scatere deprehensa justissimo anathemate perculit. Rursus Honorium Romanum Pontificem Oecumenica Synodus VI. Hæreticis accensuit, ejusque Epistola ad Sergium tanquam impia proscripta. At veritati & æquitati suus perpetuè futurus est locus. Utique post tantum antiquitatis consensum ego negare non aulam (parcant Baronius, & alii) quin anathema dictum Honorio fuerit; sed cum Baronio, Bellarmino, & aliis contendere & nos possumus, Honorium malè reverà non sensisse de Christi voluptatibus, neque Hæreticum planè fuisse. Restat adhuc illius Epistola. Nihil ibi doctissimis viris occurrit, quod consideratâ temporum & rerum conditione, verum referat Monothelismum, hominèmq; faciat impia tradentem. Quare damnatam in Honorio doctrinam nos quidem execramur; at Concilii sententiam de Persona & Scriptis Honorii certè suscipiendam. sed non omnino certam censemus, quod & quamplurimi ante nos censuere, scriptisque prodidère, plaudentibus eruditis, & Ecclesiâ, atque Apostolicâ Sede post tot annos nequaquam improbante illorum consilium. Video, in magnis ambagibus versari, qui Epistolam illam meritò fuisse damnatam evincere conantur, & Baronium atque Bellarminum cum sua sententia componere volunt.

Cæterum, quotiescunq; Ecclesiâ, aliquem aut Auctorem aut Librum post plenam causæ cognitionem damnavit, & illius mentem, istius sensum, quantum fieri potest in humanis, accuratissimè investigavit, & conceptis verbis de adhibita diligentia, & de sensu proscripto monuit fideles, confirmatâ sententiâ priore, & improbo illius Auctoris sive libri patrociniò: tantum roboris tum Ecclesiasticis judiciis accedit, ut iis non acquiescere, & adhuc adversari, non temeritas tantum, sed scelus sit, idque non levè. Veneranda semper sunt Apostolicæ Sedis & Ecclesiæ, vel de his rebus judicia. Attamen tolerare interdum Ecclesiâ solet ac potest, ut damnatis Auctoribus, Librisque proscriptis modesta & humilis defensio præstetur. Melius ipsa amat suos habere innocentès, quàm reos, & quanquam priùs ritè judicaverit secundum allegatâ & probatâ: nihilomi-

hilominus æqui deinde bonique facit hujusmodi etiam patrocina, utpote quæ interdum veritati prospicere, semper caritate abundare possunt. Verum postquam Ecclesia nulli diligentiz pepercit, & patronos nihil solidi afferentes, immo cavillationibus tantum causam agentes, filere iussit novis decretis, humillimè parendum est. Et non divina quidem, sed pia fides, & non oris tantum, sed & animi reverentia est his adhibenda judiciis.

Ad leges disciplinæ, quæ interdum tutelam suscipi reorum sinit, pertinet etiam nostræ sententiæ æquitas. Tum Ecclesiæ interest aperire, tum fidelium cognoscere, qui sint Hæretici, hoc est homines Catholicæ Fidei vel vocè vel scriptis adversi, & qui sint Libri sensibus perversis, & errorem spirantibus contaminati. ut vera Christi doctrina incolumis in congregatione fidelium servetur, & omnis errandi causa auferatur. Utramque pestem vitandam esse scimus à Christi ejusque Apostolorum imperio, ne, ut ait Apostolus 2. ad Tim. 3. 13. *Mali homines, & seductores, & errantes, in errorem nos mittant.* Porro ex institutione divina Pastorum est, scilicet Episcoporum, ac potissimum Apostolicæ Sedis, lupos hujusmodi detegere, & venenata pascua remove. Ipsorum est judicare, quid ovibus fugiendum sit, quidve sequendum. Igitur sinè crimine, sinè temeritate negari obsequium, & pia fides non potest hujusmodi judiciis, ubi diligentissimo examine legitimi judices causam versare, ubi statutum est, nullius ponderis esse adhibitas in patrocinium personarum, atque Librorum, rationes. Cur enim remerarium non sit, privatam suam opinionem solemnī Ecclesiæ & Apostolicæ Sedis, h. e. judicium à Deo constitutorum, sententiæ præponere in re tanti momenti? Nisi his decretis humiliter & ex animi sententia obtemperandum, atque acquiescendum est, si que retractari ista judicia possunt, quanquam aded exquisitè peracta: quandonam constabit, qui sint Hæretici nobis ejurandi, quæ sint verba malè sonantia, qui sensus impiam doctrinam referentes? Quotidie non acquiescendi, non obtemperandi causas necemus, atque interea Hæretici frustra damnati bacchari pergent, eorumque Libri sensibus perversis infecti doctrinam perversam animis pervicacibus aut incautis legentium instillare non cessabunt. Quem quæso judicaturum de sensibus verborum, de mente Scriptorum amplius appellabimus, quando Ecclesiam, Concilia, & Christi Vicarios auscultare nolumus, à quibus tam solemnī judicio hæc etiam causæ pars & contro-

versia dirempta est? Utiq̃ue non sunt è cœlo expectandi Angeli, ut his quæstionibus finem faciant. Nunquàmne parendum est?

At, inquirunt, nos doctrinam ab Apostolica Sede, & ab Ecclesia damnatam damnamus; non enim illic errori obnoxia est Ecclesia Christi Sponsa. Hanc autem doctrinam verbis & phrasis illius Libri contineri; eamque illius hominis menti reverà insedisse, neque divinitus cognoscit Ecclesia, neque jurè nos ad credendum cogere potest. Silentium præ reverentia adhibebimus. Majora præstare necessum non est. Nam qui certos nos Ecclesia de re illa faciat, quam ipsa certò non cognoscit, & in qua judicanda errare potest? Verùm argutiis talibus Ecclesiæ mandata eludere nefas est; & qui iis utitur, Fidei quidem leges se habere perspectas prodit, disciplinæ autem prorsus igitur. Nimirum disciplina præcipit, ut his etiam iudiciis rite peractis animum piè fidelitèrque submittamus. Cordi nobis futura est præ omnibus Catholica Doctrina: ergo abominandi, qui illam corrumperunt voce, scriptis ergo damnanda scripta & sensa, quibus ex Ecclesiæ sententia continetur malè sana doctrina. Cujusnam verò est, nisi Episcoporum, & præcipuè Romani Pontificis, juridicè decernere, qui sint isti Auctores nobis execrandi, quive Libri, Verba, & Phrases veneno infecta? Recta igitur ratio docet, hos præ aliis Auctores, Librosque esse à nobis damnandos, quos Ecclesia per juridicam & solemnem sententiam damnavit, & damnandos mandavit. Itaque huic damnationi quisque fidelis corde & ore subicere se debet, & inanem, ne errèt in obsequiando, timorem deponere. Ferendi ergo non sunt si Jansenii Episcopi olim Iprensus affectæ, qui post celebre ac repetitum ab Apostolica Sede, & ab Ecclesia universa receptum Jansenianæ causæ iudicium cedere nolunt & obsequi, & quorum nonnulli sub specie tuendi Jansenii & vindicandi à nota hæreseos impacta, non quidem ejus personæ, ut constat, hujus controversiæ peritis, sed ipsius doctrinæ, errores damnatos defendere & tradere non dubitarunt, Summis Pontificibus, Episcopis, omni-que Ecclesiasticâ ac seculari auctoritate contemptis. Sibi igitur irascantur, si disciplinæ severitatem in se experiuntur, qui Disciplinæ Legibus à Deo temerè adversantur. Fieri non potest, ut gravem Hæretici cordis suspensionem non ingerant, dum tanto molimine deploratam Jansenii causam tuentur. Nam quod est ad novissimum Clementis XI. Pontificis Maximi decretum, nihil æquius effor-

*Mari potuit, quàm cum statuitur, non ore solum, sed & corde peccati ac damnari a omnibus Christi fidelibus debere damnatum in V. Propositionibus Janseniani Libri sensum, quem illarum verba præferunt, nec alia mente, animo, aut credulitate formula Janseniana condemnationis subscribere licere posse. Jure (ut diximus) exigere à Fidelibus Ecclesia potest, ut Libros, hominesve à se damnatos damnent. Quis autem mentis compos, & veræ Theologiæ gnarus, sibi persuadeat, licere aliquid ore damnare, illudque ipsum interea corde amplecti? Ista linguæ & animi dissensio ullisne potest ratiunculis dealbari, atque excusari?*

Quod autem Apostolica Sedes in Jansenii causa nunc exigit, non nudius tertius exigi coëptum est, sed ab ipsis Ecclesiæ incunabulis invaluit. Ubi quempiam Hæresis Ecclesia damnavit tum continuo præceptum est, ut illum omnes pro Hæretico haberent, atque ut saltem Ecclesiæ Ministri ipsum disertis verbis execrarentur. Formulæ etiam, siue fidei Professiones fuere constitutæ, quibus subscribendum erat, uti post Jansenianam controversiam actum pariter fuit. Qui hõsce Hæreticos, eorûmve scripta ejurare noluerunt, tum de Hæresi suspecti, tum Hæretici (si evidentia maxima suberat) & ipsi proclamati sunt. Unius Theodoretæ exemplum memorasse sufficiat. In Chalcedonenli Concilio Actor. 8. tergiversabatur ille, nolébátque Nestorio statim anathema dicere. Post varias interpellationes, minitati sunt Patres se pro Hæretico ipsum habituros, nisi in Hæreticum Nestorium anathema apertè pronuntiaret. Tum ille amplius non cunctatus, paruit, & orthodoxè sentire ex hac professione creditus fuit. Cæterum sequenti sæculo iterum in scenam Theodoretus rediit unà cum Iba Edeffenò, ac Theodoro Mopsuesteno in celebri trium Capitulorum causa. Scripta istorum, tanquam à recta fide abhorrentia damnavit Synodus V Oecumenica, reluctantibus plerisque Africæ & Istriæ Episcopis, Chalcedonenlis Concilii incolumitati tunc immeritò paventibus, qui & inde perniciosum Schisma conflarunt, cum alioquin omnes in doctrina fidei consentirent. Sed ejus Concilii judicium, cui primùm reluctatus fuerat Vigilius, ratum tandem ipse habuit, aliisque deinceps Romani Pontifices, ac successu temporis immutabile stetit. Tum verò inexcusabiles habiti, qui eidem iudicio subscribere noluerunt, & pœnis ac censuris compulsi sunt ad subscribendum. Quamvis enim, uti vidimus, ad fidei dogmata non pertineat Personarum, Libro-

rūmq; damnatio, attamē ad disciplinæ leges spectat *facere* & exigere, ut & hujusmodi judiciis reverenti animo & humili assentiantur fideles, eosq; nisi obsequantur, temeritatis, scandalisque crimine meritò posse damnare, cū disciplinæ contemptum & perversæ doctrinæ suspensionem à se depellere isti non possint, si Libros & Auctores solemniter iterūque damnatos damnare recusent. Ad ejusdem disciplinæ auctoritatem referendum est, compellere posse fideles ad piè credendum & fideliter obsequendum in tot aliis factis à Deo quidem minimè revelatis, sed moraliter evidentibus, & ut talibus ab Ecclesia ritè judicatis, è quibus Doctrinæ Catholicæ stabilitas, & morum regimen quodammodo pendet. Talia habeto qui sint legitimi Successores Petri, legitimi Episcopi, ac Reges; quæ sint Oecumenica aut probata Concilia; quæ Decreta indubia Romanorum Pontificum; quæ germana Patrum scripta; & quid interdum reverà sentiat aliquis ex Patribus; & quis cœlitum albo sit adscriptus, & alia ejusmodi, in quibus modò majorem, modò minorem reverentiam postulare poterit Ecclesia pro majore aut minore rerum certitudine atque evidentiâ, pro graviore aut leviori necessitate ad servandam unitatem atque doctrinam, & ad avertendos errores. Uno verbo, hujusmodi factis, à Deo quidem non revelatis, sed tamen cū dogmate connexis, si evidentiâ præferant, demens sit, & nonnunquam reputetur Hæreticus, qui credere & obtemperare nolit; sin ambigua & dubia appareant, adhuc præstat Ecclesiæ sententiam ferenti, utpote judici divinitus ad nos regendos constituto, quàm infirmo nostro ingenio, piam adjungere fidem, ne ob timorem incerti & minimè periculosi erroris in crimen certum incurramus, quale profectò est in tanto discrimine aut corrumpendæ doctrinæ, aut scindendæ unitatis, obedientiam Præpositis nostris, rationem pro nobis Deo reddituris, pervicaciter denegare. Arque hætenus de judiciis Ecclesiæ in factis ad Historiam Ecclesiasticam pertinentibus, atque à Deo non revelatis.



## CAPUT XXI.

*In Profanis artibus, Scientiis, ac Historiis magna Ingeniorum libertas. Sed & hæc ab Ecclesia tunc coercenda, cum per eas sententias aliqua ex parte laditur fidei doctrina, aut sacrosancta Litteræ erroris sive mendacii suspitione asperguntur. Sublato huiusmodi periculo, liberum est in his sentire, quæ velis. Regula nonnulla in hanc rem. Sacrarum Litterarum scopus. Quandonam sit, aut non sit, evidens scriptura mens in rebus ad salutem minimè spectantibus.*

**N**unc mihi dicendum restat, quæ regenda sint hominum ingenia, quæve tum illorum, tum Ecclesiæ sint jura in profanis artibus, scientiis, atque historiis pertractandis. Lex illa omnium prima: *Licere ingeniis nostris hic sentire, quod & magis liceat, & veram aut veri videatur similis.* Si Mathematicas artes excipias, & Philosophiam morum, reliquæ Artes ex opinione hominum non parum pendent, tenebris innumeris involutæ, in quibus certum difficile offendas, hallucineris facile: id quod potissimum in Phycis, Medicis, Astrologicis, Geographicis, Chronologicis, Historicis rebus animadvertere est. Caliginem istam superare ingenia nituntur. Si res bene cedat, secundos eorum conatus humana tantum gloria manet, non autem cœleste præmium. Sin aliter accidat, nihil est quod sibi timeant à divina Justitia; non enim in postremo orbis judicio cuiquam vitio vertetur, quod aut has artes ignorarit, aut in earum cognitione aberraverit. Huc spectant Ephremii, Antiocheni verba apud Phot. Cod. 228. *Ἡ μὲν γὰρ περὶ τῶν αἰσθητῶν ἐρευνῶν &c.* Inquisitio illa, qua de rebus fidei suscipitur si aberres à veritate, ingens anima naufragium affert. Quare vel minimam, quæ quidem eo pertineat, excutere syllabam oportet. At verò disputatio illa, qua de quæstionibus habetur ad fidem minimè spectantibus, rectè quidem res habeat, si optatum finem veritatis assequatur. Sin autem ab eo excidat id quidem non bene successerit, non tamen in exitium animæ vergit. Unum igitur hinc redundare potest incommodum, terrenam videlicet gloriam carere, si hæc nescias; aut sese hominum cachinnis & contumeliis exponere, si in his turpiter erres.

Cum

Cum autem has eruditionis partes non minus Ecclesiæ, sanctis Patribus, & Christiani gregis Pastoribus, quam cui-  
cumque homini privato, obscuras & ambiguas reliquerit  
Deus, & cum eorum tenuissimam portionem ipsemet reve-  
laret, neque porro necessarium foret, ut ea revelarentur;  
non enim ad beatam in cœlis immortalitatem suapte na-  
turâ animam perducunt, quod res mundi uno potius  
quàm altero modo esse, aut non esse, accidisse, aut non ac-  
cidisse putentur: quis non intelligat, huiusmodi opinio-  
nes extra ditionem Ecclesiæ plerumque esse, ingentemque  
ingeniis patere libertatem, ut hic sese pro viribus opinan-  
do, concertando, somniando etiam, ac delirando exer-  
ceant? Nova hoc in regno excogitare licet, vetera asper-  
nari, susque deque etiam vertere. Et quoties de meris  
profanis rebus, sive cognitionibus agitur, à Religionis ne-  
gotio omnino disjunctis, non alio loco habendi vel ipsi  
sancti Patres, quàm quo singuli privati Auctores. Vene-  
randa profectò semper est Conciliorum, sanctorumque  
Patrum auctoritas; sed quæ in dogmatis est certissima  
magistra veritatis, talem se præstare nequit in his etiam,  
quæ sunt ultra fines sanctissimæ Religionis, Doctrinæque  
Christianæ. Quare nescio, quo plausu excipiendi sint illi,  
qui in Phycis, in Historiis profanis, & huiusmodi argu-  
mentis Augustinum, Thomam, Bonaventuram, Antoni-  
num, aliosque sanctitate simul & eruditione celebres vi-  
ros producant, rati se istorum auctoritatē firmissimum  
suis sententiis comparasse præsidium, & ad ista certè ma-  
gna nomina incutiendum esse mirum suis adversariis ri-  
morem. At sancti Patres in hisce artibus humanis ac scienti-  
is, non Christum, sed Platonem, sed Aristotelem, sed Avi-  
cennam, homines videlicet impios, aut cœcos habuere  
Magistros, aut suum intellectum fallacem, aut alios homi-  
nes erroribus obnoxios, secuti sunt. Quid ergo hic certi à  
sanctis Patribus polliceri tibi possis? Tantum sanè eorum  
dicta valebunt apud cordatos viros, quantum rationibus,  
& robustissimis, neque fallacibus argumentis nitentur.  
Præterea non hoc suæ Ecclesiæ, non Conciliis, non Patri-  
bus dedit Christus, ut Populum fidelem Astronomum fa-  
cerent, Phycisve, Chronologiæ, Historiæ profanæ, re-  
rumque similium sine ullo errore peritum. In Crucifixi scho-  
la satis est docere, satis ediscere, quæ verè de Religione cre-  
denda, quæ piè facienda, ut ametur Deus, cœlorumque re-  
gnum vi beatissimâ tandem rapiatur. Sed hæc manifestiora  
sunt, quàm ut pluribus argumentis indigant.



Ipse tamen profane Artes & Scientie quibusdam evidentibus Christiane Doctrinae, sacrarumque Literarum monumentis possunt interdum opponi. Igitur altera Lex erit: *Nefas ingenio nostris esse, in cunctis artibus, siue disciplinis, aliter sentire, quam veritatis oracula clament;* & Ecclesie Pastoribus jus esse à Deo datum hic quoque coercendi temerarias hominum mentes. Non hic de iis profane scholae opinionibus loquimur, quae recta feriunt Christi & Ecclesie Scholam; nam hae statim damnandae cognoscuntur, quales de moribus, virtutibus, & vitiis, de Natura divina, de Providentia, creatione mundi, animâ rationali, aliisque rebus bene multae occurrunt in Platonis, Aristotelis, Zenonis, Democriti & Epicuri Sectis. Loquimur de iis opinionibus, siue effatis, quae suapte naturâ nihil pertinere ad fidem, nihil officere, nihil adversari videntur salutari doctrinae Christianae Religionis. Etiam si aperta facie ista non militent, militare tamen clanculum, atque indirectè, possunt contra certissimam aliquam Religionis veritatem. Est dogma Fidei, Prophetis ac Apostolis divinum adfuisse Spiritum, ne quid falsi memoriæ mandaretur in sacris Scripturis. Multa autem in utriusque Testamenti Libris habentur, quae referri possunt ad Phycam, ad Astronomiam, ad Historiam profanam, ad Chronologiam. Turpiter erret, qui in ejus generis notionibus reverà hallucinatos Prophetas arbitretur, & documentis eorum habere fidem nolit, aut falsi litem intendat; causatus tantummodo, non eam Deo fuisse mentem, ut nos eruditione profanâ imbueret, atque inutilem rerum scientiam per suas Scripturas revelaret. Certè non ista ad salutem necessaria, & in se considerata, minimè pertinent ad fidem. Sed quia à Scriptoribus falli nescis, & divino Spiritu afflatis, consignata literis fuere, atque errorem in Prophetis, siue fallaciam suspicari nefas est; idcirco hujusmodi etiam documenta certissima credenda sunt, & relationis eausâ procul dubio spectant ad Fidem. Neque sanè ferendi Arminius & Episcopus Remonstrantium primipili, affirmare ausi, Scriptores sacros in rebus levibus, & nihil ad salutem pertinentibus, memoriâ, aut ignorantia labi potuisse, & reverà fuisse lapsos. Absit, ut hac temeraria medicina apparentibus quibusdam sacrorum Librorum contradictionibus atque difficultatibus consulamus, quando toralix rationes, æquè commodæ & innocuæ occurrunt, quibus divinarum Literarum veritas & auctoritas à suspicionem falsi & erroris liberetur. Idem dicendum de aliis phy-

physicis atque historicis opinionibus, quæ si veræ credantur, consequenter infirmant, & falsitatis arguunt divina quædam mysteria & dogmata, in Ecclesia Dei firmissimè stabilita. In his igitur dubitandum non est, quin ingenjis nostris Ecclesia imponere frenum possit, ac debeat: neque enim committendum est, ut Spiritu Sancto inspirati homines lapsi putentur vel in levibus rebus, cum non quæ sua erant, sed ea dumtaxat, quæ Deus omnibus revelaverat, memoriæ mandârint, & populo credenda exhibuerint.

Atquæ hæc quidem regulæ generales, & leges præcipuè ad judicandum de hisce quæstionibus. Sed judicio subactò & circumspectâ æquitatè opus planè est in earum usu. Nam una ex propositis legibus illam ingenjis licentiam tribuit, quæ in Ecclesiæ & veritatis perniciem declinare interdum possit, altera opinandi libertatem ità adimere nonnunquam potest, ut ingenjorum jura lædantur. Et profectò cum præteritis temporibus, tum nostris potissimum, non defuere, nec desunt homines, quibus familiare est profanas disciplinas, atque sententias seculi, quasi verbis divinis infestas atque contrarias, insectari, & prostindere, internecino odio, perpetuis clamoribus. Si quid novi Physica, aut Astrorum Scientia, aut Ars Medica, aut eruditio profana adfert: istud hominum genus mille pericula continuè timet sanctissimæ Religionis, & certis fidei decretis. Solliciti ergo nullum non movent lapidem, quo Auctores novarum opinionum, licet nihil rei cum Sancta Religione habentium, infament, eorûmq; libros dilacerent, proscribant, & supremis Ecclesiæ Tribunalibus configendos exhibeant. Et eorum zelus utique laudandus, modò tamen sit secundum scientiam, & cautis gressibus procedat. Deplorandum enim est, si errores, ubi non erant, somniet; si illic pericula confingat, unde nihil mali effluere potest, & injustos neque necessarios compedes injicere velit naturali humanarum mentium libertati. Et reverà non animadvertunt interdum docti pariter piique viri, se uniùs Aristotelis causam agere, cum Religionis causam tueri videntur. Peripateticâ Philosophiâ capti atque distenti, quidquid ab ista abhorret, continuè falsum ducunt. Tantùm nempe amoris ac venerationis huic Scriptori, aliisque antiquis Auctoribus, præjudicata opinio comparavit, ut eorum adversarios, & contraria quæque, non odisse eorum amassique nequeant, usque aded ut quando nulla alia ratio succurrit nova inventa deijciendi, facile & crebrò ad au-

**A**utoritatem Principum, Academiarum, & Religionis confuegiatur, quasi de regnis, de veritate, de fide actum sit, si nova hæc recipiantur in Scholis. At ista sinceriori iudicio, & sine affectibus, pertractare, atque insectari, aut defendere debet unus amor veritatis. Unum hunc igitur nos consulentes, necessarium putamus quædam hæc itatuere, quibus ingenia nostra insistere jubentur, si ritè fungi suo jure ac munere velint, neque in Religionis sacraria quicquam peccare.

Et primò dicimus, tum posse ac debere Ecclesiam sententiam ferre, certumque illius fore iudiciū de Quæstionibus Physicis, Medicis, Astronomicis, Geographicis, Historicis, aliisque hujusmodi, cum constabit, uno potius, quam altero modo opinari, contrarium esse evidenti Scripturarum Sanctarum, & dogmatum veritati. Secundò, evidens erit, & constabit sacrarum Litterarum, christianæque doctrinæ sententia, quando Prophetarum, Apostolorum, & Ecclesiæ verba ac documenta nullam aliam interpretationem commodam sustinent, quàm quæ iis opinionibus omninò repugnat. Tunc enim variæ ab hominibus excogitatæ opiniones, quamvis ad salutem non necessariæ, & ex sui institutione indifferentes ut aut credantur, aut non credantur, erroris, impietatis, & falsitatis iusta de causa damnabuntur. Tertiò, si commodè cum hisce hominum privatorum opinionibus conciliari poterunt divinæ Litteræ, neq; vis in Scripturarum explicatione sacris verbis inferatur, tunc neq; impia neque falsa appellare licebit hujusmodi, ut ità dicam, indifferentia Scientiarum & Artium placita. Quartò, erit ea interdum in hujusmodi sententiis indifferentibus rationum & experimentorum gravitas atque evidentiā, ut non laudabile solū, sed & necessarium futurum sit, cum istis conciliare sacrarum Librorum sententias: quod commodè sæpè fieri poterit, si rectæ Critices usus adimiculum piè & sedulè quærentibus ferat.

Quæ sint autem harum legum fundamenta breviter exponemus. Veritas una est. Innummerabiles ejus particulæ non pugnant invicem, non discordant, sed amicè conspirant: quod de erroribus non accidit, quorum alter alterum insequitur nonnunquam, ac destruit, omni spe fæderis utrinque sublata. Fac aliquid sit verum in Theologia & in sacris Litteris: necesse est ut idem quoq; affirmetur in Physica, & in profanis Historiis. Rursus si quidquam verū certumque sit in Philosophia & in Historiis non sacris, aliter sensisse nequit divina Scriptura, & Christianor. Theologia. Unicum tamen hæc inter discrimen. Semper ratio, semper Philo-

Philosophia, aliarumque artium documenta cedere fidei, sacrisque Literis debent, aliquid evidenter tradentibus, non autem sacræ Literæ ac Theologia, aliquid evidenter narrantes, submitteendæ sunt rationi ac Philosophiæ, quam & istæ evidentiam jactent à suis partibus quam maximam. Et æquissimè id ab ipsa ratione exigitur; cum sacris enim Literis, & cum fide, ac revelatione divinâ, perpetuò & necessariò conjuncta est veritas. Aliquid revelante ac tradente Deo omniscio, & veracissimo, illic errorem aut mendacium excogitare, omnium perniciosissimum delirium est. Contra cum ratione humana, cum Philosophia, Historia profana, aliisque artibus necessariò veritas non habitat, & sæpè error locum habet. Igitur falsum sic necesse est, quod à perspicua fidei eruditione dissentit; neque enim alia esse potest Theologorum veritas, alia Philosophorum; alia Dei, alia hominum; ac proinde cedat oportet ratio fidei, non fides rationi, sicuti æquum est, ut homines Deo, non Deus hominibus cedat. Et gravissimè profectò ac sanctissimè pronuntiatum anathema in Lateranensi Concilio sub Leone X. Sess. 8. contra quosdam Peripateticos Philosophos, inter quos fuisse fertur Petrus Pomponatius, quod secundum Philosophicam doctrinam mortales esse hominum animos dicerent, licet secundum Christianam fidem immortales eos affirmarent. Rationem damnationis invictissimam his verbis conclusere Patres, *Cum verum verum minime contradicat, omnem assertionem veritati illuminatæ fidei contrariam, omnino falsam definimus.*

At sæpè etiam in humanis scientiis & artibus, imò in toto rationis humanæ regno, tanta esse potest veritatis evidentia & perspicuitas, ut secundum ipsam rationem, secundum istas artes, non solum liceat, sed necessarium planè sit explicare non æquè perspicuam Scripturarum sanctarum mentem, ac verba. Id accidit, cum talem sensum divinæ Literæ præferunt, qui si verus & germanus censeatur, intoleranda post se absurda & incommoda trahat. Hoc est, ubi sententiam aliquam tribuas aliquibus verbis divinæ Scripturæ, contradictiones nunquam sedandæ emergent inter hæc & alia aut Scripturæ loca, aut fidei dogmata, atque de numine, ejusque naturâ, ac voluntate, indignum aliquid sentietur; & rectæ rationis principia, & virtutum ac morum clarissima præcepta, & receptissima apud omnes Christianos artium placita, evertentur. Tunc ergo res monet, prioribus illis Scripturæ verbis, utpote minùs quàm hæc alia documenta perspicuis, non eum, qui putabatur tribuen-

tribuendum esse sensum. Tunc non obvia ac literalis sententia, sed figurata accipienda fortassis erit; neq; proprius, sed translatus sensus; eisque verbis aliquid aliud significare voluisse divinus Spiritus censendus erit: quod quale sit, facile ex aliorum locorum collatione liquebit. Hinc illud celebre & summopere laudandum Augustini axioma in Ep. 143. olim 7. *Si Ratio contra divinaram Scripturarum auctoritatem redditur, quamlibet acuta sit, fallit verisimilitudine, vera esse non potest.* Rursus si manifestissima certaq; rationi velut Scripturarum sanctarum objicitur auctoritas, non intelligit, qui hoc facit; & non Scripturarum illarum sensum, ad quem penetrare non potuit, sed suum potius objicit veritati, nec quod in eis est, sed quod in se ipso velut pro eis invenit, opponit. Unde autem Anthropomorphitarum Hæresis erupit, nisi è perversa eorum locorum interpretatione, in quibus sacræ literæ Deo oculos, manus, pedes, aliâque membra, & corpus & affectus hominum tribuere videntur? *Oculi Domini super justos, & aures ejus in preces eorum. Manus Domini fecit hac.* Et cum audissent Adam & Eva vocem Domini Dei ambulantis in Paradiso ad auram. Et alia id genus innumera. Hæc, ut litera sonat, accipienda non esse, sed sinè dubio censenda tropicè & figuratè dicta, quo per sensibiles imagines invisibilia intelligantur, quis quæso nos docuit, nisi evidentissima lux rationis ac Theologiæ naturalis, quæ Deum planè incorporeum & spiritalem esse statuit? Ne contradicam idæ perfectissimæ, quam & natura & scientiæ mihi de vero & summo Deo indiderunt, à literali proprio sensu eorum verborum discedere cogor, & loca illa coniare cū hujus idæ veritate manifestissima. Quando autem mysticus, aut figuratus sensus literali proprio sit præponendus, & ab isto recedere non solum deceat, sed oporteat, doctissimi viri luculentissimè tradidère, Sed unius Ecclesiæ est decernere sinè errore, quæ interpretatio consonet aut repugnet veritati, in sacris Literis, atque in singulis earum verbis certissimè regnanti.

Si quidquam igitur literalis proprius sensus Scripturarum habeat, quod cum artium, & scientiarum, & Historiæ evidentibus principiis & documentis pugnet, & commodans non recuset interpretationem, ista profectò adhibenda erit, aut saltem illam adhibere nemo sibi religioni ducat. Tantòq; magis id præstare licebit, quanto certius est, majorem sinè comparatione libertatem hic esse humanis ingeniis, & nullam necessitatem credendi, siue discendi. Certum enim est, in istis rebus Deum exquisitè erudire noluisse hominum genus, cū sacrarū literarum verus sit scopus atq;

consilium nos ad amorem Dei & proximi tantummodò informare, in quo universa Lex posita est, & Prophetarum doctrina. Quod cum fieri nequeat, nisi etiam cognoscatur verus Deus, & verus Dei & hominum mediator Christus Jesus, & nisi recta morum præcepta habeantur perspecta: hæc etiam in Scripturis sacris revelare & inculcare hominibus Deo placuit. Reliqua ad humanas artes pertinentia, quæ illic narrantur, eatenus spectanda sunt, quatenus ad illam Scripturarum sanctarum mentem referuntur. Eo saltem fine consideranda non sunt, ut Physicam, Geographiam, Chronologiam, terrenarum rerum Historiam, Astronomiam, Medicinam, militarem artem, & alia id genus, non secus ac ipsa dogmata, discamus.

Quocirca quàm diligenter Apostoli, & Ecclesiæ Patres mandant, ut ad illustrandam, confirmandam, propugnandam Dei, Christi quæ, & veræ pietatis cognitionem, Scripturarum scientia adhibeatur, tam cautè etiam vetant, ne in alias inutiles, & curiositati potius quàm eruditioni salutari inservientes quæstiones nimium divertant Christianorù ingenia, nève ad eas dirimendas in medium afferantur oracula divina, quasi divini consilii fuerit, & nostra & Creatoris nostri inter sit, nos in his inanibus argumentis doctos esse, aut ignaros, & sapere, sive desipere. Altiora, diviniore, & nostram salutem æternam, non nostram temporalem eruditionem, sacri illi Codices respiciunt. Audiatur hic Gentium Doctor. In Ep. I. ad Tim. c. I. illa prohibet, quæ quæstiones præstant magis quàm ædificationem Dei, quæ est ex fide. *Finis autem præcepti est caritas de corde puro, & conscientiâ bonâ, & fide non fictâ.* Et Cap. V. 3. *Si quis aliter docet, & non acquiescit sanis sermonibus Domini nostri Jesu Christi, & ei, quæ secundum pietatem est: doctrinæ: superbus est, nihil sciens: sed languens circa quæstiones & pugnas verborum. ex quibus oriuntur invidia, contentiones, &c.* Postquam in Epist. ad Titum multa de clementia Dei, de Mediatore, aliisque divinis beneficiis prolocutus est: *Hæc, inquit, sunt bona & utilis hominibus. Stultas autem quæstiones, & genealogias, & contentiones, & pugnas legi devota, sunt enim inutiles & vana.* Ubinam ergo sunt, qui in divinis scripturis quærunt naturalium rerum, Astrorum, temporum, & locorum scientiam? Earum auctoritatem, nisi manifestissima sit, in his nimium inculcare, neque temeritate, neque periculo interdum caret: certè ab ipsarum consilio abhorret.

Propterea idem Apost. Cap. I. 9. Epistolæ ad Titum postulat Christianum & Episcopum ita Scripturarum scientiâ instru-

instructum, ut petens sit exhortari in doctrina sana, & eos, qui contrasunt, arguere. In doctrina, inquam, sana & pietatis, & fidei, non in Physica, aut Chronologia, aut rebus profanis. Neq. alio nomine se Doctorem, servum Dei, & Apostolum Jesu Christi in exordio hujus ipsius Epistolæ proficitur; quàm secundum fidem electorum Dei, & agnitionem veritatis, quæ secundum pietatem est. Quid autem refert ad pietatem, scire, cujus figuræ, v. g. terra sit, quæ supra coelos sint aquæ; an cæli ex quinta substantia sint, an ex se corruptioni obnoxii; num ignis inter elementa computandus; quis Estheris conjux, videlicet utrùm Xerxes, an Artaxerxes fuerit, & alia ejusmodi? Hæc idcirco præ oculis habens S. Basilius in Examer. Hom. 9. Moysen laudat, quod ea prætermiserit, quæ Philosophorum animos inani studio torquent. Scripturam autem ait suo honore, suâ gloriâ spoliari per eos, qui ejus dicta ad inutiles quæstiones inflectunt. Similia habet S. Hieron. in c. 3. Ep. ad Titum, etq. concinnum, quictumq. pietate & judicio in explicandis sacris literis excelluere. Quibus ex rebus sequitur, prudentissimè agere Ecclesiam, quæ ab hujusmodi quæstionibus dirimendis, & opinionibus probandis five improbandis abstinet. Eas ipsa aut non curat, aut etiâ contemnit; & siquidem vellet interdum se istis immiscere controversiis, necessaria ad rectum certamque judicium ferendum præidia ipsam deficere interdum possent. Nimirum Traditio sacra, antiqua, & continuata nonnunquam deesset, finè, quæ testatur Ecclesia se firmas proferre hinc non posse sententias. Nam cur Deus incorruptam per tot sæcula hisce de rebus scientiam, & Traditionem in Ecclesia servet, quando earum ignorantia nullum suis fidelibus, nullum suæ Religioni periculum creat, atque ipse earum scientiam neque à nobis expetit, neque nobis reverà reliquit, immo contra ab eorum inquisitione per suos Apostolos nos non semel deterruit?

Restat igitur, ut una de causa nonnunquam Ecclesia compescere & damnare possit has etiam indifferentes hominum opiniones, cùm videlicet agitur de liberandis ab erroris aut mendacii suspitione utriusq. foederis libris. Tum certè ad Ecclesiam spectat. falsa proclamare & irrevocabili ictu prosternere, quæ aliter vera esse nequeunt, nisi falsi arguatur sacratissimum illud veritatis penus. Huc autem pertinet, quæ S. Thomas habet 2. 2. Q. II. Art. 2. ubi ait, quædam spectare ad fidem posse dupliciter: uno modo directè, & principaliter, sicut articuli fidei; alio modo indirectè, & secundario, sicut ea, ex quibus sequitur corruptio unius articuli. Sed omni-

nino appareat, neque appareat tantum, sed reverà adfit oportet necessitas damnandi hujusmodi opiniones indirectè oppositas sacrarum Scripturarum veritati. Evidenter, inquam, constare prius debet, non alium sensum commoddè, & legitimè, & secundum Criticæ regulas, tribui posse Literarum sacrarum verbis, quàm qui adversetur Physicis istis, Geographicis, Historicis, & aliis ejusdem naturæ sententiis. Nam si per germanam aliquam, & non violentam interpretationem alius sensus à literali & obvio, convenire possit Scripturæ divinæ verbis, & componi cum artium & scientiarum effatis Prophetarum dicta valeant: non est cur ab ea interpretatione adhibenda nos jure ac merito impedire quisquam velit. Tunc in tuto sunt omnia. Tunc divinorum Codicum dignitati consultum satis est, & ingeniorum juribus, & legibus optimi judicii, verique Scripturarum interpretis. Neque temeritas amplius est, neque crimen perniciosum, id affirmare, quod à sacris Auctoribus negari non constat, aut id negare, quod ab iisdem affirmari manifestè non liquet. Sufficit autem in his rebus, uti diximus, à divinis iis Scriptoribus arcere aut mentiendi voluntatem, aut memoriæ lapsus, aut rerum, quas narrant, ignorationem quamcumque; non enim ista excogitare aut suspicari vel leviter licet in hominibus, quorum calamum regebat divinus veritatis Magister. Hoc periculo declinato, quæ ad veritatem propius accedere, aut veri videbuntur similia, sentire faserit in quæstionibus videlicet, quæ sive in unam sive in alteram partem versentur, ad æternam hominum vitam, eruditionemque salutarem nihil faciunt.

Interdum autem tantam esse posse diximus divinæ mentis evidentiam in verbis sacrorum Codicum, ut abjicienda sit quæcumque alia diversa opinio rerum vel indifferrentium. Atque id potissimum elucet in historicis documentis, quorum sensum obvium sæpissimè accipiendum esse, manifesta ratio docet, atque aded omnis inde excluditur figuratæ dictionis suspicio. Quod Jacob ex utero materno prodiens, plantam fratris teneret, aut non teneret manu, nihil ad hominum salutem, & necessariam eruditionem spectabat, nullum enim continet aut innuit fidei dogma, sive præceptum vitæ. Sed quando hujus rei mentionē nobis relinquere ad aliquam semper utilitatem nostram divino consilio placuit, & Jacobum apprehensâ fratris plantâ, in lucem reverà egressum fuisse, Gen. XXV. 25. ità narratur, ut non nisi violenta interpretatio adhiberi possit Scripturæ verbis: ejus rei historia habenda est sine ulla dubita-



bitatione à Deo revelata, atque certissima Similiter nullus esse potest dubitandi locus, quin sub Augusto Cæsare facta fuerit descriptio illa, quam Lucas in Evangelio memorat II. 2. & quin Syriæ aliquo modo præfuerit Cyrinus, sive Quirinus. Idem certum nobis ac ratum est, Tobix canem suo Domino præcurrisse, & quasi nuntius ad ejus parentes adveniret, blandimento caudæ suæ expressisse gaudium, Tob XI. 9. Atq; alia id genus certissima sunt; nam si aliter explices, quàm litera sonat, manifestam vim inferis narrationi divinæ. Propter eandem rationem, cùm ex evidenti Scripturarum testimonio, & perpetuâ Ecclesiæ Traditione constet, Deum omnipotentissimum posse ex nihilo aliquid facere; & posse alicuius rei substantiam in alteram convertere, ità ut prioris substantiæ accidentia, sive species, non destruantur, fiatque in hominum sensibus eadem sensatio, quam substantia sublata sive commutata prius producebat; & posse facere, ut humanum corpus indutâ incorruptione glorificatum in cœlis, angustissimo spatio contineatur, & per corpora spississima liberum habeat aditum; cùm, inquam, hæc evidenter certissima sint nobis per revelationem: statim consequitur, à veritate abhorre, quidquid acuti, quidquid speciosi Physica excogitare & afferre contra possit.

Rursus eas rationes, eamque evidentiam secum ducere interdum Physica, Historia profana, atque aliæ artes possunt, ut præ illis non æquæ evidentia, immo dubia sint Scripturæ sacræ verba. Quod si contingat ( sæpè autem contingit ) tum certè non licet solum, sed oportet, sacras Literas non repugnantes interpretatione aliquâ explicare, quod semper commodè fiet, consultis prius non temerariæ Criticæ regulis: sive Metaphora quæpiam, sive Synecdoche, sive Metonymia, sive alius quispiam Tropus & Figura in divinis verbis apparebit, quò non obviis, sed aliis verissimus sensus illic significetur cum profanis opinionibus concors, ut nihil dicam de Orientalium populorum Dialectis, in quæ manifestum nimis est diversos planè à nostris sæpè exhiberi dicendi modos. Unde autem novimus, tot Scripturæ sensus aliter quàm litera sonat significare, nisi quia rerum experientia, & humanæ artes ità accipiendos monent? Animâ rationali carere bruta, animâ quacumque carere simplicia corpora, jam notum est nobis. Ergo ubicumque iis animam, aut etiam animam rationalem, tribuere Scriptura videtur, illic Tropum & Figuram aliquam haberi statim intelligimus, aut animæ vocabu-

lum aliter apud Hebræos accipiendum, quàm apud Latinos. Eodem modo, hominem, cujus *cor & ossa tanquam cremum aruerint*, quique *ut sanum percussus fuerit*, vivere diutius non posse, tam certum est, quàm quod certissimum. Ergo Davidis verba hæc narrantis in Psalmo CI. 4. i. de se ipso, aut de paupere quopiam adhuc vivente, non ad literam, sed figuratè exponenda sunt. Idemque de versiculo sequente dicendum, ubi sanctus Rex ait: *A voce gemitûs mei adhasit os meum carni meæ*. Quodnam enim est angustiae & miseriae signum, ossa habere carni suæ adhaerentia? Nónne & hoc in rectè se habentibus conspicitur? Et nihilominus hæc David memorat, infelicem alicujus statum descripturus. Ergo dicendum, carnem hîc pro cute hominis accipiendam esse; cutis enim est pars quasi homogenea carnis. Ossa autem cuti adhaerisse dicuntur, ut macies hominis extrema significetur, quâ dicendi formulâ & ipsum vulgus nunc utitur, & Comicus olim dixit: *Ossa atque cutis sunt, miser*. Accedit etiam locus Jobi XIX. 20. *Pelli mea, consumptis carnibus, adhasit os meum*. Seu, ut habent Hæbraici Codices: *Pelli mea, & carni mea, adhasit os meum*.

Tandem loca Scripturarum quamplurima occurrunt de rebus ad salutem non necessariis, quæ dubium sensum, dubiam significationem præferunt, variâsque faciliè admittunt, easque verisimiles interpretationes. In his, non immoderata quidem, sed magna tamen ingeniis licentia conceditur interpretandi, & disputandi, modò omnis ingeniorum linea illò tendat, ut inter cæteras, quæ verissimilima sententia videtur, Scripturis sacris tribuatur. Experimenta rerum, linguarum peritia. Historia profana, omnesque artes, & humanæ Scientiæ hîc in consilium adhibentur; & quod graviores rationes & probabiliora argumenta unam potius quàm alteram sententiam commendant, eò rutiùs & laudabiliùs in eam ingenia concedunt. Hinc tot in sacris Scripturis exponendis quæstiones. Hinc tot unius loci interpretationes, totque novi eruditorum conatus, ut dilucidius, verisimiliùs, & aptius quàm antea explicentur Scripturarum loca. Neque hujusmodi interpretationes, quia novæ, unquam improbari possunt, sed quia insulsæ, ineptæ, & à ratione absonæ, & ab aliis Scripturæ locis fortasse discordes. Nam in iis quidem, quæ ad præcepta vitæ, & ad fidei dogmata pertinent, jure interdicta est illa opinionum novitas, quæ SS. Patrum consensui repugnet. At in istis indifferentibus rebus opinari, & nova pro-

proferre, nequaquam prohibemur; siue enim hîc uno potius quàm altero modo sentias, nihil hoc fidei, nihil hoc dogmatibus. & scientiæ morum officit. ubi à singulis interpretibus in tanta interpretationum varietate satis consulatur dignitati & veritati sacrorum Codicum Sic eruditis hucusque licuit disputare, num Quirinus, memoratus, ut vidimus, in Eyangelio Lucæ, ordinarius Syriæ Præses fuerit, an extra ordinem censûs causâ illuc missus; aut an descriptio universi orbis Romani, antè indicta & completa fuerit, quàm idem Quirinus Syriæ præesset. Id ex innumeris aliis exemplis liquere potest. Neque verò urgere quemquam possumus disputantem de his rebus scitu non necessariis, ut opinionem suam mutet, multoque minùs ipsum tanquam Hæresis, & perversæ doctrinæ reum infectari, dum tamen hic ritè & commodè interpretari, suæque opinioni minimè contraria Scripturarum loca, si qua opponuntur, ostendere valeat. Ille tantùm Hæreticus est, qui pertinaci animo dogma aliquod ab Ecclesia receptum à Scripturis sacris, aut à Traditione commendatum, contemnit, rejicit, negat; aut Scripturæ loca ad fidei & morum doctrinam spectantia contra mentem Ecclesiæ, & consensum Patrum pervicaciter interpretatur. In reliquis ipsos Patres quidem venerari, aut religiosè & κατὰ πρόδα sequi non cogimur; alioqui tot haberemus Hæreticos, aut saltem temerarios, quot habemus Scripturarum Interpretes.

---

## C A P U T XXII.

*An Scripturis sanctis repugnet Astronomorum sententia de Telluris motu diurno. Sacra Litera phrasibus vulgi ac figuris usa, ut verum quodpiam significarent. Exempla in eam rem. Quid totus orbis in Scripturis, extremitates cælorum, Solem incalescere, aliæque ad cælos, stellas, ac solem spectantia. Quando proprium literalem sensum in Scripturis sacris retinere cogamur; & quando sit locus aliis interpretationibus.*

**E**Xigere itaque juvat, cum res poscit, ad hîsce Canones inventa nonnulla, opinionésque varias Philosophorum, Physicorum, Historicorum, & quidquid in Mathematicis, Astronomicis, & Geographicis studiis aut

novi aut antiqui traditur. Fac autem, exempli gratiâ, in Astronomia nobis occurrat quorundam systema de diurno circa solem immobilem Telluris motu, cui complura loca è divinis Scripturis petita opponi videntur. Tum prudentis Theologi erit investigare, an ita perspicua sint atq; evidentia sacrarum Literarum loca, ut omnino peccetur contra melioris Criticæ, ipsiusque rationis leges, & contra germanæ Interpretationis regulas, si illa trahere velimus ad opinionem eorum Astronomorum. Multa autem ab ejus sententiæ tutoribus pro se adferri possunt. Quamquam enim neque in Phisica, neque in Astronomia quidquam certi habeamus de Telluris motu, attamen eam sententiam nondum Ecclesia, aut Apostolica Sedes damnavit, neque pro hæreticis reapse habet tot eruditos viros aut clam, aut apertè eam amplexos, sive olim, sive duobus proximè præteritis sæculis. Copernicana quippe Hypothesis, ut obiter id dicam, non planè nova est, uti ex Aristotele, Cicerone, & Plutarcho apparet, eamque octoginta annis ante Copernicum assertuerat celeberrimus vir Nicolaus Cusanus Cardinalis in Libro de docta ignorantia; sed illam Copernicus in multis perfecit, ejusque vestigia secuti videntur Calendarii Juliani in Correctione Gregoriana emendatores. Contrà verò his Scripturæ sanctæ locis immobilitas Telluris, & Solis mobilitas suadentur. Gen. XIX. *Sol egressus est super terram.* Et Cap. XXXII. *Ortusque est ei statim Sol.* Ecclesiastis verba sunt Cap. i. *Generatio præterit, & generatio advenit; terra autem in æternum stat. Oritur Sol, & occidit, & ad locum suum revertitur, ibique renascens gyrat per Meridies, & flebitur ad Aquilonem.* Ad imperium autem Josue præcipientis, ne Sol ac Luna moverentur, *steterunt Sol & Luna, donec ulcisceretur se gens de inimicis suis. Stetit itaque Sol in medio cœli, & non festinavit occumbere spatio unius diei.* Ità Josue X. 12. 13. Alia loca prætermitto jam nota, jam usu doctorum hominum trita, quibus terræ quies, & motus Solis apertè memorari videntur in sacris Codicibus. At quod est ad ea Scripturæ verba, quæ Tellurem immobilem significare videntur, fatendum est, parvo negotio conciliari posse cum Astronomorum sententia; etenim ibi potius affirmatur, Tellurem permanere, semperque esse, neque à suis cardinibus unquam dimoveri: quæ sanè consistentia, perduratio, ac firmitas localem motum in ea excogitatum nequaquam excludit. Ità quoque firmamentum cœli appellantur, & Æthera etiam seu Cœlos divina Sapiencia firmavit sursum,

sum, ut habetur Proverb. VIII. 28. Et tamen à cœlorum firmitate motus nequaquam abhorret, ut in Ptolemæi Sytemate traditur.

Longè clariora sunt pro Solis mobilitate sacrorum Librorum documenta. Verùm animadverti debet, solere divinas Scripturas ad opinionem vulgi sese interdum accommodare, & retinere communem loquendi consuetudinem, ut ad rudis populi sensum & caput, sese attemperent. Facilius enim ignarum vulgus ea concipit & percipit, quæ usitatis dicendi formulis proponuntur, quàm quæ inusitatis, licet accuratioribus. Quod potissimum elucet in iis tradendis, quæ ad salutarem fidei & morum veritatem non pertinent, nam, uti diximus, Deo per suas Scripturas loquenti non is scopus fuit, ut inanem erga res, scitu non necessarias, erga mundi elementa & corpora, hominum curiositatem pasceret, sed ut verè utilia ad æternam beatitudinem consequendam traderet. Neque in doctis humanæ sapientiæ verbis ipse loquitur, sed sese demittit ad earum locutionum usum, quæ quanquam minùs accuratæ, & ad humanæ sapientiæ trutinam improprie dignoscuntur, rudi tamen populo veritatem quampiam utilem ac salutarem commodius exponunt. Quod si Deo corpus & membra, & animi perturbationes, & operationes humanas tribuere non dubitârunt divinitus inspirati viri, quod significarent veros divinæ operationis effectus: quantò æquius huiusmodi minus accurato loquendi genere uti potuerunt, dum de physicis & humanis rebus quidpiam enarrabant? Est hoc figuratè loqui, est hoc in usu apud omnes populos, imò & apud ipsos doctos, & præcipuè Poetas, atque Orientales; neque enim veritas inde læditur, sed per eas etiam figuras eleganter traditur, quod verè tradere in animo fuit. Eruditorum autem hominum est in his non necessariis rebus, Ecclesiasticorum verò iudicum in rebus ad fidem & eruditionem christianam spectantibus, discernere, quid propriè, & quid figuratè sit accipiendum.

Fuisse divinis Scriptoribus eum morem, ut secundùm vulgi sententiam interdum loquerentur, luculentissimis exemplis demonstrari potest. Cùm dicimus *Terrarum Orbem*, multòque magis cùm *Universi* titulum addimus, nemo est qui nesciat, significari populos omnes, & universas provincias ac terras, quæ terraquei globi spatio quaque versum continentur. Sed alia interdum fuit, & adhuc est vulgi opinio, dicendique consuetudo. Nimirum totius

orbis vocabulo significantur provinciæ & populi antea cogniti, & magna terræ pars, aut vastissimum quoddam Imperium, quale olim Assiriis, & Alexandro Magno, & Romanæ Reipublicæ contigit. Inquit autem S. Lucas II. 1. *Existeditum à Casare Augusto, ut desirberetur universus Orbis,* ἀπο γράψασθαι πᾶσαν τὸν οἰκουμένῃ. En ut vulgari opinione dicendique formâ utitur S. Evangelista. Magnifice de suo Imperio sentiebant Romani. Nihil minùs, quàm totum terrarum orbem suâ ditione se tenere aut arbitrabantur, aut dictitabant. In hanc rem celeberrima præsertim sunt Petronii verba in Specimine Belli Civilis.

*Orbem jam totum viscer Romanus habebat.*

*Qua mare, qua terra, qua fidus currit utrumque.*

Et Hegesippus Lib 2. Antiqu. Cap. 9. *Orbis terrarum qui Romano Imperio clauditur ac definitur.* Attamen nemo in Historia aliquantulum versatus est, qui nesciat, longè abfuisse Romanos ab imperio totius orbis, cujus amplam quidem partem armis victricibus occupant, sed reverâ opinione minorem, si cum tot aliis provinciis adhuc indomitis conferebatur. Cùm igitur in quibusdam Scripturæ locis mentio sit de terra, de toto orbe, *περὶ τῆς οἰκουμένης*, non continuò accipienda sunt ea vocabula de omnibus telluris gentibus atque provinciis. Interdum per illa significatur Judæa tota cum Judæorum tribubus latè diffusis, interdum Romanum Imperium, interdum etiam ea terræ pars quæ antiquis iis temporibus cognita erat, hominûmque Judæorum commercio patebat. Quam interpretationem admittit locus ille Pauli ad Rom X. 18 ubi ad Evangelii prædicationem accommodat Psal. XVIII. vericulum quintum: *Sed dico, numquid non audierunt? Et quidem in omnem terram exivit sonus eorum, & in fines orbis terræ verba eorum.* Non enim verisimile est, tum temporis in extremas usque Scythiæ seu Tartariæ inhospitæ provincias, & in vastissimas Americæ regiones, atque in tot alias barbaras gentes sub utroque Polo sitas, Evangelium & Apostolos penetrâsse; cùm novissime tantùm, hoc est tribus proximè præteritis sæculis, magna earum regionum pars innotuerit, & amplissima adhuc regnatum circa Arcticum, tum circa Antarcticum Polum, diligentiam & navigationem hucusque fugerint recentium Europæorum, qui tamen sine comparatione anteferendi sunt veteribus nautis, & antiquis lustratoribus orbis. Etcertum quidem videtur, ante seculorum consummationem nullo termino constringendam esse Ecclesiæ Catholicæ fideique veræ ditionem, omnes.

nésque prorsus gentes in hæreditatem Christi cessuras. Verum Tertulliani. Hieronymi, Augustini, aliorumque Patrum ævo id nondum contigerat, quanquam ex ipsorum sententia Ecclesia Catholica mundum replet; totum terrarum orbem incenderet; in toto orbe divideretur; implet universam terram; toto orbe diffusa esset. Maximam totius orbis portionem ea nomina sonabant, illamque præcipue, in quam aditus erat Judæis, Romanis, & Græcis. Hæc vulgò erat terra nota, hæc Patribus erat totus terrarum orbis. Divinæ verò Scripturæ illam vulgi opinionem, & loquendi consuetudinem usurpârunt, reverà significaturæ eam terræ partem quam vulgus noverat; non enim divinum consilium eo etiam pertinebat, ut fideles hinc discerent, alias easque amplissimas terræ partes haberi ultra cognitum orbem. Id quoque animadvertas, ubi Daniel prædicat, Alexandrum universæ terræ imperaturum. Lege etiam Cap. II. 5. Act. Apost. *Erant*, inquit Sanctus Lucas, *in Hierusalem habitantes Judæi, viri religiosi ex omni natione, quæ sub cælo est.*

Ad hunc eundem morem facit alius Auctorum locus XXVII. 27. *Circa medium noctis suspicabantur nauta apparere sibi aliquam regionem.* Græci Codices, non apparere, sed appropinquare habent, cum utantur verbo *προσάγειν*. Ubi videmus cum vulgò loqui Sanctum Lucam, ipsūque externam speciem oculorum secutum; nam navigantibus littora moveri, & loca remotiora accedere aut recedere videntur.

*Provehimur portu, terraque, urbisque recedunt.*

Est verus perquam notus Virgilii 3. *Æn.* cui similes bene multos facile attexas. Cum autem Apostolus in I. ad Cor. Cap. I. 21. ait: *Placuit Deo per stultitiam prædicationis salvos facere credentes*: cur eo vocabulo prædicationem veritatis & Evangelii designat, nisi quia sapientibus hujus mundi, & humanæ rationi stulticia videbatur Christiana Fides atque doctrina? Idem Apostolus in 2 ad Cor. Cap. IV. 4. *Deum hujus sæculi* diabolum appellat, non quia talis ille sit, sed quia pro Deo ab Idololatrâ habetur, & colitur & Ipse Deum sese venditat, uti innuitur Matth. IV. 9. & Luc. IV. 6. 7. Ab aliis ejusmodi exemplis abstineo, iis lubentius usus, quæ ad propositum argumentum propius accedunt.

Nusquam certè manifestius oculorum judicia, & vulgi opiniones consecratur divina Scriptura, quàm cum de cælis, corporibusque cœlestibus loquitur. *Isaias XIII.*

4.5. *Dominus exercituum, inquit, praecepit militiae belli, venientibus de terra procul, à summitate caelis.* Hebraei codices habent: *Venientes de terra procul, ab extremo Caeli.* Gentes de loginqua terra. & ab extremitatibus Caelorum venturae, nihil aliud significant, quam populos ab extremis terrae partibus ac finibus in Babyloniorum imperium ruituros. Desumpta autem ex opinione populari ea phrasis fuit. Vulgo enim videtur coelum esse, non sphaericum, sed hemisphaericum, & in extremis terrae deficere, atque illic terminari. Eadem phrasis occurrit Deuter. IV. 31. & XXX. 4. & lib. 2. Esdræ I. 9. & Matth. XXIV 31. Eo pertinet, quod in iisdem sacris Libris Montes appellantur *fundamenta Caelorum.* Ità 2. Reg. XXII. 8. de Deo canit sanctus Rex David: *Commota est, & contremuit terra: fundamenta montium concussa sunt, & conquassata. Pro fundamento montium legitur in Hebraeis Codicibus fundamenta Caelorum contremuerunt.* *Miscdoth baltiamaim irgazu.* Nimirum, si fidem osculorum & iudicium vulgi consulamus, coelum è longinquo videtur in montes desinere, eos contingere, ipsique quasi fundamentis initi. Columnae itidem coeli appellantur Montes, Job. XXVI 11. Quia montes tanquam columnae, ut oculo apparet, coelum innixum sustinere videntur. Familiaris fuit omnium populorum Poëtis hæc eadem dicendi forma; & inde Atlas, Olympus, alique montes coelum sustinere dicti, quasi ipsis incumberet coelum. Neque aliunde *smitoris* seu *horizontis* nomen venit, nisi quia coelum suo hemisphaerio contingere illam regionem videtur, quam terminat.

Non minus apertam in eo figuratae dictionis genere phrasim invenio Exod. XVI. 21. *Colligebant autem manè singuli (manna) quantum sufficere poterat ad vescendum: cumque incaluisset Sol, liquefiebat.* Quid est quod Sol incallescere dicitur? Num identidem frigescit, num de suo ardore atque calore Sol interdum quidquam remittit, ut subinde recuperet? Nequaquam profectò. Cum vulgò loquuntur sacrae Litterae. Matutino tempore, cum adhuc nocturnum frigus aërem occupet. Solisque radii nondum suam vim repetitis ictibus in oppositum atmosphaerae crassioris aërem exercuerint, Solis calor remissus, debilisque omnino videtur. Ipsum itaque Planetam sensim incallescere arbitrantur mortales, quo altius ab horizonte procedit, quasi in ipso, & non potius in aëre, seu in hominibus ad Solem expositis cresceret aut decresceret calor. Occurrit eadem phrasis 1. Reg. XI 9. ac utrobique in Hebraicis Libris adhi-



adhibetur verbum *chamam*, quod propriè significat *calere, incallescere*, & passivè accipitur. His adde Isaiam dicentem Cap. XIII. 10. *Obtenebratum fuisse Solem in ortu suo*. En res tantummodo apparens in divinis Litteris delineata. Cum nubibus obducitur cælum, aut inter Solem ac Terram Luna interponitur, Sol ipse obtenebrari videtur. Videtur, inquam, oculis mortalium; non enim ipsius globum reverà tenebræ capiunt, neque ejus lumen deliquium patitur. Hinc Ezechiel XXXIII. 7. sensum Isaia aliter expressit, inquit: *Solem nube tegam*. Quandò verò in sacris Scripturis stellæ de cælo aut casuræ, aut decidisse dicuntur, tunc ad ea, quæ apparent, alludere videntur Prophetæ; quippe non in terram cadere plures Stellæ possunt, cum earum singulæ terram suâ magnitudine superent. Fortassis etiam in Epistola S. Judæ Cap. I. 13. Quæ ibi *Stella erratica* appellantur, reverà Stellæ non sunt, sed meteora, & aëris inflammationes in longum ductæ, cadentibus Stellis peritiles, quæ vulgo stellæ creduntur.

Quid? quod in iisdem etiam Scripturarum locis, quæ pro Solis diurno motu contra opinionem Astronomorum proferuntur, sacri Auctores popularibus locutionibus uti maluerit, quàm exquisitis, & ad veræ Astronomiæ Physicæque amussim exactis. In Ps. XVIII. 6. de Dei gloria, quæ in Sole præsertim apparet, loquens Propheta: *In Sole*, inquit, *posuit tabernaculum suum. Et ipse* (hoc est Sol) *tanquam sponsus procedens de thalamo suo, exultavit ut gigas ad currendam viam. A summo cælo egressio ejus. Et occursum ejus usque ad summum ejus. Nec est, qui se abscondat à calore ejus*. Hic Sol exoritur comparatur Sponso procedenti de thalamo suo, quibus verbis ad populi opinionem alluditur, putantis, Solem quiescere atque dormire: quandiu à nostro hemisphærio abest, & cum aurora è cubiculo quasi post somnum egredi, atque interruptum cursum resumere. Sequentia verba parùm aptè exponit celebris quidam inter Astronomos: Almagesti novi Scriptor; ait enim, illic *Astronomico more initium finemque diei à summo, & in summo cæli, id est, à Meridiani culmine, ac summa altitudine Solis per summum cæli*, quod hic memoratur, unde Sol egreditur, & aliud *summum*, quod pervenit, nihil aliud sunt, quàm extremæ cæli partes, quæ supra horizontem nostris oculis sese offerunt, scilicet Oriens & Occidens. Suprà vidimus, in Isaia Cap. XIII. à vulgata memorari *summitatem cæli*. Itidem à summo cælo usque ad summum ejus, legitur Deuter. IV. 32. & XXX. 4. ejusdem libri. *Pro summo Cæli*  
Vulga-

Vulgata legit hic *Cardines Cali*. Hæc autem omnia idem significant, videlicet *extrema Cali* ( quæ etiam vox occurrit 2. Esdræ I 9. Apud vulgatum Interpretem ), & in Hebraicis ubique exprimuntur per vocabulum *Katseh*, significans *finem, extremum, extremitatem*, alicujus rei. Itaque in suprâ laudatis verbis Psalmi XVIII quæ Hebraicè ita sonant: *Ab extremo calorum egressio ejus, & revolutio ejus super extrema eorum*, divina Scriptura loquitur secundum opinionem vulgi. Rotunditatem cœli minimè aspiciens, neque concipiens vulgus, duas ipsius *extremitates* sibi fingit, oculis etiam hanc opinionem confirmantibus: alteram nempe, unde Sol oritur, alteram, quò se quasi fessum à cursu vespere adveniente recipit. In eadem quoque opinione vulgi fuisse traduntur nonnulli à Patribus, cœlum arbitrari hemisphæricum. Reliqua verba, ubi dicitur, *nihil sese abscondere à calore Solis*, hoc est, ejus fervorem omnia contingere, & in omnia penetrare: ad aliquam etiam vulgi opinionem fortasse respiciunt; sed iis immorari nolumus.

Potius asseram, quæ in suprâ laudato Ecclesiastis loco de Sole narrantur in Hebraicis Codicibus. Ibi enim scriptum est *vel me homo scioeph*, hoc est, & ad locum suum anhelus est, seu *anhelat*. Ubi videmus, Scripturam sacram figuratè loqui, non propriè, quasi Sol vivat, moveatur, & è cursu anhelans ad locum quempiam properet sibi constitutum, tanquam ad metam. Eâdem de causa ad illa verba *erit Sol & occidit*, Lyranus adnotat: *ut apparet ad sensum*. Celeberrimum autem ad preces Josue factum in Sole prodigium aliqua pariter nobis exhibet, quæ Spiritus Sanctus, non qualia revera sunt, sed qualia oculis nostris apparent, in ea narratione usurpavit. Cap. X. 12. Josue referuntur ejusdem ducis verba: *Sol contra Gabaon ne movearis, & Luna contra vallem Ajalon*. Seu, ut alii vertunt, *super Gabaon, & super vallem Ajalon*; seu secundum Hebræos, *in Gabaon, & in valle Ajalon*. Cùm Tellus in comparatione Solis sit exigua moles, & Gabaon, ac vallis Ajalon in eodem terreo globo sint minutissimum punctum; quomodo Soli præcipitur, ne moveatur, sive ut sileat ( ita Codices Hebræi ) ac stet suprâ Gabaon, & suprâ vallem Ajalon? Numquid huic puncto respondere potest ingens Solis globus? Ad vulgare igitur oculorum judicium alludere videtur Josue; nostris enim oculis Sol apparet tanquam discus duobus palmis dimetiendus, & super exiguum unum cœli spatium moveri. Infra additur: *Sietis itaque Sol in medio cali*. At cœlestes orbes, si exactè loqui velimus,

mus, carent medio, atque extremitatibus; nam in corpore sphaerico, in semita aut linea circulari, quæ extremitas, quod medium reverà excogitari potest? Ergo istud etiam interpretari juvat ad sensum vulgi. Nempe oculis ille medius esse videtur cælorum locus, qui ab Oriente atque Occidente æqualiter distat. Concluditur tandem narratio his verbis: *Non fuit antea, nec postea, tam longa dies.* Ridendum se præberet, qui ad litteram hæc verba accipiens, contenderet, nullam in toto terrarum Orbe longiorem illa diem fuisse, Peragrantibus regiones sub utroque Polo sitas exploratum est, Solem diutius lucere, ibique longiores sine comparatione contingere dies. Verùm scriptura ad intellectum & scientiam Judaici populi sese accommodabat. Rudi illi populo Solis effectus sub regionibus Polaribus ignoti erant, neque porro divinus Spiritus revelare volebat, & ad utilia nimirum intentus, & à pascenda inani hominum curiositate alienus.

Quæ cum ita sint, & tot exemplis jam pateat, non rarè Scripturam sacram. & præsertim dum de corporibus cælestibus agit, humano more, & ex vulgi usu solere loqui: uti etiam Sanctus Augustinus Lib. I. Cap. 39. Quæst. super Gen. & cæteri Patres animadvertunt: illud consequitur, neque temerè, neque imperitè agere, qui loca ejusdem Scripturæ, mobilitatem Solis præ se ferentia, figuratè accipiunt, explicantque per Metonymiam, ut Scripturæ, non quæ sint, sed quæ appareant, illic enuntiet, & vera facta referat per improprias vulgi phrasas. Et non violentam, neque insolitam, neque absurdam interpretationem illic adhiberi, tot rationes suadent, quot exempla produximus. Quod si per ejusmodi æquam interpretationem error omnis, & mendacii suspicio à sacris Litteris excluditur atque arceatur divinæque Historiæ dignitas & fides in tuto posita est: equidem non video, cur iis incertis & commodè exponendis documentis urgere velimus Astronomorum opinionem, eoque minùs, queis ipsam impietatis arcessere. Non enim illa quidem certa, non demonstrativis rationibus probata, & per Tychonicum Systema suppleri fortitan potest, sed verisimilis tantum est, motibusque cælestibus explicandis, & superfluis compluribus removendis omnium consensu perquam idonea. At ne certissima quidem neque evidentia esse videntur Scripturarum interpretamenta, quæ adversus ipsam pugnare debentur, ut illorum patentissima veritas nutantem istius verisimilitudinem suo pon-

pondere aperte prosternat. Nam quodd in hanc rem aliqui  
junt, *omnem sacra Scriptura propositionem accipiendam esse in  
sensu litterali & proprio, quotiescumque in tali sensu non est re-  
pugnantia cum aliis propositionibus ejusdem Scripturae aequè aut  
magis certis, aut cum definitione summi Pontificis, aut cum propo-  
sitione aliqua naturalis lumine certa & evidenti*; hoc, inquam,  
tam latum ac generale axioma nescio quàm opportunè  
inculcetur. Certè quantum fieri potest, retinere & conse-  
ctari debemus litteralem proprium Scripturae sensum.  
Verùm propè innumera ibi sunt de rebus ad salutem non  
necessariis seu dicta, seu phrasés, seu verba, quibus neque  
fidei, neque Ecclesiae placita, neque naturalis luminis lux  
palam repugnat, & tamen in sensu litterali ac proprio à  
Sanctis Patribus, aliisque Catholicis interpretibus non ac-  
cipiuntur. Ut aliter ista explicentur, atque accipiantur,  
quàm primà facie accipienda videantur, sufficit, ut id pro-  
babilior aliqua ac verisimilior ratio suadeat, petita è libe-  
ralibus disciplinis, è profanis Historiis è populorum mo-  
ribus, aliisque etiam minus certis fontibus, & sit non vio-  
lenta, sed naturalis, atque in aliis similibus locis usitata &  
probata interpretandi ratio.

Sed ut clariùs loquamur, meminisse debent viri Theo-  
logi litteralem Scripturae sensum quatenus à mystico di-  
stinguitur, vel proprium esse vel figuratum. Est autem  
Augustini & complurium sententia, interdum plures lit-  
terales sensus uni Scripturae loco seu testimonio congrue-  
re, cùm contrà alii arbitrentur, unum solum convenire  
posse. Utriq; rectè sentire, eorùmque opiniones facilè con-  
ciliari posse videntur. Unicum tantummodo sensum litte-  
ralem (non excluso mystico) aut propriis aut figuratis ver-  
bis expressum, in quolibet sacrarum Litterarum testimo-  
nio divinus Spiritus reverà voluisse concludere censendus  
est. At cùm Scripturae verba, quod est ad sensum litteralem,  
sint obscura interdum, variisq; interpretationibus obno-  
xia, incertumque non rarè sit, utrum propriè an figuratè  
sint accipienda; diversas propterea litterales interpretatio-  
nes ad eundem locum adhibere licet. Harum quælibet,  
modò contorta non sit ac violenta; modò non aliis Scrip-  
turae, Traditionis, & rationis luminibus adversetur, con-  
venire, & laudari, ac tolerari potest. Quandiu non constet,  
quæ sit eo loco mens divini Spiritus, neque evidenter ap-  
pareat unicus ille sensus, quem Deus significare voluit;  
quid vetat pluribus modis eandem explicare locutionem,  
dum id religiosè fiat? Loca autem illa Scripturarum, quæ  
ad

ad fidei ac morum doctrinam spectant, uno duntaxat modo esse explicanda, neque plures pati posse literales sensus, dicimus; quia germanum eorum sensum à Deo unice expetitum jam Ecclesia ab ipso Deo didicit, & per Traditionem, atque unanimem Patrum consensum ad nos usque transmisit. Quare in iis locis interpretandis ab Ecclesia, à Traditione, à Patribus recedere nefas est. Verum in aliis Scripturæ locis, quibus doctrina salutis minimè continetur, ubi sensus non aliunde jam certus sit, immo ubi iste sit obscurus, & diversam literalem interpretationem commodè patiatur: locum utique habet Augustini aliorumque sententia, plures videlicet sensus literales convenire uni loco posse, ac tolerari debere. Hic valent sanioris Criticæ leges. Quamvis obvius sensus minimè tum incurrat in fidei & caritatis dogmata, neque rectam rationem pulset: si tamen non benè consentire deprehendatur cum Experientiæ, Physicæ, Geographiæ, Astronomiæ, Historiæ, Logicæ, aliarumque disciplinarum verisimilibus sententiis, & contrà conciliari cum istis non absurdè, non violenter possit, vel figuram aliquam illic ostendendo, vel prætermissa supplendo, vel obscura explicando: probabiles sunt, verisimiles, atque tolerabiles alii etiam sensus literales.

Retinere igitur proprium literalem sensum Scripturæ non cogimur, eiq; licet præferre figuratum literalem, siue cum verisimilis ratio hunc potius quam illum eligendum suadet, simulque in aliis ejusdem generis locis ita explicari Scriptura amat, siue cum hujusmodi explicatio à Patribus non impugnatur, non dissentit ab aliis Scripturæ clarioribus locis, non ab Articulis fidei, non à recta ratione. Hoc enim est, non in Allegorias historicum literalem sensum deflectere, sed eum historicum ac literalem sensum Scripturis tribuere, qui rei, & narrationi, & consuetudini Prophetarum aptius conveniat. Unicum exemplum dabo. De Hierosolymæ excidio hæc prædicebat divinus Magister, Lucæ XIX. 44. *Et non relinquent in te lapidem super lapidem.* Ut nemo non intelligit, obvius literalis, ac proprius horum verborum sensus est, ita minutatim urbis illius mœnia, ac domos disjicienda ac subvertenda fore, ut unus lapis relinquendus non sit cum altero coagmentatus. Nihil prohibet, quin ita reapse evenisse dicamus in celebri expeditione & victoria Titi. Adversus alia Scripturæ loca, adversus Traditionem Patrum, aut Romanorum Pontificum, Conciliorumque decreta non pugnat hic sensus. Neque naturali luminis adversatur; poterant enim Romani d

nullo negotio præstare, si animus fuisset. Historia etiam & Patres ita vastatam Hierosolymam ajunt, & solo æquatam, ut ne ullum quidem signum habitatæ urbis relictum fuerit. Prædixerat etiam Christus nullum Hierosolymitani Templi lapidem super lapidem relinquendum, qui non destrueretur, Matth. XXIV. 2. & Marci XIII. 2. Plenè Prophetiam hanc impletam fuisse, Historia fidem facit. Ingentes immensæ illius molis lapides victor exercitus omnino contrivit, atque dissolvit, ferrum ac plumbum, quo connexi fuerant, rapturus. Et ne vestigia quidem celeberrimi Templi reliqua fuere; ipsius enim fundamenta Turnus Rufus aratro evertit, aded ut nihil integrum remanserit, nullusque lapis lapidi impositus. Parem igitur everisionem toti quoque civitati contigisse, non solum non abhorret à vero, sed veri omnino simile videtur; & si audire velimus, legem à quibusdam, uti suprà diximus, nobis præscriptam, necesse erit id sine dubitatione credere factum.

Ex alia tamen parte verisimile nequaquam videtur, tantum otii fuisse Romanis, ut tam minute amplissimam urbem, ejusque omnia fundamenta conscinderent. Ad hæc Auctor Josephus est Lib. 7. Cap. 18. de Bell. Jud. à vastitate urbis immunes fuisse Turres, quæ præter alias eminebant, partemque muri ad Occidentem non fuisse dejectam. Quocirca, relicto obvio proprioque sensu, alter sensus æquè literalis & historicus, sed priore verisimilior tribui potest iis Servatoris nostri verbis. Is nempe vulgarem consuetudinem loquendi imitatus, *nullum lapidem super lapidem relinquentium* hyperbolicè prædixit, quò significaret, urbem funditus diruendam, ejusque everisionem ingentem, insuetam, & horrendam supra modum esse futuram: quam sanè prædictionem nemo dubitat, quin plenè eventus compleret. Igitur videndum est, quare non & Astronomis liceat diversum ab obvio sensum quibusdam Scripturæ locis tribuere, cum præcipuè similis interpretatio in aliis Scripturæ locis simillimis non solum non vituperetur sed etià laudetur & verisimiliores rationes, ut vulgò Astronomi fatentur, Copernicane, quàm vulgari sententiæ, faveant, & hæ rationes verisimiliores præferendam etiam, aut saltem ferendam esse suadeant adhibitam ab ipsis interpretationem Scripturæ. Hoc, inquam, videndum; cum cæteroqui pateat, literalem sensum in iis Scripturæ locis intactum custodiri, & æquè per eam explicationem statui miraculum, quod Josue contigit. Sed quomodocumque tandem ista quæstio  
verse-

versetur, illud certum est, in his ad doctrinam fidei nequaquam spectantibus rebus, nihil aliud Ecclesiam ab Interprete exigere, nisi ut à sacris Scripturis omnis suspicio falsitatis ac erroris avertatur, idque præstetur per commodas ac verisimiles Interpretationes, & verisimilior Interpretatio minus verisimili anteponatur, quanquam ne ipsæ quidem minus verisimiles idcirco sint repudiandæ. Hæc autem omnia præstitisse Copernicani sibi videntur. Quod an verè contigerit, prudentum eruditorum erit judicare, donec Ecclesia hanc ritè controversiam decernat, si tamen id facere, aut utile sit, aut necessarium sanctissimæ Religioni.

Neque est, cur aliquis dicat: Diurnus Telluris motus minimè demonstrativè ostenditur verus Ergo rejiciendus. Ergo vetus & communis sententia de Solis motu retinenda. Nam non ideo omnes Scripturæ interpretationes rejiciendæ, quia demonstratione caret ratio ità interpretandi. Alioqui de commentariis SS. Patrum, aliorumque Interpretum actum esset, eandem interdum sententiam variè atq; oppositè in hujusmodi locis exponentium. Deinde prudenter quidem, & religiosè Ptolemæi, seu Tyconis sententia retineatur, sed ità ut ad fidem pertinere nondum dicatur, neque hæresis postuletur contraria sententia. Copernicani enim Systematis rationes, etsi nequaquam demonstrativæ sint, eæ tamen sunt, quæ dubium faciunt Scripturæ sensum in locis suprà laudatis, ipsùmque verisimili ac probabili interpretatione à se non dissentire ostendunt. Quid si aliquando hæc demonstratio à solertibus Astronomis & Philosophis adinveniretur? Nónne tum certum foret, interpretationem propositam non solùm tolerabilem & æquam, sed etiam necessariam esse? At quis non videat, periculosissimum, atque à Religionis Ecclesiæque institutione alienum esse, velle id nunc pertinere ad fidem, quod cras pertinere non possit? Fides atque stabilitas credendorum in Ecclesia Christi, absit, ut ab humanis experimentis pendeat. Alibi autem vidimus, Concilia ipsa Generalia ex Augustini sententia certissimè definiri non posse, quæ è novis experimentis aliter se habere deprehendi possunt. At inquis: nulla unquam opinioni Copernicane demonstratione invenietur Consentiam, si vis, & ego; verùm præ difficultate rei semper fortasse desiderabitur hujusmodi demonstratio, non quòd aperta revelatio divinam spem omnem illius inveniendæ sustulerit. Ne Ptolemæici quidem, aut Tychonici Systematis demonstratio hucusque inven-

ta; imò hæc majoribus quàm Copernicanum difficultatibus laborare videntur. Interim ergo prudentis est suspendere judicium, neque tam acriter urgere divinas Literas, ut oppositam sententiam hæresis & impietatis insimules. Id enim est contra Ecclesiæ ipsius mentem, cujus in hisce quæstionibus moderationem omnia monumenta antiquitatis testantur, & nos dilucidius exposituri sumus.

---

## CAPUT XXIII.

*Traditio, & evidentia exiguntur, ut in his ad salutem minimè spectantibus documentis statuatur, aliquid certò esse credendum. Concilii Tridentini laudandum de ratione interpretandi præceptum. Evidentia in his non rarò desiderata. Quid de Antipodum existentia olim creditum, & quàm prudenter ab ea quæstione dirimenda abstinuerit Ecclesia. Scriptura non detorquenda ad profanorum dogmatum tutelam. Petavii & sancti Thoma sententia de stilo Moysi.*

UTi satis significasse mihi videor, ab Ecclesiæ foro atque censurâ eximere sese non possunt quæstiones opinionésque eruditorum hominum hac una de causa. quod nihil in fidei & caritatis doctrinam directè & suaptè naturâ influant, siue uno, siue altero potius modo definiantur, quotiescumq; per eas Christianæ doctrinæ divinitus certæ pars aliqua læditur, aut per latus confoditur, & erroris siue mendacii suspicione, nedum notâ patentis, aspergitur divina Scriptura: tunc in eas gladium æquissimè & sanctissimè arripit Ecclesia, easque prostermit, atque è fidelium scholis & cordibus eliminat. Duplici autem modo suum hoc jus Ecclesia exercere potest, aut ipsas opiniones reverà dampnando, tanquam fidei & sacrarum Literarum doctrinæ contrarias, aut solùm vetando, ne publicè tradantur, néve per Libros disseminentur in vulgus, prudentissimè prospiciens incautis, ignaris, & novitatum amatoribus, quorum salutis æternæ aut jam cœpit, aut in posterum potest nocere ejusmodi quæstionum atque opinionum agitatio. Verùm istâ medicinâ rarò, illâ etiam rariùs Ecclesia utitur; & neutrá sanè, nisi præcesserit accuratissima causæ rerumque cognitio. Et primò sententias quasdam ad salutis

fidei-



fideique eruditionem per se non pertinentes damnatura, rem tantam peragere se non posse, neque debere, probe intelligit, nisi explorata Traditio, & evidentia rei prius moneant, ejusmodi sententias sacrarum Literarum, fideique firmissimis documentis opponi. Nam si in judicandis rebus fidei, quæ propriè sui sunt juris, & quas Theologorum est scire, hæc eadem fundamenta exiguntur in Ecclesiasticis Præsulibus: quanto magis eadem exigenda sunt, cum de aliis rebus judicandum est, quas ad Religionem non tam propriè pertinere diximus, imò nos ignorare sine crimine possumus?

Sæpè autem Traditio desideretur, sæpè etiam evidentia. Nam rarò contingat, ut de inanibus sæcularis eruditionis quæstionibus Traditio vera attribui possit Ecclesiæ Dei. Hujusmodi quæstiones vel tanquam inutiles neglexerunt, vel tanquam perniciosas, humanæ curiositatis nutritias fugerunt sancti Patres. Quòd si eas pertractarunt, aut obiter, aut etiam ex professo, nihilominus tanti eorum dicta valere noluit Ecclesia, ut ipsorum auctoritati fasces necessariò submitterent omnia posterorum ingenia, & legitima inde Traditionis Ecclesiasticæ forma petenda foret. Hanc Patribus venerationem profectò debemus, cum de Christi, & Ecclesiæ, & morum doctrina loquuntur, eamque doctrinam in sacris Literis unanimi consensu exponunt. In reliquis profanæ literaturæ partibus, immo in ipsis Scripturis interpretandis, ubicumque non agitur de salutari illa fidei & caritatis doctrina, nunquam ità premimur auctoritate, aut sanctitate, aut eruditione Majorum, ut si quid melius, verius, aut saltem verisimilius ac probabilius nobis occurrat, proferre, atque etiam adoptare non liceat, dum Scripturæ sanctæ veracitas, dignitasque ubique intacta servetur. Hac libertate hucusque sunt usi, atque adhuc utuntur recentiores Scripturarum Interpretes, omnesque eruditi Catholicæ communionis, quoties in id genus controversias incidunt, neque religioni sibi ducunt dissentire à Patribus in iis, quæ quocumque modo explicentur, ac dirimantur, nullam divinis Literis, nullam fidei doctrinæ, nullam Ecclesiæ sanctæ injuriam inferunt, & veritatem, quam proximè possunt, accuratè consecantur. Eset igitur inquirendum, num venerandum Traditionis nomen rectè ac legitimè in Copernicanam aliàsque ejusmodi causas à nonnullis proferatur: scil. num sancti Patres Telluris motum reverà damnarint, sacrisque Literis contrarium appellarint, cum certè non à Copernico originem duxerit

ea opinio, sed quibusdam ex antiquis Philosophis, uti diximus, in mentem venerit. & literis mandata, fortasse ab ipsis Patribus ignorata non fuerit.

Interim nobis planè commemorandum est, & summe commendandum Tridentini Concilii decretum Sess. IV. vulgatum, quò nihil in hanc rem opportunius reperiatur. *Ad coercenda petulantia ingens decernit sancta Synodus, ut nemo sua prudentia innixus, in rebus fidei & morum ad ædificationem Doctrinæ Christianæ pertinentium, sacram Scripturam ad suæ sensus contorquens, contra eum sensum, quem tenuit, & tenet sancta Mater Ecclesia, aut etiam contra unanimem consensum Patrum, ipsam Scripturam sacram interpretari audeat.* Mirari tamen, neque injuriâ, liceat, qui hanc regulam sapientissimè conceptam intorquere nonnulli velint adversus Copernicani Systematis patronos, quasi in omnibus quæstionibus unanimem sanctorum Patrum consensum necessariò sequendum Ecclesia pronuntiet. Non inquit sancta Synodus, piaculum esse à Patribus discedere in Quæstionibus Historicis, Philosophicis, Mathematicis, Physicis, Astronomicis, Geographicis, aliisque hujusmodi rebus, quibus sacræ Literæ materiam vastam suppeditant. Conceptis verbis petit illa, ut sensum Ecclesiæ, ac eosdem Patres humiliter audiamus, fideliter sectemur, cum agitur *de rebus fidei & morum ad ædificationem Doctrinæ Christianæ pertinentium.* Quibus sanè verbis non tam apertè coërcet petulantium ingeniorum temeritatem in pertractandis rebus utilibus, siue necessariis ad fidem, ac mores, quàm tacitè monet quorundam aliorum exuberantem zelum, ne sententiam & auctoritatem Patrum importunè objiciant, & necessariò præferendam putent in reliquis etiam aut minimè necessariis, aut inutilibus quæstionibus, & in exponendis iis Scripturæ locis, quæ ad fidem, & mores, atque ædificationem Doctrinæ Christianæ non pertinent. Si & hoc poscere Tridentinis Patribus animus fuisset, nihil erat, quod sua verba ad salutares tantummodo quæstiones è Scripturis emanantes spectare affirmarent; & saltem aliis dicendi formulis latius patere mentem suam indicassent. Sed iis perspectum erat, frustra ad fidem trahi de his rebus scitu non necessariis. imò ad æternam vitam inutilibus qualemcumque sententiam.

Itaque sapientissimè in eam illi ivère sententiam, quæ & unitati fidei consulit, & ingeniorum libertatem non minuit, optimè intelligentes, quando Scripturæ veracitas, fideique veræ doctrina sinè vi collocentur in tuto, non esse

esse litem intendendam diversis Interpretum sententiis de rebus ad Fidem, & Mores, & Christianæ Doctrinæ ædificationem nequaquam pertinentibus. Præ oculis autem Tridentinorum Patrum, ut arbitror, tunc erant Apostoli verba in Ep. 1. ad Tim. III. 16. *Omnis Scriptura divinitus inspirata utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne opus bonum instructus.* Ad quid utilis sit divina Scriptura, en quàm apertè Apostolus significat. Nimirum justitiam tradere illi est scopus, quo nomine virtutes omnes complecti Scriptura solet, & ad caritatem, & ad omne opus bonum Fideles incitare atque instruere. Non, inquit, ad Mathematicas, Astronomicas, Physicas, atque alias id genus controversias dirimendas, doctrinæque sæculares explicandas, non ad erudiendum in historiâ naturali, quæ verba nescio, quibus Codicibus fretus Almagestri novi architectus Apostolo affingit, ut Copernicanis invidiam creet. Ista quoque (non inficiamur) innuuntur, & obiter memorantur sacris in Literis; sed ut eadem aliquo pacto & pro conditione sua nos ad fidem, pietatem, & caritatem erudiant, & à nobis in eum finem considerentur, non ut reapse disputationibus nostris, & nostræ curiositati finem faciant. In hanc rem præcipuè consulendus S. Augustinus lib. 1. Cap. 35 & 36. de Doctr. Christ. ubi Scripturæ totius summam & scopum statuit in commendanda nobis dilectione Dei, & proximi.

Cæterum ex his etiam intelligere possumus, evidentiam non raro deesse, necessariam prorsus, ut ab ipsis Ecclesiasticis Judicibus certa feratur de his quæstionibus ad salutem non pertinentibus sententia. Partim id contingere ex rerum difficultate, atque obscuritate, partim ex ambiguo Scripturarum sensu potest. Aut turgidus, nimis que sui æstimator, aut cæcus aliorum venerator sit, necesse est, qui tot Aristotelis, Epicuri, Cartesii, Galeni sententias, in Physicis potissimum, sine ullo discrimine certas esse contendat. Pleræque (ut noverunt, & dissimulare nequeunt sinceri Philosophi) intra unius verisimilitudinis pomœria continentur. Quo quæque deprehenditur, aut apparet verisimilior, eò dignior fit plausu & consensu eruditorum. Hinc tot sonoræ lites, & verborum rationumque pugnæ, non prius modum finemque habituræ, quàm in terris habitare & literas colere delinat mortalium genus. Has autem, ut ita dicam, ingenitas rerum tenebras ne ipse quidem divinus Spiritus in Libris suis discutere voluisse

luisse putandus est. Imò ipse testatur, se in hujusmodi rebus tradidisse mundum disputationi; hominum; sequè Deum esse docentem utilia, & tradentem utiam scientiam reverà lucidam, & facilem; qualis (postquam locutus est ipse, & postquam quid ipse locutus sit; ab Ecclesia Catholica illius Interpretè edocti sumus) est fidei Catholicæ; & caritatis doctrina. non autem Physicæ; Astronomiæ, & horum similium. Id autem in sacris Codicibus evidenter traditum non dicitur, quod plures commodas & germanas patitur interpretationes, à quibus nulla certissimis aliis Traditionis, & Rationis, & Scripturæ documentis opponitur. Multoque minùs illæ Scripturæ sensus evidens appellandus, cui verisimiliores rationes, & experimenta sive jam facta, sive peractu non impossibilia, diversum aliū sensum; immo oppositum, esse præferendum monent, in iis nempe rebus, quarum, uti ex generali regula statutum est; certam nobis cognitionem Deus relinquere voluisse nequaquam videtur, & quas contineri Traditione Patrum difficile demonstretur, & quæ nihil Religionis interfici, quod uno potius quàm altera modo ab hominibus credantur.

En ergo causæ, cur ab hisce questionibus dirimendis Ecclesia Catholica, & Patres, & Romani Pontifices plerumque abstinere. Tum solum in hoc etiam studio currunt; suamque non fallaci auctoritate utuntur, cum necessitas cogit. Tum verò cogit necessitas, cum evidenter adeò de hujusmodi quoque indifferentibus rebus Scriptura loquitur, ut unum tantummodò sensum ejus verba admittant; & reliqui sensus, reliquæ interpretationes ab usu Scripturæ ipsius, aut ab aliis manifestissimis ejusdem locis; aut à Fide, Traditione, ratione rectà apertè abhorrent. Sublatis hujusmodi periculis & incommodis, & Scripturæ sanctæ veracitate ac dignitate servatâ, placidè hæc controversias Ecclesia intuetur, ac tolerat, aut certè eorum decisionem suspendit. Et cur in hisce minutis, & suapte natura non utilibus, neque necessariis questionibus dirimendis sese Ecclesia occupet; quæ tot alias controversias inter Theologos & sacrarum Literarum Interpretes regnare sinit; ipsasque dijudicare supersedet? Majoris momenti sunt istæ, quàm illæ, & propius sine dubio ad Christianam Doctrinam accedunt, immo de ipsa Christi doctrinâ, de fide, ac moribus plerumque agunt. Pro istis etiam, & contra istas, afferunt divinæ Scripturæ verba, quibus unusquisque sensum tribuit verisimilem; interpretatione præpo-

præposita, quæ suis cum opinionibus conveniat. Attamen Ecclesia sustinet pacificè tantam quæstionum segetem, & interpretationum varietatem; & nisi absurda tradantur, & contraria receptis dogmatibus, à judicando temperat. Ipsis etiam disceptatoribus sese invicem hæresis & impietatis postulantiibus; sapientissimè mandat interdum; ut his contumeliis parcant, neque sibi iudicium usurpent Apostolicæ Sedi, & Conciliis reservatum. Ergo multò cautiùs & prudentius Rômani Pontifices, & Concilia, aut despiciunt; aut ferunt ista de rebus indifferentibus, & à Scripturæ scôpo alienis, litigia, dum sine Scripturæ ipsius injuria ac dedecore exerceantur.

Non solùm autem à iudicio, quantum fieri potest, in his Ecclesia abstinet; sed ægro nonnunquam fert animo, sacras Litteras in patrocinium Physicarum, aliarumque ejusmodi sententiarum, ità advocari, ut quisquis secùs senserit, statim venditetur Violatæ fidei reus. Neque solùm finit, ut arma è divinis Libris petita per verisimilem aliquam explicationem declinentur; sed nè impedit quidem, quomihus apertas his de rebus sententias Patrum deseramus, ubi verisimiliora argumenta, robustiores rationes, multoque magis experimenta manifesta pro aliis iisque contrariis sententiis pugnant. Vulgatà est veterum quorundam opinio quæ Antipodas ab orbe terrarum excludebat, eamque hîc memorasse non abs re erit. Post aliquot profanos Auctores ità sensisse videntur Lactantius, Augustinus, Ilidorus Hispalensis. Nazianzeno ea quoque sententia placuisse fertur, neque ab eà abfuisse censendi Chrysostomus, Procopius, Diodorus Tarsensis, Acacius, Theodoretus, Theophylactus, Severianus, Euthymius, Joannes Damascenus, & alii, quibus Cœlum non Sphæricum, sed Hemisphæricum putabatur. Utramque istorum opinionem, ne dicam puerilem, certè absurdam, uti hunc omnes fatentur, Astronomicæ, Physicæ, & Mathematicæ rationes deſicere olim poterant, & demum experientia profligavit. Antequam tamen Columbus felici ausu ignotum orbem pervium nobis fecisset, fingere nobis liceat. Antipodas à quoquam assertos fuisse; & hujus opinionem sibi exagitantam delicatulos quosdam suscipere voluisse. Philosophia simul & experientia nonnullas verisimiles rationes suffecissent, quibus Antipodes negandi, Tellus non rotunda, Cœlum verò hemisphæricum esse probarentur. Tum auctoritas Scripturæ, ac præcipue Patrum in aciem educta fuisset. Demum divina Scriptura prælium absolve-

re poterat. Uti suprà vidimus cœli ac terræ extremitates illic memorantur; totus terrarum orbis sub Augusto descriptus, ab Apostolis aliisque Discipulis Christi peragratus, & per omnes gentes atque per universum terrarum orbem Ecclesia jam diffusa temporibus Patrum occurrebant. Ergo nulli Antipodes statuendi erant. quos Populi & Patres tunc ignorabant, imò negabant.

Quid hîc fecissent, qui Scripturam sacram de his etiam indifferentibus rebus loquentem in sensu litterali proprio, neque figurato, ubique & semper accipiendam esse contendunt, quoties hic sensus *non repugnat cum aliis Scripturæ locis, æquè, aut magis certis, aut cum Ecclesiæ definitionibus, aut cum præpositione aliqua naturali lumine certa & evidenti*? Non erant Scripturæ loca, quibus adversaretur opinio Antipodas terræque rotunditatem negans. Imò Severianus Isaïæ verbis XL. 22. secundum versionem Sepruaginta opinionem suam tuebatur; ibi quippe legitur: *Qui statuit cœlum tanquam fornicem, καὶ μέγαν* Chrysostomus proferebat Epistolam ad Hebr. VIII. 2. Procopius illis verbis Ps. 18. utebatur, *à summo cœlo egressio ejus*. Ad hæc erat dogma, quocum conciliari non posse contraria sententia putabatur. Nullus hominum non ab Adamo propaginem ducit. Si homines excogitabantur immenso interjecti Oceani spatio à nobis disiti, nullâ ad eas terras navigatione cognitâ, & ne possibilibi quidem, uti olim arbitrabantur: ægrè persuaderi, & credi, & sustineri posse videbatur certa de unius hominis propagatione sententia. Neque cum ulla Ecclesiæ definitione proprius ille Scripturæ sensus pugnabat, Imò proferri contra poterant verba Zachariæ Romani Pontificis ex Epist. 10. ad Bonifacium Moguntinum. Virgilium quemdam affirmantem, *quodâ alius mundus & alii homines sub terra sint*, damnat ibi Pontifex, & Sacerdotii honore privandum ait, ejusque *doctrinam perversam*, pignantemque *contra Dominum & animam suam*, apertè vocat. Num denique in proprio sensu ea Scripturæ verba accipientibus *aliquâ naturali lumine certa & evidens præpositio* opponi poterat? Imò qui Antipodas statuebant, naturali lumini renuntiare credebantur: Nam qui excogitare gentem, quæ ad versa nobis vestigia figat, neque in cœlum irruat? Id monstri simile videbatur; id eruditi ipsi, nedum rude vulgus, concoquere minimè poterant. Tam parum, inquam, apparebat à rectâ ratione absona Antipodum negatio, ut illam cum Philosophi, tum Historici, & eruditorum ferè omnium chorus sine comparatione magis, quàm alteram opinio-

nem,

mem, consentaneam rationi, & experientiae censerent. Si istos ergo homines auscultasset Ecclesia, certe conclamatum fuisset in Antipodas, in coeli terraeque rotunditatem. Et quid si eam sententiam Ecclesia tulisset, quam falsam & irridendam experimenta subinde monstrassent? Quantum quidem arbitror, eò tandem confugere necesse erat, ut diceretur, nihil mirum, quod in illo iudicio Ecclesia defecisset, quae se quaestionibus immiscere voluerit, ad salutis scientiam minimè pertinentibus. Id autem nihil officere promissae ipsi ab erroribus immunitati, quae dogmata duntaxat respicit, hoc est fidei & morum salutarem doctrinam. Nos nequaquam negare, quin falli & ipsa possit in factis & rebus à fidei & caritatis scientia alienis.

Verùm & à nostrae defensionis necessitate, & ab errandi periculo sollicitè sibi cavit Ecclesia. Nunquam ipsa damnavit Antipodum vindices; nunquam iis Scripturas sacras opposuit; nunquam ut opponerentur amavit. Neque verò arbitror, Zachariam Pontificem in Virgilium idèò tantùm anathema dixisse, quòd is Antipodas poneret. Adiaphoram hanc opinionem inficiebat ille erroribus aliis. Nam & Solem alium à nostro, aliàmque Lunam incolis iis tribuebat, & pejora fortasse delirabat. Cæterum quòd reverà collinearet Virgilii opinio, & Zachariae censura, vix dicas. Totum illud negotium multà caligine obvolutum est, sicuti eruditi viri negare non possunt. Ab huiusmodi autem censura non alià profectò ratione Ecclesia abstinuit, quàm quòd videret commodam probabilemque Interpretationem divinæ Scripturæ ab iis etiam adhiberi, quibus Antipodes, & Coeli ac Telluris rotunditas affirmabantur. Quando coelestibus Libris & fidei morumque doctrinae consultum erat, quid Ecclesiae intererat, quòd hanc unus, illam alter opinionem: quanquam insulsam, sectaretur? quæ auferendæ litis necessitas? Non jam ampliùs de tuenda Scriptura agebatur, sed de Astronomicis, sive Phycis rebus ac dissidiis quæ ad Ecclesiam non pertinent. Quare auctoritas Scripturæ, nisi cum evidentia loca sese offerebant, nemini contorquenda erat in suæ causæ præsidium, ne risui exponeretur, si falsa tandem deprehenderetur opinio, quam ipsæ Litteræ sacrae autèa tueri videbàtur. Origenes tutatus sententiam Platonis Aristotelis, Ciceronis, aliorumque Philosoph. de anima Coelorum, Solis, Lunæ, ac Siderum omnium, Ecclesiae fulmina in se pertraxit, tum quòd aliis commentis onerasset hanc ipsam opinionem, tum quòd è Scripturæ ver-

bis in litterali sensu acceptis sibi patrociniū quæreret? Contra laudandus Theologorum Scholasticorum princeps Thomas non tam divino ingenio, quàm prudentia & modestia ubique spectabilis. Is opusculo 10. seu XXXI Art. 16. quærens, an Angelus circulari motu movere tellurem possit, ait, ordini certè rerum id minimè repugnare, sed tamen sibi videri *quod naturaliter terra quiescat*. Id autem probaturus, non Scripturarum loca, non Patrum verba promit, sed Lectores ad unius Aristotelis argumenta dimittit.

Proinde erit hominis parum acuti, ac verum Scripturæ institutum, & Ecclesiæ mentem minimè assecuti, incerta inculcare sacrarum Litterarum verba, quo certam esse persuadere Philosophicam aliquam opinionem suam, aut falsitatis ac hæresis contrariam convincat. Incerta autem, si vè non evidentia esse diximus Scripturæ loca de indifferentibus hisce rebus. cum plures loco eidem convenire possunt verisimiles Interpretationes, exque litterales. Quæ duo tela ex elephanti ore prominent, & deorsum retorquentur, idemque sunt ac ebur, dentes appellantur ex omnium ferè Scriptorum, ipsiusque vulgi sententia. Sunt qui contendunt, cornua potius esse appellanda, quàm dentes. Varrò de Lingua Latina de his agens, *Quos dentes, ait, multi dicunt, cornua sunt. Ex temporibus enim enascuntur, & ex superiori mandibula per os resupinata sese efferunt, & decimo quoque anno ea elephanti abjiciunt & defodiunt, sicut cervi quotannis, quoties amiserint, reponunt*. Præter Varronem Juba, Plinius, Aelianus, Oppianus, Pausanias ita sensere. Experientia quoque testis adducitur, cum ebur igne emolliatur ad quaslibet recipiendas formas, quod dentibus animalium non contingit. Et hæc quidem mihi videtur quæstio de nomine. Attamen argutulus quisquam accedat, & in postremam hanc opinionem exerat arma è Litteris sacris. Ibi dentes elephantorū commemorantur 3. Reg. X. 22. & dentes eburnei. Ezech. XXVII. 15. Alibi etiam in Hebræis Codicibus ebur *scen* hoc est *deus*, appellatur. Nunc ergo rem definitam clamet ille sciolus, & pertinaciter amantem appellare cornua potius quàm dentes, tanquam erroris & impietatis reum, ad Ecclesiæ tribunal deferat. Iste profectò delirabit, risum vix sustinebunt gravissimi Ecclesiæ proceres. Cum toties à vulgo loquendi formas divina Scriptura mutetur, & ad populi opinionem sese accommodet: cur non idem hic quoque contigerit? Incerta igitur sunt ista loca, & ad hujusmodi litem inepta; certumque potius est, hominem



istum, si quis est, sacris Litteris abuti, easque invitas in disputationem philosophicam trahi.

Illi eadem nomina convenirent, qui *Lucem esse Ignem, & Lucem proprie calefacere* contendens, Græca verba Marci XIV 54. proferret, ubi Petrus dicitur θερμαινόμενος πρὸς τὸ φῶς, & *calefaciebat se ad lumen, sive ad lucem*. At nihil necesse est, proprium litteralem ac obvium sensum huius loci retinere. Vulgarem dicendi consuetudinem secutus est Evangelista. Usurpabatur autem vulgò φῶς seu *lux* pro igne, quodd nempe ignis cum calore lucem præbeat. Ità Euripides in Rheseo; *ὕπνω πρὶν ἢ ψαυεῖν πολεμιοὶ τόσονδε φῶς; Non dum antequam hostes succenderunt tantam lucem*, hoc est tantum ignem Neque minùs ineptè in Peripateticos velitaretur, qui ignem ipsum inter elementa computari non ferret, perinde quasi ipsum ab elementis S. Petrus excludat, dum ait Epist. 1. Cap. III. 12. *Et elementa ignis ardore tabescunt*. Idem plausus iis deberetur, qui ad adversus Cartesianam Scholam qualitates rerum sensibiles non in corporibus, sed in hominum sensibus locantem, ea Scripturæ loca afferret, quibus corpus aliquod amarum, dulce, candidum, nigrum, frigidum, calidum appellatur, Quod si valere, & commendari debet talis divinæ Scripturæ abusus, arguari etiam posset Copernicanus quispiam, verba afferens Lib. 1. Reg. Cap. II. 8. uti apud Latinum Interpretem habentur: *Domini enim sunt cardines terra, & posuit super eos Orbem*. Commemorantur etiam Prov. VIII. 26. *cardines orbis terra*. At *cardines*, quos *πόλλες* Græci appellant, sunt nomen relativum, & rem versatilem ac mobilem, sibi impositam, simul significant Quandoquidem ergo in sensu obvio, proprio, ac litterali omnia Scripturæ verba non repugnantia fidei, ac rationi accipienda sunt, uti à quibusdam contenditur adversus Copernicum: Tellus versatilis, ac mobilis ex origine sua dicenda esset. Verùm facessant ista ludibria, Non illa est Scripturarum indoles, ut secreta Physices atque Astronomiæ aperire mortalibus velint. Sancti Prophetæ atque Apostoli ad sublimiora intenti, & ad captum usumque vulgi sese componentem, familiares usurpabant loquendi formulas. Hoc totis inculcavimus; sed hic adungere juvat Cl. V. Dionysii Petavii verba, cujus quæ sit inter eruditos auctoritas, ii tantum ignorant, qui nullas, penè dixi, nove-re disciplinas. In Præfat. ad Libros de Opifice sex Dier. antequam aggrediatur explicandam rerum Creationem, sibi duplicem cautionem ac regulam ille præscribit. *Altera est,*  
inquit,

inquit, *verum olim re ipsa verèque gestarum Historiam in Moysi enarratione contineri; non allegoriis adumbratos & involutos nescio quos sensus spiritalium rerum corporèque carentium. Altera in illis ipsis naturalibus & corporeis exponendis rebus Moysen rudis hebetisque populi ad captum & ingenium temperasse stylum. Infrà idem repetit Hac mea perpetua sententia fuit, omnia ferè quæ hic Moyses attingit, popularem ad usum esse loquendi intelligendique demissa. Lib. autem 1. Cap. 10 quædam istius consuetudinis exempla affert. Scriptura hoc ipsum, quod cælum & firmamentum vocatur, aerem esse non raro significat. Velut cum ait Ps. 146. Qui operit cælum nubibus. Et Matth. 16. Triste & rubicundum cælum. Sunt & ista vulgata volucres cœli, & alia similia. Etenim Moyses, quod jam monui, & non semel dicere est opus, communibus & popularibus cum verbis tum verborum notionibus est usus. Vulgò autem cælum ita sumitur. Quare plebejo penè sermonis usu sic etiam Moyses & cœli & firmamenti vocabula sumpsit. Ut cum Volatile dicit volare super faciem firmamenti; ut Hebræi referunt, id est super firmamenti partem illam, & in illa, quam aerem dicit. Nimirum quod aves, dum altius ab oculis nimis volant, cælo propinquare dicuntur ἰδιον ἔως, adeoque juxta extimam cœlestis orbis superficiem, & sub ea ferri. Petavio præiverat S. Thomas in 1. parte Summæ quæst. 70. Art. 1. ad 3. de motu Luminarium atque Sphærarum agens: Moyses, inquit, *rudis populo condescendens, secutus est, quod sensibilibus appareret.* Si igitur Moyli viro divinitus afflato ita res enarrare in more fuit, eisque cum vulgò potius, quàm cum sæculi sapientibus, loqui placuit, idemque procul dubio fecere & alii Prophetæ atque Apostoli, cum tamen suis hisce vulgaribus loquendi formis ac notionibus è rudis populo petitis res veras, & sensum Historicum clauderent: quis tandem non intelligat, non esse per hujusmodi ambigua Scripturæ Sacræ verba dirimendas quæstiones Physicas, Astronomicas, & alias id genus, neque hisce disputationibus sine magna rerum evidentia immiscendas esse Prophetarum sententias, multoque minùs hæresis ac impietatis postulandos, qui aliter sentiunt, quàm Scriptura in speciem de his rebus indifferentibus sentire videatur? Certè nemo non perspiciat, his haudquaquam insistendum, hæc minimè urgenda, si commoda ac verisimili Interpretatione litteralis Scripturæ sensus aliter explicari possit; & ubi in hisce conflictationibus sine vi prospectum fuerit veracitati sacrarum Litterarum, non esse de reliquo tam anxie sollicitèque curandum. Desinit enim esse causa fidei, quæ non ampliùs ad rerum divinarum scientiam, sed ad liberales Artes, incertamque*

que mundi eruditionem pertinet. Definit esse opinio ad fidem referenda, quæ non contra, sed præter Scripturam deprehenditur esse.

## CAPUT XXIV.

*S. Augustini consilia, cum de interpretandis sacris Scripturis agitur in rebus Physicis, Astronomicis, & aliis id genus. Quid S. Thomas hic sentiat. Quam Litteris sacris nonnulli abutantur ad suas privatas opiniones tuendas. Judicium Ecclesiasticorum munus in hisce controversiis, & quæ eruditio in ipsis exigatur. Cartesii de natura corporis doctrina an fidei dogmatibus adversetur.*

**N**UUC adjungenda est ad animadversiones nostras S. Augustini doctrina, hætenus reservata, cujus unius auctoritas pro multorum esse potest. Ejus autem verba hoc in argumento aded dilucida esse videntur, ut mirari subeat, quæ homines alioquin eruditi, & minimè infantes, quamquam ea probè noverint, in aliam tamen à nostra sententiam abierint Lib. 1. Cap. 18. de Gen. ad Litteram, *In rebus obscuris*, inquit ille, *atque à nostris oculis remotissimis, si qua inde scripta etiam divina, legerimus, quæ possint salvâ fide, quâ imbuimur, aliis atque aliis parere sententiis, in nullam earum nos præcipiti affirmatione ita projiciamus, ut si forè diligentius discussa veritas eam rectè labefactaverit, corruamus; non pro sententia divinarum Scripturarum, sed pro nostra ita dimicantes, ut eam velimus Scripturarum esse, quæ nostra est cùm potius eam quæ Scripturarum est, nostram esse velle debeamus.* Nomine rerum obscurarum, atque à nostris oculis remotissimarum, nihil aliud Augustinus significat, quàm Physicas, Astronomicas, Geographicas, Chronologicas, atque hujusmodi alias, quæ plerumque magna in nocte sedent. Ipsemet Augustinus paulò infra, quibus de rebus loquatur, satis significat, nempe de terra, de cælo, de cæteris hujus mundi elementis, de motu, & conversione, vel etiam magnitudine & intervallis siderum, de certis defectibus Solis & Lunæ, de circuitibus annorum, & temporum, de naturis animalium, fructuum, lapidum, atque hujusmodi cæteris, quæ videlicet ad fidei & pietatis eruditionem, & ad rerum divinarum scientiam minimè spectant. Dum hæc igitur disquiruntur atque explicantur, occurrere Scriptorum etiam divinarum documenta possunt. Tum videndum, an ista salvâ fide, quâ imbuimur, aliis atque aliis, hoc est

est pluribus ac diversis, sint obnoxia Interpretationibus, quarum nulla stabilitis Catholicæ fidei dogmatis adversetur. Quotiescumque id accadat, auctor est S. Doctor iudicium & affirmationem esse suspendenda, atque cohibenda, Cum enim fieri possit, ut re per humanas diligentias diligentius discussa, & experimentorum ope in primis adhibita, verior sententia appareat, si quam nos jam elegerimus, eamque sacris Litteris unice tribuendam pervicaciter contenderimus, quæ falsa demum, aut à verisimilitudine abhorrens dignoscatur, tum & nos deridendos propinabimus, & divinæ Scripturæ veracitatem in discrimen estimationis ( quantum quidem in nobis est ) adducemus.

Libro sequenti Cap. 9. hæc alia habet S. Augustini. *Quærit etiam solet, quæ forma & figura cæli esse credenda sit secundum Scripturas nostras, Multi enim multum disputant de iis rebus, quas majore prudentiâ nostri Auctores omiserunt, ad beatam vitam non profuturas discendis, & occupantes, quod pejus est, multum pretiosa, & rebus salutaribus impendenda temporum spatia. Quid enim ad me pertinet, utrum cælum sicut sphaera undique concludat terram in media mundi mole librata, an eam ex una parte desuper velut discus operiat? En illam ipsam quæstionem quam supra commemoravimus, de cæli sphaericitate, Hanc ipsam nihil ad salutem, ad fidem, ad beatam vitam pertinere ait, quocumque modo solvatur; porro prudentis esse Theologi ab his abstinere, & in salubriora studia conferre tempus & operam. Attamen quia non de ista solum quæstione, sed de aliis etiam ejusdem generis quædam occurrunt in divinis Codicibus, & propterea defendenda venit eodem tempore causa Scripturarum, hæc addit Augustinus: *Sed quia de fide agitur Scripturarum &c. ne quisquam ( Christianus ) eloquia divina non intelligens, cum de his rebus tale aliquid vel invenerit in Libris nostris, vel ex illis ( hoc est Gentilibus ac Philosophis ) audierit, quod perceptis assertionibus ( sive ut in nova editione à se rationibus ) adversari videatur, nullo modo eis ( eloquiis divinis ) cetera quælibet monumentis vel narrantibus, vel prænuntiantibus, credat; breviter dicendum est de figura cæli hoc scisse Auctores nostros, quod veritas habet; sed Spiritum Dei, qui per ipsos loquebatur, noluisse ista docere homines nullius saluti profutura. Appositè Augustin. ad ea, quæ de Scripturæ S. scopo atque instituto supra disseruimus. Nihil igitur ignorârunt Prophetæ; sed Spiritus Dei docere nos ista noluit, quæ curiositati solum blandiuntur, & ad pietatem & caritatem nulla ex parte pertingunt. Quapropter, etiamsi ad istam controversiam referantur aliqua Scripturæ di-**

æ divinæ verba, nisi hæc ita aperta & circumscripta sint, ut unum tantummodo literalem sensum admittant, omnisque alia interpretatio violenta sit, ac inverisimilis, aut etiam exemplis careat, aut fidei rationiq; repugnet, non est omnino contendendum, unum potius quam alterum Scripturæ sensum ad fidem spectare. Juvat in his continere iudicium, & neutram adoptare sententiam, & ab aliena damnanda potissimum temperare, dum hæc ea sit, quæ Scripturam non invitam sibi concordare, aut saltem à se non dissonare ostendat. Quòd si alicui sententiæ de his rebus indifferentibus aut experimenta, aut potentes rationes adstipulentur, tantum abest, ut ea sit damnanda, quòd Scripturis contraria videatur, ut contrà necesse sit Scripturam ipsam per commodam aliquam interpretationem ostendere ab eadem sententia minimè discordem, dum tamen Scripturæ sensus ita evidens non deprehendatur, ut falsitatis arguenda sit illa, quantumlibet verisimilis, contraria tamen opinio.

Huc pertinent, quæ idem S. Augustinus adjicit. *Sed ait aliquis, quomodo non est contrarium iis, qui figuram sphaerae cælo tribuunt, quod scriptum est in lsteris nostris: Qui extendit cælum sicut pellem? (Ps. 103.) Sit sanè contrarium, si falsum est, quod illi dicunt. Hoc enim verum est, quod divina dicit auctoritas, potius quàm illud, quod humana infirmitas conjicit. Sed si fortè illud talibus illis documentis probare potuerint, ut dubitari inde non debeat: demonstrandum est hoc, quod apud nos de pelle dictum est, verum illis rationibus non esse contrarium. Alioquin contrarium erit etiam ipsis in alio loco Scripturis nostris, ubi cælum dicitur velut camera esse suspensum.* Tum pergit ostendere Vir doctissimus, verisimiliter, & non inconcinne posse ista Scripturarum loca conciliari cum utraque illorum sententia, qui aut cælum minimè sphæricum, aut sphæricum reverà statuunt. Quo facto, non ille sollicitus est, quid potius hac de re Pphilosophi atque Astronimi sentiant. Fide Scripturarum in tuto positâ, placidè spectari potest eorum conflictus, atq; dissensio, & unius etiam partis victoria. Cap. X. ejusdem Lib. 2. alia Augustinus habet, quæ à causâ Copernici penitus aliena esse nonnulli affirmant, de quorum iudicio eruditi viri, nullo partium studio capti, judicabunt. *De motu etiam Cæli, ait ille, nonnulli fratres questionem movent, utrùm stet, an moveatur: quia si movetur, inquiunt, quomodo firmamentum est? Si autem stet, quomodo sidera, quæ in illo fixa creduntur, ab Oriente usque ad Occidentem circumveunt? &c.* Quid ad hæc Augustinus? Neutram ille Philosophantium opinionem rejicit, neu-

tram affirmat temerariam ; sed potius contemnit, earumque rationes ne ullo quidem examine dignatur, tanquam controversias ad Fidem & Ecclesiam inutiles, & minimè necessarias. At Scriptura de his loquitur. Augustino sat est ostendere divina verba ejusmodi esse, quæ neutri opinioni contradicant. *Respondeo*, subdit ipse, *multum subtilibus & laboriosis rationibus ista perquiri, ut verè percipiatur, utrum ista, an non ita sit : quibus ineundis atque tractandis, nec mihi jam tempus est, nec illis esse debet, quos ad salutem suam & sanctæ Ecclesiæ necessariam utilitatem cupimus informari. Hoc sanè noverint, nec nomen firmamenti cogere, ut stare cælum putemus, &c.* Affiniâ sunt Augustini verbis ea, quæ S. Thomas Opusc. X. seu XXXI. habet. Interrogatus de quibusdam articulis, prius monet, plures horum ad fidei doctrinam non pertinere, sed magis ad Philosophorum dogmata. Multum autem nocent talia, quæ ad pietatis doctrinam non spectant, vel asserere, vel negare, quasi pertinentia ad sacram doctrinam. Tum ita suam præfationem concludit : *Unde mihi videtur tutius hæc, quæ Philosophi communiter senserunt, & nostræ fidei non repugnant, neque sic esse asserenda, ut dogmata fidei, neque sic esse neganda, tanquam fidei contraria, ne sapientibus hujus mundi contemnendis doctrinam fides occasio præbeatur.* Quæ verba miratur quidam, à Copernicanis in suæ sententiæ tutelam advocari, cum isti doceant, non quæ Philosophi communiter senserunt, sed quæ contra communem Philosophiam omnino conflictantur. Frustra hujus loci vim eruditus ille vir infringere conatur per illam vocem *communiter*. Et nos ejus responsionem eludere possemus legendo : non *Philosophi communiter*, sed, uti in aliis editionibus habetur, *Philosophi communes*. Verùm, quando res tenetur, superfluum est litigare de vocibus Non ideo aliquid verum, & ab errore immune est, quod communiter à Philosophis traditum fuerit ; nam & eorum dicta non sunt fidei dogmata, & novæ opiniones, antiquis contrariæ, inveni possunt, & communiter accipi ; & ipsum Copernici Systema se tueri jam posset, cum ab Astronomis ferè omnibus verisimillimum præ cæteris censeatur, & Astronomis in arte sua id juris concedendum videtur, quod Philosophis in sua. Ratio S. Thomæ, cur aliquid neque affirmare liceat, tanquam dogma fidei, neq; negare, tanquam fidei contrarium (sive *communiter*, sive non *communiter* à Philosophis tradatur) illa est, quia *fidei non repugnat, & ad pietatis doctrinam non spectat.* Talia siquidem habere non secus ac dogmata fidei, est humanis opinionibus pondus dare, quo carent ; est incerta hominum cogitata certissimis fidei revelationibus teme-

temerè æquare; & cum doctrina pietatis confundere curiositatis atque opinionis inventa ac somnia. Inter eas autem opiniones, quæ neque fidei adversantur, neque doctrinam pietatis contingunt, an S. Thomas habiturus Copernicanam fuisset, non levi conjecturâ assequi possumus; in hoc enim eodem Opusculo Art. 16. uti suprà vidimus, Telluri mobilitatem negat, suamque tamen sententiam non sacrarum Literarum testimonio, sed Aristotelicis duntaxat argumentis probat. Quod si ità est, videant, qui Systemata Astronomica ad fidei doctrinam pertrahere conantur, ne S. Thomæ gravissimum consilium conculcent, & importunè causam fidei esse vellent, quæ post adhibitam interpretationem verisimilem, Philosophorum tantummodo atque Astronomorum esse videtur.

Atque hætenus oratio nostra, & tanta verborum moles, non ut Copernici patrocinium suscipiamus, cujus opinionem nunquam nobis animus fuit adoptare, aut plusquam verisimilem arbitrari, sed ut quosdam avertamus à pertrahenda nimis facilè, imò contorquenda in istud quæstionum genus auctoritate Scripturæ. Nesciunt ii, sæpius hunc esse divinorum Librorum abusum, quàm usum, & hîc etiam superstitionem, temeritatem atque stultitiam habere posse locum, quæ de re conqueritur Augustinus in Libris nuper laudatis. Deinde palam facere volumus, cur tam cautè ac rarè ad cõfingendas opiniones à doctrina fidei ac pietatis suapte natura distitas, Ecclesia Catholica & Romani Pontifices procedant. Si quando igitur Ecclesiastici Judices utile sive necessarium putabunt ad severius examen poscere tot nuperas, in Physica præsertim, Medicina, & Astronomia, sententias, quibus tempora nostra adeò abundant: dubitandum non est, quin eorum judiciû præcessura sit omnis cautio, diligentia, & causæ cognitio. Et sollicitè sanè cavere solent sapientissimi judices, ne quis sub specie tuendæ fidei, servandæque salutaris doctrinæ curet, ut suæ peculiæres opiniones consecrentur, & ab Ecclesia recipiantur. Sunt qui, non pravo certè consilio, sed incauto sui, suarumque anticipatarum opinionum amore in hanc fallaciam dilabantur. Quicquid animo prius imbiberunt, & vetustatem, olere sentiunt, sacrum ipsis est, & sacrum reliquis etiam, quantum quidem in ipsis est, esse volunt. Si quis igitur contrà sentit, & nova profert, vix fieri potest, quin continuè in eorum odium offensionemque incurrat. Nam quis ferè tam sui dominus, animoque tam probè composito esse solet, ut quæ non tam sibi, quàm alijs, veluti cer-

tissima tamdiu persuasit, repudiare tam serò velit? Quis lubenter fateri senex, se primò deceptum, tum alios decepisse, & sibi erranti se alios adjunxisse pariter errantes? Ambitiosissima animalia sumus, nobisque cordi magis est (quanquam aliter nobis ipsis videatur) existimationis propriæ, quàm veritatis causa. Facillimè etiam nobis amor nostri persuadet, tunc nos pro una veritate configere, cum magis ipsam insectamur; non enim pro illa, sed pro opinionibus nostris nobis est pugna, quas verissimas esse olim statuimus, falsasque deinde demonstrari posse impossibile ducimus. Et quidem occinere possis veteris scholæ amatoribus, nova hæc ad fidei doctrinam minimè pertinere. Nihil refert. Antiquæ sententiæ & hæc obtinere debent, quanquam interdum verisimiliores. Omnis porrò lapis movendus, quo suadeatur, Novatores istos aliqua ex parte in Religionis dogmata, atque in sacras Literas aut imprudenter aut inconsultò peccasse.

Non pravus tamen sæpè zelus, immo utilis plerumque diligentia illorum est, qui in has novitias opiniones primi aciem movent. Si non aliud commodum per eos præstetur, saltem deterretur impietas, atque audacia à venditandis suis mercibus, quandoquidem ne ipsis quidem innoxiiis opinionibus sinè rigido examine concessus est aditus. Interdum etiam latentia quædam venena hac ratione deteguntur, ac remonentur. Quæ verò sana sunt, vegetiora post exhaustam pugnam exsurgunt. Accusationes igitur, & consilia istorum non contemnit, sed amat Ecclesia. Irà tamen amat, ut ea interim accuratè expendere velit, saluberrimè cavens, ne plus aliquorum affectus valeant, quàm veritatis jura. Exploratum siquidem est, quod suprà sanctus Augustinus agebat, nos interdum *non pro sententia scripturarum Scripturarum sed pro nostra ità dimicare, ut eam velimus Scripturarum esse*, quæ nostra esse. Neque minus certum est, novitatem ac vetustatem sententiarum in hujusmodi incertis disciplinis inanes plerumque titulos esse, quippe quæ nullum per se certum aut veritatis aut falsitatis indicium secum trahant. Id tantummodo verum est, quod solidis verisque rationibus nititur, neque à certa fidei doctrina discrepat. Illud falsum, quod cum ratione recta, & fidei dogmatis, aliisque certis monumentis apertè configit. In Christi solùm schola antiquitas doctrinæ quò major est, eò fortius veritatis argumentum præstat adversus novitatem. Extra istam scholam veriora novitas, quàm antiquitas, tradere interdum, aut sæpè potest.

Quo-



Quocirca inter accusationes, defensionésque, medii stant oculo cautissimo Ecclesiastici Judices, & nunquam committunt, ut sibi alterutra pars illudat, fucúmque faciat declamationibus vanis, nominibúsque falsis. Quod ut facilius accadat, sincerissimos tantùm veritatis amatores sincerissimi & ipsi in consilium adhibent. Neque contenti cùm à se ipsis, tum à suis consiliariis arcere studia partium, congruam sibi vel per se, vel per eosdem comparant cognitionem causæ. Quam in rem animadvertendum est, esse quosdam, qui in Judiciis Ecclesiasticis, cùm de Physicis, Astronomicis, & hujusmodi rebus judicandum est, absolutam istarum disciplinarum scientiam postulant. Nam quid solidi exspectes, ajunt, immo quid non exspectes infirmi ab iis, qui de incognitis, sive non sat perspectis negotiis judicium ferunt? Contrà sunt, qui Præsules Ecclesiæ, atque Theologos ab hujusmodi labore amplissimè liberant, sat esse arbitrati, si nudam sententiam sive Physicam, sive Astronomicam sibi oblatam conferant cum Scripturæ sacræ, Catholicæque Theologiæ documentis, & deinde statuant, num his veritatibus ea opinio repugnet, an eum ipsis amicè consentiat.

Verùm illi fortasse nimia, isti certè nimis pauca à Theologis, & Ecclesiasticis Judicibus exigunt. Episcoporum non est, ut verum fatear, considerare atque decernere, sintne veræ an falsæ in Philosophia, Astronomia, cæterisque artibus profanis propositæ opiniones. Pertinet ea cura ad Philosophos, earumque artium peritos, non autem ad Theologos. Atque adeò hæcce opiniones Ecclesiasticus Judex contemplari solùm, & tanquam consonas scientiæ divinarum rerum, atque revelationi, aut ab ea dissonas. Ad quod opus sufficit, ut illam sibi earum sententiarum notitiam paret, qualis à viro prudente exigitur, adeò ut sibi conscius sit, se quæstionis statum, remque ipsam sinè errore intelligere. Hoc præstare etiam potest, qui non sit numeris omnibus perfectus Astronomus, & Physicam omnium scholarum exquisitissimè priùs dedicerit. Notitia, inquam, & cognitio congrua opinionum profanarum necessaria quoque est Ecclesiastico Judici, quanquam quousque se protendere debeat, quantaque futura sit, ne imprudenter Theologica trutina de iis judicet, vereor, ut unquam definiri aptè possit. Sunt enim, quæ communem tantùm hominum intelligentiam exposcunt; sunt, quæ ab exquisitis atque abditis scientiarum ac artium principiis arctissime pendent, vixque teneri possunt, nisi priùs ipsa

principia intellectu probè complexus fueris. Quid hîc faciat Judex prudens? A præcipiti judicio abstinere, arbitrator, donec in rei penetralia tuto pede sese ingesserit. Illud porro certissimum est, oportere semper, ut antea quam pronuntietur, an sacrorum Codicum, & Orthodoxæ Theologiæ documentis opinio quæpiam consonet, siue repugnet, perspectissimæ sint Ecclesiasticis Judiciis tum negantium tum affirmantium rationes, non solum quatenus Theologiam respiciunt, sed quatenus etiam ad singularem aliquam disciplinam spectant. Quæ res necessariò exposcit, ut ea saltem disciplinæ pars cognoscatur, unde rationum cognitio pendet. Si, exempli gratiâ, quærat, an fidei doctrinæ adversetur Cartesius, cum essentiam Corporis Phisici statuit in extensione quantitatis, neque substantiam ab ipsa quantitate secernit: erunt profectò complures, quibus conciliari non posse videbitur hujusmodi placitum cum Ecclesiæ sententia de augustissimo Altaris Sacramento. Hîc profectò necesse est, ut de ista controversia judicaturus Peripateticam Scholam aliquantis pererrat, donec substantiæ, specierum, atque accidentium nomina ac historiam probè nôrit; ad ejus quippe scholæ sententiam respexisse videntur Tridentini Patres de Transubstantiatione loquentes. Tum delatam ad Ecclesiasticum tribunal Cartesii opinionem si seriò, si natura corporis perscrutetur oportet, rationesque perpenderit, quibus ille suam sententiam ingeniosè muniavit.

Id plurimum intèrest. Nam, ut alibi diximus, verum vero adversari nequit, atque uti cum veritatibus Theologicis Philosophicæ, ita cum Philosophicis Theologicæ reverà pugnare non possunt. Quamobrem tam ex his illæ, quam ex illis istæ lucem mutuò accipiunt, & certa incertis dant legem; ut si exempli causâ aliquid in Phisica certum sit, inde incerta sacrarum Scripturarum verba sint explicanda, & contrà certis divinatorum Librorum sententiis incerta Phisicæ documenta se conformare debeant. In hac autem controversia statim occurrit, jam spectare ad fidem, certissimùmque esse debere inter Catholicos, substantiam panis, & vini in Sacramento Altaris converti in substantiam Corporis & Sanguinis Christi, permanentibus tamen ac perdurantibus in Sacramento pristinis speciebus panis ac vini, ita ut externis sensibus nulla illic appareat facta substantiæ mutatio, atque non amplius sit, neque appellari propriè possit panis & vinum, quod ante consecra-

crationem panis & vinum propriè fuerat Cùm ergo verissimum, certissimùmque hoc sit in fidei Theologia, id quoque in Philosophia verum certumque sit, necesse est; & fallacià laborabunt quæcumque verisimiles, ingeniosæque rationes à Philosopho excogitentur contra firmissimum hoc fidei documentum. Propterea se rem non inficiari, se rem credere, Cartesiani Catholici ubique ajunt. Modum tantummodo, quo hujusmodi prodigium fiat, & quomodo pereat, intactis speciebus, panis ac vini substantia, ab Ecclesia minimè fuisse constitutum, affirmare se posse arbitrantur sinè injuria Theologiæ. Tum nervis omnibus contendunt, ut ostendant, nihil dogmati fidei repugnare naturam, ac essentiam corporum, quam tradunt, suamque opinionem conciliari posse cum Ecclesiæ decretis. Utrum isti vera, an somnia nobis narrent, qui judicare prudenter cupiat, necesse est in primis, ut sollicitè vestiget, intelligat, & expendat Cartesianæ sententiæ rationes, tum perspiciat, an uti rem, ita modum Ecclesia quoque statuerit. Si enim vera & certa deprehenditur Cartesii de natura corporum opinio, neque modum physicum Sacramenti definivit Ecclesia; neque reipsa Aristotelicum placitum consecrare illi animus fuit: jam non est, cur Cartesianam sententiam explodamus; cùm præcipuè in ea fuisse sanctus Augustinus videatur, immo tunc non aliud, quàm quod Cartesius, sensisse Ecclesiam, excogitare licebit. A Cartesianis autem putatur, minimè Tridentinis Patribus fuisse consilium consecrandæ Peripateticæ de natura corporum sententiæ (ab his enim quæstionibus dirimendis Ecclesia abstinere solet) & consultò ipsos Patres vocabulo specierum fuisse usos, cùm accidentia nominare potuerint, ut eâ voce solùm significarent sensationes illas, quæ sublatâ panis ac vini in Sacramento substantiâ adhuc in sensibus nostris fiunt, & fieri non negant cùm Peripatetici, tum Cartesiani. Contendunt insuper, Ecclesiam nequaquam statuisse, quæ species in Sacramento sinè substantia panis ac vini permaneant. Quibus diligenter ab Ecclesiastico Judice examinatis tum constare poterit, num absurda, num falsa sit, illa Cartesii opinio (qualis certè erit, ubi cum certo & vero dogmate Ecclesiæ consentire non posse dignoscatur,) an potius toleranda sit, sive etiam laudanda.

Hoc ergo exemplo patere potest, eas esse interdum quæstiones, quæ à mero Theologo prudenter absolvi nequeant, nisi in disciplinas illas excurratur, unde pendent

argumenta quæstionum. Constat etiam, prudentis judicii leges exposcere, ut non accuratè minus in his controversiis investigentur, intelligantur, & expendantur accusatorum, quàm reorum rationes. Cavere autem præ omnibus Ecclesiasticos Proceres debere, ne quis eorum auctoritate & gratiâ abutatur, profanas nimirum & Philosophicas opiniones ad sacri Juris tribunalia deferens, & impietatis postulans, & damnationem suadens, & urgens, quasi de Christianæ Fidei magno negotio agatur, cum tamen anticipata aliqua opinio, & Aristotelis, exempli gratiâ, amor, & odium alienæ sententiæ potiùs, quàm sanæ fidei tutela, tantos conatus exciverit. Facile appareat, quid Judici Ecclesiastico accidere possit, si hujusmodi accusatoribus Religionis causam præferentibus facile credat, & præcipuè si ipso sinit in consilium adhibeat, & unico eorum filo se in judicandis controversiis regat. Quod & dictum velim, dum de meris Theologicis, imò de quocumque alio negotio lis excitatur. Maximi ponderis res agitur, cum de fidei doctrina, cum de opinione probanda, sive improbanda, & de aliena fama congenda, hominibûsque damnandis agitur. Jacta alea revocari amplius non potest. Si post accuratum examen tenebris adhuc obsita manet controversia, præstat judicio parcere, quàm errandi discrimen subire. Interdum etiam Ecclesia re in medio relicta, accusatoribus silentium indicit, donec accuratiori trutinâ iterum causa pensetur, prohibetque ne pendente judicio nota hæreseos aut impietatis impingatur opinionibus exagitatis. Interdum denique sententias aliquas, licet nondum postremo calculo damnatas, tradi tanquam certas & veras, Ecclesiastici Judices prudentissimè vetant. Etsi enim eas falsas & fidei doctrinæ oppositas non judicârunt, periculi tamen plenas, & errori proximas intelligunt. At de his in sequenti Libro fusiùs nobis agendum est, ubi investigabimus, quando nam, & ubi, & quibus liceat, sive non liceat, veritatem prodere, literis que consignare, & quæ sint jura

Ecclesiæ, ut nos aliquando ab opinionibus, quas  
nos putamus veras, scriptis aut ore  
prædicandis avertat.





D E  
INGENIORUM  
MODERATIONE  
IN RELIGIONIS  
NEGOTIO.  
LIBER SECUNDUS.

---

CAPUT I.

*Amplum jus Ingeniis in prodenda, ac annuntianda veritate : sed ita ut iustitia, caritas, & prudentia nunquam ab isto jure ledantur. Heretici in sua Religionis doctrina annuntianda, quippe de illius veritate non satis certi, & sine missione legitima Evangelium predicantes, iustitiæ defunt.*



Ummo ac præstanti ingenio viri, quos defidia nunquam invadere, nunquam turbulenti rerum terrenarum affectus occupare diu possunt, solent, abjectis omnibus curis, se totos ad inquisitionem veritatis conferre, atque in eius contemplatione tanquam in beatissimis Elysiis consistere, ac sese abdere. Quod minimè mirum; nam cum humana felicitas, vel ipsis Ethnicis Philosophis testibus, sita sit in sapientia, virtutibusque animi: quænam vera virtus, quænam vera

sapientia homini contingere potest, nisi in sacratissimum aditum veritatis prius fuerit penetratum? Inter tot autem veritates quibus si recte utamur, ad bene beatéque vivendum quasi manu perducimur, illa certè omnium princeps, & sola propemodum necessaria, veritas Christianæ Religionis, unde tot sanctorum dogmatum eruditio fluit. Qui verò hîc profecere, vix imperare sibi deinde potuerunt, quominus alios quoque homines continuò adsciscerent in suæ felicitatis communionem. Itaque aut in libris aut in disputationibus, aut etiam in publicis scholis, & rostris, veritates à se compertas, magnâ contentione animi atque ingenii, vulgârunt, illustrârunt, suaferunt. Quod alterum studium si priore etiam longè laudabilius, neque tamen minùs utile dixerimus, luculentissimæ rationes facillè occurrent, quibus sententia nostra firmetur. Cùm itaque versata sit hæcenus oratio nostra in iis persequendis, quæ spectant ad investigandas, & consequendas sine errore saluberrimas Christianæ Fidei, Catholicæque Ecclesiæ veritates: restat ut in posterum explicemus, quemadmodum etiam, & quatenus, annuntianda sit atque aliis communicanda huiusmodi eruditio. Et hîc enim, non secùs ac in superiore navigatione, scopuli, & firtes, & pericula varia offenduntur, à quibus nisi maturè opportunèque caveamus, verendum est, ne jactura fiat non solum existimationis & nominis sed etiam terrenæ quietis, & coelestis demum beatitatis.

Illud ergo ex omnium sapientium consensu exploratum in primis est, uti in quærenda ac discenda veritate, ità & in proferenda atque prodenda, amplissimum jus pateri ingeniis humanis. Inter honestissima simul, utilia, & delectabilia bona proximum à Deo locum veritas, imò, ut melius dicamus, eundem cum ipso locum obtinet; Deus enim sùmma, & ipsa veritas est, cujus particulæ variae ac innumeræ se in hominum mentes infundunt, & per omnia creata excurrunt. Quamobrem cui contigit veritatem, hoc est eximium istud bonum, consequi, nullum dubium est, quin & liceat, & laudi singulari verendum sit, reliquis etiam partiri tam nobilè divinûmque patrimonium. Christiani hominis est alios efficere meliores, & sapientiores, cùm possit, & lucem, quam sibi comparavit, communem aliis velle. Neque verò ut in terrenis opibus distribuendis atque clargiendis usu venit, quisquam sit minùs quàm antea dives, communicatâ reliquis hominibus veritate. Nihil propterea decrevit privato hominis ærario,  
& ani-

& animus ditior inde potius evadit, cum ad priora ornamenta accedat liberalitatis laus, & caritatis fructus. Interdum verò non licet solum, sed etiam necesse est veritatem annuntiare, & prodere, atque tueri, quod onus Episcopis, & universis Pastoribus Catholici gregis incumbit, cum ad populos doctrinâ sanâ informandos, tum ad errores subinde nascentes eliminandos. Interdum non necessitate quidem, sed optinio, summæque pio consilio veritas disseminatur, cum nempe ad populos barbaros atque infideles Evangelii lumen defertur, quod sanctissimum opus per tot secula una Ecclesia Catholica sibi vindicare & peragere consuevit, ad adhuc peragit, Apostolicæ fidei non minus quam zeli Apostolici hæres.

Verum hæc non sunt huius loci, neque ampliorem sermonem postulant; adeò apertum est, atque homini à natura insitum, honestissimam, sanctissimam, & eximiis laudibus dignam esse veritatis propagationem, & illius præcipue, quæ ad æternam vitam perducere potest. Satiùs ergo est statim aggredi limites, quibus constringitur vastum jus ingeniorum veritate annuntianda. Quod ut paucis complectamur, illud maturè statuimus, recta esse non posse hominum opera, nisi à iustitia vera procedant, & caritatem christianam ducem, prudentiam verò comitem habeant. Has ergo virtutes præ oculis habeat necesse est, qui rectè proferre, aliòsque docere velit veritates ad orthodoxam religionem & eruditionem christianam spectantes. Primum autè iustitiæ munus est interdicare, ne quis in negotio Religionis veritatem evulget ac tradat, quam ipse tertò priùs non noverit reverà talem esse. Non inquam, homini licet, tanquam vera fidei dogmata proferre incertas opiniones suas, aut certi erroris insinulare atque damnare, quæ sibi falsa & damnanda esse prius non constet. Quis enim non intelligat, quantum ab æquo & ratione abhorreat, tanquam medicinas propinare, quæ venena esse dubitare possis? Et id quidem temerè fiat in curandis humanis corporibus. Quantò autem minùs tolerandum est in animarum curatione, cum de hominum æterna aut salute, aut damnatione agitur, non de temporaria corporum vita? Nefas ergo est, & iustitiæ legibus adversatur, in tanti mali discrimen populos adducere, & tanquam veritates Theologicas venditare, quæ fortè perniciosissimi errores esse deprehendantur.

Equidem fateor, non tam facilè invenias homines in hanc iustitiæ partem oculis apertis animoque sui criminis

aut

aut periculi conscio incurrentes. At innumeros profecto, offendas ex ignorantia, & cæcitate mentis, & ambitione peccantes. Rari, inquam, sunt, qui dum populum erudiunt, dubitent de veritate suæ legis. Serecta certaque tradere constanter arbitrantur, vel dum apertè errant atque delirant, ipsique omnium pestilentissimi Hæresiarchæ non aliter (quantum quidem conjicere juvat) de sua doctrina plerumque judicabant. Verùm neque ipsi Hæresum conditores, neque Hæreticorum gregarii idcirco ab eorum numero eximi possunt, qui veritatem & justitiam ex temeritate saltem & cœcitate lædunt, dum pro veritate errores incautè disseminant, & Christi gregem quanquam nolentes, inficiunt. Si minùs occupati forent opinionibus anticipatis, si plus humilitatis ac sinceritatis eis esset, tum intelligere possent, tum fateri fortasse vellent crimen suum atque infortunium. Ipsos toties Catholici provocârunt ad rationem reddendam, quare fidem veram & justitiam non conculcarint, cùm ab Ecclesia Catholica discesserunt, & schisma adhuc conflent, & diversas à Catholicis sententias tradant, & aliqua Catholicorum dogmata erroris ac impietatis accusent. Oblata est ipsis germana & unica methodus, quâ se ritè purgarent, & in tanto negotio se minimè hallucinari ostenderent. Legitimas causas nondum attulit gens illa, propositi tamen sui tenacissima, & nunquam allaturam esse, certum est nobis. Nam quî à se veritatem stare illi ostendant, cùm certam methodum fugiant, ut rem tantam pro dignitate fidei, & sui salutis necessitate, convenienter assequantur? Quî se in suo schismate atque doctrina nullo crimine, aut errore teneri evidenter ostendant, postquam Traditionis vim, Ecclesiæ veræ & Conciliorum auctoritatem, sanctorumque Patrum consensum flocci faciunt, & Ecclesiam ipsam non solum turpissimis in dogmate erroribus obnoxiam, sed etiam in ipsos errores jam foedè prolapsam; & per tot secula Babylonem, & Meretricem egisse, affirmare non dubitant? His fundamentis everfis, quæ tamen tantopere à divinis Scripturis commendantur, & excogitato admissoque tam horrendo Ecclesiæ Catholicæ adulterio, à quo tamen abfuturam semper Ecclesiam veram Scripturæ ipsæ pollicentur: quid jam certi superest, ut quis sibi aliisque sine hæsitatione persuadeat, se in Christiano dogmate nunquam errasse aut errare, suamque Ecclesiam legitimam esse Christi sponsam? Videndum igitur, an oculorum mentisque usum iis eripuerit, aut eripiat ambitio. Expendendum est, virêne majores apud illos

suum



suum, an totius Ecclesiæ Catholicæ judicium sit habiturum, & an totius antiquitatis consensio sit dissonantibus Novatorum consiliis in tanto negotio præferenda, Fortasse mentibus tam malè affectis certissima statim non appareant quædam Catholicorum dogmata; sed profectò neque certa Novatorum videbuntur documenta, si accuratè aliquantulum res pensitare, & cautè judicium ferre velint. Quod si dubia ac incerta sint, in quibus Novatores à Catholicis dissentiant: quo jure nutantes sententias populo ii venditant, ingentique errandi periculo credulam gentem exponunt?

Altera justitiæ lex est, ut Evangelii veritas non nisi ab iis annuntietur, qui aut apertè, aut tacitè ab Ecclesia, legitimisque Ecclesiæ Pastoribus ad annuntiandum mittantur. Hanc legem Apostolus statuit, & ratio ipsa confirmat. Erroribus obnoxii sunt singuli homines; sub ovina pelle delitescere possunt lupi, & fallere gregem; Hæretici identidem prodeunt, morbosam doctrinam disseminantes; & innumera sectæ veritatem, & verum Dei cultum longè latèque sonant. Hinc infici corruptique facillè potest ovile Christi; non enim indoctæ plebis est, sophismata omnia ac deliramenta ad falsi originem revocare, sibi que à tam benè comitis mendaciis cavere. Ipsi acuti ac eruditi homines non rarò inter ista fluctuant, & ducuntur contrariis opinionibus. Ergo poscit ratio, ut iis tantùm liceat erudire populos, qui legitimam docendi auctoritatem ab Ecclesia vera acceperint. Neque itidem populis licet alios audire, ac habere Doctores, quàm quos Ecclesia vera ad id muneris ritè elegerit, aut in eo munere versari ipsa apertis oculis patitur. Cùm in una Ecclesia Dei veritas Religionis, & sana doctrina habitet, quicumque istâ Ecclesiâ probante, aut saltè, cùm conscia sit, non improbante, doctorem agit, jure agit, & jure censendus est ab errore abesse, & vera tradere. Contrà ille justitiam lædit, qui non vocatus, non missus, non saltem tacitè probatus, sumit sibi honorem, & docendi ministerium usurpat.

Mirum est, quàm anxios efficiat, & verbis rationibusque exarmet hic locus sinceris veritatis amantes, quorum non pauci adhuc sunt inter nostri temporis Novatores. Et ipsi intelligunt hujus legis æquitatem; nòrunt hac de re Apostoli præcepta; statuerunt & ipsi, nemini licere sine præviâ legitimâ vocatione, atque missione, verbi Dei præconem fieri. Primi autem prætensæ, quemadmodum vocant, Reformationis Auctores, Lutherus, Zuinglius, Calvinus, Socinus

cinus, & alii, quo titulo, quæso, quo nomine Christianorum orbem docendum sibi sumpsere, & antiquissimas Catholicæ Religionis cùm sententias tum consuetudines inmutandas, ridendæve suscipere? Nulla ipsis extraordinaria, ut ajunt, & immediata à Deo vocatio fuit. Si fuisset, signis & prodigiis, quæ veraces ac veros Dei Prophetas perpetuò comitantur, divinitus acceptam docendi auctoritatem confirmassent. Defuit & ordinaria vocatio. Non ipsis sacrum docendæ plebis munus, & Scripturas interpretandi, & ritus veteres proscribendi facultatem demandant aut Romani Pontifices, aut Episcopi legitimi, aut Concilia Orthodoxa. Imò Episcoporum omnium, & Ecclesiæ totius voce atque consensu id munus ipsis interdictum fuit ac ereptum, eorumque audacia damnata. Ipsi præterea sese vel tacentibus Episcopis, jam reos prodiderant, atque damnarant. Etenim nonnulli ne Sacerdotum quidem albo adscripti fuerant, & tamen Sacramenta ministrare sunt auli. Rerum divinarum imperiti quidam fuere; & tamen Scripturas sacras suo Marte explicare, & eo in studio à sanctis Patribus discedere non dubitarunt. Deinde quando, nam Dei Ecclesiæ lubenti animo ferat, & probet, & auctoritate donet homines qui se ipsam evertant, & Altare contra Altare erigant, & schismata faciant? Dubium ergo nullum esse potest, quin primi isti Hæresum Auctores Justitiæ inflixerint magnum vulnus, dum veritatem, quam perditam aut viciatam sibi consingebant, restituere conabantur. Nemo autem ex iis justum se putet, qui tam injustos potius duces, quàm ipsam Christi Ecclesiam, pertinacissimè sequuntur. Nam quod ajunt, annuntiandæ veritatis, & refellendi erroris, christianam omnibus esse libertatem, eamque ita singulis inesse, ut eripi nobis à nemine possit, ac debeat: splendide profectò falluntur. Cur quosdam *pessuit Deus in Ecclesia primum Apostolos, deinde Prophetas, tertio Doctores, in opus ministerii, in aedificationem corporis Christi?* Cur Hierarchicum Ordinem instituit? Non igitur omnium est Sacerdotem Doctoremque legis agere, sed eorum tantummodo, quos Ecclesiæ publicè decernit, aut non invita patitur. Accedit, quòd tum certè vim habitura non est hujusmodi libertas, cùm annuntianda est veritas incerta, ubique sunt errores, quos exagitandos suscipimus; multoque minus, cùm nuntianda sunt pro veris falsa, prava pro rectis, & cùm ab errore longissimè illa absunt, quæ judicantur damanda. Porro sana esse, quæ ab Hæreticis in Ecclesiâ Catholica repudiantur; corrupta quæ ab Hæreticis in

cis in suis conventibus ac Libris proponuntur : potior Christianorum pars hucusque contendit. Quare si petas ab eruditis viris, num iure non adimi possit ingeniis hisce novaturientibus docendi in Ecclesia libertas : nemo negabit. At inquam Hæretici: Certi nos sumus, nos nihil tradere, quàm quòd Christus & Apostoli tradiderunt, nos nihil damnare, nisi quòd Christi & Apostolorum doctrinæ adversatur. Ità porro arbitrentur: sed quidnam aliud occinerunt antiqui Hæresiarchæ, eorùmque filii, quos tamen & ipsi Novatores, non secus atque Catholici impietatis arguunt? Num idcirco iis pestibus grassari liberè licuit. & veneno populos afflare, reclamante nequidquam Ecclesia: Quod si quis è Novatorum gremio exurgat (quod identidem fieri consuevit) & falsi postulare dominantem Religionem, aliàmque invehere unà cum aliis doctrinis velit, Evangelii nuntiandi, ac erroris confodiendi jure amplissimo sese tuens: nemo inter ipsos Novatores hominem, ejusque audaciam non abhorreat, non damnet, & ad silentium compellat. Nemo ab eo audiendo suum non avertat gregem. Nolint ergo suos partes alio à nobis dimetire pede, quàm quo suos ipsi filios dimetirentur, in parentem Ecclesiam armatos. Et discant, læsam ab eorum patribus justitiam, & ab unaquaque in posterum quoque lædendam, quoties sine aperto aut tacito Ecclesiæ veræ consensu, docendi munus arripiant, licet nonnisi vera & recta se prædicare arbitrentur.

## CAPUT II.

*Caritas quando obftet, ne veritas evulgetur. Ejus leges. An, & quando, & quomodo evulgandi errores Procerum Ecclesiasticorum. An aliorum errores, & vitia, & quando id liceat aut necesse sit. Abusus, & excessus in hisce, An mordacitas styli ferenda.*

**V**eritatis præconibus non sola justitia præcipit, ut cautissime prius & sollicitè caveant, ne falsa pro veris venditent, ne pro recta perversam doctrinam obtrudant. Id etiam caritas & prudentia arctissime præscribunt & imperant. Quale enim amoris genus illud est, quo proximum nostrum prosequimur; quale prudentiæ facinus, cum ipsum vitiosis aut agendi, aut credendi documentis imbu-

entes,

entes, à veræ fidei ac pietatis semita stolidè avocamus? Dubitatio ipsa, ne venenum propinemus à medicina exhibenda absterre nos debet. Hostis enim potius, quàm amantis est, in æternæ mortis discrimen illos adducere, quos certus non sis te ad æternæ vitæ spem erudire posse. Verùm non hîc solum stat caritatis & prudentiæ disciplina. Etiam si vera ac certa sint, quæ tradere animus est, quædam tamen sunt, quæ silere ac tegere, interdum prudentia, interdum caritas nos jubet. Justitiam fortasse læsuri non sumus vera narrantes; ac certè caritatem, certè prudentiam quandoque vulnerabimus, quæ non omnia vera ac certa, neque semper, in publicum efferri patiuntur. Quid igitur caritas & prudentia hîc velint, & quænam sint earum consilia & leges, differendum restat.

Prima lex ista à nobis ponitur: *Ita dicendum, aut silendum est verum, ita errores aut resellendi, aut dissimulandi sunt, ut caritatis ordo servetur.* Id ni fiat, ipsa caritas desiderabitur. Videlicet præponendus est ex institutione charitatis amor Dei, & Fidei, & Ecclesiæ cæteris amoribus. Post hûc amorē valere plus debet Reipublicæ, Regis, & Patriæ, quàm privatorū dilectio. Primam istam legem Religio & Philosophia sumopere commendant. Ex iis enim virtutibus est caritas, quæ ordinem exigunt, & sine ordine pereunt. Recta autem ratio docet, majorem iis rebus amorem deberi, quibus est majus pretium ac dignitas, & quibus nos majora debemus. Proinde oblati duobus, quorum alterutri, prodeundo, sive occultando verum, displicere, ac placere oporteat, nullum esse dubium, quin illi sit inserviendum, quod apud nos amore sit dignus, atque præstantius, præferendūque sit privato publicum, temporario æternum, corporeo spiritale bonum. Altera caritatis lex est: *In profigandis erroribus, & in predicatione utilis aut necessaria veritatis, ita se gerere homo debet, ut moderationis quantum fieri potest recordetur; atque ut id solum curet, quod sanare alios, melioresque efficere, non autem vulnerare pejoresque facere possit.* Proinde inde nullam caritatis rationem habere dicamur, si unà cum erroribus homines persequimur, si eorum mores atque existimationem pessumdare nitimur, si nomen potius nobis, quàm proximo nostro salutem conquirimus, proditâ inhonestè illius imbecillitate, atque ignominia. Duas itidem leges prudentia nobis ob oculos ponit. Earum prima est: *Circumspiciendum esse veritatem predicaturis, nedum unum bonum ex una parte quærunt, gravius ex ea malum incautè excident, qualia sunt schismata, scandala, funesta dissidia, atque horum similia.* Altera est

*est: In prædicando vero, & alienis erroribus insectandis, perpendendum esse tempus, locum, & personam cum corrigentis, tum corrigendi, & qualitates cum dicentis, tum dicendorum. Non enim cuiuscumque licet quemcumque corripere, & omnia prode-  
re, aut ibique, aut quovis tempore.*

His legibus positis, atque alæ animo infixis, tam difficile non erit agnoscere, quando necesse sit, aut expediat, aut deceat, veritatem prodere, & litteris consignare, quæve ratione præstandum id sit, aut ipsam occultare, atque silentio tegere. Fingamus ergo, Auctorem aliquem, aut Episcopum, aut etiam Primatem Ecclesiæ virum, in doctrina Christi reverà falli, errorésque suos aut scriptis, aut voce in vulgus spargere. Ejus vulnera dissimulare piaculum fuerit, Nam quamvis ipsius accusatio, & inde emanans ignominia, à caritate, quam ipsi debemus, recedere videatur, caritatis tamen ordo poscit, ut Ecclesiam & Rempublicam magis amemus; neque committendum est, ut universitas periclitetur, dum uniús existimationi servandæ studemus. Veritatem itaque revelare, ac super tecta prædicare, falsaque dogmata quantis poterit viribus impugnare, hæc non solum unicuique Christiano licebit, sed necesse erit sacris Ecclesiæ custodibus. Imò, istis præ timore, negligentia, ignorantia, aut conspiratione tacentibus, privato cuiuscumque homini id oneris incumbet, ut in lupum exurgat, dormientesque Pastores suis clamoribus excitet. Ne ipsos quidem sanctissimos Patres, nobis alioqui summâ veneratione spectandos, habere aliter in hac parte decet. Homines & ipsi fuerunt. Incautè interdum locuti, pessimè sensisse videntur. Nonnulla etiam Ecclesiæ decreto nondum stabilita tradidère, quæ qui nunc pervicaciter tueretur, Hæretici notam nequaquam effugeret. Huiusmodi ergo nævos arguere, ac prodere liberum est nobis; non quod malè doctissimis iis & venerandis capitibus velimus, sed quod Ecclesiæ toti, ac fidei sanctissimæ velle melius debeamus, quàm singulis ipsis Patribus. Juvat autem, & Reipublicæ plurimum interest, nosse quibus in locis non satis recta tradiderint Majores nostri, ne quis tantorum nominum auctoritate, ubi non debet, fretus, in transversum agatur, ipsamque Ecclesiæ universæ fidem inde oppugnet. Est & hoc aliquod caritatis genus in ipsos sanctissimos Patres, atque in alios errantes. Illi, si viverent, Libros suos lubentissimè emendarent. Cum id amplius ipsi non possint, amant tamen sibi à posteris eam medicinam adhiberi, quæ si purgare penitus Libros suos, ac certè à suis Lectoribus arce-  
re morbum

qualemcumque valeat. Reliqui verò, dum di vunt, erroris moniti, sicuti honestatis & veritatis amantes putandi sunt, ità gaudere credendi, quòd tum se, tum Lectores Auditoresque suos ope nostrà ab errore sentiant revocatos. Atque hæc de erroribus, qui in Fidei Christianæ & Ecclesiæ Catholicæ perniciem recta contendunt.

Alii sunt errores extra fidei doctrinam, sed tamen non extra Religionis pomœria. Ejusmodi sunt singulorum hominum abusus in ministrandis Sacramentis, in sacris Ordinibus conferendis, in veneratione tum Sanctorum, sacrarumque Imaginum, tum etiam Reliquiarum, & ut ipso externo Dei cultu, atque Mysteriis, aliisque similibus rebus, Pastorum profectò proprium est munus, hanc ab Ecclesia Dei pestem avertere tum prædicatione, tum scriptis, atque decretis. Sed ipsis nihil proficientibus, gloriosum semper fuerit, Deòque gratissimum, si nostras jungamus copias, sique privatorum etiam telis hujusmodi monstra conficiantur. Quòd si eò usque malum creverit, ut diutius remedia differre periculosum sit, neque Ecclesiæ Præsules gliscenti malo, quod eorum munus poscit occurrant: frustra audaciæ acculabitur privati hominis consilium, qui hosce petulantes abusus ad Tribunal Ecclesiæ deferat, ac in eos exerat vocem & calumum. Dummodo veram istè doctrinam adferat, publicosque errores, & crimina non somniata exagitet (quod acuratissimè prius curandum) nihil in caritatem peccabit, imò secundum ipsam faciet, atque adeò nos omnes in hisce casibus zelari zelum domus Dei jubemur, & veritatis ac religionis jura publicè tueri, in quæ perversi hujusmodi Christiani suis vitiis conspirasse videntur. Idem dicendum de alio errorum genere, quo Ecclesiastica Historia deturpari, & rudium populorum traditio infici potest. Confictæ Martyrum, & Confessorum, seu vitæ seu Reliquiæ, seu opera miranda; suppositi Sanctis Patribus & præclaris Ecclesiæ viris Libri; origines Ecclesiarum, & Monasticorum Ordinum, aliæque innumeræ ad Episcopos, ad Concilia, ad Ecclesiam pertinentes res gestæ, mendacio infuscato aut è levissima tantum popelli narratione depromptæ, & confidenter ad memoriam posterorum litteris traditæ: hæc omnia procul dubio veritatis inimica sunt, & Ecclesiæ. Uti ea confingere, aut adoptare, aut dissimulare turpissimum est, ità revelare, & palam exhibere, justissimum, atque honestissimum. De vindicanda veritate agitur, de liberanda Ecclesia ab hisce inquinamentis & fucis non modica ex parte perniciosis. Quis hîc læ-

sam

nam caritatem clamet? Primum locum obtinere debet veritatis, & Ecclesiæ, & Reipublicæ amor. Et quando restitui tam utilis veritas, aut ab Ecclesia & populo error eliminari non potest sine alicujus offensione: utique præstat, unum aut paucos dolere, quàm multos. Quanquam & illi injuriæ dolebunt, cum beneficium non tam Ecclesiæ matri confertur, quàm ipsis.

Quod in his tamen casibus homini caritas enixè commendat, illud est, ut quantum fieri potest, parcatur personis, dum errori ac vitio non parcitur. Si simul stare queunt Reipublicæ utilitas & necessaria medicina, ac privatæ quietis atque existimationis conservatio, ambo utique sunt procuranda. Tum solum finit caritas, nos privatorum commodis & honore nocere, cum aliter publica res restitui sanariq; non potest. Cum igitur in doctrina fidei quisquam incautè delirat, neque in vulgus sua commenta dispergit, sibi tantum canens, huic adhibere decet salutarem Christianæ correctionis helleborum, ubi legibus Ecclesiasticis aliter cautum non sit; hoc est clam & amicè ita monendus, atque docendus, ut si animo sit docili, vulnera sua se cognovisse gaudeat, neque erubescat. Sin iste deliria sua pertinaciter tueri pergat, & benevolum monitorem semel iterumque contemnat, & mutandæ sententiæ spem nullam relinquat: nihil, caritate etiam suadente, tunc utilius præstari potest, quàm si ejus contumacia (uti Christus ipse mandavit) ad Ecclesiam deferatur, cujus auctoritate tum ipse in officio contineatur ac sanetur, tum ab ejus afflatu liberetur Respublica. Hujusmodi autem homines non palam errantes, non erroris sui præcones, cur ego palam & nominatim, aut scriptis aut voce persequar, ac in triviis ridendos propinem, & exosos omnibus puniendosque faciam? Clam peccavere, corripici clam possunt, & corrigi clam amabunt. Quid punis in errante nomen, & famam, quæ errore adhuc latente, & emendationem fortassis non refugiente, nullam adhuc poenam commérité sunt?

Illud verò constat, licere atque dicere publicis scriptis ac tubis in illos ferri, qui errori conjungere proterviam, & insaniam suam erumpere in publicum sinunt. Non est, quod ego eorum morbum ac nomen occultare debeam, cum ipsimet evulgare non dubitarent. Publicum Ecclesiæ hostem publice oppugnabo, publicè, si vires suppetent, evertam; ut si non ipsum ab errore revocem, reliquos saltem pugnae spectatores, atque ad eam Rempublicam ipsam veritatis acie confirmem. Sed in hoc hominum genere insectando

suus quoque caritati locus esse potest. Inter quos Sanctos Patres sunt, qui Hæreticos, & eorum assecclas, atque patronos aculeatis exagitant Libris, multumque etiam Plautino sale perfricant. Primas inter ipsos Hieronymus tenet. Sunt & Scriptores qui sibi temperare nesciunt, quin adversus Ecclesie hostes quicquid ad manum venit, intorqueant. Contumeliis nullis parcent, quarum etiam non paucæ veritatis fundamento carent. Mille vituperiorum plaustra in ipsos congerunt; uno verbo, nihil non movent, quo communem prosternant Religionis veræ adversarium. Quod est ad nonnullos è Sanctis Patribus, non iis vitio vertimus, quod acribus interdum pro veritate scriptis pugnaverint. Christianum zelum ne hic quidem stylus dedecet; hos ignes ipsa bona causa, ac defensio cognitæ veritatis, ultrò suggerit, non facile sanè culpandos, nisi cum ad calumnias concitata oratio dilabitur. Sibi ergo imputent, si tam asperè accipiantur, quicumque à recta Christi doctrina defecisse minimè contenti, positos quoque à Deo Judices, hoc est, Ecclesiam ipsam, non spernere solum, sed etiam dilaniare, atque infamare minimè verentur. Habeant illi & hanc suæ contumaciæ penam, & populus eodem abominari atque abhorreere eò facilius discat, quo libentius fertur ad legendam in piperatis disputationibus illorum damnationem. Attamen, si nobis optio detur, placidam, quàm iracundam in refellendo errore facundiam sequi mallems. Placuit hæc aliis Patribus, & Augustino præsertim, qui cum aliis nominibus maximè sit commendandus, hoc ipso in primis apud posteros spectabilem se fecit, quod certando cum Hæreticis, vel proacissimis, nunquam mansuetudinem suam, atque verborum lenitatem, quamvis lacessitus maledictis, abjecerit. Et certè vix est ut hominem animal omnium ambitiosissimum, conviciis & acerrimâ reprehensione de sententia atque errore deducas. Mordacissimâ oratione exasperatus ille vindictam potius, quàm emendationem cogitabit. Contra gravis simulque mitis confutatio, animum adversarii ab auscultanda veritate nequaquam avertens, plus quàm altera potest, cum & ejus errorem vincere, & ipsum errantem sanitati restituere possit. Quæ cura Christiano Scriptore, quàm altera, profectò dignior. Nostrium enim esse debet non ignominia onerare, sed ad meliorem frugem, quantum in nobis est, fratrem nostrum convertere, fratrem lucrari. Mirum autem est, quantum & peccantes ad poenitentiam, & errantes ad palinodiam alliciat gra-



## CAPUT III.

*Calumnia nunquam adhibenda. Conviciis temperandum. Non imputandi errores nisi benè perspecti. Placide quantum fieri potest pugnandum; & quando secus deceat. In consutandis erroribus ad Religionem minimè spectantibus quæ libertas ingenii. Caritati ac Moderationi & hic suus esse debet locus. Quando vitia morum adversariis objicere liceat.*

**P**ORRò si adhuc stat animo tua scripta contra Catholicæ veritatis & Ecclesiæ inimicos aculeato, iratòque etiam, stylo armare: non impedio scribentem. Sed ira modum habeat, honestatem non obliviscatur oratio, pro Ecclesiæ & Fidei Apologia non inveniant Lectores virulentissimam satyram. Alioqui non æquitas solùm, & caritas, sed & justitia ac prudentia illic desiderabitur. Nescio enim, quo pòtò justì ac prudentis nomen retinere possit, quia ità in hostem irruit, ut se quoque incautè lædat; adversarii culpas tam effusè persequitur, ut se maledicum fieri minimè sentiat; atque ità in aliis reparare vult veritatis jacturam, ut ipse interim ad calumnias & convicia descendens, moderationem virilem atque christianam in se ipso perdat. Difficile est, fateor, ignitis ingeniis pacatè hìc agere, zelo potissimum sacræ fidei flammæ augente. Pugnæ ipsius ardor ità ictus omnes temperare non sinit, ut errorem tantummodo alienum; non & personas aliquando feriamus. Vel cautissimis & mansuetissimis pugnatoribus jacula interdum elabuntur, quæ animum ferientis occultè fallunt. Verùm circumspiciendum est nobis, quid in certamine ad tam facile lubentèrque mordendum ingenia nostra stimulet atque impellat. Interdum unus amor nostri tantùm pulverem excitat. Amamus famam religiosi zeli, quem quo plus in censura irascimur, etiamsi excedimus, eò commodius suasuros nos esse speramus. Quærimus Lectorem plurimùm, eùmque novimus ad Plautinæ mensas, & scommata lubentiùs confluentem; quare per Satyram nostris libris curamus, ut accedat commendatio

major. Credimus etiam in hoc loquendi genere evidentius apparere bonæ causæ conscientiam: Verum hic non raro noster nos fallit affectus; & præ omnibus spectanda est veritas, quæ certe ab erroribus liberari, defendi, suaderi potest, sine tanto felle, tantâque petulantia orationis. Denique ab ingeniosè acuto quantum maxime differt amarus atque maledicus stylus. Illo sapiens quoque libentissimè utatur; ab isto temperet. Nam dum rationibus & argumentis dimicetur, jam in tuto est veritatis causa; neque interim adversario, quantum in nostra manu est, de nobis querendi ulla relinquitur justa ratio.

Jubet nos ergo caritas, placidè vel in pertinaces Hæreticos agere, ut non tantum illorum errori prosterndo studeamus, sed & saluti prospiciamus. Quando autem magis ipsa nos moneat, ne ipsis errores & crimina imputemus, falsa, sive conficta? Ejusmodi hominum insaniam, atque impudentiam, supra modum exaggerare plerumque solemus mendax fama, aut adversariorum ira. Proinde æquum est, & caritatis lege sancitum, ut in hoc etiam communium hospitum genere, eorumque libris nihil vituperemus; nihil fidenter damnemus, quod prius non constet ipsorum sententiâ affirmari atque probari. Qua in re nullus dubito, quin Catholici quidam minus cauti, & cæco zelo abrepti, interdum se quoque præbuerint arguendos. Per nonnullos è primis Lutheri & Calvini oppugnatoribus non stetit, quominus in longam seriem excreverent istorum errores. Supra centum Calvini blasphemias numerabat Fevardentius. Scriptor stylo quoque parum in ipsos Hæreticos moderato usus. Tam multa, ac tam graviter, non delirasse Calvinum ejusque sectarios, cum ipsi postea palam fecerunt nostri sensim deprehenderunt, simul ac remissus est primus ille certaminis impetus. Minus inquam Lutherani, & Calviniani, quam videbatur, olim à veritate Catholica aberant; minus etiam nostrâ tempestate absunt, cum à suis parentibus jam in aliquibus discesserint nimis apertè impiis falsisve sententiis; discessuri, uti sperandum est, à reliquis etiam, ubi Catholicorum doctrinam, vitiatam à declamatoribus suis, audire desinens, puram verò à Conciliis & Catechismis nostris publicè probatis haurire incipient. Et reverà istud non dicam familiare est, sed in consuetudinem & quamdam quasi legem apud ipsos transit, ut Catholicorum doctrina atque Ecclesia in eorum scriptis atque concionibus ita discerpatur, ac deformetur, ut nativam suam faciem ac puritatem prorsus amittat.

Quoti-

Quotidiani sui muneris esse quilibet Ministellus putat, in mores opinionésque nostras quàm maledictis, quàm declamationibus invehi; fictitiis criminibus ac erroribus dogmata nostra onerare? ipsas nostrorum virtutes, ritusque pios, fuscis exprimere coloribus; omnia denique dissimulare, quæ nobis militant, quæque aut proderet confestim possent incautam obtreptionem eorum, aut nostram tueri optimam causam. Sic alitur in populis jam annosus error, & deplorandum schisma. Plebs autem à teneris, ut ajunt, unguiculis educata atque infercita hujusmodi nœniis & calumniosis concionibus, nihil vehementius horret, quàm Catholicorum Fidem & Sacramenta. Quid? quod non auribus tantum, sed & oculis imperitorum sua spectacula ministrantur. Conclavia & Libri maledicis picturis abundant, quibus somniata Babylon lepidissimè, ut sibi persuadent, sed insulse omninò, descripta exhibetur, & innumera Antichristi jam in eorum phantasia nati, sive Monachorum, sive Episcoporum, gesta subsannantur atque deturpantur. Hac autem in parte ii præsertim excellere solent, quibus & crassiorem aërem, & frigidiorē patriam, & minus elegans ingenium natura dedit.

Equidem si qui sunt inter Catholicos, quibus adhuc hujusmodi genus pugnandi placeat, non solum nullas à me laudes expectent, sed multam potius vituperationem. Viros liberaliter eruditos, nedum Christianos, ista non decent. Et nostros moneo, potissimum verò monendos reor alienæ communionis Scriptores atque Oratores; utpote sæpius & credius in hujusmodi studio peccantes, ut dum Religionis veritatem sermone librisve pertractant, atque tuentur, à conviciis & maledicentia abstineant, & quantum fieri potest caritatis consilia auscultent. Prius adversariorum sententiæ atque argumenta probè teneantur, neque à privato quopiam ineptòve Scriptore dogmata Ecclesiæ Catholicæ, aut diversarum Sectarum hauriantur, sed à publicis fidei professionibus, publicèque receptis Libris Longè alia sunt in Protestantium ore, ac in Catholicorum Conciliis benè multa, quæ profectò ignorare confutaturis non licet, ac ignorata damnare temeritatis est, ne dicam dementiæ. Id non dissimulant, qui inter Protestantes temporibus nostris sinceritate præstant & diligentia, & perperam culpata fuisse, atque culpari multa Catholicorum sentiunt. Tum adversus benè perspectas sententias exercendæ, si quæ sunt, solidæ rationes, certis innixæ principiis, ac inde ritè deductæ. Quid his, non jam clanculum,

sed apertè sese immiscet impudens & vilis contumeliarum  
atque sanctorum familia? Cur calumniis cautè non occlu-  
ditur aditus? Quid barbarico more lectus vibrantur? Est  
hoc vulnerare atque exasperare, non autem sanare  
adversarium: quod tamen postremum caritas à nobis tunc  
cè postulare. Vincat ergo veritas pondere argutientorum  
non opprimat ira mordacitate & furore dictorum.

Huic autem suavi caritatis edicto contraire ille dicen-  
dus non est, qui furiosos, calumniosos, & maledicos Scrip-  
tores non aliter refellere potest, quàm eorū vitis excussis,  
& palam confosis. Quid agat iste censor, quanquam placi-  
dus atque modestus? Si veritatem vindicare vult ab alienis  
telis, non potest quin malam adversarii fidem mansuetè  
quidem accuset, & prodatur, sed tamen accuset. Adulteros  
ab ipso codices, truncatas sententias, dissimulata consultò  
argumenta, & confectaria, captiosas & sophisticas rationes,  
declamatorias phaleras atque hyperboles, conficta exem-  
pla, & alia hujusmodi, satyricus & immitis non est, qui ar-  
guit, & spectanda omnibus præbet; sed ille temerarius, &  
indoctus, & parum pius, & parum mentis compos, aut suæ  
existimationis prodigus, qui talia in vestitis ludibriis  
palam est ausus. Hic, ut dici solet, causa causæ respondet.  
At tamen hic etiam habere potest, quò se prudentem &  
humanum, & vitiorum, non hominum, insectatorem se  
probet Scriptor. Scilicet, quantum materia finit, non exa-  
geret, sed minuât culpas; & errata inimici aut nudè tan-  
tùm describat, atque ita demum describat, ut benevolenti  
adhuc se illius objurgatorem & correctorem ostendat.  
Hæc, fateor, facilius suadere aliis, & in aliis observata lau-  
dare, quàm à nobis impetrare possumus; nam & qui prius  
animo statuunt, se non secus cum Hæretico atque inimico  
agere velle, quàm cum fratre atque amico, vix fidem sibi  
præstare possunt factis. Sed optima nobis proponenda, ut  
eò si non pervenire datur, accedere saltem quisque con-  
tendat. Vix enim excogitari potest, quantum conducere  
ad ineundam pacem atque concordiam inter tot Ecclesiæ  
Christianæ aut veros aut perduelles filios, tantâ opinio-  
num diversitate sejunctos, adeoque miserabili schismate  
tandiu distractos, si pacifico stylo, placidisq; disputationi-  
bus utrinq; ageretur, oculis in unam veritatem semper in-  
tentis. Atq; ad hoc in primis utinam ii sedulò mētem con-  
verterent, qui resutant errores ab uno quidem Scriptore  
spargos in vulgus, sed alicui sectæ communes. Tum in uno  
multi feriuntur, mitiusque propterea dimicandum, ut non  
unum

unum tantummodo, sed plures amicâ confutatione lucraris, & Ecclesiæ restituas.

De rebus ad Religionem & Ecclesiam nihil spectantibus interdum lis erit. Multas Physica suppeditat, multas Jurisprudencia ac Historia, multas Rethorica, & Poëtica, atque ipsa etiam Grammatica. In his excogitandis, referendis, atque explicandis humanum ingenium, atque eruditio sæpè deficiunt. Hinc viris criticis, nunquam non in similes errores intentis, negotium grande, neque minus Typographis. Si quosdam audire volumus, ab omni Librorum censura temperandum. Aut enim vera & recta docent: & in censoris caput recidet censura, si fiat; aut falsa & inepta continent: & inani idcirco refelluntur labore, quam suapte naturâ sint casuri, & ad blattas tineasque damnandi. Petitur etiam, quo jure in Auctorem tibi non injurium, immo tui nescium, censoriam auctoritatem exercere velis. Sed qui ista petunt ac monent, adhuc ignorare videntur, quam facile error in homines irrepit, atque ab iis adoptetur, quantumque humanæ Reipublicæ interfuit, verum ac bonum à falso & malo distinguere atque tueri. Ut de veritate potissimum loquar, publicum illa & universale bonum est, divino munere adhuc in terris relictum. Ità totum est omnium, ut totum sit etiam singulorum, nullique licet me decipere, atque in errorem trahere, & cogere ut falsa pro veris, vera pro falsis amplectar. Cum tantum ac tam nobile patrimonium aliqua ex parte quisquam lædit, mendacio indulgens, aut falsa incautè venditans: res mea læditur, & pro bono malum, hoc est, error mihi obstruditur. Meum ergo est mea tueri, mihi que ab errore cavere, & contra veritatis inimicum, qualiscumque sit dimiticare; quod si palam veritati bellum indicitur, (id quod in Libris falsa ferentibus, & publicâ luce donatis, usu venit) jam fas mihi est, bonum non jam amplius tantummodo meum, sed publicum, ab injuria publicè vindicare, & à Republica errorem remove, Reipublicæ ipsi perniciosum. Quis me jure accuset, immo quis jure non laudet, quod non finam decipi gentem meam, & regnare veritatem velim? At error est in Historia, in Physica, in Poëtica, in Grammatica, & in aliis, ut ità dicam, ludicris, aut inanibus studiis, non in gravi Religionis, aut legum, & morum scientia. Esto. Anne propterea ferendus, neque eliminandus est error? Et ista mihi & Reipublicæ nocent, quantum possunt; malum quippe est falli tam in magnis, quam in parvis; & omnium interest, ne in

Poëtica quidem, & Grammatica, nedum in Phÿfica, & Hiſtorica eruditione, falſa aut prava diſſeminari & credi. Utà verò nulla ratio hominem excuſat, quòd in Libros optimos, & optima tradentes, cenſoriam virgam adhibeat; ità rationes multæ cum eo faciunt, qui Libros malos, & falſi aut vitii magiſtros, reſellendos corrigendòs veſuſcepit. Magnam partem ex indoctis conſtat hominum genus. Inter ipſos literarum cultòres rarum iudiciũ eſt, & crebra hallucinatio. Ità verò interdum conditur & celatur, & colore veritatis, error ac falſitas incruſtantur, ut vel peritis imponant. Non eſt ergo illius vituperandum conſilium, qui ab errandi periculo atque ab imitatione pravorum, Rempublicam aut ſtatim, aut tandem eripiat. Sed potiùs ille laudandus, quòd cenſurà ſuà cautam faciat reliquam gentem, & labore ſuo cæteros à labore exquisiti examinis liberet. Ineptiſſimos tantũ Libros & nemini officere valentes, anxie in trutina ſuſpendere & reſutare velle, eſt hominis cum inepto ineptire cupientis. Cæterũ qui & hoc ſibi negotii ſumat, quo ſaltem ab imitatione ſimilium arceat alios literis operam dantes, non ut ſuo adverſus auctorem odio obtemperet, in prudentiam fortasſe peccabit, nequaquam verò in juſtitiam.

Tractantibus autem & huiusmodi, quanquam interdum levis momenti, quæſtiones, inculcanda eſt iterũ moderationis & humanitatis mentio. Quando aliter fieri non poteſt, ad ravim uſque contendatur pro quacumque veritate, in quemcumque errorem, ac malum Librum. Sed non lacerentur in contraria, licet abſurdà ſententiã poſiti. Nimiã dicacitate non corrumpatur, non infametur bonã cauſa. Rationibus tantũ, non conviciis & maledictis, ſervata eſt palma. Præterea quid, amabo, ferventi cenſuræ tuæ, aut Apologiæ, cujus argumentum eſt error intellectũs, mores quoque & perſonam adverſarii interſeris? Indignatur veritas, ſe talibus armis defendi, cùm ſe nihil reverà defendant, & in unius utentis probrum convertantur. Et tamen cenſori ſuo, quem naturã monoculum, gibboſum; claudum fecit, aut ingenti naſo armavit, pauci tantã animi moderatione olim reſpondebant, ut hæc illius vitia non memorarent atque riderent. Pauci ità ſibi imperare poterant, ut adverſarii luxuriam, ambitionem, artẽſque pravas in literariam pugnam inferrent. Inventi ſunt; parum dixi; inveniuntur, qui paupertatem & ignobilem originem cenſori ſuarum opinionum objiciant, quaſi in iſtius ore veritas quoque & argumenta veritatis, obſcuram & miſeram dicentis

tentis conditionem, ejusque finistram fortunam combiberint. Statuunt alii potiore suæ defensionis vim in re-  
criminando adversario. Quod quidem cum nihil utilita-  
tis sæpe inferat causæ, qua de agitur, id unum potest, ut ad  
inhonestam vilemque vindictam inserviat, quando ad ju-  
stam tutelam non potest. Parum certè videntur acuti,  
qui hac arte quicquam pro se profecturos se esse sperant.  
Vulnera quidem inimico, sed sibi salutem non creabunt,  
ab eo non dissimiles, qui se non avarum, & non dementem  
probaturus, id tantummodo ostendendum sumit,  
se inter avaros atque dementes solum non esse.

Fieri tamen potest, ut non liceat solum, sed etiam quan-  
doque expediat, in adversariorum mores, & crimina in-  
quirere, moderationis tamen ac veritatis curâ nunquam  
sepositâ. Cum nempe ad veritatis & innocentiae prædium  
facit eadem ipsa morum & criminum revelatio Hujus-  
modi telo nonnunquam calumniatores feliciter repellun-  
tur; & in forensi palæstra, ac in orationibus judiciariis  
muktus esse potest illius usus. Præterea æquum simul & lau-  
dabile fuit, moribus eorum, qui recentiores Hæreses con-  
didere, litem intendere. Nempe ne hoc quidem postremum  
erat argumentum pessimæ illorum causæ, neque parum  
conducebat ad Veritatem Catholicæ Ecclesiæ firmandam.  
Ut Ecclesiam istam à vera fide jam prolapsam, & à multis  
sæculis invisibilem, Idolis & Antichristo servientem, resti-  
tuerent, divinitus constitutos Lutherum, Zwinglium,  
Calvinum, atq; alios id genus homines, dictitârunt eorum  
sectatores. Hos extraordinarios viros, extraordinariâ &  
cœlesti vocatione ad Ecclesiam reformandam missos, ap-  
pellabant. Verùm cum novos hosce Prophetas nos osten-  
damus, non solum omnibus Prophetarum donis caruisse,  
sed etiam multis abundasse vitiis, neque meliores evasisse,  
qui in eorum disciplinam & dogmata concessere, sicuti  
præter multos alios locupletissimus testis Desiderius Eras-  
mus affirmat: cuinam persuadere in posterum se posse pu-  
tant nonnulli populi, nuperos istos Catones à cœlo cecidi-  
sse, cœloque consentiente, immo impellente, tot in  
Ecclesia Dei excitasse schismata atque tragœdias? Uti ve-  
rò adversus ipsos legitimè ejusmodi argumento utimur,  
itâ ipsi ineptè adversus Catholicam Ecclesiam argumento  
à moribus ducto utuntur. Utcumque corrupti Catholi-  
corum Sacerdotum, Monachorum, & populi mores tunc  
fuerint, cum signa in matrem suam Lutherus movit:  
disces-

discessionem idcirco facere non licuit ab istorum societate, & communione. In mores enim, non in dogmata vitium fluxerat; & iniquum planè est, sanctitatem & rectitudinem Religionis dimetiri & damnare è perversis hominum moribus, cùm contra damnandi sint pravi hominum mores è sanctitate & rectitudine legum, quas ipsa Religio proponit.

---

## C A P U T I V.

*Errores in sanctorum Patrum scriptis non dissimulandi; sed modeste agendum, & excusandi errantes. Prudentia in proferenda veritate, & erroribus insectandis habenda ratio. Quot modis in hanc virtutem peccetur. Scandalis ac seditiombus non aperiendus aditus.*

Cum de fidei doctrina agitur, diximus, veritatis causam poscere, ut vel ipsis sanctis Patribus non ignoscatur. Id repeto: dissimulandi non sunt errores, qui in nonnullorum Patrum Libris interdum occurrunt, ne iis quisquam abutatur in Ecclesiæ perniciem, quæ contra sensit, & sentit. Verùm quandoquidem Christiana moderatio tanti facienda est, vel cùm in Hæreticos scribitur, quantò magis eadem servanda est virtus, cùm detegendi sunt nævi sanctorum Patrum? Hic itaque duo observanda in primis. Primum est, ut quantum fieri potest, non errorem solùm, sed etiam erroris suspicionem à magnis illis viris amoliamur. Quod contingit interdum, cùm ex plurium locorum collationeprehenditur, aliam fuisse eorum sententiam, quàm quæ in uno quopiam Libro, seu Libri loco, sonare videatur. Tum si commodum aliquem sensum eorum verba patiuntur, hunc ipsis tribuere fas est; nihil enim verisimilius est, quàm tales tantòsq; viros, cum Ecclesia & cæteris Patribus omnia plerumque concordantes, ne in ea quidem opinione ab iisdem Patribus, atque ab Ecclesia dissensisse. Prolatis etiam quaudoque Codicibus notæ melioris, parum sanis Libris succurritur, unde fluere videbatur parum sana doctrina. Et multa quidem sunt, in quibus cùm veteres tum recentiores Hæretici putant pro se habere sanctorum Patrum consensum, & loca non pauca producunt, suis in speciem opinionibus accom-



accommodata. Sed ilud constat, nullum esse dogma, in quo ostendere possint Hæretici, non dicam omnes, sed ne magnam quidem partem sanctorum Patrum secum facere. Ubique aut omnes, aut plerosque Catholica pro se habet Ecclesia. Si qui favere Heterodoxis videntur: adhuc adhibitis explicationibus non violentis, & hi non rarò ab ejusmodi notâ liberantur. Quæ tamen in re, uti sæpè diximus, tam cœca esse caritas recusat, ut aliqua ex parte veritatem pessundet. Ne ii quidem in nostram causam sunt inviti trahendi. Quanquam enim aliquis Patrum paria cum Hæreticis quæpiam in re nonnunquam scribat, inde sibi Catholica Ecclesia nihil timendum habet, quæ non singulorum Patrum auctoritate nititur, sed conjunctorum; & præstantiorem aut uberiolem istorum partem paucioribus opponere potest.

Ad hæc, ubi honesta nulla & commoda ratio succurrit, quæ ab erroris specie liberentur. quorundam Patrum dicta, ita veritatis amans hujusmodi nævos prodit, ut caritas simul vindictet eorundem auctores à crimine. Videlicet, culpam Hæresis non omnis contrahit, qui hæreticam aut perversam profert sententiam. Oportet errori conjunxisse pertinaciam. Opus etiam est, ut prius ejusmodi sententiæ inter errores ab Ecclesia numeratæ fuerint, aut ex sint, quæ vel sine Ecclesiæ decreto cognosci non difficile possint, tanquam à vera Ecclesiæ doctrinâ alienæ. Nullum autem è Patribus indicare est in aliqua opinione tuenda pervicacem adversus Catholicam Ecclesiam. Alioqui, non sanctorum Patrum albo, sed Hæreticorum ille jam fuisset inscriptus. Præterea si quis eorum in parum sana sententia constantem se prodidit, utique ea fuit sententia, quæ sine crimine, atque intactâ Fide Catholicâ, animo indui defendique adhuc poterat, quippe nondum satis explorata, & Ecclesiæ calculo nondum improbata, sive damnata. His animadversis, caritati simul & veritati factum erit satis: neque religioni sibi postea ducet eruditus Scriptor, ea in sanctis Patribus modeste arguere, quæ fortè abint à regula totius Ecclesiæ. Et quidem nonnisi laudandus, qui hujusmodi caritatis Christianæ artes exerceat pro vindicandis ab hæresi & à crimine (dum fieri absque veritatis jactura possit) reliquis hominibus, atque Scriptoribus. Sed hoc beneficium potiore jure à nobis exspectant, quos vulgò Patres dicimus, viri nempe doctrinâ, sanctitate, & sacro ministerio plerumque insignes, & ab ipsa Ecclesia laudati. Quamobrem Christianus pudor in iis desideratur,

tur, qui acribus censuris tam veneranda capita interdum exagitant. Neutiquam verò tum ferendi Censores, cum non solum veros immodeste iis errores objiciunt, sed falsos etiam affingunt, atque in eorum Libris reprehendunt germana Ecclesiæ Catholicæ dogmata. Verum de his iterum erit agendi locus, ubi à censura Joannis Phereponi S. Augustinum vindicabimus.

Demum in veritate exerenda, erroribusque palam inspectandis maxima prudentiæ habenda est ratio, sine cujus ductu vel ipsæ virtutes, ad actionem deductæ, ita vitia degenerant. Ad istam nimirum pertinet, significare, quando, & quomodo, & quibus in locis, & per quos aut dissimulanda, aut prædicanda sit veritas. Primum igitur Prudentiæ præceptum est: *Non expedire, immo nefas interdum esse, veritates quasdam proferre, atque inculcare, è quibus pessima enascantur scandala.* Hic certè cum prudentia justitia consentit. Æquitas nobis jubet ea filere, ac dissimulare, quæ nihil publicæ rei profint, & multum privatæ noceant; Proptereaque privatis adversariorum moribus in literario certamine censura parcere debet. Nihil enim aut utile, aut certè necessarium est populo rescire, quibus vitiis adversarii nostri corpus natura signaverit, aut quibus perverfis affectibus animus illius abundet. Solus hominum livor ex hisce spectaculis oblectationem capit. Contrà verò adversariorum existimationi & nomini officitur, eorum vitiis revelatis, publicèque irritis; cum tamen hujusmodi censuræ genus neque ad literariam litem dirimendam, neque ad animum inimici meliorem efficiendum, adhibeatur. Iterum: *Æquitas præcipit, ne ita prodesse Reipublicæ velimus, ut ipso tempore ipsèque beneficio gravius eidem noceamus.* Ità omnium vituperationem incurrat Medicus ille, qui ut ab ægroto morbum levem depellat, alium ipsi, atque priore graviolem, suo pharmaco creat.

Cum itaque errores & vitia inter homines obtinent, in eorum castigationem caritas exardescet, justitia armabitur; unaquæque pro tueñda veritate, ac errore eliminando. Verum ambas in aciem circumspectè ducet prudentia, neque agere sinet, nisi opportuno tempore, loco, & ardore. Interdum etiam silentium indicet, & à pugna retrahet, majoresque aut minores animos pro rei qualitate inspirabit. Nullum tam grande malum est inter Christianos, quod Christianæ doctrinæ corruptioni æquari possit. Nunquam ergo silendum, nunquam occultandam veritatem prudentia nobis auctor erit, cum quis tanquam Christi do-

doctrinam venditare incipit errores, & sententias verbo Dei sive scripto, sive non scripto, contrarias. Rursus cum istam fidem, divinamque doctrinam in me perdere quisquam hostis Christi nititur, me vel minis, vel donis, vel aliis artibus ad eam ejurandam compellens, sive alliciens: dum vox & vita suppetent, committendum mihi non erit, ut confessio veritatis, ejusque firmissima persuasio, mihi eripiantur. Cæterum in aliis casibus, ita poscente prudentiâ, non erit interdum erroribus eorum, qui sunt extra Ecclesiam, (exempli gratiâ, Ethnicorum, aut Mahumetanorum superstitioni) apertissimum ac enorme indicendum bellum. Tria prima Ecclesiæ sæcula, Terris frustra & Inferis contra pugnantibus, Religionem Christianam stupere triumphantem. Crudelissimos Tyrannos in Christi nomen conjuratos fatigavit, & vicit innumerabilium Christianorum fortissima patientia. Attamen dissimulandum non est: inter ipsos Martyres fuere nonnulli, quos in flagrantissimo veritatis & Religionis zelo prudentia defecit. Non contenti sanctissimam Religionem rationum robore defendisse, & superstitionem Ethnicam scriptis & voce fugiendam denunciâsse (quod veritatis cultores reverà decebat,) Gentilium quoque Idola comminuerè, fana, & cultum profanum palam irridere, ipsosque Ethnicos Magistratus ultro irritare non dubitârunt. Hinc autem interdum persecutiones, & multorum fides aut vita in discrimen adducta. Theodosii quoque junioris temporibus immanis procella excitata est adversus Christianos in Perside. Ex istis sublata sunt millia quàm plurima, ibique penè funditus excisa Christi Ecclesia. Tot autem mortibus & incommodis causam dedit unius culpa. Audas nempe Episcopus, vir cæteris virtutibus illustris, sed prudentiâ non satis instructus, quoddam Pyreum, sive Templum Gentilium, evertisset, tum in se, tum in reliquos fratres, atque in cuncta Christianorum Tempia concitavit iram Persici Regis. Utique Martyria feliciter ac fortiter dimicantibus utilitati sunt & gloriæ. Sed accersenda sine necessitate non sunt, ne tentetur Deus, ne constantia nostra mediis in cruciatibus periclitetur, aut saltem ne in fratres, atque in Ecclesiam, miserandæ calamitates & postrema incommoda per imprudentiam nostram deriventur. Vide Concilii Illiberitani Canonem LX. atque in eum Mendoza & Aguirrii commentarios.

Ad hæc, veritatis prædicatores, & insectatores errorum, prudentia circumstare debet, atque indicare, quæ scandala,

dala, qui tumultus, quæve alia incommoda consequi possint veritatem aut eo tempore, aut eo loco, aut ea ratione deprædicatam. Si errores in doctrinam Christi minimè pugnant, nonnunquam minus malum fuerit tolerare paupers, & proderit differre censuram. Animi Regum, exempli causa, exasperandi ita non sunt propter huiusmodi causas, ut eos ira atque ambitio ad schisma trahat, atque ad Ecclesiam veramque Religionem ejurandam. Teterri- mum malum schisma est. Væ sinè ratione constantibus. Sed væ iis etiam, qui imprudenter sollicitant alios ad tam detestandum facinus. Sunt qui abusus, & vitia, & errores publicè configere nesciunt, nisi etiam classico inflato iuri- bus aliis incautè officiant. Nam sicuti regnorum ærum- nas nonnulli deplorant, earumque auctores lacerant, po- pulos imprudenti declamatione ad seditiones movent, at- que ad auferendam legitimis rebus debitam obedienti- am: ita Præsulum & Sacerdotum, & Monachorum non somniata vitia argumentum aliis investivarum sunt, qui tamen interim haudquaquam cernunt, se ita agere, ut plebs reverentiam exuat erga optimos etiam Episcopos, & universo Ordini Sacerdotali obsequium neget. Abusus in Sacramentis ministrandis, in usu pietatis, in Imaginum sacrarum, Sanctorumque veneratione, atque in Indulgen- tiis promulgandis deprehensos, descripserunt alii, damna- runtque acerrimè. Causam, consilium, zelum laudo. Ve- rum ipsis cavendum accuratè fuerat, ne dum vituperanda vituperabant, & abusus configebant, ipsas quoque res sa- cras, & semper venerandas, aut hæreticorum ludibrio ex- ponerent, aut etiam in contempTIONem adducerent Ca- tholicæ plebis. In miracula confecta invehuntur alii, aut nimis laxas nonnullorum Theologorum opiniones ferre non possunt; pro utriusque conscribunt alii Apologias, Qui veritatem isto incertamine tuentur, rem justitiæ gra- tam præstant, iisque immeritò irascamur, Sed cum illi su- spicione falsi veræ etiam miracula à se aspergi non animad- vertant; aut integrum aliquem Ordinem ex paucorum culpa in invidiam incautè trahant; isti verò miraculis eti- am falsis, aut opinionibus parum probabilibus eodem tempore, quanquam præter sum propositum, auctorita- tem & licentiam concilient: indignandum profectò est, quòd isti prudentiam prius non consuluerint, eamque suorum scriptorum non præfecerint ductricem atque ma- gistram.

Quid itaq; curæ futurum sit huius virtutis amant, dum præ-

prædicanda veritas, errorésque sunt palam increpandi, facile hinc intelligere possumus. Interdum vir prudens errores populi, aut vitia, atque scandala Sacerdotum, Ordinisque Monastici, deferenda potiùs censet ad Episcopos, & potissimum ad Apostolicam Sedem, quàm publicis vexanda clamoribus. Certam ille mavult ab Ecclesiæ Principibus expectare medicinam, quàm dubiam & periculosam à privata censura. Et sanè quidquid à Romanis Pontificibus, & ab Episcopis, atque Conciliis in disciplina corrigitur, atque interdicitur, quamvis multa se antiquitate, & populorum usu tueatur; turbas & seditiones movere non solet, & nequit. Satis persuasum est Christianæ plebi, nihil ab iis auferri, improbari, aut immutari, nisi quod à vera pietate abhorreat; facileque auctoritati legitimæ ac venerandæ obediētes acquiescunt. Non id æquè sibi persuadeat populus de privatorum censuris, & maximè tacentibus Pastoribus, quorum silentium aut inertiam pro suffragio & consensu oves errantes interpretantur, vel quando agitur de non levibus superstitionum scintillis. Hinc aut nullus censuræ privatæ fructus, aut si quisquam, is certè rarus, & periculosus, & à Pastoribus dormientibus interdum avertit animos gregis. Itaque prudentis est, Petri Successores, & Ecclesiæ Antistites potiùs, quàm populum ipsum, ad horum emendationem concitare supplici voce, mitibusque etiàm querelis.

Sed pergunt altum stertere, aut connivere Episcopi. Nolo causam veritatis, & zelum domus Dei, & errantium curam idcirco abjiciat Christianus. Fas est ipsi publicis scriptis revelare cognita vulnera, fas est confodere pertinacem errorem. Ità tamen se gerat, ut eodem opere, atque instituto reverentiam suadeat atque confirmet erga supremos Ecclesiæ Magistratus. Abusus, & scandala, & falsam pietatem, & populares errores, configat obelo; sed simul Sacramenta, & germanum Religionis cultum, & solidam pietatem, & sanas sententias, & unitatem fidei maximè commendet. De virginitatis laudibus agens, conjugio suam non detrahat laudem: quod satis non cavisse S. Hieronymum olim suspicati sunt quidam. Si divinæ gratiæ vim & necessitatem tuetur, arbitrii libertas in ejus scriptis æquè commendetur. Et vicissim arbitrii virtus, atque libertas tantopere non extollatur, ut deprimatur dignitas & necessitas gratiæ. Dum verò corruptos vel ipsorum Præsulum mores, nullo tamen aperte designato, carpit, tantum absit, ut aut contemptum Romanæ Sedis, & Episcoporum,

& Religioforum Ordinum inducere possit ac velit, aut aliqua ex parte juvet ambitiosam & impiam reformationem, quam jactitant nostri temporis Novatores. ut ipsorum Episcoporum, & præcipuè Maximorum Pontificum decretis atque Conciliis utatur ad hæc omnia confutanda atque proscribenda, pariterque prodat, quantum in hujusmodi emendatione excellerint Hæretici recentiores. Quænam enim emergere vitia, abusus, & superstitionum deliria penè jam possunt, quæ Patres, Episcopi, & Romani præsertim, suis aut scriptis aut Synodis antea non ejurarent, monuerintque esse fugienda? Præterea prudenti viro nusquam certè nimia opinionum laxitas probatur, sed ne nimia quidem austeritas. Quanquam si in alterutram partem peccandum sit, se veritate malit, ne jam pronæ hominum naturæ ad sese emancipandam in vitia ipse calcaria addat exuberanti indulgentiâ. Non minus ergo anxie cogitat, quantum scriptis atque oratione suâ prodesse Ecclesiæ & populo possit, quàm cautè circumspicit, ne qua ex parte noceat. Atque hujusmodi ratione veritatis jura intrepidus exercet, simulque numeros omnes implet judiciosæ sagacitatis, atque prudentiæ. Pertinet & ad istam virtutem inspicere, liceátne, an non, aut saltem num expediat, an non, in Moralis Theologiæ Libris tot luxuriæ secreta prodere, quæ Sacerdotes quidem Confessionibus excipiendis destinatos ad bonum erudire, sed simul etiam multos eorum criminum antea ignaros instruere, ne dicam juvare, possunt ad malum. Quam quæstionem nos in medio relinquimus, & solùm innuere necessarium putavimus.

---

## C A P U T V.

*Quando, & quibus de causis, damnare & configere Libros, Pastoribus Ecclesiæ liceat, aut sit opus. Et hic à Censoribus Ecclesiasticis in justitiam peccari potest, in caritatem, & in prudentiam. Qui abusus & excessus in salutaris ista auctoritate exercenda fugiendi sint.*

**P**ostquam vidimus, in annuntianda veritate, erroribusque, & vitiis palam corripiendis, convenire debere atque conjungi tres virtutes, justitiam nempe, caritatem, atque

atque prudentiam : statim apparebit, quo jure, & quando, Ecclesiæ Pastores damnare possint ac debeant Libros vel olim editos, vel quotidie erumpentes in lucem. Exploratum est, nihil magis futurum esse cordi pascentibus gregem Christi, quam removere & avertere ab ovili suo quæcumque venena, quoscumque lupos. Qui ergo ferant, perniciosos Libros passim grassari, & suo gregi impune nocere? Perniciosi autem minimèque ferendi sunt ii omnes Libri, in quibus aut corrumpitur doctrina veræ Religionis, aut justitia desideratur, aut caritas, aut prudentia, Scilicet illic aut falsa pro veris produntur, aut vera pro falsis : quo læditur Religio atque Justitia. Aut maledicentia veritatis causæ sese immiscet : quo caritas vulneratur. Aut majora Ecclesiæ, siue Reipublicæ incommoda, quam commoda, afferuntur : quod prudentiæ adversatur. In his autem omnibus locum habere debet Ecclesiasticorum Judicium, & Apostolicæ præsertim Sedis, atque Conciliorum auctoritas, ut quantum fieri potest eorum curâ, nihil officiat neque veritati, neque privatis officiis, neque publicæ tranquillitati. Non quod veritatem prodi ægrè ferant, sed quod ferre non debeant, illam cum aliena injuria sine necessitate prodi, ejusque prædicationem inopportunè imprudentèq; peractam in publicam perniciem verri; hujusmodi enim benefacta æquius appellanda sunt malefacta. Audiendi porro non sunt Hæretici, qui Ecclesiasticis Pastoribus irascuntur, & malè quotidie dicunt, propter usum istiusmodi juris. Parum sanè æqui, dum Ecclesiæ ac Deo negant, quod ipsi in suis urbibus propter temporaria commoda faciendum putant, nullum videlicet ferentes Librum, quo Regum jura lædantur, & publicæ leges improbentur, & publica tranquillitas aliqua ex parte in discrimen adducatur. Quis verò Anglos exempli causâ commendet, quod Spinosa Libros ita hodie manibus omnium permittant, ut vel ipsa fæx infima plebis sceleribus suis ibi quærat præsidium; cum certè ne unum quidem publicè tolerare soleant Librum, à quo Regni, siue Reipublicæ suæ jus & concordia convellatur?

Restaret, ut exemplis rem confirmarem, excurreremque per aliquot Libros, à Catholicis & probis etiam viris conscriptos, sed à Romanis, aliisve legitimis Magistratibus confixos, quod palam fieret, unum ex tribus iis defectibus justissimam damnationi causam præbuisse. Verùm & otio meo, & alienâ patientiâ facilè abuterer in re nimirum, quam nemo non possit ingenio suo experiri, certamque

ſæpiſſimè animadvertere in tanta exemplorum copia. Juvat potiùs orationem convertere ad aliud argumentum minus fortaffe exploratum, hoc eſt, ad leges ac limites, quibus Eccleſia, & Romana Sedes, & recta in primis ratio, circumſcriptam vult auctoritatem ipſam Eccleſiaſticorum Cenſorum. Nemo quippe ignorat, quanta, & quàm juſta facultas ſit ſacris judicibus in Libris malis interdicens, atque conſigendis; aſt interdum ignorari à nonnullis, quàm cautè ac moderatè hujusmodi facultate utendum ſit. Uti igitur huic quoque parti faciam ſatis, animadverto, eos, qui cenſoris munus obire velint, non ſecùs ac ipſos Scriptores, triplici de cauſa muneri ſuo deeſſe poſſe. Ipſis quippe æquè, atque Librorum auctoribus, neceſſariò circumſpicendæ ſunt tres illæ virtutes, juſtitia videlicet, caritas, atque prudentia.

Nam quod eſt ad juſtitiam, quis dubitare poteſt, quin & ipſi Cenſores de fidei dogmatis agentes, ab illa diſcedere quandoq; poſſint, cùm homines ſint, erroribùſq; reliquorum more obnoxii? Benè de omnibus ſentire volo. Imò ſuſpicari nescio, quemquam tam perditè ſui oblitum, ut vera & recta tanquam falſa ac prava damnare, ſciens & prudens ſuſtineat. Verùm numquid non poteſt permultis aliis modis juſtitia valedici? Hominem, ut ità dicam, noſentem & inſcium perversi affectus ad injuſta rapiunt. Sed quod hìc omnium maximè in tranſverſum agere judices poſſit, ignorantia eſt, quo morbo ſe laborare plerique non ſentiunt, iſque minus interdum ſentiunt, quorum nomini ſplendidos titulos fortuna aut virtus addidère, quique erecti populos ſibi venerabundos ab alto deſpiciunt. Videant igitur ipſi, quantopere ſibi curandum ſit, ne inmeritò aliorum ſcripta feriant, eorùmq; auctores indebità ignominia onerent, fruſtra indignante juſtitia, fruſtra conquerente veritate. Nam quàmvis ſententiæ ſuæ rationem vulgò reddere non debeant, ſupremo certè omnium Judici reddituri ſunt, eidemq; pœnas daturi, ſi quando culpà ſuà defecerint in infligendis nimia facilitate ejuſmodi pœnis atq; cenſuris. Proinde niſi prius liquido conſtet, opiniones quaſdam à Catholica fidei veritatìſq; norma reverà diſcedere, hæcque eaſdem opiniones in Libris dubio procul contineri, non eſt præcipitanda ſententia atrox in eoſdem Libros atque Scriptores. Regnet pro ſuo libito quibuſdam in Scholis veriſimilis opinio aliqua; non intercedo. Sed liceat aliis aliter ſentire, quando Catholica Eccleſiæ doctrina jam rata atque ſtabilita aditum ampliùs opinandi inde nondum ſuſtu-



sustulerit. Etenim dogmata Catholicorum, non è privatis Scholis, sed è publicis Conciliorum & Patrum aliisque illustribus Traditionis monumentis petenda sunt. Liceat & quibusdam iudicibus peregrinos esse in aliquibus scientiis, atque sententiis. Non id ipsis probro vertimus, dum de hisce ignotis scientiis, minimèque exploratis sententiis iudicium sibi non arrogant, earumque patronos damnare nolint, nisi prius perspectam habeant illorum causam atque rationes. Quid quæso iniquius, quàm damnare, quæ non intelligas, aut nescias? Et animo antè aliquid statuere damnandum, quàm tibi liqueat, an falsum sit, atque perniciosum? Tacere non possum, quod egregiè in hanc rem habet Alphonsus de Castro Lib. I. contra Hæreses Cap. 7. *Sunt, ait, qui sic afficiuntur aliquorum hominum Scripturis, ut si forte quempiam viderint, qui vel digito transverso ab eorum sententia discedat, hæresim statim inclament.* Et post pauca: *Quare fateor, me non posse cohibere iracundiam, quoties video aliquos ita addictos hominum aliquorum scriptis, ut impium autument, si vel in modica re quis ab ejus sententia discedat. Volunt enim hominum scripta, velut divorum oracula, recipi, illumque honorem illis exhiberi, qui solis sacris Literis debetur. Non enim juravimus in verba hominum, sed in verba Dei.* Reliqua viri doctissimi verba æquissimè expostulantis legere juvabit, cui Ochamus, Joannes Major, Canus, Bannes, & alii, suffragium addunt.

Neque minora exigit à nobis caritas, quàm justitia. Regnum caritatis Christianorum Religio esse deberet. Nihil nobis enixiùs cùm divinus Præceptor, tum ejus Apostoli, atque Apostolorum successores commendavere. Nihil magis distinguere deberet Ecclesiasticos Judices à sæculi Magistratibus. Quænam ergo iis accedere existimatio potest, qui vel nullam, vel tenuissimam caritatis speciem exhibent in Auctoribus Librisque nonnullis proscribendis? Sunt qui, ut zelum præferant, ut docti & acuti videantur, in omnibus Libris, quicumque offeruntur, errata inveniunt, sive ut melius dicam, semper invenire volunt, & se invenisse sibi continuò persuadent. Aliis sua auctoritas languere, nihilque posse videtur, nisi quærant, quos damnent, nisi habeant, in quos tetricum vultum atque supercilium caritatis loco exercent. Sunt & qui certos. aut certæ alicujus familiæ auctores jam perosi, tum de se benemeritam vocant fortunam, cùm sibi eorum Libros obtulit, certè, si fieri unquam possit, damnationem ampliùs non evitatu-  
Hinc in plano quæzunt salebras, in scyrpo nodum. At ex-

traneos sensus Scriptorum verba obtorquentur, & eorum mens eluditur, ut criminationi tandem atque damnationi sit aliquis locus. S. Eulogius Alexandrinus in Libro contra Severum & Timotheum, uti Photius est auctor, Cod. 225. *Constituit legem & canonem; scripta disjungere non oportere ex parte, neque fragmenta quadam, sumendo ex his detorta, de Scriptoris mente judicium ferendum.* Verum hæc nonnullis erat olim cantio exotica, qui nihil sibi religioni ducebant, ex quibusdam locis detruncatis, ex meris suspicionibus, anathema pronuntiare adversus Auctores, eorumque Libros, quando ex aliis locis arduum non esset cum Libros, tum Auctores, ab ea vindicare ignominia. Quamvis autem melius quæso fuisset, hominemque Christiano, & Judice Ecclesiastico dignius, majorem impendere curam in inquirendo, qui Auctores & Libri defendi excusariq; possent, quam qui damnari? Cum vitium satis apertum se dissimulari non patitur, & excusationi locum aufert: intrepide sententia feratur, & inauditis quoque Auctoribus proscribantur Libri. Reipublicæ debetur isthæc medicina. Contra verò in dubiis rebus, quibus honesta interpretatio sine veritatis offensione præstari, quibus sine Reipublicæ incommodo ignosci potest: Caritas amat lentos, benignos, indulgentesque iudices. Atque hinc Adriani Florentii, qui postea ad Pontificatum Maximum evehctus fuit, multum olim commendata est invidenda facilitas atq; mansuetudo. Cum Lovanienfis Academiæ Decanum ageret, omnia quorumvis Catholicorum dicta, quantum per conscientiam & Religionem liceret, benignâ interpretatione emollire, & in rectum sensum trahere solebat. Paria & alii facerent, si aurum & vulgatissimum illud Christianæ caritatis præceptum identidem respicerent, hoc est: *Auctoris judicandi personam induere, ejusque rationes amantissimè animo tuo pingere debes, & in absolvendo potius atque parcendo, quàm in damnando, sistere cariorem tui ministerii laudem.*

Tertia accedit prudentia, quàm necessaria, tam rara ac difficilis in agendo virtus. Illa utinam in Censoribus Ecclesiasticis nunquam desiderata fuisset. Expeditæ quidem sunt causæ, tur Libros & Auctores damnare liceat, sive necesse sit; sed non omnium deinde est, judiciosè statuere, qui locis, quod tempus, quæ materies damnationem possit. Nōrunt ad censorium munus asciti, nihil Librorum ferendum esse, quod Religioni noceat; aut rectis moribus, aut alienæ famæ. Nonnullorum zelus ita effervesceat, tantumque illorum atiem acuit, ut aliquid ubique offendant, quod uni ex his tribus adversetur. Horrore

percelluntur, si quemquam videant, pie licet ac moderate, abusus aliquot perstringentem in Sacris, in Sacerdotibus, in cultu Dei atque Sanctorum, in Religiosorum hominum corruptis moribus, in nimia opinionum laxitate, siue rigore. Undique timent exitium sanctissimæ Religionis Catholicæ. Undique pavent, ne in castris Hæreticorum Auctor militet, neve iis nimiam libertate, modicave tutelâ adversus nos arma ministret. Ipsa olim Orientalium Linguarum peritia magnum facebat negotium eruditum, quasi ad hæresim accederet eruditionem hanc habere cum hæreticis communem. Aliquot in hoc genere non imitanda vidit sæculum illud, quo pestis Lutherana & Calviniana, tot populorum animos novitate suâ fascinosos alliciens, maxime grassabatur. Inter quæ non illud postremum, quod in suspicionem nutantis fidei adducta sunt ipsa purpurati Senatûs clarissima lumina, Sadoletus, Moronus, Contarenus, & alii. Neque sua Bellarmino postea defuere incommoda.

Jam unâ cum cæstro malefano ejurandæ Catholicæ Religionis deferbuerunt suspensiones illæ. Sed penitus sublatae non sunt, neq; omnes auferentur, dum parum prudentes erunt. Propterea si & nostris temporibus quisquam Librorum auctor non probet Scriptores illos, qui potestati sæculari, aut spiritali, plusquam veritati faveant; si titulos quosdam verus eruditus minimè toleret. effusâ nimis laude aut in sanctum quempiam virum, aut in quasdam institutiones, aut in Apostolicæ Sedis Antistitem maximum, ab aliis congestos; si quidquam in SS Patribus, aut in Baronio, & in Bellarmino, aliisq; ejusmodi Scriptoribus notet: si demum aliquid è tenebris antiquitatis depromat, quod hæretici olim procuderint, imò si quid ex hæreticorum scriptis palam adferat: de hujusmodi homine sinistrè interdum judicatur, illiusque Libris lux aut omnino negatur, aut semel concessa aufertur. Moerens hæc memoro, sed tamen fidenter; quanquam enim imprudentibus, atq; indoctis me displicere posse intelligam, certè scio me prudentum aures minimè offensurum. Nobis enim jam constat, neq; Pontificibus maximis, neq; supremis aliis Ecclesiæ Magistratibus isthæc esse tribuenda. Non nisi sanctissime instituta sunt Tribunalia, ad quæ deferantur pravi Libri, eorûmq; Auctores. Optimis item legibus armata fuere; mentem quoq; optimam in Judicibus maximis semper credere par est. Verùm ne ibi quidem deesse potest infortunium illud, quod omnem potestatem ferè semper comitatur. Caput brachiis

indiget; laudanda verò capitis consilia nonnunquam frustratur aut prodit brachiorum infirmitas. Ità & Reges; & Episcopi ministris indigent, atque istorum vitio aut socordia fieri potest; ut illi auctoritate suâ abutantur, & castissimis legibus defint. Quid faciant Ecclesiastici Judices, cum alienis oculis, alienâ fide, atque prudentiâ in tot rebus atque negotiis nequeant non uti?

Quæsitores hæreticæ pravitatîs monet Roma, ut vigilent, neque sinant per Cartesianæ aut Epicuræ Philosophiæ novitatem quidquam spargi à Catholica Religione absolum. Rectissimè id factum. Qui inter Quæsitores prudentiâ simul & eruditione excellunt, quid hîc fugiendum, quid permittendum sit, non difficile noscunt, prudenterque obtemperant. Contrà quibus aut doctrinæ aut judicii inopia est aliqua, nihil non videtur in Philosophicis abhorreere à fide, si vix tantillum à Peripateticâ sententia discedat. Atomorum & Corpusculorum nomen nescio quid hæreticum sonat ipsorum auribus, quasi & in Aristotelis schola ferri ista non possint. Formam substantialem rerum de medio tollere, non Aristoteli tantum, sed Religioni etiam putant injurium. Si ex ovo quodammodo homines quoque nasci dicantur (quod experientia omnium oculis proderet videtur) inde consequi statim putatur, nihil hominem differre ab animantibus brutis. Id genus multa quotidie occurrunt. Facit ignorantia, ut à sententiis probandis non sècerantur improbandæ; facit deinde infelix prudentia, ut metu probandi malas, ne bonæ quidem literatis hominibus permittantur. Hinc tam difficiles quidem se præbent in editione quorumcumque Librorum concedenda: hinc tam faciles alii in editis Libris configendis. Eò etiam deveniêre pauci quidam, ut votum suum Libris negarent, non alia de causa, quàm quod Græca ibi non intelligerent, imò in ipsa materia hospites planè forent. Quemdam quoque novimus ideo duntaxat vetantem Libros nonnullos vulgari, quòd illic tituli quidam, honoris politici causâ, sed non sibi satis probati, nonnullis personis non Ecclesiasticis deferrentur: quæ certè cognitio pertinet ad Principum, non ad Pastorum jura.

Quis autem non doleat fatum literatorum, ubi talia contingunt? Quis itidem non intelligat, quantum hæc absint à mente ac legibus Roman. Pontificum, atque Episcoporum quorumvis? Nihil isti arctius commendant, quàm ut ne cuiquam injuria afferatur, atque ut caritati ac prudentiæ ubique sit locus. Conveniunt in hanc rem S. Damasi verba  
in

in Ep. 4. ad Episcopos Africanos c. 6. *Decet, inquit ille, Dominus Sacerdotes fratrum causas pie tractare, & venerabiliter intendere; atque eorum iudicia super sacrificia ordinare, nec protervè, aut tyrannicè dominatione (ut de quibusdam refertur,) sed caritative pro Deo, & fraterno amore cuncta peragere; & quod sibi quis fieri secundum Dominicam vocem, non vult, alii inferre non presumat; & in qua mensura mensura mensi fueritis, remetietur vobis. Quod si de Libris & Auctoribus damnandis agitur, audiat Zoimus in Ep. 4. ad eosdem Africanos ita scribens: Docent nos terrena moderatio, quæ secularibus arbitriis & causis primum de ipsis iudiciis eligendis, repudiandisque sit. Et quanta cunctatio, quot interposita dilationes? quoties adhibita comperindinatio, etiã sub ipso fine certaminis ampliare iudicia cum innocenti reo? &c. Hac omnia mentior, nisi in patrocinium tuenda innocentia reperta sint. Tolerabilius est enim innocentem quemlibet tardius inveniri, quàm citò pro nocente damnare. Quod præclarissimi illi Pontifices monuere, monent adhuc, & optant quotidie illorum successores. Votum, inquam, est horum quoque, ut inferiores Iudices, atque Ministri, antequam durius aliquid in Libros eorumve Auctores statuunt, iterum iterumque cogitent, an defendi, an sustineri potius possint, quàm damnari. Caritatem, iustitiam, & prudentiam omnibus & isti commendant, ne legitimam auctoritatem quisquam illegitimè, &c. contra jus fasque utatur. Si quis abutitur, non Romanæ quidem Sedis, non Episcoporum, non sanctissimi instituti culpa est: sed eorum, qui sanctissimis legibus abutuntur in incommodum & calamitatem privatorum, seque damnant, dum alios injustè affligunt, atque cõdemnant.*

Cæterum non tam facile hinc à nonnullis peccaretur, ubi animum adverterent ad gravissima & crebra mala, quæ consequuntur immeritò interdicentem, ne Libri edantur, aut editos injustè vexantem. Primò, Auctorum fama & nomen ignominiam non levi afficitur, perinde quasi aut fidem prodiderint, aut caritatis & prudentiæ legibus renuntiarent, cum tamen suo munere fuerint rectè perfuncti. Ingens deinde ipsis creatur doloris causa, conspicientibus post tot labores intercidere fructus ingenii atque eruditionis suæ. Neque enim, ut est apud Synesium, aliter erga Libros suos quisque afficitur, quam parentes erga liberos suos. Tertio, nemo non videt, quàm speciosus enormi istâ morositate atque severitate declamandi locus offeratur hostibus Catholici nominis. Non est profectò committendum, ut fama obtineat, inter nos bonis ingeniis ac artibus crucem figi, nimiosque eruditioni compedes adhiberi. Cavendum præ-

terea, ne propter quorundam abusus malevoli anſam capiant vituperandæ poteſtatis tam legitimè ſanctæque conſtitutæ. Quartò, in ipſam Eccleſiam, imò in totum genus humanum recidit huiusmodi injuria. Recidit demum in ipſam veritatem. Hinc enim eruditi à ſcribendis Libris, ab explicanda ac proferenda veritate, atque ab erroribus ſtylo ſuo infeſtandis abſterrentur. *Fruſtra quippe, ut ait quidam, nili, neque aliud, ſatigando, niſi odium quarere, extrema dementia eſt.* Certè non vimus, qui, ne ſibi conſtigendum foret cum indocili quorundam Cenſorum inſcitia, atque impotentia, dimiſſis Theologicis ac Philoſophicis ſtudiis, ſe totos conjecerunt in eruditionem profanam, unde ſi non æqua laus, certè minus periculi, & plus quietis expectandum fuerat. Non ergo privatis tantùm ſtudiis officiatur ab hiſce Cenſoribus, ſed publicæ etiam utilitati, & Eccleſiæ, quæ Scrip- toribus Theologiſque indiget, non aſſentatoribus, dum ſcribunt, neque zelo immoderato ferventibus, dum judicant, ſed ſolidâ eruditione reſertis, & omni ſuperſtitione & affectu vacuis.

## C A P U T VI.

*Prudentia conſilia ad Eccleſiaſticos Cenſores. A Novitate vocum & ſententiarum timendum; ſed non omnia nova, aut noviter dicta damnanda. Quam neceſſarium Superſtitionis faciem habere perſpectam ejusque exceſſus prodere. An laudandum votum ſanguinis profundendi po- tuenda immaculata B. Virginis Conceptione. Scrupuli, cavillationes, & aſperitas à ſacris Cenſoribus abſutura. Bona procuranda, ſed ita ut mala graviora non inde fluant. Sanctorum Patrum Libri non mutilandi, cùm per typos evulgantur. Cavet hac de re accuſatio repulſa. Qui, & quando vitia Eccleſiaſticorum litteris conſignare deceat.*

**P**ARUM tamen me profeſſurum ſperarem, ſi indicatis tantummodo vulneribus, non aliquid etiam de medicina diſſererem, ſique ad miniculis quibuſdam non juvarem vacillantem nonnullorum prudentiam. Prima ergo eſto regula: *Cenſores Eccleſiaſtici ſibi metuere debent ab omni novitate ſententiarum, atque verborum, ſed ita tamen ut ne quidquid novum ſibi videtur, continud tale judicent, aut quidquid novum re-*  
verà

*vera est, damnandum quoque illico arbitrentur.* Certè prudentibus Theologis suspectæ semper futuræ sunt profanæ vocum novitates, uti nos Apostolus monuit; eorum quippe est obstare, quominus antiqua Traditio atque Doctrina ab ingeniis novaturientibus vel minimum vitietur, sive obliteretur. Magnâ hîc idcirco circumspèctione est opus, neque prius nova in lucem prodire sinenda sunt, quàm deprehendantur cum vetustis dogmatibus consentanea, aut saltem ab ipsis minimè dissonantia. Sed animadvertendum, facile ignorantiam abuti posse hac lege. Indoctis nova omnium videntur, quæ illi antea ignorarunt. Quid si velint hæc ided repellere, aut erroris suspitione onerare? Hercle id ridiculè fiat, & in justitiam peccetur. Quis molestè non ferat, eruditorum hominum studia latere, & jace re debere, quod peregrinum sapiant quorundam palato? Ad Censores potius ac Judices pertinet diligenter investigare, an ea nova sint, quàm ad eruditos filere. Præterea erunt etiam quædam nova, sed non continuò quoq; erunt culpanda. Noviter enim quædam, non nova dicuntur, & sub vocibus novis antiqua dogmata sæpè exhibentur. Exfibilati olm fuerunt Ariani, quodd celebrem vocem *ὁμοοσιον*, sive *consubstantiale*, rejicerent, tanquam nuperum figmentum. Verùm præterquam quod ante Patres Nicænos in explicando Trinitatis divinæ arcano, eamdem Catholici quidam vocem usurpant, nihil per ipsam significabatur, quod novum in Ecclesia Catholica foret. Idem dicendum de Transubstantiatione, de Sacramentorum vi ex opere operato, aliisque ejusmodi vocabulis inter Catholicos non solum receptis, sed etiam sacratis. Quapropter si res, quæ nominibus *Scientia media*, aut *Physica Prædeterminationis* significantur, cum veteri Traditione componi possunt, aut eidem nequaquam adversantur: non video, qui ferri & ipsæ voces in Scholis non possint. Apostolus enim profanas vocum novitates configens, non ipsa nuda vocabula rejicit, sed novam sub ipsis conclusam doctrinam. Scite S. Hilarius Lib. 2. de Trin. *De intelligentia, Hæresis non de Scriptura est; & sensus, non sermo sit crimen.*

Altera erit regula *Prudentis quidem est, Libros & Orationes non tolerare, à quibus scandala exoriri possint; sed æquè prudentis est, id ingenis atque Scriptoris non adimere potestatem insectandi erroris atque superstitionis, ut hæc mala per Ecclesiam sine obice fluere & bacchari exinde pergant.* Jam diximus, ferendos non esse, qui vera quidem vitia, seu certos abusus in sacris, atque in externa tum Religionis tum Ecclesiæ cœconomia depre-

deprehenſos , ſuis arguunt diſputationibus, ſed ita ſe gerunt inconcinne atque imprudenter, ut in Sacramenta ipſa, in Religionem ipſam, ſivè in factos Miniſtros, ſummæque poteſtates excitent contemptum & odium plebis. At quando & modèſtia zelo conjuncta eſt, & prudentia temperat indignationem piam: quid hiſce quæſo Scriptoribus malè velimus, rem Eccleſiæ , publicumque bonum gnaviſſime procurantibus? Equidem dicere non verebor, quod facere alios non pudet. Multis ſenſum horroris incutiunt ſolæ audaces atque impiæ ſententiæ. Superſtitioſa dogmata, & opera ſuperſtitionis ipſius, aut vix deformia ipſis videntur, aut certè non videntur igne ac ferro excidendæ. Et ſanè pietatis ac religionis ſpeciem ſuperſtitio præferre ſemper ſolet; eſt enim plerumque harum virtutum exceſſus ex ignorantia progenitus. Illius autem foeditas vix apparet, ejusque venena parum timentur. Quis autem non intelligat , æquè in Religionis perniciem conſpirare Hæreticorum impudentiam , & adulterinam ſuperſtitioſæ gentis pietatem? Ex hincitur in errorem, & hoſtibus cenſuræ materia miniſtratur. Quamobrem Eccleſiæ Dei cavendum eſt à ſuperſtitione, & per quam ſolicite, cum faciliùs nocere ſoleant ac poſſint occulti, quàm aperti hoſtes; & dulciùs bibantur errores , pietatis colorem præ ſe ferentes , quàm petulans , & aſpectu primo deformis , impiorum doctrina.

Itaque non ſolùm conducit, ſed opus eſt habere Scriptores pios , atque Theologos exquiſitâ eruditione zeloque pari conſpicios, qui ſuperſtitioni identidem pullulanti, & contra Catholicorum Præſulum ſcitta ac mentem regnanti , ſeſe impigrè obijciant, ſtylòque bellum inferant. Cum id modeſtè prudentèrque peragitur , quid invides Eccleſiæ neceſſariam utilèmvè medicinam? Cur tam facile eorum ſcriptis lucem negas, aut eripis? Omnia fermè Sanctorum Patrum , & antiquorum volumina aliquas habent falſæ pietatis accuſationes. Imò acerrimæ apud illos leguntur orationes, quales ne imitari quidem præſus nos vellemus, in corruptos Clericorum & Monachorum mores , in ſuperſtitioſas parùmque pias conſuetudines, in licentiam opinionum, & vitia Præſulum. Nulla inde tamen ſcandala conſecuta ſunt, & illis nemo ſuccenſet. Nos adèò delicati evaſimus , ut ne leves quidem puncturas ferre poſſimus , atque extrema inde ſemper mala timeamus. Erunt , ità me Deus amet , qui & hunc Librum cenſeant ad temeritatem accedere , quanquam tam levi brachio infelix iſta moroſitas



tas perstringatur. At aliter sentient, quantum quidem spero, doctissimi atque prudentissimi inter Catholicos. Quippe istis jamdudum exploratum est, nimis felicia fore, nimis progressura vitia, si ne unus quidem contra hiscere auderet; & Ecclesiæ causam non minus agi, cum externum Hæreticæ Doctrinæ virus ab ipsa arcetur, quam cum interna superstitio inde perturbatur. Non intelligunt imperiti, quantum Ecclesiæ interit, superstitionis vitium populo universo innotescere: Quod quia plerisque de nomine quoque ignotum est, hinc fit, ut serò à multis mox geratur summis Pontificibus, Episcopis, atque Conciliis, superstitiosa sæpè configentibus atque interdicentibus. Difficile enim dedisci ac abjici solet, quod pietatis personam refert, sacrumque jam diu & sanctum videtur.

Proderit hic unum producere exemplum ejusmodi plæ, ut ità dicam, pervicaciæ. Satis quibusdam non fuit, çalamo & rationibus immaculatam Deiparæ Conceptionem tueri: quod procul dubio cum vera pietate consonat. Nescio quid etiam illustrius invenisse sibi sunt visi, quo suum in Virginem testarentur obsequium. Sacramento videlicet sese obstrinxerunt, atque voverunt, se pro hujusmodi opinione tuenda sanguinem & vitam datuos, quoties occasio posceret. Novitium certè Martyrum genus, quod nusquam Majores nostri somniarunt, nunquam posterius nostri, si quidquam sapiunt, probent. Neque Evangelium, neque ratio recta nos docent adeò levibus de causis animam prodigere. Non pro opinionibus nostris, sed pro divinitus revelatis, legibusque sanctissimis, profundendus est sanguis. Hominum enim opiniones tam falsum quam verum complecti possunt; & hominis parum prudentis est pro incerta opinione (quæ falsa esse potest, & certè necessario defendenda non est) ultrò jugulum offerre carnifici. At mihi certissima est hujusmodi opinio, aliquis dicet. Cui? Homini nempe, creaturæ fallacissimæ Num, rogo, certum est aliquid, quia id sibi certum videtur? Revelavit Deus, quæ sine erroris suspitione credenda sunt vera. Ecclesiam habemus fidissimam horum dogmatum testem, atque hæc nobis, dum vita suppetit, confessione & sanguine sunt afferenda, atque inde sperandum est æternum in cœlis præmium. Verum, quianquam summè pia sit persuasio illa, quæ beatissimam Christi parentem sine labe conceptam putas, nihil aliud tamen est, quam opinio humana, errori obnoxia, dum Romana Sedes atque Ecclesia, ejusmodi sententiam antiquâ Traditione, & Revelatione divinâ sufficienter niti

niti non statuant. Cur tu sanguine, quem sine legitima causa fundere nefas est, testari tanquam certissimam vis opinionem, quam Ecclesia ipsa tot licet piorum quorundam precibus fatigata certam decernere nondum sustinuit, & propè est ut dicam, decerni non posse silentio suo quodammodo significavit? Quis te certum facit de cœlesti regno, ad mortem non sine aliqua temeritate ruentem?

At enim, subjicis, quanquam subesse error huic opinioni, & falli intellectus possit, nunquam tamen hic errare affectus dicitur. Incerta sit, ut lubet, opinio; certus tamen est zelus, & huic cœlum impetrabit Virgo Sed, ô sodes, meminisse debes, dari quoque zelum sine scientia, zelum inconsultum, & prudentiæ monitis injurium. Recta quidem voluntas imprudens facinus excusare possit, non autem inde sperare præmium ac laudem. Ut sit post filium suum supra cæteras creaturas laudanda Maria, non indiget ipsa dubiis laudibus, neque imprudenti sacrificio Et tu contrà indiges vitâ tuâ, ut eam in fide tuenda, ac virtutibus exercendis justius impendas. Irasceretur potius, ut arbitror, Christi Mater ( si quis cadere in animam sanctissimam & beatissimam posset iræ sensus) quoddam humanas opiniones, licet piâs, pari confessione & ardore tueris, atque divinam revelationem. Si tibi Virginem devincere melius & prudentius cupis, illius quantum potes imitare virtutes. Illi honorem, sed prudenter, habe; honorem enim Reginae judicium diligit. Fac ut supremo illi Regi placeas, qui & Mariæ & noster Deus est; & Mariæ placebis. Quomodo te Numini placitum putas, illiusque Martyrem te futurum speras, si ritè certus non es, te pro veritate mortem oppetere, idque tantâ contentione fuisse vis, quod aliter Deus voluisse potest, incertumque adhuc est, an aliter esse voluerit? Cave, ne amorem ac reverentiam Virgini debitam eò usque amplifies, ut superstitionem efficias. Non unus autem ego in hoc voto profundendæ vitæ pro immaculata Conceptione Virginis superstitionem timeo. Timuit, & timet Apostolica Sedes, quæ quamvis eandem opinionem maximè verisimilem & piâ ducat, nihilominus hujusmodi votum in Theophilo Raynaudo olim non probavit, ipsumque affirmantem pro ea causâ pium esse mori, silere iussit. Aliud enim est aliquid tanquam verisimile, & aliquid tanquam certum affirmare. Sed frustrâ fuit illud à Romano Pontifice antidotum. Nostris quoque temporibus tum in privatis colloquiis, tum in publicis concionibus idem votum

repetitur, eadem sponsio auditur. Credi non potest à prudentia abhorrens, quod tanta pietatis lineamenta præfert. Et tamen si hoc ferendum est, non video qui in immensum protendere non liceat novum hoc Martyrii genus. Nam & alii vitam vovebunt, atque exponent, quo exempli causâ Lauretanam ædem sustineant Servatoris ortu illustratam reverà fuisse, & Francisco Assissinati, atque Catharinæ Senensi stigmata fuisse divinitus impressa, & ab aliis Sanctis viris miracula quædam procul dubio fuisse patrata. Quod certè in Ecclesia Dei nunquam tolerandum, ne idem divinis atque humanis habeatur honor, neve temerè & promendacio interdum, projiciatur pretiosa hominum vita.

Regula tertia esto: *Prudentis est, cautè omnia perpendere, ut quantum potest, errorem, aut errerum, & atque vitiorum causam in Libris damnet. Sed à prudentia discedit, qui tam cautè agere vult, ut in scrupulos postea, & cavillationes, & asperitatem nimiam se proripi non animadvertat.* Scrupulos appello, ubique Hæreses suspicari, ubique metuere, ne Religioni vulnera infligantur, ne in venerandos Majores, atque in sacra, contemptus aut odium creetur, neve Lectoribus propinentur errores, eorumve moribus officiantur. Cavillationes voco in deteriorem partem accipere semper velle, quæ sanum facile pariunt sensum, & sive sententiæ, sive sint voces, explicationem rectæ fidei ac honestati consonam commodissimè admittunt. Asperitatis nomine significare animus est, tot obices interdum opponere editioni Librorum; aut quæ facile emendari possunt, prorsus opprimere velle; aut Scriptores, Ecclesiæ Sanctæ ob sinceritatem, quam profitentur, nimirum necessarios, rigidissimè semper excipere, eorum calamos detertere, eorum labores ac famam levibus nonnunquam de causis divexare. Neque enim quæcumque fortia, acria, & magnâ cum libertate scribuntur, Ecclesiæ nocent, sive Lectoribus. Hujusmodi quoque Libros conscribi interdum atque evulgari, plurimum conducit perfectò populorum atque Ecclesiæ regimini. Neque aut prodis amorem Hæresis, aut pravæ doctrinæ laudem sonas, si eruditos quandoque appellas Protestantium quosdam, eorumque verba & inventa in tui commodum trahis. Hæreticum non est, quidquid Hæretici dicunt; cujuscumque enim ore veritas proferatur, suam retinet pulchritudinem; & nemo nescit, eruditionem optimam cum pessima fide sæpè consistere posse.

Postre-

Postrema tandem regula statuatur: *Prudentis est ita debellere, quæ nocere possunt, ut interim tamen remedium ipsum, majorem non adferat Ecclesiæ atque Reipublica perniciem, aut majorem non impediatur utilitatem.* Certum est, Hæreticorum impiorumque Libros jure proscribi, & à fidelium manibus tolli. Eâ ratione Catholicis hominibus caveretur à viro præsentissimo, cujus progressibus vim addere posset insita humanis mentibus & cordibus corruptio. Attamen si quis Catholicum quemque, doctum licet, piûmve virum, ab hujusmodi Librorum lectione prohiberet, is in incommodum gravius Ecclesiâ impelleret, læderetque prudentiæ leges apertas. Facere nequeunt edicta Præfulum, ut per versi Libri statim à confixione aboleantur. Non solum inter hæreticarum regionum promœria liberè illi versantur, sed in Provincias quoque Orthodoxas, atque in sinum ipsum rectæ Religionis, confidentissimè penetrant. Si doctis viris talia legendi facultas nequaquam daretur, eorumque doctrinam exitialem refellere commodum minimè foret: quis non intelligat, quàm impunè vagari & debacchari posset inter Catholicos ipsos teterrima pestis? Adversariorum proinde rationes, sophismata, ac artes noscere, quibus Orthodoxa fides impetitur, non juvat tantum, sed necesse quoque est, ut nostra deinde melius confirmemus, atque tueamur, & fratres ab errore avocemus, aut saltem ne de silentio sibi victoriam Hæreticus canat.

Ad hæc sunt Libri, quos aliqui errores inficiunt, aut obscœni amores, venenumque satyricum aliqua ex parte deturpant. Reliquam, videlicet potiore, Librorum istorum partem commendant non pauca virtutes. & suam ex ipsis utilitatem capere litteraria Respublica potest, siue elegantiam styli consideres, siue eruditionem, siue doctrinam. Jam constat, non esse ferenda hujusmodi scripta. Sed quando extrahi inde nævi illi possunt, iisque demptis reliquum Libri servare fas est, atque utile fuerit: utique prudentia poscit, ut retinere Librum mutilatum, quàm integrum abjicere malimus. Quid eadem pœna tam bonum, quàm malum involvit? Si utilia & recta scribit Hæreticus doctissimorum hominum judicio, eaque ab alijs minimè sanis opinionibus depurata habere potes: quid tibi religioni ducis ab ipso accipere donum non infidiosum, non nociturum? Quamobrem Expurgatorios Indices à Catholicis excogitados nemo non laudet, si tamen eruditus æq; ac prudētibus Theologis eorum cura demandetur.

Prur

Prudentibus,inquam,& nequaquam superstitiosis,ne cum lollio frumenta evellant, nève illinc etiam timeant, unde nihil timendum est. Magnum autem hîc illi auferent facinus,certè non imitandum, imò deplorandum, qui non recentiorum tantummodo Libros sibi emaculandos susciperent, sed veterum quoque Patrum. Censores illos nimium profectò prudentia dehiceret. Nam ut consulerent paucorum inter Catholicos infirmitati, quibus persuaderi fortasse possint errores nonnulli, quia in Patrum Libris, & à Patribus disseminati; attamen ista paucorum utilitas gravissimo innumerosum incommodo,& ipsius Ecclesiæ Catholicæ (dum illorum operam per te spectemus) dedecore emeretur. Si Patrum scripta mutilantur, si illinc aufertur, quidquid nostræ communionis hominibus nequaquam arridet, sique illic tantum permittitur, atque evulgatur, quod nostris moribus atque sententiis consonat; quæ fides in posterum erit ipsorum Patrum editionibus? Imò erunt ex ipsis Catholicis infirmis, qui suspicentur, malam esse causam nostram, quæ sibi vel à Sanctis Patribus metuit, & arma inimicorum non repellit, sed eludit; non frangit, sed occultat. Præterea quàm bellam declamandi adversus Catholicos occasionem Hæreticis non ministrarent hujusmodi Censores? Videremur nempe malis artibus, & cuniculis, tueri causam veritatis.

Atque id nobis non ità pridem post alios multos insultando objiciebat Guillelmus Cave in Prolegom. ad Hist. Litterariam Scriptorum Ecclesiasticorum, quasi Curatores Indicis Expurgatorii in Hispania manum intulerint ipsis Patrum scriptis. Cui tamen ità responsum velim: si ab Hispanis id reverà præstitum fuit, Ecclesiam universam minimè suffragium addidisse Quæstorum illorum confidentiæ nimix. Omnibus non imputandum paucorum facinus. Alias Catholicorum Provincias aliter in Expurgatorijs Indicibus efformandis sese gessisse; & prodire adhuc inter ipsos Catholicos integræ Sanctorum Patrum opera, ne ullo quidem apice dempto, in Gallia potissimum; & curâ præcipuè doctissimorum Monachorum S. Benedicti & Congregatione Sancti Mauri, Prudentiam fortasse desiderari in Indicis Hispanici curatoribus, ac certè ab istis malam fidem, & fraudes abesse; ne dicam timorem & conscientiam desperatæ causæ. Apertè enim, non clanculum, truncanda esse quædam Patrum loca edixerunt, idque ut pusillis prospiceretur, quibus vel ipsa Cantica Canticorum olim negabantur, ne ex eorum lectione minus honesta de

divinis rebus animo conciperent. Eadem Patrum loca in controversiis & Schollis non dissimulari à nobis; & palam ostendi, nihil illa officere dogmatibus Ecclesiæ Catholicæ. Sanctorum verò Patrum sub nomine non omnes venire veteres Ecclesiasticæ doctrinæ tractatores; propterque parem singulis antiquis deferendum honorem non esse. Postremò ne id quidem ab Hispanicis præstitum fuisse contenderem. Aliud enim est, textum Sanctorum Patrum, aliud Indices in Opera Patrum concinnatos expurgare, aut Interpretationem iusdam ab Hæreticis obtrusam configere. In germanum textum nihil Hispani tentârunt. Tota eorum cura stetit in Indicibus atque Interpretationibus purgandis. Alicubi fortasse nimius in purgatione rigor adhibitus. At semper expuncta sunt, quæ in Indice atque Interpretatione, non autem in textu Patrum, perversam ingerunt aut sapiunt doctrinam. Nisi aliò properandum esset, id exemplis prolatis confirmare facillimum foret. Quòd si Patrum opera mutilassent nonnulli suis in editionibus, illorum quidem rectam voluntatem meum non esset vituperare, sed omnium sanè esset eorum non imitari consiliū.

Restat igitur, ut excusatione potius quàm laude excipiamus, si qui talia peregerunt in Sanctorum Patrum scriptis. In his procul dubio occurrunt aliqua interdum minùs commodè, minùs cautè, minùsque perspicuè dicta, aut etiam ab Ecclesiæ totius mente, ac Traditione alienâ. Expurganda autem ista non sunt è publicis editionibus. Interpretationes potius apponendæ aut subjiaciendæ. Scholiis ac notis edocendus est Lector sanam doctrinam, aut confirmanda est rationibus melior sententia. Ità infirmis cavetur, & eruditorum editionem curantium sinceritas, ac optima fides, in tuto collocantur. Illud enim præ oculis perpetuò futurum est nobis: Catholicam Ecclesiā, quæ nihil sibi à tot Hæreticorum arietibus pavet, longè minùs formidare sibi debere à Sanctis Patribus, suis nempe Magistris, & veritatis testibus. Cæterum sæpè recentiorum temporum Novatores conquesti sunt, adulteratos fuisse à Catholicis, & à Monachis præsertim, MSS. Codices Patrum, ne quid sententiis, quæ inter nos obtinent, quidquam illis adversi appareret. Hinc in ipsos Monachos mille injuriarum plastra exonerata fuere: sed iniquè planè, & ingratis. Undenam enim & ipsi Hæretici habent tot aut edita, aut calamo exarata Sanctorum Patrum scripta, nisi è Catholicis, præcipuèque Monachorum studio? Propè est ut dicam: pleraque antiquitatis monumenta jam periissent,

sent, nisi Monachos Græcos atque Latinos habuissimus, eorum custodes, amanuenses, Librarios. Ac proinde Monachis ferè solis debemus, quæcumque veterum Patrum scripta, integra, atque è tot mendis expurgata cunctis plaudentibus evulgantur in dies. Si quis inter illos (hoc autem nunc perpendere non vacat) adeò delicatus, imprudensque fuit, ut Catholicæ Ecclesiæ opportunum duceret, aliquid sine dolo malo immutare in Patrum Codicibus, si vè quicquam illinc demere: cur omnibus Monachis vitio & crimini vertitur paucorum inconsulta temeritas? Per alios Codices à Catholicis, & iis plerumque Monachis descriptos, vitiati Codices adhuc emendantur. Gratiæ ergo potius habeantur Monachismo pro tot tantisque diligentissimè servatis, quàm maledicta rependantur pro tam paucis, si quæ sunt, dedita opera atque imprudenter corruptis. Nam & nos ad vituperandum parati sumus, si qui fuerunt, quibus maleficus zelus suaserit inferendas esse violentas manus scriptis Patrum; cùm contrà æquè laudandos judicemus innumeros alios, qui ab hujusmodi facinore abstinerunt, noveruntque, non solum hisce artibus non indigere Catholicam Religionem, sed per illas etiam non parùm incommodi & dedecoris eidem afferri. Prudenti igitur perspiciendum est semper, ne, dum unum curat vulnus, novum ipse graviusque inferat, aut ne majorem quampiam utilitatem perdat, dum minorem persequitur. Hac de causa nunquam proscripta, semper tolerata sunt quædam Ethnicorum Scriptorum loca, putà Taciti, Suetonii, Plinii nepotis, Celsi, Luciani, quamquam Christianis interdum injuria: talia enim mirum & ipsa in modum nunc inserviunt ad confirmandam adversus incredulos cùm doctrinam tum antiquitatem Christianæ Religionis.

Sed age, quoniam de prudentiæ legibus nobis est sermo, breviter inquiramus, ferendi ne sint, an damnandi, qui Ecclesiasticorum Præsulum, aliorumque sacrorum Ministrorum, atque Ordinum, vicia suis in Historiis describunt, atque insimulant. Primò animadvertere necesse est, num quæ probrosa de hujusmodi hominibus referuntur, cum veritate pugnent, an habeant eandem amicum. Quis dubitet, quin prorsus cohibendi sint, si vè damnandi Auctores, quibus religio non est falsa pro veris, incerta pro certis, evulgare in sacrorum Antistitum, Sacerdotum, atque Monachorum contumeliam? Ipsum narrare dubia, ipsum rumores suspicionésque vulgi facili, tanquam ora-

cula, mandare litteris, legitimam sæpè ac sapiens causam præbere potest, cur aded temerariis narrationibus nulla adhibeatur fides, nigrumque Theta ab Ecclesiasticis Censoribus præfigatur. Non est profectò permittendum à publicis Ecclesiæ, seculive Magistratibus, ut vel uni homunculo scelera perverſique mores immerito ac palam tribuantur, nedum iis hominibus, quos supra vulgarem hominum sortem evexit, fecitque venerabiles Ecclesia Christi, & pium aliquod institutum vitæ. Quot autem de ipsis Romanis Pontificibus commenta nobis non dedit nonnullorum in eos odium, invidia, improbitas, ubi inter ipsos & alios quosdam Episcopos aut Principes dissidia interdum funestissima intercessere? Non ulla magis bella occasio, quàm Pontificibus Maximis teterrima quæque & nefanda pro inimicorum arbitrio adscriberentur. Vel somniata est Pappissa quædam Joanna, & fidem apud credulos non paucos fabella, quanquam malè consuta, invenit. Certârunt Hæretici quoque, & reliqui Schismatici, ut eorumdem Pontificum famam denigrarent. Conclavium pariter conficta secreta evulgari vidimus; & nostris temporibus hisce ludibriis quidam Italus Batavos oblectabat, ad quos sese receperat, desertâ Religione Catholicâ. Quo in studio liberaliter quidem daturi sumus, non semper calumniis actum fuisse, & vitiis minimè caruisse quosdam ex iis Pontificibus. Sed qui res accuratiùs & sine præjudiciis pensitant, in plerisque ex iis accusationibus veritatem desiderari facilè intelligunt. Æquitas ergo, atque prudentia, hoc hominum Librorumque genus proscribendum jubent.

Quòd si crimina vera memoriæ produntur, neq; livor aut obreſcatio calami Scriptoris abripiunt: interdum toleranda erit hujusmodi libertas, & veritatis cura. Oportet enim, timorè quoq; famæ instare principibus in Ecclesia viris, & Ecclesiasticis quibusve, quo etiam freno coërceantur tū ab impotentia dominandi, tum à reliquis sordidissimis secularium hominum vitiis. Atq; utinam non fuissent, neq; forent adhuc, Episcopi & Sacerdotes, quales Apostolus noller. Utinam non vidisset, neque videret orbis Monasticæ vitæ professores, veste tantum & colore suis Institutibus similes cætera dissimiles. Si horum gesta litteris consignanda sunt, num alios homines describere licet, quàm ipsi fuerunt? Num adulatione fama illorum palpanda? Ac ista, inquires, dissimulanda. Utique, si crimina privati hominis sūt; si nihil rei cum populo, & Religione habeant; si nihil utilitatis, eoque magis si quidquam incommodi in

Rem-



commodi in Rempublicam fluere potest ex eorum revelatione; si denique è vivis nondum excessere criminosi. Nam & discordiarum rixarumque causa omnis tollenda, & à scandalis, & ab una hominum inhonesta curiositate pascenda, nobis est abstinendum. Verùm cum publica sunt scelera, & cum Religionis atque Ecclesiæ negotio conjuncta sunt, eorumque Auctores, humanis rebus defuncti, iræ atque vindictæ locum sustulere: videndum est, an non majorem Respublica utilitatem capiat, iisdem proditis, quàm dissimulatis hominum vitiis. Erunt vitia, donec homines; sed ne vitia impunita debacchentur, arguenda sunt atque improbanda palam, eorumque horror incuriendus hominibus. E Majorum autem exemplis discunt successores, quid sibi agendum non sit; discunt vereri famam, parcentem quandoque viventibus, in mortuos omnes æquam; agnoscunt turpitudinem suam aliena sub imagine expressam. Interest igitur Ecclesiæ atque Reipublicæ, ista quoque interdum evulgari. Accedit ad hæc summè laudanda in Historicis virtus sinceritatis, quam ab Ecclesiasticis Scriptoribus abhorre nemo sanus dicat. Et certè magnus ipse Annalium parens Baronius, quanquam ab Hæreticis insimulatus, quasi plus æquo faveat Romanis Pontificibus, ne istorum quidem facinora vituperanda, cum fert occasio, dissimulat. Cæteri Episcopi, Presbyteri, & Monachi, quod quisque longiùs è probitatis via deflexit, eò retrioribus pinguntur coloribus in ejusdem Baronii Annalibus. Atq; hunc ipsum servavere morem alii inter Ecclesiasticos celeberrimi Historici. Neque verò nos ignorare finit eadem Historia, sanctos Patres humanis & ipsos interdum laborasse infirmitatibus; & siquidem siluisset Historia, satis nonnullorum Patrum scripta, jamdudum evulgata, loquantur. Quod hîc tamen cavendum maximopere puto, prudens piûsque eruditionis Ecclesiasticæ cultor ità narrabit aliorum probra, mores perversos, artes pravas, ut quantum fieri potest, neque modestia, neque pietas, neque caritas in ipsius narratione desiderentur. Erudiet Lectores utili veritate; sed ab ipsis simul etiam caute depellet scintillas omnes odii, sive contemptus in Religionem, in sacros Ministros, atq; in reliquos Monachos, eorumve piissima & optima instituta. Atq; hæc satis sint ad hujusmodi quæstionem. Nam unius prudentiæ est, dignoscere in agendo, quæ referre, quæve præterire liceat atq; expediat. Interim tamè illa stet regula: *Non esse ità Scriptorib; præcidendam libertatē ut ipsis nunquam fas sit Majorū vitia & crimina in mediū proferre.*

## CAPUT VII.

*An ad religionem veram compellere quemquam summis Magistratibus liceat. Ad Jus Ecclesiæ ac Regibus in Hæreticos. Phereponi hac de causa in S. Augustinum ira, ac injusta censura. Manifesta Religio aliqua evidenter credibilis danda est, atque hac est Catholica. Donatista phreneticis comparati, neque injuria à S. Augustino. Plerique ex iis non ficto animo Catholicam communionem amplexi. Legum terror rationibus additus laude ac utilitate non caret. Exemplum Dei hanc in rem iuste ab Augustino adhibitum.*

Inquirendum nunc restat, quodnam Jus humanis ingenius, quodnam Ecclesiæ sit in professione Religionis; num videlicet futura sit omnibus libertas illius Religionis profutendæ, quam ipse putat optimam ac veram; an hujusmodi libertati opponere se debeat certa veritas custos Ecclesiæ, reluctantesque ad meliorem fidem pertrahere atque compellere. In argumento amplissimo en quæ statuenda videntur. Cum Ecclesiæ subiecti non sint Gentiles, Muhammedani, atque Judæi, nihil eadem juris in ipsos sibi tribuit, nisi suadendi, atque hortandi, ut suis erroribus abdicatis cum Religione vera consentiant. Jus est ipsi Ecclesiæ in solos Hæreticos, quos nempe à sua ditione non idèò solutos credit, quòd ipsi ab ejus communione sese exemerint; nam & in transfugis militibus regius character perdurat, & possessione ac jure servorum, atque filiorum, quòd à se fugerint, nequaquam spoliantur domini, atque parentes. Hæreticos ergo Ecclesiæ potest suis urgere armis, quo illos in suam caulam rursus perducatur: armis, inquam, spiritalibus, excommunicatione ac diris omnibus. Ad Reges autem, seculique Principes spectat, salutaribus etiam poenis sollicitare devios, aut alienos à fide, ne in errore diutius perstent, nève eidem immoriantur.

Porro gravis hîc Novatorum nostri temporis in S. Augustinum tumultus, atque acres querimonie in Catholicos, & in Christianissimum præcipue Galliarum Regem, qui quinque & viginti abhinc annis hisce castigationibus est usus, ut Calvinii sectatores sibi subiectos in gremium Ecclesiæ Catholicæ impelleret. Phereponus autem totus in istam quæstionem invadit, & hîc effusius quàm alibi irascitur

citur Augustino , quasi Catholicis Imperatoribus primus auctor iste fuerit , ut leges in Hæreticos promulgarent , & certè severitatem in ipsos suaserit , atque laudârit. Imò liberè fatetur Phereponus , se istâ potissimum de causa impulsum fuisse ad exercendam in alia quoque Augustini opera virgam censoriam; non enim homini parcendum, eo consilio tam malè de mortalium genere, ac de ipsâ Religione merito. Equidem nihil miror , tantam bilem in Phereponi præcordiis exaruisse , Arminiarorum , sive Remonstrantium quibuscum Censor ille facit, præcipua sententia est , nemini Religionis causâ molestiam esse inferendam. Atque ità sentire, aliisque suadere, commodum planè ipsis atque utilissimum, formidantibus nempe , ne rigidis Calvinianis, numero & auctoritate præstantibus, clavumque ipsius Reipublicæ tenentibus, aliquando placeat (quod Synodi Dordracenæ temporibus tentatum quoque fuit) minorem prostrernere Remonstrantium gregem , sibi adhuc adversantem. Verùm Augustini sententia, quam Catholici semper amplexi sunt, tot rationibus nititur, atque confirmata est, ut nostro clypeo ampliùs egerè non videatur. Attamen argumenta & censuras Phereponi S. Augustino oppositas refutare , si non necessarium , saltem utile fuerit. Quod priusquam præstem, animadvertere necesse est, non Augustini tantùm ævo adversus Hæreticos , & inimicos Christi suis legibus decertâsse Imperatores ; sed statim ac ad Christianos transit Romanum Imperium Constantinus Magnus, Valentinianus senior , Gratianus , & Theodosius Magnus, ut alios omittam, ante Augustinum, & Augustini consiliis ac precibus minimè expectatis, Idolorum cultores & Hæreticos exagitârunt, compescuerunt, variis legibus, mulctis & pœnis. Id testantur Eusebius, Socrates, Sozomen. Theodoretus, Hieron. & alii Imperatorum illorum Leges leguntur adhuc in codice Theodosiano. Etiam tum Episcopi hisce Augustorum edictis, eorùmque zelo, & piæ aſſeritati laudes atque suffragium adjugebant , ut faciliè constare possit, S. Augustinum neque primum auctorem, neque primum laudatorem fuisse adhibitæ olim etiam à Regibus in Hæreticos Ethnicosve subiectos severitatis.

Primum Augustini argumentum, quod sibi sumit exsolvendum Phereponus, istis continetur verbis in Ep. XCIII. olim 48. Cap. I. *Si quisquam inimicum suum periculosis febribus phreneticum factum currere videret in præcepſ: nonne tunc potius malum pro malo redderet, si cum sic currere permitteret, quàm si corripiendum ligandùmque curaret?* Comparationem hanc ex phrenetico deductâ cum in finem, ut ostendatur licita per-

secutio in eos , quoad veritatis & germanæ Religionis professionem adducere volumus , nullius esse ponderis Phereponus ait pag. 492. Aniniadv. *Phrenetici enim* ( ita ille reponit ) *sine ullo dubio sunt phrenetici, & societate civilem planè perturbant. Itaque leges civiles eos coerceri patiuntur & jubent. At in controversiis de Religione, in quibus sæpè videas contrarias partes virtutum Christianarum æque studiosas, legibusque civilibus pariter obsequentes, res non est neque adeò manifestà, ut alteræ partes alterarum homines phreneticorum loco habere queant; nec in tantis affectibus, quanti hîc deprehenduntur, alii alicrum iudices esse possunt. Facile evanescent istæ ac aliæ in hanc rem afferendæ postea, Censoris argutiæ, si unum principium statuamus, quod qui ignorat, si vè contemnit, nescio quàm rectè inter Christianos sit adhuc recensendus. Nempè: esse debere, & esse reipsa, Religionem aliquam inter homines à Deo constitutam, eamque non solum veram, certam, ac divinam, sed etiam evidenter credibilem, & à quocumque amplectendam, dum ejus rationes & dogmata audiantur, atque expendantur. Et quale quæso Dei optimi ac sapientissimi consilium fuisset, mortaliū genus edocere Religionem veram, nisi verà hæc ejus Religio inter reliquas falsas prodere se, & suam reverà præcellentiam manifestè semper aperire potuisset, ac posset? Quid hominibus profuisset, atque prodesset divinum beneficium, si nemini unquam contingeret sine dubitatione perspicere, atque cognoscere quænam sit unica illa cœlestis Religio? Nonne apud Deum excusare se meritò posset, quicumque erraret in Religionis delectu, quando abditum, obscurum, & dubitum semper foret, quæ una sit amplectenda? Ergo frustra Christus nos docuisset. Ergo frustra Spiritus S. locutus fuisset per Prophetas, Apostolos, atque Evangelistas.*

Ex hoc principio sponte alia fluunt. Nam si recta ratio fateri nos cogit, veram aliquam Religionem, eamque evidenter credibilem, non debere dumtaxat esse inter homines, sed esse reipsa, sique, uti nòs ostendimus, & adhuc ostendere possemus, ne ipso quidem Pherepono, ut arbitror, disistente, sola Religio Christi eadem una est, cui evidentiæ conveniunt veritatis & divinitatis signa: ergo evidenter errabunt, quicumque à Christianâ Religione absunt. Rursus cum Religio ista in plures easq; diversissimas societates, invicem dissidentes atq; contrarias, dividatur: necesse est, ut una tantum inter societates hæc veram & germanam Christi Religionem possideat; reliquæ falsitatē ac errorem sectentur. Atqui nulla alia esse societas ista potest, quàm

Catho-

Catholicorum, uti & nos suprà ostendimus. Ergo Religio Catholicorum evidenter credibilis esse debet, atque adeò est, si rectè positum est primum illud principium, nempe necessariò futuram esse inter hominem Religionem aliquam, evidentià veritatis ac certitudinis signa præferentem. Quòd si Catholica Religio evidenter credibilis est, quid aliud consequitur, nisi cæteras Christianorum societates errare, delirare, & quod est ad fidem, loco phreneticarum esse habendas? Denique si exceptis Catholicis cæteri homines in Religione delirant, ergo etiam in veritatem, & in Deum peccant; ergo salutarium vexationum ope illos revocare ab æternis pœnis, non nisi caritatis Christianæ consilium laudabile fuerit.

Contistimus hîc, & pêtitus nunc à Pherepono, qui pronuntiârît, *non esse in controversiis de Religione rem adeò manifestam, ut altera partes alterarum homines phreneticorum loco habere queant, tantosque esse affectus, ut hic alii esse aliorum iudices non possint.* Hæc, ut sonant, Judæis etiam, & innumeris Gentilium, ac Muhammedanorum sectis somnium in errore dulcissimum conciliare valent. Nam quomodo illi excitentur, vincantur, & ad nos evocentur, si ipsorum iudices esse non possumus, neque manifestum est, neque manifestum esse ostendere valemus, eos in Religionis controversiis delirare? Quis Christianorum de sua, aliorumque Religione, hucusque talia pronuntiare est ausus? Quòd si Phereponus de controversiis inter varias tantummodo Christianorum societates ferventibus hæc habet: quòd vergat sua hæc sententia, animadvertat. Si manifestum satis, apertumque non est, neque esse potest, quænam è tot Christianorum societatibus veram fidem atque doctrinam cœlestem tueatur: ergo quælibet inter nos secta, quilibet Hæreticus, quanquam à Catholicorum, ipsorumque Protestantium dogmatis remotissimus, excusationem honestam prætendet, cur ejurare suas opiniones nolit. Ergo unusquisque, dum in Deum & Christum credat, & à pravis operibus abstineat in sua Secta & Religione æternam salutem se posse adipisci meritò arbitrabitur. Ergo ferenda erit omnium Hæreticorum colluvies; neque rationem Deus nos edocuerit discernendi mendacii & erroris à veritate; neque ullum in Ecclesia sua Christus controversiarum judicem constituerit, quo tamen Judæorum Ecclesia non caruit. Ergo Apostolus ad Titum 3. frustra monuerit: *Hæreticum hominem post unam & alteram correptionem devitandum; & frustra rationem adjecerit, quia subversus est, qui*

*ejusmodi est*, & *delinquit*, cum sit proprio judicio condemnatus. Frustra idem 1. ad Tim. 2. significavit Hæreticorum sermonem cancri ad instar serpere, eosque à veritate excidisse, atque inter opera carnis enumeraverit Hæreses, quæ qui agunt, regnum Dei non possidebunt. Frustra Joannes in Ep. I. v. 2. hæc de Hæreticis dixerit: *Ex nobis exierunt*, sed non erant ex nobis. Denique frustra Deus Ecclesiam unam, & concordem, & puram instituerit; & obtemperare nos iusserit Præpositis nostris; & Spiritum veritatis in eadem Ecclesia ad finem usque sæculorum mansurum pollicitus fuerit, & Ecclesiam suam nobis audiendam edixerit, si confectaria quæque absurdissima recensere vellem, quæ secum trahit inconsulta Phereponi opinio.

Sed ego Hæretici hominis confessionem ultrò oblatam libenter accipio. Fatetur ille, non satis constare in controversiis dereligionem, quibus partibus veritas adlit ac faveat. Eidem credimus; sed hæc de Hæreticorum solis conventibus vera esse possunt, & Hæretico ulli sentire aliter & pronuntiare non licet, dum seriò suæ Religionis dogmata ac methodum perpendat, & verum sincerâ confessione prodere velit. Ex quo enim quis à Catholica Ecclesia excessit, eamque visibilem, sanctam, errare nesciam, & judicem controversiarum negat: ille jam renuntiat principiis omnibus, quibus sibi palam fieri possit, ubinam certò veritas fidei regnet. Nimirum lex omnis credendi, hisce principiis abjectis, cum sistitur aut in interno afflatu, aut in viribus rationis suæ. Unusquisque autem se hinc pollere satis putat, & nemini vult concedere, sacras nempe Scripturas, prout sibi convenientiùs videtur, explicans, & in suam sententiam ubique trahens. Cum ergo paria Hæretici omnes canant, & suum quisque sensum producat: quis non videat, manifestum satis inter illos esse non posse, quis in fidei controversiis erret, quisve attigerit veritatem. Quòd si manifestum id nequaquam est, ergo finè iniquitate una Hæreticorum societas in alteram sævire Religionis causâ non poterit; multòq; magis iniquè aget, si in Catholicos, quos non solum momenta rationum, sed antiquitas etiam, & Traditio tuetur. At Ecclesia Catholica divinis quibusdam privilegiis munita, evidenter intelligit ac sentit, à se veritatem, ab Hæreticis verò errorem stare. Ea quippe est, quam Deus locavit inter homines *columnam ac firmamentum veritatis*; quacum Christus pollicitus est se æternum fore; in qua posuit visibiles, & ritè electos Pastores, atq; Doctores, quæ ab alia aliqua Ecclesia, ut Hæreticis omnibus accidit, divul-

divulsa non est, quam audire, cui credere jubemur, nulli enim fallaciæ atque errori (quoties de dogmate, & de fidei controversiis agitur) obnoxia est; imò iudex controversiarum omnium, in Religione occurrentium, à Deo constituta fuit.

Hæc autem omnia invictissimè confirmata reperias in Catholicorum scriptis. Confirmavimus & nos in hoc Libro. Ac proinde nullo negotio colligere jam possumus, quàm labili fundamento argumentum Phereponi, quàm stabili sententiâ Catholicâ innitantur. Ubi enim Catholicis evidens sit, se vera tradere & credere, consequens etiam est, ut Hæretici contraria docentes, atque credentes, delirare quodammodo dicantur, & Orthodoxi istorum Iudices merito esse possint. Quòd si Hæretici errant atq; delirant, ergo phreneticorum similes sunt, proptereaq; coercendi, & medicamentis etiam amaris ad sanitatem revocandi. Similes, inquam, sunt phreneticorum. Ut enim phrenetici, phantasiâ ex morbo vitiatâ, in furias acti, non sibi solùm, sed rei etiam publicæ esse damno atq; incommodo possunt, idèoque cohibendi sunt: ità etiam Hæretici, intellectu propter errorem corrupto, cùm sibi, tum aliis nocere queunt, æternas in se pœnas derivando, & alios in eundem errorem, eandemq; damnationem trahendo. Denique si etiam daremus, nulli alii Sectæ Hæreticorum nomen phreneseos convenire posse, at certè phreneticis accensendi erant Donatistæ, qui eò usque furebant, ut nedum in Episcopos Catholicos, sed in se ipsos sævirent, & se flammis ac morti sponte darent. Igitur quis non videat Christianæ caritatis munus fuisse, ità illud hominum genus salutaribus quibusdam castigationibus veluti medicaminibus opportunè aggredi, ut oculos tandem aperire vellent ad veritatis lucem? Augustinus autem eo in loco adversus ipsos Donatistas agit.

Quæ subinde Phereponus adfert, verba potiùs quàm argumenta sunt. Inquit enim: *Multitudinem, aut potentiam, qua sibi jus judicandi vi adrogare solent, hoc nihil facere, tùm veritatem penes plerisque & potentissimos fore nusquam promiserit Deus.* At certè Deus promittit veritatem apud Ecclesiam suâ fore. Catholici verò in sola multitudine atq; potentia nunquam constituerunt veritatis fiduciam, sed in rationibus, in scriptura sacra, in Traditione, atq; in ipsis Christi apertissimis promissis, quæ nulla sibi societas, præter Catholicorū vindicare potest. Inter Christianos nota quoque Ecclesiæ veræ fuit ac erit amplitudo, atque universalitas, ut ità dicam,

dicam, ipsius. Habemus enim firmissimos Propheticos sermones, quibus ista amplitudo promittitur germanæ Christi Ecclesiæ. Hujusmodi notam invictissimæ aliæ veritatis notæ ita comitantur, ut cuicumque sinè partium studio agenti innotescere semper queat, nos legitimum esse Christi gregem: quod de se ostendere nunquam contingeret Hæreticis. Subdit Phereponus: *Si ad ea usque tempora, quibus Vandali Ariani in Africa longè potentiores fuerunt, vitam preduxisset Augustinus, vidissetque ab iis male haberi Catholicos Afros, quasi impios ac phreneticos; facile sensisset se periculosâ ratiocinatione esse usum contra Donatistas, & denudò cepisset defendere sententiam, quam præ affectu retractarat.* Ut lubet, harricatur hic Censor. At nos longè fidentiùs dicimus, Augustinum in Vandalica persecutione positum, à sententia, quam tuemur, non fuisse recessurum. Neque enim facere Vandali poterant; ut minus quàm antea Augustino manifesta foret Catholicæ Religionis veritas, & Ariatorum impietas. Ipsos potiùs, magis quàm antea, phreneticos fuisset arbitratus, quippe qui ad errorem adunxissent etiam rabiem atque furorem. In hisce autem angustis patientiam parant, ac parare debent Catholici; parasset & Augustinus: quod jam fecerant Majores nostri sub Imperatoribus Ethnicis, atque Tyrannis. Vandali verò objicientibus phrenesim & pertinaciam Augustino, habuisset iste solidissimas rationes ipsis reponendas, quales nullus Hæreticus habere unquam contra Catholicos potest. Quamobrem cum Augustinum tum deprehensurum fuisse argumenti sui vanitatem, Phereponus frustra somnians exclamet: *O infelicia argumenta, quæ paulò post mera sophismata facta sunt! Orationes imprudentes, ac fallaces, quæ errori æquè patrocinabantur, ac veritati!* patiaturs ille, nos hoc unum dicere, neminem leviùs & confidentiùs sibi triumphum canere potuisse, quàm nunc Phereponus faciat.

Pergit Censor, & Augustinum audire recusat, affirmantem, è Circumcellionibus multos jam Catholicæ Ecclesiæ redditos, damnare suam pristinam vitam. Non credit Phereponus, neque credendum putat, homines facinorosos, qui rationes semper antea spreverant, poenis subito adductos fuisse ad id profitendum, quod damnarant. Hoc ab ipsis factum arbitratur, ut potentioribus partibus ore gratificarentur; non enim verbis metu extortis habenda fides. Nimirum videtur hic ignorare Phereponus rem sibi notissimam, nempe quale hominum genus Circumcel-

liones



liones fuerint. Cùm cæteris Donatistis errantes in fidei doctrina, rebelles Imperatoribus, in Catholicos mille modis, immo & interdum in se ipsos, morte sibi conscitâ, dementissimè ac furiosissimè seviebant. Quid facilius, quàm aliquando animadvertere manifestum scelus? Quid verisimilius, quàm hosce homines à Catholicis territos, atque edoctos, in sese tandem fuisse reversos, priorèmq; agnovisse insaniam? Verane an falsa quis in tormentis fassus fuerit, tum dubitare possumus, cùm aliunde non constat, accusatum effecisse, quæ ipse fassus est. Potuit tum vis adhibita extorquere confessionem falsam. Dubium itidem erit, an quis vî admotâ errorem suum, pravâmq; sententiam reverâ, uti fatetur, agnoverit. cùm dubitari potest, num illud sit error, num prava sententia. At, ipso testante Pherepono, apertus erat error, manifestissima insania Circumcellionum antea furentium. Quis ergo, pleròsque saltem illorum jam pacatâ mente pristinam vitam detestantes, ex animo tunc egisse non credat, & patentissimis deinde cecidisse rationibus? Quis ideo magis non credat, si recogitet, Catholicos in adhibendo rigore moderationem non fuisse oblitos? Sed Phereponus nihil facile credit, quod suæ Sectæ, suisque anteceptis opinionibus noceat. Et jam nobis timendum est, ne stultos in posterum vocet Judices Christianos, qui fidem unquam habeant confessioni, sive honestæ alicui promissioni reorum in tormentis factæ, & post ipsa tormenta confirmatæ; aut ne facinorosi, qui diu rationibus resistere, unquam ipsis cedant, quanquam pœnis meliora sapere, & ad mentem redire coacti, & quanquam rationes ipsæ dilucidam veritatem atque justitiam omnibus notam contineant.

Hæc autem rationes Donatistis magnâ curâ fuisse explicatas, auctor est ipsemet Augustinus. Inquit enim: *Si terrentur, & non docerentur, improba quasi dominatio videretur. Rursus si docerentur, & non terrentur, vetustate consuetudinis obdurati, ad capeSSendam vitam salutis pigrius moverentur, &c.* Verùm ista non sufficiunt Pherepono. Terror, si ipsi credimus, conjunctus doctrinæ eam vehementer suspectam facit; quippe quam putant homines, nisi vi & auctoritate fulciretur, sponte sua collapsuram, nec terrore legum uti, nisi quia lumine veritatis sibi hominum animos conciliare nequit. Sed quinam sint homines isti, qui ita judicant, quæso nobis edicat Phereponus. Certè non nisi homines facinorosi, cæci, & pervicaces. Nam pii, rectè compositi, & dociles,

ubi placidis animis doctrinam ipsam intimè excutiant, secùs judicabunt. At hac ipsa de causa facinorosis, cœcis, ac pertinacibus adhibentur terrores, ut attentum & ipsi animum adferant ad doctrinam cœlestem, atque ad veritatem, quæ sibi offeruntur. Hoc autem hominum genus: in errore & improbitate obfirmatum, malè forsitan semper, vel sinè tormentis, de doctrina judicassent, quippe qui non viderent, neque sentirent, illam lumine veritatis sibi conciliantem animos. Terrorem ergo adhibere licet, ut se rectè edoceri patiantur; edocti verò agnoscent, suspectam minime esse doctrinam, quæ in eum solum finem terrore utebatur, ut in suæ veritatis lucem oculi pervicacium intenderentur. Quapropter Ethnicis antiquis, & Turcis terrore solum, non autem doctrinâ, (et si doctrinâ, certè fallaci ac falsâ doctrinâ,) in suam sententiam populos pertrahere conantibus, Phereponi verba objici potuissent; non autem Catholicis. Et videat ipse Phereponus, quid scelestis ac improbis hominibus responderet. si eâdem argumentatione usi, justitiam cum humanarum tum divinarum Legum suspectam haberent, eò quòd terrore pœnarum armerentur. Neque enim veritates Religionis minorem, quàm justitia Legum, in animos vim habere dicendæ sunt, si attentè audiantur. Alioqui apud Deum & apud homines excusandi forent, quicumque in Religione aliqua, licet falsissima, conquiescunt.

Adducit subinde Augustinus exemplum Dei O. M. qui nos certè amat, & tamen nos non solum docere suaviter, verum etiam salubriter terrere non cessat. Ad hæc Cenfor: *Quis homo audeat, inquit, sibi jus in ejusdem naturæ participes, idem ac Deus, adrogare, nisi qui se hominem esse sit oblitus? Quis enim ignorat, aliud planè jus esse Creatoris in Creaturas, aliud Creaturarum in se invicem, aliâque Dei ac hominum affectionem?* En quibus captiunculis Lectorem suum Phereponus detineat. Nemo sanus, multoque minus Catholici, tale jus in homines sibi unquam adrogârunt, quale Deo competit, omnium Creatori, ac Domino vero, & animas in gehennam mittere valenti. Sed quidem putârunt, & adhuc meritò putant, legitimis Regibus atque Magistratibus jus esse animadvertendi in fontes, quamvis ejusdem naturæ participes; & in officio continendi, & corrigendi, & terrendi homines, ne in errores ac vitia defleant, sive ut inde revocentur. Quod dum præstant, non suo jure Magistratus & Reges faciunt, sed jure, quod ipsis Deus contulit, potestate regnandi collatâ. Neque propterea, quòd omnis

erroris & affectus in judicando & castigando sit expertus Deus, Reges verò & Magistratus pravis affectibus erroribusque sint obnoxii. à judicando & castigando abstinere isti debent, dicendive sunt conservos suos non amare. Nam & amant, cum injustos ad meliorem frugem revocandos justis plectunt flagellis; & amare etiam possunt, dum justos, & minimè errantes, præ errore castigandos arbitrantur: à quo tamen errore abfuisse Catholicos in causa Donatistarum nos certò scimus. Quid ergo ad Augustini argumentum faciant Phereponi verba, quodcumque in latus vertantur, non video, nisi ut persudeant, nullum homini jus in alterum esse debere, & legitimis Regibus atque Judicibus nefas esse usum securis & facitum.

Hinc etiam responsio peti potest ad Phereponi iratas voces, minimè ferentis, ab Augustino è vocatione Sauli divinà vi peractà exemplum sumi. Cum enim illa prodigiosè peracta fuerit, indignatur Phereponus, cum cœlestibus miraculis conferri vim à militibus licitoribusve Magistratuum allatam, & quia Deus miracula interdum adhibuit ad homines convincendos, hinc colligi ideo licitum esse visum. Si Augustinus, inquit Censor, *similes artes* (hoc est miracula) *adhibere potuisset ad convertendos Donatistas, nihil erat, cur eum hic confutarem, & omnem pervicaciam facile vicisset.* Iracundiæ quæso Phereponus parcat, ne illius oculis turbidus affectus aspectum veritatis eripiat. Quandoquidem Augustino & Catholicis Regibus semper ad manum non sunt miracula, num ideo illorum caritas ab honesta severitate, aliisque artibus abstinere debet, quæ vincere pervicaciam Hæreticorum possunt? Sed animadvertat Phereponus, aliud esse miracula, aliud vim adhibere, ut quis ab errore ad veritatis cognitionem traducatur. Quanquam magna virtus sit miraculis, ne ipsa quidem tamen pervicaces facile vincunt. Testis ea miraculorum copia, quam Christus, Apostoli, Moyses, atque Prophetæ fecerunt, persistentibus tamen in incredulitate Ægyptiis, atque Judæis. Hæc quoque in irritum cadunt, nisi potentis suæ gratiæ vi suavissimâ Deus agat in renitentium corda. At præter miracula usus est Deus vi externâ atque sensibili, ut Saulum de persecutore Apostolum faceret. Dicimus ergo, Augustinum cum cœlestibus miraculis non conferre, quod est ad virtutem convincendi homines, salutarem illum rigorem, quem Reges interdum adhibent ad sanandos pervicaces Hæreticos. Neque affirmat, severitatem

ritatem istam suapte naturâ aptam esse ad convincendos animos, & persuadendum verum; cum id proprium sit rationum, atque argumentorum, ad quæ audienda reluctantēs per rigorem trahuntur. Sed tantum infert, & rectissime infert, ideo licitum esse vi uti ad Hæreticos in meliorem sententiâ perducendos, quippe quod & Deus salubri violentiâ in eundem finem interdum sit usus. Posuit nempe Deus Reges in terris vicarios suos, ut veram quoque protegerent Religionem, atque Ecclesiam, & veritati omnium præstantissimæ subsidium afferrent. Cum verò Catholici Principes certissimum habeant, & meritò habeant, à se Religionem veram stare: cur ad ipsam amplectendam urgere homines pertinaces sibi subjectos, aut eosdem in ipsa continere, licitum sibi non putent, quando ipsemet Deus Saulum furem ex equo deiciens, & cœcitate percutiens, exemplo suo ostendit, vim in hunc finem usurpata consentire posse cum caritate, atque iustitiâ? Non poterat Augustinus, non poterant Catholici Imperatores miraculorum vi perviciaciam atque insaniam Donatistarum frangere. Fortasse ne ita quidem fregissent. Vim ergo aliquam salutarem, cuius exemplum Deus præmiserat, ipsis adhibere fas fuit; ut attentiores exinde aures & animos gens illa haberet, si tamen vellet, ad vim rationum, & ad veritatem doctrinæ,

## C A P U T VIII.

*Et Hæretici Catholicam Ecclesiam persequuntur. Augustinus & Africani Episcopi perperam insimulati impotentia atque ambitionis in Donatistas. Eorum Christiana Caritas, ut schismati finis fieret. Cur mortis Donatista quidam damnati. An, & quomodo piam Dei severitatem cum Afro- rum Episcoporum severitate composuerit Augustinus. Non omnis persecutio mala. Rectè id ab eodem Augustino demonstratum variis Literarum sacrarum documentis & exemplis.*

**P**Robaturus Augustinus in eadem Epistola 93. posse dici, Ecclesiam Catholicam persecutionem ab impietate & superbia Hæreticorum pati, exemplum Apostoli adfert scribentis ad Gal. IV. 29. Isaacum ab Ismaële persecutionem passum, etiam

etiam si legamus ancillam potius & ejus filium Ismaëlem , ab Isaaci matre Sara passos graves molestias. Excandescit hic Phereponus, & ait: *Verum quidem est, Hagarā male habitā à Sara, sed eò hic non respicit Paulus, verum ad Ismaelis actionem cum Isaac protervius ludentis, quam vocat persecutionem, quamque confert cum persecutione, quam Christiani patiebantur à Judæis: & qua non erat sita in eo, quod viderent Judæos superbas esse ac perversas (quod nemo, nisi Pænus Rhetor persecutionem vocavit) sed in eo quod ab iis omni molestarum & pœnarum genere afficerentur. Absurdum est conferri hæc persecutiones, quas tempore Pauli Christiani ferebant, cum affectione animi Episcoporum, & cæterorum Clericorum Afrorum, qua agrè patiebantur sibi contradici à Donatistis. Alia addit, hoc est, omnia turbat Phereponus, Augustino quod sibi lubet affingens, ut in eum declamandi postea bellam occasionem arripiat. In hæc autem modestissima verba denique desinit: Illudebat sanè miserris Hipponensis Rhetor, quia sentiebat, omnia impune à se in illos potuisse dici. Verum S. Doctor nihil Apostolo affingit, sed quidem Apostoli verba acutè perpendit; neque ait, sitam fuisse in superbia & peryicacia Judæorum persecutionem, quam ab ipsis Judæis sustinuere Christiani; neque cum iis persecutionibus contulit molestias à Donatistis Catholicæ Ecclesiæ illatas. Hæc omnia è Phereponi cerebro nata sunt, in scio Augustino, & reluctantis Augustini verbis. Sed quidem comparabat Sanctus Doctor Ismaëlis actionem in Isaacum, quam Persecutionem Apostolus appellat, cum Donatistarum aliorumque Hæreticorum superbia, peryicaciâ, & impietate, quam persecutionem quoque Augustinus vocat in Ecclesiam Catholicam. Sicut enim ille, qui erat secundum carnem, ab Apostolo dicitur persecutus fuisse eum, qui erat secundum Spiritum, non alia de casua, quam quod luderet cum Isaac (vocabulo metzachek utitur Scriptura sacra) quia ludus ille, quanquam institutus non esset ad afferendam gravem aut vitæ, aut animo, aut facultatibus Isaaci perniciem atque dolorem, nihilominus aut ex superbia, & protervia, & irratione injuriis erat dignitati Isaaci, aut ipsum edocebat cultum Idolorum, aut ad hæreditatem eidem legitimo successori eripiendam tendebat: ita & persecutio appellari potest, quicquid Hæretici faciunt adversus Ecclesiam Catholicam ex superbia, ac impietate, etiam si nullam vim atque molestiam inferant Catholicorum fortunis atque corporibus. Utrobique autem metaphoricè forsan adhibetur*

*persecutionis nomen*, sed ut certè per illud significetur verè aliquod malū alterius corpori, sivè animo illatum, & quisnam ignorat, quantum Ecclesiæ Dei noceant Pseudo-Apostoli, & Hæretici, *lupi nempe rapaces, non parcentes gregi*, uti eos Apostolus nominat Act. XX. 29. *loquentes perversa, ut abducant discipulos post se?* Quis ignorat, iniustitiam, & superbiam, & impietatem Donatistarum, à quibus olim discissa est unitas Ecclesiæ, & vinculum caritatis, & ipsamet Ecclesia infamata; qui præter se solos, reliquam innumerorum Christianorum Rempublicam è fide excidisse putabant, idque ex dubia unius, aut paucorum culpa; qui Sacramentis vim non à Deo, sed à Ministri qualitate inesse contendebant, & in Catholicos, atque in se ipsos crudelia patrabant? Ab huiusmodi hominum genere persecutionem patiebatur, & adhuc patitur Ecclesia, graviores interdum, quàm quas à Tyrannis est olim perpeffa; in iis enim complurium animæ perduntur, in his sola corpora perierunt. Atque hæc est eo in loco Augustini sententia Prostrant Libri. Attentè ac sincerè consideranti verba, nihil inde aliud eruitur.

Quid est ergo, quod tam impotenter in *Pænum Rhetorem* Phereponus fertur? Nonne in hominem hunc æquiùs sua verba conveniunt? Sed illud est Phereponus miseris Lectoribus suis, quia putat omnia impune illis cursim legentibus à se propinari posse. Verùm magis etiam fiet palam, quantopere eum transversum rapiat affectus, & malæ causæ tutela, dum carpit affectionem animi Episcoporum, & cæterorum Clericorum Afrorum, quæ ægrè patiebantur sibi contradici à Donatistis. Ad quæ è vestigio addit: *Quis ferat eum persecutionem discipuli, cui dolet, quod non dominetur aliis, æquè ac miseros, qui facultatibus omnibus spoliuntur, in exilium mittuntur, fustibus caduntur, imò & occiduntur, nam hoc factum liquet ex Epistola C. in qua Augustinus intercedit ne fiat?* Hæc ille de Episcopis Afris, & Augustino potissimum, dicentibus, se persecutionem à Donatistis pati. Nihil autem ego adferam de multis, exiliis, & pœnis, in Donatistas congestis ab Imperatoribus. Satis enim est monuisse, id hominum genus hæc omnia nimium commeruisse, cùm jam eorum Schisma non Deo tantum & Ecclesiæ adversaretur, sed humanas quoque Leges pessumdaret. Quàm immaniter in Catholicos, eorumque sacra Tempa, & vel in ipsos Episcopos cædibus etiam patratiss grassati fuerint, quàm pervacaciter Imperatoriis edictis, & omnibus pacis consiliis restiterint, nemo ignorat, & ne ipse quidem Phereponus

ponus. Sed qualiter affecti erga Donatistas fuerint Africæ Antistites Catholici, eorumque Clerici, præterire non debeo. Cùm Augustinus pluribus in Libris; tum memorabile quoddam factum, nunquam interiturum, sit prodit, à Catholicis non res aut Cathedras Donatistarum, sed ipsos Donatistas fuisse quæsitos; eosdemque in Africa Præsules Catholicos à libidine dominandi longissimè abfuisse. Antequam Carthaginensis Collatio anno Ch. 411 haberetur, in qua de vera Ecclesia disputatio in eunda, & de concilianda pace inter Catholicos atque Donatistas agendum erat, deliberatum in Catholicorum Concilio furrat, quibus conditionibus excipiendi essent Donatistæ post pugnam. In mentem aliquorum subiit offerre, ut vincentibus adversariis Catholici omnes Episcopatus muneri renuntiarent, & universæ plebes Africæ Christianæ accenserentur Donatistarum Episcopis. Quod si vincerentur Donatistæ, nihil tamen perderent, dum in communionem Catholicæ Ecclesiæ redirent. Singuli Episcopi Catholici non indignarentur in honore & munere socium & æqualem habere, ubicumque Episcopi duo Schismatis causâ constituti ante fuissent. Uno eorum defuncto, alter superstes integræ Ecclesiæ præesset. Minimè probatum ire hæc conditiones à reliquis Episcopis Catholicis Augustinus & alii nonnulli suspicabantur, quibus amor pacis, & caritas talia suggesserat. Nam & id contra Canones erat, & nonnullis incommodo gravi esse poterat. Verùm ut ipsius Augustini verbis utar in Lib. de Gest. cum Emer. n. 6. *Quando ventum est, ut hoc palam fieret, in Concilio universorum tam frequenti, penè trecentorum Episcoporum, sic placuit omnibus, sic exarserunt omnes, ut parati essent Episcopatum pro Christi unione deponere, & non perdere, sed Deo tutius commendare.* Legatur Epistola ab eodem Concilio ad Marcellinum Tribunum hac de re conscripta, ubi præ cæteris egregia illa verba tacenda non sunt: *Episcopi propter Christianos populos ordinamur. Quod ergo Christianis populis ad Christianam pacem prodest, hoc de nostro Episcopatu faciamus. Si servi utiles sumus, cur Domini æternis lucris pro nostris temporalibus sublimitatibus invidemus? Episcopalis dignitas fructuosior nobis erit, si gregem Christi magis deposita collegerit, quam retenta disperserit. Nam quâ fronte in futuro seculo promissum à Christo sperabimus honorem, si Christianam in hoc seculo noster honor impedit unicem? Neque tum solum Donatistis hanc in Episcopatu societatem Catholici obtulerant. Jam pridem id fecerant, uti significat Optatus Milev. Lib. 1. Hist.*

Ecce memorandum facinus Episcoporum Afrorum , quorum caritas erga Donatistas contumacissimos in aliis etiam iis que plurimis occasionibus effulsit , ut jam satis intelligamus, non nisi ab animo æquitatis oblito aut furente præ odio, erumpere potuisse, quæ de illorum ambitione & dominandi cupidine nuper à Pherepono audivimus. Neque hîc detinebo Lectores, tot alia monumenta producendo, quibus constet, Catholicos Africæ Episcopos, & Augustinum in primis, id unum in votis habuisse, ut à stultitia, seu potius cæco furore Donatistas revocarent, ab extremis suppliciis immanium cædium reos vindicando, & eorum Clericis & Episcopis cum Ecclesia vera conciliatis pristinos honores ac munera quæque servando. Quî componi ista possunt cum iis, quæ infra addit Phereponus? *Deus ex nostra salute nihil lucrabatur. Sed Afrî Episcopi, auctoritate, dignitate, atque opibus ed majores erant, quod greges eorum numerosiores fiebant, quæ non ultima causa harum vexationum fuisse videtur.* Cur verò dicat Censor, Deum ex nostra salute nihil lucrari, juvat explicare legentibus. quàm malè ista huic sedeat loco. Respondebat Augustinus Donatistis, Ecclesiæ Catholicæ crudelitatem objicientibus, severitatem hujusmodi non culpandam, sed laudandam. Caritas enim cum iis vexationibus conjuncta erat; & caritatem non minùs misericordia, quàm severitas decet. Exempla inde multa congerebat, ut ostenderet, non idèò quemquam accusandum, quod alteri noceat, atque molestus sit; sed animum illius esse respiciendum, qui tum magis misericors, & benivolus, aut saltem justus est, cùm magis interdum sævit. Hanc in rem inter alia scribebat Augustinus, Deum proprio Filio suo non pepercisse, sed pro nobis omnibus tradidisse illum. At Phereponus: *Quid simile est actioni Dei patientis volentem filium suum occidi, in salutem humani generis, à sceleratis hominibus, ac moliminibus Ecclesiasticorum, qui concitabant Magistratus in miseros Donatistas?* Tum petit Phereponus, an quisquam inter Afros tam perfrixtæ frontis fuerit, ut auderet postulare ab infelicibus Donatistis, ut crederent Catholicos tam benè erga eos, quos vexabant, affectos, quàm erat Deus erga homines, cùm filium suum vexationibus iraderet, ut genus humanum salvaret? Ad hæc addit: quæ nuper memoravimus; & orationem tandem ità concludit: *At Rhetor noster non tantùm veri, sed ne verisimilis quidem, ullam rationem habet. Nec opus erat cum hisce argutiis minimè cessuros, multæ, carceres, exilia, mors manerent.*

Quàm



Quàm planè verum est litigare volentem, rationes interdum, nunquam convicia deficere posse! Sed dolendum est, incidere Lectores non satis cautos in id Auctorum genus, qui nihil pensi habent in publicum efferre, quicquid non veritas attentè perspecta exercere, sed ira præceps effutire jubet; quique sibi prius, tum auditoribus suis, magnâ confidentiâ imponere non dubitant. Quis autem, ut Pherepono jam respondeamus, tam leviter Libros Augustini, atque Historiam Donatistarum percurrit, ut statim non intelligat, quàm calumniosè dicatur, nullam Augustino & Afris Episcopis curam fuisse veri, & ne verisimilis quidem; imò ne hoc quidem sibi necessarium illos putasse? Tot egregia volumina in Donatistas conscripta, tot Collationes quæsitæ ac institutæ, tot fortissimæ rationes à Catholicis adhibitæ, vel me tacente, produnt, an Augustino, ejusque in Africa collegis, veri ac verisimilis cura studiumque fuerit, & an potius severitatis quàm argumentorum vi emollire ac frangere ipsi optârint pertinaciam Donatistarum. Quod autem de morte Hæreticis eisdem illata Phereponus interfert, ludibrium pariter veritatis est Severas in se leges, ut ità dicam, ab Imperatoribus extorserat immanis jam facta crudelitas Donatistarum. Ipsæ tamen leges severiores neminem mortis damnabant, eò quòd Hæreticus quisquam tantummodo foret. *Non supplicio capitalis*, scribit Augustinus Epist. 50. nunc 185. Cap. 7. *Propter servandam etiam circa indignos mansuetudinem Christianam, sed pecuniariis damnis propositis, & in Episcopos, vel ministros eorum exilio constituto.* Si quidam ex iis morte violentâ sublati sunt: pauci & grassatores; & Circumcelliones multarum cædium rei fuerunt. Episcopi verò, & Augustinus in primis, intercessère semper, ne illo usque descenderent justus alioqui rigor, & cohibendi nimii furoris necessitas. Imò ipsas lenire multas, & leges ipsas mitigare, quantum licuit, omnium cura fuit. Id constat ex variis Augustini Epistolis. Quod si plus quàm par erat, quisquam militum Cæsareorum, sive Præfectorum, abusus est auctoritate legum in personas facultatésque Donatistarum, id in omnium æquissimarum legum conditionem referendum, quarum nulla hujusmodi infortunio obnoxia non est. Id contra mentem ipsius Imperatoris factum, & præcipuè Episcoporum, omniumque proborum. *Hæc omnia, aiebat Augustinus, displicent bonis, & ea prohibent, & cohibent, quantum possunt; quantum autem non possunt, ferunt, & sicut dixi, pro pace laudabiliter tolerant, non ea laudabilia, sed damnabilia judicantes.*

Quod est ad comparationem divini erga homines affectus, & Episcoporum erga Donatistas, nemo certe Catholicorum ita deliravit, ut se cum Deo componeret. Sed nemo itidem futurus nunc esse deberet adeò sui oblitus, ut prævum in Episcopis Afris animum fuisse contenderet, eorúmque tum ambitionem, tum avaritiam affirmaret causam dedisse invocandi in Donatistas legum subsidii. Qui Clericis & Episcopis Donatistis omnia ut prius intacta volebant, offerébantque vel Sedes proprias, ut eos Christo ac veræ Ecclesiæ lucrifacerent: quâ ratione censori, quâ fronte dici possunt abominandis cupiditatibus ad vexandos Donatistas impulsî? Id multò minùs suspicari nefas, si temporum illorum Historia sincerè consulatur, & quantopere publicam pacem Hæretici illi immanitate suâ turbarent, innotuerit, & quid eorum querelis atq; calumniis S. Augustinus responderit, præcipuè in memorata Epist. L. hunc 185. Cæterum petenti Pherepono, an quid simile reperiri possit inter actionem Dei tradentis filium suum pro salute hominum, & Catholicorum concitantium Magistratus in miseros Donatistas, respondemus non exiguam similitudinem intercedere, quantum tamen patitur infinita operantium differentia, ut actiones assimilentur, Sicuti enim Deus, quo infinitæ suæ justitiæ fieret satis, & humanum deinde salvaretur genus, voluit. non quidem scelus Judæorum, sed tormenta & mortem Filii sui ita etiam Episcopi Afrî, quo à pertinaci errore, & à certo gehennæ periculo Donatistas deploratos averterent, castigaciones in ipsos decerni voluerunt. Utrobique severitas, sed justa severitas conspicitur; utrinque caritas effulget; utrinque per severitatem magnum hominibus quæritur bonum, & proinde justa, pia, ac laudabilis cum Dei, tum Episcoporum actio est, nisi quod hominum opus, quanquam justum & pium: nulla ex parte æquare potest divini operis pretium, atq; successum. Neq; porrò necesse est, ut in omnibus & minutissimè sibi respondeant res comparatæ, dum in eo vigat similitudo in quo res ipsæ assimilatæ fuerunt. Quæ cum ita sint, quis jam pudorem, sive ut dicere jam licet, impudentiam Phereponi non miretur, dum hac de causa ait: *Pudes immorari confutandis ejusmodi ratiocinationibus, quæ ne Logici quidem Tironibus hodie condemnarentur?*

Multò magis mirabitur Lector hominis confidentiam, cum intelliget, nunquam institutam fuisse ab Augustino comparationem inter Deum ejusque actionem, & affectum erga homines & Episcopos Afros, eorúmque actionem, atque

atque affectum erga Donatistas. Ideò tantum exemplo Dei non parcentis Filio suo, sed eum pro salute hominum tradentis, Augustinus utitur, ut generale illud effatum probet: *Cum boni & mali eadem faciunt, eademque patiuntur, non facis, & pœnis sed causis utique discernendi sunt.* Et infra: *Discamus in similitudine operum discernere animos operantium; nec clausis oculis caluminiemur, & benevolos pro nocentibus accusemus.* Opera similia multis exemplis ostendit Augustinus, & tamen quia diversi sunt operantium animi, diversæ operandi causæ: hi pios & justos, illi impios & iniquos se produnt. Certum autem est, Deum non solum passum fuisse, ut innocens Filius suus à sceleratis necaretur, sed etiam voluisse atque exegisse, ut tormentis ac morti offerretur ejusdem Filii vita. Et ipse Filius, volens quidem & liber, sed tamen obediens Patri usque ad mortem, & ejus æterno decreto, ac voluntati obsequens, traditus est Cruci pro nobis. Reus, impius, & damnandus nobis illicò videretur, qui tale aliquid vellet atque exigeret, nisi ejus animum atque ita agendi causam discerneremus. Cum verò infinita justitia atque infinita Caritas Deum promoverint ad hujusmodi actionem, propterea summè pia, justa, & laudabilis fuisse cognoscitur actio illa Dei, qui alioqui nihil non pium, non justum agere potest. En ergo quem in finem & quanto jure mentionem Dei tradentis filium suum fecerit Augustinus, non comparans reverà cum Episcopis Afris Deum, neque Moysen, neque Græcos pro Paulo Apostolo cædentes Sosthemem Judæum, neque Paulum eundem, neque Apostolos, neque ipsum Christum: quibus tamen omnibus exemplis appositè probat, justum opus, & pium esse posse in aliquibus, quod injustum & detestandum postea deprehendatur in aliis. Pro sua liberalitate Phereponus comparationem istam aliò detorquet contra Augustini mentem, ne se declamaturum tam citò materia deficiat, quanquam inter ista, ut vidimus, intercedere similitudo aliqua possit.

Sunt Augustini verba §. 8. in Epist. 93 olim 48. Cap. 2. *Si semper esset laudabile persecutionem pati, sufficeret Dominus dicere: Beati, qui persecutionem patiuntur, nec adderet, propter justitiam.* Ad hæc ait Phereponus, Donatistas non solum se prætulisse Catholicis, quòd persecutionem paterentur, sed quia, ut quidem putabant, hoc fiebat justitiæ causâ, cum nollent id facere, quod sibi illicitum esse, ac Deo displicere credebant. Tum addit, hanc animi affectionem laudandam, etiam in errantibus; vituperandos contrà esse, qui ab invitis extorquent, ut id faciant metu suppliciorum, quod illicitum

esse putant. *Quamvis enim, quod inviti faciunt, naturâ suâ rectum esset, Deo non posset non displicere, qui non vultorê dumtaxat celsi, sed potissimum animo; nec ab invitis quidquam accipit.* Ità ille: Et ei quidem gratias habebunt cum Judæi, tum Muhammedani, & Gentiles, cæterique Hæretici vel pestilenti-ores, quod plaudent eorum pertinaciæ in tuendis erroribus, in impietate servanda. Sed quid refert, quod ista protervia à non mala affectione prodeat, hoc est à voluntate non faciendi, quod illicitum putatur: Num propterea excusandi, imò laudandi Judæi, & Donatistæ, & reliqui, à Christo, aut à vera Christi doctrina, aversi? Dicat Phereponus, si audet, si potis est, & evacuet Crucem & Religionem Christi. Quod si gentem illam ab ira Dei salvare nequit falsa illa persuasio atque pervicacia: cur vituperandi quæso sunt, qui eos à tanta miseria liberare conantur, & in spem æterni Regni pertrahere? Nonne & hæc animi affectio in Catholicis laudanda; quippe à Christiana caritate progenita? Certissimum autem est & apud nos, fidem à liberâ voluntate, non à coactione esse expectandam; Deoque non solum non probari, sed invisos esse, qui animum ab ore discordant in Religione ferunt. Sed quæ à Catholicis interdum adhibentur in Hæreticos moderatæ castigationes, & usus modestus terrorum, non eò tetidit, ut errantium voluntas adigatur ad veteres opiniones ponendas, & ad meliorem amplectendam; sed ut propter suppliciorum sive incommodorum imminentiû formidinem animi & aures attentiores præbeantur doctrinæ sanæ, & veritatis prædicationi. Quod si Deo displicet, quidquam ab hominibus invitis fieri, etiam si id naturâ suâ rectum foret, non minus etiam eidem displicet, perniciosos & impios errores, ultrò ab hominibus propugnari, quanquam credentibus se pro veritate certare. Quapropter si ad evitandas vexationes quisquam ficto animo ad veram fidem convertitur, id quidem ejus vitio aut infelicitate contingat, non autem Catholicis culpæ vertendum, qui quantum in ipsis est, hominem illum & à primis erroribus, & ab illa gravi calamitate liberum optant, & liberare contendunt.

Pergit Augustinus ita scribere in memorata Epist. 93. Cap. eod. *Item si semper esset culpabile persecutionem facere, non scriptum esset in Sanctis Libris: Detrahentem proximo suo occulte, hunc persequabar. Aliquando ergo & qui eam patitur, injustus est & qui eam facit, justus est.* Respondet Pherepon. hunc Psalmi centesimi locum, nihil facere ad persecutionem hominum dogmata quæpiam bonâ fide amplectentiû, nec cæteroqui

detra-

deteriorum morum, quàm sunt reliqui cives. David enim ibi non agit *de quavis persecutione*, sed tantummodo pollicetur, se à *conspectu suo ejectionem* calumniatores omnes, loquiturque de delictis, societatem civilem perturbantibus, & de quibus non ex religionis, sed ex civilibus legibus pœnæ sumi possunt. Nolo hîc disputare de sensu vocabuli Hebraïci *Aismith*, quod *tollam* Phereponus interpretatur; reliqui verò Linguae sanctæ përirî interpretati sunt, *succidam, disperdam, interficiam, interficiebam, & usque ad internecionem persequer*. Neque itidem placet hîc inquirere, an pravæ opiniones in Religionis doctrina societatem civilem perturbent, & Ecclesiam scindant, & Deo sint invisæ, ac propter eâ pœnas quoque civiles mereantur à Regibus, quos Deus custodes etiam constituit Religionis germanæ, & Doctrinæ cœlestis. Prætereo etiam, nulli cœtui magis convenisse calumniatoris notam, quàm Donatistis, Cæcilianî, Imperatorum, Judicum omnium, & Ecclesiæ universæ calumniatoribus conclamatis: quod ne ipse quidem Phereponus negat. Animadvertere solum juvat, Phereponum non hîc minus quàm alibi imponere Augustino, sive nesciat, sive nolit apertissima illius sensa intelligere. Illo Psalmi loco utitur Augustinus, non ut ostendat, licere Catholicis persequi Donatistas; sed ut ostendat, non ideo quemquam statim esse culpandum, quòd persecutionem faciat; nam & sanctus David persequeretur calumniatores, neque tamen injustus idcirco fuit. *Si semper*, inquit, *esset culpabile persecutionem facere; non scriptum esset in sanctis Libris &c.* Propositis Psalmi verbis, conclusionem inde istam elicit: *Aliquando ergo & qui eam (persecutionem) patitur, injustus est; & qui eam facit, justus est.* Ubi vides, ex tribus propositionibus, quibus constabat Syllogismus à Donatistis instructus, solam primam universalem his verbis conceptam: *semper culpabile est persecutionem facere*, ab Augustino falsitatis argui, & meritò argui. Quocumque enim nomine appelles, quod Regius Psalter comminabatur calumniatoribus, grave istis molestumque futurum erat, & proinde à persecutione minimè distabat, eique persecutionis, sed justæ minimèque culpabilis convenire nomen potuit. Vides etiam, ab Augustino ea Psalmi verba non accipi, quasi de quavis persecutione David loquatur, neque adhiberi, ut justa demonstretur persecutio Donatistis illata. Phereponus autem contra ventos pugnans, sibi fingit, Augustinum nihil aliud voluisse, quàm hoc postremum, à quò tamen tunc Augustinus alienus erat. Quare Censor

in ea verba confidenter erumpit : *Hocine est Scripturam , ut decet , interpretari , an temerè arripere vocabulum malè intellectum , ut videaris aliquid discere , cum reverà nihil discas ?* Hocine est , & ego dicam , censuram agere , ut decet , an sibi umbras effingere , ut in illas digladiaris , & videaris aliquid evincere , cum reverà nihil evincas ?

Ejusdem ponderis sunt sequentes Phereponi animadversiones ; & utinam non pigeat Lectorem audire , ut me piget refutare talia *Occiderunt impii Prophetas* , inquit Augustinus in eadem Ep. 93. olim 48. c. 2. §. 8 *Occiderunt impios & Prophetas*. Ad quæ Phereponus : *Quosnam propter meras opiniones occiderint Prophetæ , debuisse dicere Augustinus ; nam si quos occiderint propter malè facta , ex Lege ipsa Moysis morte plerenda , hoc nihil facit ad Donatistas , aut alios similiter errantes*. At Augustinus , si hoc objecisset Donatista aliquis , ut arbitror , serium risisset , non quia sibi deesser , quod hic responderet , sed quia nullâ responsione opus erat ad hujusmodi interrogationem Neque enim , dum hæc scribebat , sibi propositum erat , aut esse debebat , inquirere , cujus delicti causâ occisi à Prophetis impii fuerint . Quæcumq; enim causa Prophetas eò impulerit , injusta certè poena esse non potuit , quippe quæ zelo Dei , & Deo ipso jubente de hominibus sumpta . Hoc autem Augustino satis erat , ut universalem illam sententiam confirmaret à se productam , nempe : *aliquando & qui persecutionem patitur , injustum esse ; & qui eam facit , justum*. Cur vis Augustinum debuisse dicere , quòd ad rē propositam nihil necesse fuit ? Cæterùm ex Deuteronomii Cap. 13. & 17. & 18 & ex nonnullis exemplis antiquæ Legis , non difficile fuisset hujusmodi etiam Phereponianæ interrogationi facere satis . Pergit Cenfor : *Præterea ostendendum fuisset , quidquid fecerunt Prophetæ , ad licitum esse sub novo Testamento ; nam hoc pernegat Christus disertissimis verbis Luc. IX. 55. 56. neq; quenquam legibus à Christo latis solvere potest Augustini auctoritas*. Cupientibus discipulis , ut Samaritæ flammis è cœlo demissis comburerentur , Christus ait : *Nescitis , cujus Spiritus estis . Filius hominis non venit animas perdere , sed salvare*. En Lucæ verba . Quid Catholici nonnulli ad ea respondeant , sentientes , morte quoque Hæreticos pertinaces posse justè mulctari : apud alios legere Phereponus poterit , cum sibi vacabit . Nobis interim mitiora suadentibus satis est pro Augustino respondere , nihil pertinere ad Donatistarū causam locum illum Evangelii . Ecquando enim Donatistarum animæ à Catholicis perditæ fuerunt propter solam dogmatum sive opinionum differentiam ? Quando nam ab

Imperatoribus statutum fuit, ut Hæretici illi primerentur, nisi fortè cum turbata publicæ pacis, & cædium, & perditionis rei deprehendebantur? Poenæ dumtaxat moderatæ, levésque multæ in ipsos decretæ à legitimis Magistratibus, idque secundum Christi Spiritum, & desiderio salvandi, non perdendi illorum animas, postea quàm nullâ mansuetudine, nullis rationibus ab apertissimo errore, & à furore se non patiebantur revocari. Ostendat Phereponus, quibus Christi Legibus id in Lege nova interdictum fuerit, & quæ Christianæ Caritati adversetur; atque erit tum nobis magnus Apollo.

*Flagellaverunt Judæi Christum, Judæis flagellavit & Christus. Sunt Augustini verba. Quæ ità excipit Phereponus: Quasi verò flagellatio illa, quæ Christus pecudes, potius quàm homines, eiecit è Templo, possit conferri cum crudeli flagellatione, quam Christus passus est à Romanis Judæis gratificantibus. Aut Augustinus valde spernebat ingenia Donatistarum, quibus se ejusmodi ratiocinationibus os obstruere posse sperabat; aut multò majorem fiduciâ habuit in Edictis Honorii, quàm in pondere rationum. Jamdiu conviciis rem suam agere Phereponus instituit. Sed ego veri studiosos atque sinceros Lectores rogabo, ut perspiciant, quàm opportunè Phereponus suam hîc bilem in Augustinum rursus exoneret. Dixerat sanctus Doctor: Planè semper & mali persecuti sunt bonos, & boni persecuti sunt malos. Illi nocendo per injustitiam, illi consulendo per disciplinam. Illi immaniter, illi temperanter. Illi servientes cupiditati, illi caritati, &c. Tum exemplis rem firmat, atque inter alia memorat Christum à Judæis flagellatum, qui & Judæos in Templo vendentes & ementes flagellis cæciderat Exemplum hoc appositè cadere ad confirmandam Augustini sententiam universalem nemo non videat. Certissimum enim est, tam Christum, quàm Judæos rem illam præstitisse. Sed Christus bonus consulendo per disciplinam malis, isti mali nocendo per injustitiam bono, id præstitère; ille caritati serviens, isti cupiditati; ille temperanter, isti immaniter. Quid est, quod intentioni Augustini planè hîc non respondeat? Sed, inquit Phereponus, cum Judæorum crudelissimo rigore conferri non potest mitissima severitas Christi in Judæos; & Judæi è Templo eiekti pecudum similes fuère, ac flagello propterea digni, Christus autem innocentissimus fuit, & ingenuus moribus. Quis rogo acutum Phereponi ingenium jam non miretur, tantum discrimen inter Christum & Judæos nostris demum temporibus reperientis? Immo, si Pherepono credimus, quis non agnoscat Augustinum aut stupi-*

stupidum, qui discrimen istud non animadverterit, aut callidum, qui dissimulârit? Verùm, ut seriò agamus, dicat Phereponus, num Augustinus sibi probandum sumpserit, malos parem persecutionem in bonos, & bonos in malos semper exercere? Si probandum id non sumpsit, sed quidem, non minus bonos quàm malos, ex diversis tamen causis, persecutionem agere: quid refert animadvertere discrimen inter Christi, & Judæorum flagellationem? Obstatne discrimen illud, quominus immeritò Judæi Christum, Christus Judæos meritò, re ipsa flagellârint? Præterea nōne & hanc ipsam differentiam significavit Augustinus, dum inquit, bonos persecutionem temperanter facere in malos, & malos contrà immaniter sævire in bonos? Quos si Judæi è Templo expulsi pecudes erant, num propterea mali, & nocentes, & plectendi non fuere, quando *orationis domum fecerant, domum negotiationis, & speluncam latronum*? Quacumque ex parte animadversionem Phereponi contemplemur, nihil occurreret adversùs Augustinum. Quid aliud ergo Phereponus inde obtineat, nisi prodere se scientissimum pessimæ omnium censuræ, quæ tum sit, cum nos arreptis temerè Auctorum verbis, neque mente, consilioque eorundem Auctorum considerato, somniamus in iis, quæ postea stylo nostro liberè insectemur? Porro ex his judicent æqui amantes, num Augustinus Donatistarum, an potiùs Phereponus Lectorum suorum ingenia valdè spreverit, hæc scribens, quæ tam facilè sophisticam redolere noscuntur.

Mitto non absimiles hominis illius notas in ea verba Augustini: *Traditi sunt Apostoli ab hominibus potestati humanæ; tradiderunt & Apostoli homines potestati satanæ*; quia nihil ad rem illæ faciunt, & unâ eadēque responsione jam per nos confutatæ fuerunt. Cum subinde Augustinus sentiat, idéo Apostolorum tempore non invocatam fuisse Regum auctoritatem in præsidium veræ fidei, quia nondum Rex ullus erat Christo deditus: ita respondet Phereponus: *Quasi verò ea non fuerit nativa indoles Regni Christi, quod ipse testatur non esse hujus mundi, quamobrem legionibus minimè defendebatur. Annon potuit Christus, si voluisset, ingentem copiam Judæorum ad arma, ut se iueretur contra inimicos; & quod viribus humanis deerat, vi divinâ miraculorum perfacile superare, si ità Deo visum fuisset?* Utique Christum id potuisse, cum Pherepono affirmamus. At qui venerat ad instituendum, atque exercendum spiritale Regnum in terris, Regnorum temporalium jura & leges intacta relinquere, non evertère, voluit.



voluit. Exemplo itaque suo tantum significavit, Pontifices, Sacerdotes, & reliquos spirituales Ministros suos jus armorum sæcularium sibi tribuere non debere. Ostendit, non esse fidem suam, Turcarum ad instar, vi gladii propagandam, & ad eam suscipiendam invitos homines extremis suppliciis non esse cogendos. Demum nos docuit, excitandas non esse vel pro vera fide seditiones populorum adversus legitimos Reges, & contra Præpositos nostros: quod Anabaptistæ, Calviniani, & alii Novatores, ipsique olim Donatistæ, sunt ausi. Nunquam verò Christus docuit, legitimos Reges, qui non sine causa gladium portant, & ministri Dei sunt, peccare, & iniquè facere, si veram fidem, quam ipsi favente Deo amplexi fuere, & fidei unitatem, sanctam rectam in populis sibi & Ecclesiæ subjectis servare, ac à ruina, & divisione tueri velint, & salubribus in eum finem suppliciis temporalibus in refractarios utantur. Imò piis Regibus, & politicis Magistratibus hoc onus incumbere, cum recta ratio, tum sacrarum Literarum exempla persuadent.

## CAPUT IX.

*Quod Augustinus de Rogatistis, & de vexatione Hæreticorum, sententiâ mutatâ, scripsit, non inmitem eum, neque Proteum arguit. Hipponensis civitas credenda est non fideo animo Schisma ejurâsse. Inter Catholicorum & Muhammedanorum persecutiones quàm magna differentia. Sententia Augustini de divina gratia non excludit utilitatem pœnarum in Hæreticos pertinaces. Nullo jure culpatus à Pherepono Augustinus, culpans Donatistam asserentem, neminem cogendum esse ad bonum.*

**R**ogatistas, qui Schisma ab ipsis Donatistis fecerant, alloquens Augustinus in laudata Epist. 93. Cap. 3. §. 2. ait, illos quidem reliquis Donatistis videri mitiores, quòd cum immanissimis Circumcellionum gregibus non sævirent; sed non ideo mitiorem inde ipsorum animum ostendi posse. *Savire vos velle dicitis; ego, inquit Augustinus, non posse arbitror.* Immite ac inhumanum Pherepono videtur hoc Augustini responsum, & alienum à mansuetudine,

dine, quam præferre solebat. *Qui enim, ait, noveras eorum animos? Annon poterat fieri, ut ex animo ab omni persecutione abhorrerent? Facile sanè hoc mihi persuadeo.* Et Augustinum quipelaffectu occæcatum, ideo tam futilibus rationibus usum fuisse pronuntiat. Sed utinam sibi semper tam facile de aliorum animis benè persuaderet Phereponus; neque enim adeò frequenter, ut vidimus, & visuri sumus, Augustino & Catholicis malediceret, ineptis tantummodo & virulentis suspicionibus indulgens. Equidem quin mitiùs respondere potuerit Augustinus, inficias non eo. Quid enim dissimulemus Christianæ caritatis loquelam in his casibus? Verùm Augustinus ita sibi respondere fas licitumque putavit, ut Rogatistas moneret, ipsos non idcirco se à persecutione faciendâ alienos venditare posse, quod re ipsa non facerent; nam & ad faciendâ vires deerant (erant enim Rogatistæ numero tantum decem) & eorum auctor Rogatus à contentionibus minimè abstinuerat. Cæterum è vestigio subicit Augustinus, se mitem hunc animum in Rogatistis ponere & credere velle. *Sed ponamus, ait, vos etiam nolle, quod non valeatis, &c.* Hoc autem omittere Phereponus non debebat, si agere sincerius cum Augustino statuisset, quem alioqui mansuetum virum ipse negare non potest.

Fatetur infra Augustinus, se olim in ea sententia fuisse, ut Hæreticos nullâ molestiâ temporali afficiendos arbitraretur; sed aliam se postea mentem induisse, ex quo tum experimenta, tum rationes validissimæ sibi nimium persuaserant, non justam solùm, sed utilem planè ac necessariam interdum esse hanc agendi rationem. Ad hæc Phereponus ait, Augustinum, uti nòrat ex *Rhetorica institutione* id dicere pro temporibus, quod causæ postulabant, ita etiam pro temporibus sensisse. Et si daremus, Augustinum ex institutione *Rhetorica* novisse in utramque partem dicere, non quod veritas, sed quod causæ postularent: num illum excogitare etiam aut credere possumus adeò excordem, & impium, ut eandem servare consuetudinem vellet in tanti momenti rebus, atque ubi de Religionis, & Ecclesiæ honore, & de sua, ac aliorum æternâ salute agebatur? Id suspicari, id credere sinè ulla prorsus causa, atque ratione, cum inhumanum, cum iniquum esse, quis non intelligat ex ipsius Phereponi nuper allata sententia? Mutavit opinionem Augustinus; at vi exemplorum atque rationum victus. Id quotidie prudentes, & veritatis amantes faciunt, qui meliorem sententiam amplexi in ea consistunt, & consistendum sciunt, & tum potissimum, cum ad æternæ salutis periculum atque

ad leges divinas res pertinet. Attamen Phereponus hæc subijcere non erubescit: *Quis dubitat, quin si Ecclesia Africana à persecutione abhorruisset, &c. contrariam causam copiosè peroraturus fuisset? Ego sanè nullo modo dubito, quin si illum apud Vandalos vexata ab Arianis Ecclesia Africana causam dicere oportuisset, contrariis planè usus esset argumentis, &c.* Non solum Phereponus ipse non dubitat, sed neminem alium dubitaturum esse ait, quin Augustinus tunc Proteum acturus fuisset. Quo quid durius dici possit, non facillè reperiatur. Nos contra, & Augustini sanctitate perspecta, & Ecclesiæ Catholicæ argumentis benè perpensis, neutiquam dubitamus, quin Augustinus præstiturus in ea sententia fuisset, quam hic post illum tuemur. Quodd si Ecclesia Africana à persecutione Hæreticorum, sive, ut melius dicam, à salutaribus remediis ac pœnis in ipsos experiendis abhorruisset, non ideo id factum fuisset, quodd illicita hæc remedia Episcopi censuissent, sed quodd opportuna atque utilia tum temporis minimè judicassent: quodd contingere interdum potest. Augustinus verò, si ad tyrannidem usq; Vandalorum protraxisset vitam, utique illorum damnasset, & confutasset rabiem in Catholicos, quia uti impia erat Vandalorum, & olim Paganorum doctrina, ita ipsorum rigor pro eadem doctrina propaganda injustus erat. Catholicorum autem nunquam damnasset piam severitatem in Hæreticos, quippe in cœlestis doctrinæ, & germanæ Religionis præsidium adscitam, & magnâ moderatione exercitam.

Augustinus in eadem Ep. 93. Cap. V. §. 17. affirmat, Civitatem suam quæ tota erat in parte Donati, ad unitatem Catholicam, timore Legum Imperialium, conversam fuisse, & Schisma deinde ita fuisse detestatum, ut eidem nunquam immixta fuisse crederetur. Sed nullam ei fidem habet Phereponus; Difficillimum enim putat, ut grandiores natu, & perspicacioris ingenii homines alieniores multò non fiant à doctrina, quæ eis vi ingeritur. Si Donatistas evidens injustitia non divisisset ab Ecclesia Catholica; si item Ecclesiæ huic non essent (quæ certò illi sunt, & apud nullos Hæreticos sunt) aperta veritatis signa; si denique rigor solus à Catholicis adhibitus fuisset, non autem explicatæ, atque inculcatæ Donatistis ejurandi Schismatis manifestæ rationes; imò si rigor ipse, licet moderatus, eò dumtaxat respexisset, ut invitæ doctrinam Catholicam ingereret, & non ideo potiùs adhibitus fuisset, ut converteret animos pervicacium ad auscultandâ diligentius meliorem saniorémque doctrinam: Si, inquam, hæc omnia in Donatistarum causa non præcessissent, parcere ali-

aliquo pacto possemus Phereponianæ suspicioni, quam rationibus destitutæ. At cum hæc omnia conveniant in illam causam, nimis æquum est credere, non ficto, sed vero animo conversos fuisse Hipponensium plerosque, uti & alios Donatistarum populos non paucos, quos Augustinus commemorat. Mitto alia in hanc rem argumenta, quippe solâ teste experientiâ res confici potest. Nostris quippe temporibus in Galliarum Regno idem ferè conspeximus, quod suâ ætate vidit Augustinus. Num affirmare Phereponus poterit, immensum Calvinianorum numerum ad fidem & unionem Catholicam ibi conversum, inter quos & grandiores natu, & perspicacioris ingenii homines, & docti viri, imò Pastores ipsi fuere, omnes à Catholicorum doctrina alieniores factos, cum ipsam & amplexi fuerint, & constanter adhuc teneant? Quin ex iis aliqui simulatum animum ad Catholicam Ecclesiam detulerint, negare nolo. Verum plerosque scimus, & contendimus, ex animo egisse, & apertissime novisse, quantum Hæresi & Schismati adhærentes, à veritate & caritate abessent: quod & Donatistarum plerisque ad eandem Ecclesiam conversis contigisse olim, fidenter nobis persuademus, & Augustinus alijque testantur.

Cæterum Phereponus, ne ubique durum se nobis præbeat, fatetur, adolescentes, & Hæreticorum filios Catholicis placitis educatos, sincerissime Fidem Catholicam amplecti. Non est hic exiguus salutarium terrorum fructus, Sed adhuc idem Censor contendit, *Schismati finem imponi vexationibus non nisi iniquè atque inhumane posse.* Quibus rationibus hoc ille contendat, ignotum est nobis; nam quas hactenus deprompsit in Augustinum, nihil solidi habere deprehendimus; & contra solidissimæ adhuc vigent, quas Augustinus attulit, quasque Phereponus aut infelicitè insectatus est, aut attingere ausus, ut puto, non est. Attamen hæc fortasse, quæ subjicit, rationum loco Censori fuerunt. Inquit enim: *His artibus non modò Schisma ex pertinacia aut imperitiâ ortum, sed & omnem veritatis cognitionem tolli, ut liquet vel ipsius Africa exemplo, in qua Muhammedanorum furor exinxit illic Religionem Christianam, similibus artibus iis, quibus evulsum fuerat olim Schisma Donatistarum.* Igitur, tandem concludit, non erat, quod de eventu gloriaretur Augustinus, qui omnium vexationum par est. Si Augustini Epistolam iterum legisset, aut studiosius semel legisset Phereponus, intellexisset, Augustinum nequaquam de illo eventu gloriari, quanquam Catholicis futurum esset gaudium, tot populos ample-

amplecti, ad unitatem fidei, atque ad veram Ecclesiam re-  
versos. Id ille refert, ut causam tantummodo prodat,  
quare ab antiqua sua sententia ipse discesserit. Nempe ve-  
rebatur olim, ne Legum terror ex apertis Hæreticis fictos  
Catholicos faceret; quam tamen suspicionem deinde su-  
stulit experientia ipsa. Quod reliquum est, etsi injustæ ve-  
xationes ( ità Deo propter hominum scelera permittente )  
parem cum justis effectum sortiantur ( quo tamen eventu  
caruere tot Paganorum sævissimi conatus in Christianam  
gentem, ) nihilominus animadvertere debemus, nonnisi  
temerè comparari hac in re potuisse Catholicos cum Mu-  
hammedanis. Orthodoxi ac legitimi Imperatores in po-  
pulos sibi & Ecclesiæ subjectos, sed pervicaces, & per a-  
pertam iniquitatem ab eadem Ecclesia vera sejunctos, pœ-  
nas moderatas constituebant, ut iterum ad ovile Christi  
perditas oves revocarent, neque prius errantes revoca-  
rent, quàm erudiissent, eisque errorem pristinum manife-  
stum fecissent. Muhammedani contrà in solo terrore, &  
vi acinacis, ratione omni reposità, sinè ullo dominationis  
legitimæ jure, sinè bonâ causâ, populos alienos in antiqua  
Religione stantes, ad novam amplectendam coëgere, quàm  
Catholicæ præferendam nemo liber, & ingenio valens per-  
suadere sibi possit. Quid hîc simile sit, non video; & ne  
ipse quidem Phereponus videat, utpote qui neque diffite-  
tur, Donatistas iniquo titulo secessionem olim à Catholi-  
cis fecisse, neque diffiteri potest, falsam esse & absurdam  
Muhammedanorum fidem atque sævitiam. Etiam si ergo  
iisdem artibus cum Catholici tum Muhammedani usi fuis-  
sent, & par utrinque fuisset eventus, quia tamen jus legi-  
timum, & justâ causa, & recta doctrina Christianis Imper-  
atoribus erant, hæc autem Muhammedanis deerant;  
nefas profectò erat Pherepono, rigorem pro custodia ve-  
ritatis adhibitum cum rigore pro impietate propaganda  
usurpato conferre. Ut toties Augustinus ostendit, immo,  
ut quotidie nobis cernentibus usu venit, cum boni, tum  
mali persecutionem faciunt; sed justè illi, iniquè isti; illi  
odio, siue errore incitati; isti caritate, & veritate ducti.  
Oppresserint ergo Donatistas Catholici, Catholicos  
Muhammedani; Justitia nihilominus semper faciet, ut  
illos laudemus; injustitia, ut istos damnemus. Denique  
dissimulare quidem possumus, dici Muhammedanos si-  
milibus artibus usos ad extinguendam in Africa Religio-  
nem Christi, ac usi Catholici fuerint ad auferendum Do-  
natistarum Schisma: quod certè nunquam ostendetur;

sed absolvere planè nequimus Phereponum finè ulla ratione contendentem, per hujusmodi vexationes non solum Schisina, sed & omnem veritatis cognitionem tolli. Id jure de Muhammedanis artibus, & Turcicâ crudelitate canatur; immerito & falso de Catholicis; sicuti ex ipsa Donatistarum Historia liquet. A Catholicorum parte evidens veritas stabat. Nihil intentatum Catholici relinquebant, quo istam pertinacibus persuaderent; ed collineabat Romanarum Legum terror, ut se Donatistæ edoceri paterentur eandem; & plerique edocti, insaniam præteritam ex animo detestabantur, errore veteri perspecto, & novâ veritate imbuti. Quid hîc simile cum cœca feritate ac impietate Turcarum? & quis dicere audeat, in hisce casibus atq; conditionibus veritatis cognitionem tolli, cùm contrarium evidenter curetur?

Infrâ nequit capere Phereponus, quomodo ita ratiocinari posset Augustinus, *qui credebatur homines ad Deum solâ gratiâ internâ, & electis solis concedendâ converti, & ad vitam æternam adduci. Quid enim, inquit, magis alienum à gratiâ divinâ, quàm multa, exilia, atque alia supplicia?* At nos respondemus, utique fidem non ex meritis, sed ex gratiâ venire, Sed cùm ipsa Fides ita sit Dei donum, ut actus etiam sit liberi arbitrii, & omnes jubeamur benè sentire, & rectè agere: proptereâ homines cuncti, ad benè sentiendum, & rectè agendum sollicitandi sunt. Consilia, præcepta, leges, prædicatio Evangelii, & variæ convincendi, ac hortandi rationes in hunc ipsum finem adhibentur. Correptio autem, quæ ut habetur Proverb. 29. *tribuit sapientiam*, modò inferre, modò conservare potest donum Fidei, & prodesse hominibus. Quare non solum laudanda, sed etiam gratiæ divinæ instrumentum dicenda est. Neque verò nos, quia gratiâ Dei non sinè tamen libero arbitrio probos homines facit, à bonis operibus abstinere debemus, aut cessare ab urgendis ad bona opera cæteris fratribus. Neque item Apostolica Gratiae Doctrina obstare debet, quominus injustos, impudicos, & blasphemantes Deum, legitimi Judices ad justè, pudicè & piè vivendum salutaribus pœnis impellant. Nos, quod nostrum est, faciamus; gratiâ, quod suum est, faciet. Sed si ista non capit Phereponus, multò minus capere ego nescio, cur ipse loqui his verbis per gat: *Quis dicere sustineat, qui modò pudore aliquo teneatur, nec omnem Religiosis reverentiam exuerit, irritam planè esse verbi divini prædicationem, nec gratiam divinam cum ea conjungi, nisi accedat persecutio?* Itam quæso non profundat Phe-

Phereponus. Non Augustinus, non Catholici unquam sensere, *irritam planè esse verbi divini prædicationem*, nisi illam persecutio comiteretur. Immo nos affirmamus, Evangelii potissimum prædicationi Deum conjungere suam gratiam, suisque gratuitis donis referare per illam aditum consuescere. Sed negari non potest, quin irritus quoque interdum sit prædicationis istius effectus, vel quòd attentum animum ad illam homines non adhibeant, vel quòd pervicaciam & cœcitatem luci veritatis, & pulsanti gratiæ opponant. Atque utinam Judæi, Muhammedis sectatores, Gentiles, & tot Hæretici, hujus calamitatis fidem nobis non facerent. Ergo ut ejusmodi pertinacia & cœcitas amoveantur, atque ut animum in prædicationem veritatis solertiùs homines intendant, rigor & moderata severitas interponuntur interdum à legitimis Regibus sive Magistratibus, non sinè ingenti animarum fructu. Quæ in re, ut patet, non statuunt Catholici vim animorum emolliendorum in vexationibus adhibitis, sed in gratiæ divinæ efficaciam, quæ his modis tum utitur, ut de pertinacibus hominibus, incuriosis, & nolentibus, attentos ad verba divina, & volentes faciat. Neque verò unquam à salutaribus hisce pœnis Catholici disjungunt prædicationem Evangelicæ veritatis, sed potiùs ad eas tantummodo confugiant, ut ista prædicatio studiosius auribus accipiat, & in mentem fluat.

Ad Augustini Epistolam centesimam quintam Phereponus notat, Augustinum nimio affectu occæcatum, in eo falsum fuisse, quod Donatistis, indulgentiam suæ factioni ab Honorio Imperatore concessam distantibus, mendacium exprobrârit. Nam, inquit Phereponus, eo tempore (ut à Concilio Carthagine XVIII. Kal. Jul. Anni 410. habito constat,) libertas facta omnibus fuerat cujusvis Religionis sequendæ; ideòque non mentiebantur Donatistæ. Lectores autem suos Censor adire jubet Augustini vitam ab erudito Benedictino proximè præteritis annis eductam Lib. 6. Cap. 7. §. 2. ut Augustini errorem manifestius intelligant. Nos Auctorem vitæ Augustinianæ adimus, & utique inde ediscimus, aliquando ab Honorio Augustino per dolum expressam, & reverà promulgatam fuisse Legem Hæreticis faventem, quam non dubitamus, quin Donatistæ etiam in sui favorem interpretarentur. Verùm Donatistas ab antiquis Legibus liberatè animus Honorio non fuit; Epistola verò memorata Augustini (ut animadvertit & rectè infert eruditissimus Scriptor

vitæ ejusdem) scripta fuit, antea quàm reapse libertatem cujuslibet Religionis colendæ concessisset Honorius, quam Donatistæ famam jam concessæ evulgarent. Quare intelligat Lector, quanta huic Censori habenda sit fides.

Presbyterum quemdam Donatum, è factione item Donati, existimantem, & identidem repetentem, *neminem cogendum esse ad bonum*, Augustinus ita alloquitur in Ep. 173. aliàs 208. c. 2. *Attende, quid Apostolus dixerit: Qui Episcopatum desiderat, bonum opus concupiscit. Et tamen tam multi, ut Episcopatum suscipiant, tenentur inviti, perducuntur, includuntur, custodiuntur, patiuntur tanta, quæ nolunt, donec iis adsit voluntas suscipiendi operis boni.* Phereponus pag. 498. Animadv. primò difficilem se præbere videtur ad credendum, fuisse olim, aut nunc esse, qui verè cogantur dignitates & opes Ecclesiasticas accipere, cum antea nollens. Scilicet nihil ille veretur in suspicionem adducere omnia, & ubicumque eum incescit ipsi Augustino abrogare fidem. Et sanè miror, hominem illum adhuc ignorare, vetari nos ab æquitate & caritate malè sentire, immo non bene sentire de aliis sinè potenti ratione. Ut enim hominis improbi est, neminem alium credere velle probum; ita imperiti est negare, quod nunc ipsa testatur experientia, & multò magis Augustini tempore testabatur. Numquid enim ille tam hebes, aut impudens fuerit, ut rem veluti vulgarem, & Donatistis compertissimam narraret, quæ multis jam non constaret exemplis? Immo complura antiquitatis monumenta, quæ hic innuere supervacaneum puto, hoc idem adhuc dilucide testantur. Deinde Phereponus ita differit: *Sed qui ita coguntur, putant etiam ipsi Episcopatum esse opus bonum; nec eum refugiunt, quasi malum quippiam, sed tantum, quod ei oneri rectè ferendo impares se judicent.* At Donatistæ malum per se esse ac Deo displicere, quamvis ea in re errarent, putabant id, quod facere cogebantur; nec vexationibus aliter ut sentirent adduci poterant. Detecto hoc Augustini paralogismo, res poscebat, ut aliquo documento Lectores suos Phereponus dimitteret. Inquit igitur: *Itaque nihil ad rem hoc exemplum facit, nec adhibetur ab Augustino, nisi more eorum Rhetorum, quibus satis est vel levissima verisimilitudinis umbra, ut sibi rectè ratiocinari videantur; cujusmodi hominibus nimis scatuerunt per multa sæcula Christianæ Ecclesiæ, sed præsertim illo ævo. Optandum esset eos, qui publicè causam Ecclesiarum suscipiunt, paulò studiosius Dialectica & Rhetorica severiori operam dare, ne tot sophismata, ac inanes phaleras plebecula venditarent.* Et nos optamus, Ecclesiasticos non solùm viros, sed & omnem veri-



veritatis cultorem, Dialecticæ ac Rhetoricæ severiori multum studere, ut à sophismatis ac inanibus phaleris abstinerere discant. Sed itidem optamus, ut Critici viri non minus Modestix, quàm Logicæ, studeant, atque à petulantia temperent; neque generali censurâ quemquam, veluti indoctum, sophistam, ac levissimarum mercium propalam, traducant, quòd ipsum aliquando errasse deprehenderit. Præterea optamus, ut magnos viros jam functos humanis rebus si quando emendandos suscipiunt (quod certè per nos licet,) sinè supercilio, sinè malignitate emendent, & *modestè atque circumspècto judicio de tantis viris* pronuntient, uti jam Quintilianus monebat; neque impotenter insultent ingeniis tam benè de re literaria, & de Veritate, & de Religione alioqui meritis; immo non prius quempiam ex iis carpant, quàm sibi satis constet illorum error. An ab æquissimis hisce honestisque legibus Phereponus quidquam discesserit, jam puto Lectores sobrios atque honestos ante me dudum intellexisse. Sed hìc vix ille ferendus, quòd tam universali sententia percellat Augustini sæculum, quo floruere tot illustres, magnique nominis, ac ingenii Scriptores. Multò minus ferendus, qui nobis exhibere audet Augustinum Logicæ studiis perfunctoriè excultum, quando vix alium inter veteres offendere possumus, qui acutiori mente, & meliori Dialectices usu, cum res poscebat, veritatem investigarit, defenderit, & Sophismata caverit. Nam quod & apud illum paralogismus quandoque occurrere aliquis possit, non ingenio, non voluntati, non Logicæ neglectui tribuendum id est, sed hominum conditioni miseræ, cui nullus propterea insultare sibi licitum putat, nisi qui se hominem esse fuerit oblitus.

Sed quid, si ne hìc quidem Augustinus contra Logicam peccarit, ubi tanquam in opportuno loco ipsum ad Logicam addiscendam amandare videtur Phereponus? Quid si Logicæ se minus gnarum, ne dicam Sophistam, hìc se Phereponus prodiderit, ubi sophisma Augustini sibi redarguendum putat? Periculum faciamus. Quid agebat Donatus ille Donati sectator? *Neminem cogendum esse ad bonum. Deum dedisse homini liberum arbitrium; ideo non debere cogi hominem nec ad bonum.* Hoc ex Augustini Epistola nuper laudata discimus. Quid Catholicus ad hæc respondere debuit? Num ostendere, Donatistarum Schisma esse malum, Unitatem Fidei & Ecclesiæ Catholicæ bonum esse? Id fecisset inopportune. Neque enim poscebat Presbyter

Donatista, ut sibi demonstraretur, *bonum esse* redire in Catholicæ Ecclesiæ gremium. Non aiebat: *Neminem ad malum esse cogendum*. Aiebat: *Neminem cogendum esse ad bonum*. Hoc est, ut jam sibi persuaserat *bonum esse*, quod Catholici sibi inculcabant, aut saltem non negabat, & concedebat, *id esse bonum*, aiebatque *se sic velle errare, se velle perire* in Hæresi sua, uti infra Augustinus tradit. Quid aliud ergo Logicus vir ad Donatistæ effatum reponere debebat, nisi ostendere, homines *ad bonum* quoque impelli posse, atque debere? Quod Augustinus appositè facit producto vulgari eorum temporum exemplo, cui vel ipsi Donatistæ nihil obicere vellent, eorum nempe virorum, qui ad Episcopatum suscipiendum, hoc est, ad bonum amplectendum, cogebantur. Nihil ergo facit huc animadvertere, Donatistas malum putasse id, quod facere à Catholicis cogebantur. Ex Donati ultronea confessione assumebat Augustinus, id bonum esse. Tum ex Logicæ regulis id tantummodo evincebat, quod solum à Donato negabantur, videlicet, *cogere homines ad bonum debere*. Si *bonum* id esse negasset Donatista, tum Augustinus aliter sibi ad negantem respondendum novisset. Quamobrem nemo Logicæ præceptis instructus non intelligat, quantum ad rem faciat illa Augustini responsio, & quantum contrà à Logica alienum fuisset ea respondere, quæ si Phereponum audire volumus, respondenda tunc erant. Pudere deberet hominem Criticum tam supinè Censorem agere.

## CAPUT X.

*Non infamatur ab Augustino Ecclesia trium priorum seculorum, neque eidem affingitur aliqua dissimulatio iniqua. Non omnis persecutio improbata à veteribus Christianis, sed ea tantum, quæ pro errore contra veritatem exercebatur. Neque Ethnicis criminari iure potuissent pœnas moderatas in aversos à Religione vera statutas. Augustinus erga Manichæos mitis, sed non idcirco incusandus, quod salutare Hæreticorum vexationes deinde laudavit.*

**F**Acilè ab his, quæ ad Epistolam 185. olim 50. Augustini pag. 521. Animadv. habet Phereponus, expedire sese posset,

posset, quicumque Donatistarum insaniam, aut ex ipsius  
 supra memorati Presbyteri facinore, aut ex tot aliis Hi-  
 storiarum monumentis colliget, eoque magis qui demum  
 animadverterit, quam nullis rationibus, sed solum indi-  
 gnis suspicionibus omnia corrumpere, & denigrare Phe-  
 reponus soleat. Quam artem si in isto Censore probare  
 velimus, jam nihil erit, in quod sævire impune non possi-  
 mus, culpamque falsitatis conferre. Sed ne hæc quidem is  
 finè responso dimittendus est, quippe multum exspatia-  
 tur, ut ostendat Augustinum non animadvertisse, quan-  
 tum ipse universam Ecclesiam Christianam trium prio-  
 rum à Christo nato sæculorum suis dictis infamaret. Quis  
 tam malè Ecclesiam habeat Augustinus, videamus. Dona-  
 tistis dicentibus, *non petiisse à Regibus terræ Apostolos talia*,  
 hoc est, ut vulgò dicitur, non invocasse sæculare brachium  
 pro tutela Religionis veræ, Augustinus respondet in ead.  
 Epist. 181. Cap. V. §. 19. *Quis tunc in Christum crediderat  
 Imperator, qui ei pro pietate contra impietatem leges ferendo ser-  
 viret, quando adhuc illud Propheticum complebatur: Astiterunt  
 Reges terræ, & Principes convenerunt in unum adversus Domi-  
 num & adversus Christum ejus?* Tum addit, ex quo Impera-  
 tores Christianæ Religioni dederant nomen, potuisse il-  
 los, & debuisse pro ipsa Religione tuenda, & errore profligando, leges condere, Christianam tamen moderatione di-  
 gnas. Hinc Phereponus infert, Augustini mentem esse, à  
 primis Christianis improbatam non fuisse persecutionem  
 omnem: quod si verum esse ponimus, infamis ex Phere-  
 poni sententia fuisset Ecclesia sub Ethnicis Imperatoribus,  
 graviter semper de persecutionibus, quasi humanitati  
 contrariis, conquesta. Expectamus à Pherepono argu-  
 mentum, quo palam fiat, tam absurda consèctaria venire  
 ex Augustini sententia. Ecce. *Si enim dicamus Christianos an-  
 tiquiores ea tantum de causa vexationes damnaſſe, quod in ipsos  
 exercerentur, non in Ethnicos: habendi erant callidi dissimulato-  
 res, qui tempori dumtaxat serviebant; cum damnaverent quasi im-  
 pia & inhumana, quæ ipsi lubentissime fecissent, si potuissent.* Tum  
 è vestigio hæc alia subjicit: *Neque enim vetustiores Christia-  
 ni damnaſſent persecutionem, quam ipsi patiebantur, sed omnem  
 omnino, quacumque esset.* Postrema hæc verba si perpendan-  
 tur, quamvis speciem præferant rationis, & confirmatio-  
 nis superiorum, nihil tamen aliud continent quam id, quod  
 in quæstione est. At quæso non adferat pro re comperta  
 Censor iste, à vetustioribus Christianis omnem omnino  
 quæcumq; esset, persecutionem damnatam fuisse. Hoc ille

dicat, sed hoc illi adhuc demonstrandum restat. Superiora ergo repetamus Phereponi verba, quæ sanè ad rem propositam faciunt. Ad ea verò ita respondemus, antiquos Christianos non ideo de vexationibus fuisse conqueitos, quòd in se, & non in Ethnicos exercerentur; sed quidem quòd exercerentur contra veritatem, & contra veritatis patronos; & in patrociniùm patentiissimæ impietatis, & infelicissimi & apertissimi erroris. Expostulantes de iniqua crudelitate nunquam negârunt, quin moderatæ persecutionis aliquæ à legitimis Regibus exerceri licitè possent, ut ab impiis opinionibus pars populi sibi subiecti liberaretur. Ergo nihil dissimulabant Christiani veteres, neque temporì serviebant, neque libentissimè idcirco Ethnicos persecuti fuissent, si potuissent; nam quamvis id liceat, ægrè tamen à Catholicis semper factum est, neque parem Ethnicis vexationum mensuram reddidissent Catholici, neque alia præstare cupiebant, quæ nunc sibi Phereponus fingit, atque adeo sententia Augustini veterem Ecclesiam minime infamat.

Sensit Pherepontus hæc sibi illico reponenda esse; quare hanc nobis justam defensionem eripere conatur, ita scribens pag. 521. *Non poterant dicere Christiani, se veritatis esse patronos, Ethnicos mendacii. Nam quamvis verum hoc esset, contraversia illa etiamnum pendebat dum Ethnici contra sentiebant; armaque eis in Christianos; interea dum Christiani ipsi fierent, suppeditabantur; nam dum se pro veritate stare illi putabant, debebant ex Christianorum sententia vexare aliter sentientes. Quamvis Ethnici se pro veritate stare putarent, attamen Christiani minus perspicaces fuissent, & ratione convincendi, atque exarmandi superstitiosi furoris nunquam prudenter iniussent, si persecutionem omnem, quæcumque sit, damnassent. Tunc enim Ethnici, qui sese elumbes planè sentiebant, cum eò res veniebat, ut Christianos ostenderent non pios, non veritatis patronos, se verò non impios, non mendacii sectatores, vires resumpsissent, & fortissimos, imò ex una parte invictos se præbuisent adversus Christianam gentem. Nimirum dimissa quæstione illâ, utrobi, nempe, veritas & Religio verà staret, libentissimè in alteram quæstionem invasissent, num, scil. improbanda sit persecutio quævis. Argumentis autem tum à naturali ratione, tum ab omni populorum institutis, tum ab ipsis Christianorum SS. Libris, facile ductis, ostendissent, licere Magistratibus legitimis persequi, & divexare, improbos ac impios, ut aut emendèntur; aut justas dent pœnas. Nos contendimus,*

mus, in huiusmodi controversia rationibus obruendos fuisse Christianos. Quod profecto eorum apud Ethnicos bonam alioqui causam pessumdedisset, quasi Christiana gens, quam impiam, atque superstitiosam illi credebant, ea falsâ opinione eximere sese voluisset debitis impietati suppliciis. Saltem, ut quisque intelligere potest, difficilis illa quæstio difficile composita fuisset, atque interim, dum componeretur, debacchari perrexisset confidenter in Christi gregem Paganorum furor. Restabat ergo, ut ad priorem quæstionem, quam unam reverà nos dicimus agitatam, regrederentur Religionis Christianæ patroni, contemptoque Phereponi consilio, hoc solum peterent, hoc probarent, nempe ab impietate, atque à superstitione nimium abesse Christi fidem; impium contrà, atque superstitiosum esse Idolorum cultum, atque Ethnicos pro veritate minime stare. Si hîc vincebant Christiani, ex ipsorum Ethnicorum sententia divexandi amplius non erant; non enim illos, qui se pietatis & veritatis cultores probabant, suppliciis addicendos Ethnici credebant. At hoc facile, & illicò, & invictè ostendere poterant Christiani, vel Pherepono iudice: tantum eminet ac patet suprâ Ethnicorum superstitionem veritas Religionis Christianæ. Quod Christiani tantum serò profecerint, serò sævitiam Tyrannorum evaserint: non causæ infirmitati, non spreto Phereponi consilio, tribuendum, sed impotentia, & cœcitati Ethnicorum, quam hîc pluribus describere non vacat. Non ergo, ut Phereponus autumat, arma in semetipsos Christiani suppediabant Ethnicorum crudelitati, dum sentiebant, licere persequi impios; nam cum se impios non esse è vestigio & evidenter ostenderent, simul etiam persecutioni modus erat illicò faciendus. Ministrassent potiùs rationem perpetuò sæviendi, si (quod Phereponus eos fecisse vellet) contendissent, ne in impios quidem & superstitiosos, & sacrilegos licitum esse animadvertere, & iniquè vexari, quos idèò vexas, ut impietatem errorisque nefarios contra divinitatem ejurent.

Non conquiescit Phereponus, sed hæc addit: *Si potuissent prævidere Ethnici, ad fore aliquando tempus, quo morte multarentur Diis sacra facientes à Christianis Imperatoribus, nec sine plausu Episcoporum, licet alioquin in partes abiissent, Christianos infamassent, quasi factiosos & malos homines, qui non dicebant, quod sentirent, cum Religionem liberam esse oportere clamitabant.* Tum orationem suam ità concludit: *Nec dubito quin Ethnici, qui supererant in Imperio Romano, & vicini etiam Idolatra,*

*ut Persæ, talia Christianis objicerent* Malè accidit vetustioribus Ethnicis, quòd hominem acutum, qualis est Phereponus, illorum ætas ac superstitio non tulit. Eos enim iste fortasse monuisset, ut in Christianorum animos profundius inquirerent, seque diligentius liberarent à gente seditiosa, & vindictæ sitim occultante. At nos æquiùs putamus, Ethnicos, si prævidissent, quæ verè à Christianis Imperatoribus præcipienda erant, nullà infamiâ aspersuros fuisse Christianam sui temporis gentem; & siquidem fecissent, iniqua, ut cæteræ aliæ, fuisset hæc etiam accusatio. Nunquam enim clamitaverant Christiani, non licere legitimis Principibus superstitionem & manifestam impietatem proscribere, & salutaribus pœnis urgere impios ad meliorem sententiam; sed quidem superstitiosum & apertè sacrilegum Idolorum cultum Christiani appellabant. Deinde magna inter Ethnicorum & Christianorum persecutiones intercessit differentia; quippe Ethnici invitos Christianos coegerunt. Ethnicos verò invitos nunquam coegerunt Christiani veterem suam Religionem ejurare. Imò quæ capitalia supplicia memorat hic malevolenti animo Phereponus, in neminem decreta fuère, quòd Ethnicismo intimè addictus esset, sive quòd Christo nomen dare detrectaret; sed in eos dumtaxat, qui externum Idolorum cultum, & nefaria sacrificia, impiòsque superstitionis illius ritus vetitos exercere palam deprehenderentur. Quamobrem iniquè talia Christianis exprobrassent Pagani, qui sibi, cum rerum potiebantur, fas esse censuerant, invitos etiam Christianorum animos cogere timore mortis ad ejurandum Christum, & Idola colenda. Iniquissimè autem tanquam seditiosos, & vindictam anhelantes dictitassent Christianos, quos, uti Sanctus Cyprianus, Tertullianus, & alia antiquitatis monumenta testantur, obsequium & fides erga legitimos Reges potissimum commendavit, quamquam in eum numerum & in eas vires, excrevissent, ut Paganorum jugum excutere securi jam possent, & quamquam tam malè quotidie haberentur à sevirissimis Tyrannis, ut non destitui patientia ad miraculum accederet. Quare si Christianis ea, quæ Phereponus sibi persuadet, objecissent Ethnici superstites, ipsi nunquam sanè ad Christi Religionem inviti coacti habebant Christiani, quo eis ora statim obstruerent, seque à simulationis, & perfidiæ, & crudelitatis nota defenderent.

Cum non sint, nisi suspensiones inanes, & odii dumtaxat ac livoris testes, præterco notas, quas Phereponus habet ad

Serm.

Serm. CCCLIX. Augustini. Alia nos vocant. Quàm sincera Catholicorum, saltem plerorumque, caritas foret in Donatistas, jam suprà docuimus, & eorum temporum Historia luculentissimè docet. In animadversionibus autem ad Cap. 2. §. 2. Libri contra Epistolam Manichæi exosculatur Phereponus ea Augustini verba, quibus se à persecutione alienum, & mansuetissimum erga Manichæos præbet. *Illi, inquit Augustinus, in nos sæviant, qui nesciunt, cum quo labore verum inveniantur, & quàm difficile caveantur errores. Illi in vos sæviant, &c.* Sed oppido Censor dolet, Augustinum ad mortem usque in tam pia sententia non perstitisse; nam hunc Librum scripsit S. Doct̃or circiter Annum Chr. 397. Anno autem 412. planè mutaverat mentem. Ne nos quidem inficias imus, quin pia fuerit illa Augustini sententia; ejusque verba nos quoque altè in eorum animos immissa vellemus; qui nimio interdum rigore in Hæreticos sæviunt, & perdere, quàm sanare malunt errantes. Verùm debuit Phereponus ostendere, impiam fuisse alteram sententiam, in quam se meliori consilio transiisse postea Augustinus ipse fatetur. Nos æquè piam, & Justitiæ consonam, & prætereà Ecclesiæ ipsisque pertinacibus atque phreneticis utiliolem sæpè numero esse alteram etiam, dicimus. Ut enim pium esse potest facinorosis parcere, & non sævire in improbos, quia peccare humanum est, atque à vitiis criminibusque difficile abstinere se possunt homines, virtutemque sectari; ita pium, & æquum, & Reipublicæ, ipsisque scelestis utile est, in eos interdum sævire, ut aut ipsi, aut eorum exemplo cæteri emendentur. Neq; aliter tum sentiebat Augustinus, vel cum in priore sententia fuit; siquidem scribit in eodem Lib. Cap. 1. *Dominum per servos suos regna subvertere erroris, & emendandos esse potius quàm perdendos errantes.* Ad emendandi autem rationem pertinere ait supplicia, exilia, orbitates, & molestias corporis. Cur verò mitiorem in Manichæos agendi formam probaret Augustinus ipse docet, quia olim ejusmodi errore deceptus difficillimè ad lucem veritatis evasit. Cæterum cum ait: *Illi in vos sæviant, &c.* Dubitare cogor, nū respiciat ad justas punitiones, sive ad salutares pœnas à legitimis Magistratibus in Hæresim pestilentissimam decretas; an potius ad rationem disputandi, eosq; coarguendi, quæ cum aspera & sæva esse possit, lenis tamen potius Augustino usurpanda videtur. E.g., inquit Cap. 3. §. 3. *sævire in vos omnino non possum, quos sicut me ipsum illo tempore, ita nunc debeo sustinere, & tanta patientia vobiscum agere, quanta mecum egerūt proximi mei, cū in vestro dogmate rabiosus & cæcus errarē.*

Augustinus certè sævire flagris, & castigationibus in Manichæos non poterat; poterat quidem disputatione ac Libris. Quodcumque tamen intelligas, certè nusquam ibi Augustinus damnat, uti Phereponus sibi persuasit, promulgatas à Christianis Imperatoribus in Manichæos leges. Quod autem Phereponus miratur, ab Augustino cœptas esse probari Hæreticorum persecutiones, eodem tempore, quo gratiæ ineluctabilis inspirationi omnes bonas hominum actiones tribuere cœpit: jam diximus, divinam gratiam prædicationibus, cohortationibus, miraculis & ipsis etiam salubribus vexationibus uti, ut viam sibi sternat in hominum corda, quibus nunquam adimit essentialem voluntatis libertatem. Valdè autem fallitur Censor, *si ineluctabilis gratiæ* nomine significare vult, *neccessantem* (ità liceat loqui) & Calvinianam gratiam Augustino placuisse. Non alia hîc ei fuit sententia, quam Catholicæ Ecclesiæ, ut jam doctissimi viri demonstrarunt; quare nil mirum, si cum ea Augustinus componeret sententiam de justè adhibendo rigore in perveraces Hæreticos.

## CAPUT XI.

*Donatista multorum criminum rei, & puniendi quoque ex legibus politicis. Probata ab ipso Deo moderata Hæreticorum vexatio. Inepta declamatiuncula à Pherepono afficta veteribus Christianis, qui persecutionem Ethnicam idèd injustam vocabant, quia pro impietate erat. Maxima disparitas inter Ethnicos, & Christianos Imperatores, quod est ad vexationem subjectæ gentis. Ad summas potestates pertinet coërcere impios, & à vera Religione devios.*

**L**ibenter jam dimitterem istam quæstionem, si Phereponus, quem nimium urunt Dordracenæ Synodi tempora, & parium infortuniorum timor, finem loquendi hac de re facere posset. Tanquam ergo nihil hætenus attulisset, in Augustinum animosius iterum insurgit, cum hujus Librum primum contra Epistolam Parmeniani commentatur. Decreverat Constantinus Augustus in Donatistas, non semel in Cœciliànî accusatione falsi convictos, animadvertere.



tere. Hoc immaniter, & Ofio Episcopo suggerente, à Constantino factum, criminabatur Parmenianus. Iterum Hæretico succinit Phereponus p. 602. & ait: *Donatista propterea occidi non debuerunt, quod de Cæsiliano probare non potuerant, traditorem fuisse, aut à traditoribus ordinatum; vel quod secessionem fecissent, quamvis immerito, à reliquis Ecclesiæ Christianis; si modo legibus civilibus cæteroqui parerent. Hac delicta & vulnera mitioribus remediis curanda fuerunt.* Quasi civiles Leges gravissimè non lædat, qui calumniis alterum petit; quasi severissimæ poenæ ab iisdem Legibus propositæ antiquitùs non fuerint contra Calumniatores, & falsos accusatores, eòsque potissimum, qui ultimo iudicio superati, Imperatorem gratià corruptum fuisse criminabantur, quales, ut ex Augustino intelligimus, Donatistæ fuere. Quo autem supplicio dignos ex ipsis etiam civilibus Legibus non reputaret Constantinus Donatistas, qui ad iudicium suum toties appellarant, toties falsi convicti fuerant, & tamen Imperialia Decreta flocci facientes, quasi causam obtinuissent, furioso Schismate (cui falsa ipsa accusatio originem dederat) tam pervicaciter Ecclesiam dilaniare atque infamare pergebant? Attamen Constantinus, ipsius forsitan Ofii precibus delinitus, longè mitiori sententiâ, quàm mererentur, Donatistas compressit, uti ex Historia constat: quod non satis considerasse aut considerare noluisse Phereponus videtur.

Capite 9. ejusdem Lib. 1. contra Epistolam Parmeniani de Hæreticis ità scribebat Augustinus: *In quos ex occulto Imperio Dei, per manifestum hominem Imperium, multa quibus coercerentur severissimè constituta sunt; nec solum Hæreticis quoquo modo saltem Christiano nomine dealbatis, sed etiam ipsis Paganis, &c.* In hunc locum ità scribit Phereponus pag. 603. *Rectius dixit Augustinus, quàm putabas, occultum esse Imperium Dei de vexandis Hæreticis; nam profectò ad eò in Apostolorum scriptis latet, ut ne ipse, ne alius quisquam id proferre adhuc potuerit.* Tum addit, eo latente imperio, excusari non posse Christianos Imperatores, qui *Ethnicos imitati meras opiniones pro delictis habuerunt, & contra sentientes gravibus poenis affecerunt.* Non enim res tanti momenti, & cujus sunt tam horrenda sequela, unquam à Christianis tentanda erat, Deo non tantùm tacente, sed etiam tot & tantis de amore in univèrsam humanum genus iteratis præceptis disertissimis satis apertè rem vetante. Quod est ad Augustini verba, nemo non intelligit, occulto Dei Imperio significari internam illam inspirationem, quâ Deus cùm Reges, tum cæteros homines ad optimas & justas leges condendas, & ad virtutis

opera occultè sollicitare solet. Phereponus verò *Imperium Dei*, sive præceptum, de vexandis Hæreticis apertè conscriptum in Apostolorum Libris exigit ab Augustino, quasi ab Apostolis omnia Regum Jura Litteris consignanda fuerint; quasi Jus Regum in pervicaces Hæreticos, sibi atque Ecclesiæ subjectos, ex ipsis Apostolorum, aliarumque sacrarum Litterarum locis, ritè non deducatur; & luculentissimè demum non persuadeatur à recta ratione. Certè Hæreticorum vexatio res magni momenti est; sed nos nullas inde adeo horrendas sequelas novimus, aut saltem non alias, quàm quæ comitantur vexationem justam malorum ac improborum hominum. Ut enim istos ad meliorem frugem, ità illos ad meliorem mentem Magistratûs legitimi, dispari tamen severitatis genere, pertrahere nituntur. Quòd cum accidit (& sæpè de Hæreticis accidisse notum est) optima est vexationis adhibitæ sequela tum homini emendato, tum Regi emendanti: quæ certè optima sequela longè superat & pensat quæcumque Phereponus afferre contra possit. Homini autem non minùs timendum sibi est ex impiis opinionibus, è contemptu Ecclesiæ, ex Hæresi & Schismate, quàm ex malis moribus. Proinde vituperare non potest moderatas Imperatorum Leges in Hæreticos, nisi qui pravas de Religione opiniones nihil hominibus, nihil Ecclesiæ veræ, nihil Reipublicæ nocere sentit, & iniquum putat urgere errantes, & pervicaces ad veritatem dignoscendam atque amplectendam, sive custodiendam. Neque verò quod tot præceptis amorem in humanum genus exposcat Deus, idcirco vexationes moderatæ in Hæreticos interdictæ dicendæ sunt. Nam vel idèd nos illas ab ipso Deo probatas affirmamus, quia ex amore sive caritate in Hæreticos exercentur, quos non minùs quàm nos veritatis asseclas & erroris expertes vellemus, ut ipsi quoque nobiscum Deo miserante ab ira ventura liberentur. Amat & qui castigat. Innumera id exempla ostendunt, & Judicium in primis, qui justis poënis nocentes plectunt, ut perversas eorum voluntates sanent. Alioqui ne morum quidem crimina Deus amantissimus hominum aut punita vellet, aut ipse puniret. Sed quod Censorem istum in tot paralogismos conjicit, illud est, quod tam Ethnicorum, quàm Catholicorum, atque Hæreticorum sententias de Religione pari gradu habet tanquam meras opiniones, hoc est, à certitudine æquè distitas: qua in re an non ipse, qui tamen se Christianum dicit, delīpiat, eruditi judicent.

Ad Ethnicos Phereponus se rursus confert, quos capitali supplicio, si sacra Diis suis, fecissent, mulctandos, decretum est ab Imperatoribus Christianis. Crudelem appellat Censor, & Christianam mansuetudine prorsus indignam hanc legem. Augustino autem hujusmodi edicta laudanti talia reponit Phereponus pag. 603. *Hæc si possent laudari, omnia à Christianis, per tria prima secula dicta contra persecutionem Religionis causâ, quasi stulta aut malâ fide dicta, essent habenda. Stultum enim id oppugnare, quod æquissimum esse putares; nam non persecutio ipsa quasi per se mala, potuisset ab iis oppugnari, sed tantum quæ fieret contra rectè sentientes.* Crambem recoquere nos cogit Phereponus, & reponere, oppugnatam à Christianis fuisse non omnem persecutionem, sed eas tantummodo, quæ exercentur in veræ Religionis perniciem, ac in tutelam impietati. Id ergo olim oppugnabant Christiani suis vocibus & scriptis, quod iniquissimum esse putabant, cum nempe ab impiis Ethnicis in Christianos recta sentientes fieret; æquissimum verò putabant, si pro veritate contra errorem factum fuisset. Quæ hæc quæso umbra stultitiæ? At inquit Phereponus: *Cupiebant Christiani ab Ethnicis, dum Ethnici erant, omnem persequendi animum abjici; hoc est, se ab iis non vexari, quamvis Ethnici crederent eos in errore versari, quod multis locis probari posset.* Nos expectamus testem, aut rationem aliquam, quibus demonstraretur, Christianos omnem olim, quæcumque esset, persecutionem detestatos. Phereponus affert id solum, quod in quæstione est. *Multis locis, inquit ille, probari id posset.* Cur tam avarus est, ut ne unum quidem producat? At nos legimus Christianorum veterum Apologias, Justinii, Athenagoræ, Minutii, Tertulliani, Cypriani, & similia, & nihil tale reperimus. Toti illi sunt in demonstranda veritate & probitate suæ Religionis, in calumniis evertendis, in Ethnorum impietate, ac injustitia prodenda: quo facto rectissime concludebant, iniquam esse persecutionem, quam sustinebant, atque aded ab ipsa cessandum.

At Phereponus, lubenter dimissis veterum testimoniis, mirabilem rationem loco eorundem de suo penu educit, ita scribens: *Quod si Christiani persecutionem non improbant, si modo à rectè sentientibus in errantes exerceretur; oportuisset eos, si animum nudare voluissent, sic Ethnicos alloqui: Nunc quidem, dum infirmiores sumus, ô Ethnici, à vobis dissidentes clementer fieri cupimus. Sed si quando rerum potiemur, ne fallamini, non eandem clementiam vobis præstare statuimus:*

*Aras,*

*Aras, Tempia, ac simulacra omnia evertemus, sacrificiâque vestra ita vetabimus, ut sacra Diis vestris facere vobis capitale futurum sit. Interdum vos oramus, ut erga nos clementer vos geratis, dum superiores estis, quamvis, si unquam Imperatores Christianos habere possimus, vos quasi impios simus interfecturi, si Religionis vestrae cultum tueri velitis.* Post hunc locum, quem integrum afferre placuit, ne sita in ipso victoriæ spe fraudaretur Phereponus, nemo, si eidem credimus, non intelliget, aliter quam Augustinus sentire debuisse Christianos vetustiores. *Hæc enim, inquit Censor, sunt necessaria sententiæ Augustiniana consecratoria.* Nos verò nullum aliud consecrarium tam elegantis orationis à Pherepono confictæ videmus, nisi Phereponum ipsum indeclamatoriis coloribus addiscendis non frustra collocasse tempus. Nam qui trutinâ severiore sententiam Augustinianam expendunt, hæc tam necessaria consecratoria assequi intellectu non possunt. Primò ergo dicimus, veterum quoque Christianorum sententiam fuisse, licere Magistratibus legitimis coercere impietatem, ac superstitionem, quæ verè talis esset. Pro iis multis locis, quibus contrarium ostendi posse, aiebat quidem Phereponus, in speciem minans, sed non sine industria à proferendis abstinens. nos pauca dabimus. Justinus Martyr in Apologia secunda, quæ nunc ab eruditissimis prima dicitur: *ἡμεῖς μὲν γὰρ πρὸς οὐδενὸς πείσασθαι πκαχὸν δύνανται λελογίσμεθα, ἢ μὴ κακίας ἐργάται ἐγγυώμεθα, ἢ πονηροὶ διεγνώσμεθα.* Id est: *Nestra, inquit, ratio est, à nemine nos quidquam mali pati posse, si non aut malefici coarguamur, aut pravi cognitâ causâ judicemur esse.* Infra subdit: *Oramus, ut quæ Christianis obijciuntur crimina, inquirantur, atque si ita se habere probata fuerint, pro eo atque par est, puniantur, seu potius acrius etiam puniantur.* Præcipuum autem crimen Christianis objectum, Impietas ac Irreligio fuit. Quare Justinus ab ipso in primis purgat Religionem Christianam, ejusque cultores, atque doctrinam. In eadem verba scribit Athenagoras in Legatione pro Christianis. *Trium flagitiorum infamem rumorem de nobis spargunt: Impietatem, Epulas Thyesteas, concubitus incestos. ἀδείκτα, Ουτέγεια δειπνα οἰδοπδεῖς μιξεις* Quæ si vera sunt, nulli vel sexui, vel aetati parcite, ad pœnas rapite, &c. Tum rogat, ut si commenta hæc sint, atque calumniæ, à sæviendo temperent contra justitiam. Rogat, ut de Christianorum vita inquirant, quam innocentem invenient, & de eorum opinionibus, quas veras & pias non cognoscere nequibunt. Impietatis autem calumniam sibi primo loco suscipit diluendâ.

Num

Num ergo persecutionem quamcumque , an illam tantummodo , quæ contra probos , piæque ac rectè sentientes sit, damnarent Christiani antiquiores. ex his judicent æqui Lectores. Tertullianus itidem, quamvis unà cum aliis merito conquereretur, à Romanis Christianos propter diversas de Diis opiniones tam crudeliter vexari, cum tamen reliquis Philosophis in Imperio Romano liberum foret, quæ vellent de Diis , & de Religione Ethnica sentire: idem, inquam. Tertullianus Cap. X. Apologet. agnoscit, Christianos jure ac merito fore plectendos, ubi falsa & impia esse ostenderetur eorum sententia de Diis, *Scimus, inquit, Deus non colendos. Itaque Sacrilegii, & Majestatis rei convenimur. Summa hæc causa, imò tota, & utique digna cognosci, si non præsumptio, aut iniquitas judicet: alio a qua desperat, altera qua recusat veritatem.* En quo in loco statuat ille totum quæstionis cardinem. In opinionum videlicet examine. Si vera de Diis sentiant Christiani; injusta vexatio fuerit. Sin impia & sacrilega; tum justa persecutio. Addit propterea. *Exigere debetis, uti probemus, non esse illos Deos, & idcirco non colendos, quia tunc deum colā debuissent, si Diis fuissent. Tunc & Christiani puniendi, si quos non colerent, quia putarent non esse, constaret illos Deos esse.* Quibus ex verbis plane videas, non solum non improbatas, sed probatas à veteribus Christianis persecutiones, cum contra errorem ac impietatem fiebant: quæ ipsa Augustini sententia est.

Ergo non inquit Phereponus, quæcumque ab iis Christianis dicebantur contra persecutionem adversus se commotam, malâ fide fuisse dicta. Damnabant ii atque detestabantur persecutionem in justam, qualis apertissimè erat, quæ contra eosdem fiebat; non autem damnabant, quæ justè fieri poterat contra patentissimam Ethnicorum impietatem. At Phereponus reponit: Ergo animus erat Christianis persequendi, cum possent, Paganos, & oportuisset eos, si *animum nudare voluissent*, ad Ethnicos loqui concinnâ illâ oratione, quam super ex ore ipsius excepimus; aut certè nihil obstabat, quominus eorum dicta sic interpretarentur Ethnici, si Christiani credebant, quod hisce temporibus credebant Augustinus. Mirum est, hominem acutum nondum perspexisse, aut perspicere non potuisse, quantum interit inter sentientem, licere aliquid facere, & volentem, sive cupientem facere id quod licitū creditur. Christiani veteres utiq; arbitrabantur; fas esse impios vexationibus moderatis ad meliorem sententiâ incitare. At quis Logicâ veram edoctus inde veluti necessariū confectariū deducat: ergo & cupiebant persequi

impios: Innumera sunt, quæ facere licet; & tamen homines facere neque cupiunt, neque volunt, quia & ipsum non facere licitum est. Ridiculum prætereà est, eam Christianis affigere orationem, cum Christiani illi nondum scirent, an opus aliquando futurum foret suppliciiis ad cohibendam Ethnorum superstitionem; & an Ethnici omnes Christi fidem ultrò non essent amplexuri; & an Imperatores sibi addictos tam citò habitura esset Christiana Religio. Deinde num spectabat ad privatos Christi fideles dicere: *Nos statuemus, nos evertemus, nos vetabimus*, nos persecutionem faciemus? Regum, non privatorum, ista sunt jura; & velle talia ad Reges pertinet, non ad subjectos. Neque adeò inepti erant Christiani illi, ut incertam voluntatem Imperatorum futurorum tam circumscriptæ, tam fidenter in Ethnicos interpretarentur, cum ne certum quidem sibi foret, quis rerum status futurus esset, cum Ecclesiâ hujusmodi Imperatores habitura erat. Quod ab Ethnicis interrogati respondere poterant, illud erat: An Imperatores, (si quando societas Christianorum habebit) contra vos asperi quicquam sint constituturi, nos latet. Scimus quidem, si id ab ipsis fiet, licitè faciendum ex vestra ipsorum opinione: quæ fas licitumque creditis impios & sacrilegos vexare, ut ad veritatem assurgant. Quod est ad nos, paratissimi ad ostendendum sumus, & evidenter ostendemus, si nos audire sustinebitis, si æquas aures præbebitis rationibus, unam nostram Religionem veritatis & pietatis esse Magistram; atque adeò nullum vobis justum esse titulum tam crudeliter sæviendi in Christianam gentem.

Sed quod Phereponianæ declamationis absurdum auger, est comparatio instituta inter persecutionem ab Ethnicis in Christianos, & alteram à Christianis in Ethnicos commotam, quam postremam Phereponus invidiosissime commemorat, & lepidè ex ipso Christianorum ore audire nos facit. Neminem ex Ethnicis interficiendum sanxere Christiani Imperatores, quod Ethnicismo adhæreret, quod superstitionem minimè ejurare vellet, quod Religionem Christianam non amplecteretur. Vel Honorii, & Augustini tempore ingens Paganorum copia pacificè agere sinebatur intra fines Imperii Romani, & in ipsa urbe: imò ad Consulatum usque ascendebant Proceres apertè Pagani. Quid hîc quæso simile cum persecutione deterrima ab Ethnicis tamdiu facta, cujus erat scopus invitas Christianorum voluntates, sine rationum pondere, & solo mortis metu, cogere ad abnegandum Christum, & ad colendos mortu-

mortuos Deos? Quid ergo adversus Ethnicos ab Imperatoribus Christianis constitutum est: Nen. pe externum Ethnicæ Religionis, sivè ut melius dicam, publicum superstitionis exercitium Cæsareâ lege interdictum, & capitale supplicium contra inobsequentes propositum fuit. Hanc legem *crudelem, & christiana mansuetudine prorsus indignam*, Pherepono appellare placet. Verùm vel ex ipsis Hæreticis Principibus nemo licitum sibi nunc non putat, cum externum cultum, publicumque exercitium interdicere illarum Religionum, quas impias & sacrilegas esse credit, tum inobedientes extremis plectere rigoribus. Petat homo ille à Batavis suis, ab Anglis, & reliquis Protestantibus, num id facere liceat, quando licitum sibi omnes duxerunt (in hoc tamen errantes) à suis proscribere finibus ipsius Catholicæ Religionis exercitium: quam, ut cæco odio ferantur, comparare nunquam audebunt cum impia & manifesta Paganorum superstitione. Præterea videat novus iste Patronus Ethnicismi, qui nunc audeat crudelitatis postulare Imperatores, quod in suo Regno tolerare noluerint publicum Idolorum cultum, quem tantopere execrantur divinæ literæ, & eradicandum jubet Deus; & non eradicare cum possis, crimen est, intactâ tamen in hominibus subjectis arbitrii libertate relicta. Talia ab homine Christiano, & nequaquam habere, expectanda non erant; eoque minus, quod ipsos Christianos ita loquentes inducat, ut videantur libertas Ethnicorum voluntates olim coëgisse ad Christi fidem, & multis cædibus eorum fregisse contumaciam: quod falsissimum est.

Pergit Phereponus pag. 603. & adversus Augustinum demonstrare conatur, minimè pertinere ad Imperatorum potestatem coercere, vel punire impios, & à Religione vesta alienos. Inquit autem, summis Potestatibus demandatam solùm fuisse legum civilium, & publicæ tranquillitatis tutelam nullam verò societatem esse, quæ iisdem potestatibus detulerit *curam opinionum, præsertim Theoreticarum, ita ut eas sanciant, quæ ipsis placebunt, præscriptis omnibus aliis, atque auctoritate suâ & armis, si necesse sit, à Republica eliminatis*. Tum addit, neminem tam insanum esse, qui putet sibi necesse esse sequi opiniones summæ potestatis; alioquin innumeræ inde cōsequerentur absurda. Sed quid attinet ultra immorari in illius rationibus referendis? Quæcumq; ille habet, quadrare forsitan possunt in Batavorum, & Anglorum πολιτεία, apud quos sæculares Potestates, sive civiles Magistratus, sibi Jus perperam arrogant dirimendi Religionis negotia atque controversias; & apud quos (si principia sequi

impios: Innumera sunt, quæ facere licet; & tamen homines facere neque cupiunt, neque volunt, quia & ipsum non facere licitum est. Ridiculum prætereà est, eam Christianis asfigere orationem, cum Christiani illi nondum scirent, an opus aliquando futurum foret suppliciiis ad cohibendam Ethnorum superstitionem; & an Ethnici omnes Christi fidem ultrò non essent amplexuri; & an Imperatores sibi addictos tam citò habitura esset Christiana Religio. Deinde num spectabat ad privatos Christi fideles dicere: *Nos statuemus, nos evertemus, nos vetabimus*, nos persecutionem faciemus? Regum, non privatorum, ista sunt jura; & velle talia ad Reges pertinet, non ad subiectos. Neque adeò inepti erant Christiani illi, ut incertam voluntatem Imperatorum futurorum tam circumscriptæ, tam fidenter in Ethnicos interpretarentur, cum ne certum quidem sibi foret, quis rerum status futurus esset, cum Ecclesia hujusmodi Imperatores habitura erat. Quod ab Ethnicis interrogati respondere poterant, illud erat: An Imperatores, (si quando societas Christianorum habebit) contra vos asperi quicquam sint constituturi, nos latet. Scimus quidem, si id ab ipsis fiet, licitè faciendum ex vestra ipsorum opinione: quæ fas licitumque creditis impios & sacrilegos vexare, ut ad veritatem assurgant. Quod est ad nos, paratissimi ad ostendendum sumus, & evidenter ostendemus, si nos audire sustinebitis, si æquas aures præbebitis rationibus, unam nostram Religionem veritatis & pietatis esse Magistram; atque adeò nullum vobis justum esse titulum tam crudeliter sæviendi in Christianam gentem.

Sed quod Phereponianæ declamationis absurdum auget, est comparatio instituta inter persecutionem ab Ethnicis in Christianos, & alteram à Christianis in Ethnicos commotam, quam postremam Phereponus invidiosissimè commemorat, & lepidè ex ipso Christianorum ore audire nos facit. Neminem ex Ethnicis interficiendum sanxere Christiani Imperatores, quòd Ethnicismo adhæreret, quòd superstitionem minimè ejurare vellet, quòd Religionem Christianam non amplecteretur. Vel Honorii, & Augustini tempore ingens Paganorum copia pacificè agere sinebatur intra fines Imperii Romani, & in ipsa urbe: imò ad Consulatum usque ascendebant Proceres apertè Pagani. Quid hîc quæso simile cum persecutione deterrima ab Ethnicis tamdiu facta, cujus erat scopus invitas Christianorum voluntates, sine rationum pondere, & solo mortis metu, cogere ad abnegandum Christum, & ad colendos mortu-



mortuos Deos? Quid ergo adversus Ethnicos ab Imperatoribus Christianis constitutum est: Nempe externum Ethnicæ Religionis, sive ut melius dicam, publicum superstitionis exercitium Cæsareâ lege interdictum, & capitale supplicium contra inobsequentes propositum fuit. Hanc legem *crudelem, & christiana mansuetudine prorsus indignam*, Pherepono appellare placet. Verùm vel ex ipsis Hæreticis Principibus nemo licitum sibi nunc non putat, cum externum cultum, publicumque exercitium interdicere illarum Religionum, quas impias & sacrilegas esse credit, tum inobedientes extremis plectere rigoribus. Petat homo ille à Batavis suis, ab Anglis, & reliquis Protestantibus, num id facere liceat, quando licitum sibi omnes duxerunt (in hoc tamen errantes) à suis proscribere finibus ipsius Catholicæ Religionis exercitium: quam, ut cæco odio ferantur, comparare nunquam audebunt cum impia & manifesta Paganorum superstitione. Præterea videat novus iste Patronus Ethnicismi, qui nunc audeat crudelitatis postulare Imperatores, quod in suo Regno tolerare noluerint publicum Idolorum cultum, quem tantopere execrantur divinæ literæ, & eradicandum jubet Deus; & non eradicare cum possis, crimen est, intactâ tamen in hominibus subjectis arbitrii libertate relicta. Talia ab homine Christiano, & nequaquam hebere, expectanda non erant; eoque mirus, quod ipsos Christianos ita loquentes inducat, ut videantur libetas Ethnicorum voluntates olim coëgisse ad Christi fidem, & multis cædibus eorum fregisse contumaciam: quod falsissimum est.

Pergit Phereponus pag. 603. & adversus Augustinum demonstrare conatur, minimè pertinere ad Imperatorum potestatem coercere, vel punire impios, & à Religione vesta alienos. Inquit autem, summis Potestatibus demandatam solùm fuisse legum civilium, & publicæ tranquillitatis tutelam nullam verò societatem esse, quæ iisdem potestatibus detulerit *curam opinionum, præsertim Theoreticarum, ita ut eas sanciant, quæ ipsis placebunt, præscriptis omnibus aliis, atque auctoritate suâ & armis, si necesse sit, à Republica eliminatis*. Tum addit, neminem tam insanum esse, qui putet sibi necesse esse sequi opiniones summæ potestatis; alioquin innumeræ inde cōsequerentur absurda. Sed quid attinet ultrà immorari in illius rationibus referendis? Quæcumque ille habet, quadrare forsitan possunt in Batavorum, & Anglorum πολιτείας, apud quos sæculares Potestates, sive civiles Magistratus, sibi Jus perperam arrogant dirimendi Religionis negotia atque controversiæ; & apud quos (si principia sequi

velint, propter quæ à Catholica Ecclesia sese disjungere licitum putârunt ) nullis Conciliis, & ne ipsi quidem Ecclesiæ suæ; in fidei causis , certa ab errore immunitas tribui potest. Apud illos, inquam, jure conqueri potest Phereponus Arminianus, quòd Arminianos Hæreticos Calvi nistæ potentiores minis & pœnis olim à sententia dimovere voluerint , cùm certè secundùm eadem principia magis isti, quàm illi de veritate suarum opinionum certi esse non possint. Et nos habemus , quod Prudentius *apud sēp.* De Gallieni Cæsaris edicto habet.

*Damnes, si sapias, anile dogma.  
Jussum est Cæsaris orî Gallieni.  
Quod Princeps colit, colamus omnes.*

Verùm hæc neque in Religionem Catholicam, neque in Catholicos Imperatores quidquam conveniunt. Nemo nostrum dicit, nos sequi oportere summarum Potestatum Religionem, quæcumque sit; nam Regibus terræ nunquam Deus pollicitus est , eos in veritatis partibus semper futuros , neque eorum judicio dimisit Religionis veræ criterium. Ecclesiam dicimus audiendam & sequendam esse. Evidenter ostendimus, contra Ethnicos aliasque à Christo avversas gentes, veram in ista Ecclesia Religionem reperiri; & adversus Hæreticos æquè evincimus , huic uni Ecclesiæ concedendum, & obtemperandum esse in quæstionibus & judiciis ad Religionem pertinentibus. Huic igitur Ecclesiæ ipsi quoque Reges parent, nihil in hoc à cæteris Christianis dissimiles; sed ipsorum Regum est cùm Religionem istam veram, tum Ecclesiam ipsam , ejusque unitatem auctoritate suâ tueri. Ut igitur verum est, summis seculi Potestatibus nunquam concessum fuisse jus decernendæ Religionis veræ aut ineluctabilis judicii ferendi de opinionibus ad Religionem spectantibus; ita falsum est, ad summas ipsas Potestates non pertinere defensionem cœlestis Religionis , & unitatis Ecclesiasticæ. Primum Reipublicæ vinculum Religio est; & nihil magis hominum interest, quàm aut veram ipsam Religionem cognoscere , aut in ipsa permanere, cùm & idè in mundum invehantur, corporique copulata: hîc peregrinentur animæ, ut Deo vero serviant, & intelligant quid de ipso ejusque operibus credendum , quisve ei cultus sit exhibendus. Nemo ergo non videat , non à populis tantum, sed ab isto Deo demandari Principibus curam arcendæ impietatis, & servandæ, ac propagandæ

dæ Religionis illius , quæ certa & divina probari potest ; quippe quodd apertè in civilem animorum concordiam, in Dei honorem, atque incredibilem utilitatem populorum post mortem , cura ista redundet. *Quis mente sobrius* ( utar Augustini verbis in Ep. 185. Cap. V. §. 20. olim 50. ) *Regibus dicat: Nolite curare in Regno vestro, à quo teneatur, vel oppugnetur Ecclesia Domini vestri? Non ad vos pertineat in Regno vestro, quis velit esse sive religiosus, sive sacrilegus: quibus non potest dici: Non ad vos pertineat in Regno vestro , quis velit esse pudicus , quis impudicus?* Usque aded autem verum est, Religionis tuendæ curam summis Potestatibus traditam, & velut à natura insitam esse, ut vix ulla ostendi possit Respublica, quæ contra impietatem, contra violatores suæ Religionis, Leges aliquas non condiderit , quanquam illa sæpè Religio falsa ac sacrilega fuerit.

## CAPUT XII.

*Posito in Regibus jure vexandi impios , nulla Christianis, aut saltem Catholicis imminere debent incommoda apud Ethnicos & Muhammedanos. Religio Christi manifestè vera , eamque tueri pertinet etiam ad Reges. Pœna utiles ,ut Hæretici in veritatem attentius oculos convertant. Quam sanctitatem in subjectis exigere debeant civiles Leges. Dissensiones in Religione politico quoque regimini noxia. Latantii locus explicatus. Ecclesia Catholica aperta veritas , & potissimum in controversia cum Donatistis.*

**A**T, inquit Phereponus pag. 603. *Si dixeris, non licere errantibus potestatibus facere, quod licet rectè sentientibus, in labyrinthum inexcabilem te conjicies. Nam quis demum judicabit hic de errore? Credunt Ethnici, credunt Mahummedani, credunt Hæretici Principes te errare, qui te putas rectè sentire; ac proinde te vexare debebunt, nisi fortè velis tibi soli ab omnibus credi , à te verò nemini; quod furiosum esset* Quæstio nostra est, num Regibus liceat moderatis vexationibus impios & à veritate fidei alienos sollicitare ad amplectendam Religionem veram. Magnum incommodum, si id licere affirmemus, imminatur Phereponus; arreptâ enim hâc ipsâ opinione, Ethnici, Muhammedani, ac Hæretici Principes, quibus persuasum est, se benè sentire, cæteros verò à germana Religione abesse, in posterum sibi jus tribuent debacchandi in rectè

sentientes Fateor & ego non leve futurum hujusmodi incommodum. Sed velim scire, num Phereponus putat, aliquid definire esse licitum ac bonum non alia de causa, quam quod eadem ipsa re impii & scelesti illicitè ac malè utantur, aut uti possint. Licità & bona est auctoritas legitimis Principibus delata puniendi fontes & facinorosos. Certè à sua bonitate jus istud non cadit, quòd si vè mali, si vè errantes Principes in fontibus quandoque noceant aut nocere valeant; Religionem veram amplecti, defendere, persuadere cæteris, & propagare, optimum cœloque gratissimum est. Num idem dicendum de amplectentibus, tuentibus, suadentibus, atque propagantibus Religionem falsam, si vè superstitionem? Istud ne malum facere potis est, ut illud cesset, quod prius erat, bonum esse? Non ergo evincit Phereponus, injustam illicitam vè esse impiorum & pravè in Religione sentientium vexationem, eò quòd eadem auctoritate possit & impius in benè sentientes uti. Sed eò semper deveniendum, ut quærat, quis veram tueatur Religionem, & quis ab ipsa aberret.

Attamen, inquit ille, quis Judex erit? cui potius credendum? cur tibi uni cedendum, cum tu nemini concedere velis? Quid autem aliud hîc agit Phereponus nisi se conjicere in intoleranda illa absurda, quæ non ità pridem monuimus esse omninò vitanda? Nempè non sine gravi ignominia Christianæ Religionis necesse est ille sibi fingat, ità doctrinæ & Ecclesiæ quam Servator tradidit, atque fundavit, occultam esse veritatem & lucem, si vè tam parum evidentes parùmque manifestas esse rationes fidei nostræ, ut furiosus sit (verbis Phereponi utor) qui sibi Christiano ab Ethnicis, Judæis atque Muhammedanis credi, ipsi verò nemini ex illis credere velit. Quis non miretur, ac doleat, ab homine, qui se Christianum dicit furentes appellari Christianos, cum sibi de veritate Religionis nostræ tot ac tam invicta argumenta solidasque rationes proferentibus credi à cæteris volunt? Quid Christiani nominis hostes pro se in posterum non dicant, si nunc pertinaciæ sui erroris ità plaudentes inveniant ipsosmet Christianos? Deinde ex Phereponi sententia consequens erit, excusandos esse, aut excusandos credere se posse, quibus Christi Religio non aridet, & contra superstitio placet; nam de vera Religione nemo in terris judex esse potest, & oportet, unusquisque sequatur & faciat, quod verissimum & opimum, ex animi sui sententia, ei videtur. Hæc sunt Phereponi verba, post quæ nescio, qui damnare ille amplius pergat immanem & injustam Ethnicorum

corum sive Judæorum crudelitatem in Christianos ; nedum justam & moderatam Catholicorum severitatem in aversos à Religione vera. Quippe tum his, tum illis optimum ex animi sententia videbatur persequi gentem, Deo, ut credebant, invisam: ipsique Deo se præstare obsequium arbitrabantur, cum à se dissentientes plectebant.

Reliqua perquam horrenda consecraria, quæ hinc fluunt, iterum exponere opus non est. Intelliget ipse Phereponus, si animo minùs nobis infenso in suarum opinionum effrenem licentiam inquireret. Quòd si, ut Christiani toties ostenderunt, & facile adhuc demonstrare valent, evidenter Ethnici, Mahummedani, cæteri que id genus homines veritati repugnant, necesse est etiam, evidenter cognoscere possint, se in justitiam peccare, quoties Christianos sanctissimæ Religionis addictos persequuntur, & persequi licitum putant. Neque porro minùs constare potest, Hæreticos in errore versari, simul ac eorum doctrina & credendi methodus, exigitur ad constantissimas ac certissimas regulas Catholicæ fidei. Quæ cum ita sint, ubi Principes Ethnici Muhammedani, ac Hæretici vexare instituant Christianam atque Catholicam gentem, tanto se crimine illi obstringent, quantum crimen est apud Deum, ab ipsa Religione Christi & ab Ecclesia Catholica abesse ac defecisse Catholicis verò tunc exerendæ sunt rationes cum fidei nostræ, tum alienæ injustitiæ; quibus si nihil proñciatur, & errare ac sævire pergat cæcus persecutor: arma patientiæ tum expedienda sunt, & illa Apostoli verba altè animo committenda: *Omnes, qui in Christo pie vivere volunt, persecutionem patiuntur.* 2. Tim. III. 12. Non aliâ ratione, non alio clypeo sese tutati sunt veteres Christianæ Religionis Athletæ.

*Sed nullamne, inquires, curam Religionis gerere debent Principes?* Ità se interrogat Phereponus, atque ità sibi respondet pag. 603. *Maximam & quæ in hæc potissimum sita est, ut ne quis Religionis causâ alium vexet, aut malè habeat, &c.* Ne nos quidem dicimus, vexari quemquam Religionis causâ debere sine auctoritate Principis. Ad hoc missum faciamus. Si igitur Phereponi judicio standum est, nullam ferè aliam Religionis curam gerere Principes debent, nisi ut cuicumque subjecto liceat quam velit Religionem pacificè tueri. Dum sibi legibúsque civilibus morigerum habeat populum cætera Princeps contemnat, & pro nihilo ducat, Deum blasphemari, sacrilegis ritibus creaturas adorari, Christum fabulis accenserì, ejusque veram Ecclesiam, & Sacramenta ut lubet proscindi. Scilicet, si Pherepono credimus, nullam fermè

Religionis curam gerere debet Princeps, sed tantum politicæ ac temporalis tranquillitatis, quam diversarum Religionum causâ turbari ipse nunquam sinet. En ut solum temporalia Phereponus sapit. Sed oblitus est, ut puto, in sacris Litteris Mozem, Phinees, Heliam, Jehu, Ezechiam, Josiam, & alios laudari propter pietatem, quod aut lucos, & templa Idolorum disjecerint, aut impiis sublati cultum ac Religionem Dei veri propagarint. Oblitus est, Religionem præcipuum esse bonum humani generis, politicè etiam considerati. Neque perspexit, aliter Regem, quia homo est, aliter quia Rex est, & Rex Christianus, in servire Deo, ac æternæ hominum felicitati, debere. Quod si hominum singulorum virtus est, & quoddam etiam debitum, veritatem cognitam propagare, ac bonum diffundere errorémque atque superstitionem auferre: quanto magis Regum munus id erit, quorum curæ tradita est vera populorum felicitas, quorum auctoritati demandatum & vitia emendare ac vellere, & virtutes, quarum prima Religio est, conservare, poenis quoque, si res poscat, adhibitis?

At, reponit Phereponus pag. 604. *nullâ aliâ tutelâ indiget veritas, nisi ut ei liceat luce propriâ fulgenti oculos hominum ad se convertere, & firmis rationibus animos eorum allicere. Nulla erroris oppugnatio certior est, quàm ut perspicuè confutetur, & libere vetegantur hallucinationes. Sic ergo favcant Magistratus veritati, sic errori adversentur. Ubi cumque utrumque licebit facere, brevi de errore veritas triumphabit.* Profectò & nos dicimus, nullam erroris oppugnationem esse validiorem, quàm ut perspicuè is confutetur; imò nullam aliam ejus oppugnandi rationem legitimam nos novimus, quando ipsas errantium vexationes idèò solum probamus, quod à veritate devii per eas fieri soleant, attentiores ad perspicuendos errores. Nullâ autem aliâ tutelâ, quàm confutatione errorum, juvandam esse veritatem, & etiam si nil aliud agas, brevi de errore ipsam esse semper triumphaturam, suadere quidem sed nobis nunquam persuadere Pherep. poterit. Nimirum in nostros omnium oculos experimenta contraria, eaque passim, & omnium temporum, incurrunt. Certè arbitretur, ut puto, Pherepon. cum veritate consentire Arminianorū opiniones. Easdem porrò perspicuè exposuerunt Arminius, Episcopus, Grotius, & alii non pauci; contrarias quoque rationibus variis insectati sunt iidem. Numquid verò in Armenii sententiâ ingenti copiâ concessere conterranei saltem Calvinistæ rigidiores? Nūquid Calvini dogmata de Lutheri erroribus hucusq; triumpharunt? Num de ipsis Idololatriis  
atque

atque Judæis, quibuscum versantur Batavi? Alia innumera exempla prætermitto. Aut ergo fateatur Phereponus, veritatem sibi suisque deesse (quod nos credimus:) aut intelligat, non sufficere interdum veritatis prædicationem; sed moderatas quoque & opportunas vexationes non parum prodesse ad effringendam pertinaciam & cœcitatem, quam veritatis prædicationi opponere solent errantes. Neque solum obduratæ perstant in veteri errore mentes, sed quotidie in novos alios disfluunt, in Hæreses, in Schismata, in Septicismum ac Atheismum ipsum, si nullo freno, si nullo terrore compescantur. Non ergo veritatis, sed erroris conservatio & propagatio ex ea licentia, & pace dimanat, quam Phereponus tantopere extollit atque commendat. Confutatione autem non indiget, quod subinde ille in culpam potius Christianorum, quam in vitiosos Ethnorum affectus, rejiciat seram post Constantinum ipsum de Ethnicismo victoriam. Nemo rerum causas intimè perscrutetur, & Historiam calleat, secumque reputet, quid ante & post Constantinum, & nostrâ etiam tempestate factum fuerit, & fiat: cui statim innotescere non possit, quàm leviter, quàm sinè pudore, & quanta cum infamia Christianæ Religionis, atque contemptu veritatis, talia nunc à Pherepono obtrudantur.

Infrà contendit idem Censor, imperitè ratiocinari Augustinum, dum in Hæreticos, atque in impias dissensiones justè exerceri posse rigorem legum putat, quia Apostolus inter opera carnis enumerat *fornicationes, immunditias, contentiones, amulationes, animositates, dissensiones, & hæreses*. Inquit ergo Phereponus: *Quis ignorat, quæcumque Evangelicis Legibus damnantur, & qua præscrim Paulus loco ab Augustino allato perstringit, civilibus legibus nec solere plecti, nec pisse?* Tum addit: *Leges civiles esse hominum conditioni attemperatas, nec ab iis eximiam quandam sanctitatem postulare, sed tantum eam virtutem, sinè qua Civium societas incolumis esse non potest.* Augustinus locum Apostoli attulerat, ut ostenderet, Hæreses, & Schismata, & dissensiones in Doctrina fidei, iniquitatis esse fructus. Cùm verò Idolorum cultores justè puniri posse Donatistæ facerentur: hinc Augustinus Hæreticos quoque meritò vexari atque coërceri posse inferebat. Phereponus contrà neque Hæreses, neque Idolorum cultum inter ea crimina recenset, propter quæ à civilibus Legibus sunt homines malè habendi. Quod cùm audio, mihi videor audire hominem nulli Religioni addictum, aut certè à veritate Religionis Christianæ alienum,

qui jura dumtaxat politica atque temporalia populis præscribat, nihilque de Religione vitiosa vel falsa curandum esse summis potestatibus dicat. Sed nos respondemus, pleraque ex iis, quæ per Apostolum damnantur, civilibus Legibus posse, ac solere interdici, atque puniri, præsertim si hæc vicia potiorẽ populi partem occupent, aut in immodicos excessus erumpant. Deinde dicimus, Idololatram, Impietatem, Hæreses, & Schismata, mala omnium gravissima esse. Quare ubi populi & Reges in Christi Religione, & Ecclesia descripti sunt, hoc est, quã Christiani sunt, & auctoritate eminent, quantum possunt studere debent, non solum ut ne tantum bonum inter cives pessum eat, sed etiam ut perditum recuperetur. Numquid enim liberum esse, & licere impunẽ cuicumque debet vel temerario, vel deliranti, frangere divinitus datas Religionis veræ Leges, & cœlestia Dogmata falsi arguere, & impiis opinionibus animos hominum corrumpere, & Deum blasphemias appetere, & Sacerdotibus à Deo constitutis negare obsequium, & rectè sentientes erroris per calumniam arguere, & dissidiis prout libet unitatem Fidei atque Ecclesiæ disrumpere, populũque aut exemplo aut prædicatione in errorem ac impietatem impellere? Quid fiat de sanctissima Religione, si nullo freno compescenda est ingeniorum licentia, atque amicorum corruptio? Uti-que civiles Leges eximiam quandam sanctitatem è populo non exigunt, & humanæ infirmitati indulgent. Sed qui à germana Religione abest, & Idolis famulatur, & ambizioso Schismate dilaniat Ecclesiam Dei, non solum mediocri illâ sanctitate caret, sed execrandâ impietate abundat, à qua nisi ante mortem se expediat, neque ipsi proderit mediocris sanctitas, neque ulla virtus. Nequit autem fieri, quin & civilis societas ex his etiam dissensionibus aliquas tandem contrahat rimas, & potissimum si scriptis & eruditione error invadatur, veritas deprædicetur: quod facere jubentur Christiani manifesto suæ Legis præcepto, & caritatis consilio, & justitiæ fiducia. Etenim ægrè fert unusquisque, se Deo invisum credi propter suas opiniones, impiumque idcirco, & Antichristum, & errantem sese appellari, sibi quæ æternæ mortis pœnas ab aliter sentientibus deputari. Hinc odia, simultates, atque contentiones, quas nulla Historia non refert, ipsaque experientia nunc etiam abunde testatur. Quid, quod ab Evangelica ipsa Lege jubemur Hæreticos, & impios, devitare, atque ab eorum abstinere commercio, nisi aliud necessitas poli-



tica suadeat? Plerique autem Politicæ Disciplinæ Magistri satis ostendunt, Religionum diversitatem civili etiam regnorum tranquillitati, & concordiæ nimium nocere. Quis igitur injustitiæ postulare audeat Reges auctoritate suâ usos, ut una vera fides propagetur, ut error proscribatur, ut unitas Religionis & Ecclesiæ custodiatur, siue instauretur, atque ut legitimus Christi grex in mille Sectarum Opinionésque contrarias atque absurdas pro hominum arbitrio quotidie non scindatur; quod fieri, si Phereponiamis consiliis contenti sumus, facillimè potest ac solet?

Alia sunt, quæ congerere me vetat aliò festinans oratio. Sed reponit Phereponus ista Lactantii verba è Lib. 5. Cap. 19. mihi 10. Div. Inst. *Defendenda Religio est, non occidendo, sed moriendo (monendo habent alii Codices;) non savitiâ, sed patientiâ, (sipientiâ habent alii Codices;) non scelere, sed fide. Illa enim malorum sunt, hæc bonorum. &c. Nihil est tam voluntarium, quàm Religio, in qua si animus sacrificantis aversus est, iam sublata, jam nulla est.* Hæc, ut opinor, loca illa sunt veterum Scriptorum, quæ nuper aiebat Phereponus, se posse, at nolle producere in suæ sententiæ tutelam. Non dissimilia ex Arnobio petere potuit, hoc est ab ejusdem Lactantii Magistro. Equidem excipere possem contra istorum Scriptorum auctoritatem, quæ inter Christianos tanti, ut constat, non est, & cui graviorum Patrum sententiam opponere liceret; attamen respondere juvat, talia quidem posse convenire in Ethnicos, non autem in Catholicos Principes. Illis una cura erat Christianam gentem non monitis, non rationibus, non doctrinâ, sed cædibus, & immanibus tormentis vincere. Christiani verò Principes gentem nondum Christo deditam non sine persuasione, argumentis, & caritate ad rectam fidem pertrahere conantur. Si aliquâ vi interdum utuntur, & vexationibus, moderatè & ex amore utuntur, qualis pœnarum usus deceat patrem, ac Principem amantem, non crudelem Tyrannum. Et ne nos quidem eos unquam occidendas profiteamur, ideo dumtaxat, quod à nobis diversa sentiant: quippe nostra quoque sententia est, Religionem voluntariam esse debere.

Quamobrem nihil hîc simile habet Catholicorum Principum usus cum teterrima Paganorum impotentia atque crudelitate; neque Lactantii sententia excludit salutarium pœnarum usum, quem in parentibus vel amantiſſimis contra filios reluctantes atq; errantes nemo est, qui vituperet

aut damnet. Lactantius verò, atque Arnobius, nihil aliud detestabantur, quàm vim sinè persuasione & ratione adhibitam, & vim crudelissimam, quæ invitis voluntatibus Religionem ingerat. *Non audent*, ajebat eodem loco de Ethnicis Lactantius, *quicquam de rebus docere divinis, ne & à nostris derideantur, & à suis deferantur*. Furor & sævitia pro rationibus erant. Igitur quamvis statuamus, uti reverà statuendum est Religionis veræ electionem voluntariam esse debere, atque ad illam invitos homines non esse adigendos; athuc tamen statuendum est, licitum esse ac saluberrimum severitatis usum, quâ homines urgentur, ut falsam Religionem, impietatem, errorémque suum animadvertant, verámque Religionem rationibus victi liberè ac voluntariè postea amplectantur. Hoc est, etiam si voluntarium esse debeat, virtutem & Religionem veram sequi, nam sinè voluntatis consensu virtus nulla est, atque Religio; attamen liberum esse cuicumque non debet in vitia voluntariè ferri, in impietate pacificè vivere, & à veritate; sanctâque Religione pro suo arbitrio deficere. Postremum hoc ostendat Phereponus; ostendat, liberum esse debere cuicumque maximâ ignominiâ afficere Deum, & abuti suâ potestate, qui ab impietate, ac errore omnium perniciosissimo per aliquas molestias revocare conetur subjectam gentem, ipsâque facere Deo amicam; demonstret, præter jus & fas agere, qui moderato rigore cohibeat arrogantes, ignaros, & scelestos, quominus à veritate ac unitate Catholicæ Ecclesiæ tanti faciendâ sese liberè divellant, & Schismata ac Hæreses ita Deo invisas conflent. Denique respondeant Patribus, & Augustino in primis, tantâ argumentorum copiâ id licere, & laudandum esse ostendentibus. Sed ille rem confecisse se putat, quòd unum aut alterum ex iis argumentis cursim, ut hætenus vidimus, arrodât.

Incommoda interim nobis ille minatur ex hujusmodi sententia. Verùm hæc abesse debere dicimus, quia dum attentè rationes expendantur, constare potest, & re ipsa constat, quænam sit vera, quænam falsa Religio; quo posito nemo nisi cæcus & summè impius persequi potest Religionis veræ cultores. Eò tandem ille necesse est, dilabatur, ut neget constare posse, si vè dicat incertum esse, cui nam sit germana Religio. Nos contrà id falsum esse ostendimus ex absurdis, consequentibus hujusmodi sententiam, Stoicis, Symmacho, aliisque recentioribus non ingratam. Provocamus deinde ad experientiam, immo ad  
ipsum

ipsum Phereponum, qui negare nequeat, quin falsitas cuiuscumque Religionis à Christo aversæ evidenter intelligi possit. Quòd si Ethnicis, Muhammedanis, atque ipsis Hæreticis id non constare dicatur, ii monendi sunt, ut attentius rationes Catholicorum audiant, & æquius judicent. Sin errorem vel ex his auditis fovere pergant, ii non placidè ferendi sunt, qui ex affectu pravo ac pertinacia videre nolunt, quod æquius omnis iudex videat. Non autem damnandi, qui temperatâ aliquâ vexatione illos urgent ad intuendam veritatem nostræ Religionis, & errorem suæ. Immo commendandi, qui recta in Religione perstant, rationibusque, ac persuasionibus, & prædicatione non minus demonstrare, quàm propagare conantur rectam hanc Religionem, & salutare etiam severitate ex officio caritatis in subjectam gentem utuntur, ut ista aut erudiri ad veritatem se patiatur, aut ad ipsam veritatem, quam temerè deseruit, se rursus restituat.

Quod est ad Augustinum in Donatistas agentem, nihil evidentiùs est, quàm ipsum pro bona causa adversus errorem scripsisse, & moderatum rigorem Legum jure ab ipso fuisse probatum. Lepidum autem se nobis exhibet Phereponus, cum pag. 493. in notis ad Aug. Epistolam XCIII. argumenta ejusdem pro æquitate persecutionis in Donatistas factæ his verbis amoliri nititur. *Hic & ubique statuit, atque adsumit pro comperto Augustinus, quod in controversia erat positum, suam nimirum Ecclesiam fuisse unam, exclusis Donatistis, Christi Ecclesiam. Nonequidem probo Donatistarum Schisma; sed cum illis disceptanti absurdum fuit perpetuè id assumere, quod præfractè negabant.* Is fuit Donatistarum error, ut illius Schismatis injustitia faciliùs, quàm aliorum complurium, liquidò se prodere posset. Pleræque aliæ controversiæ inter Christianos in Juris & Opinionum discordia versantur. illa in facti contentione potissimùm sita erat; quare civili etiam judicio dirimi. ejusque affectu ad formam juris communis absolvi, sive damnari poterant. Et re ipsa, ut unum hoc dicam, Cæcilianus non semel objecta sibi crimina purgavit cum in Imperatoris Aula, tum in Conciliis Episcoporum. Nisi Donatistarum vesaniæ aliter visum foret, jam sublata erat Schismatis causa. Id æquus omnis rerum æstimator tunc perspiciebat, nunc aperte idem nos perspicimus; & ipse Phereponus non hic tantum, sed alibi quoque Donatistarum Schisma improbavit. Quid est ergo, quod idem Phereponus adversus Augustinum nunc habet? *Assumit Augustinus pro comperto, quod in contro-*

*controversia erat positum.* Hoc est, malè Augustinus contendit, justam esse in Donatistas Legum severitatem, quia nondum ostendit, injustam esse ipsorum Donatistarum secessionem, & Hæresim. Qua in re lepidum, ut dixi, nobis se præbet Phereponus. Nam si constat illi, æquè ac reliquis nostrorum temporum Christianis, iniquè Donatistas delirasse: cur nunc ille petit, ut eadem veritas ab Augustino demonstretur? siue indignatur, quòd demonstrata non fuerit? Si hoc unum (ut jure vexatos Donatistas intelligamus) Pherepono, & nobis deest, nempe intelligere prius, an Donatistæ à vera Ecclesia exciderint: jam Pherepono, jam nobis id certum est atque compertum. Ergo hinc arguere, Pherepono non repugnante, debemus, merito exagitatos fuisse Donatistas protervos, & injustæ secessionis reos. At, inquit ille, Donatistæ hoc præfractè negabant; & Augustino demonstrandi onus incumberebat. Quid hoc quæso ad nos? Non Augustino jam è vivis sublato, sed nobis viventibus persuadere Phereponus cupit, justum vocari non debuisse adhibitum adversus Donatistas rigorem, quia Donatistæ se perperam egisse præfractè negabant, & Augustinus eos rationibus non vincebat. Ergo nos, cum vel ex ipsa Phereponi confessione liqueat, perperam Donatistas egisse, ideoque superfluum sit id ab Augustino demonstrari: nos, inquam, judicare debemus, justis legibus compressam fuisse Donatistarum amentiam, licitamque fuisse persecutionem illam, alioqui moderatam, quâ scilicet, ut cum Augustino loquar, *potius admonerentur ab errore discedere, quàm pro scelere punirentur.*

Inquiat porrò Phereponus, quidquid sit de confessione mea, absurdum semper fuit Augustino id assumere pro comperto, quod Donatistæ negabant. Mihi autem mirum videtur, hominem hunc tam inani censurarum genere delectari, & distingere Lectores. Quotus enim quisque est, qui nesciat, quot scriptis & argumentis, & quàm evidenter Augustinus, vel antea quàm Epistolam XCIII. scriberet, Donatistarum sophismata, & errores disjecerit? Deinde in eadem Epistola ad Vincentium id præcipuè quærebatur, num persecutio omnis illicita sit? Augustinus autem ostendit, eam esse laudandam, quæ pro veritate contra pertinaciter errantes ex officio caritatis instituitur. Tandem in ipsa eadem Epistola multa habet Augustinus, ex quibus intelligere possit quilibet veri amator, justitiam à Catholicis, culpam à Donatistis pervicacibus steterisse. Quamobrem, tametsi Augustinus nihil in ea Epistola attulisset

tulisset pro bona Catholicorum causa, absurdè non egisset: quantò autem minus absurdè egisse dicendus est, cum & ibi unam Catholicorum Ecclesiam ostenderit esse Christi Ecclesiam? Si Donatistæ id præfractè negabant: num propterea minus nocentes erant? Numeorum negotio vim Catholicorum rationum frangebat? Minimè gentium. Nunc illius controversiæ iudices sunt æqui Lectores, & victoriam sine dubitatione adjudicant Catholicorum parti. Iidem quoque iudicabunt, num Phereponus quidquam solidi hætenus deprompserit, quod negotium facessere possit Augustino affirmanti, moderatam errantium in fide, & deficientium ab Ecclesia vera, vexationem licitam esse. Et tandem, ut spero, animadvertent, non Augustinum pro comperto adsumpsisse, quod in quæstione erat, sed quidem Phereponum graviter errare, quod semper pro comperto adsumat, veram Religionem, & germanam Christi Ecclesiam; certò cognosci, atque evidenter apparere non posse in terris, atque eodem jure præditos, & in eodem incertitudinis loco esse quoslibet hominum coetus, quod est ad Religionem.

## CAPUT XIII.

*In Judæos, Ethnicos, & Muhammedanos minus asperè agendum Catholicis Regibus. Rigidiùs habere Hæreticos fas est. Et in eos tamen spiritus lenitatis est retinendus. Hæretici meri, Hæretici seditiosi. Postremi pœnis gravibus digni, sed non fingenda crimina. Hæreticos aliena ditioni subditos plectere non licet. Errantes alii pertinaces, alii dociles. Inter primos mitiùs habendi, qui cum lacte biberunt errorem, quàm qui ultro errorem adsciverunt. Attamen & hic audienda caritatis voces, & misericordia futurus locus. In errantes non pertinaces clementiùs agendum. Quæ regula Iudicibus Catholicis hic futura.*

**D**iximus hætenus, licitam esse temporalem vexationem errantium in Fidei Doctrina, ut ab errore ad veritatem assurgant. Non tamen diximus, licere semper, multòque minus diximus, semper debere Principes

cipes pari severitate mederi animis ægrotantibus. Etenim quod est ad eos, qui foris sunt, hoc est ad Ethnicos, Muhammedanos, atque Judæos, & si qui sunt horum similes: Principi non licet eisdem afficere suppliciis, & urgere asperè ad veram fidem amplectendam. Fas est quidem publicam professionem, & externum superstitionis exercitium iis interdicare, privilegiis in reliquos effusis eos privare, atque etiam, dum converti nolint, & Regibus commodum videatur, à Regno dimittere & expellere, ut à Religionis veræ cultoribus illorum sedes justius ac utiliùs occupentur. Cæterum nocere eorum vitæ, eorum corporibus, eorum fortunis, illa dumtaxat de causa, quòd in errore pertinaciter versentur: à Catholicæ Ecclesiæ doctrina nimium abhorret. Si quis auctoritate suâ, in Americanos præcipuè populos, abusi sunt, Religionis titulum impotentiae, ac avaritiæ propriæ obtendentes; ii non solum apud omnes malè audierunt, sed Apostolicæ etiam Sedis oraculo compressi sunt.

Quod est ad Hæreticos, quos Ecclesiæ subdidit Baptisma Christi, nos aliis iuribus utimur. Profectò ubi intelligas, esse veram apud Catholicos Ecclesiam & Religionem Dei, idque demonstrari posse statuas (quod certè nos statuimus:) illico iustitia & caritas postulant, ut nulli curæ parcas, quo tantum bonum in populis, jam illud libere amplexis, factum rectumque tueare. Abominandæ perduellionis crimen est, à veritate jam suscepta deficere, & in errores perniciosissimos sese conjicere. Tum quis ferat intolerandam illam ambitionem, quæ & Ecclesiam discindit, & aspernatur datam di vinitùs Sacerdotum choro, summisque Pontificibus auctoritatem? Magni sceleris reos nemo eos non agat, qui non errasse contenti, alios quoque in fide & veritate stantes, aut prædicatione errorum, aut exemplo, polluere & seducere nituntur; & aures ad veritatis argumenta, ad monita Pastorum, pertinacissimè claudunt; & infamant innumeris modis, ridendamque exhibent veram Christi Religionem atque Ecclesiam. Hic frenis indiget humani arbitrii libertas; hinc ipsis hominibus expedit Legum rigore ac terrore compesci; atque ut laudandæ sunt Leges, quæ nos impiè agere vetant, ita commendandæ, quæ nos impiè credere ac sentire non sinunt. Si rationes, si persuasiones, aliæque mitiores Artes nihil proficiunt: non irascendum Medico asperis utenti remediis, ut sanet; sed ægrotorum pertinaciæ, se aliter non permittentium sanari succensendum est.

Neque

Neque tamen hic ego sum, ut suadeam, Hæreticos ab Ecclesia damnatos, morte ipsâ esse mulctandos: Mihi potius, & unice summo, commendare & suadere summis Potestatibus moderationem hac in re & mansuetudinem S. Augustini, cujus nunc negotium agitur. Certè ille semper abfuit à suadendis extremis suppliciis in Hæreticos vel pertinaces. Quæ adhibere quanquam multorum sententiâ & liceat, & pro sit interdum, attamen ab ipsis quantum fieri potest abstinendum, & sollicitè Principibus cavendum est, ne aut justitia, aut caritas in eorum usu quidquam lædantur. Ecclesiasticorum autem omnium esse puto, Legum justitiam hocce in negotio mitigare potius, quàm accendere; & *spiritum lenitatis* ab Apostolo commendatum, non verò sæviciam, ubique prodero; & meminisse, *Ecclesiasticam lenitatem, Sacerdotalis contentam judicio, cruentas refugere ultiones*, uti ait S. Leo in Epist. 93. Tantùm autem abest, ut Ecclesia suadeat extremam severitatem in devios à fide, ut ab ipsis sacris arceat religiosos viros, talia suadentes, aliquòve pacto in judicium mortis influentes. Ideòque vel cùm incorrigibiles atque damnatos Hæreticos sæcularibus Judiciis tradit, obsecrat, ut leniter in ipsos agatur: quod vellem, semper ex animo, & non interdum ex consuetudine, per nonnullos factum fuisset. Quanquam enim dicamus, Judices, Principes, & Reges contra jus fàsque non agere, cùm in Hæresi & impietate obfirmatos, aliorumque seductores, extremis etiam plectunt poenis; & quanquam fatendum sit, nimiam humanitatem, ac impunitatem errantium ad errores & crimina multiplicanda inservire, & idcirco necessarius sit Legum terror, & justissima sit poenarum temporalium severitas: nihilominus ad neminem magis, quàm ad Christi Sacerdotes pertinet, mitiora semper consilia eligere & præbere; atque obstare, ne plus quàm deceat, & expediat, & æquum sit, in hujusmodi hominum genus sæviat sæcularis potestas. Dicam enim cum Apostolo Heb. V. 1. *Omnis Pontifex ex hominibus assumptus, pro hominibus constituitur in iis, quæ sunt apud Deum; qui condolere possit iis, qui ignorant, & errant, quoniam & ipse circumdatus est infirmitate.*

Itaque primò animadvertendum est, duplici de causa reos esse posse Hæreticos. Altera est Hæresis ipsa, sive error in fidei doctrina, & dissensio ab Ecclesia vera. Altera est seditio, & contemptus civilium Legum. Quoties ab obsequio & obedientia Regum, quam exigunt Politicæ Leges, Hæretici deficiunt, aut societatis civilis jura turbant, & sese

mergunt in horrenda flagitia: tum non secus ac alii seditio-  
 si plectendi sunt, & coercendi, Pherepono ipso consentien-  
 te atque laudante. Ex hoc potissimum capite quasdam Hæ-  
 reticorum Sectas & cædibus, & exiliis, aliisque gravibus  
 pœnis affectas ac dissipatas novimus, sine crudelitatis nota,  
 sine vituperio Principum & Judicum. Nam quæ benè con-  
 stituta Respublica ferat Manichæorum, Adamitarum,  
 Fraticellorum, Quietistarum, aliarumque hujusmodi pe-  
 stium sordes, siue sunt, quæcumque de iis feruntur? Quis  
 jure non abjiciat ac evellat de Regno. suo opinionum illa-  
 rum fautores, atque præcones, quæ moluntur Ateismum,  
 quæ licentiam peccandi faciunt, aut ad ipsam citatis equis  
 trahunt? Donatistarum autem crudelia facinora tum in  
 Catholicos, tum in seipsos, & Cæsarearum Legum aucto-  
 ritas conculcata ab ipsis, nimium vulgata sunt in Ecclesia-  
 sticis Historiis. Eadem de Albigenensibus dicas, de Anabapti-  
 stis, de Hussitis, de Puritanis, aliisque hujusmodi Hæreticis.  
 Quod enim est ad Calvinianos, qui tamdiu Galliarum Re-  
 gna infecerant, & seditionibus, turbisque vexarunt ac di-  
 viserunt, legendus est integer non ita pridem editus Liber  
 à doctissimo quodam Scriptore Gallicæ Congregationis  
 Oratorii, & subjectus Libris posthumis V. Cl. Thomassinii  
*de Edictis aliisque rationibus conservanda unitatis in Ecclesia  
 Catholica.*

Nescio igitur, quæ expostulare de Regibus atque Princi-  
 pibus possit turbulentum hoc hominum genus, si pœnis  
 gravibus, si exilio, si gladio mulctetur Num ignorant,  
 quantopere Apostolus, & recta ratio nobis commendent,  
 parere & obsequi summis Potestatibus? Tanta vis est illius  
 legis, ut ne ipsis quidem Catholicis Religionis causa vexa-  
 tis liceat seditiones conflare, & à Principum obsequio de-  
 sciscere, & Politicas conculcare Leges, Fides, inquam, ser-  
 vanda Regibus & Principibus vel impiis, & Hæreticis, ne-  
 que eorum usurpanda Jura, licet illorum Legibus Catho-  
 lici non teneantur quidquam facere contra ipsam suam  
 Religionem, atque conscientiam; tunc enim non tumultus  
 excitare, neq; armis se tueri, sed collum dare gladio jubent-  
 ur, potius quam iniquis obtemperare præceptis. Quantò  
 autem magis intolerandi sunt, qui talia audent contra Do-  
 minos suos legitimos pro errore ac impietate tuenda? Hic  
 autem meminerint Reges, non conficta crimina, non som-  
 niatas seditiones, non falsò attributas conjurationes esse  
 puniendas. Politicas, inquam, causas minimè veras adscif-  
 cere nefas est, ut speciosius alienæ Religionis homines ve-  
 xen-



xentur, & Religio invisa eliminetur. Quo titulo videantur Angli, num sui Majores unquam peccarint, cum tot Catholicos suppliciis, exilio, & morte affecerunt, quanquam nullum aliud istis fortasse crimen foret, nisi eam ipsam Religionem sanctè profiteri, quam à Romanis Pontificibus olim Britannia acceperat. Ubi verò ejusmodi criminibus Hæretici sese re ipsa obstrinxerint, modò eorum animi ad rebellionem seditionesque nimium proni alioqui non inveniantur, & dum clementia Principum in Regni & Religionis perniciem minimè redundare possit, indulgentiâ invitante reos ad scelera nova: à mansuetudine Sacerdotum non abhorret, imò cum ipsa penitus consentit, veniam interdum pro illis & poscere, & impetrare. Legatur in hanc rem Ep. 127. Augustini, quâ Donatum Africæ Proconsulem rogat, ne pro meritis facinorosam Donatistarum factionem corrigat. Legantur etiam Epist. 158. 159. 160. Nemo autem, ut arbitror, erit, qui his lectis non laudet ac amet Augustini aliorumque Catholicorum in Africa Sacerdotum lenitatem, & contra non irascatur Pherepono, indignè non uno in loco ferenti, Augustinum Christi Sacerdotem apud seculares Judices agentem, ut mitibus potius quàm atrocibus poenis Donatistarum comprimeretur insania.

Alii sunt Hæretici, quos aut voluntas benè composita, aut virium defectus ab instituendis deditionibus abhorrentes fecit. Unum in eis crimen error schisma, & hæresis. Gravissimum sanè crimen in Deum, in veritatem, in Ecclesiam, atque in se ipsos; sed non semper, non ubique, non in omnibus, pari suppliciorum ratione, atque asperitate plebendum. Varia itaque hic nobis considerata veniunt. Primò, nefas est Regibus atque Principibus Hæreticos alienæ ditioni subditos, sibi que nullo jure obligatos, eâ tantummodo de causa, quòd Hæretici sint, & ab Ecclesia Catholica averfi, aut bello invadere, aut ullâ afficere molestiâ; sive intra sive extra fines regni secundum constitutis legibus politicis iidem intra Regnum se alioqui inobedientes non præbeant. Hos nequaquam idcirco lædendos, cum Evangelica doctrina, tum recta ratio, & Jus Gentium satis ostendunt. Illud etiam inter Catholicos compertum, iisdemque nititur fundamentis, non licere summis potestatibus frangere fidem datam Hæreticis subditis, nedum ab aliena ditione pendentibus. Pactis, inquam, fœderibusque standum est cum ista quoque gente percussis, eique religiosè servanda fides, ac si nostra cum Religione omninò sentiret; neque aliis de causis recedere à promissis licebit,

quàm quibus recedere fas est inter ipsos Catholicos secundum iura Gentium, atque naturæ.

Secundò, distinguenda est errantium cohors in pertinaces, ac minimè pertinaces. De pertinacibus sermo nunc sit. Magna est utique hominum calamitas, in errorem labi; sed magna iniquitas, animum in ipso obfirmare velle. Quamquam enim idè in sententiis absurdis, fallis & impiis persistant non rarò homines, quòd ipsas sententias & rectas, & veras, & pias arbitrentur, atque idcirco, si non excusatione, at certè miseratione aliquà dignos se præbeant; nihilominus alia ex parte effugere non possunt abominandi criminis culpam. Facit nempe eorum arrogantia, eorum superbia, atque temeritas, ne errorem ultrò adscitum ponant, atque in castra veritatis immigrarent aliquando. Et cur non appellemus temeritatem, atque arrogantiam suam, hoc est fallacissimi hominis præferre, imò opponere opinionem iudicio Ecclesiæ Catholicæ. Pontificum Maximorum, Conciliorum, & Episcoporum, quos tamen Deus Iudices nobis reliquit in Fidei controversiis, & ad eos audiendos ire nos iussit in ejusmodi causis? Nam quod ajunt, & contendunt, ipsam Ecclesiam erroribus esse obnoxiam, nihil aliud est, quàm sibi adimere viam omnem erroris dignoscendi, & assequendæ veritatis, quam tamen unam Christus ipse nobis in hac mortali vita constituerat. Porro neque de numero, neque de Ecclesiæ aliqua imagine plaudere sibi possunt Hæreticorum conventicula; tum quòd abjectâ Ecclesiæ Catholicæ auctoritate, cujuscumque alterius Ecclesiæ auctoritatem abjiciant oportet; tum etiam quòd eorum Patres perperam soli sese opposuerunt Conciliis veris, & veræ Ecclesiæ, eorúmque posteri quamvis in ingentem copiam crescant, vitium & culpam temeritatis paternæ retinent, & minuere amplius nequeunt.

Pertinax igitur hoc hominum genus, quod aut se argumenta veritatis edoceri non patiatur, aut edoctum veritati ipsi; atque ipsi Ecclesiæ veritatis columnæ resistat: gravi se crimine obstringit, & propterea jure coërcetur; & coërcendum est; & acerbis pœnis ejus pervicaciam (si aliis noceat) sive emendare, sive punire iustissimum fuerit. Sed Justitiæ dumtaxat non est hic habenda ratio. Caritatis quoque Christianæ præcepta atque concilia occurfare in primis debent oculis Principum, & Regum. Quamobrem considerandum est rursus, duplicem esse posse istorum Hæreticorum pertinacium turbam. Hi errorem, & Hæresim, unà cum lacte biberūt; isti jam adulti, Priores à nulla Religione  
ad

ad alteram defecere, sed quam pueri didicerunt, hanc postea rueri pergunt. Posteriores inconstantia delectavit; infortunium, si de una fallaci Religione in alteram fallaciore latius mutarunt; at gravissimum ac perniciosissimum crimen, si de vera desciverunt in falsam. Dico ergo, illorum in errore perveraciam aliter, hoc est longe mitius, quam istorum esse habendam. Siquidem ignorare, & non sentire nemo potest, quam altas radices in animis mortalium agat à teneris unguiculis inspirata cujuscunque Religionis opinio. Sit licet falsa, impia, atque ridenda Religio; dum accepta sit à parentibus filiorum amantissimis, dum antiquitate aliquam constet, dum tenellis cordibus inscripta fuerit: in naturam, ut ita dicam, transit; quantaque facilitate impressa fuit, tantam vicissim difficultate exculpi atque expelli inde potest, Nimum vulgaria sunt istius veritatis exempla, ut hic referre sit opus. Quis ergo tantam hanc hominum infelicitatem potius quam temeritatem supremis plectendam suppliciis facile pronuntiet? Imò quis miseratione dignissimam non assermet? Hos doceri, hoc terrere fas est; & quoties in antiquo errore obfirmatissimo animo perstent, ipsique fulgentissimæ veritati resistent, eis negare privilegia, incommodisque etiam, & exilio illos mulctare pro errorum gravitate, & varia conditione temporum, utile, licitumque puto. Sed isti ab iis semper discernendi, qui studio culpæque tantum propriam in errorem se præcipites dedere. Ne punire gladio velis, quod isti ut aliter esset efficere, cum nascerentur & educarentur, minimè potuerunt. Quanquam enim postea possint, & pervacaciter nolint; ab eadem tamen infelicitate nativitatis atque educationis hæc ipsa descendit in errore pertinacia.

Tertio, ad eos quod attinet, qui de veritate ac unitate Ecclesiæ Catholicæ in hæreses errorisque adulti defecere, & auctoritatem summorum Sacerdotum aspernantur, atque irridunt: alia convenit severitatis ratio. Eorum vitio, ac temeritate factum est, ut laberentur in tenebras, sibi que atque Ecclesiæ veræ nocerent. Eorum superbiâ deinde fit, ut in falsitate perstent, & ad lucem rursus non assurgant. Ideò quidem plerique non assurgunt, quod putent, se contra conscientiam acturos, & Deo displicituros, si ad veterem sententiam revertantur, iterumque cum Catholica Ecclesia consentiant; sed temerè id putant, & eorum culpam factum est, & fit, ut sic putent. Porro quemadmodum ebrius & perditus amator poenam criminum, ebrietatem & amorem consequentium, non effugiunt, quia causam

huiusmodi criminum ipsi volentes elegerunt; ita & qui lubens errori mentem mancipavit, culpandus deinde est, quòd ad ipsum errorem dignoscendum atque ejurandum induci non possit. Sibi imputet, qui optimam opinionem in pessimam commutavit, si nequeat de pessima in optimam reverti. Optimam autem rursus inveniet, si errorem ponat, si attentum se præbeat vocibus veritatis: quòd cum facere nolit, magno se crimine profectò obstringit. Quid si non errasse iste contentus, errorem quoque evulget, litterisque consignet, ac prædicatione persuadeat? Huiusmodi hominem societati humanæ perniciosissimum ferat, excuset, absolvat, qui velit, non excusabunt, neque ferent, quibus notum est, quantum bonum sit in Religione vera, si in veritate stare, quantumque malum ab ipsa discedere. Quid si semel iste emendatus ac toleratus, in ejuratis erroribus iterum deprehendatur? Nemo non videt, quid asperi mereatur perversa isthæc hominis voluntas, & illusoria poenitentia, & periculosa contagio.

Attamen & hinc audire juvat caritatis voces, etiam atque etiam commendantis, ut quàm difficillimè, quàm rarissimè ad extrema Hæreticorum atque Apostatarum vel pertinacium supplicia deveniatur. Caritate ergo hortante, reorum personam prius induere debent supremi Iudices, & Magistratus; quòd cum fiat, non tam proni subinde erunt ad arripiendam securim, non tam lenti ad misericordiam impertiendam. Culpam autem Hæreticorum quorundam etsi non tollit, aliqua tamen ex parte minuit consideranda in iis voluntas. Non improba planè, non prorsus vitiata in illis est interdum huiusmodi potentia. Vel lent veritatem servare, Deo placere, & errorem effugere, dumque etiam pro errore ac impietate pervicaciter pugnant, se gratum Deo facere persuasum habent, suæque obsequuntur conscientiae. Culpam quidem, ut diximus, ne sic quidem apud homines, eoque minus apud Deum, effugunt, cum in causa sit ipsa eorum voluntas, ne errorem dignoscant & Hæresim exuant; sed non parum extenuare potest culpam ipsa hæc eadem voluntatis in bonum, & verum inclinatio. Peccat in iis intellectus potissimum. Omnia autem delicta quæ ob impetum affectuum, atque errorem intellectus patrantur, quippe quòd in ipsis non præcedit omninò libera electio mitius punienda sunt, & veniam æquius impetrant, quàm quæ proficiuntur à prorsus libera electione, & perversitate voluntatis. Hæretici autem, vel pertinaces, cum errore intellectus, & cum ipsa voluntatis per-

pervicacia plerumque conjunctum habent probum aliquem ipsius voluntatis affectum. Indue ergo parumper Hæretici personam; neque miraberis, tam serò, aut nunquam expediri mentem posse à præjudicatis opinionibus, quas certas, Deoque gratas putes. Excogita hominis nativam calamitatem, quem tot impediunt tenebræ, cui etiam volenti adeò difficile veritas persuadetur. Si tibi similis error accidisset, & deponere impium putares, nihil fortasse differres à pertinaci illius erroris patrono. Reliquorum criminum reos conscientia ipsa fere semper accusat, usque adeò ut se ultro pœnis & morte dignos aut fateantur, aut sentiant. Contrà non pauci Hæretici suum crimen neque agnoscunt, neque sibi exprobrant, idque ut faciant, supplicia plerumque facere non possunt. Imò contra conscientiam, & adversus Deum se facturos si crederent, si à sua sententia in contrariam discederent, ac tormenta prius non sustinerent. Cum eorum ergo crimine multa infelicitas conjuncta est, & non parum involuntarii, & proba aliqua voluntas ac indoles: quæ omnia caritatis Christianæ memorem à nimia severitate retinere, & ad misericordiam impellere meritò debent ac possunt.

Præterea sollicitè cuicumque Christiano Magistratui curandum est, ut suos fratres lucretur, & ab æternis pœnis arceat. Cui muneri non deest, quisquis facinorosos extremo supplicio plectit; nam ex istis nullus fere est, qui sceleris sui turpitudinem non agnoscat, & pœnitentiâ ductus à vita non abeat, & mortem ipsam corporis in animæ suæ utilitatem non vertat, aut vertere possit. Hæretico autem pertinaci, in quem lictor animadvertit, omnis præcluditur ad salutem via; tempusque resipiscendi aufertur. Ille quidem vitio ac pertinaciâ suâ pereat, sed culpâ nequaquam cognita; atque adeò christianæ mansuetudinis foret sustinere potius quàm urgere ultro festinantem in æterna supplicia. Quis enim scit, an non aliquando eidem daturus sit Deus pœnitentiâ, ut cum Apostolo loquar 2. ad Tim. 2. *ad cognoscendam veritatem, & resipiscendum à diaboli laqueis, à quo captivus tenetur ad ipsius voluntatem?* Ad hæc deterimus ille mortis terror facit, ut apertis Hæreticis fictos non raro habeamus Catholicos. Quod si postremum supplicium intrepidè à nonnullis feratur, ipse error latius interdum serpit, cum incauti homines non animorum pertinaciæ, sed veritatis virtuti ac fiduciæ tribuant miseram illam in tormentis & morte constantiâ. Exempla in hanc rem plurima suppetunt. Non hic tamen dissimulandum est, hujusmodi homi-

homines, si vivere diutius sinantur inter gentem Orthodoxam, publicæ rei nocere posse prædicatione errorum. Et sanè periculum istud impigrè avertendum. Tunc enim ad ipsam caritatem Christianam spectat, plurimum saluti prospicere, quàm unius. Sed ubi aliter consulere possit Princeps reipublicæ, quàm sublato è vivis pertinace Hæretico: tunc erit gratissimum caritati, quòd & istum incolumem servet ad emendationis ac pœnitentiæ spem. Inspiciendum ergo, an non carceres, exilia & aliæ salutares pœnæ, & anathemata, quibus errans à fidelium consortio amoveatur, & Monasteria, quæ ad pœnitentiam ac disciplinam includatur, idonea sint remedia, ut cohibeatur à veneno spargendo, & ad saniolem mentem infelix ille sensim perducatur. Caritas tandem nihil intentatum relinquit, quo si fieri potest, à temporali ac spiritali morte fratrem defendat, ac liberet; & cum pœnitentem certè necari non sinat, ideo pœnitentiam hominis, quanquam seram, libentiùs exspectari cupit, quàm ejus pertinaciam citò puniri.

Succedit alia errantium phalanx, nempe non pertinaciù. Primò autem animadvertere opus est, propriè hæresim appellari non posse, à qua absit animi pertinacia. Cujus placiti certissimas rationes non est, cur nos congeramus, quando eas alibi à gravissimis Theologis luculentissimè digestas habere Lector potest. Quamobrem cum hoc hominum genus Hæreticos nuncupamus, ex usu potiùs, quàm ex ratione loquimur. Eadem verò animi docilitas illud inter Catholicos obtinuit, ac obtinet, ut neminem sine pertinacia errantē supremi Magistratus morte puniant, puniendumve censeant. Rectè sanè. Ut enim dictum est, non ideo Hæreticis pervicacibus vita interdum eripitur, quòd errent, atque à veritate defecerint, sed quòd moniti atque edocti germanam fidem, pertinacissimè deliramenta sua aut prædicare, aut fovere pergunt; h. e. infelici mentis errori voluntatis crimen adjiciunt. Si ergo quisquam à fide, aut ab unitate Ecclesiæ excidat, monitùsque postea resipiscat, & edoctus intelligat, fateatur, ac ejuret falsam doctrinam: meritò voluntati ejus bonæ malum intellectùs errorem indulget Ecclesia. Æquum nihilominus est, ut homini pœnitentiæ erroris ducto injungantur salutaria aliquot pœnitentiæ genera, quibus aut Deum sibi propitium facere, aut scandala præterita reparare, aut certos in posterum de vera sua pœnitentia, & non fictâ emendatione, fideles reddere possit. Proinde & hoc rectissimè constitutum est, ut sponte suâ sese accusantes, ac pœnitentes, omnium mi-

mitissimè habeantur ; reliqui pro erroris, & scandalì, & pertinaciæ præeuntis diversitate diversis subjiciantur poenitentiae speciebus.

Quod hic tamen commendandum in primis videtur, illud est, ut Christianæ caritatis, atque prudentiæ maxima cura habeatur à Quæstitoribus Hæreticæ pravitatis. Rectissimè instituta fuit, nostrisque etiam temporibus utilissima est horum auctoritas, quippe succrescens faciliè vulgi superstitio, & ingeniorum temeritas non raro comprimuntur, & à Domini tritico zizaniâ arcentur. Optimis præterea legibus constat eorum facultas, (& placidis etiam, saltem apud Italos) ut plus inter nos severitatis in prospectu, quàm in recessu, invenias. Sed periculum etiam subest, ne quis auctoritate legibusque sanctissimis ob immoderatum zelum, nimiamque asperitatem abutatur. Dicam id, quod mecum dicant, ut spero, me sapientiores; dicam, quod dicunt & faciunt optimi Quæstitores, atque exoptant, ut fiat à cæteris fodalibus suis. Necessaria semper est accuratissima diligentia, quæ nihil erroris, nihil superstitionis aut pullulare, aut vigere sinat. Necessaria quoque severitas sæpè est, ne nimia indulgentiâ animum sceleribus addat. Sed non eò usque procedere diligentia debet, ut vel levissimis de causis, & meris de suspicionibus, carceres, & alia incommoda fidelibus creentur. Neque talis ac tanta esse debet severitas, ut caritatem, & mansuetudinem Christianam unquam obliviscatur, & à se abjiciat. Asperos se præbeant in judiciis civiles Magistratus; nihil nos moramur sæculi ritum. At certè Ecclesiasticos Judices, & Christi Sacerdotes, & Christianæ Legis, hoc est caritatis & mansuetudinis Præcones simul, atque exemplaria, omnium maximè lenitas, ac benignitas decet; torvum autem supercilium & immitis animus omnino dedecet. Neque enim Episcopos tantum, sed cæteros etiam Ecclesiæ Ministros, exigere Apostolus mihi videtur *non superbos, non violentos, non percussores*, (id est, non linguâ, non contumeliis, non acerbitate quemquam ferientes,) *non turpis lucri cupidos, sed hospitales, benignos, sobrios, justos, sanctos*. Idem etiam in 2. ad Tim. 2. egregia illa verba, & altè nostris omnium animis infigenda habet: *Servum autem Domini non oportet litigare, sive pugnare; sed mansuetum esse ad OMNES* (sive ἅπας, benevolum, placidum, lenem, & humanum erga omnes,) *docibilem, patientem, cum modestia sive lenitate corripiens eos, qui resistunt veritati*. Quod si mansuetudinem, & patientiam, & lenitatem, & humanitatem enixè commendat Apostolus vel in eos, qui, ut habet

vulgatus Interpres, *veritati resistunt*, & sunt in errore pertinaces : quantò enixius credendus est mansuetudinem eandem commendasse erga illos, qui non resistunt veritati, sed errorem, simul ac edocentur, pontunt, & in veritatis castra libentissimè redeunt? Et quidem Apostolica Sedes medicinale tribunal hoc esse voluit, non asperitatis, atque inclementiæ. Cavendum ergo, ne turbidi affectus, ne ira, ne ambitio exercendæ potentæ, ne feritas hic locum habeant; curandum, ut captandæ famæ, & zeli non levis ostentandi cupido, quò postea ad ampliora munera faciliior sit aditus, in miseræ gentis perniciem & incommodum vertatur; denique studendum, ut sicubi peccandum sit, ex benignitate potius nimia, quàm ex nimio rigore peccetur. Quòd si Italicæ Inquisitionis Magistratibus qui mitissimi omnium sunt, aut minore saltem, quàm reliqui severitate utuntur, dicimus, caritatem præ oculis semper esse futuram : quantò magis commendandum id erit Hispanicæ Inquisitionis Præsidibus, immo Lusitanæ, si verà fortè sunt, quæ de illorum rigore feruntur?

Itaque primò suspiciones meræ, & leviusculi rumores de alieno errore, sive superstitione, ac Hæresi, satùs esse non debent, ut cuiquam negotium facessas, & vincula inferas. Quanquam & hoc referre supervacaneum fortassis est; video enim apud nos non sinè prævia eaque gravi cognitione rerum procedi. Secundò error in iis esse rebus & controversiis potest, quas nondum Ecclesiæ, aut Concilia statuerint. Fac ista deinde statuatur ac dirimantur supremo Ecclesiæ oraculo: à crudelitate ac injustitia non abesset, qui Theologo, sive Scriptori aliter ante iudicium Ecclesiasticum sentienti, Hæresim objiceret, ipsùmque malè propterea haberet. Utique is erravit, sed excusabili errore; tunc enim verè crimen est, ab Ecclesia, & Doctrina Christi dissentire, cùm homini constat, quænam sit Ecclesiæ mens, & doctrina Christi. Hoc autem notum, certùmve esse homini antea non poterat, tacente ac tolerante Ecclesiâ. Et profectò, si iudicandum secùs foret: dedecoris & Hæresis notam nonnullis Sanctis Patribus inureremus, è quorum calamo & mente sententiæ quædam exciderunt, quas deinde Ecclesia non tulit. Sed nihil ex eorum sanctitate idcirco imminutum, quia nihil antea illa de re fuerat constitutum. Facit eadem ratio, ut Vincentium Lirinensem, Cassianum, aliòsque Semipelagianis Opinionibus olim addictos, & Sanctorum fastis, sive

è Ca-



è Catholicorum albo non expungamus; siquidem floruerit ante Arausicanam Synodum, cujus decreta si quisquam postea contempnisset, tum solum culpandus merito & anathemate percutiendus fuisset. Idem fiet, si quando Romani Pontifices, atque Concilia, nonnullas ex iis de divina Gratia & libero Arbitrio sententiis, quæ nunc in Scholis impune obtinent, aliquando proscribant.

Tertiò, errare etiam homines & Scriptores possunt in ipsam Christi & Ecclesiæ doctrinam. Quod cum accidit, considerandum est, num ex ignorantia & incuria, an verò ex perversa voluntate, deditaque operâ, se conjecerint in errorem sibi certè perniciosum. Si apertis oculis à Dogmate Catholico discessum est, nemo neget, quin hujusmodi crimen castigatione sit in primis dignum. Sed longè mitior ultro ad pœnitentiam venienti castigatio erit; longè autem durior agnoscenti quidem errorem suum, sed urgente metu pœnarum, & nonnisi ex alieno impulsu. Ità veræ Ecclesiæ ac Religionis desertores, dum sponte, & non mendaci pœnitentiâ ducti, ad gremium fidei revertuntur, minimè graves pœnas subire coguntur. Et contrà severiùs mulctati, qui Magistratuum vigilantiam deprehensi, terrorem expectârunt melioris sententiæ magistrum. Attamen vel in his expendere juvat minorem majorémve in defectione pravitatem voluntatis. Multos enim non odium Catholicæ communionis, siue doctrinæ, non ingenii ambitio, non contemptus Ecclesiæ, ad Hæresim traxit; sed humani animi affectus, aut Præsidum severitas, aut disciplinæ impatientia: quæ sanè imminuere quandoque possunt voluntatis scelus, quod est ad læsam fidem, majorémque propterea mereri misericordiæ mensuram.

At alios ignorantia sola, & incuria errantes fecit. Quis enim est, qui scire omnia, nihil oblivisci, & nunquam errare sibi tribuat? Sed quicumque errat, animo interim veræ Fidei & Ecclesiæ Catholicæ conjunctissimo, falsa Dogmata non amplexurus, non propugnaturus, si ea sciret averfa à Schola Christi, & à disciplina, ac mente Ecclesiæ, & ubi scit, ea illico execrans: cur puniendus, cur rigide excipiendus apud homines, cum nullo apud Deum crimine idcirco isteneatur, nisi de Dogmatis iis præcipuis sit res, quæ nescire suapte naturâ peccatum est, & nescire Christianus homo non debet? Exploranda igitur sedulo est errantium voluntas; quòd si promptus in obsequium fidei & Ecclesiæ, illorum animus deprehenditur,

vel

vel dum errant : edocendi sunt veram sententiam , monendi ut à sermonibus abstineant gravissimarum rerum , dum sibi majorem prius non compararint Eruditionem Theologicam ; & excusanda facile ingenii infirmitas , aut ignorantie inconsultus error. Non autem continuò in vincula conjiciendi sunt , non diu detinendi , atque vexandi , neque populo spectaculum miserabile daturi. Hominem vidimus rudi minervâ , cui exciderat , aliud esse à vulgari nostro purgatorium ignem. Communibus quidem suffragiis innocens evasit , sed post non paucos carceris dies , & non finè ingenti rerum suarum incommodo. Prudentiæ potiùs , & caritatis erat , hunc accitum monere , ne talibus sese immisceret , & verbis tantummodo argue-re , ad canendam palinodiam jam paratissimum , quam & hæc quæstio ex iis sit , quæ adhuc in ancipiti posita , nondum Ecclesiæ calculo fuere diremptæ Errant enim multi , quia non Theologi ; errant & ipsi quandoque Theologi , quia tunc non errare , sed cum Ecclesiâ sentire se putant. Privatæ verò objurgationes satis plerumque forent , ac esse deberent ad medicinam errantium. Alioqui si levibus de causis in carcerem , & in rostra , homines rapere velis , & præsertim rudes , ac Theologiæ abstrusioris , meliorisque Disciplinæ ignaros : verendum est , ne caritatis tribunal apud optimos ob nimium rigorem malè audire incipiat , & ex terrore potiùs , quàm ex amore Christiani in posterum simus : quod à mente Apostolicæ Sedis , & meliorum profectò abhorret.

Quid si eos divexare velimus , qui in Opinionibus aut Philosophicis , aut Historicis , aut Astronomicis , aut etiam Theologicis , sed nondum ab Ecclesiâ , sive à Romanis Pontificibus , sive à Concilio quopiam proscriptis , errare nobis videntur ? Facile contra jus , nedum contra caritatem , hæc agendi ratio pugnabit. Numquid enim tua opinio , ab illorum opinione diversa , ideo verior & sanior est , quia tu potentior , quàm illi ? Ne tu quidem , ut puto , id arbitrêre. Sola divinarum Scripturarum , & Ecclesiæ mens cognita facere potest , ut tu de veritate sententiæ tuæ , illi de errore suo certi sitis. At cum non illi minus , quàm tu , contendant , opiniones suas consentire cum sacrarum Litterarum & Ecclesiæ doctrina , cumque Ecclesiâ , uti prædixi , mentem suam nondum hîc explicuerit : propterea hujusmodi opinionum propugnatio nondum crimen evasit , pœnis & carcere exagitandum. Quis enim te certum facit , Ecclesiam contra illos potiùs , quàm contra te , esse ali-

aliquando pronuntiaturam ? Et ii quidem fortasse in errore versentur. Sed quamdiu latet Ecclesiæ oraculum, eique parere ac cedere, simul ac prodeat, paratissimi sunt homines : ab officio veri & obsequentis Christiani minime per illos disceditur, & apud Deum non peccatur ; & error ille ( materialis, ut ita dicam, non verò formalis ) nondum carceribus aliisve corporeis incommodis castigandus erit. Quamobrem ut non audeam quascunque Cartesii Opiniones Theologiæ Catholicæ consonas appellare, multoque minus præstare ; attamen cum hoc ille, ejusque affectu, sibi persuadeant, & suis etiam rationibus ostendere conentur : vix intelligerem, cur adversus eos rigorem adhibere placeret, priusquam Ecclesia opiniones hujusmodi suo decreto proscripserit, atque damnarit. Utique Cartesii Libros nonnullos cum Romanus Pontifex, tum Academicæ quædam nigro thetâ confixerunt. Sed numquid hæresibus scatent, quicumque Libri configuntur ? Num sententiæ omnes, quas cartesius literis consignavit, errorem ac hæresim sapiunt, ut singulas abominari, ac rejicere sit opus ? Cum hoc à fidelibus Ecclesia expetit, solet sententias, sigillatim enuntiatas, hæresis, aut falsitatis damnare. Antequam damnet, earum patronis bona fides eripi non potest, dum tamen opiniones tueantur reverà dubias, hoc est nondum definitas, & à definitis apertè non effluentes, & in iis tuendis se ab Ecclesia dissentire non putent. Neque privatorum objurgationes facere possunt, ut bonæ fidei privilegia in ipsis cessent, multoque minus cum suspicio adest, ne privati homines ad eas opiniones damnandas ferantur amore potius privatæ cujuspiam Scholæ, quàm certâ cognitione veritatis, quæ adhuc latet, sive fiduciâ proferendi ab Ecclesia decreti. Locum hîc habere possunt, quæ de Aristotelis fortuna in Christianorum Scholis apud Veteres feruntur, & quæ olim contigere in celebri controversia de Divinis Auxiliis, & de Scientia mediâ.

Sed nos aliò properamus.



## CAPUT XIV.

*Zelus ineruditus, & nimia Licentia in Fidei & Disciplina negotiis. Quos pessimos effectus ille pariat. Scientia & Prudentia si à Zelo absint, quid sequi inde possit. Zelus ineruditus Novatorum. Quomodo regendus Zelus. Licentia opinandi in Religione nimis nocet. Ejus exempla in Phereponi Libris.*

Multa sunt, quæ ad inveniendam veritatem obstant; multa, quæ inventam in publicum efferrî non sinunt. Ignorantia, præjudicatæ opiniones, ambitio, impotentia, terrenorum bonorum amor, dedecoris timor, auri & gloriæ sitis nimia, atque alii effrenes animi effectus, quotidie veritati bellum indicunt, & errori patrocinantur. Ego Librum concludam, duobus præcipue commemoratis, quorum unum pauci ferè considerant, aut animadvertunt, in quot excessus, & incommoda vergat, & vergere possit; alterum omnes passim & cognoscunt, & detestantur, cum tamen ab eo non pauci abstinere nesciant, sèque illo teneri non sentiant. Zelum ineruditum intelligo, & nimiam licentiam in Fidei & disciplinæ negotiis. Ille superstitionem, grave scilicet malum, procreat; ista Hæreses, & Schismata, gravissima nempe mala, quorum incommoda brevi oratione persequi, & frena simul proponere est opus. Quod attinet ad ineruditum zelum, dicimus, nomine zeli significari honestum illud & laudabile studium, quo accendimur ad colendum Deum ejusque servos honorandos, & ad illius Legem, & veram Religionem tuendam atque propagandam. Sed optimus hic hominum affectus, cæterorum affectuum, atque ipsarum virtutum mœre, in pessimos excessus interdum excurrere potest, & in illaudanda facinora. Quod tum contingit, cum homines pio quidem zelo ardentés, sed scientiâ destituti, id peragunt, quod ipsi divinæ Legi, & Ecclesiasticæ Disciplinæ, & documentis rectæ rationis, & prudentiæ, & caritati adversatur. Testimonium perhibentis Paulo ad Rom. X. *Judæi Zelum Dei habebant; sed ille zelus non secundum scientiam erat.* Tuebantur mordicùs Mosaicam Legem, atque in ipsius ritibus collocebant potissimam salu-

salutis spem, & maximum hominis pensum. At qui zelum Dei habebant, non habebant scientiam Dei; quare Dei honorem potius oppugnabant, ejusque legem persequabantur. Neque aliter se olim gesserat ipse Paulus, cum paternarum amulator, sive Zelator traditionum supra multos coetaneos suos, devastabat Ecclesiam Christi. Eodem imprudenti zelo Scribas & Phariseos abundasse, nonnunquam etiam Discipulos Servatoris laborasse, ex Evangelio discimus. Hinc Aug. de Civ. Dei. Lib. 10. Cap. 12. tam secundo quam pravo sensu zelum accipi ait in divinis Scripturis. *Sicut enim, inquit, zelus in bono positus est, ubi legitur: Zelus domus tue comedit me; ita è contrario in malo, ubi dicitur: Zelus occupavit plebem ineruditam.* Illud igitur, quod solet ac potest destruere honestissimam indolem zeli, ignorantia est, insipientia, ac ineruditio: quæ mala cum in plebe crebrius inoleant, facile etiam in eadem zelus immoderatus & perniciosus vim obtinet. Ubi nescias, quibus moribus, quibus ritibus, ac artibus Deus velit se coli, Sanctos suos honorari, Legem servari, ac defendi, virtutes exerceri: quid mirum, si pius ille tuus ardor in absconsa interdum feratur, atque indigna, quæ Deo placeant, quo ipso tempore tantopere curas, ut per ea placeas Deo? sine prudentia, sine scientia plus nocere, quam prodesse potest zelus non privatis tantum hominibus, sed reipublicæ ipsi. Hinc egregie sanctus Bernardus Serm. 49. super Cantic. *Importabilis, inquit, absque scientia est zelus. Ubi ergo vehemens amulatio, ibi maxime discretio est necessaria, quæ est ordinatio caritatâs. Semper quidem zelus absque scientia minus efficax, minusque utilis invenitur, plerumque autem & perniciosus valde sentitur. Quid igitur zelus fervidior, ac vehementior spiritus; profusiorque caritas, ed vigilantiori opus scientiâ est, quæ zelum supprimat, spiritum temperet, ordinet caritatem.*

Et quid quæso non fecit ineruditus zelus? quid quotidie non facit? sanctam Religionem amplificare, Idola fugere ac detestari, ad zelum verè Christianum pertinet. Sed ipsum dedecebat, interdum Ethnicis rerum potentibus insultare, eorum fana evertere, eorum Idola conterere, minime consentientibus in eam rem Principibus; dedecebat Judæis subjectis contumelias, & dira tormenta atque incommoda inferre, aut filios invitis parentibus eripere, sacro Baptismate abluendos; & alia hujusmodi audere. Zelotis Christiani est, cultum Deo O. M. semper, & ubique, & ferventissime præstare, ejusque amorem,

ac reverentiam instillare populis. Verum ab hac præstantissima virtute abhorrebat, Deum colere inopportunis locis, atque temporibus, ornamentis luxum potius quam gravitatem referentibus, Musicis concentibus magis intemperantiam quam pietatem conciliantibus, ritibusque ab Ecclesia nondum probatis, imò nonnunquam ab ipsa improbatis. Abhorrebat, Myſteria pietatis, & Sacramenta impiis atque infidelibus prodere; & ex ipsis ridenda potius quam veneranda exhibere populo ſpectacula; & immoderatam peccatoribus à Deo polliceri indulgentiam, aut eosdem nimiam ſeveritate in deſperationem agere, aut ſpem ſalutis omnem ponere in quibuſdam levibus externæ pietatis institutionibus, quod Phariſæi olim quoque faciebant. Zelus noſter eò etiam ferri debet, ut non difficiles nos præbeamus ad credenda ſanctorum Hominum geſta, virtutes, ac miracula, quæ ab Historicis fide dignis memoriæ traduntur. Sed iſte zelus honeſtos virtutis fines prætergreditur, ubi nos nimium faciles efficit ad credenda quæcumque prodigia, ſeu ut apertius loquar, ad probandas fabulas omnes, aut leves anicularum narratiunculas de admirandis quorundam Sanctorum operibus, aut antiquitates fictas, aut Lipſana non ſatis probatæ fidei. Sanctis ipsis Martyribus, & reliquis Beatis, & Deiparæ poſſimum debemus honorem non exiguum, quippe in illis, licet conſervis noſtris, honoramus dona Dei, & gratiam Chriſti, atque adeò ipſum Deum, qui & ex eorum interceſſione plura in homines beneficia ſpargit. Sed immoderato, & minimè laudabili zelo ardebit, quiſquis talem ipsis honorem deſert, qualis uni Deo convenit; aut ab ipsis ita poſcit ac exſpectat non temporalia ſolum munera, ſed ipſam peccatorum remiſſionem, & vitam æternam, ut illoſ ex interceſſoribus facere Deos videatur; aut omnia pietatis officia in iſtis potiùs ſibi demerendis, quam in Deo placando, collocat; & ipſos iis nimis laudibus extollit, quas perfectæ diſciplina ægrè ferat, immo ipſi è coelis minimè probare credendi ſunt; eorumque Imagines, & ſacras Reliquias, & Dies Feſtos cultu immodico proſequitur.

At non alia de cauſa homines hîc errant, quam quia carent ſcientiâ, atque prudentiâ, h. e. ignorant, quid, & quando, & quomodo agendum ſit, ut rectè agant. Pio amore cœleſtium & Religionis æſtuant, ſed amorem iſtum in abuſurda & pernicioſa deferre ſæpè ſolet, ac poteſt moderatricis ſcientiæ penuria. Hinc in popello, in indoctis, illiteratis,

ratis, atque mulieribus, frequentiores sunt zeli excessus, quippe in istis ignorantia communior. Ipsos etiam literis & scientiâ excultos homines exuberans ardor nonnunquam extra orbitas rapit, aut rapere videtur. Cur hoc quæso? Quia non satis bonis literis, non satis scientiæ, operam dederunt, aut quia scientiæ multæ exiguam sapientiam, atque prudentiam minorem, conjungunt. Quapropter nihil magis commendandum est Ecclesiæ Præpositis, quam ut impensum in Ecclesiasticam eruditionem studium conferant, quod singula tum ad Christi doctrinam, tum ad Disciplinam spectantia rectè ipsi sciant, & alios docere subinde possint. Meminerint, quid per Oseam Prophetam Deus olim edixerit Os IV. 6. *Conticuit populus meus, eo quod non habuerit scientiam. Quia ut scientiam repulisti, repellam te, ne Sacerdotio fungaris mihi* Proinde necesse saltem est, ut Ecclesiarum Pastores supremi Ministros sibi adsciscant, aut homines ad consilium adhibeant, quibus consummata sit istius eruditionis peritia Alioqui si zelus ineruditus, & in plebe potissimum, sedulo non coërceatur, superstitio immane malū, & æquè ac ipsæ Hæreses formidandum, invalebit, sanctissimæq; Religionis vultū sumopere deformabit. Monstrum istud, superstitutionem, inquam, ignorantia parit, zelus immoderatus nutrit ac fovet. Quod enim omnium pessimum est, huiusmodi insipientis zeli culpā sæpè fit, ut abusus inveteratos, pietatis referentes speciem, nemo tollere, aut tolli sustineat. Immo si qui melioris notæ eruditi voce aut calamo in superstitutionem aut gliscentem aut vetustam insurgere cupiunt, interdum aut ne hiscere quidem sinuntur, aut certè parum Christiani animi famam in se concitant, & scandala statim excitare posse creduntur. Ergo quis non intelligat, quanta sit necessitas eruditionis & scientiæ, ne veritas lædatur, ac supprimatur, neve superstitio regnet? Neque verò putes ad tantum negotium sufficere Scholasticorum Theologiam. Dogmaticâ hîc opus est in primis, & non mediocri controversiarum, quas cum Hæreticis habemus, peritiâ; itâ enim sinceris hominibus melius innotescit, qui sint fines tum veræ doctrinæ, tum disciplinæ melioris, quos una Ecclesia Catholica fideliter servat, Hæretici pertinaciter contrariis hinc inde sententiis, aut etiam ineruditi incautè quidem, sed parum laudabiliter, prætergrediuntur. Itaque tum Conciliorum, tum Romanorum Pontificum, tum sanctorum Patrum documenta accuratè consulenda sunt in hunc finem, & non faciliè deinde peccabitur. Tandem credendum est, posse Deum quidem tolerare,

rare, non autem probare zelum sine scientia delirantem; nam ut ut ipsi pius affectus placeat, fieri tamen non potest, quin ipsi contra displiceat parum pius prodendæ hujus affectionis modus.

Dissimulare autem nequeo alterum scientiæ neglectæ, aut ignorantia dominantis effectum in hominibus piis. Undique pericula ipsi timent, undique scandalum patiuntur. Quoties homines Deo dicatos conspiciunt æquæ ac sæculi cultores, vitiis effluentes, & luxuriâ sceDOS, & mammonæ potius quàm Dei laudibus addictos: tum mirantur, ac horrent, atque ex intimis præcordiis dolent, ac indignantur suorum temporum conditionem. Si Episcopos, si Sacerdotes deprehendunt sanguini diligentius, quàm altari servientes, & ambitione turgidos, & factis in suam rem abutentes, & Simonis veneno afflatos: quid non mullitant? quid non conqueruntur? Priora Ecclesiæ sæcula ante eorum oculos, atque in eorum labiis continuo recurrunt. De Religione primæva multum excidisse tum dicunt. Imò in pietate nonnumquam frigescere idcirco illos videas; sensim quippe decrescit in eorum animis veneratio atque existimatio non tantum Sacerdotalis ac Monastici Ordinis, sed Religionis ipsius. Eò etiam quandoq; se rapi sinunt, ut persuadere sibi nequeant, aut veram, aut sanctissimam esse Religionem illam, quam adeò nefariis moribus negare, & flocci pendere videntur illi, quorum præ cæteris esset eam & dictis probare & factis. Quòd si apud Hæreticorum quosdam splendidiorem fortè pietatis, aliarumq; virtutum speciem intuentur: tum suspicio aboritur, ne apud illos germana; apud nos vitiata Religio habeatur. Et quidnam, quæso, tot populos à Catholicæ Ecclesiæ sinu proximè præteritis sæculis abstraxit, & in Lutheri, aut Calvinii castra conjecit? Ignorantia ista, zelus iste ineruditus, & scandalii patiendi nimia facultas. Non erant (fatendum est) ii Sacerdotum mores, quos & Religio, & institutum vitæ poscebant. Superstitio aliqua in populis; avaritia & luxuria in non paucis Ecclesiasticis viris, nimium prominebant, ut occultari, aut dissimulari jam possent. Igitur ubi adversus ista declamatum est, zelo Dei exarsit ineruditus populus, sibi que censuit ab ea Ecclesia discedendum, cujus sanctitatem frustra requirebat in plerisque Pastoribus.

At miseri infelicitissimè errarunt. A Pastoribus fugientes, quos lupos credebant, secuti sunt lupos Pastorem præferentes personam. Etenim undenam didicerunt, propter perversos Sacerdotum mores ab Ecclesia Dei veri secessionem



nem esse faciendam? Contendebant quidem eorum temporum Pseudo-prophetæ, Romanæ quoque Ecclesiæ doctrinam esse corruptam. Verum quî de tanti momenti re, de qua etiamnum disputatur utrinque à doctissimis & clarissimis ingeniis, tam citò judicare potuerunt homines indocti, rudes, & à studiis Theologiæ prorsus alieni? Morum corruptio tunc patentissima, & disciplinæ abusus, vel oculis plebis indoctæ conspicui, in causa fuerunt, ut doctrinam quoque Romanæ Ecclesiæ corruptam somniarent, & crederent. Ergo cavendum iis erat, ne scandala tantum in suis cordibus possent, ut non mores dumtaxat, sed etiam malè moratos Pastores, ipsamque Pastorum Ecclesiam, atque Religionem, deferendam arbitrarentur. Id non cavendum minùs deinceps; erunt enim vitia, donec homines; & ut prædixerit Christus futuram hanc morum corruptionem, attamen edixit, non esse nostrum, bonos pisces à malis separare, atque à tritico paleas. Ad ista sanè nequit quin ingemiscat vir pius ac eruditus; sed nullum inde sibi scandalum creari patitur. Scandala quippe creat facinorum novitas, hanc autem scientia, siue eruditio tollere potest ac solet, Apostolorum tempora intueri; tria, imò quatuor, & quinque priora Ecclesiæ sæcula contemplare. Nunc imperita gens à Christianis iis, & præsertim ab Ecclesiæ Pastoribus, omnem iniquitatem exulasse sibi persuadet. Secus testantur ipsæ Literæ sacræ, ipsi sancti Patres, ac præcipuè Cyprianus, Nazianzenus, Hieronymus, Salvianus. Subsecuta sunt tempora longè pejora prioribus, sed meliora tandem evasere, ut si Christiana Respublica ætatis nostræ cum multis aliis præcedentibus sæculis conferatur, habeat unde sibi jure gratuletur, & divinæ misericordiæ referat gratias.

Zelum interuditum alterum illud incommodum ferè semper consequitur, de quo aliàs conquesti sumus, & quod hic repetere non puto supervacaneum; nimia videlicet formido, ne quicumque minùs cum vulgo sapit, ac aliter loquitur quàm vulgus, Religioni & Ecclesiæ sanctissimæ exitium creet. Nequit emunctæ naris eruditus, quin abusus in Ecclesiasticam disciplinam identidem irrepentes animadvertat; quomodo enim maculæ istæ se subducant oculis legentium monumenta summorum Pontificum, Conciliorum, & Patrum? Ars critica, necessarium in Ecclesia Dei flagellum ad imposturam omnem, errorésque tollendos, erudito homini interdum aperit, quæ sint conficta miracula, qui apocryphi ac supposititii Libri, quidve à magni etiam nomi-

nominis scriptoribus in Historia & eruditione Ecclesiastica peccetur. Si quis tamen zelo secundum scientiam incitatus, quod Majores nostri cum laude fecerunt, facere & ipse velit, hoc est, aut voce aut scriptis hujusmodi abusus ac peccata prodat, ac eliminare nitatur, non modestiam, non prudentiam oblitus: ignara gens non raro exhorrescit, & ejusmodi eruditos suspitione gravat non temeritatis solium, sed etiam languentis pietatis, fideique etiam titubantis. Verum hisce eruditis, ut cordi summo opere esse debet, scandalis quantum fieri potest, occasionem omnem præripere, ita patienter ferenda sunt talia piæ ignorantie deliria Nullæ sunt, tametsi optimæ leges, nulla auctoritas legitima, quibus abuti non possit, ac soleat Magistratum incuria, ignorantia, impotentia. Sed non propterea optimæ leges abrogandæ, optima instituta vituperanda, quod iis abutantur nonnulli. Adversus hosce abusus, modeste tamen, ac prudenter, scribere piis eruditis licet, ut simul eorum odium, & Legum ac Magistratum reverentia inspiretur. Quod cum faciunt eruditi, iis esse debet satis, meliorem hominum partem, si non majorem, suis habere faventem scriptis, zeloque plaudentem. Nimum quippe Ecclesiæ conducit tales literatos habere, superstitionis, perversæ disciplinæ, piorumque commentorum inimicos, & veritatis semper amantes. Hæc vera pietas est, hic germanus zelus, quem Catholici Episcopi in Conciliis ubique produnt, quem Patres commendant, & carum habet in primis Apostolica Sedes. Quæ consideratio mihi quoque animos addidit, ut quæ hætenus disserui, dissimulanda non censerem, & spem fecit fore ut nemini saltem ex melioribus consilium meum displiceret, quando non ambitio, non captandæ famæ, aut maledicendi pruritus ullus, non Pastorum, Legumque rectissimarum contemptus, neque mei ipsius, sed unius Ecclesiæ, Religionisque Catholicæ amor, pro qua omnibus vigilandum esse puto, & ego lubentissime sanguinem darem, mihi ut hæc scriberem, auctor fuit, utinam alicui utilia, utinam nemini perniciofa.

Nemini, inquam, perniciofa; nam in oppositum huic excessum atque abusum equidem sentio homines labi posse, atque interdum labi, vel cum in ipsius Catholicæ Ecclesiæ sinu degunt. Est autem alter excessus licentia opinionum tum in fidei ac disciplinæ negotio, tum in Ecclesiastica eruditione pertractanda. Facile intelligunt homines non rudi minervæ, nimios interdum ac intolerabiles fros

nos adhiberi ingeniis, vitio videlicet Magistratuum, sua potestate, optimisque legibus abutentium. Sed æque deinde non intelligunt, qui sint legitimi freni, omnibus Christianis jure ferendi, & quousque procedere merito ac prudenter possit ingeniorum libertas. Hinc ergo totius Antiquitatis, sanctorumque Patrum, & Ecclesiæ ipsius contemptus, hinc errores, ac temerariæ opiniones; sique in iis obfirmetur animus, hinc Schismata, ac Hæreses, à quibus tamen ut semper caveamus, non sollicitè solum movit Apostolus, sed caritas, justitia, ac prudentia apertissime præcipiunt. Hos autem ingeniorum frenos itidem videor mihi satis expressisse in hoc Libro. Quare nunc rogo Lectores meos, ut non minus diligenter perspiciant, quid juris ac libertatis futurum sit ingeniis humanis in tanti momenti rebus, quam quid freni. Utrinque veritati nocere possumus, vel nimium, vel nimis parum nobis tribuendo. Quod doctiores erimus, magis que in Dogmatica, ac Polemica Theologia, atque in eruditione antiqua versati, edocutiùs ac moderatiùs in Rudiis ac opinionibus nostris procedemus. Ignorantia hinc, inde superbia, superstitiones pariter ac temerarios faciunt. Mediæ stant scientia, ac humilitas Christiana. Faciunt istæ eruditos, atque Theologos, verè perfectos ac religiosos. Illud autem certum est, nos nunquam ex temeritate erraturos, si magis, quam nos ipsos, famamque nostram, diligamus decorem domus Dei, hoc est, amemus Ecclesiam Catholicam, ejusque tutelæ ac laudi ubique studeamus, ejusque judicio omnia nostra cum dicta tum facta obsequentissimè subjiciamus, ejusque Præsidibus sacris ad ubique obtemperandum paratissimi simus. Hoc votum est mihi, hoc mihi statutum. Similia à reliquis opto. Quis enim tandem fructus literarum, si destruas, non ædifices? Equidem errare possum ex ingenii infirmitate, non possum ex obsequii ac voluntatis defectu.

Non verò longiori sermone persequar, quid in his possit audere humanæ mentis ambitio, atque ingeniorum licentia: instar omnium considerandum mihi elegi unum Joannem Phereponum, cujus Animadversiones in Opera sancti Augustini, si non perpetuum, at certè non leve præbent hujus infelicitatis argumentum atque exemplum. Et hominis quidem consilium ego non miror, cum potius mirandum esse debeat, cur non omnes ab Apostolicæ Sedis, Catholicæque Fidei doctrina & communione alieni, paria, imò pejora non audeant. Nam ubi Ecclesiam audire

deseris, Conciliorumq; ac Patrum excusseris obsequium, tuoque iudicio nullum aliud esse superius tibi persuadeas præter verbum Dei scriptum, quod uti experientia fidem facit, unusquisque ad arbitrium, captumque tuum facile contorquere novit: quid te amplius impedire potest, quominus quodcumque lubet, quodcumque menti tuæ verisimile occurrit, amplectare ac teneas, & contraria quæque despicias atque repudies? Phereponus autem ita se interdum contra Augustinum, immo contra omnium Catholicorum sententias, gerit, ut qui ejus principiis utatur, atque licentiam opinandi imitetur, mirum sit, qui abstinere se jam possit ab oppugnandis in posterum vel ipsis Literis sacris, sive à revocandis in dubium reliquis Christianæ Fidei Mysteriis. Nam quod non prouat relictus sibi hominum literatorum animus, & potissimum si Criticâ Arte Linguarumque Orientalium peritiâ sit quisquam turgidus, & immoderate ad dubitandum de rebus quibuscumque pronus, & novitatis, suarumque opinionum pertinacissimus amator? Pertinet igitur tum ad publicam utilitatem, tum ad Ecclesiæ sanctæ, & Augustini defensionem, tum etiam ad eruditorum documentum, intueri in Phereponi Animadversionibus nimiam ingenii humani libertatem. Et ejus quidem sententias nonnullas, prout occasio tulit, hætenus confutavimus. Reliquas deinceps, quæ confutatione indigere videantur, singillatim recensebimus, & pro virili profligare nitemur.





D E  
INGENIORUM  
MODERATIONE  
IN RELIGIONIS  
NEGOTIO.  
LIBER TERTIUS.

---

CAPUT I.

*Quid de Peccato Originali sentiant Remonstrantes ac Sociniani. Nulla injustitia Deo tribuitur per Catholicorum sententiam de Originali Peccato. Cum potuerit Deus ab initio condere naturam hominis talem, qualis nunc nascitur, potuit etiam ex Adami Peccato sinere mala in hominum genus effluere. Auctoritate sacrarum Literarum confirmatur Dogma de Originali Peccato. Apostoli locus ab interpretatione Phereponi vindicatus.*



**I**NITIUM facimus à controversia de Peccato originali, è qua, velut è capite cujusdam cætenæ, pendent reliquæ ferè omnes controversiæ de Gratia & libero Arbitrio, & de Natura innocenti, lapsâ & reparatâ, quæ inter Pelagianos ac Semipelagianos ex una parte, Lutheranos & Calvinianos ex altera versantur, Catholicis medium iter tenentibus. Hic autem videas Arminianos, sive Remonstrantes, parum à Pelagio abludere, Socinianos cum eodem prorsus sapere, imò duriora, quam

ipsum tradidisse. *Peccato originali inesse privationem Justitiæ originalis, & inordinatam ad peccandum proclivitatem*, fatetur Joannes Arnoldus Corvinus, hoc est ex Remonstrantibus unus, in Lib. contra Molin. c. 8. pag. 118. Idem Remonstrantes in Apologia sua c. 7. fol. 84. addunt: *Peccatum Adami à Deo imputatum dici posse posteris ejus, quatenus Deus posteros Adami eidem malo, cui Adamus per peccatum obnoxium se reddidit, obnoxios nasci voluit, &c.* At postea subdunt, se peccatum originale nec habere pro peccato propriè dicto, quod posteros Adami odio Dei dignos faciat; nec pro malo, quod per modum propriè dictæ pœnæ ab Adamo in posteros dimanet. Quare peccatum hoc affirmare non audent malum culpæ, aut malum pœnæ. Socinus verò in Prælection. Theol. c. 4. & in Dialog. de Justific. tanquam fabulam Judaicam, & ab Antichristo in Ecclesiam introductam. Peccatum originis irridet, cui consonat Smalzius una cum reliquis ejusdem Socini affeclis, ita ut una eorum sententia esse videatur, nihil nisi exemplo posteris nocuisse Adamum peccantem. Arminiumne, an Socinum hic sequatur Phereponus, statuerè nescio. Illud certum, ut in aliis opinionibus non paucis, ita in hac Pelagio adhærere Phereponum, & non Augustino tantum, sed Ecclesiæ Catholicæ ipsum patentissimè adversari. Mihi verò certissimum est, idemque spero & Lectoribus æquis futurum, longissimè ipsum à veritate recessisse.

Catholicorum doctrinam de peccato originali oppugnabat Julianus, quasi per ipsam infinita Dei justitia læderetur. Qui etiam justus Deus parentis primi culpam imputare velit posteris, eamque in nobis punire, cum tamen consensu voluntatis nostræ nihil ad ipsam contulerimus? Augustini autem Lib. I. num. 3. Oper. Imperfect. contra Julianum ita scribebat: *Vos quod dicitis; potius non pot. st ullà justitiâ ratione defendi, quia miseria generis humani; à qua nullum hominum ab exortu usque ad obitum videmus alienum, non pertinet ad Omnipotentis justum judicium. si non est originale peccatum.* Igitur S. Doctor putabat, divinam justitiam defendi non posse, nisi humanæ corruptionis ac miseriæ causam ab ipso hominum peccato originali peteremus: quod & alibi sæpè repetit. Ad hæc Phereponus: *Atqui hoc tantum de infantibus aut puerilis dicere debuit; nam maiores natu sat actualium peccatorum admittunt, ut hujus vita miseriis digni sint. Sed ponamus eum, ut debuit, de infantibus duntaxat, aut puerulis locutum. Peccatum originale, ut ab Augustino explicatur, commodam nullam rationem defendendæ Justitiæ divinæ suppeditat, cum qua nullo modo potest consistere, ut existimabam adversari Augustini, quod nusquam rectè*

*rectè confutavit.* En expeditam viam cujuscumque quæstionis dirimendæ, quanquam difficillimæ, & inter ingenia præstantissima dudum agitæ. Satis est pronuntiare sententiam dictatoriâ voce. Alii rationes excogitabunt, & argumenta contraria dissolvent.

Sed ut pressius scriptori huic respondeamus, prius Lectori sedulo ad memoriam revocanda sunt quædam. Nemo est, qui vel in semetipso non sentiat innumera cum animi, tum corporis mala, eaque omnibus communia non videat, tamque altis radicibus in nobis fixa, & ab ipsa statim nativitate pullulantia, ut ea homini ingenita fateri cogamur. Corpus, inquam, mille ærumnis, doloribus, morbis, ac periculis, & morti denique obnoxium est. Animum ignorantia infelicissimâ gravat, ac fœdat. Proni, & penè abrepti vel ab ipsa pueritia in vitium, difficillimi & supra modum inertes ad virtutem, terram semper cogitamus, rarò cælum; & avaritiâ, luxuriâ, ac ambitione exæstuentes, voluptatibus unice studemus, commodisque nostris, licet inhonestis, pejora longè acturi, nisi nos humanarum potius quàm divinarum legum terror compesceret. Hæc vel ipsi Christiani, & Sancti in se experiuntur, qui & aliam legem sentiunt in membris suis repugnantem, legi mentis suæ, qui quotidie cum tentationibus conflictantur, & sæpè concupiscentia vincente vincuntur. Quanto autem magis tanta humani generis miseria, & ad peccandum proclivitas, & rebellio appetituum, ac pugna in rationem, emineat, & conspiciatur in barbaris, aut sine Lege, aut sine vera Christi Lege, & Gratia viventibus, in comperto est. Non vacat hîc varios populorum mores, & innumeranda hominum vitia, & incommoda, oratione percurrere. Unusquisque sibi testis in re tam patenti esse potest. Illud dicam, vel ipsos Ethnicos, Aristotelem puta, ac Ciceronem, tantam hominum miseriam contemplantés, non potuisse quin exclamarent, naturam, non ut matrem, sed ut novercam, erga nos se gessisse. Hæc tibi considerata fuerint, è vestigio suboritur in animis nostris sciendi ardor, unde tanta in nos malorum atque miseriæ procilla derivetur. Cum quisque sanus Manichæorû deliria irridiat, restat ut hominem vel ita à Deo in prima institutione creatum, vel propter culpam aliquam suam in tot incidisse misérias affirmemus. Prima sententia Pelagianos habuit Patronos; altera Catholicos.

Pelagiani contendebant, quod & nunc eorum assecla Phereponus contendit, Catholicorum sententiam cum Justitia Dei consentire non posse. Contrà Augustino aliisque

Catholicis visa est Pelagiana opinio Idæ, quam de Deo habemus, penitus contraria. Nam quo pacto Deus, qui hominem perfectum, rectum, ac felicem creare potuit, potius tam infirmum, vitiisque deditum, & alienum ab amore summi boni creare voluit? Quis opus manuum suarum vel ante peccata actualia miserum fecit, ejusque naturam in ipsa peccata aded proclivem, & averfam à virtute creavit? Cur posuit, ut habetur Ecclesiastici 40. *Jugum grave super filios Adam à die exitus de ventre matris eorum?* Immensè bonus, Sapiens, & Benignus, id sine aliqua hominum culpa facere noluit; infinite Justus id facere non potuit. Hæc illi. Verùm alii Theologi Catholici, iique potiori jure affirmarunt, ac affirmant, *potuisse Deum condere talem ab initio hominem, qualis nunc nascitur.* Ipsemet Sanctus Augustinus in hac eadem sententia fuit; nam Lib. 3. de Lib. Arb. Cap. 20. agebat: *Si anima talis esse cepit, non solum ante peccatum, sed ante omnem vitam suam, qualis alia post vitam culpabilem facta est; non parvum bonum habet, unde Conditori suo gratias agat.* Leger reliquâ idem Augustinus in Lib. 1. Cap. 9. Retract. eandem sententiam confirmat, inquiens: *Ignorantia & difficultas ( duo nempe hominum gravissima mala ) etiam si essent hominis primordia naturalia, nec sit culpandus Deus, sed laudandus esset.* Quæ retractationum verba iterum repetit in Lib. de Bono Persever. Cap. XI.

Quod si iustus & laudandus esset Deus, si talem, qualis nunc est, hominum naturam creâisset, sique Phereponus, ut arbitror, idem fatetur, imò contendit: quid est quod ipse, ejusque Majores Pelagiani, Justitiam divinam Catholicorum opinione dictitant lædi, & cogitatione assequi non posse videntur, quomodo Augustini hypothesis, imò thesis, consistere queat cum ejusdem divinæ Justitiæ evidentissimâ notione? Iisdem testantibus, divinæ Bonitati atque Justitiæ contrarium non est, naturam nostram ab initio tot subjecisse ærumnis, cum tanta proclivitate ad malum, tantæque difficultate ad bonum, tamen si nulla hominum culpa præcesserit. Ergo multò minùs divinæ Justitiæ repugnat tot in nos mala congerere unius peccati præcedentis intuitu. Justus ergo, & bonus, & laudandus in utraque hypothesis Deus. Hæc sola intercedit diversitas: quidquid Pelagiani adferre possunt pro tuenda Justitia ac Bonitate divina in hypothesis sua, illud ad eandem tuendam in Pypothesi Catholicorum inservit. Quidquid verò Catholici pro sua habent, non æquè à Pelagianis pro sua

opi-



opinionem usurpari potest, facilius enim Catholici Justitiam ac Bonitatem Dei sartam nobis testamque exhibent, tot humanæ naturæ miseriis non à primæva institutione ac voluntate Dei boni, sed à primorum parentum culpa derivatis, quàm si talem, qualis nunc est, naturam ab initio creatam affirmant. Et hoc fideri, sagacesque viri non intelligere nequeunt.

Restat ergo inquirendum, num reverà humanam naturam Deus tam imbecilem ac miseram ab initio condiderit, quod Pelagiani opinantur; an ejusdem naturæ corruptio pœna sit primi peccati, quod Catholici affirmant. Ut habetur Ecclesiast 7. *Fecit Deus ab initio hominem rectum, & ad imaginem suam creavit, & in eximia beatitudine collocavit.* Deinde, quidquid nonnulli somniant, adeò perspicua sunt Genesis verba Cap. 2. ut certissimum esse debeat, primos humani generis parentes, si divino præcepto parere voluissent (quo nihil facilius ipsis tum fuit) à naturali morte futuros fuisse immunes. Uti certum quoque est, peccarunt, eorumque inobedientiam secuta est mortis naturalis inevitabilis pœna, & quærendi panis cum sudore necessitas, & partus foeminei dolores, & rebellio belluarum, quas hominum nutui subjecerat primum Creator, ut alia mala atque incommoda omittam. Experientia verò dubitare nos non finit, quin eadem mors, & multiplex calamitatum genus in nobis eorum posteris perduret. Ergo nos luimus primi peccati pœnas, luuntque vel ipsi infantes, quanquam nullius peccati actualis rei. Ergo primorum parentum culpa iratum & nos Deum sentimus, & peccasse cum Adamo quodammodo dicendi sumus; à qua ira & culpa nos liberare non potest, nisi regenerationis Sacramentum, & Gratia Christi Servatoris. Propterea Regius Psalter in Ps. 50. agebat: *Ecce in iniquitatibus conceptus sum, & in peccatis concepit me mater mea; sive in iniquitate, & in peccato, uti Hebraica Exemplaria habent.* Apostolus verò ad Ephes. 2. *Eramus, inquit, & nos natura filii iræ, sicut & ceteri. καὶ ἡμεῖς τέκνα φύσει ὀργῆς* Et ad Rom. 3. *Omnes peccaverunt, & egent gloriâ Dei.* Etiam Sanctus Joannes Cap. 3. Evang. *Qui, ait, non credit in Filium, ira Dei manet super eum, μένει ἡ ὀργὴ τοῦ Θεοῦ;* ubi vides non dici iram Dei venire super eum, sed manere super eum, qui jam antea fuerat. Ut alia Scripturarum loca prætermittam, quæ in hanc rem afferri solent, memorabilem istum instar omnium referam, quem Apostolus ad Rom. Cap. V. 12. habet. *Propterea, inquit, sicut per*

*per unum hominem peccatum in hunc mundum intravit, & per peccatum mors, & ita in omnes homines mors pertransiit, in quo omnes peccaverunt.* Quibus ex verbis intelligimus, cum Adamo omnes homines peccasse, & propter illum peccatum mortem in omnes homines pertransire, hoc est, communis mortis causam fuisse unius hominis, sive unius Adami peccatum. Infra idem Apostolus ait: *Sicut per inobedientiam unius hominis peccatores constituti sunt multi, ita per unius obedientiam iusti constituentur multi.* En Adami inobedientia, quæ una multos constituit peccatores, uti multos iustos obedientia Christi. Vide reliqua ejusdem Cap. V. ad Rom. quæ Catholicorum sententiam disertissime produunt, ac firmant, & sine ipsa rectè explicari non possunt. Tandem accedit, vel antequam Pelagiana Hæresis exoriretur, & lis de Peccato originali ferveret, veteres Patres non aliter quàm Augustinum sensisse, quanquam parè admodum de illa re fuerint locuti. Egregia in hanc rem occurrunt testimonia Justini Martyris, Irenæi, Tertulliani, Origenis, Cypriani, Athanasii, Hilarii, Basilii, Ambrosii, Nazianzeni, Chrysostomi, Reticii, Olympii, & aliorum, quos prætereo, ut dubitari non possit, quin antiquissima hæc sit Ecclesiæ veræ Traditio, cum divinis Scripturis omninò consentiens. Nunc videamus, an quidquam Phereponus proferat, quo tam antiquum, tantæque firmitate constitutum dogma deici possit.

Dixerat Augustinus Lib. de Corrept. & Gratia Cap. 6. *Peccata quidem ista originalia idèò dicuntur aliena, quòd ea singuli de parentibus trahunt, sed non sine causa dicuntur & nostra, quia in illo uno omnes sicut dixit Apostolus, peccaverunt.* Excipit ista verba Phereponus animadversione hujusmodi. *Verum in hac controversia nostra dicuntur, non tralatitio sensu, sed proprio, peccata; nam sermo hic est de peccatis, propter quæ non tralatitias, sed propriè dictas pœnas, ex divina, hoc est, perfectissima Justitia, dare possumus: quia ab iis abstinere potuimus, nec iis, nisi culpâ nostrâ propriè dictâ, succubuimus.* Cæterùm dicere pergit Phereponus, peccata parentum nostra dici non posse, ita ut propterea corripì, & plecti jure queamus. Addit, neque Apostolum dicere, nos in Adamo peccasse, quemadmodum passim Græci sermonis imperitus dicitur Augustinus. Quod ut palam fiat, Apostoli verba Rom. V. 12. *ἐφ' ᾧ πάντες ἥμαρτον*, quæ vulgatus Interpretes vertit, in quo omnes peccaverunt, Phereponus ipse vertit, quia omnes peccarunt. Cujus versionis rationem hanc reddit,

reddit, inquit, *Vertimus cum Desiderio Erasmo* ἐφ' ᾧ. *Quia, non in quo, quia alioquin hiulca est ratio, & dura.* Equidem, ut hinc iter instituamus, expectabam ab homine Critico aut veterum Græcorum auctoritatem, aut rationes ex intima Linguæ Græcæ peritiâ petitas, quibus hæc sua Paulini loci Interpretatio confirmaretur. Sed ille unum nobis obtrudit Erasmus, virum certè in Græco sermone minimè hospitem, sed in quæstione de *Peccato Originali* planè Pelagianum, quique nihil non molitus est, ut in alium sensum hæc, & superiora Apostoli verba invita detorqueret. Erasmi studium hac in re infelicissimū alii castigarunt. Verūm quis stylum Pauli vel leviter novit, qui non etiam didicerit. similes sermonis structuras, duras in speciem, & parum (uti delicatis videtur) elegantes, Apostolo esse familiares. Deinde Theophylactus, Oecumenius, & alii procul dubio Græcæ Linguæ peritissimi, ἐφ' ᾧ interpretantur *in quo Adamo*. Quamobrem nisi qui ab anticipatis iudiciis, turbidisque affectibus iudicio uti prohibetur, nemo alius hoc in loco memorasset *imperitiā Græci sermonis*, eamque objecisset Augustino, verba ista cum Græcorum ipsorum consensu *in quo* interpretanti.

Quod tamen hîc attentius considerandum est, illud est, vel per ipsam Erasmi ac Phereponi interpretationem nihil roboris dempi huic loco, sive huic fortissimo Catholicorum & Augustini argumento. Pingamus Apostolum dicere: *sic & in omnes homines mors transiit, quia omnes peccarunt*. Non hîc de solis peccatis actualibus loqui Paulus potest, uti Phereponus persuadere nobis vellet; nam cū dicat, morti omnes homines esse obnoxios, & reapse mori hac de causa, quod omnes peccarint, certūque sit, infantes nullius actualis peccati reos sæpè de vita decedere: necesse est, ut aliquod peccatum sit vel in ipsis infantibus, cujus causā malum illud subeant. Hoc autem nullum aliud esse potest, quàm primorum parentum inobedientiâ & culpa, propagata in posteros omnes, per quam peccatores constituti sunt, vel infantes, & regnavit mors ab Adam usque ad Moysen. etiam in eos qui non peccaverunt in similitudinem prævaricationis Adæ; quippe unius delictum in omnes homines in condemnationem. Nisi hoc statuas, sibi non constabit Apostolus, qui cū alibi appellat *stipendium peccati Mortem*, tum hîc significare vult, idèd omnes homines mori, quia omnes peccarunt; quare si nullum in infantibus peccatum admittamus, aut ipsi morituri non essent, aut argumentum Apostoli elumbeprehenderetur. Sed Phereponus non au-

aufus affirmare præfractè, germanam esse interpretationem suam, ad aliam anchoram se coniecit. *Fac, inquit, hoc non esse perspicuum: profectò versio, quam sequitur Augustinus, non ità certa est, ut possit is locus, quasi clarus urgeri; cum præsertim ex eo fermè solo, aut potissimo, colligatur dogma, quod tot difficultatibus premitur, ut vix ullas alias maiores in dogmate Theologico invenire posse putem.* Phereponus ergo mente assequi non valet, quì Deus justissimus peccata parentum filiis tribuat, & in filiis puniat, cum filiorum voluntas nihil contulerit ad parentum inobedientiam; proinde altè clamat: *peccata parentum nostra dici nequeunt, ità ut propter ea corripi, & plecti jure queamus.* At nil mirum ista ab homine dici, cui non secùs ac Socinianis, illud continuò per versum videtur, quod ingenio non placet, quanquam disertissimis, neque Metaphoricis verbis in Scriptura sacra enuntietur. Prope est, ut dicam, nolle hujusmodi homines sentire, quod Paulus sentit; sed necesse esse ut Paulus sentiat, quod ipsis commodum videtur, & Deus agat, prout ipsis lubet. At profectò feliciùs saperent, si in simili causa dictum sibi ab Apostolo putarent Rom. IX. 20. *O homo, tu quis es, qui respondeas Deo? Numquid dicit figmentum ei, qui se finxit: Quid me fecisti sic?* &c. Et Cap. XI. 33. *O altitudo divitiarum, &c.* Cùm lumini rectæ rationis evidenter adversari deprehenduntur Scripturæ sacræ verba, tum certè commodum aliud sensum intimè latentem inde jubemur deducere. At quando ità composita sunt sacrarum Literarum testimonia, ut pateat, nihil aliud divinos Scriptores significare voluisse, quàm quod verba sonant, & ad istam significationem accedit vetustissimæ Traditionis consensus, & dogma illud supra quidem humanam rationem est, sed non contra ipsam; tum nefas est eludere mentem divinorum Librorum non alia de causa, quàm quod mente assequi non possumus consilia, & voluntatem, & opera Dei.

Cæterùm ut fateamur in quæstione de Peccato originali occurrere quædam non satis pervia hominum infirmæ rationi, nihil tamen est, quod contra ipsam rationem pugnet. Cùm enim peccatum istud consistat in privatione justitiæ originalis, à justo Deo nequaquam abhorret, originali justitiâ privatos homines nunc nasci causâ primi peccati, quando justus itidem fuisset Deus, si vel ab initio, & ante Adami peccatum, eandem nobis justiciam denegasset, eandemque & animi, & rationis, & corporis infirmitatem in nobis regnare siveisset. Et omnium hominum

num reverà peccatum istud est, non actuale quidem, sed habituale, sive morale; nam voluntas omnium hominum, non physice quidem, sed moraliter, conjunctæ fuere cum voluntate primi parentis, idque ex decreto & pacto Creatoris nostri: quod profectò neque potentia, neque sapientia, neque Justitiæ Dei repugnat, nam ne in ipsi quidem terrenis universitatibus hujus rei exempla desunt, & in ipsis tamen Justitiâ minimè desideramus, uti neque in divino Circumcisionis præcepto Gen. 17. non inveniet, ut putò, Phereponus ipse. Apostolus autem disertè docet, *in omnes homines per unius delictum condemnationem venisse, & omnes peccasse, & per inobedientiam unius hominis peccatores constitutos fuisse multos, & mortem esse effectum, stipendium, & aculeum peccati: quæ omnia satis evincunt, ubi ad infantes interdum morientes respiciamus, peccatum aliquod originale per propagationem ex Adamo in omnes descendere, & nostrum omnium esse appellandum. Tandem peccatum istud in ratione culpæ omnium levissimum est; neque necesse est credere, ipsum post corporis mortem pari cum actualibus peccatis supplicio esse puniendum; nam & ipse Augustinus Lib. 1. de Peccator. merit. Cap. 16. §. 21. ait: Potest proinde rectè dici, parvulos sine Baptismo de corpore exeuntes in damnatione omnium iustissima futuros. Et lib. 5, Cap. 11. §. 44. contra Julianum, parvulos, ait, sine Christi Baptismate morientes, non tantâ pœna esse plectendos, ut eis non nasci potius expediret, ipsosque in damnatione omnium levissima futuros.*

## CAPUT II.

*Infantes miseri causâ unius Adami peccantis. Baptismus eis necessarius ex Traditione probatur. Antiquitas Sponsorum pro infantibus in Baptismo contra Phereponum ostenditur auctoritate Tertulliani, qui necessitatem Padobaptismi agnovit. Et in veteri Lege parvulis Profelytis adhibitus Baptismus, & varia apud Judæos Baptismatum genera. S. Cyprianus Peccati Originalis assertor perperam à Pherepono negatus.*

**P**HEREPONUS tamen, quod est ad infantes, & pueros, aliâ opinione tenetur. Nam pag. 621. Animadvers. in Op.

in Op. Imperf. contra Jul. objicit sibi illorum miseras, quæ nobis argumentum præbent intelligendi originalis Peccati. Tum responderet: *Satiùs esset multò dicere, te nescire, cur innoxii miseri sint, quàm ut facias eos noxios, invenire hypotheseim, quæ tot difficultatibus laborat. Quasi Augustinus, aut alij hanc hypotheseim invenerint, & eam antea non tradiderint Apostolus satis apertè. Multò satiùs esset, ut hoc repetam, Apostolo credere, & venerari divinum consilium, quàm in hrmæ rationi tantùm deferre, ut divinitùs tradita nolis alia de causa credere, quàm quod intelligere nescias. Sed quid sunt, pergit Phereponus, hæ infantium puerorumque brevissima miseria, sicum æterna beatitudine, quibus eas Deus pensat, conferantur? Nihil prorsus, aut si quid nihilo posset esse minus. Itaque quod Deus eas ab illis in hac vita non amolitur, mirum videri nequit.* Hinc intelligimus, Phereponum infantibus ac pueris vel sine sacramento regenerationis è vita decedentibus, æternam in Cœlis beatitudinem liberaliter concedere. Non ausi sunt Pelagiani; nisi medium quemdam locum inter cœlorum regnum, & gehennam, assignare hujusmodi puerulis, felicem quidem, sed tamen ab æterna cœlitum felicitate alienissimum. Sociniani patere ipsis fores Cœli volunt, & execrantur *Pædobaptismum*. Ministrari verò eisdem hoc Sacramentum in suis cœtibus molestè non ferunt Remonstrantes; sed ipsum sacramentum necessarium illis ad deatitudinem æternam non censent. Anabaptistæ, Calvinistæ, aliique id genus Novatores ab ea opinione aut parum, aut nihil abludunt. At ego non suscepi controversias omnes, quæ inter Catholicos ex una & innumeros Hæreticos ex altera parte intercedunt, diffusè agitandas. Esset hoc majoris otij, ac instituti diversi. Jam verò, quod est ad quæstionem de Baptismi necessitate in ipsis parvulis, luculentissimè illam complures è nostris expedivere, afferentes loca quædam Scripturarum, & certissima quædam principia Orthodoxæ Religionis è quibus rectè deduci potest illa necessitas. Antiquissimam certè, atque aded Apostolicam Traditionem, *Pædobaptismi* testem simul ac laudatricem habemus. Quare secundùm Traditionis legitimæ regulas, à Catholicis fortissime assertas. pueris ac infantibus necessarium est divinum lavacrum, ut Regnum cœlorum, si illà ætate decedant, consequi valeant.

Cùm tamen Phereponus pag. 495. in notis ad Epistolam Augustini XCVII. olim 129. §. 9. videatur aliquid dicere contra *Pædobaptismi* antiquitatem, ejus verba audienda sunt

*Quis.*

Quis, ait, intelligat susceptorem infantis baptizandi. quoniam pro infante responderet Credo, hoc velle: Baptismum, vel Sacramentum fidei suscipio? Quis non videt, primum formulam illam antiquam Baptismi esse institutam in usum adultorum, qui soli primum Baptismum suscipiebant, deinde translatam etiam ad infantes? Utique nos nequaquam videmus, quod tamen tantâ confidentiâ Phereponus videndum affirmat. Meram conjecturam, omni veterum auctoritate destitutam; nescio qui velit homo ille, ut pro evidenti veritate accipiamus. Nos ab Apostolis ipsis, ut infantium Baptismum, ita & ritum spondendi pro iis derivamus, tum quod id affirmant vetustissimi Patrum, tum etiam quod Ecclesia universa omnibus retrò temporibus eam consuetudinem servavit. Quid contrâ Phereponus affert, nisi unum illud, quod animum jam præjudicavit; & quod spontè concidat, si negetur? Operæ autem pretium est duorum veterum Scriptorum loca proferre, ne & nos sine tabulis ac auctoritate agere videamur. Sanctus Irenæus Lib. 2. Cap. 39. de Christo Domino hæc habet: *Omnes veniunt per seipsum salvare, omnes, inquam, qui per eum renascuntur in Deum, infantes, & parvulos, & pueros, & juvenes, & seniores.* Hic vides alludere Irenæum ad Servatoris verba Joan. III. 5. *Nisi quis renatus fuerit ex aqua & Spiritu Sancto, non potest introire in Regnum cælorum.* Vides, infantes, & parvulos per Christum renasci ex aqua, & Spiritu Sancto. Quod autem est ad infantium & puerorum Susceptores, audi Tertullianum in Lib. de Baptismo Cap. 18. suadentem, ut differatur in ætatem maturiorem Baptismus. Itaque, ait, pro cuiusque personæ conditione, ac dispositione, etiam ætate, curatio Baptismi utilis est: præcipue tamen circa parvulos. Quid enim necesse est Sponsores etiam periculo ingeri? Quia & ipsi per mortalitatem destituere promissiones suas possunt, & proventu mala in dolis falli. Ergo Tertulliani etiam ævo obtinuisse, ac in usu fuisse patet, non infantium dumtaxat Baptismum. sed & formulam ab eorum susceptoribus nunc quoque adhibitam; idèd quippe Sponsores appellati fuere. Neutrum porrò novitatis damnat Tertullianus. Cumque is altero dumtaxat ab Apostolorum morte seculo vixerit; Irenæus verò ipsos Apostolorum auditores habuerit Magistros; & auctor uterque sit, Baptismum infantium in Ecclesia Dei jam tunc fuisse usurpatum: quis non intelligat, ruere Phereponi sententiam, atque conjecturam, & perperam ab Apostolorum ætate atque institutione sejungi Pædobaptismum, & formulam spondendi pro illis?

Sed, inquires, Pædobaptismus fuit vel Tertulliani ævo

improbatus. Imò, ne quid dissimulem, afferam hæc ipsius Tertulliani verba ex Cap eodem: *Quid si stinat innocens ætas ad remissionem peccatorum?* Non hoc negamus. Athæc non tollunt, quin Ecclesiæ Catholicæ jam tum fuerit mos præter adultos baptizandi etiam parvulos. Tertullianus ex propria sententia hunc morem sublatum cupit, ut alibi sæpè, ità & hîc à suo effreni ingenio abreptus, & privatæ opinionis nimis indulgens. Nam S. Cyprianus, & reliqui Patrum, atque Episcoporum, Baptismi in annos majores aut in mortis periculum dilationem concorditer rejecere, laudato semper infantium Baptismo. Infrà auctor est idem Tertullianus, Baptismum quoque *innuptorum esse procrastinandum*; & tandem absurdè concludit: *Si qui pondus intelligant Baptismi, magis timebunt consecutionem, quàm dilationem.* Nullus Catholicorum ità unquam sensit. Cæterùm si mortis periculum ingrueret, minimè negandum, aut differendum regenerationis Sacramentum, alibi docet ipse Tertullianus, & Cap. 12. ejusdem Libri de Bapt. fatetur, *nemini sine Baptismo competere salutem*; & in hoc eodem Cap de parvulis, ait: *Nòrini petere salutem, ut fetenti dedisse videaris.* Quæ satis esse possunt, ut ex ejus quoque sententia necessitas & usus Baptismi vel in infantibus probetur. At ille vocat parvulorum ætatem *innocentem*, hoc est ab actualibus peccatis immunem; nam ex hac ipsa rationis specie vel post Tertullianum, & quarto potissimum seculo, sanctissimum lavacrum differre consueverunt à Christianis non pauci, & ipse Augustinus distulit, quanquam contagium mortis antiquæ, & maculam originalem omnes faterentur omnibus Adæ filiis inesse. Nisi periculum mortis Baptismum suscipere coëgisset, ejus consecutio differebatur, quòd peccata simul actualia postea delerentur. Quid? quòd maculam originalem ne ipse quidem inficiatus est Tertullianus? Humanas certè animas non solum immundas, sed etiam peccatrices ille vocat, donec Baptismo Christi mudentur. Sunt ejus verba Lib. de Anima Cap. 40. *Omnis anima est, quæ in Adam censetur, donec in Christo recenseatur; tamdiu immunda, quamdiu recenseatur.* Peccatrix autem, quia immunda, recipiens ignominiam ex carnis societate. Lib. I. Cap. 1. de cultu Fœminar. ait, omnes mulieres de Eva trahere ignominiam primi delicti, & invidiam perditionis humanæ. Vivit sententia Dei super sexum istum in hoc seculo; vivat & reatus necesse est. Et Cap. 3. de Testim. animæ de satana ait: *Per quem homo à primordio circumventus, ut præceptum Dei excederet, & propterea in mortem datus exinde totum genus de suo semine infectum, suæ etiam damnationis*



*tionis traducem fecit. Lib. V. Cap. 17. contra Marcionem, hominem videlicet pestilentissimum, à quo Deus traducebatur tanquam peccati auctor, ita idem Tertullianus scribit: Apostolus, iracundia filii fuimus, inquit sed natura..... Cui dicit: Fuimus natura filii iracundia, ..... ira filios, ad naturam retulit, non ad Creatorem. Ad summam subjungens: Sicut & ceteri, qui utique filii Dei non sunt? apparet communi naturae omnium hominum & delicta, & concupiscentias carnis, & incredulitatem, & iracundiam reputare? diabolo idem captante naturam, quam & ipse jam infecit delicti semine illato. Hæc easunt, ut vel sine interprete prodero possint, Scriptorem Afrum diversam hinc à cæteris Catholicis non induisse opinionem.*

Verum Phereponus in animadv. ad Epist. 157. Augustini olim 89. §. 1. pag. 497. alia habet. Celebrem Apostoli locum Rom. V. supra à nobis productum Pelagianis opposuerat Augustinus, utpote affirmantibus, sine peccato hominem nasci. Quid ad hæc Phereponus? Hunc, inquit, locum Pauli pertinere ad adultos tantum, qui peccatum Adam imitantur ostenderunt dudum viri doctissimi. Tum paucis interjectis addit, ed confidentius hic loqui Augustinum, quod minus probare poterat, quæ hic habet. Locus Pauli Rom. V. obscurior est, quam ut à tam proleto Interprete explicari possit. Phereponum libenter interrogarem, num illorum hominum ingenium ipse probet, qui nullum sibi frenum statuunt in fidei quæstionibus, & pro suo modulo sentire, ac interpretari divinas Scripturas, constituunt; tum sua placita, tanquam certissima, vultu imperterrito venditare; adversarios verò non semel contemnere, eisque reponere pro rationibus contumelias. Verum, his dimissis, cuinam Parum controversiarum perito persuadebit ille, dudum viros doctissimos ostendisse, ad adultos tantum pertinere locum illum Apostoli? Pelagiani quidem olim, tum Erasmus, alique ejus gregis sensere, peccatum ex Adamo non propagatione, sed imitatione, in hunc mundum intrasse, & adultos tantum, non quod filii sint Adam, sed quod ipsum imitati sint, omnes peccasse. At merum hoc fuit illorum commentum, ac effugium, & mera conjectura, quam sine ratione ulla gravi, sine majorum auctoritate excogitatam, suæ opinioni accommodarunt, Apostoli mente ejusq; verborum sensu, ipsaq; ratione reluctante, uti S. Augustinus variis in locis, & innumeri subinde Catholici, & plerique etiam à Protestantibus demonstrarunt: quod ignorare Phereponus nequaquam potest. Istius verò hominis nequeas non mirari ingenium, qui hinc ansam sumit appellandi Augustini proleto Interpretis. Videant alii, an

viro liberali ac honesto consentaneum sit huiusmodi conviciis excipere Augustinum incomparabilis ingenii, sanctitatis, & doctrinæ virum. Certè hic locus, minùs etiam quàm reliqui, contumeliis patebat. Quamnam enim Linguae Græcæ imperitiâ Augustino obijcere hic possis? Nihil habet ille, quod eruditissimi deinde inter Catholicos Theologi ac Interpretes non habeant, & sentiendum discernant. Num audeat Phereponus proletarios Interpretes appellare tot clarissima ingenia in hac re Augustino concordia? Si non audet, cur tibi hic licitum putat, unum Augustinum tanto contemptu repellere, nihil tamen aliud sentientem, quàm quod tot doctissimi viri sentiunt ac sentiendum esse nos quoque brevibus nuper ostendebamus?

*Nunquam Augustinus probavit infantibus Baptismum præscribi à Christo, aut Apostolis, ne pereant.* Sunt hæc ejusdem Phereponi verba pag. 497. ad citatam Augustini Epist. CLVII, olim 89. Similia habet ille ad Ep. 175. olim 90. §. 6. pag. 519. At Augustinus ostendit, non ex apertissimis quidem Christi, aut Apostolorum verbis scriptis, sed ex vetustissimæ Traditionis testimonio & universalis Ecclesiæ usu (ut alias rationes taceam) præscriptum à Christo fuisse parvulorum Baptismum. Nunquam verò Pelagiani ostenderunt, contrariam fuisse Christi, aut Apostolorum mentem. Utri parti nunc est credendum? Utra pars dicenda est inopiâ rationum laborare? Sincerus quisque fateatur, ad Pelagianos reddendæ rationis onus hic pertinere. Numquid enim minùs Christo, & Apostolis Christi nomine aliquid scripto proponentibus, quàm sine scriptis & per legitimam Traditionem loquentibus, habenda est fides? Nos verò palam fecimus, saltem per Traditionem sine scriptis *Padobaptismum* ab Apostolis esse præscriptum. Pro bent Pelagiani, aliter se rem hanc habere; pro bent, nihil aliud credendum esse, quàm quod in Scripturis sacris apertè propositum est; pro bent, futilem esse interpretationem nonnullorum Scripturæ locorum, è quibus Catholici deducunt necessitatem baptizandi parvulos. In huiusmodi quæstionibus illud nos usurpamus, quod vetustissimus Scriptor Tertullianus in simili aiebat Lib. de Corona Cap. 3. *Hanc si nulla Scriptura determinavit, certè consuetudo corroboravit, quæ sine dubio de Traditione manavit. Quomodo enim usurpari quid potest, si traditum prius non est? Etiam in Traditionis obtentu exigenda est, inquit, auctoritas scripta. Ergo quæramus, an Traditio nisi scripta non debeat recipi.* Lege reliqua; lege in hanc rem cæteros Patres. Præterea num stolidi, ac moriones, ac amentes adulti à sacro fronte

fronte arcendi, quòd manifestè à Christo aut ab Apostolis præscriptum ipsis Baptismus non invenimus?

Corollarii loco ad ista accedat Circumcisionis consideratio, & antiquissimus Judæorum ritus in recipiendis ex Ethnicismo ad Mosis legem hominibus Infantes ex veteris Legis præcepto in fœdus Israeliticum ingrediebantur per Sacramentum Circumcisionis, Deoque grati per ipsum constituebantur. Odium Dei, & pœnæ etiam propositæ fuere in eos, quibus tale Sacramentum non conferebatur. Etiam si infantes non intelligerent, quàm magnum bonum sibi inde contingeret, ex pacto tamen Dei illud bonum in ipsos manare non cessabat. Quamobrem collatus quoque Baptismus parvulis, suum in ipsis producere effectum potest, ac debet, vel sine actuali fide, neque adulta ætas illis expectanda est, ut sanctificentur, & Deo placeant; ipsique sine lavacro sanctissimo decedentibus, æquè ac adultis, deerit fœderis novi gratia in regenerationis Sacramento constituta. Deinde Baptismus Evangelicus, ut eruditis quibusdam videtur, quid novum apud Judæos non fuit. Cum enim Ethnici homines fiebant *geres sedech*, hoc est, *Profelyti Justitia*, sive *justi*, atque inter Judæos cooptabantur, non sola Circumcisio, sed & baptismus conferebatur eisdem. Hinc apud Hebræos vulgatum axioma: *Non est quis Profelytus, usque dum circumcidatur, & baptizetur*, Maimonides in *Issure Biah* Cap. 13. & alibi, Gemara Babylonica variis in locis, Moses Mikotzi Præcept. Negat. 116. R. Joseph Karo in *Schulcan Aruch* Lib. Jore dea. Cap. 268. alique Judæi Scriptores, non solum testantur, vigere adhuc in Synagoga hunc morem, sed & ipsum referunt ad tempora usque Davidis, ac Salomonis. Eò etiam pertinere potest locus quidam Areiani in *Epiætetum* Lib. 2. Cap. 9. Ex iisdem autem Hebræis Auctoribus pariter discimus, cum olim fuisse baptizatos, tum etiamnum baptizandos esse una cum parentibus parvulos Profelytos ex Synedrii sententia. Vide laudatam Gemaram Babylon. tit, *Erubh.* & ibi Glossam, & Maimonidem in *Avadim* Cap. 8. & Gemaram Hierosol. tit. *Jevamoth*, & *Lightfootum*, & alios Judaicæ eruditionis illustratores. Itaque uti sine Circumcisione, ita sine Baptismo, eoque unico, & ab aliis vulgaribus Judæorum Iustrationibus ac lotionibus diverso, nemo vel antiquitus inter Profelytos describebatur. Quam Rabbiorum Traditionem juvat adhibitus à Joanne Præcurfore Baptismus, ut ad vitam novam Judæos perduceret. Non enim Synedrium ab eo per nuntios quæsit, quid sibi vellent ille Baptismus,

tismus, sed solum quâ auctoritate ipse baptizaret. *Dixerunt ei: (sunt verba Jo. I. 25.) Quid ergo baptizas, si tu non es Christus neque Elias, neque Propheta?* Scilicet illa baptizandi ratio nova non erat, ac ignota, sed frequens, ac usitata, & in parvulis usurpata. Propterea que miratus nemo est tantum gentis confluxum ad Baptismum Joannis. Apostolus quoque Heb. IX. 10. commemorat varia Baptismata inter Judæos usurpata.

Ergo generis humani Reparator Christus, antiquatâ solum Circumcisione, Baptismum retinuit, qualis in usu apud Judæos erat, non rem novam instituens, sed jam usitatam ad aliud munus, finemque nobiliorem erigens, & vivificâ verèque saluari gratiâ donans, ut sicut olim ad Judæicam Religionem, ita in postetum ad Christianam per verum hoc Sacramentum transirent Infideles, atque iterum nascerentur. Ideo que nihil necesse erat, conceptis verbis populo ac Apostolis præcipere *Pædobaptismum*, sed satis fuit generaliter indicare Baptismi usum, atque necessitatem. Per sæcula præcedentia, & Christi etiam tempore, vulgatissima erat parvulorum æquè ac adultorum Iustratio, cum ad Religionem Dei veri & ad regenerationem transitus fiebat. Satis ergo constabat, præscripto per Christum Baptismo, quis foret abluendus. Atque aded in re aded nota superfluum erat hoc edicere, postquam dixerat Jesus: *Nisi quis renatus fuerit ex aqua &c.* Si ejusmodi consuetudinem abolere ipse voluisset, eam potius prohibere debuisset apertis verbis. Rectè itidem conjicere hinc possumus, parvulos aliquot christiano fonte fuisse mundanos, cum, in Act. Apost. XVI. 15. & 33. paterfamilias baptizatus dicitur *cum omni domo ejus*, aut saltem inferre licet, parvulos, si aderant, & ipsos fuisse baptizandos; hoc enim de more à Judæis fiebat, cum recipiebantur Profelyti. Quod enim est ad locum Matth. XXVIII. 19. *Euntes ergo docete omnes gentes, baptizantes eos*, quæ Anabaptistæ nobis opponunt, quasi ii tantum dicantur baptizandi, qui prius fuerint edocti, evanescit ex vi Græcorum verborum. *Μαθητεύσατε*, inquit Christus, *πάντα τὰ ἔθνη*. Hoc est, non propriè *docete*, sed *discipulos facite*, scilicet in disciplinam meam, & in fœdus novum, per Sacramentum regenerationis adducite omnes gentes. Tum subsequitur *διδάσκοντες*, *docentes eos servare omnia &c.* ut videas, Baptismum præire posse doctrinæ, & Discipulos posse fieri illos etiam, quos à discendo infirma ætas avertit, cum ided *Discipuli* per Baptismum fiant, ut postea doceantur.

Quæ Phereponus notat ad Ep. CLVI. Augustini pag. 498. consi-

consilia tantummodo sunt, & phaleræ, & voces hominis, quibus nulla ratio adnexa est, ne gravioribus titulis utar. Si hoc pacto exhibilare adversariorum opiniones, vincere quoque est: vicit Phereponus. Sed meritò exhibilandus ille, si unico *αὐτὸς ἐπα* & propositis tantum suis, hoc est exole-  
tis Pelagianorum opinionibus, agitatissimas quæstiones se-  
dirimere, & Sententias Catholicas tanto pondere stantes  
prosternere posse putat. Et tamen id ipsi in more positum  
est Pag. item 520 in notis ad Ep. 176. iterum vellicare ille  
pergit locum Apostoli ad Rom, V. & *ἐφ' ᾧ* esse *quia*, vel eò  
*quodd*, non in *quo* contendit, exempla innuens in 2. ad Cor. V.  
4, & ad Philipp. III. 12. At in citato loco Epist. 2. ad Cor. ego  
nihil tale reperio. Alterum exemplum iis tenebris circum-  
fusus est, ut adhuc rem nostram in medio relinquat,  
quanquam non minùs quàm antea, uti suprà diximus, con-  
stet, firmumque sit Catholicum dogma, tametsi interpre-  
tatio illa præferatur. Locum item alium Epist. I. ad Cor.  
XV. 21. Catholicis erepturus ad suam mentem explicat  
Phereponus, atque eà ratione loca ista esse procul dubio  
explicanda persuasurus Lectoribus suis, monet, *viros ac The-  
ologos doctissimos* ità sensisse, atque ostendisse. Hos autem etsi  
ille non nominet, nemo non intelligit esse gregarios Pela-  
gii, Arminii, Socini, atque etiam Calvini. Alibi quoque, hoc  
est pag. 549. locum Jo. III. 5. *Nisi quis renatus fuerit &c.* memo-  
rans, satis liquere ait intelligendum de adultis tantum, non  
autem & de infantibus. Nos contrà affirmamus, longè do-  
ctiores viros tum inter Catholicos, tum inter ipsos Prote-  
stantes contrarium ostendisse, & ab istis prostrata jamdu-  
dum fuisse quælibet Pelagii commenta: quam in rem & nos  
aliqua attulimus. Prostrant Libri. Nostris palmam negabit  
Phereponus. Ipsam patiatur & nos negare suis. Lectores  
sinceri, & nullo partium studio adducti, dum omnia lege-  
rint, facile judicabunt, nos fumos non venditare, sed Apo-  
stolicam doctrinam constanti ac universali Ecclesiæ Tra-  
ditione firmatam. Pag 549. in Animadv. ad Ser. CCXCIV.  
§. 6. 12. 17. & 19. Phereponus quæ alibi non semel contra *Pæ-  
dobaptismum*, & *Originalis peccati* veritatem dixerat, aliis ver-  
bis repetit, quare sine responsione dimittendus est.

Quod autem est ad S Cypriani verba ex Epist. LXIV ad  
Fidum, quibus S. Augustinus utitur in eodem Sermonem ad  
confirmandum Dogma de *Originali Peccato*, ea tam perspi-  
cua sunt, ut sibi melius fuisset Censor consulturus, si quæ  
ad ipsa eludenda adfert, prorsus omisisset. *Quid sit*, ait, *li-  
cuit Pelagianis rejicere. Cypriani auctoritatem in hoc negotio*;

ut Augustino licuit, quod attinet ad Baptismum Hæreticorum?

Tum addit, multò clariùs, atque constantiùs S. Cyprianum affirmasse, Hæreticos esse baptizandos, quàm dari Peccatum originis: Si Pelàglani licitum sibi censuissent, quod nostrorum temporum Novatores contra fas omne licitum sibi putant, nempe non Cyprianum tantummodo, sed reliquos Patres, & omnem legitimam Traditionem respuere ac irridere: rejecissent profectò Cypriani auctoritatem in ista controversia, non expectato Phereponi consilio At illis, quàm recentioribus Hæreticis, major erga sacras Traditiones reverentia erat, & melius intelligebatur quàm stabili quoque fundamento nitantur dogmata ab Apostolorum Traditione descendente. Imò nervos omnes intendunt & ipsi, ut ostenderent, Majorum Traditionem sibi potiùs, quàm Augustino favere. Ut cumque tamen Pelagiānis in pretio fuerit vetustissimæ Traditionis auctoritas (non enim victas dedere manus documentis in hanc rem ex Catholicorum parte productis) illud mihi certum, perperam à Pherepono componi auctoritatem Cypriani affirmantis *Originale peccatum*, cum Cypriano contendente rursus baptizandos esse Hæreticos. In priore sententia nihil aliud affirmavit Sanctus Cyprianus; quàm quod universa tūn ante se, tum post se ad Pelagium usque Ecclesia Christi, quæ sub cælo est, affirmavit & concorditer tradidit, & *Pædobaptismo* semper usurpato se credere significavit. Quamobrem Cypriani hac de re sententia non unitus hominis erat, sed universæ Catholicæ Ecclesiæ sententia. atque adeò ineluctabili auctoritate constabat. Verum Cyprianus contendens, Hæreticos esse rebaptizandos, si Agrippinurum, & Africanæ Diocesis Episcopos, & nonnullos item Asiaticos Præsules excipias, qui Cypriano aut prævivere, aut consensere, neminem alium ipse habuit suæ opinionis assertorem. Non ipsa solum Ecclesiarum Caput Romana Ecclesia sed reliquæ ferè omnes cūm Orientis, tum Occidentis Ecclesiæ & Traditionem vetustissimam, & consuetudinem perennem Cypriano contrariam tenebant. Quid plura? Ne ipse quidem gloriosus Martyr Cyprianus in suis Conciliis negare potuit, quin consuetudo recipiendi in Bap̃tismo Hæreticos in Ecclesia Dei ante suam constitutionem oblineret. Itaque altera hæc S. Cypriani sententia paucorum erat, non Ecclesiæ Catholicæ sententia atque Traditio; ac proinde licuit Augustino, imò necesse fuit hic Cypriani auctoritatem rejicere, ne veneranda totius Ecclesiæ Cathol. & Concilii universalis auctoritas, firmissimis etiā in

in ista quæstione armata rationibus, à se rejiceretur : quod Catholicò homini nefas perpetuò fuit.

*Deinde non dicit (Cyprianus) in infantes transire ullam labem internam, quæ eorum facultates sine vitia; sed tantum transire eos contagionem mortis ab Adamo; quia ex patre mortali non nisi mortales nascuntur : quod multum abest à sententiâ Augustini.* Sicut ista Phereponi verba, sed Phereponi litigare potius amantis, quàm veritatis inveniendæ solliciti. In Cypriani verbis hæc nimium aperta est, ita ut aut ultro oculos clausisse dicendus sit; aut oculis reverà careat, qui eam non cernit. Ità scribit sanctus Cyprianus in laudatâ Epist. LXIV. ad Fidum scripta A. C. 253. *Si etiam gravissimis delictis. & in Deum multum ante peccantibus, cum postea crediderint, remissa peccatorum datur, & Baptismo atque à gratia nemo prohibetur : quando magis prohiberi non debet infans, qui recens natus nihil peccavit, nisi quod secundum Adam carnaliter natus; contagium mortis antiqua primâ nativitate contraxit? qui ad remissionem peccatorum accipiendam hoc ipso facilius accedit, quod illi remittuntur non propria, sed aliena peccata.* Apertissime distinguit hic sanctus Episcopus infantes ab adultis. Hos actualium criminum reos dicit; illos uni tantum peccati, quod posteri originale deinde appellârunt. Utrosque à Baptismo non esse prohibendos affirmat, in quo gratia divina utrisquæ confertur, & datur remissa peccatorum. Quid est, quod Phereponus scribit, & à Cypriano non dici; *in infantes transire ullam labem internam*; hoc est nullum animæ inhærens peccatum, sed mortis solum naturalis necessitatem? Cyprianus disertè pronuntiat infantes *nihil peccasse, nisi quod contagium mortis antiqua primâ nativitate contraxerunt*; id est, non actualibus quidem culpis iram divinam in se contitasse, sed tamèn esse reos peccati priuni parentis, quia ab ipso carnaliter sunt nati. Disertè, inquam, dicit, ipsos etiam peccasse, quia peccatum contraxere Adami. Dicit ipsos accipere remissionem peccatorum; ipsi-que remitti, non propria, hoc est, non actualia, sed aliena peccata, id est peccatum Adami, qui actualiter peccando fecit, ut omnes posteri vel recens nati peccatores essent, ac indigerent remissione peccatorum per salutarem Baptismi aquam. Uri verò expressè Cyprianus ait, infantes ante susceptum Baptismum carere *Gratiâ Dei*, ita in eadem Epistola non semel addit, ipsos egere *misericiâ Dei*, eorumque animas sine Baptismo decedentes perdis. *Quantum in nobis est, ait, si fieri potest, nulla anima perdenda est. Si Adami reatus in infantibus habitat, si animæ illorum perduntur,*

duntur, ubi sine Baptismo decedant, sique *remissam peccatorum accipiunt*: ergo necesse est, in infantes transire labem aliquam internam; atque peccatum, quod animæ sit proprium. Necessitatem mortis corporeæ utique non tollit Baptismus; ergo tollit solum *peccatum originale ex anima*, atque hoc peccatum illud est, quod Cypriano dicitur *contagium mortis antiquæ*.

Sed Phereponus dicere pergit: *Deniq; rhetoricè potius fortasse dixit remitti aliena peccata, quàm didacticè. Ac sanè nec imputari, nec remitti aliena peccata, si propriè loquamur, à justo judice possunt. Satis est multa Oratorum Ecclesiasticorum dicta esse vel diluto sensu vera; cum satis constet eos minimè accuratè loqui solitos.* Habeat sibi Phereponus alibi Criticam istam regulam; nihil enim illa ad rem præsentem facere potest. Etsi rhetoricè locutus hic fuerit S. Cyprianus, ejus tamen mens apertissimè se prodit, & sensus didacticus elucet: quod & contingit in reliquis Rhetoricis coloribus ab omni perito Rhetore adhibitis. Si verbis didacticis, non rhetoricis, hæc doctrinam Catholicorum Catholicus Episcopus exprimit. Cum nihil boni aut mali egerint infantes, reverà nullum *proprium actuale peccatum* habent, quod sibi remittatur. Ex Apostolica tamen ac universali Ecclesiæ Traditione peccatum habent, & indigent gratiâ & gloriâ Dei. Hoc autem peccatum nihil aliud est, quàm Adami peccatum in omnes homines descendens in condemnationem; alienum, quia non ab infantibus, sed à solis protoplastis actualiter perpetratum. Hinc propriè ac sinè Rhetorico colore dictum est, *non propria, sed aliena peccata, remitti* parvulis undâ saluari ablutis. Cæterùm, quod Phereponus tum hic, tum alibi eandem ingeminat cantilenam, videlicet imputari à justo Deo aliena peccata non posse, quasi veteres ac recentes Catholicæ Ecclesiæ Theologi de tuenda Justitia Dei nihil solliciti, satis hoc nondum animadverterint: rogandi sunt Lectores, ut quod in hujus controversiæ exordio nos paucis innuimus, multòque magis quod S. Augustinus, S. Thomas, cæterique Patres ac Theologi nostri hanc in rem latè conscripsere, legant Tum enim intelligent hæc rectè cum divina Justitia componi, & contra non solum suis difficultatibus, quod attinet ad Providentiam, Bonitatem, ac Justitiam Dei laborare sententiam Pelagianorum, sed ipsam quoque adversari Ecclesiæ totius Traditioni, & Apostoli verbis. Atque hætenus de hujusmodi controversia.



## CAPUT III.

*Concupiscentia non bonum, sed malum homini. Quid Libidinis generale nomen interdum apud Augustinum sonet. Libido carnis, qualis nunc est, malum pœna, & non peccatum proprium est. Non venit ab institutione naturæ innocentis, sed peccati primi pœna fuit. Differt ab appetentia cibi & potûs. Perniciosa homini, ut is animal rationale est. Pudor nuditatis in statu naturæ innocentis locum non habuit, sed post Adami lapsum effluxit, & insitius nunc omnium naturæ. Fuiſſet & in terrestri Paradiso voluptas carnis, sed non inimica & infesta rationi. Nisi Adamus peccasset, neque Libidini turbidæ, neque aliis malis obnoxium foret genus humanum Scripturâ teste.*

**J**ulianum Pelagianæ Hæresis primipilum cum alias ob causas S. Augustinus eloquentissimè ac nervosissimè exagitat, tum ob illam in primis, quòd se humanæ concupiscentiæ atque libidinis laudatorem præstitisset. Postremis hisce temporibus inventi sunt, qui contra eundem Augustinum, imò contra Catholicam Ecclesiam, Julianum ejusque conclamatam sententiam iterum tuerentur, inter quos non ultimam aciem Phereponus nunc ducit. In eo sita fuit controversia. Julianus *Concupiscentiam Bonum* naturæ appellabat, quo *Bonè* benè utitur, qui modum tenet; quo *Bono* malè utitur, qui modum non tenet; quo *Bono* melius non utitur, qui etiam ipsum modum, sanctæ Virginitatis amore, contempserit. Augustinus contra *Concupiscentiam* semper malum esse contendebat; quare Lib. 3. adversus Julian. Cap. 21. ita reponebat: *Concupiscentia carnalis qui modum tenet, malo benè utitur; qui modum non tenet, malo malè utitur; qui autem etiam ipsum modum, sanctæ Virginitatis amore, contempserit, malo melius non utitur.* Innumera sunt, quæ Augustinus variis in Libris, & benè longo sermone contexit, ut suam hanc sententiam confirmet. Sed nos, quæ Phereponus contra habeat, jam recenscamus. Dixerat Augustinus in Lib. 1. Cap. 3. de libero Arbitrio, *Libidinem in adulterio malum esse.* Phereponus in Animadv. ad hunc locum pag. 482. prius dubium non esse ait, quin mala

mala sit in adulterio libido, sed non alia de causa, nisi quia  
 adulterium ipsum est malum, quippe quod ab illo socie-  
 tas humana planè perturbetur, atque adeò vetitum sit,  
 hominum causâ, quibus vehementer nocet. Alioqui, de-  
 inde scribit, *libido, seu cupiditas alterius sexûs, nihil habet*  
*per se mali; si intra limites à Deo, immo & ab ipsa ratione,*  
*præscriptos maneat.* Quare inquit, Augustinum minus  
 commodè indicâsse, cur malum sit adulterium, cum e-  
 jus malitiæ causam à libidinis malitia derivavit. At Phe-  
 reponus animadvertere attentius debuit, quid hoc in lo-  
 co per *Libidinis* nomen significare voluerit sanctus Augu-  
 stinus. Non *cupiditatem* luxuriosam, sive carnalem *alie-*  
*rius sexûs*, sed quidem pravam quamcumque cupidita-  
 tem, atque concupiscentiam hîc libidinem appellavit. Ut  
 enim idem Augustinus Lib. 14. Cap. 15. de Civ. Dei scri-  
 bebat: *Libido generale vocabulum est omnis cupiditatis*, im-  
 mo & iræ, & jactantiæ, & pervicaciæ, aliisque hujusmodi  
 perversis animi affectibus Cicèrone teste convenit, quan-  
 quam pro venereo appetitu usitatius accipiatur. Cupi-  
 ditas, quâ homo inclinatur ad aliquid appetendum contra  
 Rationem, contra Justitiam, Pietatem, Temperantiam,  
 aliasque Virtutes & contra Leges à Deo & à ratione consti-  
 tutas, libido est, libido appellari potest. Quæ profectò  
 concupiscentia, sive libido, cum in adulterio quoque de-  
 prehendatur, justitiam quippe, ac societatis humanæ ju-  
 ra. & Sacramenti fœdus, adulter contemnit ac lædit:  
 commodè propterea & verè in ejus malitiam retulit Au-  
 gustinus adulterii malitiam. Ipsemet eodem Cap. 3. Lib.  
 1. de libero Arbitrio apertè prodit, quid sentiat, ita scri-  
 bens: *Ut intelligas libidinem in adulterio malum esse, si cui eti-*  
*am non contingat facultas concumbendi cum conjuge aliena, pla-*  
*num tamen aliquo modo sit, id eum CUPERE, & si potestas de-*  
*tur, facit eum esse, non minus reus est, quàm si in ipso facto depre-*  
*henderetur.* Vides, non turbidum carnis motum, sed pra-  
 vum animi affectum, sive alienum à ratione recta appeti-  
 tum, vocabulo *libidinis* hîc designari. Tum addit Evo-  
 dius: *Clarum est enim, jam nihil aliud quàm libidinem in toto*  
*malefaciendi genere dominari.* Cui protinus Augustinus:  
*Scisne etiam istam libidinem alio nomine cupiditatem vocari?*  
 Melius ergo & commodius libidinis pravitatem consti-  
 tuimus causam illius pravitatis, quæ in adulterio est; fie-  
 ri enim potest, ut quis sit adulter, humanæque proinde so-  
 cietatis ordinem turbet, & nihilominus tum ipse, tum e-  
 jus opus culpâ ac malitiâ careat: quod fit, cum ex igno-  
 rantia

rantia invincibili agitur. Et quare tunc adulterium malum non est, nisi quia tunc libido, sive pravus animi appetitus, in ignoranter operante minimè dominatur? Itaque nihil erat, cur hic Augustinum edocere meliora Phereponus vellet, multoque minus cur in commendationem veneræ libidinis transgrederetur, cui nullus hic locus erat.

Sed quoniam illius oratio nos eò quoque abripit, videamus, qui probet novus iste Pelagianorum patronus, libidinem carnis, sive cupiditatem alterius sexus, nihil habere per se malè. En ejus verba pag. 482. *Ità constituta sunt à Deo omnium animalium corpora, ut cum adoleverunt, ea cupiditas in iis, mechanico impetu, excitetur, non aliter ac cupiditas edendi aut bibendi. Confectarium est naturæ corporis, quale à Deo creatum est, ut ex brutis, & ex ipso consilio propagationis generum intelligere est. Ratio igitur, quare malum non sit, dicenda libido, si Pherepono credimus ea est, quod naturalis motus sit, à Deo constitutus, nihil certè nisi bonum creante. Eadem repetit ille, pag. 528. in Notis ad Lib. 9, Cap. 10. de Gen. ad Lit. Nam cum dixisset sanctus Augustinus, honestius meliusque credi, ità fuisse primorum parentum corpora constituta in terrestri Paradiso, ut appetitum carnalis voluptatis non haberent, qualem nunc habent ista corpora: Phereponus talia apponit: *Appetitus ille, ut liquet vel ex brutis, tam naturalis est, quam appetentia cibi, aut potus, voluptasque, quam experimur, cum comedimus esurientes, vel bibimus sitientes. Non puto sanè quemquam disturbum, sitim, aut famem, voluptatemque, quam in iis explendis experimur, effectus esse peccati. Fragmenta mera sunt, qua hic & alibi dicuntur. Ità brevibus rem expedit Phereponus, & longas Augustini commentationes nullo negotio prostermit, & rotundâ sententiâ exhibilat. Experiamur, an benè sedeat homini isti confidentia tanta.**

Cum Augustinus libidinem carnis malum appellat, animadvertendum primò est, quo sensu illic *malis* nomen sit accipiendum. Ut autem Augustinus ipse auctor est Lib. 1. Cap. 1. de Lib. Arb. *Duobus modis appellare solemus malum; uno, cum malè quemquam fecisse dicimus, alio, cum malis aliquid esse perpeßum.* Eo recidere potest, quanquam diverso sub intuitu, illa divisio mali, quam idem Augustinus, ac cæteri Theologi frequenter usurpant, nimirum aliud esse malum culpæ, aliud malum poenæ. Prius malum inquinat animum, Deoque hominem invisum facit, & Peccatum dicitur. Alterum tantummodo excruciat, aut lædit animum,

naum, five corpus hominis. Certum est, Augustinum minime inter priora mala, sed quidem inter secunda, computare libidinem. Quanquam enim concupiscentiam humanam generaliter sumptam, cujus pars ac species est ipsa carnalis libido, Augustinus interdum cum Apostolo peccatum vocet, nunquam tamen aut Apostolus, aut Augustinus hujusmodi vocabulo significare voluerunt, concupiscentiam verè & propriè peccatum in hominibus esse, sed peccatum ideo appellant, *quia ex peccato est* (originali videlicet) & *ad peccatum inclinat*, sicuti Synodus Tridentina nos docuit Sess. V. & ipse Augustinus antea docuerat Lib. 1. Cap. 23. de Nupt. & Concup. & in Libris contra Julianum, & Lib. 1. Cap. 12. contra duas Epistolas Pelag. & in aliis Libris. Proinde sublati omnibus in sacro Baptismo re culpis, atque peccatis, adhuc restare in homine concupiscentiam Augustinus affirmat, non quòd propter ipsam rei ampliùs simus, sed ut cum ipsa configamus in posterum, ne fiamus rei. Quamobrem, si Pherepono visus fortè est Augustinus tunc libidinem appellasse proprium ac verum peccatum, cum eam in malorum aciem retulit: sciat, se quidem improbare Calvinii ac Lutheri commentum, non autem Augustini mentem.

Statuit igitur Augustinus adversùs Pelagianos, concupiscentiam, & libidinem carnis non esse naturale Dei donum, non esse à Deo creatam in primis parentibus talem, qualis post eorum peccatum fuit; & qualis adhuc sentitur ab hominibus. Primi peccati infelix fructus illa est, vitiùmque corruptæ, non innocentis, naturæ, ac propterea malum poenæ, malum homini molestum, quo nos careremus, si culpâ caruissent primi omnium parentes. Quis autem libidinem, qualem nunc in membris suis humanum genus sentit, naturale bonum putet, quæ nos ad peccandum pervicaciter incitat, quæ contra legem mentis atque rationis tam sæpè pugnat, quæ continentie & virginitati infestissima est, quam quilibet vir pius sentire se dolet, ac porrò sentire nollet, quæ demum pudoris atque erubescentiæ materia est, atque argumentum? At hæc nihil Pherepono obstant, quominus inter naturalia bona libidinem referat. *Appetitus ille, inquit, tam naturalis est, quàm appetentia cibi aut potûs.* Mechanico autem impetu non minus brutorum, quàm hominum corpora ad libidinem, & per libidinem ad generis propagationem moventur. Ergo non est effectus primi peccati libido. Ità Phereponus. Quod est ad comparisonem libidinis cum fame & siti, respon-

respondemus, Censorem demonstrare prius debuisse, famem quoque, ac sitim, quales nunc ab hominibus sentiuntur, tales quoque futuras fuisse in innocentiae statu, atque in illa summa felicitate, in qua Deus Adamum creavit. Ad Catholicam fidem spectat credere, primos parentes morituros non fuisse, nisi peccassent. Cum fames, & sitis, mala utique omnium iudicio in hoc præsenti hominum statu gravia, præter acerrimum dolorem, mortem quoque corpori inferre nunc possint: cur mechanicam etiam vi homines, in terrestri Paradiso alioqui non morituros, compellere fames & sitis non potuissent, atque interdum non compulissent ad mortem? Aut ergo Deus in statu naturæ innocentis famem & sitim, consecraria naturæ corporis non fecit; aut si fecit, tales, quales nunc experimur, ne homo sentiret, effecit

Sed ut à quæstione ista æquivocationem omnem amoveamus, dicimus, hominem sub duplici ratione esse considerandum, nempe aut quatenus homo est animal, aut quatenus est animal ratione præditum. Nutrirî, augeri, propagationem quærere, delectari in operationibus sensitivis, ac in ipsa venire, & appetere cibum ac potum, & alia id genus, homini ut animali naturalia sunt, & in Adamo etiam fuissent. Atque idcirco bona ea sunt à Deo, uti bonum quoque à Deo emanans sunt vis generativa, & vasa generationis, & seminis efficacia, & honesta sensuum voluptas, & commixtio corporum ad licitam propagationem humani generis, atque alia ejusmodi. Immo ipse genitalium motus *bonum naturæ* in se est; *nunquam enim motum genitalium Augustinus reprehendit generaliter*, tanquam naturæ malum ac vitium, uti Julianus eidem objiciebat, *sed illum motum reprehendit, quem facit concupiscentia, quæ caro concupiscit adversus spiritum, quam velut bonum defendebat Julianus.* Utor ipsius Augustini verbis lib. 4. Cap. 13. contra eundem Julianum. Secundò, in libidine, ac in aliis quibuscumque motibus animalitatis, ac inferioris appetitus, considerari potest, effrenis illa membrorum, & affectuum concitatio, quæ vel repugnante voluntate hominis fit in homine, quæ pudorem ingerit, & ad peccatum incitat ac rapit, ut ea faciamus, quæ facere nolumus, mentemque ac rationem in actibus libidinosis turbidâ suâ delectatione absorbet, & de sua dignitate dejicit. Hoc illud est, quod malum appellat Augustinus, & nos cum Augustino malum esse homini, quatenus animal rationale est, affirmamus. Quo malo in primi sceleris

leris pœnam mulctati sunt posterì Adami, Deo non quidem hoc malum creante, sed sinente, ut efflueret è constitutione corporis divinis donis spoliati, postquam à divina gratia, ac primævâ innocentia Adamus peccando exciderat. Quapropter nihil est, quod Phereponus exemplum brutorum adhibeat, ostensurus, libidinosos humani corporis motus malum non esse. In animabus brutis nullum deformitatis sensum libido creat, nihil pudoris ingerit, nihil cum ratione pugnat, quippe quod ratione pecudes ipsi carent. Conformis potius eorum naturæ est huiusmodi motus concupiscentiæ, ut bonum quoque ac perfectio in iis appellari jure possit. At in animalibus ratione præditis, & ratione utentibus, malum, vitium, defectus, & corruptio naturæ libido est, quippe ad inhonestà, & rationi contraria hominem sollicitans, & ad ea impellens, quæ naturam hominis, quatenus rationale animal est, omnino dedecent. *In pecoribus*, inquit Augustinus Lib. 4. Cap. 14. contra Julianum, *malum non est Concupiscentia, quia non adversus spiritum concupiscit, sed eorum potius oblectat spiritum.* Vide & eundem Lib. de Pecc. Orig. Cap. 40. & Lib. Oper. imperf. Cap. 56. Ergo qui se hominem esse recordatur, non sentire, non fateri nequit, quin Concupiscentia carnis, qualis nunc sentitur, unde tot intestinas patimur pugnas, quas etiam Apostolus in se olim deplorabat, malum sit homini, quatenus ratione prædito, ejusque naturæ incommodum, ac vitium.

Quandoquidem verò negare ne nos quidem volumus, aut possumus, quin huiusmodi malum in statu quoque naturæ puræ locum habere potuerit, ita ut culpanda ne sic quidem foret Creatoris justissimi voluntas, qui tale vitium è corporis constitutione effluere vel in puris naturalibus permisisset; imò cum neque disceptare velimus, an tantæ vires in statu Naturæ puræ carnali concupiscentiæ esse potuerint, quantæ nunc à nobis sentiuntur: superest solum, ut inquiramus, feceritne Deus reverà, an non, in primordio rerum hominem adèò inordinatis motibus concupiscentiæ obnoxium. Phereponus cum Pelagianis affirmat. Catholici cum Augustino negant. Id ostendimus primò, quia magis decuit divinam bonitatem atque justiciam, ita hominem innocentem condere, ut corpus animo, inferiora superioribus placidè subdita forent: quod certè secùs nunc evenit in isto corruptæ naturæ statu. Deinde cum constet, Adamum in maxima cum animi, tum corporis felicitate à Deo fuisse creatum, quis eam in iis membris pugnam, cum-  
que

que peccati fomitem, easque concupiscentiæ vires in illo fuisse credat; quæ nunc maximam vel hominibus piis & infelicitatem & periculum animæ creant? Sed quod rem evidentiùs tangit, hæc de primis parentibus scripta sunt Gen. 2. v. 25. *Erant autem uterque nudus. Adam scilicet, uxor ejus, & non erubescabant.* Nihil igitur pudoris nuditas innocentibus hominibus attulerat non aliâ de causa, nisi quia nullum adhuc præter voluntatis arbitrium in membris suis motum, nullam carnis rebellionem, nullum intestinum membrorum bellum contra mentis legem senserant. At postquam Deo inobedientes peccârunt, uti habetur Gen. 3. v. 7. *Aperti sunt oculi amborum: cumque novissent se esse nudos, consuerunt folia ficus & fecerunt sibi perizoniata.* Profectò aliud novi in se, ac in membris suis animadvertere primi homines non potuere, cujus illos pudere inciperet, nisi libidinis motus vel invitâ voluntate factos. Tum sentire cœperunt sui peccati poenam, tum se divinis donis spoliatos deprehenderunt, tum percipuit illos novæ deformitatis, ideòque *perizoniata*, siue *succinctoria*, atque *femoralia*, *chagoroth*, sibi concinnârunt, ut suis aliorumque oculis pudoris aut lasciviæ materiem subtraherent. Ergo tum primum nata est turbida illa libido, inflictaq; hominibus primis in poenam primi peccati à justo Deo fervere finitur in eorum posteris, cum antea non nisi ex imperio aut consensu mentis atque rationis ea membra moverentur, quibus homo ad generationem utitur.

Quid quæso ad hæc tam luculenta divinæ Scripturæ verba reponit Phereponus? Scripserat Augustinus Lib. 13. Cap. 13 de Civ. Dei hæc de primis parentibus: *Senserunt ergo novum motum inobedientis carnis suæ, tanquam recipere poenam inobedientiæ suæ.* Hujusmodi opinionem commentum Phereponus statim vocat, Tum ait pag. 583. *Ne quid aliud hic dicam, non debuit dicere, senserunt, sed sensit Adamus, nam metus aut nullus fuit in Eva aut certè minimè conspicuus, & qui eam in ruborem dare posset.* Telum hoc vetus est à Juliani pharetra petutum, sed ab Augustino jamdiu protritum Lib. 4. Cap. 33. contra eundem Julianum. Attamen cum nos moneat Censor, ut de nuditate primorum parentum cum alios Interpretes, tum præsertim Joannem Clericum consulamus: illi habendæ gratiæ, quod ex interpretum vulgo aliquem seligat, in quem edocendi nos onus transferat. Et ego quidem novi Joannem Clericum, virum & eruditione & ingenio critico reverà celebrem, sed licentia quoque opinandi, æquè famosum, adeòque in sanctos Patres animatum, ut

cùm ipsum audis, alterum, imò ipsum Phereponum audire te putes. Varias Interpres ille Interpretum sententias congerit ad explicandam primorum parentum nuditatem, & perizomata; tum probare videtur, qui dicat, *nudum* in eo loco nihil aliud significare quàm *peccatorem*, seu hominem qui se peccasse animadvertit. Nobis non irascatur Phereponus, si novum hunc suum divinarum Litterarum Interpreterem dicimus interpretatione sua ridendos incredulis exhibere aut Mosem divinum illius Historiæ Scriptorem, aut ipsos parentes primos. Cognoverunt nempe isti se peccatores esse, atque ideò minùs honestas corporis partes velavêre cinctoriis; sivè, ut ipse conjicit, tectum, sub quo habitarent, sibi composuerunt. Quis hæc audiens non rideat aut hominum illorum consilium, aut Historici sacri ingenium? Nam quid rei habent perizomata consuta, & nudis membris aptata, aut habitaculum sibi constructum, cum cognitione antecedentis peccati? Num tegere animæ peccatum poterant nova illa integumenta membrorum? Sed Clericus nullam pudoris causam in Adam & Evæ nuditate reperiebat, remotis nempe arbitris, & sine consensu voluntatis, atque ideò sine culpa nudis, aut etiam sine culpa libidinem concitatis membris. Phereponus verò, cum nullus, aut saltem non conspicuus, fuerit motus in Evæ membris, nullum sentiri ab ea potuisse pudorem ait, eidemque propterea nullam tegendi corporis necessitatem fuisse. Verùm nos cum Augustino dicimus, Evam in membris suis intestinam novamque pugnam, ac inobedientiam sensisse. Sensit ipsa, quid conspicua viri nuditas in se intuite efficeret; & hinc didicit quid vicissim in viro foeminea nuditas efficere posset. Insolita hæc erant, & nullo negotio in poenam criminis à Deo inflicta fuisse uterque intellexit. Quare perizomatium ope deformitatem hujusmodi auferendam, & subtrahendam oculis Adam excitatricem injustæ libidinis nuditatem Eva quoque cognovit.

Cæterùm cum pudor sit tristitiæ species è metu infamiæ propter aliquod vitium aut culpam: quis non videat pudori locum fuisse in primis parentibus ad novum illum membrorum ac libidinis affectum sine voluntatis imperio excitatum? Præterea nonne & nos pudet, & meritò pudet, alia quædam corporis vitia prodere, ac palam deferre, quando iis animi nostri vitium & peccatum causam dedit? Imò nos pudet etiam, & jure pudet, si cum facili possumus, non ea quoque oculis aliorum eripiamus, quæ aut molestiam dolorémque ipsis creent absque utilitate ulla; aut  
eorum



eorum animos, & sensus ad aliquid alliciant ac impellant, quod rationi recte minimè conveniat; aut culpam tacite exprobrent? aut alicujus morbi, sive calamitatis nostræ, quam culpa adduxit voluntaria, & pellere voluntaria amplius medicina non potest, alios moneant. Tales pudoris causas in se invenerunt Adamus & Eva, cum se nudos conspexere, & noverunt, inobedientes carnis motus ex antecedenti peccato venire, & alienis oculis, phantasiæ, ac menti periculum se ingerere, & inobedientiam mentis per illos motus accusari. Qui antea innocentes membra sibi ad nutum obedientia habebant, & alterius nuditate conspecta nihil sentiebant in se, quod voluntati repugnaret, sive mentem de sua tranquillitate ac regno dejiceret, peccatores postea facti non potuerunt non pudore suffundi, cum ad aspectum nuditatis tam diversa in sese experirentur, idèdque velandum censuerunt; quod eorum quoque posterì velandum nunc censent, ab ipsa natura edocti. Nunc audi Augustinum ipsum Lib. 4. Cap. 13. contra Julianum. *Quid autem de motu fœmina, cujus & ipsam puduit, inaniter argumentandum putasti. Non utique fœmina motum visibilem tenuit sed cum in eisdem membris tale aliquid sentiret occultius, quale vir senserat, ambo texerunt, quod alterutrum videndo in alterutrum commoti ambo senserunt & vel unusquisque sibi, vel alter alteri erubuerunt.*

Phereponus tamen insitum fuisse nobis à natura morem istum operiendi pudenda tacite negat in Notis ad Cap. 17. Lib. 14. de Civ. Dei Augustinum enim affirmantem, vel apud ipsos Barbaros, atque Brachmanes in more id esse positum, non vera narrasse nos monet, pag. 585. cum in Africa atque America sint gentes planè nudæ, uti ex oculatis testibus ipse didicit. Sed quamvis populi nonnulli sint, qui nudo penitus corpore adhuc incedant, num idèd minis verum, nos à natura edoceri in honesta illa membra velare? Alioqui non comedere humanas carnes, non mactare senes, sive ipsos etiam parentes, ut senectutis incommodis eripiantur, & abstinere à rapinis, cædibus, aliisque teterrimis ac vituperandis moribus, ne inter leges quidem naturæ referremus, sunt enim quidam in Africa & America integri populi, qui talia adhuc faciunt, & sine pudore faciunt, sive quòd licita censeant, sive quòd habitu in iniquitate firmato pervenerint ad exuendum, sive non sentiendū qualemcumq; in iis operibus pudorē. Ergo quòd adhuc vivant quædā gētes moribus barbaræ numero paucæ, quibus pudori nō sit nudis planè mēbris incedere, nihil impedit, quo

minus dicendus sit infitus nobis à natura nuditatis pudor, quando reliqui, iisque cultiores, & innumeri populi, nostra in sententia exemplo suo conveniunt.

Verùm Phereponus, quanquam concedat, *pudorem* nuditatis inde partim ortum vid. ri, unde dicit Augustinus: attamen addit, multas alias accessisse obtegendi corporis causas, videlicet ne liberis exemplo pessimo, & pravo ad intempestivam luxuriam incitamento foret, parentum nudorum aspectus; ne foedum quid singulis mensibus foeminae exhiberent; ne conjugati ad adulteria excitarentur. Subinde verò scribit: *Hinc paulatim natus nuditatis pudor*, hoc est è causis, & rationibus, quas ipse Phereponus refert, non quas Augustinus affert. At nos vel ante istas causas à Pherepono memoratas, quando certè neque liberi Adamo, neque alii conjuges præter Adamum, & Evam erant, ortum habuisse nuditatis pudorem dicimus ex fide Litterarum sacrarum, quæ mentiri non possunt, & quas non satis animadvertit Phereponus, quantopere ipse per latus oppugnet, ac vulneret, & dubiæ fidei faciat, cum talia scribit. Nihil hîc dico de latebris vel ipsi conjugali copulæ meritò quæsitis, quas idè tantùm Phereponus tolerat aut probat, quòd avertendi sint liberi ab eo periculoso aspectu, non autem quòd ipsa res, in se spectata, pudenda sit. Quasi liberis solis, & non quibuscumque aliis hominibus, hæc sint abscondenda; & quasi hoc ipsum satis non ostendat, aliquod naturæ vitium in iis actibus esse, qui ad impudicitiam, & ad scelera, si conspiciantur, reliquos accendere possunt; & quasi ea res pudenda non sit, quam subsequitur agentis infamia, nisi remotis arbitrâs ac testibus fiat. Hæc leviter excussisse sit satis.

Accuratiùs Pherepono respondendum est irridenti Augustinum, qui Cap. 23. Lib. 14. de Civ. Dei agens de ratione, qua in statu naturæ innocentis propagatum fuisset genus humanum, ità scripsit. *Voluntati membra illa, ut cætera omnia, servirent. Ità genitale arvom vas in hoc opus creatum seminaret, ut nunc terram manus.* Ad quæ statim Phereponus pag. 386. *Hæc est sine ullo voluptatis appetitu; nam eam libidinem vult Augustinus esse peccatum.* Non exaggeret quæso Censor noster, non imponat lectoribus credulis. Fuisset etiam in innocentia statu sua sensibus & carni voluptas, sed quæ mentem non obrueret, sed quæ rationem in sua tranquillitate relinqueret, non qualis nunc sentitur, turbida, immoderata, & hominem ad belluarum conditionem dejiciens. Fuisset & voluptatis appetitus, sed rationi omninò obtemperans  
atque

atque subiectus; & homo voluptatem appetiisset, non tanquam finem, sed tanquam medium ad ea, quæ instituto suo, ac homini ut rationali convenirent. Hæc Augustinus non negat, qui & Cap. 26. ejusdem Libri 14. de Civitate Dei hæc scribit: *Ab sit, ut suspicemur, non potuisse prolem ferri sine libidinis morbo: sed eo voluntatis nutu moverentur illa membra, quo cætera, & sine ardoris illecebroso stimulo cum tranquillitate animi & corporis.* Et Lib. 4. Cap. 2. contra Jul. *Quis negat futurum fuisse concubitum, etiam si peccatum non præcessisset? Sed futurum fuerat, sicut aliis membris, ita etiam genitalibus voluntate motis, non libidine concitatis, aut certè etiam ipsa libidine, non qualis nunc est, sed ad nutum voluntarium serviente.* Eodem autem Lib. Cap. 14. acutè distinguit à vivacitate, utilitate, & necessitate sentiendi, libidinem sentiendi. Tum infra, *ne nimium, inquit, videamur offendere homines, qui voluptatem corporis quomodocumque defendunt, concedit, credi posse, in illo tantæ felicitatis loco carnalium sensuum fuisse libidinem, sed ita ut omnimodo rationalis subdita voluntati, non aliàs adesset, nisi cum per illum vel salutis esset corporis, vel stirpis propagini consulendum, & tanta adesset, ut nulla ex parte mentem de supernarum cogitationum delectatione deponeret &c.* Vide & Lib. I. Cap. 17. contra duas Epist. Pelag. Ab innocentis igitur Adami conditione exclude illecebrosum illum Ardoris stimulum, qui nunc non solùm homine invito membra movet, sed etiam adversus mentis legem pugnat, rationemque reluctantem non rarò sibi subjicit, ac turbidâ delectatione absorbet, & *Libido* carnis appellatur. Cætera quibus generationis opus completur, à terrestri Paradisi felicitate non abfuisse. Imò tunc, ut S. Thomas T. 1. Summæ qu. 98. Art. 2. ad 3. inquit: *Fuisset major delectatio sensibilis, quando esset purior natura, & corpus magis sensibile.* Denique Augustinus libidinem carnis ita peccatum quandoque nominat, uti Apostolus Concupiscentiam *Peccatum* appellavit, nimirum non ut is inferioris partis motus formale peccatum, & culpa sit, sed quòd ad peccatum & culpam inclinet, & tunc dumtaxat proprium & verum fiat peccatum, cum ad illicita ac inhonesta voluntatem rapit. Jam id suprâ nos demonstravimus. Quare videat Phereponus, se aërem verberare, & sibi larvas effingere, ut cum iis digladietur. Cùm Augustinus ait, ita seminandum fuisse *genitale arum*, ut nunc *terram seminat manus*, obedientiam tantùm exprimere voluit membrorum generationi inservientium, qualem humanæ menti præstat manus, non autem è sensibus delectationem moderatam excludit, quam tamen in innocentie

statu nihil rationi perniciosam futuram fuisse putamus.

Quamobrem inania planè sunt, quæ postea Phereponus congerit, ita scribens pag. 586. *Eandem operâ dicere debuisset* (Augustinus) *appetitum cibi grati peccatum esse, nec primos parentes, cum fructus licitos & jucundos comederant, ullâ voluptate titillatos fuisse &c. Adlere etiam eum oportuisset, bruta, quorum organa nostris non absimilia sunt, nullam querere in naturalibus actionibus voluptatem, nam sanè non peccarunt; sed eis defungi spontè naturæ sine ulla penitus cupiditate.* Non hæc certè absurda dicere debuit Augustinus, quia nusquam, nisi in Pherepono cerebro, duxit, sine ullo voluptatis appetitu & sine ulla delectatione sensuum innocentes homines prolem fuisse seminatuos & nunquam docuit libidinem ipsam propriè peccatum esse, nisi eidem contra Legis edicta obediatur. Et miror, qui toties Phereponus comparationem instituat inter pecudes ac animalia ratione præditâ, neque consideret, multa esse homini quidem & brutis communia, quæ tamen in brutis, quippe ratione destitutis, laudanda sint, aut saltem non vituperanda, in hominibus autem ratione utentibus & foeda sint, & vituperanda, & rationali creaturâ prorsus indigna, *Aliud enim est arietis & aliud Publii Africani bonum*, olim Cicero agebat. Sed minùs tolerandis declamationibus, hæc de Augustino scribere pergit nuperus Cenfor: *Postquam Deum planè alium descripsit, ac est: quamque à Scriptura nobis præpingitur, tota etiam naturæ vim infert, ut possit pravæ Interpretationes obscurorum aliquot Scripturæ locorum iucri.* Ubinam Deum Augustinus describit alium, ac est? Ubinam, & qualem naturæ vim infert? Et quænam sunt obscura illa Scripturarum loca, quibus abutitur, ut cælum terramque misceat? Sed hæc ut sine magno labore interferuntur à confidentissimo homine illo, ita a nobis nullo labore negata, suapte naturâ cadunt.

Ab eodem fonte veniunt subsequentes Cenforis notæ ad Cap. 14 Lib. 14. de Civ. Dei. Augustinus, inquit ille, *turpia commenta hic nobis propinat, dumtaxat ut rationem reddat rei, quæ nec fuit, nec erit; nimirum generationis liberorum in statu innocentie, si in eo primi parentes perseverassent; & quidem quia statuit peccatum id esse, quod inest naturæ omnium animalium, nec usquam damnatur, si modò intra leges contineatur; nimirum cupiditatem conjugii, postquam pubertatis annos attigerunt.* Nihil horum sensit Augustinus, imò oppositum sensit, eique talia absurda unus pro sua liberalitate asstringit Phereponus. Neque enim cupiditatem conjugii unquam Libidinem Augustinus appellavit, multoque minùs culpæ damnavit. Alia fuit

fuit ipsi, & planè diversissima carnalis libidinis idea. Imò vidimus, ne turpem quidem libidinis æstum, contra nutum voluntatis membra moventem, & adversus spiritum pugnantem; verum & proprium peccatum ab Augustino censerì, nisi cùm voluntas se abripi sinit ad consentiendum illicitis. Pelagianis ergo oculis, & exulcerato animo, & apud Calvinianos tantùm Interpretes, Libros Augustini Phereponus legisse videtur.

Sed ut istam denique controversiam expediamus, & uberius constet, quàm contra omnem rationem hìc Augustino Phereponus insultet: dicimus, verum quidem esse, humanam mentem atque rationem ex constitutione naturæ habere non posse; neque debere semper ad nutum suum obediens corporis vires, motus, humores, somnum, appetitus, & alia, quæ ad vegetabilem & animale, & mechanicam membrorum œconomiam pertinent. Naturaliter etiam accidit, ut caro sua munia exercens, & in delectationes sibi congruas tendens, adversus spiritum concupiscat, & ingratos ac perniciosos tum animæ, tum rationi motus eliciat. Poterat & istud contingere in statu naturæ puræ, non ex culpa sapientissimi atque optimi Creatoris, sed ex elementorum compage & discordia, atque ex ipsius naturæ creatæ defectu. At certum est nobis, aliter institutam fuisse à Deo naturam primi hominis, hoc est, peculiari divinæ gratiæ prærogativa, & supranaturali freno ita temperatam atque firmatam, ut non sineretur caro quidquam pugnare, neque doloribus neque pravis affectibus, adversus mentem atque rationem, cùm anima pariter & corpus mirabili tunc fruerentur tranquillitate, atque harmoniâ, Peccavere primi parentes. Tunc sublatum fuit illud cœlestis gratiæ frenum, tunc desiit peculiare illud muneris divini præsidium. Quare in homine suis cum naturalibus relicto suapte naturâ emergere tot illi defectus, vitia, & pravi appetitus tum corporis, tum animæ, quæ ab omnibus Adami posteris sentiuntur adhuc, & graviora fiunt, quando ad originale peccatum actualia etiam crimina accedunt. Itaq; per nos etiam liceat Pherepono, tum famem, sitim, & libidinem, tum alios corporis motus mechanicos, nunc naturæ humanæ & spiritui plerumque graves ac infestos, appellare sub ea ratione defectus naturales hominis. quia ab ipsa hominis naturâ sibi relicta, & non à Deo creata procedunt. Liceat, inquam, ipsi, dum modo is quoque fateatur, aliter è divinis manibus innocentis hominis naturam exiisse, hoc est, invidendâ felicitate corporis præditam, & forti rationis imperio in inferiore appetitum donatam; tot

statu nihil rationi perniciosam futuram fuisse putamus.

Quamobrem inania planè sunt, quæ postea Phereponus congerit, ità scribens pag. § 86. *Eàdem operâ dicere debuisset* (Augustinus) *appetitum cibi grati peccatum esse; nec primos parentes, cum fructus licitos & jucundos comederant, ullâ voluptate titillatos fuisse &c. Addere etiam eum oportuisset, brutâ, quorum organa nostris non absimilia sunt, nullam quærere in naturalibus actionibus voluptatem, nam sanè non peccarunt; sed iis defungi spontè naturæ sine ulla penitus cupiditate.* Non hæc certè absurda dicere debuit Augustinus, quia nusquam, nisi in Pherepono cerebro, dixit, hinc ullo voluptatis appetitu & sine ulla delectatione sensuum innocentes homines prolem fuisse seminatuos & nunquam docuit libidinem ipsam propriè peccatum esse, nisi eidem contra Legis edicta obediatur. Et miror, qui toties Phereponus comparationem instituat inter pecudes ac animalia ratione præditâ, neque consideret, multa esse homini quidem & brutis cõmunia, quæ tamen in brutis, quippe ratione destitutis, laudanda sint, aut saltem non vituperanda, in hominibus autem ratione utentibus & fœda sint, & vituperanda, & rationali creaturâ prorsus indigna, *Aliud enim est arietis & aliud Pubii Africani bonum*, olim Cicero agebat. Sed minùs tolerandis declamationibus, hæc de Augustino scribere pergit nuperus Cenfor: *Postquam Deum planè alium descripsit, ac est: quamque à Scriptura nobis præpingitur, totâ etiam naturâ vim infert, ut possis pravæ Interpretationes obscurorum aliquot Scripturæ locorum iueri.* Ubinam Deum Augustinus describit alium, ac est? Ubinam, & qualem naturæ vim infert? Et quænam sunt obscura illa Scripturarum loca, quibus abutitur, ut cœlum terramque misceat? Sed hæc ut sine magno labore interferuntur à confidentissimo homine illo, ità a nobis nullo labore negata, suapte naturâ cadunt.

Ab eodem fonte veniunt subsequentes Cenforis notæ ad Cap. 14 Lib. 14. de Civ. Dei. *Augustinus, inquit ille, turpia commenta hic nobis propinat, dumtaxat ut rationem reddat rei, quæ nec fuit, nec erit; nimirum generationis liberorum in statu innocentia, si in eo primi parentes perseverassent; & quidem quia statuit peccatum id esse, quod inest naturæ omnium animalium, nec usquam damnatur, si modò intra leges contineatur; nimirum cupiditatem conjugii, postquam pubertatis annos attigerunt.* Nihil horum sensit Augustinus, imò oppositum sensit, eique talia absurda unus pro sua liberalitate assingit Phereponus. Neque enim cupiditatem conjugii unquam Libidinem Augustinus appellavit, multoque minùs culpæ damnavit. Alia

fuit

fuit ipsi, & planè diversissima carnalis libidinis idea. Imò vidimus, ne turpem quidem libidinis æstum, contra nutum voluntatis membra moventem, & adversus spiritum pugnantem; verum & proprium peccatum ab Augustino censeri, nisi cum voluntas se abripi sinat ad consentiendum illicitis. Pelagianis ergo oculis; & exulcerato animo, & apud Calvinianos tantum Interpretes, Libros Augustini Phereponus legisse videtur.

Sed ut istam denique controversiam expediamus, & uberius constet, quàm contra omnem rationem hîc Augustino Phereponus insultet: dicimus, verum quidem esse, humanam mentem atque rationem ex constitutione naturæ habere non posse; neque debere semper ad nutum suum obediens corporis vires, motus, humores, somnum, appetitus, & alia, quæ ad vegetabilem & animale, & mechanicam membrorum œconomiam pertinent. Naturaliter etiam accidit, ut caro sua munia exercens, & in delectationes sibi congruas tendens, adversus spiritum concupiscat, & ingratos ac perniciosos tum animæ, tum rationi motus eliciat. Poterat & istud contingere in statu naturæ puræ, non ex culpa sapientissimi atque optimi Creatoris, sed ex elementorum compage & discordia, atque ex ipsius naturæ creatæ defectu. At certum est nobis, aliter institutam fuisse à Deo naturam primi hominis, hoc est, peculiari divinæ gratiæ prærogativa, & supranaturali freno ita temperatam atque firmatam, ut non fineretur caro quidquam pugnare, neque doloribus neque pravis affectibus, adversus mentem atque rationem, cum anima pariter & corpus mirabili tunc fruerentur tranquillitate, atque harmoniâ, Peccavere primi parentes. Tunc sublatum fuit illud cœlestis gratiæ frenum, tunc desiit peculiare illud muneris divini præsidium. Quare in homine suis cum naturalibus relicto suapte naturâ emergere tot illi defectus, vitia, & pravi appetitus tum corporis, tum animæ, quæ ab omnibus Adami posteris sentiuntur adhuc, & graviora fiunt, quando ad originale peccatum actualia etiam crimina accedunt. Itaque per nos etiam liceat Pherepono, tum famem, sitim, & libidinem, tum alios corporis motus mechanicos, nunc naturæ humanæ & spiritui plerumque graves ac infestos, appellare sub ea ratione defectus naturales hominis. quia ab ipsa hominis naturâ sibi relicta, & non à Deo creata procedunt. Liceat, inquam, ipsi, dum modo is quoque fateatur, aliter è divinis manibus innocentis hominis naturam exiisse, hoc est, invidendâ felicitate corporis præditam, & forti rationis imperio in inferiore appetitum donatam; tot

statu nihil rationi perniciosam futuram fuisse putamus.

Quamobrem inania planè sunt, quæ postea Phereponus congerit, ita scribens pag. § 86. *Eandem operâ dicere debuisset* (Augustinus) *appetitum cibi grati peccatum esse; nec primos parentes, cum fructus licitos & jucundos comederant, ullâ voluptate titillatos fuisse &c. Adulere etiam eum oportuisset, brutâ, quorum organa nostris non absimilia sunt, nullam querere in naturalibus actionibus voluptatem, nam sanè non peccarunt; sed eis defungâ sponti naturæ, sine ulla penitus cupiditate.* Non hæc certè absurda dicere debuit Augustinus, quia nusquam, nisi in Pherepono cerebro, dixit, hinc ullo voluptatis appetitu & sine ulla delectatione sensuum innocentes homines prolem fuisse seminatuos & nunquam docuit libidinem ipsam propriè peccatum esse, nisi eidem contra Legis edicta obediatur. Et miror, qui toties Phereponus comparationem instituat inter pecudes ac animalia ratione præditâ, neque consideret, multa esse homini quidem & brutis cõmunia, quæ tamen in brutis, quippe ratione destitutis, laudanda sint, aut saltem non vituperanda, in hominibus autem ratione utentibus & fœda sunt, & vituperanda, & rationali creaturâ prorsus indigna, *Aliud enim est arietis & aliud Publii Africani bonum*, olim Cicero agebat. Sed minùs tolerandis declamationibus, hæc de Augustino scribere pergit nuperus Cenfor: *Postquam Deum planè alium descripsit, ac est: quamque à Scriptura nobis prapingitur, totâ etiam naturâ vim infert, ut possis pravas Interpretationes obscurorum aliquot Scripturæ locorum iuværi.* Ubinam Deum Augustinus describit alium, ac est? Ubinam, & qualem naturæ vim infert? Et quænam sunt obscura illa Scripturarum loca, quibus abutitur, ut cœlum terramque misceat? Sed hæc ut sine magno labore interferuntur à confidentissimo homine illo, ita a nobis nullo labore negata, si apte naturâ cadunt.

Ab eodem fonte veniunt subsequentes Cenforis notæ ad Cap. 14 Lib. 14. de Civ. Dei. *Augustinus, inquit ille, turpia commenta hic nobis propinat, dumtaxat ut rationem reddat rei, quæ nec fuit, nec erit; nimirum generationis liberorum in statu innocentie, si in eo primi parentes perseverassent; & quidem quia statuit peccatum id esse, quod inest naturæ omnium animalium, nec usquam damnatur, si modò intra leges contineatur; nimirum cupiditatem conjugii, postquam pubertatis annos attigerunt.* Nihil horum sensit Augustinus, imò oppositum sensit, eique talia absurda unus pro sua liberalitate assingit Phereponus. Neque enim cupiditatem conjugii unquam Libidinem Augustinus appellavit, multoquæ minùs culpæ damnavit. Alia fuit



fuit ipsi, & planè diversissima carnalis libidinis idea. Imò vidimus, ne turpem quidem libidinis æstum, contra nutum voluntatis membra moventem, & adversus spiritum pugnantem, verum & proprium peccatum ab Augustino censeri, nisi cum voluntas se abripi sinat ad consentiendum illicitis. Pelagianis ergo oculis, & exulcerato animo, & apud Calvinianos tantum Interpretes, Libros Augustini Phereponus legisse videtur.

Sed ut istam denique controversiam expediamus, & uberius constet, quàm contra omnem rationem hîc Augustino Phereponus insultet: dicimus, verum quidem esse, humanam mentem atque rationem ex constitutione naturæ habere non posse; neque debere semper ad nutum suum obediens corporis vires, motus, humores, somnum, appetitus, & alia, quæ ad vegetabilem & animale, & mechanicam membrorum œconomiam pertinent. Naturaliter etiam accidit, ut caro sua munia exercens, & in delectationes sibi congruas tendens, adversus spiritum concupiscat, & ingratos ac perniciosos tum animæ, tum rationi motus eliciat. Poterat & istud contingere in statu naturæ puræ, non ex culpa sapientissimi atque optimi Creatoris, sed ex elementorum compage & discordia, atque ex ipsius naturæ creatæ defectu. At certum est nobis, aliter institutam fuisse à Deo naturam primi hominis, hoc est, peculiari divinæ gratiæ prærogativa, & supranaturali freno ita temperatam atque firmatam, ut non fineretur caro quidquam pugnare, neque doloribus neque pravis affectibus, adversus mentem atque rationem, cum anima pariter & corpus mirabili tunc fruerentur tranquillitate, atque harmoniâ, Peccavere primi parentes. Tunc sublatum fuit illud cœlestis gratiæ frenum, tunc desiit peculiare illud muneris divini præsidium. Quare in homine suis cum naturalibus relicto suapte naturâ emergere tot illi defectus, vitia, & pravi appetitus tum corporis, tum animæ, quæ ab omnibus Adami posteris sentiuntur adhuc, & graviora fiunt, quando ad originale peccatum actualia etiam crimina accedunt. Itaque per nos etiam liceat Pherepono, tum famem, sitim, & libidinem, tum alios corporis motus mechanicos, nunc naturæ humanæ & spiritui plerumque graves ac infestos, appellare sub ea ratione defectus naturales hominis. quia ab ipsa hominis naturâ sibi relicta, & non à Deo creata procedunt. Liceat, inquam, ipsi, dum modo is quoque fateatur, aliter è divinis manibus innocentis hominis naturam exiisse, hoc est, invidendâ felicitate corporis præditam, & forti rationis imperio in inferiorem appetitum donatam; tot

statu nihil rationi perniciosam futuram fuisse putamus.

Quamobrem inania planè sunt, quæ postea Phereponus congerit, ita scribens pag. 586. *Eandem operâ dicere debuisset* (Augustinus) *appetitum cibi grati peccatum esse; nec primos parentes, cum fructus licitos & jucundos comederant, ullâ voluptate irritatos fuisse &c. Addere etiam eum oportuisset, brutâ, quorum organa nostris non absimilia sunt, nullam querere in naturalibus actionibus voluptatem, nam sanè non peccarunt; sed eis defungâ spontè natura, sine ulla penitus cupiditate.* Non hæc certè absurda dicere debuit Augustinus, quia nusquam, nisi in Pherepono cerebro, dixit, sine ullo voluptatis appetitu & sine ulla delectatione sensuum innocentes homines prolem fuisse seminatuos & nunquam docuit libidinem ipsam propriè peccatum esse, nisi eidem contra Legis edicta obediatur. Et miror, qui toties Phereponus comparationem instituat inter pecudes ac animalia ratione præditâ, neque consideret, multa esse homini quidem & brutis cõmunia, quæ tamen in brutis, quippe ratione destitutis, laudanda sint, aut saltem non vituperanda, in hominibus autem ratione utentibus & fœda sunt, & vituperanda, & rationali creaturâ prorsus indigna, *Aliud enim est arietis & aliud Pubii Africani bonum*, olim Cicero agebat. Sed minùs tolerandis declamationibus, hæc de Augustino scribere pergit nuperus Cenfor: *Postquam Deum planè alium descripsit, ac est: quamque à Scriptura nobis prapingitur; totâ etiâ natura vim infert, ut possis pravâs Interpretationes obscurorum aliquot Scripturæ locorum tueri.* Ubinam Deum Augustinus describit alium, ac est? Ubinam, & qualem naturæ vim infert? Et quænam sunt obscura illa Scripturarum loca, quibus abutitur, ut cœlum terramque misceat? Sed hæc ut sine magno labore interferuntur à confidentissimo homine illo, ita a nobis nullo labore negata, suapte naturâ cadunt.

Ab eodem fonte veniunt subsequentes Cenforis notæ ad Cap. 14 Lib. 14. de Civ. Dei. Augustinus, inquit ille, turpia commenta hic nobis propinat, dumtaxat ut rationem reddat rei, quæ nec fuit, nec erit; nimirum generationis liberorum in statu innocentia. si enim eo primi parentes perseverassent; & quidem quis statuit peccatum id esse, quod inest naturæ omnium animalium, nec usquam damnatur, si modò intra leges contineatur; nimirum cupiditatem conjugii, postquam pubertatis annos attigerunt. Nihil horum sensit Augustinus, imò oppositum sensit, eique talia absurda unus pro sua liberalitate asingit Phereponus. Neque enim cupiditatem conjugii unquam Libidinem Augustinus appellavit. multoque minùs culpæ damnavit. Alia

fuit

fuit ipſi, & planè diverſiſſima carnalis libidinis idea. Imò vidimus, ne turpem quidem libidinis æſtum, contra nutum voluntatis membra moventem, & adverſus ſpiritum pugnantem, verum & proprium peccatum ab Auguſtino cenſeri, niſi cùm voluntas ſe abripi ſinit ad conſentiendum illicitis. Pelagianis ergo oculis, & exulcerato animo, & apud Calvinianos tantum Interpretes, Libros Auguſtini Phereponus legiſſe videtur.

Sed ut iſtam denique controverſiam expediamus, & uberius conſtet, quàm contra omnem rationem hîc Auguſtino Phereponus inſulter: dicimus, verum quidem eſſe, humanam mentem atque rationem ex conſtitutione naturæ habere non poſſe; neque debere ſemper ad nutum ſuum obediens corporis vires, motus, humores, ſomnum, appetitus, & alia, quæ ad vegetabilem & animale, & mechanicam membrorum œconomiam pertinent. Naturaliter etiam accidit, ut caro ſua munia exercens, & in delectationes ſibi congruas tendens, adverſus ſpiritum concupiſcat, & ingratos ac pernicioſos tum animæ, tum rationi motus eliciat. Poterat & iſtud contingere in ſtatu naturæ puræ, non ex culpa ſapientiſſimi atque optimi Creatoris, ſed ex elementorum compage & diſcordia, atque ex ipſius naturæ creatæ defectu. At certum eſt nobis, aliter iſtitutam fuiſſe à Deo naturam primi hominis, hoc eſt, peculiari divinæ gratiæ prærogativa, & ſupranaturali freno ita temperatam atque firmatam, ut non ſineretur caro quidquam pugnare, neque doloribus, neque pravis affectibus, adverſus mentem atque rationem, cùm anima pariter & corpus mirabili tunc fruèrentur tranquillitate, atque harmoniâ, Peccavere primi parentes. Tunc ſublatum fuit illud cœleſtis gratiæ frenum, tunc deſiit peculiare illud muneris divini præſidium. Quare in homine ſuis cum naturalibus relicto ſuapte naturâ emere tot illi defectus, vitia, & pravi appetitus tum corporis, tum animæ, quæ ab omnibus Adami poſteris ſentiuntur adhuc, & graviora fiunt, quando ad originale peccatum actualia etiam crimina accedunt. Itaq; per nos etiam liceat Pherepono, tum famem, ſitim, & libidinem, tum alios corporis motus mechanicos, nunc naturæ humanæ & ſpiritui plerumque graves ac infeſtos, appellare ſub ea ratione defectus naturales hominis. quia ab ipſa hominis naturâ ſibi relicta, & non à Deo creata procedunt. Liceat, inquam, ipſi, dum modo is quoque fateatur, aliter è divinis manibus innocentis hominis naturam exiſſe, hoc eſt, invidendâ felicitate corporis præditam, & forti rationis imperio in inferiore appetitum donatam; tot

statu nihil rationi perniciosam futuram fuisse putamus.

Quamobrem inania planè sunt, quæ postea Phereponus congerit, ita scribens pag. 586. *Eandem operâ dicere debuisset* (Augustinus) *appetitum cibi grati peccatum esse; nec primos parentes, cum fructus licitos & jucundos comederant, ullâ voluptate titillatos fuisse &c. Addere etiam eum oportuisset, brutâ, quorum organa nostris non absimilia sunt, nullam quærere in naturalibus actionibus voluptatem, nam sanè non peccarunt; sed iis defungi spontè naturæ, sine ulla penitus cupiditate.* Non hæc certè absurda dicere debuit Augustinus, quia nusquam, nisi in Pherepono cerebro, dixit, hinc ullo voluptatis appetitu & sine ulla delectatione sensuum innocentes homines prolem fuisse seminaturos & nunquam docuit libidinem ipsam propriè peccatum esse, nisi eidem contra Legis edicta obediatur. Et miror, qui toties Phereponus comparationem instituat inter pecudes ac animalia ratione præditâ, neque consideret, multa esse homini quidem & brutis communia, quæ tamen in brutis, quippe ratione destitutis, laudanda sint, aut saltem non vituperanda, in hominibus autem ratione utentibus & fœda sunt, & vituperanda, & rationali creaturâ prorsus indigna, *Aliud enim est arietis & aliud Publii Africani bonum*, olim Cicero agebat. Sed minùs tolerandis declamationibus, hæc de Augustino scribere pergit nuperus Cenfor: *Postquam Deum planè alium descripsit, ac est: quamque à Scriptura nobis prapingitur; tota etiam natura vim infert, ut possis pravæ Interpretationes obscurorum aliquot Scripturæ locorum tueri.* Ubinam Deum Augustinus describit alium, ac est? Ubinam, & qualem naturæ vim infert? Et quænam sunt obscura illa Scripturarum loca, quibus abutitur, ut cælum terramque misceat? Sed hæc ut sine magno labore interferuntur à confidentissimo homine illo, ita a nobis nullo labore negata, si apte naturâ cadunt.

Ab eodem fonte veniunt subsequentes Cenforis notæ ad Cap. 14 Lib. 14. de Civ. Dei. Augustinus, inquit ille, turpia commenta hîc nobis propinat, dumtaxat ut rationem reddat rei, quæ nec fuit, nec erit; nimirum generationis liberorum in statu innocentie, si in eo primi parentes perseverassent; & quidem quia statuit peccatum id esse, quod inest naturæ omnium animalium, nec usquam damnatur, si modò intra leges contineatur; nimirum cupiditatem conjugii, postquam pubertatis annos attigerunt. Nihil horum sensit Augustinus, imò oppositum sensit, eique talia absurda unus pro sua liberalitate assingit Phereponus. Neque enim cupiditatem conjugii unquam Libidinem Augustinus appellavit, multoque minùs culpæ damnavit. Alia fuit

fuit ipsi, & planè diversissima carnalis libidinis idea. Imò vidimus, ne turpem quidem libidinis æstum, contra nutum voluntatis membra moventem, & adversus spiritum pugnantem; verum & proprium peccatum ab Augustino censeri, nisi cum voluntas se abripi sinat ad consentiendum illicitis. Pelagianis ergo oculis; & exulcerato animo, & apud Calvinianos tantum Interpretes, Libros Augustini Phereponus legisse videtur.

Sed ut istam denique controversiam expediamus, & uberius constet, quàm contra omnem rationem hîc Augustino Phereponus insultet: dicimus, verum quidem esse, humanam mentem atque rationem ex constitutione naturæ habere non posse; neque debere semper ad nutum suum obediens corporis vires, motus, humores, somnum, appetitus, & alia, quæ ad vegetabilem & animale, & mechanicam membrorum œconomiam pertinent. Naturaliter etiam accidit, ut caro sua munia exercens, & in delectationes sibi congruas tendens, adversus spiritum concupiscat, & ingratos ac perniciosos tum animæ, tum rationi motus eliciat. Poterat & istud contingere in statu naturæ puræ, non ex culpa sapientissimi atque optimi Creatoris, sed ex elementorum compage & discordia, atque ex ipsius naturæ creatæ defectu. At certum est nobis, aliter institutam fuisse à Deo naturam primi hominis, hoc est, peculiari divinæ gratiæ prærogativa, & supranaturali freno ita temperatam atque firmatam, ut non fineretur caro quidquam pugnare, neque doloribus neque pravis affectibus, adversus mentem atque rationem, cum anima pariter & corpus mirabili tunc fruerentur tranquillitate, atque harmoniâ, Peccavere primi parentes. Tunc sublatum fuit illud cœlestis gratiæ frenum, tunc desiit peculiare illud muneris divini præsidium. Quare in homine suis cum naturalibus relicto suapte naturâ emersere tot illi defectus, vitia, & pravi appetitus tum corporis, tum animæ, quæ ab omnibus Adami posteris sentiuntur adhuc, & graviora fiunt, quando ad originale peccatum actualia etiam crimina accedunt. Itaque per nos etiam liceat Pherepono, tum famem, sitim, & libidinem, tum alios corporis motus mechanicos, nunc naturæ humanæ & spiritui plerumque graves ac infestos, appellare sub ea ratione defectus naturales hominis. quia ab ipsa hominis naturâ sibi relicta, & non à Deo creata procedunt. Liceat, inquam, ipsi, dum modo is quoque fateatur, aliter è divinis manibus innocentis hominis naturam exiisse, hoc est, invidendâ felicitate corporis præditam, & forti rationis imperio in inferiorem appetitum donatam; tot

verò corporis ærumnas , & pravy ac effrenes animorum affectus, quibus obnoxii nunc sumus, à primi hominis inobedientia fluxisse, & esse peccati illius pœnam , atque aded sub hac ratione dicendos non esse naturales humanæ naturæ defectus. Hæc Augustini sententia est, hæc sententia veracis Ecclesiæ.

Cùm ergo dicit Augustinus, turbidum libidinis æstum nunc humanæ naturæ communem cum brutis , abfuturum fuisse à statu originalis Justitiæ primorum parentum, nihil eos de tanta loci & naturæ beatitate deiecisset divini præcepti violatio: quid quæso dicit, quod non facillimum Deo & ejus bonitati convenientissimum fuerit facere , & naturæ humanæ contingere , Deo volente, non potuerit? Deum autem & hoc reverà voluisse, & reapse fecisse, nemo nisi Pelagianâ vertigine præoccupatus non perspiciat apertissime scriptum in sacris Litteris. Ex humiorum pugna , & corruptione , atque ex mechanicis legibus nunc ex anima omnium hominum solvitur corpus, quam dissolutionem *mortem* appellamus. Et tamen nisi vetitum comedisset potum , mortem primus parens nullam sensisset, uti Deus Gen. 2. 17. pollicitus fuerat , atque aded nullus è tot aliis mœchanicis motibus, hoc est, morbis, & periculis, quæ hominem ad mortem compellunt , tunc futurus erat. Motu quoque mœchanico , & naturâ corporis ita ferente, nunc parientes mulieres gravi dolore torquentur. At innocentis Eva nihil tale sensisset. Ex naturali etiam terrarum ingens nunc tribuli & spinæ emergunt ; homines verò in sudore vultus sui vesci pane coguntur: quæ tamen omnia ab innocentis naturæ statu abfutura fuisse deducimus Gen. Cap. 3. Si tot ergo prærogativis primorum parètum corporalem vitam donavit Deus: quæto majoribus eorum vitam spiritalem, hoc est animam, ditasse credendus est, ut nempe rationi prorsus obtemperaret, & subjecta esset caro nullumque motum ederet, quo tranquillitas & sanitas rationis beatissimo illo tempore læderetur? Et ad ipsam libidinem scèdam quod attinet , cuius effrenem impetum , & voluntati obluçantem , & rationi rebellem, nunc nemo non sentit, cuius neminem honesta discernentem non pudet inò non piget, nonne satis apertè innuunt divinæ Litteræ ipsâ quoque caruisse primos parentes , quando nullus eos nuditatis pudor ante peccatū urgebat; post peccatū verò ita invalit , ut illicò inhonesta corporis membra ( quò etiam epitheto verenda Apostolus ipse distinguit in I. ad Cor. XII. ) femoralibus operuerint? Hæc seriò perpende. Lege itidè, quæ Augu-

gustinus non uno in loco de hac re luculentissime conscripfit, & potissimum Lib. 2. Cap. 10. de Nupt. & Concup. & contra Julian. Lib. 3. 4. 5. de Civ. Dei Lib. 14. & contra duas Epistolas Pelagianorum. Tum verò palam fiet, tantum abesse, ut Augustini & Catholicorum sententia ullam naturæ vim inferat, ut qui inter Christianos secus sentiat, & seqti hic velit sive Pelagianos, sive Phereponum, atque Socinum, manifestam vim auctoritati divinarum Scripturarum inferre deprehendatur.

---

## CAPUT IV.

*Phereponus Pelagii Patronus. Episcopi Catholici propter damnatum Pelagium perperam injustitiæ accusati. Liberum arbitrium reverà à Pelagianis inflatum. De qua gratia Dei disputaretur inter Catholicos atque Pelagium. Post Augustinum non adoptatà in Ecclesia Catholica Pelagii Opiniones. Consecraria quadam dura à Pelagianis, & à Pherepono objecta, minimè admissa in Augustiniana Sententia de Gratia & libero Arbitrio. Quam gratiam negaret Pelagius. Africani Patres à Semipelagianismi nota liberati, & æquitas in eorum judiciis contra Pelagium ac Celestium minimè desiderata.*

**J**Am Pelagii patrociniū, uti hætenus vidimus, apertà fronte Phereponus suscepit. Cùm autem pugnam pro deplorato Hæresiarcha multis aliis in locis, & acrius etiam quàm antea, instaurare non erubescat, res poscit, ut continuatâ serie orationis perpendamus, quidquid ille profert in Pelagianæ Hæresis tutelam. Epistola inter Augustinianas 175. olim 90. data est ad Innocentium I. Pontificem Maximum à Patribus Carthaginensis Concilii habiti A.C. 416. contra Pelagianos. Multa adversus illam commentatur Phereponus, odio non minus in Augustinum, quàm in Ecclesiæ Catholicæ doctrinam. Quod tamen antequam faciat, veritus ne quisquam candorem suum calumniatur, Lectores præmonendos censet, multa esse, quæ sibi in doctrina Pelagii, ejusq; sequacium improbantur, adversarios tamen ejus non ita sese gessisse, ac ratiocinatos esse, ut à se possint etiam per

omnia probari. Amo candidam hominis confessionem, sed aded brevem & obscuram in re tanta non laudo. Vereor siquidem, ut apud attentos Lectores candore hujusmodi suo eluere ulla ex parte possit suspicionem Pelagianismi altè exhibiti, quem tamen ille amovere se posse fortasse censuit magnificis hisce præmissis vocibus. Certum est, cum Pelagio consentire prorsus Phereponum in inficiando *Originali Peccato*, in *Pado baptismi* necessitate, & foedæ libidinis origine neganda, in notionibus gratiæ homini ad æternam salutem necessariæ, in liberi arbitrii viribus extollendis, in œconomia Prædestinationis, aliisq; horum dogmatum confectariis. Quænam tandem restant, & quænam adhuc esse possunt multa illa, quæ in Pelagio Phereponus se improbare fatetur, quando præcipua in eo probat, propter quæ pertinacem Hæreticum illum Ecclesia Catholica execrata est, atque damnavit? Quem ergo fructum ex hac sua admodum ingeniosa animorum præoccupatione Phereponus exspectet, non video, nisi ut persuadeat, se tantummodo in Pelagianis alia multa damnare, quæ ipsi concorditer cum Catholicis credebant.

Sed his dimissis, audiamus novam Pelagii Apologiam, immo totius Christiani orbis accusationem gravissimam. *Damnatus quidem ille est*, inquit Phereponus, pag. 517. & *conviciis exagitatus ab omnibus, etiam quibus ejus dogmata ignota erant, ex quo est ab Africanis Episcopis infamatus; sed nulla hominum damnatio efficere potest, ut quod verum fuit, falsum fiat, & vice versâ nulla hominum laudes ex errore veritatem faciunt.* Posteaquam abunde à tot Catholicis Scriptoribus, & in hoc etiam Libro, demonstratum est, quantum ab erroris periculo absit vera Christi Ecclesia, siue in probandis, siue in improbandis dogmatibus ad fidem sanctissimam spectantibus: non est, quod nos laboremus in ostendendo, supervacaneum esse ad Pelagii defensionem postremum hocce Phereponi axioma. Addit: *Præterea notum est, in magnis cœtibus res magnis affectibus dijudicari.* Equidem id notum fateor; sed illud æquè notum est nobis, in Episcoporum Catholicorum cœtibus, ritè institutis, atque peractis, divinum adesse Spiritum, ejusque interno afflatu fieri, ne sacri Pastores pravis affectibus in transversum acti veritatem Christianæ Doctrinæ dissimulent, aut perdant. *Nec in re satis difficili, pergit scribere Censor, facile fuit verum à falso secernere omnibus illis Africanis Episcopis, quorum nonnulli ne scribere quidem potuisse dicuntur in Collat. Carthag. C. 133. & doctissimi, præter dicendi facultatem, pro modulo illius*  
*avi,*



*ævi, quid eximium habuerint, non video.* En qui suum candorem exprimat Phereponus, prodens quo loco habeat ipse tot doctissimos ac illustres Augustiniani ævi Patres, inter quos ipsi Augustino primas concedere iniquum non fuerit. Quod cum facit confidentissimus homo, necesse profectò est, ut se non iudicio minus, quàm eruditione præponat innumeris aliis celeberrimis tot subsequantium sæculorum Theologis, à quibus cum Augustinus, tum Augustiniani ævi Patres, summo in honore habiti sunt, & eximiis laudibus ornati. Africanis illis Episcopis facile fuisse verum à falso discernere in Pelagii causa difficili, senserunt, & sentiunt Catholici omnes, neque Phereponus ullâ ratione contrarium suadet. Et quid ad causam Pelagii, si unus aut alter Episcopus in causa Donati ne scribendi quidem peritus fuisset, quod tamen contigisse non ajo? Sicuti nòrunt, qui vel leviter Collationem Carthaginensem perspectam habent, res poscebat, ut vel minus docti Episcopi tunc adessent numerum facturi. In causa Pelagii aliter actum est. Non omnium cœtus fuit, sed eruditiorum; & siquidem docti simul atque indocti convenissent, præsto omnibus fuisset ex Christi promissis Spiritus veritatis, ne errarent. Præterquam, quòd ubi de Traditione colligenda res est, vel ipsum vulgus, nedum Episcopi, facile doctrinam veram assequi & exponere possunt. Et profectò neque Episcopi Catholici, neque ipse populus tunc ignorabat, an omnes homines in Adamo peccassent, an parvulorum Baptismus necessarius foret, & quânam Christi gratiâ indigerent homines ad salutaria opera exercenda, atque alia ejusmodi in controversiam à Pelagio adducta. Phereponus autem post hæc subjiciens: *Non dicerem hac, nisi viderem, multitudine, & auctoritate multò magis quàm rationibus pugnari,* nihil aliud dicit, quàm quod quotidie dolor & cœcitas eorum dicit, qui in aliqua causa justissimè damnati fuêro. Innumeris rationibus, quæ adhuc prostant, pugnatum est à Catholicis adversus Pelagianos. Nisi externos oculos clausit Phereponus, ne illas legeret, certè clausit internos, ne intelligeret. Sed ipsum audiamus in aliquas ex his Catholicorum rationibus pro suo instituto atque odio decertantem.

De Cœlestio ac Pelagio hæc in laudata ad Innocentium I. Papam Epistola Synodica scribunt Carthaginenses Patres: *Id agunt isti damnabilibus disputationibus suis, ut non defendendo, sed potiùs in superbiam sacrilegam extollendo*  
libo.

*liberum arbitriatis, nullum relinquunt locum Gratiae Dei, quæ Christiani sumus.* Se non capere inquit Phereponus pag. 517. quæ Pelagius & Cœlestius in superbiam extollerent liberum arbitrium, quando fatebantur Deum humanæ naturæ, omniumque ejus facultatum Creatorem, adeò ut ei debeant homines quidquid habent boni, & ab eo quasi ab omnium rerum Domino pendeant; & quando affirmabant, Deum ignoscere voluisse hominibus peccatoribus, & æternam vitam largiri, si modò Evangelio parerent, *misso ad illos, ex mera gratia, Servatore Jesu Christo, qui gratiam illam Dei adnuntiaret hominibus, eosque ad officium misericorditer revocaret,* miraculis etiam additis, quibus fidem sibi vel apud pertinaces faceret. En quàm jejune, quàm cautè de Servatore nostro Phereponus hic, licèt ex sententia Pelagianorum, loquatur. Nullum aliud Christi ministerium memorat, quàm Angeli, seu Nuntii, & Prophetæ. Quid ipse hic sentiat, nescio. Certè Pelagianos de Christo longè magnificentius sensitse nos facile ostendere possumus; sed pergamus. Deinde ait, Pelagium confessum fuisse internum etiam auxilium à Deo hominibus suppeditari, quo eorum animos illustret; & regenerationem per Baptismum dari; atque à libero arbitrio pendere, ut possit rectè uti, aut abuti tot divinis beneficiis. Tandem his verbis orationem suam concludit: *Est igitur, ex sententia Pelagii, tur Deo gratias agunt homines, sed non cur sibi placeant ac plaudant. Africana, aut Punica Rhetorica exaggeratio fuit, cum liberum arbitrium in sacrilegàm superbiam extollere dictus est.*

At nos respondemus, non Punicæ Rhetoricæ exaggerationem fuisse illa vocabula, sed quidem Phereponianæ eloquentiæ flosculos esse ista dicteria, atque hic Phereponus satis proderè aut ignorantiam non mediocrem, aut nimis turbidos affectus. Utique multa divinarum gratiarum genera Pelagius illiusque gregarii agnoscebant, eaque magnâ verborum pompâ extollebant, quo imperitis persuaderetur, se quoque fateri, nos omnem bonum Deo optimo ejusque gratiæ debere. Et istas gratias Augustinus cæterique Catholici agnoscebant; immo effecere ipsius Augustini & Catholicorum voces, ut Pelagius nullam primò aliam gratiam confessus, quàm naturam libero arbitrio præditam, sensim & istas fateretur. Sed non hic sita erat controversia inter Catholicos, atque Pelagium. Aliam gratiam in primis necessariam, aliud illudque præstantissimum super omnia Donum, & Adjutorium Dei, posce-

bant

bant Catholici, ut confiteretur Pelagius, nempe gratiam illam, quam naturæ viribus in nobis efficere non possumus; gratiam, quæ in hominum etiam voluntates efficaciter influunt. gratiam, quæ intactâ libertate voluntatis potest ac solet de nolentibus volentes, & de inutiliter volentibus utiliter volentes facere, quæ liberi arbitrii vires nimium infirmas reficit, & caritatem Dei diffundit in cordibus nostris per Spiritum sanctum, qui datus est nobis, sine qua liberum hominis arbitrium nullum optat, nullum incipit, nullum perficit opus bonum, ad salutem æternam pertinens, quæ demum in nobis, & nobiscum operatur, quæcumque veram rationem habent placendi ipsius gratiæ auctori ac dispensatori Deo per Jesum Christum Dominum nostrum. Externæ dumtaxat gratiæ, exteriora tantummodo auxilia erant, quæ Pelagius commendabat; & siquidem internam etiam intellectûs humani illuminationem à Deo fieri is concedebat, certè nullum aliud internum Dei auxilium fatebatur. Illa autem in doctrina; in lege, in miraculis, in suasionibus, in terroribus, aliisque hujusmodi, constituta auxilia, ostendunt solum homini, quid faciendum sit, quid cavendum; non etiam voluntati ad malum prone, & debilitato post primi parentis peccatum hominis arbitrio vires præbent, ut salutare bonum re ipsa velit, & faciat, malumque detestetur, ac fugiat. Oportet ergo aliam fateri gratiam, quæ erigat, & adjuvet jacentem infirmamque mortalium voluntatem, eam videlicet inflammando, eique caritatem inspirando, ut quæ per legem atq; doctrinam facienda, aut vitanda novimus, per ejus interiorem opem exequamur. Hanc autem gratiam nunquam adducti fuere Pelagiani, ut homini confiterentur necessariam.

Nunc ergo à Pherepono petimus, an benè animadvertit, de quali gratia inter Catholicos ac Pelagianos quæstio verteretur. Quod si animadvertit, cur hic tam cautè dissimulavit? Nimirum post commemorata tot exteriorum gratiarum genera, quæ Pelagius agnoscebat, si commemorata quoque fuisset vera Christi gratia, quam inficiabantur Pelagiani, continuò intellexissent vel imperiti, quàm insulsum foret illud in Punicam Rhetoricam scœmma, & quàm ineptè exaggeratio appellaretur facta à Patribus Africanis sacrilegæ superbiæ mentio. Nam qui audit, contendere Catholicos adversus Pelagium, nihil post Adami lapsum per se valere liberum hominis arbitrium ad salutaria opera salutariter exercenda, ipsumque indigere  
inter-

interno Dei adiutorio, quod voluntati virtutem inspiret, defectumque suppleat naturalis facultatis; qui, inquam, hoc audit, non intelligere exemplò nequit, rectè Catholicos etiam affirmare, liberum arbitrium à Pelagio *in sacrilegam superbiam extolli*. Si enim verum est, quod Catholici ex manifesta divinarum Scripturarum, & legitimæ Traditionis auctoritate, verissimum esse demonstrant, nempe ab hac peculiari, internâ, & efficaci gratiâ cum libero Arbitrio conjuncta, non autem à solius liberi Arbitrii & naturæ viribus, aut meritis, justificationem, caritatem, atque omnia opera bona, virtutisque veras emanare: Pelagium verò contra sentire: non est Rhetoricus color, non est exaggeratio, sed naturalis Catholicorum deductio, affirmare, à Pelagio liberum Arbitrium extolli in superbiam, eamque sacrilegam, quia adversus Deum.

Sed inquit Phereponus, commemoratis tot divinis gratiis, quas Pelagius libenter fatebatur: *est ex Pelagii sententia, cur Deo gratias agant homines, sed non cur sibi placeant, ac plaudant*. Jam obsoleta, jam millies protrita est ab Augustino hujusmodi argumentatio. Eadem ingeminabat Pelagius, eadem Julianus. Augustinus autem ostendebat, ne sic quidem veram Dei gratiam illos fateri, quam tamen finè impietate nemo negare potest; neque aliud ab ipsis laudari, quàm legem, atque doctrinam, & extrinseca præsidia sub tam speciosis gratiarum vocabulis; & inflari per eos liberum Arbitrium, quando ejus viribus id tribuebant, quod gratiæ ab iis negatæ tribuendum esse divinæ Literæ clamant. Audi, quid ille Juliano respondeat Lib. 3. Cap. 106. Op. Imp. *Tam multa dicis, quibus nos adjuvat Deus, id est, præcipiendo, benedicendo, sanctificando, coercendo, provocando, illuminando, & non dicis caritatem dando, cum dicat Joannes Apostolus: Caritas ex Deo est. Unde item dicit: Ecce qualem caritatem dedit nobis Pater ut filii Dei vocemur, & simus. In hac caritate, quæ cordi humano Spiritu, non Litera datur, etiam potestas illa intelligitur, de qua idem ipse in Evangelio suo: Dedit eis, inquit, potestatem filios Dei fieri. Hanc vos ab homine esse dicitis per liberum Arbitrium, Spiritum habentes hujus mundi, non eum, qui ex Deo est, propter quod nescitis, quæ à Deo donata sint nobis, &c.* In eodem etiam Lib. 3. Cap. 122. *Inter divina Gratia species, inquit, si poneritis dilectionem, quam non ex nobis, sed ex Deo esse, eamque Deum dare filiis suis, aperitissime legitis, sine qua nemo pie vivit, & cum qua nemo nisi pie vivit, sine qua*

*qua nullus est bona voluntas, & cum qua nullus est nisi bona voluntas: verè liberum defenderetis, non inflaretis Arbitrium. Inviçtiſſima iſtius ſententiæ argumenta paſſim legas in Operibus ſancti Auguſtini, aliorumque Patrum atque Theologorum.*

Poſthæc poenâ talionis agendum ſibi Phereponus putat; quare etſi nullam ſibi huiusmodi accuſationis inſtituendæ occaſionem præbuerit iſta Africanorum Patrum Epiſtola, attamen imperterritus ait pag. 518. *Quàm facile fuit Pelagio premere contrarias partes invidioſis conſectariis, Deum jubere impoſſibilia, æternis poenis afficere homines, quod impoſſibilia non præſtiſſent, aliſque id genus, quibus excuſatur planè homo, ac ipſa culpa in Deum conſicitur? Non laboret, quæſo, Cenſor iſte novitiuſ in colligendis iſtis aliſve inanibus Auguſtini- anæ doctrinæ conſectariis. Tot ſunt, ac tam luculentaſ Auguſtini loca & verba, quibus ille docet, Deum ſufficientia cunctis hominibus auxilia præbere ad præcepta Legis ſervanda, & impoſſibilia non jubere, & ſolâ hominum culpâ fieri, ſi aut in infidelitate maneat, aut in peccato ruatur, aut ab iis non aſſurgatur, ut patere omnibus poſſit, tam abſurda conſectaria non ſequi ex Auguſtini ſententia. Quod autem videri poſſit mirum, illud eſt, quod Phereponus ad- jicit. Hiſce permota ſæcula ſequentia, in Pelagii opinionem dilapſa ſunt, quam etiam Auguſtino tribuerunt, cui ipſa Pelagii Opuscula adſcripſerunt: quia non poterant ſibi perſuadere, tantum virum, quanti cum fuiſſe ex fama putabant, eiſmodi conſectaria potuiſſe concoquere. Scitne Phereponus, quid hîc dicat; an amat vir lepidus paſcere fabulis Lector ſuos? Quænam ſunt ſæcula illa in opinionem Pelagii dilapſa? Nullum eruicij nôrunt. Auguſtini ſententia, quod eſt ad doctrinam gratiæ ſalutaris. Peccati originalis, debilitati Arbitrii, aliarumque huius- modi præcipuarum quæſtionum, ſæculis ſubſecutis ad noſtram uſque ætatem perpetuè in honore fuit, & laudata, & propugnata. Nam quod attinet ad alias quaſdam profundiores, difficilioreſque partes incurrentium quaſtionum, uti appellantur à Cœleſtino I. Papa in Epiſtola ad Episcopos Galliarum, ſive ab illo, quicumque ſit, qui plures definitiones Apoſtoli- cæ Sedis ad verſus Pelagianos congeſſit, liberum huc uſque fuit diſceptare inter Theologos, dum ſibi quiſque caveat à Pelagii, atque Semipelagianorum fermento. Conſulat Lector recentiores duos Scriptores Catholicos, à quibus quanquâ diverſis armis vindicata eſt Auguſtini doctrina à calumniis Joannis Launoii, ſi tamen iſ eſt germanus Auctor viru- lentiffimi illius atque ineptiffimi Operis contra Sanctum Au-*

Augustinum, quo maxime delectatum fuisse Phereponum nostrum arbitror. Quod si nomine sæculorum subsequen-  
tium in Pelagii opinionem dilapsorum animus Pherepono  
fuit significare aut Catholicæ ipsius Ecclesiæ sententias  
nunc passim in Scholis & Conciliis consecratas, aut non-  
nullas tantummodo privatas Catholicorum Scholas, à Cal-  
vini atque Jansenii deliramentis, longè quàm reliquas, re-  
motiores: quæ tandem ostender ille, Pelagianismum ab istis  
fuisse adoptatum? Id quidem effutiunt à doctrina Augu-  
stini mirum in modum exorbitantes Calviniani atq; Jan-  
seniani, quibus fortasse Auctoribus hanc nobis calumniam  
Phereponus instruxit; sed quantum id à veritate ablit, &  
quàm nulla è damnatis Pelagii opinionibus inter Catholi-  
cos toleretur, jam plurima scripta prodiderunt.

Quod autem ait, subsecutis sæculis ipsa Pelagii Opuscula  
ipsimet sancto Augustino fuisse adscripta, & per hyperbo-  
lem dicitur, & nullius planè momenti est Non Opuscula  
Pelagii, sed unum tantummodo, hoc est illius Epistola ad  
Demetriadem conscripta, Augustino à quibusdam, sed  
paucis, sed ineruditis, sed per supinam inconsiderantiam,  
adscripta fuit. Inter Augustini Epistolas eam consultò de-  
scripserant nonnulli n. 142. quippe quod illius confutatio  
in subsequente Epistola Alypii & Augustini ad Julianam De-  
metriadis matrem legeretur. Quid refert, si pauci ex mera  
oscitantia illam quoque Epistolam pro Augustini scetu ac-  
ceperint? Num continuò etiam Pelagianum effecere Augu-  
stinum? Num subsecuta sæcula dici idcirco possunt *Opuscu-  
la Pelagii* adscripsisse Augustino? *Adscripserunt*, inquit Phe-  
reponus, *quia non poterant sibi persuadere, tantum virum ejusmo-  
di consecraria potuisse concoquere.* Eximiam enim verò ratio-  
nem, cur Augustinum posterì in Pelagii sententiam debue-  
rint pertrahere. Tot Libris, tantà vi rationum, & per tot an-  
nos Augustinus in Pelagianos decertavit, compluribus eti-  
am in locis invidiosa eadem consecraria, quæ nunc Phe-  
reponus, & ante Phereponum Pelagiani objiciebant, à sua  
sententia ipse removìt, & sibi concoquenda non esse de-  
monstravit. Necesse ergo est, in illius Libris hospites fue-  
rint, qui eum tandem consensisse Pelagianis (si Pherepono  
fides) sunt arbitrati Neq; nos audire pigeat ipsum Augusti-  
num ità loquentem in Lib. de Gratia & lib. Arbitrio, Cap. 4.  
*Homo gratiâ juratur, ne sine causa voluntati ejus jubeatur.* Cele-  
berrima autem est altera ejus sententia, quàm è Lib. de Na-  
tura & Gratia, atque ex aliis Augustini Libris desumptam,  
Tridentina Synodus Sess. 6. Cap. 11. his verbis expressit :

*Deus*

*Deus impossibilia non jubet, sed jubendo monet, & facere quod possis, & petere quod non possis, & adjuvat, ut possis.* Qui ergo dicitur Phereponus, in Augustini sententia Deum jubere impossibilia? Et qui alia objicit consuetudina, quæ jam ipse Augustinus explisit? Sed nos repetimus, & sæpè repetendum erit: in tuenda contra Augustinum Pelagii causâ non raro criminationum materies prurientem Phereponum defectura fuisset, si Augustini doctrinam ex Augustino ipso, ejusque veris discipulis, h. e. ex Theologis Catholicis, discere voluisset, non autem ab infido illius Interprete Calvino, aliisque personatis Calvinii sectatoribus. Sed hic amavit Phereponus credere in viso sibi in multis Calvino, ut sibi speciosus deinde aliquis esset color debacchandi in invisum sibi aliis de causis Augustinum.

Pergit idem Censor Africanis Patribus insultare, quorum sunt hæc verba: *Quâ (gratiâ) nostra voluntatis arbitrium verè sit liberum, dum à carnalium Concupiscentiarum dominatione liberatur, dicente Domino: Si vos Filius liberaverit, tunc verè liberi eritis: quod auxilium fides impetrat, quæ est in Christo Jesu Domino nostro.* Inquit autem, non dubitasse Pelagianos, quin divinâ gratiâ homines à peccatis liberarentur, si modò eâ rectè uterentur; sed putasse, eadem gratiâ posse homines abuti, ac præterea neminem esse usque adeò mancipatum peccato, ut gratia illa excitari nequeat, ad servitutem illam fugiendam. Tum subdit: *Sed quid sibi volunt boni Patres Africani, quando addunt, quod auxilium fides impetrat? Id enim auxilium, quod fides impetrat, non est græta, quâ sumus Christiani, quæ antecedit fidem, non eam sequitur. Nam quando credidimus, & si de aliquid à Deo impetramus, jam sumus Christiani. Redolent illa verba Semipelagianismum, aut simile quidpiam.* Itaque concludit, bonos illos viros nondum satis intellexisse doctrinam Augustini, aut hoc esse additamentum, cum, ut Benedictini adnotant, ea verba desiderentur in duobus Codicibus Mss. Sed ne hic quidem Censor mentem Africanor. Patrum in ea Epistola, aut argumentum hoc satis intelligit, multoq; minus studet, ut intelligat. Chartam implere censuris, homini cura est. Tum nihil pensi, an accuratè, verèque accuset. Ut autem ad rem veniamus, multa sunt divinæ gratiæ munia, multa nomina, ut passim Theologi animadvertunt. In nonnullis cum Ecclesia Catholica Pelagius conveniebat, dissentiebat in alijs Potissima autem controversia erat, num divina Caritas, quæ tum gratiæ effectus est, tum gratia dicitur, imò gratiarum omnium maxima est, à viribus natiis liberi arbitrii efflueret, an verò

speciali & gratuita Dei in voluntatem spirantis misericordiâ Illud Pelagius, hoc affirmabant Catholici. Nimirum a-  
 jebat ille, in voluntatis nostræ arbitrio positum esse, viri-  
 bus nostris concipere, quodcumque lubet, amorem Dei,  
 seu caritatem vivificam, Deo ipso eum amorem, eamq; ca-  
 ritatem nobis pro sua misericordia non dante, neq; in vo-  
 luntatem inspirante. De hoc impio dogmate primò agunt  
 eam Epistola Africani Patres Inquiunt autem, eam esse Pe-  
 lagii opinionem, talem videlicet hominis institutam crea-  
 tamque fuisse naturam, quæ legem Dei implere, five ope-  
 rari ac perficere justitiam, sine alio interno Dei adjutorio  
 possit, quippe sola sibi sufficit in tanto negotio humana na-  
 tura. Consequens hinc erat, vel gentes sinè fide, & sinè ca-  
 ritate infusa, amare Deum supranaturaliter, & complere  
 utiliter ac piè legis præcepta posse, & caritatem à nobis, non  
 à Deo, in nobis gigni. Quæ omnia, quantum à divina re-  
 velatione abhorreant, nemo non sentit, si vera est (utì ve-  
 rissimam nos esse dicimus) Catholicorum sententia affir-  
 mantium, naturam humanam, liberumque Arbitrium ob  
 primi hominis peccatum nimium esse debilitatum, & ex  
 se solo non posse, ut ad salutem oportet, credere, peccatum  
 abjicere, ac fugere, virtutes, ac præsertim Caritatem in-  
 duere, atque alia ejusmodi facere, nisi Deus suâ gratiâ, &  
 singulari potentia suæ operatione supranaturales vires ei-  
 dem largiatur, & voluntati caritatem donet, quæ, ut dixi-  
 mus, præcipua est gratia Dei, de quâ cum Pelagianis lis erat.  
 Hinc Augustinus in Lib. de Gratia Christi Cap. 13. exigit  
 ab iis, ut gratiam confiteantur, quæ *non ostendat tantummodo*  
*veritatem, verum etiam impertiat caritatem.* Tum Lib 3. c. 114.  
 Op. Imperf. *Hoc est, ait, incrementum, ut unusquisque obediat*  
*præceptis Dei, quod non fit, quando verè fit, nisi caritate. Istam ca-*  
*ritatem non dat nisi Deus. Caritas enim ex Deo est. Hanc vos (Pe-*  
*lagiani) inter adjutoria gratiæ, quæ commemoratis, nominare*  
*non vultis, ne hoc ipsum, quod obedimus Deo, ejus esse græ-*  
*tia concedatis, &c.* Idem sæpè Augustinus inculcat aliis in  
 locis.

De hac igitur gratia, de istius caritatis, quæ à Deo est, ne-  
 cessitate ad servanda legis mandata, atque ad amandum  
 ipsum Deum, præcipue agunt in ea Epistola Africani Pa-  
 tres. Hac ajunt nos verè *Christianos esse; hac testantur ipsum*  
*nostræ voluntatis Arbitrium verè fieri liberum à carnalium concu-*  
*piscentiarum dominatione; nam tunc verè liberi sumus à pec-*  
*cati jugo, & ab effectibus peccati, & aptissimi atque expediti*  
*efficiamur ad divinam legem implendam, si Filius nos libe-*  
 raverit



raverit per gratiam Dei, non autem si arbitrium nostrum per vires suas liberaverit nos, ut falsò fieri posse arbitratur Pelagius. Idcirco frustra animadvertit Phereponus, Pelagianos admisisse remissionem peccatorum, sive *divinam gratiam, quâ homines à peccatis liberarentur, si modo ea rectè uterentur.* An Deus suâ gratiâ peccata hominibus ignosceret, tunc non disputabatur inter Catholicos, atque Pelagium, sed quidem an gratia ista hominem justificaret solâ remissione peccatorum, an etiam caritatem inferret in hominum voluntates, per quam postea opera pietatis præstarentur. Istam caritatis infusionem contiteri volebant Pelagiani à Deo esse, sed quidem à nobis ipsis. Audi Augustinum Lib. 6. c. 23. contra Julianum. *Verum, inquit, tu à vestro dogmate non recedis, quo putatis gratiam Dei per Jesum Christum Dominum nostrum sic in sola peccatorum remissione versari, ut non adjuvet ad vitanda peccata, & desideria carnalia vincenda, diffundendo caritatem in cordibus nostris.* Vide eundem Lib. de Natura & Gratia Cap. 34. & Cap. 55. Hoc idem indicant ipsi Africani Patres Can. 5. Concilii Carthagine habiti A. 418. uti etiam in Epistola 95. nunc 177. inter Augustinianas ad Innocentium eundem Romanum Pontificem. Ipse Augustinus alibi, hoc est Lib. de Gratia & libero Arbitrio c. 18. ad hoc unum videtur totam controversiam deducere, inquit: *Unde est in hominibus caritas Dei & proximi, nisi ex ipso Deo? Nam si non ex Deo, sed ex hominibus, vicerunt Pelagiani; si autem ex Deo, vicimus Pelagianos.* Legereliqua. Huc igitur Africani Patres respiciunt, & nihil ad rem facit Phereponi animadvertio monentis, censuisse Pelagianos per gratiam divinam homines à peccatis liberari, atque eadem gratiâ posse abuti. Multò minus locum hic habet altera illa consideratio, quâ Semipelagianis in iis Patribus confiderenter objicit propter illa verba: *Quod auxilium fides impetrat.* Nam inquit, *auxilium illud, quod fides impetrat, non est gratia, quâ sumus Christiani, quæ antecedit fidem, non eam sequitur; quando enim credimus, & fide aliquid à Deo impetramus, jam sumus Christiani.* Nihil minus cogitârunt hic Africani Patres, quàm quod Phereponus somniat, hoc est, initium fidei, atque ipsam fidem ex naturæ viribus, non ex Dei dono, esse posse in hominibus. Auxilium illud, quod fides impetrat, nil aliud est Africanis Patrib. quàm caritas, de qua cum Pelagio disputabatur. Hanc habere finem fide in Christum nemo potest, hanc ipsa fides justificans in hominis voluntate invehit. Expresit alibi Augustinus eandem sententiam in Lib. de Spiritu & Litera Cap. 3. quo tempore certè à Semi-

pelagianorum opinione is aberat, suamq; doctrinam satis intelligebat. Unde, inquit, est dilectio, id est caritas, per quam fides operatur, nisi unde illam fides ipsa impetravit? Idem prodit in Epist. 106. nunc 186. c. 3. Sin autem dixerit, quod gratiam bene operandi fides mercatur, negare non possumus, imò verò gratissime confitemur. Hanc enim fidem volumus habeant, quā impetrent caritatem, quæ sola verè bene operetur, &c. Qui ergo habent fidem, quā impetrent justificationem, per Dei gratiam pervenerunt ad legem justitiæ. In Lib. etiam de Prædest. Sanctior, Cap. 7. Ex fide, inquit, ideo Apostolus docet iustificari hominem, non ex operibus, quia ipsa prima datur, ex qua impetrentur cætera. Inquiunt ergo Africani Patres, gratiam istam, videlicet caritatem, eam esse, quā Christiani sumus, quia gratiam hanc soli Christiani & nōrunt, & habere possunt, quia solā fidē præcedente cognosci & recipi potest, eam diffundente Spiritu sancto in cordibus nostris. Ista caritas, ista solius hominis Christiani propria gratia, ea est, quæ facit, ut non solum nominemur, sed & simus Christiani: nam si habuero omnem fidem, ut inquit Apost. 1. ad Cor. XIII. ita ut montes transferam, caritatem autem non habuero, nihil sum. Eodem anno 416. quo à Patrib. Carthaginensibus ad Innocentium I. ea Epistola conscripta fuit, alteram ad eundem Pontificem dedere, quæ inter Augustinianas, olim 95. nunc est 177. Aurelius Carthaginensis, Alypius, Augustinus, Evodius, & Possidius. Eorum verba sunt: Si intellexissent Episcopi (Diospolitane Synodi) eam illum (Pelagium) dicere gratiam, quam etiam cum impiis habemus, cum quibus homines sumus; negare verò eam, quā Christiani & Filii Dei sumus: quis eum patienter Catholicorum Sacerdotum, non dicimus, audiret, sed ante oculos suos ferret? Quænam autem erat gratia, quam versipellis Pelagius reverà negabat, & ut ipse fateretur, instabant Episcopi Afri? Sine dubio gratia, quā iustificamur ab iniquitate, & quā salvamur ab infirmitate, non quā creati sumus cum propria voluntate; ita illi. Quibus verbis fidem cum caritate conjunctam, fidem, quæ per dilectionem operatur, utramque Dei donum, intelligunt Africani Patres. Igitur constare jam potest, quàm inani censurâ Phereponus laudata illa Patrum Carthaginensium verba sollicitarit, & Semipelagianismi incusarit: quod etiam ut faceret, necesse habuit ipsa pervertere verba, scribens, non ut Episcopi posuerunt, gratia, quā Christiani sumus, sed gratia, quā simus Christiani, inter quæ quale discrimen intercedat, facile Lector intelligit.

Ægrè deinde fert æquissimus iste Censor, Africanos Episcopos tam acerbis in Cœlestium absentem dixisse sententias,

tentias, recitatis dumtaxat accusatorum Literis & minimè lectis ejus Libris Respicit hæc censura eum Epistolæ Synodice 175 aliàs 90. locum, ubi de Cœlestio & Pelagio Episcopis isti scribunt: *Isti autem adserunt, sicut à fratribus, qui etiam eorum libros legerunt, cognovimus, in eo Dei gratiam deputandam, &c.* Sed satis est ipsam legere Synodicam, ut statim evanescat Phereponi censura. Cœlestium in Synodo quinqueñio ante habita auditum, convictum, & confessum, anathemate percusserant Africani Patres, duraturo, donec aperte sibi objecta & ipse exécraretur. Sed interpositâ in speciem appellatione ad Apostolicam Sedem, judicium illud vasserimus Hæresiarcha declinârat. Constat præterea, ipsum minimè persecutum fuisse appellationem; jûsq; fuisse Patribus Africanis rursus adversus illum etiam inauditum dicere sententiam. Et quidem, quæ in ea Synodo peracta fuerant, se recensuisse, & præ oculis habuisse, monent iidem Episcopi in Synodica ad Innocentium. Nihilo tamen secius animadvertere, Episcopos illos dum ad eundem Innocentium scribunt, anathema dicere in Pelagium atque Cœlestium sub ea tantum conditione, si videlicet isti in perversa illa opinione peristerent. Qua in re vides, Africanos Patres personis Pelagii atque Cœlestii parcere, eorumq; tantummodo doctrinam anathemate confingere. *Censuimus, inquit, hujusmodi persuasionis auctores, nisi hac apertissime anathematizaverint, ipsos anathematizari oportere.* Addunt infra: *Si ergo Pelagius Episcopalis gestus, qua in Oriente confecta dicuntur, etiam tua venerationi iuste visus fuerit absolutus, error tamen ipse & impietas etiam auctoritate Apostolica Sedis anathematizanda est.* Animadverte etiam, quæ infra leguntur: *Etiam si Pelagius Cœlestiusq; correcti sunt, vel se ista nunquam sensisse dicunt, & quacumque scripta contra eos prolata fuerint, sua esse negant, nec est quemadmodum de mendacio convincantur: generaliter tamen quicumque dogmatizat, & affirmat, &c. anathema sit.* Ubinam ergo sunt acerba illæ sententiæ in Cœlestium absentem dictæ ab Africanis Patribus, quas nobis Phereponus obtrudit? Quæ justa causa de tam circumspecto judicio expostulandi? Recensitâ priore Synodo Carthaginensi, auditis accusatoribus, nihilominus affirmare nolunt. Pelagium atq; Cœlestium execrandis iis adhærere opinionibus. Sola ipsis adscripta abominanda dogmata anathemate feriuntur: quo quid æquius & mitius agi posset, nemo qui sit juris Ecclesiastici atque naturalis peritus, non videat. Quamobrem nihil opus fuit eorum Libros legere. Altera Synodus à quinque Episcopis Carthagine habita, itidemque Milevi-

tana, ambæ eodem Anno 416. celebratz, non aliter se gessere erga Hæresiarchas eosdem.

Cùm deinde in Synodica illa 175. aliàs 90. Patres Carthaginenses dicant, Pelagium & Cœlestium, uti nuntiatum fuerat, affirmare, *in eo Dei gratiam deputandam, quod talem hominis instituit, creavitque naturam, quæ per propriam voluntatem legem Dei possit implere, Eandem quoque legem ad gratiam Dei pertinere, quod illam in adiutorium hominibus dedit*: Phereponus se non capere fatetur, cur spretim de creatione & lege loquantur Africani Patres; hæc enim sunt longè maxima Dei beneficia. Id autem factum suspicatur, quod unicam illi gratiam Dei arbitrarentur afflatum nescio quem, cui resistere non licet, iisque pauculis concedendum. Quæ hic habet Phereponus, quarto quoque verbo infra etiam repetet, de afflatu illo, cui resistere non licet. At aliam esse cum Augustini, tum Catholicæ Ecclesiæ sententiam, jam innumeri & Scriptoribus nostris contra Calvinistas & Jansenianos demonstrarunt. Actum agerem, si id in præsentia & ego demonstrandum susciperem. Paratragediatur verò Phereponus, & se nolle Carthaginensium Patrum mentem intelligere ostendit, dum ait, illos contemptim de creatione & lege loqui. Ubinam sunt illorum verba, quæ contemptum redoleant? Hoc unum suâ illâ oratione contendunt Africani Episcopi, creationem naturæ, & Legem, non esse gratiam illam, quâ Christiani sumus, quâ ab infidelibus & peccatoribus distinguimur, quâ voluntatis arbitrium verè juvatur, ut Deo placeat, æternamque salutem adipiscamur. Non in lege, non in naturæ viribus, sed in interno adiutorio Dei caritatem suam voluntati inspirantis, sitam esse propriam Christianorum gratiam ajunt. Quod dum affirmant, quis meritò exculpere ex eorum verbis potest, eos naturam & legem non agnovisse, tanquam Dei beneficia? Sunt beneficia, Christianis æquè & non Christianis, justis & injustis communia; sed ejus non sunt vigoris, ut sola, hoc est sine vera Dei per Christum gratia, ad opera pietatis exercenda, & ad beatam immortalitatem perducere hominem possint. Legem *sine dubitatione laudandam* affirmat alibi non semel Augustinus, & tamen quàm parum illa sola possit, contra Pelagianos eandem nimis extollentes, ex auctoritate Apostoli invictissimè ostendit. Vide Norisium in Vindiciis Augustini § 6. In Epistola quoque 95 nunc 177. hoc eodem Anno 416 ad Innocentium data, ab Augustino & quatuor aliis Episcopis, hæc leguntur de Pelagio: *Sive enim gratiam dixeris esse liberum Arbitrium, sive gratiam esse remissionem*

*tionem peccatorum, siue gratiam esse legis praeceptum, nihil eorum dicit, quæ per subministrationem Spiritûs sancti pertinent ad concupiscentias, tentationesque vincendas, &c. Et infra : Distinguenda est Lex, & Gratia. Lex jubere novit, Gratia juvare, &c. Tum concedunt, creationem rectè appellari gratiam Dei, sed addunt : Alia est tamen gratia, quâ Prædestinati vocamur, justificamur, glorificamur ; & de ultima ista gratia tum solùm disputabatur cum Pelagio.*

---

## CAPUT V.

*Quæ Gratia Dei negaretur à Pelagio, olim notissimum. Gratia Calviniana ac necessitans ubique à Pherepono perperam affecta Augustino, & Patribus Carthaginensibus. Apostoli loca varia ab iis Patribus rectè adhibita contra impiam Pelagii dogmata. Phereponi interpretationes variæ, & accusationes repelluntur. Evangelii nuda predicatio est quidem gratia, sed non gratia, de qua S. Paulus, & Patres Africani agebant.*

Queritur posthæc Phereponus, quòd Africani Episcopi in ea Epistola gratiam illam suam nusquam definiant, idque etiam fraudi ipsis vertit, quasi suum dogma occultare quàm aperire mallent. Nimirum expectasset hic Censor, necessitante fortasse Calvinianamque gratiam ab iis per definitionem quampiam nobis obtrudi, in quam postea inveheretur. Sed satis apertum erat inter Christianos, quid significaretur nomine gratiæ illius, quâ Christiani sumus, & quâ nostrum Arbitrium expeditum redditur ad opera pietatis, & finè qua viribus caret humana natura atque voluntas ad amandum Deum, exercendamque veram virtutem. Hanc ipse Augustinus cum quatuor aliis Africanis Episcopis in laudata Epist. 9. ad Innocentium hoc eodem anno scripta, *Christianis fidelibus, Catholicisque notissimam* appellat. Neque ipse Pelagius ignorabat, quid à se peterent Catholici Episcopi, cùm instabant, ut fateretur, non solam sibi humanam sufficere naturam ad facienda ac perficienda mandata Dei, sed auxilium divinæ gratiæ per Christum prorsus eidem opus esse. Vide acta Conventûs Hierosolymitani, & Concilii

Diospolitani Anno præcedenti 415. Sed inspiciamus, an sacrarum Scripturarum loca à Patribus Africanis producta satis exprimant, quæ Catholicorum sententia foret, & quid gratiæ nomine significaretur.

Gratiam Dei à Pelagio negatam dicebant Cæthaginienses Patres in Epistola 175. aliàs 90. ab Apostolo iis verbis prædicari: *Videō aliam legem in membris meis, repugnantem legi mentis meæ, & captivantem me sub lege peccati, quæ est in membris meis. Miser ego homo, quis me liberabit de corpore mortis huius? Gratia Dei per Jesum Christum Dominum nostrum.* Quid Phereponus ad ista? Si ipsi credimus; in Pauli verbis nihil aliud est, *gratia Dei*, quàm *Dei misericordia*, atit *Dei beneficium*; nemo enim inquit is, contrarium unquam ex vi nativæ vocis usque probabit. *Non negabat autem Pelagius homines Dei beneficio peccato eripi; sed negabat fieri id afflatu quodam in æterno, cui reluctari non liceret; & sine quo cætera omnia Dei beneficia inutilia essent.* Hæc sunt Phereponi verba pag. 518. Tum repetit; non ausos esse Africanos Patres perspicue suam exprimere sententiam; longè enim maximam partem Christianorum in se concitassent, si aperte dixissent, quod animo versabatur; cum ante illa tempora aliter de gratia homines non sensissent, quàm sentiret Pelagius. O aureum hominem Phereponum, qui sinceritate Patribus Africanis præstat, & quidquid sentit, liberè dilucidèque promittit! Sed quis ostendat ille, Africanos Episcopos non ausos mentem aperire suam, & dolo malo egisse, & pro unâ gratia ineluctabili tunc decertasse? Huiusmodi gratiam ex entitate sua ineluctabilem, trahentemque necessariò ad consensum arbitrium hominis, nunquam Catholicis, nunquam Africanis Patres tradiderunt; ejusque confessionem nunquam à Pelagio exegerunt; ut in Catholicorum hac de re luculentissimis scriptis videre est. Aliud est, Deum per suam Gratiam infallibiliter operari salutem electorum, certumque; facere per suæ gratiæ dispensationem propositum suæ prædestinationis; aliud, gratiæ talem esse vim nativâ, ut necessariò ad unam partem determinet liberum hominis arbitrium, eiq; vim dissentendi eripiat. Sed Phereponum verba defecissent, nisi ubiq; Augustino & Patrib. Catholicis tam absurdam sententiam affinxisset. Ann. 416. quo Synodicam istam Epistolam ad Innocentium dedere Africanis Patres; in eo sita potissimum erat quæstio de Gratia & libero Arbitrio; videlicet: num homines per sola naturalia dona, malis & bonis; fidelibus & infide-

fidelibus communia, & per solas Arbitrii vires, implere iustitiam possent, & evitare peccata: an verò peculiare iis adiutorium Dei per Christum Servatorem necessarium foret, sine quo neque peccata caverentur, neque Lex pie impleretur, & sine quo nihil ad salutem pertinens fieret, & cum quo reverà esset effectus. Primum affirmabat atque alterum negabant Pelagiani, à Catholicis propterea execrandæ hæreticis postulati. Nulla verò tunc, ne per umbram quidem, suborta erat controversia, num huiusmodi auxilio, quod humanæ necessarium naturæ contendebant Catholici, resistere & reluctari posset hominis Arbitrium. Ingenio haberi non erant eorum temporum Pelagiani, facileque intellexissent necessitatem gratiæ eâ ratione excludi posse, quòd consensendi necessitatem voluntati inferret in Catholicorum sententiâ; attamen ex iis nullus id Augustino objecit. Vide Augustinum ipsum Ep. 105. & de Gestis Pelagii Cap. 18. & Hieronymum Dial. 1. contra Pelagium, ubi constabit, quid Catholicis obijceret Pelagius, & ne ipsum quidem invenisse in Catholicis necessitantem Calvinî gratiam. Et certè animo statim quisque concipit, necessariam hominî posse dici gratiam ad bonum, etiam si non ea asseratur gratiæ natura, atque efficacia, ut excuti frustrarique suo effectu à voluntate non possit. Necessariam reapse gratiam contendebant Catholici, necessitantem negabant. Atque hæc non novâ Africanorum Patrum, sed Ecclesiæ totius vetustissima scientia erat, ut Augustinus aliique toties ostenderunt. Quare nihil confidentius dicere Phereponus potuit, quàm Christianos ante definitiones Africanorum Conciliorum non aliter de gratia sensitse, quàm sentiret Pelagius.

Cæterum frustra Phereponus Africanis Patribus eripere conatur locum illum Apostoli ad Rom. VII. 23. *Quis me liberabit de corpore mortis huius? Gratia Dei per Jesum Christum Dominum nostrum*, quasi gratia ista nihil aliud sit, quàm Dei misericordia, aut Dei beneficium; Pelagius verò non negaret, quin Dei beneficio homines à peccato liberarentur. Nam si gratuita misericordia Dei intuitu meritorum Christi hominem à peccato liberat, à peccato servat, invictumque efficit contra cupiditatum pravarum impetum; ergo non operum meritum, non lex foris sonans, non vires naturales humani Arbitrii id præstant. Pelagius autem primò sentiebat, solam sibi sufficere naturam humanam ad omnes tentationes superandas, implendamque legem; tum divinæ misericordiæ auxilium,

hoc est gloriæ adiutorium, idè solùm admittit, ut per illud natura faciliùs evitaret, ac vinceret peccata, virtutèsque exequeretur: quam opinionem conceptis verbis ab ipso traditam, Concilium Africanum A. 418. Can. 5. his verbis execratur: *Quicumque dixerit, ideo nobis Gratià justificationis dari, ut quod facere per liberum jubemur Arbitrium, faciliùs possimus implere per gratiam, tanquam eisi gratia non daretur non qualem facile sed tamen possimus etiam sine illa, implere divina mandata, anathema sit.* Quamobrem, ut lubet, gratiam ab Apostolo memoratam appellet Phereponus misericordiam, ac beneficium Dei: adhuc certum erit, Apostolo auctore, non vinci concupiscentiam rebellem, non evitari peccata, non impleri legem, non à peccato assurgere, nisi misericordia ista, gratuitùmque Dei beneficium intellectui lumen, voluntati infirmæ vires divinitus suppeditet, & in nobis atque nobiscum faciat, quod solis viribus nostris facere non possemus. Si hoc Pelagius confessus fuisset, quod nunquam confessus est (quidquid Phereponus hic dicat) nihil de *Adiutorio gratiæ inter Pelagium atque Catholicos relictum fuisset controversiæ*, ut Augustinus ipse testatur in Lib. de Gratia Christi Cap. 47.

Mitto, quæ mox Phereponus congerit, ostensurus, mandata Dei non esse ejusmodi, ut omni vi destituta sint ad movendos hominum animos: quod ne Africani quidem Patres negabant; adhuc enim ex Apostoli auctoritate edocemur, solam Legem, sola Dei Mandata, non convertere hominem ad Deum, ut oportet, nisi accedat gratia Christi, atque internum Adiutorium Dei. Inspiciamus potiùs, quid habeat Censor ad loca quædam Scripturarum à Patribus citata, ut contra Pelagium evincant, *ad operandam perficiendamque justitiam, ac Dei mandata complenda, solam sibi humanam sufficere non posse naturam.* Ne unum quidem ex his locis conficere id, quod volebant Patres, denuntiat è vestigio Phereponus: quam levissimam facilitatem, atque rationem citandi Scripturam propriam illorum in Critica infantium sæculorum vocat. Scilicet, deinde addit, *declamitare, & effutire quidquid in os veniebat apud plebem excommunicandam, si forè à declamante dissentiret, multo facilius fuit, quàm Criticæ seriàm operam dare.* Infelicia planè sæcula, quibus defuere unus pluresve Phereponi, quorum Criticâ Arte tum solùm licuisset arcanam Scripturarum assequi mentem, nugis erroribùsque Theologiam ac populos eripere. Infeliciorem etiam Ecclesiam, cui Christus polli-



pollicitus quidem fuerat per omnia tempora Doctores , atque interpretes fidos divinarum Litterarum , immunitatēque ab omni doctrinæ errore , & tamen postremis hisce tantum sæculis suam fidem liberavit. Sed præstat argumenta audire Phereponi , ut pateat , jurēne an injuria pronuntientur ista de Africanis Patribus , hoc est , num reverà ipsi declamatores levissimi fuerint , an potius conviciator audax sit Phereponus noster. *Spiritus , qui adjuvat infirmitatem nostram*, de quo Paulus Rom. VIII. 26. Censore isto interpretante , *est qui est in jam credentibus , eosque in orationibus rectè fundendis apud Deum adjuvat*. Utique de Spiritu S. qui jam in credentibus habitat, loquitur hîc Apostolus. At hinc manifestè intelligimus , humanam naturam auxilio Dei penitus indigere ad opera salutaria , neque ipsam sufficere sibi ad ea præstanda , quando orationes ipsas , quæ actiones maximè piæ sunt ac salutares. Spiritus S. operatur in nobis , dum nos orare ut oportet , efficaci suâ atque internâ operatione facit ; nam *quid oremus , si ut oportet nescimus*. Quis ergo effutire audeat , minimè ex his Apostoli verbis resultare , quod Africani Patres volebant? Imò quis contra non intelligat, eam ab Episcopis illis de prædicari gratiam, quæ jura liberi Arbitrii non lædat? est enim gratia, quæ adjuvat nos, ac proinde non sola, ut Calvinus ejusque gregarii velle videntur , sed nobiscum agit.

*Non est volentis, neque currentis, sed misereantis est Dei*, sunt Apostoli celeberrima verba ad Rom. IX. 16. ab Afris Episcopis citata. Iis hæc alia Phereponus Interpres adnectit : quod *verbum Dei mittitur ad populum quempiam ad cognitionem ejus vocandum* ; sed *quid hæc facit ad afflatum singulorum?* Nihil, fateor, hoc facit ad probandum afflatum illum necessitantem , quem in Augustino se deprehendisse Calvinus somniavit ; sed quidem apertissimè facit ad evincendum , quod Patres volebant. Si non hominis currentis, sed misereantis est Dei , quòd homo perveniat ad agnitionem veritatis , ac fidei per quam felicitas æterna speranda est : quis amplius nisi desipiendo dicat , posse ad fidem atque salutem perveniri solis humanæ naturæ viribus , conantibus ac meritis , uti Pelagius affirmabat? Cæterum hunc locum pro suo potius arbitrio , quàm pro veritate explicat Phereponus , cùm ait , illic agi tantum *de missione verbi Dei ad populum quempiam ad cognitionem ejus vocandum*. Apostoli verba nihil tale referunt. Eorum sensus est, quòd homines nonnulli ad Christi hæreditatem, benedictio-

ditionem, & electionem pertineant, id non provenire ex eorum volitione & cursu, neque ex operibus meritisque præcedentibus, sed quidem ex mero nutu, beneplacito, vocatione, & misericordia Dei, sicuti neque cursus neque voluntas Jacobi aut matris ejus in causa fuit, cur Jacobo Isaac benedictio, & hæreditas divinarum numerum contingeret, sed quidem vocatio, & electio gratuita Dei. *Non ex operibus, sed ex vocante dictum est, quia major serviet minori.* Quod si interpretationem Phereponi & hic admitteremus, eadem nihilominus consecutaria inde effluerent, quæ Catholici docent. Neque apud Deum injustitia est, quod Jacobum dilexerit, Esau autem odio habuerit; hoc est, illi singularia beneficia contulerit, huic autem paria ac tanta conferre noluerit, etsi & ipse Esau voluerit; atque cucurrerit; nam inquit Deus: *Miserebor cujus misereor; & ejus electio, & gratia non est hominum operibus & conatibus debita, sed à sola ejus misericordia venit. Ergo cujus vult, miseretur, & quem vult indurat;* hoc est, eligit quos vult, & permittit alios lux ipsorum infirmitati atque malitiæ, quanquam nulli sufficientia deneget auxilia. Vide locum Apostoli integrum facilique negotio intelliges, nullum alium esse luculentiorum ad ostendendum, quid per se viribusque suis valeat in negotio salutis corrupta ac infirma hominum natura sine peculiari adjutorio gratiæ Dei, & sine misericordi illius præsidio, & ( siquidem id etiam velis ) sine missione verbi ejus, & potenti & efficaci vocatione ad salutarem fidem, & caritatem Dei, ac proximi.

*Unum omnes sumus in Christo; singuli autem alter alterius membra, habentes dona diversa secundum gratiam quæ data est nobis.* Ità Apostolus ad Rom. XII. 5 Quæ verba à Patribus Africanis citata his aliis exponit Phereponus: *Gratia, secundum quam sunt diversa dona, non est gratia, quæ singulis fideles ad Deum conversi sunt, sed beneficentia varia Dei, quæ aliis alias dotes concesserat, seu solita sua providentia sed extræordinaria spiritualium donorum effusione.* Non de gratia tantum, quæ homo ad Deum convertitur, disputatum est interdum cum Pelagio, sed de omnibus aliis gratiarum & auxiliorum generibus, quibus mentem & cor hominis jam conversi aut illustrat, aut perficit Deus. Sine istis auxiliis contendebat Pelagius hominem ex viribus naturæ in creatione inditis posse omnia salutaria opera virtutisque præstare, & ad perfectionem, atque ἀναμαρτυρίαν pervenire. Hinc illud Cœlestii apud Augustinum Lib. de gest. Pelag. Cap. 14. *Unumquemque hominem omnes virtutes posse habere, & gratias, eas videlicet*  
Deo

Deo non donante, sed sibi unoquoque comparante viribus Arbitrii sui. Quid Apostolus ad hæc? Edocet ille, non à nobis esse perfectionem, & virtutes nostras. sed à misericordia Dei, atque ab illius gratia, quam ipse dat quibus vult & prout vult Rectè interpretari divinas Scripturas, ministeria Ecclesiastica sanctè obire, nosse alios docere doctrinam sanam, & exhortari utiliter, & eleemosynas distribuere bonâ fide, & præesse in sollicitudine, & misereri in hilaritate, & diligere sine simulatione, & odisse malum, & adhærere bono, aliâque illa χάρισμα. sed dona fidelium, quæ ab Apostolo hic enumerantur, Deus elargitur, Deus dividit pro suo arbitrio, & dona sunt illius. Ergo non ea sibi comparare viribus propriis potest humana natura. Et si hoc non potest, quanto minùs poterit fidem, & caritatem, quæ omnium maximæ virtutes sunt, in se gignere, nisi Deus ex sua misericordia, & per suam gratiam inspiret? Vide S. Hieronym, Lib. I. Cap. 6. Dialog, adversus Pelagium.

*Gratia Dei sum id quod sum* (inquit Apostolus I. Cor. XV.) & gratia eius in me vacua non fuit, &c. Non ego autem, sed gratia Dei mecum &c. & gratias Deo, qui dedit nobis victoriam per Dominum nostrum Jesum Christum, Phereponus inquit, loqui Paulum de Gratia Dei, quæ erat Apostolus, hoc est, de misericordia ac munificentia, quæ eum Deus necessariis ad hoc munus donis instruxerat. Tum addit: *Nec quisquam unquam negavit, à Deo per Jesum Christum nobis datam esse de peccato victoriam, ac esse cur propterea ei gratias agamus. Verùm hoc factum afflatu interno & ineluctabile, nusquam docet Scriptura.* Iterum ludit Phereponus, Augustino affingens afflatum illum ineluctabilem. Ad primum autem Epistolæ Paulinæ locum quod attinet, ibi Apostolus non commemorat simpliciter dona sibi tanquam Apostolo divinitus concessa, sed extollit ac memorat ipsam generalem Gratiam Dei, quæ de persecutore Ecclesiæ Apostolum fecerat, ipsumque adeò de infidelitate & peccato converterat ad cognitionem fidei veræ, & ardentissimâ caritate Dei, & sollicitudine ac virtute ad annuntiandum Christi Evangelium instruxerat. Ego, inquit, sum minimus Apostolorum, qui non sum dignus vocari Apostolus, quoniam persecutus sum Ecclesiam Dei. Gratia autem Dei sum id quod sum. Hic S. Ambros. quasi Pelagianos nondum natos impugnaturus, hanc sententiam accipit de omni bono, quod in Paulo erat, ita scribens Lib I. Cap. 7. de Abel & Cain: *Benè Apostolus non gloriabatur in virtute sua, sed minimum Apostolorum se esse dicebat, & quidquid esset gratia divina esse, non meriti sui, nihilque nos habere, quod non acceperimus.*

Vide

Vide & Hieronymum Lib. 2. Cap. 3. adversus Pelagium. Igitur ex Apostoli verbis & exemplo discere poterant Pelagiani. omnia nostra bona accepta esse referenda Gratiae Dei, quæ nobiscum opera salutaria agit, & nos sine necessitate ac sine coactione de nolentibus volentes facit, nihilque nos gloriari debere de virtute nostra, meritisque nostris.

Subinde inquit Phereponus, neminem unquam negasse quin Deus per Jesum Christum nobis dederit victoriam de peccato. At Coelestius, uti ex Actis Diospolitanæ Synodi constat, affirmabat: *Dei gratiam secundum merita nostra dari; quia si peccatoribus illam dat, videtur esse injustus*; quem errorem damnavit ipse Pelagius, nescio animone, an voce tentus in eadem Synodo Cap. 12. Augustinus autem in Lib. de Hæres. Cap. 88. auctor est, in posterioribus suis Libris Pelagium instaurasse eandem sententiam, & scripsisse: *Gratiam Dei, quâ liberamur ab impietate, secundum merita nostra dari*. Sed ut mittamus acrem illam, quæ inter eruditos adhuc vertitur, controversiam, nempe an tandem Pelagius confessus fuerit, gratis Deum remittere hominibus peccata (quod Augustinus non uno in loco factum memorat) & quid per peccatorum remissionem Pelagius significare vellet: potius insistamus Apostoli verbis. Victoriam referre de peccato duo significare potest, videlicet vel à se expellere peccatum jam admissum, vel ita repellere, ne admittatur: quod postremum fit cum tentationibus dæmonis, mundi & carnis nos ad peccandum sollicitantibus, resistimus fortunato successu. Utrumque hic ab Apostolo dicitur. Cui nam autem debemus laudem & gratias, quod expulerimus à nobis peccatum, illudve in nos intrare non siverimus? Num viribus humanæ naturæ in creatione inditis, quibus æquè præditi sunt Christiani, atque infideles? Nequaquam, sed quidem Deo, qui Filii sui Servatoris nostri intuitu, peculiari ac supranaturali gratiâ in eum credentes donat, tum ut liberentur à peccatis commissis, tum ne in nova labantur. Imò animadvertite, Apostolum de peccatis potius non admittendis, quàm de admissis & de tentationibus, quæ quotidie à piis fidelibus superantur, quàm de superatis, agere videri; ita enim ejus Græca verba se habent: τῷ Θεῷ χάρις τῷ διδόντι ἡμῖν τὸ νῆκος Deo Gratia (sit) danti nobis victoriam. Hinc Deum quotidie rogamus, ne nos induci in tentationem, ne peccatum regnare in nobis sinat; sed nos liberet à malo: quod petere à Deo in Pelagii sententia utile quidem, sed necessarium non erat. Ostendat nunc Phereponus, Pelagianos unquam sincere confessos fuisse, non posse

posse humanam naturam, liberumque Arbitrium sine adjutorio interno Dei, sine Gratia Salvatoris, aut assurgere, aut abstinere à peccatis. At istud ille nunquam ostendet. Pelagium, quod hoc ipsum negaret, his Apostoli verbis Africani Patres aggrediebantur. Hinc Augustinus, quoties Pelagius Gratiâ Dei statuere in illo tantum videbatur, ut præterita peccata auferret, toties ab ipso etiam exigebat ut fateretur, necessariam esse gratiam Dei, ne nova peccata committantur. Iterum lege Epist. 95. nunc 177. ubi Africani Patres ajunt de Pelagio : *Sive Gratiâ dixerit esse liberum Arbitrium, sive Gratiâ esse remissionem peccatorum, sive Gratiâ esse Legis præceptum; nihil eorum dicis, quæ per subministratorem Spiritûs S. pertinent ad concupiscentias tentationeque vincendas &c.* Hinc oramus, ut peccatorum tentationem superare possimus, ut Spiritus Dei, unde pignus accepimus, adjuvet infirmitatem nostram. Similiter in Lib. de Natura & Gratia Cap. 34. Augustinus ait: *Hanc iste misericordiam, & medicinale Salvatoris auxilium, tantum in hoc ponit, ut ignoscas commissa præterita, non ut adjuvet ad futura vitanda.* Sed in tanta luce ne Phereponum quidem ipsum futurum fuisse cæcum arbitror, nisi unum illum afflatum ineluctabilem, hoc est, Calvinianum illud commentum, quod Augustinus atque Africani Patres nūquam tradidēre, ante oculos ipse semper haberet.

*Non quia idonei sumus cogitare aliquid, quasi ex nobismetipsis, sed sufficientia nostra ex Deo est.* Hæc Episcopi Africani proferrunt ex Epistola 2. Cor III 5. Phereponus vero ita reponit: *Sufficientia sanè omnium Christianorum, ad cogitandum aliquid Evangelio consentaneum, est à Deo; quis enim nescit, Evangelium non ingenio hominum, sed Deo deberi? At Apostolorum præsertim sufficientia, ad munus, ad quod vocati fuerant, sustinendum, non humana, sed divina fuit.* Ergo, si fides Pherepono, Apostolus hic significat, ideo non posse dici Christianos sufficientes ex se, aut idoneos ad cogitandum aliquid Evangelio consentaneum, quia Evangelium non ingenio hominum excogitatum fuit, sed solius Dei. At quis certum fecit Criticum istum nisi de Evangelio (quod certè Dei, non hominum, opus est) loqui hic Apostolum? Dixerat Paulus, Corinthios Epistolam esse vivam, quæ in suam ipsius commendationem pateret omnibus hominibus, Epistolam, inquam, Christi, quippe Christum palam amplexi fuerant; Epistolam ab ipso Paulo ministratam, quia illius ministerio conversi ad Christum fuerant; Epistolam scriptam, non atramento, sed Spiritu Dei vivi, quippe Spiritus S. in eis sua virtute habitabat, atque in eorum cordibus caritatem diffun-

diffundebat, unde præclara pietatis opera quotidie efflu-  
bant. *Nescitis* ( scripserat jam ad eosdem Corinthios Apo-  
stolus in priori Epistola III 15. ) *quia templum Dei estis, & Spi-  
ritus Dei habitat in vobis?* Tum in loco, quem præ manibus  
habemus, pergit dicere; *Fiduciam autem talem habemus per  
Christum ad Deum;* hoc est. Cum dixerim Epistolam Dei vi-  
vi vos Corinthios esse, vósque & fide in Christum; & carie-  
tate, quæ in tabulis cordis per Spiritum S. inscripta est, cons-  
picuos ita esse factos, ut ab omnibus hominibus laudemini,  
dixerimque, me instrumentum atque ministrum fuisse,  
ut ad tantam lucem, atque felicitatem perveneritis: gloria-  
ri quidem, sed gloriari in Deo, de fructu prædicationis  
meæ nos debemus per Christum Dominum nostrum; gra-  
tiæ enim Christi, meritis, virtute, atque potentiâ illius, me  
suo ministerio utentis, & non virtute vestrà, Ineque meâ,  
tales evafistis. Postremum hoc significatur subsequentibus  
verbis: *Non quod sufficientes (sive idonei) simus cogitare aliquid à  
nobis, quasi ex nobis, sed sufficientia nostra, sive etiam velis, ido-  
neitas nostra ex Deo est.* Id est: quod tales facti sitis ex ministe-  
rio nostro, non virtuti meæ, non vestræ, id adscribendum  
est sed quidem Deo, atque illius misericordiæ & gratiæ;  
nam nos ex propriis naturæ nostræ viribus nihil, non di-  
cam facere ac dicere, sed ne cogitare quidem, possumus,  
quod perducatur ad fidem, & amicitiam, seu caritatem Dei,  
nisi Deus ipse per Christum nobis id donet, uti mihi &  
vobis donasse successus meæ prædicationis jam compro-  
bavit,

Hæc germana loci illius interpretatio, ad quam confir-  
mandam, afferre etiam possemus sanctorum Patrum, ho-  
minumque eruditissimorum documenta complura. Qua-  
re & S. Hieronymus loco eodem contra Pelagianos jam u-  
sus fuerat Lib. 3. Cap. 3. Dialog. Non ergo, ut Phereponus  
putat, idèd solum Apostolus ait, Christianos sufficientes, si-  
vè idoneos, non esse ad cogitandum aliquid Evangelio  
consentaneum, quia *Evangelium non ingenio hominum, sed Deo  
debetur.* Cogitare quippe aliquid Evangelio consentaneum,  
duplici modo fieri potest, nempe aut mente solum concipi-  
endo, seu percipiendo, quæ Evangelium narrat, præcipit,  
vetat ac monet, ita ut in homine eorum nuda simplèxque  
apprehensio tantummodo fiat; aut ita concipiendo, ut iis  
mens adsentiat, atque ad illa jam apprehensa feratur de-  
liberato rationis judicio, & voluntatis intimo affectu. Phe-  
reponus priori modo locutum censet Apostolum, dum in-  
quit, Christianos sufficientes non fuisse ad cogitandum  
per

per se Evangelica præcepta, monita, & documenta, nisi Deus per Apostolos eisdem annuntiasset Evangelium ipsum, quod certe ipsi Deo, non autem hominum ingenio, debetur. At hoc à Pauli mente abhorret: non enim gloriatur, neque gloriatus fuisset Apostolus in Christo, & per Christum, quod Corinthii tantummodò apprehendissent, atque intellexissent ex ore ac prædicatione sua Evangelium, cum constet innumeris aliis populis, tum illo, tum subsequens temporibus annuntiatum fuisse Evangelium, qui tamen idcirco neque crediderunt Evangelio sibi prædicato, & apprehenso, neque consentaneè ad Evangelium vixere. Igitur secundo modo Corinthii cogitarunt ea, quæ Evangelio consentanea erant, hoc est, non solum intellectu, sed & voluntate, amplexi sunt cum fidem Christi, tum caritatem, eoque virtutum splendore inter Christianos effulgebant, ut omnibus admirationi essent; atque in iis laudaretur Apostolus ipse. Atque hic sensus iis Pauli verbis. Sufficientia autem, sive idoneitas ad cogitandum hoc pacto ea, quæ sunt consentanea Evangelio, nequit dici inde profecta, *quia Evangelium non ingenio hominum, sed Deo debetur*; nam ut dixi, Evangelium ab aliis etiam percipitur, & tamen salubriter non percipitur; & nisi Evangelii prædicationem Deus peculiari suâ gratiâ comitetur, homines neque convertuntur neque divinâ caritate ad bonas cogitationes, & ad opera pia sæcundantur. Hoc idem Apostolus denuntiârat in priore Epist. ad eosdem Corinth. III. 6, ita scribens; *Ego plantavi, Apollo rigavit, sed Deus incrementum dedit. Itaque neque qui plantat est aliquid, neque qui rigat, sed qui incrementum dat, Deus.* Hoc est: Ego quidem Evangelium vobis prædicavi, Apollo vos baptizavit, sive superaddidit Christianæ Disciplinæ præcepta. At nemo ex vobis ex solo nostro ministerio profecisset ad fidem, & perfectionem Christianam, nisi Deus illuminando mentem, & inspirando in voluntatem vestram vos intimo suæ gratiæ vigore ad hos fidei & virtutum fructus intactâ libertate Arbitrii vestri perduxisset. Quibus ex verbis intelligas, sufficientiam ad cogitandum aliquid boni, aliquid quod ad salutem pertineat, aliquid verè consentaneum Evangelio, non à nobis esse, non ab Evangelii nudâ prædicatione, ejusque apprehensione, sed ab ipso Deo, hoc est ab ipsa Dei gratia interiori, intellectum illuminantis, & voluntatem moventis ad bonum. Hoc illud est, quod ostendere volebant, & reipsâ ostendunt Africani Patres, laudatis Apostoli verbis, quibus frustra Phereponus alium sensum affingit contra ipsius Apostoli mentem.

Denique ex eadem Epistola 1. ad Cor. IV. 7. citant Episcopi hunc locum: *Habemus thesaurum istum in vasis fictilibus, ut eminentia virtutis sit Dei & non ex nobis.* Eodem loco unus est Hieronymus contra Pelagium Dial. 3. Cap. 3. Thesaurum tamen istum esse dona Apostolica ait Phereponus, ideoque nihil pertinere ad gratiam, de qua cum Pelagianis disputabatur. Sed inter ista dona Apostolica quis docuit Phereponum non computandas esse virtutes omnes, earumque principem in primis, ardentem caritatem Dei, & proximi? Quid reliqua dona Apostolis à Deo concessa profuissent, si istam quoque caritatem eisdem non donasset Deus? Idem Apostolus ad Corinthios in prior Epistola Cap. XIII. 1. jam hæc scripserat: *Si linguis hominum loquar, & Angelorum; & si habuero prophetiam, & noverim mysteria omnia, & omnem scientiam; & si habuero omnem fidem &c. Caritatem autem non habuero, nihil sum, nihil mihi prodest, &c.* In altera verò Epistola, quæ nunc argumentum nobis differendi præbet, Cap. V. 14. explicat Apostolus, quid se urgeret, impelleretque ad labores pro Corinthiis susceptos. *Caritas, inquit, Christi urget nos.* Unde autem caritas ista in Apostolos venerat? Nam ex eorum viribus, num per liberi Arbitrii conatus? Nequaquam; sed quidem à Deo. sed quidem per Spiritum S. *Caritas enim ex Deo est, ut habetur 1. Jo. IV. 9. Et caritas Dei diffusa est in cordibus nostris per Spiritum S. qui datus est nobis,* ut inquit Paulus ipse ad Rom. V. 5. à qua caritate Dei non angustia, non fames, non persecutio ulla poterat ipsum cæterosque Apostolos separare. Quapropter Apostolus, quod ipse tam fortis esset inter tot adversitates atque pericula, & quod tantus fructus in populis prædicationem Evangelii, suumque Apostolicum ministerium consequeretur, non suis, non auditorum viribus, industriæ, ac sapientiæ adscribebat, sed potentiæ, ac virtuti, id est gratiæ divinæ, ut *sublimitas, sive eminentia sit virtutis Dei, & non ex nobis.* Quid ergo Phereponus ait, nihil hæc verba pertinere ad causam, quam Catholici adversus Pelagium tuebantur? Imò qui pronuntiare potuit, ne unum quidem ex iis Scripturarum locis, quibus hætenus lucem attulimus, *probare id quod volebant Africani Patres? Iudicium Lectorum appello.*



## CAPUT VI.

*Orandi quidem Dei utilitas in hominibus, sed non necessitas, à Pelagio admissa. Aliæ Phereponi accusationes confutantur. Non omnia dona Evangelica Pelagius confessus est. Gratiæ Dei, cum opponitur Legi in sacris Litteris, non semper Evangelium merum significat, ut Phereponus & Hammon-  
dus putant, sed etiam beneficia Dei per Evangelium collata, & præsertim fidem, & caritatem. Deum impossibilia non jubere, Augustini & Ecclesiæ Catholicæ sententia est. Pelagiani inimici gratiæ Dei,*

**P**ERGUNT dicere Carthaginenses Patres in sua ad Romanum Pontificem Synodica Epist. 175. aliàs 90. ex sacrilegis Pelagianorum disputationibus necessariò consequi, ut nec orare debeamus, ne intremus in tentationem, quod Dominus & discipulos monuit, & posuit in oratione, quam docuit; aut ne deficiat fides nostra, &c. Non necessariò hoc sequi, Phereponus statim notat, nam particula illa Orationis Dominicæ, aut preces Christi pro Petro, non significant id, quod innuunt Patres, quasi hoc sibi vellent: O Deus, fac afflatu interno, cui resistere nequeamus, ut tentationem vincamus. Ità Censor imperterritus patientiâ Lectorum abuti pergit. Sed gratiam, ut his vocabulis utar, necessitante, atque irresistibilem, ubinam Africani Patres, Augustinus, & Catholici tradiderunt? ubinam exegerunt, ut gratiam talem Pelagius confiteretur? Somnium hoc esse, complures Catholici jam ostenderunt; & tamen Phereponus id tanquam pro comperto, minimèque dubio passim sumit ac statuit. Cæterùm nobis necessarium est ad superandas tentationes auxilium gratiæ Dei, etiamsi huic auxilio resistere valeat liberum hominis arbitrium. Catholici reipsâ hoc unum tradebant; Pelagius contrà necessarium negabat adiutorium Dei, ne intremus in tentationem; qua ex opinione consequitur, nobis non esse opus oratione ad evitanda peccata. Quid autem habet Pherepon. quo istud consecrarium à sententia Pelagii tandem avertat? Ait, Pelagium non negâsse, neq; negare potuisse, quin constitutis in periculo confugiendum sit ad auxilium Dei, etiâ extraordinarium; primò, quia non ità facile contingit, ut cada-

mus, inusitato Dei auxilio adjuti, faciliusque hâc ratione à periculis evadimus; secundò, quia inter ipsas vires, quas Deus Christianis sufficientes largitur, nihil vetat, pro magnitudine periculorum, inusitata auxilia haberi. *Itaque, concludit in hæc verba, non potuit meritis insimulari Pelagius, quasi doctrinâ suâ orationis usum sustulisset.* Ità Phereponus Pelagium facit non stultum, quando facere non potest Orthodoxum, Nimium quippe ille delirâisset, si eum credens Deum, qui homini in periculis opem ferre possit, utile saltem non censuisset orationibus exposcere illius præsidium, Sed non idcirco rectè sentiebat Pelagius; nihilque habet nunc Phereponus, quo Africanos Patres jure arguat, sed solùm, quo suam præcedentem sententiam refellat. *Pelagianorum sacrilegas disputationes,* ajebant Africani Episcopi, *necessariò consequitur, ut nec orare debeamus;* hoc est, ut necesse homini non sit orare. *Non necessariò hoc sequitur,* reponit Phereponus. Cur? Quia orationis usus ex Pelagii sententia utilis est. At aliud est, utiles esse ad Deum preces, aliud esse necessarias. Utiles tantùm, Pherepono teste, Pelagius orationes ajebat, non autem necessarias. Ergo jure dicunt Carthaginenses Patres, è Pelagii sistemate consequi, ut orare necesse non sit: quod confectarium negabat modò Phereponus noster.

Sed luculentiùs videamus, quæ verè fuerit Catholicorum, hac de re cum Pelagianis disputatio. Cùm primùm cœpit Pelagius tantas naturæ humanæ, liberòque Arbitrio vires tribuere, ut homò sine adjutorio gratiæ Dei agere bonum, & evitare peccatum, quandocumque velit, possit: illico objectum est illi, ità fieri, ut necesse amplius non sit orare Deum; nam quæ necessitas ab alio poscendi, quod in tua potestate jam sit? Sanctus Hieronymus in Epistola ad Ctesiphontem Cap. 3. ità in Pelagium ejusque gregarios maturè disseribat: *Si non ultrà Dei indigemus auxilio, ne si indigerimus, liberum frangatur Arbitrium: ergo nequaquam ultra orare debemus, ne illius clementiam precibus flectere, ut accipiamus quotidie, quod semel acceptum in nostra est potestate, &c.* Tum inquit, ità philosophari & scribere unum ex ipsis Pelagianis, nisi sit ipse Pelagius. Idem confectarium ex ejusdem Hæretici doctrinâ jure colligebant Carthaginenses Patres in laudata Synodica ad Innocentium I. & Milevitani in altera Synodica ad eundem Innocentium, & Innocentius ipse in suis Litteris. Ut à se tantam culpam aliquâ ratione removeret Pelagius, eo Catholicorum ob-  
jurgationibus adductus tandem est, ut confiteretur, idèd  
grati-

gratiam Dei hominibus dari, ut quod per liberum facere jubentur Arbitrium, FACILIUS possint implere per gratiam. Ità ille in Libris de lib. Arbitrio. Ejus verba refert & explicat Sanctus Augustinus in Lib. de Hæres. Cap. 88 in-  
 quiens: Dicendo utique, ut FACILIUS possint, voluit credi, etiamsi difficilius, tamen posse homines sine gratia divina facere jussa divina; Et in Epistola 186. olim 106. Cap. 10. Uti-  
 cum dicit FACILIUS, quid vult intelligi, nisi & gratia si de-  
 sit, posse per liberum Arbitrium vel facile, vel etiam difficile, qua divinitus jubentur, impleri? Nihil aliud extundi è per-  
 tinaci Hæretico potuit, quem propterea variis in locis ar-  
 guit Augustinus, & potissimum in Lib. de Gratia Christi Cap. 29. dum ad ea verba respiciens scribit: Tolle FACILI-  
 US, & non solum plenus, verum etiam sanus est sensus si ità di-  
 catur: Ut quod per liberum facere homines jubentur Arbitrium, possint implere per gratiam. Africani autem Patres in Syno-  
 do habitâ Carthagine Ann. Chr. 418. istud Pelagii dogma anathemate excipiebant: quod & à reliquis Catholicis, & ab Augustino in primis est factum. Quid ergo laborat hîc Phereponus, nisi ut nos doceat rem jamdiu explora-  
 tam, videlicet Pelagium non negasse, quin utile sit orare Deum, quo facilius peccata caveantur? Nihil id ad rem at-  
 tinebat. Si animus ipsi erat, suum & hîc Pelagium defende-  
 re, ostendendum fuit, Africanos Patres frustra conqueri, quod Pelagius doctrinâ suâ orationis necessitatem sustu-  
 lisset, sive quia reverà Pelagius eam fatebatur, sive quia hominibus nulla est propriè necessitas orationis. At neu-  
 trum potuit aut poterit ille præstare: adversantem enim sibi reperiisset atque reperiet cum totam Historiam Eccle-  
 siasticam, tum apertissima divinarum Litterarum, & legitimæ Traditionis monumenta, quibus palam fit, sine adjutorio gratiæ Dei vinci non posse tentationes, & ne-  
 cessum esse cuicumque nostrum orare, ne ab ipsis tentatio-  
 nibus vincamur.

Quæ sequuntur apud Phereponum §. 5. pag. 515. nihil est quod refellamus; versantur enim in illo ineluctabilis affla-  
 tus somnio, cui uni tam sæpè, tam libenter, ille superædifi-  
 cat. Nihil etiam reponendum arbitror eidem dicenti, se nomine Pelagii posse objicere Afris, ex eorum sententia à Deo ni-  
 hil potuisse peti (debuisse alter scripsisset) cum reprobis quidem necessaria negare, electis verò omnia concedere, etiam non pe-  
 tentibus, ab aeterno decrevit. Nam ignorare ipse nequit, cum Augustinum, tum totam Catholicorum Ecclesiam, agnovisse semper auxilia sufficientia ad salutem omni-

bus à Deo præberi ; atque uti ad regnum ex gratuita Dei misericordia electi vocantur ; ita etiam reprobos ex propria culpa ac voluntate damnari. Eâdem brevitate transcurrimus, quod infra habet §. 6. de Pædobaptismo, querens aut ex Novo Testamento ostendi nullo modo posse necessarium. Subdit autem non nisi absurdè fundamenta fidei ab Afris vocari potuisse ea ; de quibus altum est in Novo Testamento silentium. Verùm & infantibus necessarium esse Sacramentum regenerationis per aquam , suprâ nos demonstravimus ; & Patres Cartaginenses , cum ajunt , Pelagianos affirmare , necessarium non esse neque infantium Baptismum, neque orationis usum, quibus impiis dogmatibus *fundamenta Christiana Fidei conantur evertere* : satis produunt , se inter dogmata quidem Catholica referre Pædobaptismum, sed non inter fundamenta fidei, qualia sunt, omnes in Adam peccasse, atque indigere gratiâ Dei, & hominum naturam esse corruptam , & ad bonum per se ineptam, & neminem sine gratia Servatoris ad regnum posse pervenire , atque alia ejusmodi , quæ negato Pædobaptismo, & orationis necessitate sublatâ, consequenter everuntur.

In notis ad Epistolam 176. Augustini olim 92. Milevitanos Patres arguit Phereponus pag. 120. quod hæc de Pelagianis ad Innocentium I. Pontificem Maximum scribant : *Cum Dominus docuerit , ut dicimus : Dimitte nobis debita nostra, &c. Isti dicunt ; posse hominem in hac vita , præceptis Dei cognitis ad tantam perfectionem justitiæ , sine adjutorio Gratia Salvatoris , per solum liberum voluntatis arbitrium pervenire ; ut ei non sit jam necessarium dicere : Dimitte , &c.* Ità verò ad hæc adnotat Phereponus : *Non dicebant , quemquam per totam vitam immunem prorsus peccatorum vixisse , excepto uno Christo. Unde sequabatur , neminem esse , ex eorum sententia , qui non deberet dicere : Dimitte , &c. Nam ad finem usque vitæ peccatorum semel admissorum veniam petere omnes necesse habemus. Hæc ergo est invidiosa criminatio. At nos dicimus, Pelagium, seu potiùs Cœlestium affirmasse , hominem per totam vitam prorsus sine peccato esse posse : id enim illius argumenta aperte conficiunt. Quòd si hominem esse , aut fuisse reipsa sine peccato, præter Christum, affirmare ille non est ausus : ex primo tamen ejus effato jure colligebatur , hominem posse in hac vita pervenire ad tantam perfectionem justitiæ , ut ei non sit jam necessarium dicere : Dimitte , &c. Quæ enim Vera necessitas petendæ veniæ de peccatis homini illi , quem nullius culpæ conscientia morderet ? Sed utcum-*

que

que fit de illorum sententia , atque de ejusdem sententiæ confectariis, nos Pherepono respondemus, quod Augustinus respondebat Cœlestio in Lib. de perfectione justitiæ Ratioc. 16. Cap. 7. nempe : *Nullum cum eis de his verbis esse debere confictum , quia non est ausus dicere hominem esse sine peccato vel aliquem, vel seipsum, sed tantummodo esse posse : quod neque nos negamus. Quando autem possis , & per quem possis , hoc quaritur , &c. Nam si per se ipsum potest homo esse sine peccato , ergo Christus gratis mortuus est. Non autem gratis Christus mortuus est ; non igitur potest homo esse sine peccato , etiam si velit , nisi adjuvetur gratiâ Dei per Jesum Christum Dominum nostrum, &c.* Milevitani autem Patres eâdem ratione Pelagium sive Cœlestium execrabantur, quod diceret, *sine adjutorio Gratia Salvatoris, per solum liberum Arbitrium posse hominem pervenire in hac vita ad perfectionem justitiæ.* Reliqua vide apud eundem Augustinum in laudato Libro de perfectione justitiæ.

Invidiosam pariter criminationem , si Pherepono credimus, continent hæc alia Patrum Milevitanorum verba : *Non ita intelligendum (ex sententia Pelagii) illud ne nos inferat in tentationem, tanquam divinum adjutorium poscere debeamus, ne in peccatum tentati decidamus, sed hic ( id est non decidere ) in nostra esse possumus potestate.* Inquit enim Phereponus, gratias cœlestes non parum in tentatione juvare , ex ipsius Pelagii sententia. Addit etiam , *ac sine iis in gravibus sensationibus homines succumberent :* quod postremum quandonam Pelagius ad fatendum adductus fuerit , nescio quâ ostendere possit illius hyperaspistes Phereponus Orationis, ac divini adjutorii utilitatem , uti vidimus, prædicavit quidem interdum Pelagius , at nunquam ejus necessitatem ; quippe viribus humanæ naturæ nimium semper indulgit. Ergo jure ex ejus sententiâ inferebant Patres , necessarium non esse divinum poscere Adjutorium , ne in peccata cadamus. Duo autem illa è facris Litteris excerpta loca , quæ ad confirmandam necessitatem auxilii , & gratiæ divinæ protulere Milevitani Concilii Patres , frustra à Pherepono sollicitari intelliget , quisquis & superiorem nostram responsionem legerit , & meminerit ineluctabilem afflatum temerè atque injuriâ ubique Augustino affingi à confidentissimo Censore isto.

Non sunt quidem cursim prætereunda , quæ idem animadvertit ad Augustini Epistolam 177. olim 95. Inquit ibi Augustinus cum suis collegis , Pelagium in Diospoli-

tano Concilio *Gratiam Dei* se agnoscere professum: *Quibus auditis verbis Catholici Antistites nullam aliam Dei Gratiam intelligere potuerunt, nisi quam in Libris Dei legere, & populis Dei legere, & populis Dei predicare consueverunt; eam utique, de qua dicit Apostolus (Gal. 2. 21.) non irritam facio Gratiam Dei.* Nam si per Legem iustitia, ergo Christus gratis mortuus est. *Sine Dubio gratiam, quâ iustificamur ab iniquitate, & quâ salvamur ab infirmitate, non quâ creati sumus cum propria voluntate.* Hic insurgit Phereponus, & ait, Pelagium non sola Creationis beneficia agnovisse, verum etiam Evangelica omnia; sed non *Gratiam illam efficacem Augustinianam, ante cum incognitam præsertim in Oriente.* Quid pro *Gratia efficaci Augustiniana* hic intelligat Phereponus, nemo non intelligit. At si cûti certum nobis est, huiusmodi gratiam, cui reluctari humana voluntas non possit, & quæ non *Augustiniana*, sed *Calviniana* dicenda est, incognitam fuisse plurimis sæculis tum ante Pelagium, tum etiam postea: ita quoque certissimum est, nunquam instituisse Augustinum, ut gratiam talem agnosceret Pelagius. Non autem minus fallitur, aliósq; fallit Phereponus in hac absurda sententia sancto Augustino tribuenda, quàm fallatur & fallat in altera opinione Pelagio adscribenda. Nullus controversiæ locus superfuisset inter Catholicos atque Pelagium sive Cœlestium, si omnia Evangelica dona is agnovisset, eaque verè *Dei dona*, & non humanarum virium, laborisque nostri fructum confessus fuisset. Tot autem invisibilia ac interna beneficia, sive auxilia Dei, quibus ad bonum prævenitur, & adjuvatur, sinè ulla tamen prævia necessitate, & sinè ulla coactione, nostra voluntas; & quibus vitiatur nostræ naturæ infirmitas suppletur, atque sanatur, per se, & absque huiusmodi auxilio, præstitura nihil boni ad salutem æternam pertinens; & quibus homo ad veram fidem perducitur, & ad verum suorum criminum dolorem excitatur, atque à peccatis liberatur, & caritate divinâ demum perfunditur, aliæque ejusmodi: utique sunt Dei dona per Christum Servatorem homini comparata, hominique si-  
ve gratis collata, si-  
ve gratis, & non ex meritis nostris, conferenda, & peculiari vocabulò *Gratia Dei per Christum* apud sanctos Patres celeberrimâ. Somnia ergo nobis narrat Phereponus, in-  
quiens Pelagium agnovisse *omnia dona Evangelica*; nihil enim magis exploratum est in Historia Ecclesiastica, quam quod ambitiosus humani Arbitrii inflator Pelagius alia ex his donis, beneficiis, & auxiliis non agnoverit, alia agnoverit quidem, sed minimè necessaria  
duce-

duxerit, aut minimè gratis à Deo concessa, sed ità viribus Naturæ nostræ, atque Arbitrii nostri conatibus quæsitā ac debita, ut jam dona & gratiæ Dei desinerent esse.

At his dimissis, vocat nos Phereponus ad perpendendum locum Apostoli nuper ab Agustino laudatum, hoc est *non irritam facio Gratiā Dei*, eūque nihil facere contra Pelagium sinè ulla dubitatione pronuntiat. Audiamus illius rationes: Nam, inquit ille, *Gratiā Dei est ibi Evangelium, aut Evangelica ōconomia, quā Deus justos censet, non eos, qui peccato carent, sed qui Evangelio parent: quamvis antea eorum vita vitiis inquinata fuerit, nec sinè lapsibus variis reliquam aetatem traducant.* Tum addit, eo sensu semper sumi gratiam, quando opponitur Legi, quæ ex Judæorum sententia summā postulabat perfectionem, ità, ut Gratiā opposita Legi & Operibus idem sit ac misericordia opposita rigori, siue imperfecta observatio Mandatorum Dei opposita perfectæ sanctitati. Et ne quis malè tempus terat in ultra inquirendo, an ità se res habeat, hoc luce meridiana clarius esse nos monet, nullūque recentiorum Interpretum occurrere, qui rem non viderit. Quis homini tanta cum securitate talia affirmanti fidem negare audeat? Et tamen patiatur Phereponus nos dicere, nūquam minus quàm hīc sua verba impetrare posse fidem, nobisque contra esse manifestissimum, cum doctrinam Evangelicā, tum Apostoli mentem, ejusmodi suā interpretatione mirū in modum corrumpi. Primò falsum est, Deum in Evangelica Ōconomia censere justos, qui in peccata labuntur, dum tamen Evangelio pareant. Secundò ineptè, & contra veritatem dicitur, obtemperare aliquem Evangelio, etiam dum vitiis se inquinat, suisque cupiditatibus pravis indulget. Furfurem istum Calvinianæ doctrinæ Catholici jamdudum exploserunt; & quisque per se intelligere potest, justitiā à peccato expelli, & neminem reputandum esse justum, hoc est, virtute præditum, & amicum Dei, dum Deum offendit, ei que non pareat, suæque Inobedientiæ præteritæ culpam dolore ac pœnitentiā non eluit. Proinde falsum quoque est, eo sensu, quem Phereponus offert, semper sumi gratiam, quando in Scriptis Apostolicis Legi oppositā nobis occurrit.

Ut hoc tamen perspicuè appareat, animadvertendum est, contendere paucos quosdam è recentioribus Novi Testamenti Interpretibus, Hæterodoxis, & Hammondum in

primis, caput Pherepono in multis carum, reverà nomine Gratia Evangelium significari, cum Gratia seu χάρις in sacris Literis Legi opponitur. Quod tamen Hammondus sæpe factum ait, Phereponus pro sua liberalitate semper factum pronuntiat. Ex iis autem bene multis locis, quæ ad hanc suam opinionem confirmandam contradit undique Hammondus ipse, nonnulla sunt, quæ mirum videatur, quomodo convenient choros. Exemplo sint duo illa desumpta à Cap. XX. 24. & 32. Act. Apost. ubi inquit Paulus, se *testificari Evangelium Gratia Dei*; tum ait, se Ephesios commendare Deo, & verbo Gratia ipse, &c. Εὐγγέλιον τῆς χάριτος, & λόγος τῆς χάριτος, nihil aliud sunt Hammondus, quàm prædicatio Evangelii. Non is quidem sum, qui negare velim, quin Gratia nomine Evangelium dici interdum possit designatum, quando Legi opponitur; sed quidem ajo. constare prius inter nos debere, quid sit vocabulo Evangelii tunc intelligendum, & præsertim in loco Apostoli ad Gal. II. 21. quem Augustinus olim citabat, & nunc Augustino eripere Phereponus nititur. Nomine ergo Evangelii intelligere possumus aut prædicationem gestorum, doctrinæ, cæterorumque donorum, quæ Christus in mundum intulit, & infert, aut ipsam rem prædicatam, h. e. ipsa gesta, doctrinam, & dona Christi. Quanquam prædicatio Evangelicæ Fidei, donum sit, & Gratia à Deo veniens; manifestum tamen puto, Evangelium non appellari Gratiam sub ea significatione, quando opponitur Legi in Apostolicis Literis. Nam prædicatio necessaria quidem est, ut homines audiant, atque amplectantur Fidem Christi; ipsa tamen homines meliores facilioreque; quàm sub Judaica Lege essent, homines per se non facit, cum hoc facere spectet ad ipsam rem prædicatam, h. e. ad doctrinam verà fide perceptam, & ad gratias & dona Dei in amplectentes Evangelium prædicatum diffusà. Dicimus ergo Evangelium, seu rem prædicatam in Evangelio, gratiam potuisse appellari, vel respiciendo ad ipsas Christi res gestas, & ad ejus præcepta, consilia, & exempla [divinà quippe misericordià factum est, ut hæc audierint, & audiant homines,] vel considerando beneficia interna, & dona invisibilia ab ipso Christo procurata hominibus in Lege nova Evangelium fideliter recipientibus, eiq; obtemperantibus, per Christum à Deo collata. Sed nudas Christi res gestas, ejusque doctrinam, atque exempla, non intelligunt Apostoli, cum novi Testamenti Gratiam, Legi antiquæ opponunt; etenim Litera sola ho-



mines justificare non potest, nisi accedant interna illa dona ac beneficia, quæ audientibus, recipientibus, & observantibus Legem Evangelicam confert Deus, & quæ reverà justificationem in nos important.

Hoc ergo postremo titulo propriè ab Apostolis atque Evangelistis Gratiæ nomen Evangelio tribuitur, & jure opponitur Legi. Edocebat Lex, quid agendum foret Judæis, ut Deo placerent, virtutisque à vitiis distinguebat, propterea; fuit & ipsa donum Dei misericordis. Verùm quandoquidem ipsa alioqui bona, sancta & utilis non vivificabat, h. e. per se vim justificandi non habebat, neque virtutem internam Judæis præstabat consequendæ justitiæ, & servandæ Legis, & Deo verè placendi, ut Apostolus toties nos docuit: ideo causa erat, ut cognosceretur peccatum, vigorem autem non ministrabat, ut peccatum evitaretur; neque satis erat homini ad consequendam æternam gloriam. nisi Christus ad mundum suâ morte & gratiâ salvandum venisset. Christus autem venit, donaque invisibilia & præstantissima, fidem præsertim, & caritatem, homini comparans, & vires internas naturæ vitiata, infirmoque hominis arbitrio suppeditans, aliæque beneficia ad bonum operandum præbens, quæ à Lege sola exspectari non poterant, eaque dona in eos effundens, qui sibi credunt, suæque Legi parent, nunc facit, ut justii evadamus, Deoque verè placeamus, cælumque nobis aperit. En igitur causam proximam, cur Evangelium propriè Gratia appelletur in comparatione Judaicæ Legis. Hinc Jo. I. 16. dicit: *De plenitudine ejus (videlicet Christi, quem supra plenum gratiæ & veritatis nuncuparat) nos omnes accepimus, & gratiam pro gratia, quia lex per Moysen data est; gratia, & veritas per Jesum Christum facta est.* In verbis autem Apostoli ad Gal. 2. 21. citatis ab Augustino id apertè innuitur: *Non irritam (inquit Paulus) facio gratiam Dei (sivè non abjicio, ut vulgata versio habet.) Si enim per legem Justitia, ergo gratis Christus mortuus est.* A Lege Moysis, atque ab operibus, & cæremoniis legis, non exspectandam justitiam, atque justificationem, clamat Apostolus, sed quidem à fide Christi, quæ per dilectionem operatur; alioqui si aliunde, quàm per Christum, ejusque dona, obtineri possit justitiâ: quid necesse erat Christum mori? Nisi fides in Mediatorem venturum vel ipsi Judæi habuissent, salutem ex lege sola, atque ex operibus nunquam retulissent. *Scientes (jam supra Apostolus dixerat) quod non justificatur homo ex operibus legis, nisi per fidem Jesu Christi: & nos in Christo Jesu credimus, ut justificemur ex fide Christi, & non ex operibus*

*bus legis, &c.* Igitur Apostolus, dum *Evangelium Gratia Dei*, five prædicationem Divinæ & Evangelicæ Gratia memorat, nihil aliud nomine *Gratia Dei* designat, quàm ea dona, ac beneficia, quæ ex auditu, & receptione Evangelii in homines fluunt, aut fluere possunt per Christum, & quæ Moisaica Lex per se conferre nequibat. Dona hæc & beneficia inspiratione potissimum constant Spiritûs S. qui fidem donat & caritatem diffundit in cordibus nostris, & iustitiant, & morum sanctitatem, cæterasque virtutes in nos defert, omniâque bona in nobis & nobiscum operatur. Proinde Apost. Cap. seq. v. 1. Galatas interrogat: *Ex operibus Legis Spiritum accepistis, an ex auditu fidei?* Et infra: *Qui ergo tribuit vobis Spiritum, & operatur virtutes in vobis: ex operibus legis, an ex auditu fidei?* De hac autem *Gratia Evangelica*, quæ non à nobis, sed ex Deo est, quâ, ut ait Augustinus, *justificamur ab impietate, & quâ salvamur ab infirmitate*, disputabatur eum Pelagio affirmante illam à viribus nostris esse, easque esse humani arbitrii vires, ut in nobis fidem & caritatem, Deo has virtutes gratis non tribuente, excitare possimus. Quamobrem nullo jure Phereponus dicit, *Gratiam* sensu Augustiniano hic minimè sumi, ut nec usquam alibi in Scriptura. Nam si Calviniano sensu, quem ipse pro suo more *Augustinianum* appellat, *Gratiam* intelligit: id quidem certum sit ex nostra quoque sententia; sed falsissimum est, si ad veram S. Augustini mentem respicimus, ut ex pluribus divinarum Literarum exemplis constat, & præsertim ex eo ad Rom. III. 24. *Justificati gratis per gratiam ipsius per redemptionem qua est in Christo Jesu*; & ex altero 1. Cor. XII. 8. *Sufficit tibi gratia mea*. Videat insuper Phereponus, quàm opportuno loco pronuntiârit, Africanos Episcopos & negligenter legisse, & oscitanter laudâsse Scripturam, & quàm solidâ ratione hic elevet eorum auctoritatem atq; doctrinam. Tandem videat, quibus tabulis fretus affirmare ipse possit, *Gratiam* oppositam *Legi* in sacris Literis idem esse, ac *miseri-*  
*cordiam oppositam rigori, & imperfectam observationem mandatorum Dei perfectâ sanctitati.* Quasi Deus in veteri Testamento rigidus iudex nullius Judæi misereretur, qui in peccata caderet; misericors autem in novo non exigit à Christianis perfectam mandatorum observantiam; & quasi perfecta sanctitas atq; iustitia obtineri per Legem solam potuerit, imperfecta autem in Evangelio neminem à salute excludat. Hæc dogmata manifestè pugnant in Scripturam sacram: quod ostendere nobis facillimum foret, nisi ad alia raperetur oratio. Temperare tamen mihi non possum, quin

memorem illa Servatoris verba ad Discipulos suos Matth. V. 20. *Nisi abundaverit iustitia vestra, plus quàm Scribarum & Phariseorum, non intrabitis in Regnum cælorum.* Tu reliqua ibi Christi verba perpende.

In Lib. de Hæres. ad Hæresim 88 de Pelagianis hæc habet Augustinus: *Dei gratia, quâ prædestinati sumus in adoptionem filiorum per Jesum Christum in ipsum, & quâ erui-mur de potestate tenebrarum &c. in tantum inimici sunt, ut sine hac posse hominem credunt facere divina mandata, &c.* Ubi Phereponus hæc retulit pag. 595. religiosum ardorem præferens, anathema continud dicit omnibus, qui divinæ gratiæ inimici sunt; imò ut putat, Pelagius, si revivisceret, in eadem sententia, atque execratione secum fore consensurum judicat. Verum (deinde subdit) *accusatorie dicit Augustinus inimicos Gratia Dei eos, qui interitum afflatum, ad singulos necessarium actus, eumque ineluctabilem, & ad finem usque vita solis electis dandum, hoc est, Gratiam Augustini, non Dei repudiabant; nam Gratiam hunc afflatum, aut Gratiam Dei vocari in Scriptura nunquam demonstravit.* Tum addit, Deum (utpote justum) impossibilia non imperare, neque sumere pœnas de iis, qui non fecerunt impossibilia. Quod si præter nudum imperium, auxilium aliud divinum necessarium sit (hoc autem, si Pherepono credimus, non negabat Pelagius,) id nemini eorum, quibus aliquid imperat, subtrahit Deus. Tandem ita Cenfor eloquitur: *Sed omnia hæc sunt, ut alibi apud Augustinum, ad invidiam faciendam composita.* Liceat & nobis hæc dicere, omnia hæc Phereponi verba, ut alibi sæpè, hominis esse aut calumniantis, aut sibi ignota culpantis. Ità Augustinus scribebat in Lib. de Gratia & libero Arbitrio Cap. 16. *Magnum aliquid Pelagiani se scire putant, quando dicunt: Non juberet Deus, quod sciret non posse ab homine fieri. Quis hoc nesciat? Sed ideo jubet aliqua, quæ non possumus, ut noverimus, quid ab ille petere debeamus.* Ipsa est enim fides, quæ orando impetrat, quod lex imperat. Juvat etiam repetere alium celebrem Augustini ejusdem locum in Lib. de Natura & Gratia Cap 43. *Non igitur Deus impossibilia jubet; sed jubendo admonet & facere quod possis, & petere quod non possis.* Ubi vides duo poni ab eximio viro; nempe Deum impossibilia non imperare, simulq; Dei auxilium necessarium esse ad ea implenda, quæ ipse præcipit: è quibus tertium necessariò consequitur, Deum videlicet, sufficienti auxilio hominibus adesse, ut præcepta adimplere possint, eorundemque tantum vitio fieri, nisi impleant. Quo verò opera bona virtutesque certò amplectamur, legemq; velimus implere, & reapse impleamus, & quod æterna Dei

de electorum suorum prædestinatione decreta certus subsequatur effectus : efficacioribus auxiliis utitur Deus , quæ singulis profectò non donari , neque ex obligatione teneri Deum , ut omnibus & singulis donet : tum experientia , tum sacræ Literæ , & sancti Patres , & rationes innumeræ manifestum faciunt. Primo igitur loci quid est , quodd Phereponus monet , impossibilia à Deo non præcipi , quasi aliter Augustinus sentiret ? Deinde quid dubitare videtur , num præter nudum imperium , necessarium sit aliud quodpiam à Deo auxilium , quo Lex impleatur ? Istius auxilii necessitatem divinæ Literæ luculentissimè statuant. Tertiò sentit Phereponus , non negasse Pelagium , quin sit necessarium istud auxilium. At Augustinus in eod. Lib. de Hæres. atque ad eandem Hæresim Pelagianorum , atque alibi etiam , testis est fide dignior quàm Phereponus , nunquam induci potuisse Pelagium , ut divinæ gratiæ necessitatem admitteret. Denique ( sunt Augustini verba ) *Pelagius à fratribus increpatus , quodd nihil tribueret adiutorio Gratiæ Dei , ad ejus mandata faciendâ , correctioni eorum hætenus cessit , ut non eam libero Arbitrio præponeret , sed infideli calliditate supponeret , dicens , ad hoc eam dari hominibus , ut quæ facere per liberum jubentur arbitrium , facilius possint implere per Gratiâ . Dicendo utique ut facilius possint , voluit credi , etiam si difficilius , tamen posse homines sine gratia divina facere jussu divina .*

Quæ si vera sunt , ( ut profectò sunt , neque negare Phereponus audeat , ) quis non intelligat , rectissimè atque verissimè Pelagianos appellatos ab Augustino fuisse *inimicos divinæ gratiæ* , & potissimum cum hæc de ipsorum prima opinione pronuntiet , quando videlicet nihil aut parum tribuebant auxilio gratiæ Dei , sed omnia linebant liberi Arbitrii viribus ? Non semel autem monui , rursusque monere cogor , mirè decipi Phereponum , dum ejus gratiæ , quam S. Augustinus tuebatur , notionem nobis obtrudit. Est quidem illa internus Dei afflatus in intellectum , & voluntatem hominis , sed ineluctabilis afflatus non est , cui nempe resisti non possit ; neque solis electis reservatus est , cum reliquis etiam concedatur , qui ab amore creaturarum rerum ad amorem veri Dei , & Salvatoris nostri Jesu Christi reverà convertuntur. Calviniana Gratiâ est , quam ubique describit nobis Phereponus , non Augustiniana. Hic ille dudum cœcutit ; cum tamen ignorare homo tot controversiarum gnarus non possit , num à Calvino , an potius à Catholicis stet Augustinus Et sanè afflatum , qualis à Calvino describitur , Gratiâ Dei nunquam in Scripturâ vocari ,

cari, nos quoque libenter concedimus. Verùm in Scriptura clarissimè tradi Augustinianam divinæ Gratiæ notionem atque sententiã, tum aliquibus testimoniis suprà ostendimus, tum pluribus aliis evincere possemus. Eò etiam faciunt omnia, quæ sacræ Literæ habent de auxiliis, de adiutorio, & ope, quam Deus homini confert, ut bonum operetur, & finè quo homo operari bonum, & venire ad Christum, & impleri Spiritu Sancto, & sanctâ charitate donari non potest. Intimè quoque, atque efficaciter (non finè tamen cooperatione ac libertate Arbitrii nostri,) in animos voluntatèque hominum auxilia ista influere, multis in locis tradit Apostolus, sed præcipuè cùm ait ad Philip. 2. 13. *Deus est enim, qui operatur in vobis & velle, & perficere pro bona voluntate.* Et in 1. ad Cor. III. 7. *Neque qui plantat est aliquid, neque qui rigat, sed qui incrementum dat Deus.* Atque hoc internum Dei misericordis auxilium Gratia illa potissimùm erat, de qua cum Pelagio disputabatur, quæque à S. Augustino ità definitur Lib. 4. Cap. 5. contra duas Epistolas Pelag. *Inspiratio dilectionis, ut cognita sancto amore faciamus.* Ejus necessitatem non agnoscebat Pelagius; Augustinus autem, & Ecclesia Catholica deprædicabant. Si contendere Phereponus velit, Pelagio perperam Augustinum affinxisse hujusmodi sententiã: Pelagium faciet ille Catholicum. Sin ità Pelagium sensisse fateatur, solumque contendere velit, ejus opinionem immeritò à Catholicis divexatam fuisse; Augustinum non arguat tanquam Pelagianis dogmata ab eisdem repudiata declamatorio more imponentem, sed ipsa arguat ipsius Augustini dogmata. Quod postremum si Pherepono facere placeat, non expectet à nobis confutationem, sed sciat se jamdudum ab innumeris Ecclesiæ Catholicæ Theologis fuisse confutatum. Cæterùm in sententiã, sive ut ità dicam, in suppositione Augustini, rectissimè semper, & finè calumnia vocari potuit Pelagius *inimicus Gratia Dei*, quippe qui illam humanæ voluntati necessariam ut fieretur induci nunquam potuit.



## CAPUT VII.

*Voluntarium & Liberum Phereponus putat ab Augustino confusa. Quid sint Libertas essentialis, & Libertas accidentalis humani Arbitrii. Quid necessitas essentialis, quid accidentalis, quid antecedens, quid consequens. Arbitrium hominum semper liberum ab antecedenti necessitate, semper præditum essentiali libertate. In hac sententia semper fuit sanctus Augustinus, uti ex multis ejus locis ostenditur. Nulla in Deo antecedens necessitas, eique etiam tributa à quibusdam Libertas in amore sui, atque virtutis. Præscientia futurorum in Deo non tollit Arbitrium homini liberum. Deus prævidet, liberè homines peccaturos. Idem in Deo sunt præteritum, præsens, ac futurum; quare ejus Præscientia non lædit Arbitrii humani libertatem.*

**D**E libero Arbitrio agentem Augustinum Phereponus non uno sugillat in loco; sed quanta cum æquitate, nostrum erit deinceps ostendere. Illud verò tanquam ratum certumque statuit ubique Phereponus, aut Augustinum ignorasse, quæ inter *liberum & voluntarium* differentia intercedat, aut novisse quidem, sed affirmare non dubitasse. à Deo puniri quæcumque etiam mala ab hominibus, etsi *voluntariè*, non *liberè* tamen perpetrantur. In Lib. de vera Relig. c. 14. dixerat Augustinus: *Usque aded peccatum voluntarium est malum, ut nullo modo sit peccatum, si non sit voluntarium.* Hæc ita excipit Phereponus pag. 485. *Nempe si voluntarium dicatur liberum, ita ut possit admitti peccatum, aut non, & quidem ab ipso peccante.* Tum addit, omnes prorsus mortales ita sensitse ante controversias Pelagianas; *Nec aliter, ait, sensitset ipse Augustinus, si post mortem ejus nata demum fuissent.* Itaque hac frustra cum sententia, quam postea amplexus est, in concordiam redigere conatur, *Retract. Lib. 1. Cap. 13. §. 1. quasi voluntarium dicatur tantum, quod infidet voluntati, quamvis liberum non sit.* Istam quæstionem uberiùs deinde agit in Animadv. ad Lib. V. Cap. 10. de Civ. Dei, inquiens pag. 579. *Augustinus hic, ut & alibi, voluntarium, & liberum confundit, quæ in omnium hominum sermone distincta sunt; nam voluntate quidem ad sen-*

*ad sentimur evidenti enuntiationi, sed non liberè, & voluntate simul cupimus felicitatem, sed non liberè; neque enim possumus nolle evidenter assentiri, aut nolle esse felices. Infra verò hæc Augustini verba adfert, simulque per quasdam parentheses commentatur: Quocirca nullo modo cogimur (inquit Philosophus Pœnus), aut retenti præscientiæ Dei tollere voluntatis Arbitrium (cur non addit liberum) aut retento voluntatis Arbitrio (addendum erat libero, hoc est, in utramque partem flexii) Deum quod nefas est, negare præscium futurorum. Sed utrumque amplectimur, utrumque fideliter & veraciter confitemur: illud ut benè credamus, hoc ut benè vivamus. Male autem vivitur, si de Deo non benè creditur. Ità Augustinus, cujus sententiam his aliis verbis Phereponus onerat, dicens: Postrema hæc libenter amplectimur; sed si aliquis reposuisset Augustino, negasset ab Augustino retineri liberum Arbitrium; quoa nec ille diffidetur, cum extra controversiæ assum loquitur. Vide Enchiridion. ad Laurentium Cap. XXX.*

Illud primò nos hîc protestamur, firmissimum esse semperque fuisse Catholicorum dogma, liberum in homine, vel post Adami lapsum, superesse Arbitrium, neque aut peccata, aut divinam gratiam essentiali istâ qualitate hominem exspoliare posse; Calvinum verò, Lutherum, eorumque similes execramur, & Concilii Tridentini diris percutimus, quòd in actibus moralibus voluntarium quidem, sive spontaneum homini tribuant, sed liberum Arbitrium, sive electivam potestatem eripiant. Secundò addimus, si quid hîc extra Ecclesiæ Catholicæ sententiam exorbitasset Augustinus, controversiæ ardore abreptus, non eum declinantem ad extrema volumus sequi, sed regiam tenere Catholicæ matris viam. Tertiò dicimus, ne ipsum quidem ab hac eadem via veritatis Augustinum deflexisse; & si qua occurrunt in ejus Libris de hoc ipso argumento obscura, facili interpretatione, & ex aliis ejus locis explicari itidemq; cum Catholico dogmate componi posse, atq; debere. Animadvertendum igitur est ante omnia, libertatem, atq; necessitatem humani arbitrii, sive humanæ voluntatis, diversimodè accipi, pluribusque distingui modis. Nos ut brevitati consulamus, bifariam tantummodò ipsas distinguemus. Itaque alia est libertas essentialis, alia accidentalis. Prior voluntatem respicit, uti electiva est, facitque ut homo ex institutione sua possit aut eligere, aut non eligere aliquid sibi propositum. Idèò verò essentialis homini dicitur, quia homo desineret esse animal rationale, & in brutorum animalium naturam concederet, si eidem auferretur

tur huiusmodi libertas, atque potestas, propter quam iuste aut iniuste operari dicitur? & laude & vituperatione dignus reputatur. Altera libertas accidentalis est, quæ voluntati humanæ adesse, aut ab eadem abesse potest, salvâ libertate illâ, quam *essentialem* diximus esse rationali naturæ. In tot autem libertates huius postremi generis libertas dividitur, in quot ipsa actionum humanarum ampla respublica, iisque libertatibus privare se ipsemet homo, atque ab aliis quoque externis causis privari potest. Rursus ad instar libertatis alia est necessitas essentialis, alia accidentalis. Illa hominem essentiali libertate, sive naturali facultate eligendi aut non eligendi spoliatum, ita determinat ad unum, ut ei aliter eligere aut facere impossibile sit. Accidentalisi verò accidentali tantum aliquâ libertate hominem spoliatur in aliqua singulari actione faciendâ, aut non faciendâ. Porro necessitas essentialis id proprium habet, ut ad externa causa atque impressione veniens, & præveniens omnem rationalis voluntatis nutum, ipsam potentiam ante determinet ad alicujus rei amorem aut odium, sive electionem aut fugam, quàm ipsa potentia sese liberè moveat ad eligendum aut fugiendum illud objectum; ideòque necessitas antecedens dicitur. Talem necessitatem invexere Fati assertores, & impii quidam Astrologi, & Manichæi, ut alios omittam. Necessitatis verò accidentalisi proprium est, subsequi liberum voluntatis nutum, ideòque consequentis illa appellatur. Ad hæc animadvertendum est, *spontanei*, & *voluntarii* nomine, prout à *libere* hæc nomina distinguuntur, id significari, atque intelligi, quod voluntati placet, & gratum est, quocumque modo id fiat, hoc est, sive ipsi voluntati liberè eligenti palceat, sive placeat eidem ante suam electionem determinatæ, ac necessariò motæ ad illud objectum amandum. Involuntarium, vis & coactio opponuntur spontaneo, & voluntario. Quamobrem qui lubenter, & voluntariè, atque spontaneè agit, is liber à coactione dicitur; & tamen istum eundem imaginari eodem tempore possumus *non liberum à necessitate essentiali*. Ità animalia bruta eò quòd, ut oculis nostris apparet, lubenter, & cum delectatione, aut si mavis dicere, non reluctantia, neque repugnantia, cibum, potum, & venerem identidem appetunt, & tamen necessitate id facere dicuntur, libera dici non possunt à necessitate, etiam si libera sint à coactione.

Hispositis, memoriâ recolendum, contendì solvere à Calvino ejusque gregariis, hominem in actionibus moralibus



libus necessariâ quapiam impressione rapi, ac determinari ad unum ante omnem suæ voluntatis ac arbitrii motum ac nutum, aded ut eligendi potestate ac libertate careat. Concupiscentia prava, ac homini innata, Præscientia Dei, Prædestinatio, Gratia, aut aliæ hujusmodi causæ, secundum ipsos, electivam homini Potentiam eripiunt, ipsûmque aded liberum Arbitrium, At cûm fieri possit, ut ad ea, quæ homo non facere non potest, (necessitate quippe antecedenti atque secreta raptus) moveatur quoque illius voluntas non coactè, sed spontaneè, si vè lubenter, hinc liberum hominis Arbitrium, si eosdem Hæreticos audimus, situm est in hac una *Libertate à coactione* non autem in *Libertate à necessitate*. Quantum à recta ratione, à divinarum scripturarum documentis, & à sanctorum Patrum sententia absit, ac abhorreat hujusmodi commentum, non est hujus loci ostendêre Meminisse tantummodo juvat, nihil à Fati assertoribus, à Manichæis, aliisq; id genus hominibus, quos tantopere Christiana execratur Ecclesia, differrè istorum opinionem; homines verò hoc pacto in pecudum sortem demitti, nulliusque reverà meriti aut demeriti; laudisque ac vituperationis capaces amplius esse dicendos. Augustinum verò in hac sententia sibi præcessisse; jactitant Hæreticorum recentium Scholæ, istorumque clamoribus nihil cunctatur adhibere fidem Pheroponus noster, ne carpendi Augustini tam bella sibi elabatur occasio. Sed aliter sensisse Augustinum, jam per alios patuit, & adhuc nostrâ, ut spero, oratione palam fiet.

Arbitrium ergo hominis liberum esse ab antecedenti necessitate, hoc est præditum suâ essentiali libertate, atque electivâ potestate, ita ut nihil voluntatem ad suos actus, & ad eligendum ante determinet, atque ut ita dicam necessitet, quàm ipsa voluntas libero motu sese ipsa ad unam partem eligendo inclinet: doctrinam semper fuisse Sancti Augustini, ea persuadent, quæ ipse variis in locis in hanc ipsam rem peculiariter intentus scripta reliquit. Et in primis quod est ad peccandum negat ille omnem in voluntate antecedentem necessitatem. In Lib. 3. de lib. Arb. Cap. 18. ait: *Quæcumque ista causa est voluntatis, si non ei potest resisti, sine peccato ei ceditur; si autem potest, non ei cedatur, & non peccabitur.* Mox subdit: *Quis enim peccat in eo, quod nullo modo cavere potest? Peccatur autem; cavere igitur potest.* Si secretâ necessitate, atque determinatione præviâ ad unum; homo aliquod opus prævum agit, utique nullo modo cavere illud potuit. Ergo sine culpa erit,

quia nulla ex parte liberum ipsi fuit secus agere, neque ipse necessitatem sibi fecit, sed factam aliunde sensit. At certum est Augustino, homines revera peccare sæpè ac sæpius ergo certissimum est Augustino, libertatem ab antecedenti necessitate superesse vel post Adami lapsum. Eadem fusiùs repetit Sanctus Doctor in Lib. de duabus Animabus Cap. 12. *Peccati reum teneri quæquam, quis non fecit, quod facere non potuit summa iniquitatis est, & insania. Quamobrem illa anima quicquid faciunt, si natura, non voluntate faciunt, id est, si libero & ad faciendum, & ad non faciendum, motu animi carent; si denique his abstinendi ab opere suo potestas nulla conceditur, peccatum earum tenere non possumus; &c.* Vide & eundem in Lib. de vera Relig. Cap. 14. & in Lib. contra Adimantum Cap. 27 & in Lib. 2. contra Faustum Cap. 5. & in aliis locis Librorum de Lib. Arb. Quod autem est ad bonum faciendum, ne tunc quidem necessitate ferri hominem, sed quidem fini liberè agere, auctor est non uno in loco Augustinus. Celeberrima sunt, quæ ille habet in Lib. de Spiritu & Littera Cap. 34. *Misericordia ejus prævenit nos. Consentire autem vocationi Dei, vel ab ea dissentire, propria voluntatis est.* Iisdem ferè verbis de libertate ad malum perpetrandum pronuntiavit in Psalm. 91. inquit: *Non cessat Satanas suadere malum: sed nec Deus cessat admonere bonum. Satanas autem non cogit invitum. In tua potestate est consentire, aut non consentire.* Alia omitto loca, quibus Sanctus Augustinus, Ecclesiæ Catholicæ concors, humanæ voluntati facultatem, & non de nomine tantum, sed veram ac innatam potestatem tribuit reluctandi & resistendi divinæ Gratiz.

Sed quia loca superiùs aut descripta, aut indicata, quibus essentialem Arbitrii libertatem Augustinus deprædicat, omnia ferè deprompta sunt è Libris contra Manichæos compositis, Phereponus autem contendere potest, Augustinum hostibus mutatis sententiam quoque mutasse: consulamus & Libros Augustini contra Pelagianos, ubi eadem repetit atque confirmat. In Lib. de Natura & Gratia Cap. 65. Pelagianis Sancti Hieronymi auctoritate abutentibus ita respondet: *Item quod ais (Pelagius) à memorato dictum esse Presbytero: Liberi Arbitrii non condidit Deus, nec ad virtutem, nec ad vitia necessitate trahimur, alioquin ubi necessitas, nec corona est; quis non agnoscat? quis non toto corde suscipias?* Vide & Cap. 64. & 66. & 32. & 43. ejusdem Libri. Ad hæc in Lib. 2. Cap. 3. de Nuptiis & Concupisc. objicienti Pelagio, eos statim infamari, qui liberum affirmant Arbitrii-

bitrium, respondet Augustinus: *Non itaque, si-  
cut te atque alios fallens loqueris, si quis liberum in hominibus  
Arbitrium dixerit, Cœlestianus, & Pelagianus vocatur: ista quip-  
pe Catholica fides dicit, &c.* Idem in Lib. de Spiritu & Lit-  
tera Cap. 33 *Vult autem Deus, omnes homines salvos facere,  
& in agnitionem veritatis venire; non sic tamen, ut eis adimat li-  
berum Arbitrium, quo vel bonè, vel malè utentes iustissimè judi-  
centur.* Vide & Cap. 34. ejusdem Libri, & Cap. 2. 3. & 11  
Libri de Gratia & libero Arb. ubi fortiter prædicat hu-  
mani Arbitrii libertatem à necessitate quacumque ante-  
cedenti.

Accedamus nunc ad Phereponum, & ab eo petamus,  
num sibi videatur essentiali homini libertatem eripere,  
qui consentire, aut dissentire sive ad bonum sive ad ma-  
lum in potestate semper relinquit humani Arbitrii? qui  
nos necessitate non trahi fatetur? qui libero Arbitrio bonè  
aut malè uti nos agnoscit, fatum execratur, liberumque ad  
faciendum, & non faciendum animis nostris motum fa-  
cultatemque tribuit? At inquit Phereponus: Cur Augusti-  
nus voluntarium dumtaxat exigit ut actio mala jure dica-  
tur Peccatum? Non voluntariè tantum, sed & liberè fiant  
necesse est, quæ laudem, aut vituperationem mereri de-  
bent. Verùm Phereponus æquior em se erga Augustinum  
longè præbuisse, si viam potius intelligendi; atque in bo-  
num sensum explicandi Augustini, quàm carpendi quæsi-  
isset; Sanctus autem Doctor terminis, atque vocabulis,  
quæ nunc in Scholis obtinent, semper non est usus; &  
voluntatis, ac voluntarii nomine facultatem electivam in-  
terdum significavit. In Lib. de vera Relig. Cap. 14. quo re-  
spicit Phereponiana censura, inquit Augustinus, *usque aded  
peccatum voluntarium esse malum, ut nullo modo sit Peccatum, si  
non sit voluntarium.* Hic nomine voluntarii mali significat  
Augustinus malum, quod à voluntate uti causâ verâ  
procedit, & consequenter à libera causa atque electione  
oritur, omnemque antecedentem necessitatem excludit.  
Indicat id apertè ipsemet Augustinus infrà sic scribens:  
*Si non voluntate malè facimus, nemo objurgandus est omnino, aut  
monendus: quibus sublati Christiana Lex, & disciplina omnis  
Religionis auferatur necesse est. Voluntate ergo peccatur. Et quo-  
niam peccari non dubium est, ne hoc quidem dubitandum vi-  
deo, habere animas liberum voluntatis Arbitrium. Tales e-  
nim servos suos meliores esse Deus judicavit, si ei servirent li-  
beraliter. Quod nullo modo fieri posset, si non voluntate, sed ne-  
cessitate servirent.* Vides hic liberum voluntatis Arbitrium,

vides homines Deo, aut peccato servire liberaliter; ergo liberâ voluntate, non necessitate. Imò ipsemet Augustinus necessitatem hanc opportunè nominans. eam ab Arbitrio hominum prorsus excludit. Lib. autem 1. Cap. 13. Retract. non destruit huiusmodi sententiam, sed rursus confirmat. Peccata quippe quæ ipse tantummodo peccata appellat, prorsus à voluntate electiva esse dicit; illa verò quæ peccata simul sunt, & pœna peccati, atque ab homine perpetrantur suæ cupiditati relicto in pœnam præcedentium criminum, quanquam non voluntariè facta videantur; sed quidem ex necessitate, attamen & ipsa Augustinus voluntaria esse agnoscit, hoc est à libera voluntatis electione facta. *Quamvis*, inquit, & illa quæ non IMMERTITO non voluntaria peccata dicuntur, quia vel à nescientibus, vel à coactis perpetrantur, non omni modo possunt sine voluntate committi; quoniam & ille, qui peccat ignorans, voluntate utique facit, quod cum faciendum non sit, putat esse faciendum. Et ille qui concupiscente adversus spiritum carne, non ea quæ vult facit, concupiscit quidem nolens, & in eo non facit quod vult. Sed si vincitur; concupiscentiæ consensit volens, & in eo non facit, nisi quod vult, liber scilicet iustitiæ, servusque peccati. Ubi patet, Sanctum Augustinum etiam in iis, qui concupiscentiâ illecti ac rapti peccant, nullam agnoscere præcedentem essentialem necessitatem, sed quidem liberam voluntatis inclinationem: si enim nollent, non vincerentur, neque peccarent Et sanè coactum pro invito prorsus, ac nullatenus voluntario, neque Sancti Patres, neque Hæretici accipere consueverunt, cum de ipsius voluntatis actionibus agebatur; sed de externis tantum actionibus accipere, in quibus nullæ sæpè numero possunt esse partes voluntatis. Tam quippe repugnat, actionem sive motionem voluntatis, non esse voluntariam, quam actionem intellectûs non esse intellectualem, & facultatis sentientis non esse sensitivam. Itaque etiamsi à concupiscentia cogi ad peccandum videatur homo, attamen & tunc eligit, & tunc liberè agit voluntas; ac proinde ex allatis S. Augustini verbis inferri nunquam potest, voluntarium tantummodo id dixi, quod insidet voluntati, quamvis liberum non sit.

Minus morosum sese in Augustinum non prodit Pheroponus in notis ad Lib. V. Cap. 10. de Civ. Dei inquiring, *scilicet, ut & alibi, voluntarium atque liberum ab Augustino confundi, quæ ipse omnium hominum sermone distincta sunt; nam voluntate quidem adsentimur evidenti enuntiationi, sed non liberè; &*  
volun-

*voluntate simul cupimus felicitatem sed non liberè.* Verùm si majorem cum Patribus & Scholæ Theologis familiaritatē habuisset Phereponus, vel eorum dicta sincerè & candidè reminisci vellet, intelligeret, & in hisce voluntatis actionibus, quas non liberas ipse Phereponus appellat, multos præter Augustinum agnovisse libertatem, hoc est libertatem ab antecedenti quacumque essentiali, sive naturali necessitate, determinatione, aut impressione. Hinc dixerunt, Deum liberè cognoscere, atque amare justitiam, veritatem & se ipsum, quanquam indifferentiam ad volendum contrarium ab ipso excluderent; nimium quippe solliciti erant, ne turpe necessitatis, ac servitutis nomen Deo tribueretur, neve causam quampiam admitterent, cui subjiceretur Deus; qualem Ethnicis in Fato perperam excogitabant. Itidem creatas mentes, quanquam pro sua conditione ex Dei nutu omnino pendentes, affirmarunt Patrum atque Theologorum nonnulli, vel tum libertate frui, cum seipsas amant, & felices esse cupiunt, tametsi non amare se ipsas, & felices esse nolle non possint. Quod idcirco affirmatum ab ipsis est, quia nullam præcedentem necessitatem, ac determinationem agnovère, quæ ad se amandum, ac beatitudinem volendam rapiantur, atque compellantur; in eorum enim sententia dilectio sui, & gaudii quietisque volitio, sunt ipsa voluntatis facultas, atque ipsi voluntati aliquid ita essentiali, ut sine ipso voluntas nec agere, nec esse possit. Contrà alii, inter quos videtur esse Sanctus Thomas, libertatem in memoratis actionibus tum Dei, tum hominum non agnovère: quorum utique loquendi ratio præferenda est, tanquam magis consona ideis atque notionibus communibus, quibus id tantum appellare *Liberum* solemus, cui est indifferentia, hoc est, potentia volendi, & non volendi aliquid. Sed hujusmodi contentiones sunt de nominibus potius quàm de rebus. Videndum est, an Sanctus Augustinus in actionibus moralibus hominum viatorum nullam aliam libertatem statuatur, quàm quæ Creatori dicitur inesse in amando cum se ipsum, tum virtutes, aut quæ creatis mentibus in generaliter appetendo bono ab ipso Augustini adscribitur, immo an eandem homini viatori ad actiones malas ac bonas, ad quas indifferentiam Phereponus exigit, exigimus & nos, necessitatem tribuat, quam brutis tribuimus. At certum est, in eodem Lib. V. Cap. 10. de Civ. Dei Augustinum tradere hujusmodi actiones in potestate esse humani Arbitrii, hominēque

que liberè & sine essentiali, præcedenti, sivè naturali necessitate ac determinatione, ad eas ferri, ità ut hujusmodi volitiones voluntati non inessent, nisi ipsa voluisset aut vellet. Quod ut pateat, atque ut Jansenianis quoque simul respondeatur hoc Sancti Augustini loco abundantibus, considerandum priùs est, quis ibi sit Augustino scopus.

Contra Ciceronem, & Stoicos, in quorum Libris negabatur Deo *Præscientia futurorum contingentium*, agit Augustinus. Verebantur nempe Philosophi illi, ne si divina Præscientia admitteretur, pessumiret tota humani Arbitrii Libertas, & Facto invecito, positâque ineluctabili necessitate agendi, nullum superesset laudis aut vituperationis argumentum in hominibus. Eundem ferè timorem ac opinionem ab Orco rursus excitavit Socinus, eandemque in illius affectis fervère adhuc intueor, quibus jamdudum alii accensuère Phereponum nostrum. Contrà Augustinus præscientiam futurorum sine magna impietate, & sine sacrarum Litterarum contemptu, negari non posse Deo, ostendit; inde verò non consequi ait, ut homini libera eripiat agendi & non agendi, volendi & non volendi electiva potestas. Quamvis enim necesse sit, ut quæ Deus præscivit ab æterno, in tempore fiant; Deus tamen cum simul præsciverit, voluntates hominum liberè, quodcumque volunt, præviso tempore operaturas, suâ illâ præscientiâ nihil detrahit essentiali hominis libertati. Cum verò dicatur, nec injuriâ, necessum esse ut ea, quæ præscivit Deus, fiant: respondet Augustinus, necessitate hujusmodi non adimi hominibus libertatem Arbitrii, quippe cum libertate aliquod etiam necessitatis genus consistere potest, quod Augustinus ostendit quibusdam exemplis. Aliud nimirum necessitas est, *quæ non est in nostra potestate*, hoc est, per quam, & propter quam aliquod necessariò fit, ità ut eligendi potestatem nobis eripiat, qualis est necessitas mortis. Manifestum autem inquit esse, non huic necessitati humanas voluntates subdi. Aliud est necessitas, secundùm quam necessarium simpliciter est, ut aliquid fiat, eamque minimè libertati officere sentit Augustinus. Refert porrò ad postremum hoc necessitatis genus, cum dicimus: *Necesse est, ut Deus semper vivat, ac præsciat futura*: quod cum à nulla antecedenti necessitate eveniat, sed quia Deus nullius necessitatis servus id liberè ipse vult, id propterea fiat, Deus autem semper suâ voluntate id fit voliturus: hinc Augustinus liberum simul & necessarium

rium appellat. Aliud necessitatis exemplum affert Augustinus, cum nempe dicimus: *Neceſſe eſt eſſe, ut cum volumus, libero velimus Arbitrio*. Quandoquidem enim nulla neceſſaria, inſuperabilis, ac ſecreta vis, nulla cauſa antecedens ad unum impellit, rapit, aut determinat voluntatem noſtram, ſed ipſa voluntas noſtra hoc unum eligit, cum poſſet & alterum eligere ſi vellet: propterea liberum cognoviſcimus in nobis eſſe Arbitrium; etiamſi neceſſe ſit, ut cum volumus, libero velimus Arbitrio. Iſtiusmodi neceſſitas non eſt cauſa noſtrarum volitionum, ſed potius volitiones ipſæ, quæ aliter eſſe non poſſunt, niſi liberæ ſint, cauſa ſunt iſtius neceſſitatis. Quare uti impoſſibile eſt, hominem eſſe, & carere eſſentiali facultate ac libertate eligendi, ita impoſſibile eſt, hominem aliter velle, quàm libero velit Arbitrio. Neceſſe ergo eſt homini voluntate liberâ velle, vel nolle, quia naturalis & inſita eſt huiusmodi facultas; non eſt tamen volendi hoc aut illud ſive nolendi ipſa actio neceſſaria.

Hinc Auguſtinus infert, præſcientiâ Dei poſitâ, libertatem Arbitrii nequaquam perire; ſiquidem Deus, dum determinatè præſcit ac prævidet futura contingentia, ſimul præſcit, homines ad ea ſeſe determinaturos liberâ electione, & eos aliter præſcire nequit, niſi liberos in eligendo, hoc eſt nullâ antecedenti impulſione ſive neceſſitate præreptos. *Non eſt autem conſequens* [ dixerat ille Cap IX. ejuſdem Lib. V. de Civitate Dei, ] *ut ſi Deo certus eſt omnium ordo cauſarum, ideo nihil ſit in noſtrâ voluntatis Arbitrio. Et ipſæ quippe noſtræ voluntates in cauſarum ordine ſunt, qui certus eſt Deo, ejusque præſcientiâ continetur, quoniam & humanæ voluntates humanorum operum cauſæ ſunt.* At quia Capite ſequenti uti vidimus, Sanctus Auguſtinus liberum agnoſcit Deum, liberos etiam agnoſcit homines, quanquam & in illo, & in iſtis quamdam neceſſitatis ſpeciem fateatur, vide ne paritatem ac ſimilitudinem huiusmodi in omnibus cohærere credas; vide ne eandem iſſiſſimam, quod eſt ad opera contingentia, libertatem & neceſſitatem in hominibus ſuſpicere, ac in Deo eſt ad præſcienda futura, ad vivendum, ad amandum ſe ipſum. Id à mente Auguſtini planè abhorreret, ac certiffimè abhorret. Quanquam liber appelletur Deus ad amandum exempli cauſâ ſe ipſum, quia nulla ei ſuperior neceſſitas dominatur, quia non cœco modo, non irrationabiliter, ut in brutis accidit, ſed cum clariffima viſione & confideratione ſuæ naturæ ac eſſentiæ amat ſe ipſum, & vult ab hoc

amore nunquam desistere: attamen ea non est in hac parte divina libertas, ut indifferentiam complectatur, possitque, si velit, contraria amplecti. *Neceffe est enim Deum semper vivere, & cuncta praeire*, ut inquit ibi Augustinus, cui addimus, *neceffe est & amare se ipsum, &c.* Exemplo omnipotentiae id percommode ab eodem Augustino explicatur: *Sicut nec potestas ejus minuitur, cum dicitur mori, fallique non posse, sic enim hoc non potest, ut potius si posset, minoris esset utique potestatis.* At hominis libertas, ut ut similis prorsus divinae sit, hoc est, indifferentiam careat, in generaliter appetenda felicitate: in actionibus tamen contingentibus, atque singularibus, libertate fruitur indifferente, & minimè ad unum determinatam, semperque velle & non velle in ejus omnino potestate est. Quod nunc vult, poterat non velle; & velle poterat, quod nunc fugit; neque ab ulla necessitate, quae praecesserit liberam electionem unius potius quam alterius, rapta est ad unum ita eligendum, ac volendum, ut alterum eligere ac velle non posset. Eadem pariter libertas ac indifferentia in Deo est ad facienda extra se opera quaedam, quae facere, & non facere pro sua voluntate potest.

Audi Augustinum hoc idem apertè de hominibus eodem Cap. ac Lib. testantem: *Sunt igitur nostrae voluntates, & ipsae faciunt, quidquid volendo facimus, quod nunc fieret, si nollemus.* Nulla ergo antecedens necessitas humanae voluntati jugum imponit, ipsamque secum rapit, sed ipsa voluntas propriè, primitus, simpliciterque, humanarum actionum causa est (quanquam ad bonas necessaria sit, ut dicemus, Dei gratia;) adeoque libera est, ut potuerit pro sua innata facultate nolle facere quod fecit, ipsumque nolle facere futurum fuisset causa, ne illa actio esset. Similis ergo est Deus hominibus, ad imaginem suam creatis, quòd tum ille, tum isti liberè ab Augustino dicuntur amare se ipsos ac felicitatem, quamvis contrarium amare ac velle non possint, & necessarium sit eorum essentiae ita velle. In altero quoque genere libertatis, quae verè ac propriè libertas est, similes sunt, quia neque Deus, neque homines determinati sunt ad volendum unum potius quam alterum in rebus quibusdam singularibus; atque in hoc ultimo non solum à coactione, sed à quocumque *Neceffitat*is nomine liberi sunt. At nequaquam eodem pacto liber est Deus in generaliter amanda felicitate, virtute, & se ipso, ac est homo ad unum potius quam alterum contingens volendum. Nos homines, inquit Augustinus, *si volumus est, si nolumus, non est.* Quis contra audeat



audeat dicere: *Sic Deus amat virtutem, ac se ipsum, ut si nollet, non amaret?* Hinc Augustinus beatam necessitatem alibi appellat hoc ipsum in Deo non posse non amare se ipsum. Hæc autem necessitas amandi sui ipsius idem est in homine; at nulla homini necessitas est ad volenda singularia, sive bona, sive mala, uti neque Deo ad volendum extra se hoc potius quàm illud. Ea verò necessitas, quæ ex Præscientia quodammodo provenit, sinè libera electione nostra non fit, ideòque diversa est secundùm Augustinum ab ea necessitate, quæ in nostra potestate non est. Voluntatem quippe hominum, imò & volitiones quarumcumque singularium actionum, liberas, & ad nullam partem determinatas Deus etiam præscit. Quamobrem rectissimè Augustinus infert, nullo modo noscogi, aut retentâ Præscientiâ Dei, tollere voluntatis arbitrium; aut reposito voluntatis arbitrio, Deum, quod nefas est, negare præscium futurorum. Exigebat suprà Phereponus, ut Augustinus memoratum in his verbis Arbitrium, etiam liberum dixisset, id est in utramque partem flexile; suspicionem ingerens, ne fortè callidè, aut imperitè eam vocem reticuerit Augustinus ut nomen Arbitrii retineret, rem autem negaret. At quis facilè non intelligat, Arbitrii nomine illic significari ipsum arbitrium liberum, potestatem videlicet electivam homini essentialem. Nonne suprà Augustinus hanc vocem cum arbitrio conjunxerat? Planè, inquit enim: *Sicut cum dicimus, necesse esse, ut cum volumus, libero velimus Arbitrio, & verum procul dubio dicimus, & non ideo ipsum liberum Arbitrium necessitati subicimus, quæ adimit libertatem.* Quæ ergo subdolè Augustinus omiserit infrà Liberi vocem, ut liberum esse Arbitrium neget, cum ipse in superioribus palam edixerit, *necesse esse, ut cum volumus, libero velimus Arbitrio?*

Sed inquit Phereponus, si Ciceronianus aliquis Philosophus reposuisset Augustino præscientiam futurorum Deo tribuenti, negasset ab Augustino retineri liberum Arbitrium. Id & ego suspicor Augustinum repositurum fuisse Ciceronianum aliquem; & hoc idem velle nunc reponere alienis verbis Phereponum ipsum mihi facilè persuadeo. At respondere pro Augustino acutus quisq; & sincerus homo posset, Ciceronianum istum (aut sub Ciceroniani persona loquentè Phereponum) nimium confidenter accusare negati liberi Arbitrii Augustinum, neque aliunde accusationem hanc oriri quàm aut ab ingenio sophistico, aut à solemni incogitantia. Cujus rei argumento sint alia quædam verba eodem c. 10. lib. 5. de Civ. Dei, quæ cum Phereponus aut legere nolue-

noluerit, aut satiùs duxerit omittere, quippe quòd ibi Augustinus apertissimè statuit essentialè humanæ libertatis ac indifferentiæ notionem, adferam ego, ut ineptam hominis censuram citiùs intelligas. *Neque ideo*, inquit Augustinus, *peccat homo, quia Deus illum peccaturum esse præscivit, imò non dubitatur ipsum peccare, cùm peccat, quia ille, cujus Præscientia falli non potest, non fatum, non fortunam, non aliquid aliud, sed ipsum peccaturum esse præscivit; qui si nolit, utique non peccat; sed si peccare noluerit, etiam hoc ille præscivit.* In eandem sententiam loquuntur Origenes ad Eusebium Lib. 6. de Præpar. Evang. Gaudentius Brixianus, Anselmus & alii. Vis ergo scire, quare homo peccet? quia ipse peccare vult, cùm etiam non peccare possit, si velit. Non ergo peccat, quia Deus peccatum hoc præscivit; sed contrà Deus præscivit peccatum, quia liberè in illud consensura est humani arbitrii libertas. Causa peccati humani arbitrii libertas est, sive voluntas, electivâ facultate abutens; peccatum verò hominum, causa est præscientiæ divinæ, idèdque non à præcedenti aliqua causa, sive necessitate homo ad peccandum adigitur, aut determinatur ad unum, sed ipse sese liberè determinat ad unum, cùm & facultate naturali fruatur sese etiam ad alterum determinandi. Necessitas autem illa, quâ dicimus, necessum esse malas hominum actiones accidere, si Deus illas præscivit, rectè *consequens*, non *antecedens* appellatur in Scholis. Sed cœcutiat hîc omnis oportet, qui cubitouno immensam Dei naturam dimetire audet, neque eò cogitationis aciem perducit, ut aliquo modo concipiat, Deum in tempore non esse, uti creata omnia sunt, sed in eo esse tempus; idèdque præteritum, futurumque tempus esse divino intellectui, quanquam diversâ ratione, præsentia, ità nimirum poscente divinæ omnipræsentiae, ac æternitatis naturâ. *Deus omnia præscit, & hoc æternitati ejus congruit, qui nihil futurum, quasi sciendum, nec aliquid præteritum, quasi transactum novit; sed omnia scienda, & transacta immutabilis intuitu præsentia prospicit:* verba sunt Honorii Augustodunensis in Lib. de Prædest. & lib. Arb. A nostra autem infirmitate oritur imaginari in Deo præteritum ac futurum tempus, unde postea nebulæ difficultatèsque non leves occurrunt animis nihil nisi vulgaria & humana meditantibus. Atque ex his etiam confutanda erunt, quæ Phereponus adfert pag. 433. Animadv. ad Lib. 8. Cap. 3. de Lib. Arb. ut infrà dicemus.

Phereponus tamen animum non despondet, & Augustino docente, *non frustra esse Leges, objurgationes, exhortationes,*  
*&c.*

*Ecce & præmia, & pœnas*, docet & ipse, frustra hæc esse, ubi homines à coactione tantum, & non etiam à necessitate, liberi sint. Quæ profectò & nos verissima fatemur, Auctoresque Pherepono sumus, ut eadem in Gomaristas, Calvinianosque rigidiores majori etiam voce tonet, ex quorum sententiis reverà consequitur, frustra promulgari leges, injustasque esse pœnas ac præmia. At quid hæc ad Augustinum tam à Calvinii opinione hinc distans, quàm Phereponus alibi à Religione Catholica. Quid rursus ad Augustinum, quæ in sequenti animadversione Phereponus? De homine dixerat Augustinus, ut vidimus: *qui si nolit, utique non peccat; sed si peccare noluerit, etiam hoc ille præscribit.* At Phereponus: *Certè si nolis homo, non peccas; sed oportet, ut possis velle ac nolle, ut sit peccati capax; ostendendumque fuerat contra Ciceronem, Deum posse præscire id futurum, quod potuerit nolle is, qui facturus est.* Tum quasi de prostratis Augustini cavillationibus triumphum ducens, sibi que plaudens, in hæc verba definit: *Hinc liquere potest, quantum sit discrimen inter Rhetoricas argutias, & Philosophicas ratiocinationes.* Bone Deus! neque veretur Phereponus, ut ne sibi inter gloriosos milites amplissimus aliquis assignetur locus? Quæ pauca ille huc adfert; Philosophicæ ratiocinationes sunt: quæ multa Augustinus, Rhetoricæ argutiæ.

Quisquis est in literaria palæstra aliquantulum exercitatus, continuò intelligat, levissimas hæc nebulas, quas rationibus Augustini objicit in hoc loco Phereponus, non aliunde venire, quàm ex ignoracione aut dissimulatione Theologicæ eruditionis. Cum Augustino consentiunt SS. Patres, nobilésque Theologi ac Philosophi vel ex ipsis Ethnicis, nedum è recentiorum sæculorum Scholis, Deum certò prænoscere futura contingentia. Id Catholici omnes in suis Scholis contra Phereponum ejusque magistros non solum quotidie ac passim docent, certissimùmque esse confirmant; sed simul, contra Calvinum, Arbitrii humani libertatem nequaquam hinc lædi ostendunt. Nempe Calvinus ac Phereponus in extrema ruunt; Catholica verò Ecclesia medium tenet, non divinam Præscientiam minus, quàm humanam libertatem in sacris Literis, atque in Libris Patrum æquè deprædicatam deprædicans atque concilians. Cui ergo è nostris indignationem movere non possit, audire Phereponum tum impiè detrahentem Deo scientiam futurorum contingentium, tum Augustino adeò procaciter insultantem, tanquam triobolari declamatori, quòd hanc scientiam in Deo, simulque liberum in homine

mine Arbitrium prædicet? Et quibus quæso tam solidis argumentis id facit Phereponus? *Certè, inquit, si nolit homo, non peccat; sed oportet, ut possit velle ac nolle, ut sit peccatû capax.* Rem planè certam edisserit hic Scriptor, sed bellè contigit, ut ante mille & trecentos annos hoc idem noverit Augustinus, pluribûsque in locis ità se sentire affirmârit. Nonnulla in hanc rem Augustini documenta jam produximus. *Ostendendûmque fuerat contra Ciceronem* (pergit dicere Phereponus) *Deum posse præscire id futurum, quod poterit nolle is, qui facturus est.* At hoc idem est, quod siue nolit, siue non possit intelligere Phereponus noster, ostendere conatur, & satis ostendit Augustinus in eo ipso Libro de Civ. Dei, & in Lib. 3. Cap. 3. & 4 de lib. Arb. ostendûntque tot editis libris, & passim, in Catholicorum Scholis Theologi. Iterum ergo Augustinum legat hic Censor; legat & libros Dialecticorum, atque Theologorum; ediscetque non impediri per divinam Præscientiam, quominus homo, qui aliquid mali facturus prævidetur, possit etiam nolle facere aliter quàm est facturus, si velit; nam futura quæque contingentia ab æternitate præsentia sunt Deo, atque ab eo sciuntur non solum fieri, sed etiam liberè fieri à nobis. Et sicuti qui currentem videt, minimè aspectu suo currentem potiùs huc quàm illuc facit: ità si humana licet componere divinis, Deus omnia tempora uno intuitu complectens, omnes hominum volitiones futuras videt sibi præsentis; neque ipse est, qui ad unum voluntates addicat, sed ipsæ voluntates sunt, quæ liberè ad alterutrum, sponte sese ad unam partem determinant, atque in eo statu videntur, ac sciuntur à Deo. Idem nempe est in oculis Dei, videre nunc nos agentes, ac prævidisse, uti nos dicere solemus, ante decem annorum millia agentes & sicuti qui nunc nos agentes inuictur, non facit, ut sinè libertate agamus; ità Deus prævidens ante decem annorum millia nos acturos, siue nos nunc agentes, non fecit, nec facit, ut nos liberè nunc non agamus, cùm semper nos præviderit liberè acturos, siue ut melius dicam, videat nos liberè agentes. Cum his verò hætenus dictis egregiè cohæret, hominem sinè Dei gratia ad bonum salutariter volendum determinare sese non posse, uti infra demonstrabitur.



## CAPUT VIII.

*S. Augustinus cum deperditum in homine liberum Arbitrium ait, solum de Libertate accidentali & consequente ad bonum faciendum loquitur, neque essentialem, seu antecedentem necessitatem ad malum homini tribuit, sed accidentalem & consequentem. Quid sint hæ necessitates ac libertates, ostenditur. Afferuntur & explicantur varia Augustini loca. De libertate tantum accidentali ad bonum inter Catholicos & Pelagianos lis fuit. Potestas, non Libertas operandi boni in hominibus deperdita post peccatum Adami. Quæ similitudo intercedat inter hominem factum in bello servum; & hominem peccato addictum. Arbitrium tunc liberum ad Bonum, si liberetur à Deo. Corruptio ac Oratio utiles ac necessaria in sententia quoque Augustini.*

*Sed ne quid dissimulemus, intactum hætenus locum reliquimus, ubi Phereponus Augustinum tandem deprehendere sibi visus est apertum liberi arbitrii hostem. In Enchiridio ad Laur. c. 30. sunt verba Augustini: *Liberò Arbitrio male utens homo & se perdidit, & ipsum.* Et rursus: *Cum libero peccaretur arbitrio, victore peccato, amissum est liberum Arbitrium.* En ergo, (pag 579. Phereponus inquit) cum Augustinus extra controversiæ æstum loquitur, non dissitetur, quin post Adæ peccatum prorsus perierit humani Arbitrii libertas. Poterat & ille Augustinum referre ita loquentem in Lib. de Perfect. Just. c. 4. *Vitæ à vitio, in quod cecidit, voluntate, caruit libertate Natura.* Et de Civ. Dei Lib. 14. c. 2. *Arbitrium voluntatis tunc est verè liberum, cum vitiis peccatisque non servit. Tale datum est à Deo, quod commissum proprio vitio, nisi à quo dari potuit, reddi non potest.* Vide & Lib. de Corrupt. & Gratiâ Cap. 12. ut alia loca omittam. Sed quid inde? In his aliisque similibus locis libertatem homini essentialem, sed accidentalem deperiisse; non necessitatem antecedentem, sed consequentem homini adhæsisse peccanti, Augustinus significat. Jam duplex hoc libertatis, ac necessitatis genus supra indicavimus; nunc opus est edisserere melius, quid sit libertas accidentalis, quid necessitas consequens. Utcumque*

que anima nostra eligendi, hoc est volendi; ac non volendi innatâ potestate ita sit prædita, ut illâ privari nunquam possit, & ne cogi quidem ad unum volendum, si nolle perseveret; attamen ista libertas essentialis, indifferens, atque expedita ad utrumque, & ad amanda, aut non amanda innumera objecta, ipsius identidem voluntatis vitio, aliqua ex parte, inò ex multis imminui in homine potest. Atque ut de moralibus tantum agatur, nunc homo se expeditum ac impulsum sentit ad volendum hoc bonum, ad volendam hanc aut illam virtutem, nunc impeditum, atque impotentem. Rursus se expeditum & impulsum nunc sentit ad hæc aut illa prava opera volenda, nunc impotentem atque impeditum. Habitus, & affectiones, & cogitationes animi, sive pravae, sive bonæ, itémque affectiones corporis, & externæ complures causæ, ea sunt, quæ huiusmodi varias impressiones in hominem faciunt, ipsumque, ut ita dicam, rapiunt, modò ad amanda, modò ad fugienda opera spiritus & carnis.

Homo autem aut justitiam amat, aut iniquitatem, atque agit aut ex amore honesto Dei, aut ex amore pravo mundi: quod cum dicimus, non negamus, quin sint medii quidam amores neque laudis atque virtutis, neque vituperationis atque peccati argumenta. Porro cum amamus justitiam, servi sumus justitiæ, eidemque servientes ac obedientes, expeditè ac faciliè volumus, ac facimus, quæ generali huic virtuti congrua sunt, difficile verò contraria cupimus, atque operamur. Contrà cum iniquitatem diligimus, servi sumus iniquitatis; eique mancipati, quæ illa imperat, mirâ facilitate volumus atque præstamus; ad contraria verò inertes atque impotentes nos esse sentimus. Servi quippe faciunt, quæ domini præcipiunt. Promptitudinem ergo, vividamque potentiam volendi, & præstandi, quæcumque congrua sunt affectui in homine regnanti, libertatem eatenus appellamus, quatenus nihil illum impedit, quin sectetur & agat desideria domini sui; aut etiam libertatem eo respectu, quo homo liber est & solutus à iugo ac imperio alterius oppositi effectus. Necessitatem verò ac servitutem vicissim dicimus impotentiam parendi contrariis affectibus, aut determinationem ad actus convenientes dominantis affectui. Sed tam libertas, quam necessitas huiusmodi accidentales sunt atque adventitiæ. Ab ea libertate essentiali, finè qua esse homo non potest, altera hæc libertas differt, quia & homini adesse, & abesse ab homine potest. A necessitate essentiali ac antecedente diversa itidem est altera hæc

hæc necessitas, siquidem & advenire, & recedere potest, neque antecedit, sed consequitur liberam voluntatis electionem. Quamobrem accidere videmus, ut homo nativam essentialēque sui Arbitrii libertatem habeat, & tamen liber & expeditus æquē non sit ad duo contraria, sive opposita, sed necessitate quapiam accidentali compellatur ad unum volendum, & ad alterum fugiendum. Quod verò major est vis dominantis cupiditatis, & affectus sive recti sive pravi, eò major etiam libertas, atque necessitas accidentalis; ita tamen ut, quæcumque sint determinationes ad unum, & impedimenta ad alterum, sit semper in potestate hominis retinere aut dare assensum sive honestæ sollicitationi priorum affectuum, sive turbidis impulsibus iniquæ cupiditatis; hoc enim proprium est essentialis illius libertatis, quæ ne Deus quidem spoliare hominem valet.

Quæ autem diximus, non tam Philosophiæ melioris cōsideratione, quàm ipsarum Scripturarum testimonio confirmantur. En *libertatem*, en *servitutem* ac *necessitatem*, adventitias atque accidentales. *Cum servi essetis peccati, liberi fuistis justitiæ* Rom. VI. 20. Et infra *ψ. 22. Nunc verò liberati à peccato* Item Jo. VIII. 32. *Veritas liberavit vos.* Et *ψ. 36. Si ergo vos filius liberaverit, verè liberi eritis, &c.* De potentia autem, aut impotentia, promptitudine aut difficultate agendi vel non agendi, volendi vel non volendi, quam in homine gignit dominans affectus, hæc alia habe: *A fructibus eorum cognoscetis eos &c. Omnis arbor bona fructus bonos facit; mala autem arbor malos fructus facit. Non potest arbor bona malos fructus facere, neque arbor mala bonos fructus facere.* Matth. VII. 16. 17. 18. Item: *Quomodo potestis bona loqui, cum sitis mali? Item: Quomodo vos potestis credere, qui gloriam ab invicem accipitis, & gloriam, quæ à solo Deo est, non quaritis?* Item I. Jo. 3. 9. *Omnis qui natus est ex Deo, peccatum non facit, &c.* Alia omitto documenta sacrarum Litterarum, ubi quid imperii in homine habeat iniquitas & concupiscentia mala, & quid roboris alia ex parte caritas, evidentissimè constat.

Nunc ad Augustinum accedamus. Cùm ille dicit, *perditum* ac *amissum* fuisse liberum Arbitrium, nihil aliud significare vult, nisi ad bonum faciendum, & ad volenda ac præstanda caritatis officia, periisse in homine peccante primævam libertatem conditionis humanæ. Hoc est, hominem, postquam se peccato addixit, & regnantis concupiscentiæ jugum subiit, promptitudine illâ & facultate destitutum fuisse, quâ primus homo pollebat ad ammandum incommutabile bonum, divinamque legem implendam, & con-

trà à dominante cupiditate acriter ferri ad amorem mundi & ad eligenda opera carnis, Nisi ergo divinis reparator nos liberet ab hujusmodi vinculis, nisi gratiâ suâ atque inspiratione caritatis, tyrannidem peccati, & concupiscentiæ praviæ, ab homine volente depellat: nunquam liber & expeditus homo erit ad virtutem amandam, & ad peragenda opera justitiæ, uti, & quatenus opus est ad æternam salutem consequendam; sed quidem expeditus erit, & liber ad obsequendum legi peccati, & ad prava opera complenda. Ex necessitate autem ista accidentali, sive ex hoc libertatis adventitiæ defectu perire in homine essentialem naturalemque facultatem liberi Arbitrii nunquam Augustinus dixit. Unde eam subsistere semper fatetur. In lib. de Gratia & libero Arbitrio Cap. 15. *Semper, inquit, est in nobis voluntas libera. Ecce essentialem Arbitrii humani libertatem, quam sola tollit necessitas antecedens, ab Ethnicis, & à Novatoribus excogitata, ab Augustino autem cum execratione negata.* Tum pergit: *Sed non semper est bona. Aut enim à justitia libera est, quando servit peccato, & tunc est mala; aut à peccato libera est, quando servit justitiæ, & tunc est bona.* Quibus postremis verbis designat Augustinus accidentales illas libertates, servitutes, necessitates, potentias, ac impotentias, quæ à pravis rectisque affectibus veniunt, prout quisque affectus malus sive bonus ad malum bonumve hominem sibi servum inclinat ac rapit. Et profectò cum peccator ope divinâ, seu cœlesti gratiâ se privaverit, & concupiscentiæ legibus ac imperio sese addixerit: impedire ipse non potest, quominus potentiam ad ulteriùs agendum bonum devinctam habeat, suâque voluntas ad solum malum eligendum ac perficiendum, si non absolutâ necessitate, certè magno impetu, exinde rapiatur. Fides autem nos docet, non posse homines post Adæ calamitatem, suis viribus exsurgere è peccato, aut implere salutariter legem, aut vincere varios tentationum incurfus. Ergo homo peccati servus, & in se ipso consideratus, accidentaliter liber ad electionem boni, & ad virtutis opera non est, indigétque Servatoris gratiâ, quæ ipsius voluntatem à servitute, atque ab accidentali necessitate peccandi liberet, liberamque & expeditam faciat ad amplectendam atque servandam virtutem.

Itaque amissum ac deperditum in homine liberum Arbitrium, nihil aliud est Augustino, quàm ista *libertas*, promptitudo, ac potentia ad bonum, quæ fita est in quodam laudabili, sed tamen accidentali statu humani Arbitrii, ipsiusque essentialiam minimè destruit. De hac autem una libertate



lis fuit inter Augustinum atque Pelagium ; non autem de essentiali libertate. Asserebat Pelagius, non liberum minus esse Arbitrium filiorum Adami ad bonum faciendum , quàm esset ipsius innocentis Adami; ideòque putabat tales esse humanæ voluntatis vires, expeditamque ad eò potentiam hominis ad opera caritatis, ut sine adjutorio Dei perficere posset justitiam, vel ad eam tendendo proficere. Concedebat Augustinus, liberum adhuc esse hominis Arbitrium, quod est ad immunitatem à necessitate antecedenti; at minimè in eo statu esse, in quo erat Adami innocentis Arbitrium. Nunc enim captivam esse, debilem, infirmam, & peccati iugo attritam voluntatem, & malæ concupiscentiæ aculeis exagitatam, ideòque adjutorio Dei indigere, atque inspiratione caritatis. *Ad non peccandum*, inquit idem Augustinus unà cum quatuor aliis Episcopis in Epist. olim XCV. 177. ad Innocentium I. scripta, *id est ad non malè faciendum; quamvis esse non dubitetur Arbitrium voluntatis* ( est ergo in potestate voluntatis negare consensum tentationi, atque non peccare; ) *tamen ejus potestas non sufficit, nisi adjuvetur infirmitas*. Audi & ipsum ita loquentem Lib. I. Oper. Imperf. Cap. 47. *Multa sunt, quæ agunt homines mala, à quibus eis liberum est abstinere: sed nulli tam liberum est; quàm illi fuit, qui Deo suo, à quo erat constitutus rectus, nullo prorsus vitio depravatus adstabat*. Alia sunt in eodem Lib. I. quibus apertissimum sit, sensitse Augustinum, superesse adhuc naturalem illam hominum facultatem electivam, quæ necessitatis ad unum determinantis est inimica, & esse peccata, quæ committuntur non necessitate, sed voluntate, & à quibus liberum est abstinere. Quod si peccandi necessitatem in quibusdam hominibus ille agnoscit, non alia est Augustino necessitas hujusmodi, quàm consequens, & accidentalis, & à voluntate libera sentim inducta, consuetudine videlicet peccandi, affectionibusque pravis (liberâ electione, ac volitione) in animum admissis.

Ut ergo regrediamur ad Cap. 30. Enchiridii Augustiniani, in quod magno molimine insurgit Phereponus pag. 560. suarum Animadversionum, jam palam fecimus, quid sibi velit Augustinus, cum inquit: *Liberò Arbitrio malè utens homo, & se perdidit, & ipsum*. Et infra: *Cum libero peccaretur Arbitrio, victore peccato amissum est & liberum Arbitrium*. Servus peccati voluntariè peccando factus est homo; hinc ad bona facienda liber, expeditusq; non est, ad mala autem victrice cupiditate raptum se sentit. Ab hac servitute consequèri, quæ cum naturali ac essentiali libertate voluntatis, ut vidimus,

benè consistit, non liberat nisi gratia Dei. Egregiè mentem Augustini explicat Fulgentius in Responsi. ad primam In-  
 quirit. Ferrandi, scribens: *Malos habere liberum Arbitrium, non liberatum; liberari verò per gratiam. Ex quo enim primus homo libero Arbitrio venumdatus est sub peccato, adeò mala cœpit esse libertas hominis, quia ipsi libero Arbitrio ablata est bonitas voluntatis* Neque reticere possum præclarissima Richardi Victorini verba, ita scribentis Lib. de Erud. Inter. Cap. 30. *Aliud est Arbitrii potestas, atque aliud est Arbitrii libertas. Aliud est enim magna posse, atque aliud est liberum esse. Et liber, & infirmus esse potes; sicut è contrario & sanus, & servus esse potes &c. Quàm multi in definitione liberi Arbitrii errant, quia inter potestatem, & libertatem distinguere ignorant, vel dissimulant! Vide tamen quid intersit, cum potestatem homo sapè amittat; libertatem verò nunquam amittere possit. Item nemo ad omnia bona accipit potestatem; sed omnis homo ad omnia bona vel mala, accipit libertatem. Quod Victorino potestas dicitur, libertas Augustino dicitur in eo Enchiridii loco. Hanc potestatem, seu libertatem & expeditam promptitudinem ad operandum bonum, Adamus sibi concessam perdidit peccato suo, fecitque; ut eà quoque nos careremus. Neque verò ille, neque nos unquam amisimus insitam vim electivæ ac liberæ voluntatis, uti neque potestatem, seu libertatem ad operandum malum. Imò & recuperare licet alteram potestatis partem, quâ bonum velle & facere salutariter possumus, si liberemur à servitute concupiscentiæ atque peccati per gratiam divini Servatoris. Hinc Pelagianos putantes, Augustinum dicere, sublatum fuisse liberum Arbitrium, quatenus electiva & essentialis animæ potentia est, sive facultas, ipse his excipit verbis Lib. I contra duas Epist. Pelagian. Cap. 2. *Quis nostrum dicat, quòd primi hominis peccato perierit liberum Arbitrium de humano genere? Libertas quidem periit per peccatum, sed quæ in Paradiso fuit, habendi plenam cum immortalitate justitiam, propter quod natura humana divinâ indiget gratiâ &c. Nam liberum Arbitrium usque adeò in peccatore non periit ut per illud peccent &c. Liberi ergo à justitia non sunt, nisi Arbitrio voluntatis (hoc est, idèd solùm iniqui sunt homines, quia talis esse liberè voluit eorum voluntas) liberi autem à peccato non fiunt, nisi gratiâ Salvatoris. Vide & infra, ubi eodem vocabulo, quo Richardus suprâ, utitur Augustinus, Pelagium ita arguens: *Quid est, quòd iste libero Arbitrio vult benè vivendi tribuere potestatem, cum hac potestas non detur nisi gratia Dei &c. Vide & nuper laudatam Epistolam 177. olim XCV. ubi libertatem quidem, sed non potestatem Arbitrii ad non pec-***

candum agnoscunt Africani Patres In Enchiridio autem Cap. 30. eamdem planè & unicam sententiam tradit vir sanctus sub aliis verbis.

Proinde superfluum puto singillatim confutare Animadversiones Phereponi in eundem Enrichidii locum : quando aut supposito falso laborant ejus argumenta, dum censet, Augustinum reverà, uti somniarunt Calviniani, essentialem Arbitrii libertatem sustulisse, gratiamque Dei talem deprædicasse, cui resistere amplius hominum non possit Arbitrium; aut Pelagianis opinionibus undique scatens ille, servitutem è peccato contractam viribus humani Arbitrii, & sine gratuito ac interno Dei adjutorio, vinci posse arbitratur; & nullam agnoscit gratiam Dei, quæ intimè in voluntates hominum operetur, aliàque ejusmodi dogmata placidà cum securitate venditat; quasi non jam milles confutata fuerint in Catholicorum scholis. Hoc unum prætermittere nolo, videlicet à Pherepono comparationem quamdam institui, opponique sententiæ Augustini, sed ità ut homo ille videatur & hîc ignorasse germana Scripturarum dogmata & humanæ naturæ miseriam. *U nemo fit* (sunt ejus verba pap. 580.) *in bello servus, nisi invitus, & quàm primum libertatem recuperare potest, occasionem a vidè arripit: sic quoq; hominem, qui se à peccato victum animadvertit, ejusque servitutis incommoda sentit, si quis eum melius doceat, peccato libenter valedicere.* Addit infra: *Vicit quidem peccatum, ejusque servi facti sunt homines, quia ei parere voluerunt: sed nihil vetat ut nolint ei obsequi, præter consuetudinem, quæ paulatim vinci potest: ut liquet ex eo, quod Deus omnes homines ad pœnitentiam vocet.* Vide quæso, quàm belle aduletur Pelagianus hic Cenfor miseræ conditioni peccantium Nemo fit, nisi invitus, servus peccati, occasionemque recuperandæ libertatis a vidè arripit, & peccato libenter valedicit, ubi quis eum melius doceat. Quis in hominum cœtu diu versatus est, quis Ethnicorum sapientum vitam & dogmata intellexit, quis populos adhuc à Christo, atque à Catholica Religione alienos novit, imò se ipsum novit, cæterosque æquales suos: & Phereponum non rideat, aut doleat talia pronutiantem? Peccant homines, neque peccant inviti, imò liberè ac libenter in iniquitate voluntantur, & ab incredulitate atque à tenebris emergere nequaquam volunt, nequaquam solent, quamvis tanto exhortationum strepitu, tantâ prædicatione sanctissimi Evangelii incitentur ad amplectendam Christi fidem, & ad ejurandam familiaritatem peccati. Nonne agnoscis mancipia peccati, & servos

erroris, quos unum delectat Domini sui imperium, quos liberare nequit suis viribus nimium fractis misera & cœca voluntas? Aut nolunt converti ad verum & bonum; aut si volunt, ineptissimè volunt.

Illud certissimum, posse eos converti, dum vivunt, nam libero Arbitrio quisque fruitur, & neminem ad peccatum rapit antecedens aliqua atque ineluctabilis necessitas. At æquè certum est, eos nunquam suæ naturæ suique arbitrii viribus reapse à peccato exurgere, & veram fidem amplecti, & amare fontem omnis boni. Necessaria est illius gratia atque adiutorium, qui jam edixit: *Sine me nihil potestis facere. Et nemo potest ad me venire, nisi Pater, qui misit me, traxerit eum*, Jo. 6. Et, *Non vos elegistis, sed ego eligi vos*, &c. Jo. 15. Deus autem, *cujus vult miseretur; & quem vult indurat*. Et *Non volentis, neque currentis, sed miserentis est Dei*, Rom. 9. ut innumera alia tum sacrarum Litterarum, tum sanctorum Patrum loca prætermittam, quorum una vox est, non industriâ ac vigore voluntatis nostræ, bonos & salvos homines fieri, sed gratuitâ misericordiâ, & forti adiutorio Dei. Homini ergo peccatori, ut vincat peccati consuetudinem, & à peccato liberetur, non est sufficiens virtus & vis arbitrii voluntatisque propriæ; sed ex divino auxilio sufficientia nostra procedit. Deus verò, etsi omnibus pro loco & tempore talibus auxiliis adsit, ut si quis rectè iis velit uti, possit & peccata vitare, & ad salutem pervenire; non omnibus tamen validissima illa impertitur auxilia, quibus non ineluctabiliter, sed certissimè salvantur, quicumque salvantur. Quamobrem si haberi impius assentator humanæ naturæ non vult Phereponus, agnoscat in sua comparatione necessariam opem divinæ gratiæ, aut à comparationibus abstineat, quæ rei propositæ minimè respondent. Ille tamen pergit Lectoribus credulis imponere, hæc alia scribendo eâdem pag. 560. *Ex locutione tralatitia, qualis est servire peccato, non ita ratiocinandum, quasi ut captivus amisit libertatem corporis, quam recuperare nequit, dum victus est: sic qui servus est peccati, nunquam ejus dominationem excutere potest. Neque enim hominem captivum, catenisque victum, & carcere clausum hortatur quisquam, ut excussis catenis carcere exeat, & nisi faciat indignatur, quia omnes norunt, non esse hoc in ejus potestate. Utique dominationem peccati excutere homo potest, sed non solo conatu suo, neque suis viribus id faciet (viribus quippe ad bonum se exuit semel, liberè & voluntariè peccando,) sed quidem id faciet viribus divinæ gratiæ, quam Deus sufficientem omnibus præbet. Externis ergo,*  
inter-

internisq; gratiæ suæ vocibus vel unumquemque peccatorem Deus, etsi non momentis omnibus, nec influxu pari, identidem à peccato revocat, hortaturque ad bonum, & auxiliatur, ut velit bonum. Quod quis pareat: divino muneri, non suis viribus aut merito homines tribuant; quod alii resistent, eorum pertinaci voluntati in amanda iniquitate ac errore adscribendum est. Audi Apostolum ita scribentem 2. ad Tim II. 25. 26 *Cum modestia corripientem eos, qui resistunt veritati, ne quando Deus det illis poenitentiam ad cognoscendam veritatem; & respiciant à Diaboli laqueis, à quo captivi tenentur ad ipsius voluntatem.* Plurimum autem ab homine captivo, catenisque victo, & carcere incluso, quem ad exeundum horteris, differt homo, catenis peccati illigatus, quem horteris ad virtutem; nam ille quamquam exire de carcere velit, non potest, quippe corpus illius alienâ voluntate abhuc detinetur, invitâque propterea servire servitutem, & carcerem non deferere cogitur. Habet velle, non habet posse. Peccatorem verò, quominus exeat ac liberetur, nihil aliud impedit (positâ Gratiâ Dei) nisi sua ipsius voluntas. Ut morales istæ catenæ cadant, huic sufficit, ut velit; sed miser neglectâ voce repulsôque auxilio Dei, præstare vult inter catenas peccati, quarum delectatione tenetur, & quas odisse nescit. Jure ergo indignari Deus captivo huic potest, jure *Ira Dei manet super ipsum*, quod is volentem liberare contemnat, quod oblatum auxilium respuat, & idèd solum in peccato perseveret, quod peccatum amare pertinaciter velit, nolitque diligere bonum. Neque justitiæ deest ipsemet Deus, si non omnibus momentis sollicitat, neque unicuique gratiam, illam impertitur efficacem, quæ cor hominis, intactâ libertate Arbitrii, suavissimè ad amorem boni certò convertit; nam homini, qui se liberè ac spontè servum fecit, & in carcerem se conclusit, injuriam non facit legitimus Dominus, si non omnem experitur artem, ut è carcere ac servitute eripiat. Dic ergo, peccatores ad instar hominis illius esse, qui legitimo domino liberè ac spontè posthabito, se alteri addicit, atque ab ejus latere, ab hujus ædibus ac hortis divertere amplius nescit. Eum quidem prior Dominus misericordiâ tactus officii debiti sæpè monet, sæpè minis, ac precibus, & ope oblata ad reditum urget, ac manum præbet, sæpè etiam & pericula & exitus ad fugam digito ostendit; & ut se placidissimum ac optimum dominum deprædicat & confirmat, ita & alterum sævissimum ac fallacissimum tyrannum prodit.

Verum homo infelix nunquam de proposito dimoveri se patitur, & aut aures avertit, aut hortanti fidem non habet, aut etiam contemptum & contumelias iterum ingerit; & cum recipere se possit ad priorem dominum, alterius tamen delectatione, ac amore dulcissimæ catenæ tantum tenetur, ut suum tyrannum nolit omnino deserere. Nonne homini ita agenti jure irascaris? Nunc pone, esse priori domino artes alias, quibus certissime, minimèque fallaci successu, & adhuc tamen sine violentia, perducere ad se rursum queat fugitivum servum; his autem artibus ipsum uti ad hunc potius, quàm illum servum sibi recuperandum: nonne vides. & misericordiam ejus in hunc esse laudandam, & nihilominus de illius justitia conqueri alterum non posse, quod tam efficaci brachio, artibusque adeò certis, à carcere ac servitute ipsum prior dominus revocare noluerit? Ex his intellige ( quantum tamen comparatio ferre potest ) œconomiam, æquitatem, & clementiam Dei in distributione munerum, cœlestisque suæ gratiæ, sine qua nihil ad bonum valet liberum Arbitrium, & quicum omnia potest.

Atque his animadversis, liquebit etiam, quid Pherepono respondendum sit, in Librum de Corrept. & Gratia insurgenti pag. 618. Animadvers. Frustrà ibi contendit novus Pelagii Hyperaspistes, liberum Arbitrium ab Augustino auferri, eò quod hic inquit Cap. 1. *In bono liber esse nullus potest, nisi fuerit liberatus, &c.* Arbitrii libertatem, ut millies diximus, retinet Peccator; sed non retinet vires ad bonum volendum, atque faciendum. Pelagianus noster vellet in homine peccatore indifferentiam primi hominis, & easdem ad operandum bonum & malum vires. At nos expediti, fortèsque sumus ad iniquitatis opera, infirmi & devincti ad opera justitiæ: quam infirmitatem, catenam atq; servitutem maximè peccato servientes in semetipsis sentiunt. Potentiam ergo remotam, atque imperfectas vires habemus ad opera pietatis, non autem proximam atque perfectam; neque habituri sumus, nisi nos liberaverit Deus, sine quo nihil boni facere unquam possumus. Quare Aug. Li. 1. Cap. 12. *Retract. ajebat: In potestate hominis est, mutare in melius voluntatem, sed ea potestas nulla est, nisi detur à Deo, de quo dictum est: Dedit eis potestatem filios Dei fieri, &c.* Ac propterea in eodem Cap. 1. Lib. de Corrept. & Gratia idem August. *confitendum esse ait, nos liberum Arbitrium & ad malum & ad bonum faciendū habere, quia nulla nos præcedens necessitas ante electionem nostrā rapere potest ad bonū aut ad malum.* In bo-

*no autem liber (hoc est, expeditus, robustus, & solutus) esse nullus potest, nisi fuerit liberatus ab eo, qui dixit: Si vos Filii liberaveris tunc verè liberi eritis. Voluntas enim, ut in Epist. olim 89. nunc 157. Cap. 2. inquit idem Augustinus, tantò liberior, quantò sanior; & tantò sanior, quantò divina misericordia gratiaque subiectior. Cæterum nescio, quid sibi velit Phereponus adjiciens, quasi hæc sit Augustini sententia, homines ante regenerationem nihil nisi mala facere, bona nulla posse; sed facere mala volentes, & bona emittere nolentes. Neque necessitate adacti, neque coacti homines ante Baptismum aut mala faciunt, aut bona omittunt; imò & bona quædam in genere morum facere tunc possunt cum generali adiutorio Dei, quanquam non ut oportet, ea faciant, neque ad supranaturalem felicitatē conducere ea possint sinè speciali gratia Dei.*

Reliqua verò, quæ contra eundem Librum de Corrept. & Gratia differit idem Phereponus, aut ex iis opinionibus procedunt, quarum falsò Augustinum facit auctorem, aut ex impiis iis opinionibus, quas antea ipse Phereponus adoptavit, Arminium secutus, live Socinum. Negat enim Deo scientiam futurorum contingentium, negat gratuitam atque infallibilem prædestinationem electorum. Præterea negat in homine necessitatem gratiæ ad bonum, sed ejus utilitatem tantum probat, negat originale peccatum, liberi autem arbitrii vulnera infirmitatēq; post Adamum non agnoscit pro merito. Ad hæc Augustino attingit non solum ineluctabilis atque necessitantis gratiæ necessitatem, sed etiam sublatis prorsus liberi arbitrii enormem sententiam. Quid facias homini sinè ullis frenis per divina Scripturarum mysteria & documenta excurrenti? Equidem meum non est, nec erit in tam angusto campo ostendere, quantum à mente divinarum Literarum aberret Phereponus in suis hisce opinionibus. Id jam præstitere contra alios Phereponos innumeri Scriptores Quod si Catholicorum dogmata nituntur hic auctoritate divinæ Scripturæ, atque antiquissimâ Traditione; discendum illi fuerat, intellectum captivare in obsequium revelantis Dei, & argutiis temperare, & difficultates comprimere, quas humani ingenii aut temeritas aut infirmitas excitare solent adversus exploratâ Christi atque Apostolorum doctrinam, intellectu interdum difficilem. Accedit, quod in sententia quoq; Augustini (si eam Catholicis oculis legas, & Catholicâ interpretatione exponas) utilis est correptio, utiles ac necessariae ad Deum sunt preces: idque ex ipso Lib. de Corrept. & Gratia patere potest. De nullius enim salute desperare unquam debemus,

donec in ista vita fuerit & cùm liberè nunc fiant, quæcumque ad æternam salutem aut perditionem fiunt, neque aliter à Deo ista præsciantur, quàm liberè facienda homini: hinc orationi, quam Deus misericors plerumque exaudit, & correptioni sua utilitas est, atque etiam necessitas. Quamquam verò correptionis & orationis fructum Sanctus Augustinus sentiat esse tribuendum Dei gratiæ, attamen non negat ille, quin hominibus Deus tantam gratiam suppeditet identidem, quâ proximè possint, si velint, divinâ misericordiâ vires præstante, proficere ex correptione, & oratione ad Deum fusâ. Totus ille est in ostendendo, nos de nostro gloriari non posse, sed gloriari in Domino debere. Beneficentiam Dei in omnes non negat ille. Catholica autem Ecclesia apertissimè deprædicat veram ac sufficientem gratiam nulliâ Deo negatam, ita ut ideo tantum in se beneficii divini fructum non experiantur, qui perduntur, nisi quia Deo vocanti atque auxilianti restiterunt, atque resistunt, causâque in se habeant, cur potentiori voce ac impulsu eos non excitet ac liberet Deus, & cur de se tantum conqueri deinde debeant, quòd salutiferæ vocationi, & correptioni minimè obtemperârint.

Cæterùm illo argumento, quod anxios habet non rudes tantum homines, sed ipsos interdum doctissimos & acutissimos viros, utitur etiam Phereponus in Augustinum, dum contendit pag. 618. ex istius sententia consequi, de futuris orandum non esse; nam, inquit, *Dei decreta erga electos executioni mandabuntur, sive ores, sive taceas. Erga reprobos nihil fiet orationibus tuis. Ergo desine fata Dei flecti sperare precando.* Iterum dicimus, & Pherepono denuntiamus, hallucinari ipsum, quòd æternam hominum aut prædestinationem aut reprobationem sibi fingat, ab Augustino & Catholicis omnibus ita sustineri, ut aut ad efformandum, aut ad complendum divinum decretum nihil rei habeat humana voluntas. At dogma apud Augustinum est, sinè liberâ hominis voluntate, quæ peccatum ante eligat, ac prævideatur eligere, neminem à Deo reprobari. Rursus etsi sinè nobis, & ex mera sua misericordia, non autem ex meritis nostris, nos prædestinârit Deus, attamen sinè consensu nostræ voluntatis, atque ad eam ipsâ repugnante, compleri divinum illud decretum nequit. Voluntates ergo nostræ, licèt in tempore positæ, in œconomia tamen æterni consilii locum habent, sive mavis dicere, habuerunt. Et præsentia Deo jam ab æterno fuerunt, ac sunt, quæ voluntas nostra identidem facit, & factura est. Ergo non frustra orationes



nos instituuntur in Ecclesia de futuris. Electorum voluntas, dum in via est, potest velle malum, & quandoque etiam vult, quanquam in fine invincibiliter, & liberâ electione, bonum sit amplexura Reproborum rursus voluntates bonum velle semper possunt, dum in corpore versantur, & quandoque etiam eligunt, quanquam usque in finem culpâ suâ non sint in bono perseveraturæ. Divina autem scientia ab æterno prævidens, ac divina voluntas ab æterno volens, aut permittens, contingentiam ac libertatem in tempore non adimunt animis rationi utentibus. Orationibus ergo, & correptionibus nostris fit, ut æternum Dei decretum, atque præscientia suum consequatur complementum, dum & electi ad bonum illud incitantur, quod eis per adiutorium suæ gratiæ destinavit Deus, & quod finè concursu libero voluntatis eorum perfici non potest; & reprobi nihil inde proficientes, habent, quod suæ pertinacissimæ voluntati exprobrare possint, quæ contemptis correptionibus & adhortationibus, in nequitiam liberè ferri voluit, & à nequitia exurgere liberè noluit.

Audi S. Thomam 2.2. Quæst. 83. Art. 2. Postquam dixit, *ita inducendam esse orationis utilitatem, ut neque rebus humanis divina providentia subjectis necessitatem imponamus neque etiam divinam dispositionem mutabilem aestimemus*, hæc alia subdit: *Considerandum est, quod ex divina Providentia non solum disponitur, qui effectus fiant, sed etiam ex quibus causis, & quo ordine proveniant. Inter alias autem causas sunt etiam quorundam causæ actus humani: unde oportet, homines agere aliqua, non ut per suos actus divinam dispositionem immutent, sed ut per actus suos impleant quosdam effectus secundum ordinem à Deo dispositum, &c.* Quanquam verò neque orationes, neque correptiones ex inscrutabili, sed iusto Dei consilio, profuturæ sint reprobis, ita ut cum perseverantiæ dono è vivis decedant; at tamen Ecclesia Dei non desinit orare pro omnibus, & unumquemque ad orationem sollicitat, obtemperans Christi præceptis. Nequaquam enim noti sunt, quos Deus secundum propositum vocavit; & quos secundum iustitiam damnandos præscivit. Propterea inquit S. Augustinus in eodem Lib. de Corrept. & Gratia Cap. 15. *Ad nos, qui nescimus, quisnam sit filius pacis, aut non sit, pertinet nullum exceptum facere, nullumque discernere; sed velle omnes salvos fieri, quibus prædicamus hanc pacem.* Idem verò Augustinus in eodem libro agnoscit voluntatem nostrâ, dum incitatur per correptiones, & adhortationes, liberè posse recedere ab iniquitate, & iniquitatem fugere, & orandum ei esse Deum, ut faculta-

cultatem virēſque benè agendi in tempore conferat, atque illud impleat, quod ipſe ab æterno jam ſtatuit atque præſcivît. Noſtrum quippe operari in tempore, etſi ab æterno, ſempërque, præſens Deo fuerit, attamen non deſiit eſſe (quod eſt ad nos) aliquid futurum, & liberè à liberis hominibus faciendum. Neque Deus, niſi voluntatis noſtræ conſenſus accederet, nos benè acturos prævidere potuit, quanquam nos gratiâ ſuâ præcurrente, & noſtrâ voluntate libero aſſenſu conſentiente, benè ſumus acturi, & ipſe facturus ſit, ut nos liberè conſentiamus gratiæ ſuæ. Sed nos Deum metimur (ut hoc iterum commemorem) humanis ideis, & ejus æternitatem, atque æternam præſcientiam concipimus, tanquam cognitionem, quæ per infinitos annos operationem noſtram præceſſerit, cùm tamen in Dei præſentia æternitas unum ſit punctum omnia complectens, quæ nobis triplici ſub idea apparent, nunc præterita, nunc præſentia, & nunc futura. Vide Auguſtinum Lib. 2. Quæſt. ad Simplicianum, ubi non *præſcientiam futurorum*, ſed *ſcientiam* in Deo ponit, quanquam reſpectu ad nos habito rerum futurarum cognitio *Præſcientia* in Deo ſoleat appellari. Quamobrem & bonum ſemper nobis agendum eſt, & improbitas evitanda, & fideliter Deo ſerviendum, & ſpes collocanda in immenſa illius miſericordia ac bonitate, neque nimis anxie iſteſtiganda eſt profunda illa Prædeſtinationis abyſſus, quæ Apoſtolo ipſi incomprehenſibilis videbatur. Neque enim minus certum eſt, prædeſtinationem noſtram non è præviſis meritis noſtris, ſed ex miſericordia Dei, & reprobationem contrà è ſola præcognita iniquitate noſtra, ab æterno fuiſſe in mente Dei: quàm certum eſt voluntatem noſtram in tempore poſitam nullâ eſſentiali neceſſitate præviâ ferri in bonum, aut in malum; & contingenter operari, ſive bonum, Deo adjuvante, ſive malum concupiſcentiâ vincente; & nos, dum adulti rationis uſum habeamus, non poſſe aut damnari ſine libera electione mali, aut ſalvari ſine libera electione boni, ad quam prævia & cooperans gratia gratiæ Dei neceſſaria eſt.



## CAPUT IX.

*Sententia de descensu Christi ad Inferos ad fidem spectans à Pherepono improbata. Quid hic certo credendum, quid sit dubium. Psalmi XV. locus à Sancto Petro laudatus Catholicorum sententiam probat. Phereponus eum Psalmi locum absòne interpretatus. Davidis verba ad unum Christum referenda. Vox Hebraïca Scchol Inferos etiam, & loca animarum post corporis mortem significat. Talem ejus esse sensum in Psalmo laudato vox Græca Hades à Sancto Luca adhibita evincit. Alia argumenta iu hanc rem. Sententia Hebraeorum de infernis animarum sedibus, & Scchol, eodem sensu ab Interprete Syriaco usurpata.*

**A**D alia nunc transeamus. Dixerat Augustinus in Epist. 164. aliàs 99. *Demum carne mortificatum venisse in infernum*, idque evicerat verbis Psalmi XV. 10. & Petri in Actibus Apostolorum. Quis ergo, tum subdit, *nisi infidelis, negaverit fuisse apud inferos Christum?* Ad hæc Phereponus; *Vel hinc intelligere licet, nam periculosum sit, Scripturam velle interpretari, si necessariis subsidiis destitutus sis; primum enim in ea invenitur, quod non est, deinde acerbè damnantur, qui ea melius intelligunt.* Tandem Augustinum carpit, quod existimâre, Christi animam in locum suppliciorum descendisse, dum corpus ejus in sepulchro jaceret, simulq; illos impietatis arguerit, qui aliter sentirent. Eadem repetit Phereponus ad Epist. 187. olim, 17 In notis verò ad Cap. V. §. 2. Lib. de Fide & Symbolo ait, à Symbolo Ecclesiæ Africanæ, ut & à Romano, aliisq; abfuisse caput *de descensu ad inferos, quod tamen postea temere conjunctum est.* Non uni ergo Augustino infensus est hac de causa Phereponus, quod ille inferos in Psalmo, & Actuum loco, memoratos acceperit pro loco, in quo animæ damnatorum hominum pœnas luunt, sed reliquis ferè Patribus irascitur & Scriptoribus Ecclesiasticis, imò universæ Catholicæ Ecclesiæ, quæ credit, & in Symbolo à tot sæculis profitetur descensum Christi ad inferos Ego quàm brevissimè potero, Ecclesiam Catholicam potius, quàm Augustinum, à confidenti censura Phereponi vindicare conabor.

Primò igitur statuerendum est, id tantummodo inter Catholicos constare ac ratum esse, videlicet Christum post mortem descendisse ad Inferos, & nomine *Inferorum* significata diversa quædam loca, quò omnes hominum vitæ functorum animæ è corpore solutæ olim deferrebantur pro variis meritis. Suus erat locus iustis, Christi adventum & resurrectionem expectantibus: Elysios Campos similem locum Ethnicis appellabant. Suis improbis, qui & adhuc durat, atque æternum durabit Orcus, Tartarus, aliâq; nomina ei tribuebantur ab eisdem Ethnicis. Ad priorem, superioremq; infernum, in quo Patrum atq; iustorum animæ definebantur, sententia communis est, animam Christi se contulisse. Utrùm etiam ad inferiorem infernum, seu ad impiorum loca penetrârit, & ad reliqua inferorum ergastula, quidve ibi egerit, non æquè pater, & magna inter ipsos SS. Patres, nedum inter Theologos recentiores, dissensio occurrit. Quod igitur ad Augustinum attinet ille sententiam Ecclesiæ de Christi descensu ad inferos sectatus fuit, certamque habuit, & à solis infidelibus negari posse ait. In reliquis de Christi descensu ad inferos, negandum non est, quin diu fluctuârit mens Augustini. At non omnia, quæ ad hunc Symboli Articulum referuntur, ad ipsam fidem spectant. Phereponus censere videtur, inferos ab ipso accipi pro loco duntaxat damnatorum. Verùm agnovit etiam Vir sanctus, inter inferos sinum Abrahæ, quo piorum animæ ante Christum è corporeis nexibus expeditæ migrabant. Inquit enim Lib. XX. Cap. 15. de Civ. Dei: *Non absurdè credi videtur, antiquos etiam Sanctos, qui venturi Christi tenuerunt fidem, locis quidem à tormentis impiorum remotissimis, sed apud inferos fuisse, donec eos inde sanguis Christi, & ad ea loca descensus erueret.* In enarratione etiam in Psalmum 85. idem Augustinus duo inferna statuit, quorum in uno quieverunt animæ Iustorum, in altero torquentur animæ impiorum.

Itaque ostendendum restat reverà Christum ad aliquos inferos descendisse quod ab Ecclesia Catholica non minus, quàm ab Augustino, tanquam certissimum affirmatur, à Pherepono autem tanquam falsum negatur. In Actib. Apostolorum Cap. 2. v. 24. Petrus exponit Christi resurrectionem, eamq; à Davide prædictam inquit iis Psalmi XV. verbis: *Quoniam non derelinques animam meam in inferno, nec dabis sanctum tuum videre corruptionem.* His potissimum verbis innititur Ecclesiæ fides, dum Christum ad inferos descendisse, atque inde etiam surrexisse tradit. Phereponus verò aliter locum illius Psalmi interpretatur, & pro inferno

contendit *sepulchrum* esse intelligendum; ità enim significat apud Hebræos vocabulum *Scehol*, quo usus est eo in loco David. Habet ille in hac sententia concordēs, immo Magistros, nonnullos è Novatoribus, quorum eruditio jam eò pervenit, ut pleraque Christianæ Ecclesiæ dogmata, licet antiquissimā Traditione Patrum jamdiu sacrata, arrodat, in dubium revocet, & levibus de causis explodat. Ante omnia, inquit Phereponus, statuendum est, Petrum non quassivisse in loco Psalmi id, quod minimè est; ideòque ex loco Psalmi intelligendus Petrus, a què ac Psalmes ex sermone Petri; nec ullus est inter eos dissensus, quamvis cum Augustino nullo modo sentiant. Conditionem accipimus, quam exhibet Phereponus; nihil enim apud nos certius est, quàm S. Petrum à Psalte dissentire non potuisse, ipsùmque ab omni errore immunem fuisse in Psalmi loco interpretando. Sed uti certum est, nullum inter Davidem, seu Psalten, & Petrum esse dissensum, ità quoque exploratum habemus, mentem Petri ac Davidis perspectissimam divinitus esse debuisse Actuum Scriptori Lucæ, aded ut ne iste quidem falli in ea enarratione potuerit. Videamus igitur, quid David, quid Petrus, quid Lucas habeant. Verba Psalmi in Hebraico Codice ità se habere scribit Phereponus: *Non relinques animam meam sepulchro, nec patieris sanctum tuum videre corruptionem.* Nunc notionem hujus vocabuli Hebraici dissimulemus, audituri prius, quid hæc omnia Pherepono docente significant. *Liquet*, ait ille dictatorià voce, *hoc velle Psalmen, sensu tralatitio, Deum non passurum ut occideretur, nam relinquere sepulchro, aut pati, videre corruptionem, est finire vulneratum quempiam, aut malè affectum mori. Hæc tamen verba, sensu proprio, melius in Christum quadrant, quem Deus passus non est in sepulchro diu jacere, neque in eo corrumpi.*

Malè Phereponum non habeat, si dicamus, non solum ipsum & Petro Apostolo doctiorem, & Judæis ipsis Petri auditoribus prospiciorem velle videri; sed etiam velle nobis exhibere Petrum linguæ Hebræicæ non satis peritum, & Judæis imponentem, & ipsos Judæos tam suarum rerum ignaros, ut sibi paterentur illudi. Si enim ea verba secundum Davidis mentem significabant, non permissurum Deum, ut ipse David vulneratus, aut malè affectus moreretur: quàm concinne quæso ad Christum illa referebat Petrus? Christus mille plagis & contumeliis affectus necatus fuerat, & sepulchro datus. Num ergo persuadere auditoribus suis potuisset Petrus, hæc de Christo necato dici, quæ Davidi à morte liberando, & nondum in sepulchrum  
illato

illato competebant? Quando ipse Petrus instabat, Christum inquitens è mortuis surrexisse, idque à Psaltemiis verbis prædictum: infideles ac perversos Judæi, quos tunc alloquebatur Petrus, continuo respondere poterant, si eis cor & scientia Phereponi fuisset: diversum planè aliudmq; esse eorum verborum sensum, & nihil facere cum resurrectione Christi. Liquebat enim Hebræicæ linguæ vel leviter peritis (si Pherepono credimus) non de mortuo aliquo suscitando, sed de vivo à morte servando locutum fuisse S. Regem, idque propriè illum locum sonare, quanquam tralatitiis verbis conceptū. Quid ad hæc Petrus? Frustra se contorsisset, arbitror; nihilque profuisset cum Pherepono dicere, ea verba *melius in Christum, sensu proprio, quadrare, quem Deus passus non est in sepulchro diu jacere, neque in eo corrumpi.* Nam primò negare potuissent, hæc metaphorica non esse; atque ità explicassent eadem verba: *Quoniam non fines animam meam descendere, venire (quæ verba suppleri non immeritò possunt) in sepulchrum, liciol, non dabis sanctum tuum videre foveam.* Quæ phrasæ proprio, non tralatitio sensu, etiam in Davidem non moriturum quadrassent. Tum subdere poterant, etiamsi hæc metaphorica essent, nihil tamen aliud sonare, quàm quod Phereponus censet, nempe, non permissurum Deum, ut aliquis moreretur, & sepulcro traderetur: quæ nullo pacto conveniunt in Servatorem nostrum. Ac proinde Petrum arguissent, atque irrisissent, quasi in suam rem divinis abuteretur Scripturis, & verba neque fortuitò, neque consultò congruentia in suam sententiam contorqueret.

At absit ab Apostolo tanta ignominia, tanta suæ linguæ inscitia, quibus notis ipsum Phereponus incautè aspergit. Ea erant Davidis in illo Psalmo verba, quæ unicum germanum sensum haberent in ipsius etiam Davidis mente, & hic sensus uni Christo seu Messias poterat ac debebat accommodari. Audiamus Apostolum ipsum de Jesu loquentem. *Quem, inquit, Deus suscitavit, solutis doloribus inferni, juxta quod impossibile erat, teneri illum ab eo. David enim dicit in eum: Providebam &c. Quoniam non derelinques &c.* Tum ostensurus hæc de uno Christo prædicta fuisse, ità loqui pergit: *Viri fratres, liceat audenter dicere ad vos, de Patriarcha David, quoniam defunctus est, & sepultus, & sepulchrum ejus est apud nos usq; in hodiernum diem. Propheta igitur cum esset &c. Providens locutus est de resurrectione Christi, quia neque derelictus est in inferno, neque caro ejus vidit corruptionem, &c.* Hic meridiano sole clarius est. Petrum pro confesso atque explorato apud omnes Judæos

Judæos sumere, ea Davidis verba unice significare, quempiam verè jam mortuum ad vitam postea revocandum, ejusque carnem in sepulchro non esse corrumpendam Evidens erat, Davidem è vita concessisse, ejusque cadaver in tumulo cæterorum more fuisse in tabernaculum resolutum, cujus rei testis adhuc erat superstes illius tumulus. Quare non de se Propheta locutus fuerat, sed quidem de Messia quem Apostoli omnes aliique fideles è mortuis resurrexisse compertum habebant. Ac propterea quis non videat quàm longè à Petri mente Phereponus abeat, & quàm temerè verba Psalmi interpretetur?

Sed optimos Auctores suæ in interpretanda Scriptura consuetudinis Phereponus fortasse laudabit. Theodorum videlicet Mopsuënitenum, quem in Collat. IV. Patres Concilii Constantinopolitani II. idcirco etiam diris devoverunt, quod hunc eundem Psalmi locum, aliæque de Christo prænuntiata argutis interpretationibus alio referri posse doceret, Hugonem Grotium adferre etiam poterit, virum aliqui eruditissimū (ut nihil de Sociatis Scriptoribus dicam, cujus ea fuit sententia, univèrsis de Christo Prophetiis duplicem inesse sensum, quorum alter & primarius ad Historiam temporis, quo Prophetæ vixerunt, alter & secundarius ad Christum sit referendus. Quæ opinio, quia nullo discrimine Prophetias omnes complectitur Christo accommodatas, quàm absurda sit, & quàm malè se regat, vel ex hoc loco liquere potest, ut pluribus alijs parcam. Ità enim Davidis Prophetiam in Christum è mortuis suscitatum convenire Petrus ait, ut nullo pacto ad Historiam Regii Prophetæ referri posse pro re evidenti statuas. Quis autem Petro cum Davide consensus, ubi ejusdem verbis unam rem iste, alteram ille penitus diversam significare volunt? Quis Judæorum tunc non potuit frustrari rationem Apostoli, si eo tempore aut obtinuisset, aut succurrisset interpretatio Phereponi? Quis adduci ad Christum, cujus resurrectionem à mortuis per adeò dubias, incertas, facileque eludendas Prophetias Apostolus Petrus probare conabatur? Et tamen ex ipsis Judæis tria millia ad Christum eo die conversa fuere, tantam vim habuere Petri argumenta ex ipsis Psalmorum verbis petita. Sed ultra non juvat urgere consectaria & incommoda temerariæ istius sententiæ; nos enim vocat altera quæstionis nostræ pars.

Stat igitur, locum illum Psalmi ad Christum mortuum esse referendum, cujus animam Deus derelicturus non erat in inferno. At Phereponus unà cum aliis Novatoribus pro

*in inferno* contendit vertendum esse *in sepulchro* ; vox enim *Scebol*, perpetuo linguae Hebraicae usu, significat *sepulchrum*. Catholici contra retinendam hic esse *inferni* vocem persuasum habent, qua hic non sepulchrum, sed sedes & loca hominum vitam functorum significantur, sive isti in Abrahamæ sinu, hoc est in requie, fuerint, sive in gehenna, hoc est in poenis. Vocabulum autem *Scebol* non negamus, quin pro *sepulchro* seu loco humatorum corporum, sæpe accipiendum sit in sacris Libris antiquæ legis ; sed per illud etiam significari dicimus inferna illa loca, & sedes, quod mortuorum animæ deferebantur, Christi adventum, & postremum seculi iudicium expectaturæ. Consentire in hanc rem mihi videtur & ipse Phereponus, cui vox ista significat non solum *sepulchrum*, sed etiam *locum aliquem sub terra superficie*, aut certe *statum ac conditionem mortuorum, quacumque sit*, quamvis ipse se statim addat, nunquam locum peculiarem malorum suppliciiis attributum per eam designari, qua de re nunc disputare nolumus. Certè *Scebol* indefinita quædam vox est & loca subterranea designat, atque adeo mortuorum statum atque ergastula. Quare non tam eruditè quàm prudenter illos fecisse reor, qui eam vocem Latine reddentes, potius quàm *sepulchrum*, semper *inferos* aut *infernum* trāstulere voces indefinitas ; has enim postea explicare liberum erat aut pro corporum, aut pro animarum sede post discessum è vita, prout Scripturæ sensus, rerumque contextus, & alia argumenta ab Interprete poscerent. Nam cur exempli gratiâ Gen. XXXVII. ψ. 35. ubi Jacob dicit : *Descendam ad filium meum lugens in Scebol*, hanc vocem vertas in *sepulchrum*? Putabat Jacob filium suum mortuum, & à feris devoratum, sepulchro caruisse. Non igitur ad illum sepultum se esse descensurum, suæque ossa cum filii ossibus se esse compositurum sperabat, cum ossa illius nullo sepulchro condita arbitraretur. Inquit ergo Jacob: *Descendam ad filium meum lugens in infernum*, ut post Græcā vulgata versio habet, hoc est eum in locum, quod hominū animi à corpore soluti abeunt, & quod non dubitabat pater, quin suus filius se præcessisset.

Nunc quæramus, an *Scebol* in laudato Psal. XV. ψ. 10. accipi debeat pro corporum sepulchro, an pro animarum post mortem ergastulo. Postremam significationem esse præferendam, totius Christianæ antiquitatis consensus suadet, & clamat. Justinus. Irenæus, Origenes, Clemens Alexandr. Eusebius, Athanasius Basil Nissen. Nazianzen. Epiphan. Chrysostom. Cyrillus Hierosolimitan & alii è Græcis innumeri. Tum Tertullianus, Hilarius, Ambrosius Hieronymus. Rufinus, Augu-



Augustin. & alii inter Latinos quamplurimi, tum ipsa Concilia, & Symbola ab omnibus Catholicis, imò Christianis omnibus recepta, Christi descensum ad inferna animarum domicilia crediderunt, & per sæcula XVI. prædicarunt, & ex hoc potissimum loco intellexerunt. Negantes verò talem sententiam, Hæreticis atque infidelibus omnium ore adjuncti fuere. Tanta, tamque vetusta Patrum & Christianorum Traditio atque consensus, non id solum roboris habet, ut Catholicum quemlibet suæ professionis consciū ita sentire jam cogat, sed ipsos etiam Traditionis & vetustatis nuperos contemptores impudentiæ, ac teineritatis arguit, quòd aliter audeant affirmare. Nam cum inter Novatores sincerissimi fateantur, significationem vocis *Scebol* ambiguum esse, & designari per illam statum quoque & sedes spirituum humanorum post corporis mortem: certè nullam ipsi adferunt urgentem rationem, quare in Psal. XV. vox illa significare non possit id quod Ecclesia Catholica omnium temporum censuit. Rursus cum apud omnes æquos rerum æstimatores verisimile sit, antiquissimos Ecclesiæ Patres eam non suo Marte procudisse opinionem, sed exposuisse, qualem ab aliis Majoribus, atque adeò ab ipsis Apostolis, veluti per manus acceperant; quis non videat, potiori jure antiquis illis testibus rem adeò disertè affirmantibus, quàm novitiis hisce Criticis sine ratione valida negantibus, habendam esse fidem? Accedit, quod ex iis etiam vetustis Auctoribus tres saltem Hebræam calluere Linguam, Origenes, Hieronymus, & Epiphanius. & cum sui æqualibus Rabbiniis versati, notionem vocis *Scebol* ignorasse censendi non sunt. In re autem à nostris temporibus adeò remota, cum de notione vocis agatur, quæ ab hominum usu & arbitrio pendet, exigat prudentia, ut vetustioribus potius eruditis, quàm recentioribus credamus.

Quod tamen omnem dubitationis causam auferre potest, ac debet, est ipsa S. Lucæ narratio in Act. Apostolorum Cap. 2. v. 27. Verba Psalmi Græcè reddita sic ille exhibet: ὅτι ὃ κ' ἐγκαταλείψεις τῷ ψυχῇ μου εἰς ἄδου, οὐδὲ δώσεις τὸν ὄσιον σου ἰδεῖν διαφθοράν. *Quoniam non derelinques animam meam in Hadu, neq; dabis S. tuū videre corruptionē.* Pro eis ἄδου, LXX. Interpretes, quorum versionem Lucas usurpasse videtur, habent εἰς ἄδην, in *Haden*. Quid autem sit ἄδης, quidq; eo vocabulo apud Græcos omnes significaretur, inter ejus linguæ peritos constare faciliè potest, Nativā suā significatione *Plutonium* designabat. Homerus *Iliad.* O. Ζεὺς καὶ ἔγω,

τρίτατος δὲ Αἰδης ἐνέργισιν ἀνάρων *Jupiter, & ego, tertius autem Pluto inferis imperans.* Quandoquidem in Plutonis ditione subterranea quæque loca esse credebantur, hinc *Hades* inferna ipsa loca appellata sunt, quod Ethnici mortuorum animas illabi putabant, Judæis & Christianis in ea sententia concordēs. Itaque εἰς ἄδου (quod in citato Cap. Act. legitur) nihil aliud est, quàm in domo *Hadis*, seu *Plutonis*, subintelligendo δόμον. seu οἶκον, pro ἐν οἴκῳ ἄδου, ut ex aliis exemplis confirmari potest. Idem *Homerus Odyss. k.* ἰκέσθαι εἰς Αἰδαο δόμους, καὶ ἐπαινῆς Περσεφονέης, *Venire in Plutonis domum, & tenebricosa Proserpinæ. Domus Plutonis, seu Inferni,* pro Græcorum more non *sepulchrum*, sed *inferos* significat, hoc est geminas illas subterraneas sedes, quibus, uti diximus, animæ à corporis nexibus expeditæ cludebantur, quietis loca piis, poenarum verò impiis. Proinde constans regula est, usitatissimam & communem olim ejus nominis *Hades* vim *Inferos* sonasse, qualem nos descripsimus, aliasque interpretationes aut paucis fuisse, aut nulli cognitās, sive usurpatas. Quibus constitutis, jam qui se Christianos dicunt, ac in eo Psalmi loco vocem *Scebol* pro *sepulchro* protervè accipiunt, nihil minùs facere mihi videntur, quàm *Lucam*, Scriptorem divino afflatu procul dubio plenum, ignorantia atque inconsiderantia arguere, suamque Criticam eruditionem scientia ac judicio Apostolorum præponere. Aut enim perspecta *Lucæ* non fuit notio vocabuli *Scebol* & *Hades*; & tunc ex opinione Novatorum consequitur, hic eum suam eruditionem & scientiam, imò divinum Spiritum defecisse; siquidem, si istis credimus, *Scebol* *sepulchrum* tantummodo significat, *Hades* verò pro *Inferis* perpetuo Lingua Græcæ usu accipitur. Sin autem *Lucas* novit, *Scebol* significare *sepulchrum*, quomodo ab inconsiderantia nota liberari vir θεόπνευστος potest, qui cùm faciliè per dictionem Græcam τάφος, hoc est *sepulchrum*, aut per alias Græcis usitatas voces, reddere posset Hebraicum *Scebol*, tamen usurpare voluit vocem ἄδης, quæ rem aliam à *sepulchro* designat? Nonne hoc erat certissimum errandi fundamentum præbere Græcis Lectoribus, qui Hebraica ignorantes vocem *Hades* pro suo more interpretaturi fuissent? Quod si Patres in ea interpretatione errarunt (uti Novatores affirmare audent) nonne in *Lucam* refulit culpa, qui aliis tam faciliè poterat debebatque sese explicare verbis, dum Græcos homines erudiendos susceperat?

Verùm, inquit *Phereponus*, *Græci Interpretes, qui LXX.*  
dicun-

*dicuntur, Gentilibus non una in re sese attemperarunt, & Lucas*  
*versioni græcæ adjectus, & scribens in gratiam Græcorum, adhibu-*  
*it locutiones LXX. Interpretum. Quasi, si vera sunt, quæ de hac*  
*quæstione Phereponus habet, minus errarit S. Lucas, quàm*  
*Græci Interpretes. Si istorum versio in eo loco Psalmi in-*  
*commoda erat (quo honesto vocabulo Phereponus infide-*  
*lem ac ineptam significare, ut arbitror, voluit) quam fidem*  
*amplius ac venerationem debemus Lucæ, sine iudicio*  
*incommodam nobis ac falsam interpretationem obtru-*  
*denti, & præbenti certam nobis ansam erroris? Talia in-*  
*commoda, talia absurda atque confectaria manifestè devo-*  
*rare coguntur Novatores, quoties nihil sibi religioni dū-*  
*cunt, aliter atque Ecclesia Catholica & Sancti Patres, illum*  
*Psalmi & Actorum locum explicare. Quodnam verò no-*  
*men istos manet, qui tam malè consulunt divinorum Au-*  
*ctorum dignitati ac fidei, ut ingeniorum suorum libidini*  
*& eruditioni, ambitiosè non minùs quàm incautè, satisfac-*  
*iant? At à Christiano Interprete tantum crimen absit. Nisi*  
*Lucam errantem velimus, nuperam hanc interpretatio-*  
*nem abjicere, errorisque accusare necesse est. Dissentire in-*  
*rer se atque errare non possunt Psaltes, Petrus & Lucas*  
*Scēbol* *significare Inferos potest, seu animarum post corporis*  
*mortem subterraneas sedes. Manifestè pro Inferis idem vo-*  
*cabulum S. Lucas accipit. Ergo quin illic Inferi tantum de-*  
*signentur, nullus Christianorum negare potest, ac debet.*

Et ista quidem ea sunt, ut vincant Christiani hominis  
 animum. Cum tamen argumentum hoc, ut Logici ajunt,  
 sit à posteriori, vincere quidem Christianorum omnium  
 animos debet, rem tamen nonnullis etiam Christianis per-  
 suadere fortasse non valet. Certè non continuò persuade-  
 bit incredulis atque gentilibus. Quamobrem hos quoq; ap-  
 pellamus, judicēsque in medio statuimus; certum quippe  
 est nobis, ipsos quoque in nostram sententiam, si æquos se  
 præbeant, esse concessuròs. In laudato Psalmo Catholici  
*Inferos*. Hæretici quidam *Sepulchrum* significari contendunt.  
 Quid habent postremi; quo suam opinionem firment? Ni-  
 hil profectò solidi; quamvis enim *Scēbol* pro *Sepulchro* sæpè  
 in sacris Litteris accipiatur, negare tamen non audent, quin  
 mortuorum etiam statum ac loca aliquando significat, &  
 sæpè significare possit Tum nullū adferunt vetustum Scri-  
 ptorem suæ in hoc Psalmo interpretationis vindicem ac  
 testem, qui *Sepulchrum* potius quàm *Inferna animarum à cor-*  
*pore solutorum loca*, hîc moneat esse accipiendum. Quid nos  
 contra? Cum hîc de Linguae tamdiu obsoletæ ac mortuæ

agatur, eorumque vim ac notionem veteres magis Hebrææ Linguæ peritos, quàm recentiores, intellexisse credendi sint, isque potissimum, qui florente adhuc Hebræorum Republicâ vixerunt: nemo non videt, eam esse præferendam sententiam, quæ antiquissimis hisce testibus nitatur. At nos Catholici præter quosdam veteres Patres, Hebrææ Linguæ deditos, antiquisque Rabbini in eo studio usos, Lucam ipsum omnium vetustissimum damus, qui in hoc ipsomet laudati Psalmi loco *Inferos*, non autem *Sepulchrum*, vocabulum *Sehol* interpretatur, dum per vocem *עֵדִים* illud reddit, quæ, sicuti vidimus, *Inferos* constanter pro Græcorum more significabat. Numquid verò in Lucam erroris suspicio cadat? Ab omni verisimilitudine id prorsus abhorret. Non hic Græcam, uti appellatur, LXX. Versionem aut laudare aut tueri est animus. Lucam tuemur, non ipsam versionem; nam cum illam in hoc loco suam fecerit Lucas, necessarium est, aut saltem verisimilimum, eam ibi rectè expressisse vim vocabuli Hebræici, mentemque Prophetæ; non enim aliter ejus ope Sanctus Lucas usus fuisset. Apostoli quoque eandem sæpè versionem usurpârunt; quod facientes, ineptum sit suspicari, eos nesciisse, an Græca Hebræicis verè consentirent. Hebræierant, suæque Linguæ satis periti. Ubi à Codicibus Hebræicis Græca dissonabant, ignorare isti non poterant; sique non ignorabant, quis eos versionem prævam adhuc obtrusisse vel suspicetur? Innumeri tunc erant, qui fraudem hanc, uti Linguæ utriusque periti, potuissent, & uti Christianorum acerbissimi hostes, voluissent aperire. Aut numquid, ut se Græcis attemperarent, errores sibi notos, errorumque causas disseminare voluisse putandi sunt?

Idem de Luca dicendum atque sentiendum. Ut Litteris Hebræicis ille operam dederit, profectò nunquam verisimile est, ipsum adeò in illis hospitem fuisse, ut infidam versionem potuerit volueritque usurpare Acta Apost. memoriæ mandabat, idque Pauli ipsius, ut quidam tradunt, consilio ac jussu. Individuus ejusdem Apostoli comes diu fuit, versatusque est cum aliis Apostolis, ac viris utriusque Linguæ gnaris, ab Apostolis, ac ab ipso Petro audire potuit verba in concione Hierosolymitana olim pronuntiata. Qui fieri potuit, ut ille neminem unquam interrogârit, nemo illum monuerit de infida eo in loco versione Græcorum? Nemo id credat, & de Libro, quem Lucas & Apostoli, & Apostolici viri, ad certam Christianorum eruditionem reli-

relicturi erant, & de Scriptore, qui in exordio Evangelii sui profitetur, se nihil scribere, quod à principio diligenter affectus non fuerit, sicut ei tradiderunt, qui ab initio ipsi viderunt, & ministri fuerunt sermonis. Accedit, quod Paulus resurrectionem Christi confirmaturus, laudare & ipse solebat Psalmum XV. Uti enim testis est idem Lucas Act. Apost. XIII. 34. ita Apostolus agebat: *Quod autem (Deus) suscitavit eum (Christum) à mortuis, amplius jam non reversurum in corruptionem, ita dixit &c. Non dabis sanctum tuum videre corruptionem. David enim, &c. voluntate Dei dormivit, & appositus est ad patres suos, & vidit corruptionem. Quem verò Deus suscitavit à mortuis, non vidit corruptionem.* Hic Apostolus priorem partem versiculi prætermittit, in qua *Hades*, seu *Scēbol* mentio habetur. Attamen hinc liquere potest, tritum ore Apostolorum eum Psalmi versiculum fuisse ad evidenter ostendendam Christi resurrectionem è mortuis, & Paulum etiam eo loco secundum LXX. versionem uti consuevisse, cum Hebræos Hellenistas alloquebatur, quales erant habitantes Antiochiæ Pisidiæ, ad quos fuit memoratus à Luca Pauli sermo. Quare nihil verisimilius, quam quod Lucas illius loci sensum probè perspectum habuerit; atque intellexerit vim eorum verborum tum in Græcis tum in Hebraicis Codicibus. Non video autem, quicquid recti iudicii legibus eorum opinio componi possit, qui Apostolos à perversa ac falsa versione abstinere consultò noluisse ajunt, ut sese Græcis ad eam assuetis attemperarent. Quasi non idem sit ac dicere, Apostolos consultò voluisse auditores suos in pristinis erroribus confirmare, aut novis imbuere. Postremò quicquid possit inconsultum adversariorum bellum adversus eruditionem ac iudicium Sancti Lucæ, nihil aliud sibi spondere potest, quam quòd ille non satis Hebræam Linguam calluerit, aut vim vocabuli *Scēbol* affectus non fuerit: quæ tamen omnia veri nunquam videbuntur similia. At quando hoc etiam obtinerent, num obtinere etiam poterunt, Lucam ignorasse vim vocabuli *Hades*, eique Græcæ Linguae scientiam præripient? Id quidem non audeant. Verum id satis est nobis, & satis futurum est cuicumque iudici æquo. Nam cum Lucas *Christi animam non relictam in Hade* affirmet, quæ verba Græcè peritis sonant, Christi animam è corpore solam ad *Inferos* migrasse, ibique diu non permansisse semper restat, Lucam id credidisse, ac tradidisse, quod nos credimus, & universa semper Ecclesia tradidit. Quod, inquam; Lucas ea de re didicerat ab Apo-

stolis, Græca illius verba planè significat, quæ ipse procul dubio intelligebat; & quanquàm non cõstaret, Scriptori huic sat cognita fuisse Hebraica Psaltes verba, id unum sequeretur, Lucam in eo Psalmi loco rem inutiliter quæsis-  
 visse, ac invenisse, quæ illic non erat, sed quàm tamen ipse aliunde certam hauserat, atque altè animo præceperat. Ete-  
 num nisi persuasum id ipsi antea fuisset, Græcè peritus ab ea locutione sese abstinuisset, quæ descensum animæ Chri-  
 sti ad Inferos Græcis Lectoribus apertè, atque ex suo insti-  
 tuto, persuadebat, semperque in posterum persuasit. Si er-  
 go saltem constat, Lucam de Christi ad Inferos descensu non dubitasse: quid nos ampliùs ea de re dubitare pergia-  
 mus? Hoc unum est, quod potissimum quærimus, & scire volumus, & hinc ediscimus. Hæc summa litis nostræ: nunc Lucas noverit, crediderit, atque tradiderit, animam Chri-  
 sti ad inferna loca migrasse. Id autem credidit S. Lucas. Di-  
 versa quæstio est, an Hebraicas voces Scriptor Actorum probe intellexerit, & probe reddiderit. Quæ tamen moneo non quòd Lucam adversariis in hac altera quæstione relin-  
 quam, & hallucinatum putem; alit verèar, sed ut quod ma-  
 ximè quærendum sit ipsi tandem intelligant, quò faciliùs à certis constitutis ad incerta explicanda progrediamur.

Sed hæc cui scrupulus adhuc & dubitatio super sit, an re-  
 verà per vocem *Hades*, *Inferos* designare S. Lucas voluerit, age rem in meliori lumine collocemus. Quæramus, quàm potestatem notionemque voci illi ᾍδης, Lucas, & reliqui Ju-  
 dæi Græcè loquentes, olim subjicerent, hoc est, quid eo no-  
 mine intelligerent Nobilissimus Judæorum Historicus Jo-  
 sephus id manifestè nos docebit. Auctor ille est Lib. 8. C. 2. Antiquit. Jud. tres inter Hebræos à multis temporibus  
 exstitisse Sectas, Phariseorum nempe. Sadducebrum, atque  
 Essenorum. De Phariseis hæc habet: Ὁ δὲ λαὸς τὸν τῶν Ἰσραὴλ τοῖς  
 ψυχαῖς αἰσῆς αὐτοῖς εἶναι καὶ ὅτι οὐκ ἔστιν οὐδὲν δίκαιόν τῆς καὶ  
 πᾶσι, ὡς ἀρετῆς ἢ κακίας ἐπὶ τῆς ἐκείνης ἐν τῷ βίῳ. *Animæ  
 autem immortales esse credunt, & sub terris earum pœnas ac præ-  
 mia dari, prout virtutis vitiorumque studium illis in vita fuit.*  
 Tum addit, perpetuis carceribus illic improbos constri-  
 ngi; piis autem facilem esse ad vitam reditum. Pharisei  
 potissima & doctissima Judæorum pars erant. Illis eorum-  
 que opinionibus populus adhærebat, adhæsit & olim  
 Paulus, ita ut quidquid ad solemnes preces, cul-  
 tumque divinum attinebat, secundum horum interpreta-  
 tionem ac præscriptum fieri soleret. Hanc etiam de im-  
 mor-

mortalitate animæ sententiam tuebantur Esseni, solis Sadducæis contradicentibus, quorum & numerus exiguus, & auctoritas contempta. Sadducæi inquit ipse Lucas Act. Apost. XXIII. 8. dicunt non esse resurrectionem, neque Angelum, neque Spiritum, h. e. mentes humanas à corpore expeditas amplius non vivere. Pharisei autem consentiunt utraque. Quare dubitandum non videtur, quin cōmuni his Judæorum sententia foret, animas post corporis mortem in inferna loca deferri sive ad requiem, sive ad tormenta. Eò pertinent, quæ de ipsis Judæis habet Tacitus Lib. 5. Hist. Corpora condere, quam cremare à more Ægyptios, eademque cura & de infernis persuasio. Status ergo animarum, earumque sedes, uti Josephus testatur, erat ὑπὸ χθονὸς, sub terra atque ad eò ἐν ᾧδου in Inferis. Clariùs sese explicat idem Josephus alibi. De iisdem Sectis loquens Lib. 2. Cap. 12. de Bello Jud. Postquam Phariseis laudata nuper placita tribuit, hæc de Sadducæis subdit: ψυχῆς τὴν διαμονὴν καὶ τὰς κατὰ Αἰδὸς τιμωρίας, καὶ τιμὰς ἀναιρούσι. Anima verò immortalitatem, & in Hade, seu Inferno. vel supplicium vel præmia negant. En quid Judæis Græcè loquentibus esset ᾧδης. Non utique Sepulchrum, sed locus animabus à corpore solutis destinatus, ut ibi vel pœnas vel præmia pro meritis reciperent. Eamdem prorsus Christianorum sententiam fuisse, omnia antiquitatis monumenta testantur Paulus ipse in Act. Apostolor. Cap. XXIII. cum Phariseis hac de re se consentire clamabat. Situs erat hic locus ὑπὸ χθονὸς, sub terrâ, mirabili planè, & vero, quâquam incognito divinæ potentie artificio. Id quoque Christianis persuasum fuit. & apertè ab Apostolo inhuitur ad Philipp. 2. 10. cū ait: *Ut in nomine Jesu omne genu flexatur, caelestium, terrestrium, & infernorum, ἐπουρανίων καὶ ἐπιγείων, καὶ κατὰχθονίων.* Ubi vides κατὰχθονίους appellari, hoc est subterraneos, eam gentem, cujus animæ in geminis Inferis, piorum nempe ac impiorum, clauderentur.

Ab antiquis mutuati recentiores cum Græci tum Latini significationem istam, vocabulis τῶν ᾧδου, atque Inferorum uti pertexerunt, ut ea quoque loca exprimerent, quibus piorum animæ post mortem purgandæ detineri ex Orthodoxæ Ecclesiæ Traditione creduntur. Quare non satis rectè Græcos Christianos Schismate à nobis sejunctos culpæ visus est mihi Thomas Smithus in Ep. de Græcæ Ecclesiæ hodierno statu, ubi illos in errorem Origenicum de animabus impiorum ex Inferno tandem liberandis prolapsos suspicatur, eò quod in Confessione dogmatica scribant: Βίβαια, πολλοὶ ἀπὸ

τῶν ἀμαρτωλῶν (itā illis scriptum lego) ἐλευθερώσονται ἀπὸ τῶν δεσμῶν τῆς ᾄδης, &c. Certō multi peccatores à vinculis Inferni liberantur, &c. videlicet, uti subdunt, propter viventiū pia opera & eleemosynas, & Ecclesie pro iis factas orationes, & potissimum propter incruentum Sacrificium, &c. Non est illis ᾄδης propriè gehenna, sive æternus damnatorum locus, sed quidem claustrum illud, quod nos Latini Purgatorium appellamus, Græci verò Schismatici nomine quidem negant, at cum Patribus reassertant Quod si etiam pro gehenna accipere velis, nihil moramur; adhuc enim apud Græcos stare vides Catholicum dogma de Animabus quibusdam levium peccatorum reis, & post mortem in aliquo tormentorum loco purgandis. Et certè de situ eorundem locorū disputare adhuc nefas non est. Cæterum potuisset nobis etiam hanc inurere notam Smithus, cum in Latina quoque Liturgia, quando preces Deo offeruntur pro piis vita functis, dicatur: *Domine Jesu Christe libera animas omnium Fidelium defunctorum de pœnis Inferni, &c.* Verum, uti diximus toties, Orientalibus vox ᾄδης, Occidentalibus vocabulum *Inferi* modò piorum, modò impiorum ergastulum post mortem significabant, & adhuc significant.

In alterum autem ex his ergastulis demersum post mortem fuisse Divitem illum, cujus Historiam aut Parabolam refert Christus, ex ipso Luca discimus in Evang. Cap. XVI. 21. *Mortuus est autem & dives, & sepultus est in Inferno. Elevans autem oculos suos, cum esset in tormentis, &c.* Ex omnium consensu qui hic memoratur *Infernus* à S. Luca, & vocabulo τῆς ᾄδης exprimitur, nihil aliud est, quàm pœnarum locus, quod impiorum animæ post discessum à vita trudentur. Quare hinc etiam aperte colligitur, quam notionem in auditorum animo excitare soleret ea vox *Hades*, quidve per eam significare vellent Judæi Hellenistæ, & quam vim ipsi tribueret S. Lucas. Sed ne cui succurrat cavillationibus elevare, atque eludere istius loci robur, quasi *Infernus* hic pro *Sepulchro*, & *Inferno* pro mera hominis sepultura accipi possit, necesse est animadvertere, hoc in loco non satis respondere Græcis exemplaribus versiculos vulgatæ versionis, atque inde factum esse, ut hic minus aperta sit Evangelistæ mens. At in Græcis hæc itā se habent ψ. 22. Ἀπὸ θανάτου δὲ καὶ ὁ πλουσιὸς καὶ ἐπάφη Tum sequitur ψ. 23. Καὶ ἐν τῷ ᾄδῃ ἐπάρας τῶν ὀφθαλμῶν αὐτοῦ, &c. Hoc est: *Mortuus autem est & dives, & sepultus est. Et in Hade, seu Inferno, elevans oculos suos, &c.* Græca omnia exemplaria in hanc lectionem consen-



sentiunt, tum Clemens Alexandrinus, Origenes, aliique Græci Interpretes. Sic etiam nonnulli manuscripti Codices Latini legunt, & Augustinus, aliique olim legebant. Accedit, & post Græcam in primis audienda est Syriaca Versio, cujus verba placet afferre. Ità ergo Lucam exprimit Interpretis illi: *Dives mortuus est, & sepultus est. Et cum cruciaretur in Inferno.* Quantà veneratione digna sit hæc Novi Testamenti versio, eruditis compertum est. Ejus antiquitatem ad Apostolicum usque ævum referre quidam non dubitarunt. Quare *inferna* impiorum ergastula procul dubio apud S. Lucam memorari vides, & per vocem *Hades* significari. Sed aliam insuper magni momenti rem nos edocet hic idem Syriaci Interpretis locus. Nam quod Lucæ est *ἡ τῶ ᾍδου*, Interpreti est *besiol*, hoc est, *Hades* redditur per *Sechol*. Illud autem exploratum est, Syriacam hanc linguam, seu Syro-Chaldaeam, Christi & Apostolorum ævo inter Judæos Hierosolymitanos finitimisque etiam populos vernaculam fuisse. Eadem uti consueverunt Christus ipse, ac Apostoli, cum alloquebantur plebem. Hæc autem, si serio pensentur, maximo sunt argumento, & Christum in ea narratione *Inferos*, seu tormentorum loca per vocem *Sechol* expressisse, & S. Lucam pro animarum sedibus subterraneis eandem vocem accepisse tum in laudato Psalmo XV tum in Petri concione, secutumque in ea interpretatione fuisse traditionem Judaici populi Syriacè loquentis, sicuti in usu vocis *Hades* mentem apertam sequebatur Judæorum Græcè loquentium, & infernas animarum sedes eo vocabulo designantium.

Post quæ necesse est protervus sit Academicorum discipulus, & par infidelibus, qui negare pergat, constitutum, creditumque à S. Luca descensum animæ Christi ad inferos. Itidemque est hic agnoscere consuetam Phereponi confidentiam, qui temerè conjunctum Symbolo fuisse ait placitum istud. Talem sententiam nunc nos quærimus, & evidenter expressam reperimus in verbis & mente illius Scriptoris, quem fidum Interpretem Christi atque Apostolorum Interpretum Spiritus S. elegit. Tota Christianorum antiquitas eandem illic sententiam vidit, & Traditioni consonam statuit, & Gnosticorum, Arianorum, Eunomianorum, ac in primis Apollinaristarum erroribus opposuit. Eò etiam retulit Apostoli verba ad Epheseos IV. 9. ubi Christus dicitur descendisse *εἰς κατώτατα, κατώτερα μέρη τῆς γῆς*, in infimas seu inferiores partes terræ, unde & ascendit captivam ducens.

*ducens captivitatem* : quibus verbis innuit Apostolus, Christum descendisse, non in superficiem terræ, ubi degunt mortales, non in sepulchrum paucis ulnis ab hac superficie remotum, sed in profunda terræ penetralia, unde Sanctorum animas, quas alibi *αἰτῶν* appellatas ab ipso Paulo vidimus, eduxit, & in cœlum subinde intulit. Ad eamdem rem Ecclesia docet, pertinere posse alia sacrarum Literarum loca, quæ vicissim dant accipiuntq; lucem ex Actorum Cap. 2. & apud Catholicos Polemicæ Theologiæ illustratores occurrunt. At Pheréponus, ejusdemq; gregis alii, vires Criticæ suæ eruditionis exercent atque exhauriunt in hujus Articuli *παρεργα* quædam. De *doloribus* inferni, quos impiè Christo tribuit Calvinus, & de inferorum loco, & de vocabulo *nephefē*, seu *anima*, diu sed frustra disputant Augustinum dictatorio edicto proscindunt, quod *infernum* in eodem Actorum loco memoratum pro impiorum ergastulo accipiat; alias etiam quæstiones miscent, & fere ubique Patribus antiquis ignorantia dicam nullo negotio impingunt, atque ut mirèrè magis, antiquissimas has opiniones à Pontificiis tandem invecas Ligtfootus ait (quo judicio videant alii) ut Purgatoria officina apud nos statueretur. Sed quantum lubet illic sibi placeat hoc hominum genus Nostrum non est hoc pelagus ingredi. Id satis est Catholicis, quod nullus Patrum Christum ad *inferos*, h. e. ad invisibiles post corporis mortem animarum sedes descendisse negarit, imò omnes fere cum Latini, tum Græci, cum veteres, tum recentiores affirmarint. Hanc nobis veritatem rei que arcem eripere, ut vidimus, Novatores non possunt. Cæterum utram inferorum partem Christus adierit, quidve illic egerit, atque alia hujusmodi *παρεργα*, etiam apud antiquos Patres disputationis argumenta fuerunt. De his inter eos minimè constitit; adhuc non satis constat; sed omnium consensus fuit, animam Christi in *Hadem*, seu in *inferna* penetrasse. Quare cum Augustinus à Pherépono insultatur, quod *inferos* apud S. Lucam, atque in aliis Scripturæ locis memoratos, pro subterraneo impiorum domicilio accipere semper soleat, cum tamen vox *Scēhol* id nunquam significet: primò respondere possemus, Syriacum Interpretem, uti nuper animadvertimus, eā vocē uti, *Oracum*, seu *Tartara*, uti loquitur S. Petrus, seu locum poenarum designaturus. Secundò in Thalmudicis Libris, & à Bar Nachmoni, atque ab Aben-Ezra, & in Libro Judaicarum Precum, & ab aliis Rabbiniis cum recentibus, tum vetustissimis, *Scēhol* non solum pro bonorum post mortem mansi-

que accipi, sed etiam pro Gehenna, seu Tartaro. Tertio Augustinum eam opinionem ita imbuisse, ut contrariam tamen haud quaquam aspernaretur. Imò, uti diximus, aliis in locis à priore sententia ipse recessit. Tandem Augustini placitum nihil continere, quod Christi ad inferos descendens dignitati, naturæ, atque instituto repugnet: à quo scopulo sibi non cavet olim Calvinus. Verùm in isto controversiarum campo non juvat ultrà evagari. Multa utrinque dici possent; sed cùm in obscuris versemur, utrinque demum incerta foret victoria. Nos contenti ostendisse, certam Ecclesiæ, & Patrum, & Traditionis victoriam esse, dum in Symbolo à sepultura Christi distinguunt ejus ad inferos descensum, ad alia properamus.

## CAPUT X.

*Non Apostolicâ Fide, sed Apostolicâ Sede legendum in quodam Augustini loco. Phereponi somnia aaria hic nobis obtrusa. Alia Auctoritas veritatis, alia jurisdictionis. Quid commune cum ceteris Ecclesiis Catholicis, quid suprâ ceteras habeat Romana Ecclesia. Eo in loco Augustinus à Pherepono minime intellectus. Episcoporum continuata successio in Cathedra Romana inter Notas vera Ecclesia computata, ab Augustino aliisque vetustioribus sanctis Patribus, Tertullianus ejusdem sententia fuit. Consensus & judicium Christiani Populi suum quoque robur habet in controversiis de Religione.*

**C**atholicam Ecclesiam, solam nempe Religionis veræ custodem atque hæredem, Augustinus multis commendat, & Manichæis persuadet in Lib. de utilitate credendi. Cap. XVII hæc potissimum habet: Cùm igitur tantum auxilium Dei, tantum profectum, fructumque videamus, dubitabimus nos ejus Ecclesiæ condere gremio, quæ usque ad confessionem generis humani, ab Apostolica Sede per successores (successiones legendum esse arbitror) Episcoporum frustra Hæreticis circumlaurantibus, & partim plebis ipsius judicio. partim Conciliorum gravitate, partim etiam miraculorum majestate, damnatis, culmen Auctoritatis obtinuit? Perquàm suspecta sunt Pherepono verba illa ab Apostolica Sede; nam sic solebas in Occidente Sedes Romana vocari; cujus Auctoritatem omnibus artibus amplificare conati sunt

exscri-

*exscriptores Laborum Ecclesiasticorum Monachi* Ità scribit Phereponus pag. 597. Animadv. Verùm mirari subit, hominem acutum adedò levem infelicemque occasionem arripuisse, quàdum Augustinianos Codices emendandos suspicatur, Apostolicæ Sedis auctoritatem ac præstantiam suis dictis impeteret. Censet enim, non *ab Apostolica Sede*, sed *ab Apostolica Fide* hìc esse legendum. Hujus substitutz vocis eam rationem ille reddit, quòd *primam Auctoritatem Ecclesia Christiana traheret ab Apostolica Fide*; parem enim cum Apostolis sententiam tuebantur. Tum Tertulliani locum è Præscriptionum Libro in hanc rem adfert, quasi revocari in dubium à Christianis tam aperta veritas possit, si epithetum illud *primam* à Pherepono usurpatum excipias, quòd explicatione fortassis indigeat. Sed Augustini verbis nulla prorsus adhibenda est emendatio, & inepta est, quam Phereponus proposuit; & ipse Tertullianus Augustini verba rectissimè sese habere ostendit.

Totus est Augustinus in eo Libro, ut & Gentilibus, & Hæreticis, & Manichæis potissimùm, ostendat, Religionem Catholicam reliquis, si ità appellare licet, Religionibus esse præferendam. Ad hanc veritatem attingendam, brevem præscribit, & commodam, & certam methodum, quæ vel ipsis rudioribus esse, ut ità dicam, possit ad manus. Nimirum Notas quasdam, & *Motiva*, ut ajunt, *credibilitatis* enumerat, quæ uni Christianæ Religioni, Catholicæque Ecclesiæ, conveniunt, cæteris non conveniunt, & ab ab ipsis quoque imperitis dignosci facillè possunt. Quibus ità propositis, vela contrahit, hominemque nondum ab Hæresi ad Catholicam Fidem conversum alloquitur suprà laudatis verbis, ubi nonnullas repetit ex iis prærogativis ac Notis, quæ Catholicam Fidem Ecclesiàmque suprà Hæreticas evidenter commendant, quales sunt; *Confessio generis humani*; *Episcoporum Successio in Cathedra Petri*, *Miracula* & hujusmodi alia, quæ faciunt, ut credendum sit Catholicorum Ecclesiæ, non autem Hæreticorum. *Apostolica Fides*, quam hìc Phereponus excogitat, nihil ad rem fecisset. Nam quotus quisque Hæreticus est, qui *Fidem Apostolicam* sibi non arroget ac tribuat? Se nempe cum Apostolis sentire omnes cum recentiores, tum veteres Hæretici, & vel ipsi pestilentiores dictitant & persuasum habent. Qua ita re cuncti omnes toto cœlo fallantur, ab ea tamen opinione vix removeri possunt. ità ut hæc sit omnium maxima inter nos atque Heterodoxos controversia, potius quàm aliqua veræ Ecclesiæ prærogativa in omnium oculos incurrens.

Quam-

Quamobrem inepta est, & ab Augustini mente aliena, Phe-  
reponi correctio.

Verum, inquit Censor, si Augustinus de Ecclesia per omnes  
terras sparsa hac intellexit, falsum est eam ab Apostolica Sede cul-  
men Auctoritatis obtinuisse; omnes enim norunt, Orientales Ec-  
clesias priores tempore fuisse, nec ullam auctoritatem ab ulla Oc-  
cidentalitrabere voluisse. Si quid Apostolica Sedes habuit Au-  
thoritatis, id promanavit ex communione, quæ ei fuit cum cæte-  
ris Ecclesiis Christianis, quæ omnes simul omnem suam potestatem  
Christo capiti debent. Tum addit, ne Africanas quidem Ec-  
clesias, tempore Cypriani & ipsius Augustini, Auctori-  
tem suam Romanæ debere voluisse, quamvis eam fortè  
matrem agnoscerent, ut sat liquet ex contentione cum  
Stephano, & ex altera de transmarinis Appellationibus.  
Porro vel hinc intelligere licet, quid livor & odium pos-  
sint in Criticorum animis. Utrique de Ecclesia Catholica  
hæc scribit Augustinus. In Ecclesia autem Dei per om-  
nes terras diffusa considerari potest duplex Auctoritas; al-  
tera veritatis, & sanctitatis; altera Jurisdictionis, & Regi-  
minis. Per priorem comparatur Ecclesia Catholica cum  
tot Hæreticorum & Gentilium gregibus. Veritas enim,  
& sanctitas ita sunt in Religione & Ecclesia Catholica, sive  
universali, ut ipsa non solum culmen Auctoritatis meritò si-  
bi vendicet supra cæteras Religiones, atque Ecclesias non  
Catholicas, sed etiam una ipsa vera sit & sancta, reliquæ  
falsitatis & impietatis officinæ. Per alteram Auctoritatem  
comparari potest una singularis Ecclesia Catholicorum  
cum altera Ecclesia itidem singulari Catholicorum. Ju-  
risdictionis nomine atque Regiminis intelligimus potesta-  
tem & jus explicandi sacras Literas, dirimendi controver-  
sias sive Fidei, sive Morum, conficiendi & ministrandi Sa-  
cramenta, constituendæ Disciplinæ, docendæ, & regendæ  
plebis. Exploratum habemus, postremam istam Auctori-  
tatem ab Ecclesiæ capite Christo, tanquam à fonte, per omnes  
Catholicæ communionis Ecclesias fluere. Quod esse verum  
non cessat, quamvis illam, non immediatè, sed mediatè,  
hoc est per Apostolos, per Successores Petri, per alios E-  
piscopos, atque Ecclesias, emanare in posteros, & in alias  
Ecclesias dicamus. Et ejus quidem portionem maximam  
immediatè à Deo in Episcopos descendere, Catholici ferè  
omnes fatentur. Cæterum partim ex institutione divina, &  
ex vi Ordinis Hierarchici, partim ex disciplinæ legibus,  
majorem habent Auctoritatis portionem Episcopi, quam  
Presbyteri; & majorem unus Episcopus, aut una Ecclesia,  
quàm

quàm alter Episcopus, & altera Ecclesia. In Romanis autem Pontificibus, licuti legitimis Petri successoribus, maxima & potissima residet Auctoritas, quæ tamen suis finibus & Disciplinæ statutis se circumscribi patitur, neque legitimæ reliquorum Episcoporum *Auctoritatis* officere vult, aut quidquam detrahere. Quare à Pontifice Romano, cui non solum honoris, sed etiam potestatis primas cum Christus, tum Catholici omnes detulerunt, cæteræ Ecclesiæ in multis pendent, ejusque *Auctoritatis* in multis cedendum & obsequendum noverunt atque fatentur, uti apud Ecclesiæ Patres, ac Theologos amplissimè patet.

Phereponus noster, suspicatus Augustinum de *Auctoritate* secundi generis loqui, in meridie cœcutiens, neq; Augustinum, neque rem ipsam intellexit. Proinde pro suo ingenio litem excitat aëream inter jura Apostolicæ Sedis, cæterarumque Ecclesiarum, istasq; contendit *Auctoritatem* suam ab illa minimè trahere. Quod etiam ut ostendat, rationes affert atque exempla, quibus qui moveatur, hebeti ingenio sit, & multa ignoret, oportet. Quem enim in finem Orientales, & Africanas Ecclesias homo iste producit, quæ tantum semper Apostolicæ Sedi supra se detulerunt, uti innumera antiquitatis exempla fidem faciunt? Quantum eidem detulerit gloriosus ipse Martyr Cyprianus, constat ex illius Scriptis. Quod si in controversia de Baptismo morigerum sese non præbuit Stephano Romano Pontifici: id fecit, quod alii fecere, ac faciunt, suarum opinionum nimis amantes; sed quo jure, quâ laude, tota demum Catholica Ecclesia ostendit, ejus sententiam proscribens. Controversia de *Appellationibus* ad Disciplinæ tribunal deferendo est, hoc est, ad Leges quasdam Ecclesiasticas sive Canones, quibus vel ipsi Romani Pontifices obnoxii sunt. Utcumque autem Africæ Episcopi iusta aut injusta persequerentur, plurimæ his de rebus fuere semper, & semper esse possunt controversiæ inter unam & alteram Ecclesiam, adeo ut una inferior Ecclesia causam obtinere potuerit, ac possit contra superiorem Ecclesiam, & contra ipsam Apostolorum Sedem. Porro hujusmodi victoria nihil potest detrahere potiori *Auctoritati* quam Romana Sedes supra singulas Ecclesias habet. Juvat autem credere, à Pherepono non vigilante ea verba excidisse: *Si quis Apostolica Sedes habuit auctoritatis, id promanavit ex communione, quæ ei fuit cum cæteris Ecclesiis Christianis.* Nam quid istis inconsultius? Si ex hujusmodi communione promanare potuisset *Auctoritas*: quænam Ecclesia Catholicorum vel reperiens, vel pusilla, imò

quis

quis Catholicorum sibi tantum non tribuisset ac tribueret *Auctoritatis*, quantum Apostolicæ Sedi, Romanisque Pontificibus semper fuisse, esse, ac fore apud nos constat? Ubinam verò tum foret Hierarchicus ordo, & *Auctoritatis* diversitas, siue à Christo, siue ab Apostolis, siue ab Ecclesia ipsa, inter Episcopos, & Ecclesias constituta? *Communio cum cæteris Ecclesiis* Catholicis nihil aliud præstat, quam ut Catholicus homo, & Ecclesia singularis, Catholica intra veram Ecclesiam sit, & vinculo fidei & caritatis cum reliquis membris uniatur. At illa nihil *Auctoritatis* confert. Aliunde maneat Episcoporum & Ecclesiarum *Auðoritas*, nempe ab institutione Christi, ac Apostolorum, à sacris Ordinibus, à Disciplina. Quidquid autem *Auðoritatis* Apostolica Sedes habet (amplissimam autem habet,) ab eo potissimum descendit, qui suprà Petrum fundavit Ecclesiam, & ipsi Petro ejusque successoribus pascendum gregem suum dedit, ipsique primatum in Ecclesia universa concessit.

Sed Phereponus cum ventis pugnat, & nos cogit secum longè ab Augustini mente vagari. Nihil de hujusmodi questionibus eo in loco Augustinus habet; idq; vel leviter attento Lectori patere continuò poterat. Nam cur Augustinus de *Auðoritate* secundi generis eà occasione loquatur, & jura Ecclesiarum singularium cum Apostolicæ Sedis juriſſibus conferat? Quid hoc ad rem, qua de agebatur? Contra Hæreticos erat prælium, atque ostendendum fuit, supra quamlibet aliam Religionem & societatem prævalere, culmenq; *Auðoritatis* obtinuisse Catholicam Religionem atq; Ecclesiam, ità ut dubitare nemo ampliùs deberet, se istius Religionis & Ecclesiæ gremio condere, cæterisque renuntiare falsis & impiis religionibus. Nihil hìc fecisset illa questio, an Apostolicæ Sedi suam *Auðoritatem*, atq; juriſſictionem cæteræ singulares Catholicorum Ecclesiæ deberent. Non Ecclesiæ Catholicorum inter se conferendæ erant, sed universalis Catholicorum Ecclesia conferenda erat cum omnium Hæreticorum Ecclesiis. Quamobrem constare facile potest, Augustinum dicentem, Ecclesiam Catholicam culmen *Auðoritatis* obtinuisse, nihil aliud intellexisse, quam *Auðoritatem* primi generis, h. e. *Auðoritatem veritatis*, per quam procul dubio Religio Catholica atq; Ecclesia quolibet Hæreticos post se relinquit, & falsi arguit. Talem *Auðoritatem* ex asse possidet quæcumque Catholica Ecclesia, neque ejus partem potiore una sibi tribuit, quàm altera. Non enim magis Orthodoxus est Roman. Pontifex, quàm quilibet alius Episcopus, aut etiam quilibet alius homin-

culus, dum tamen & isti cum Ecclesia Catholica sentiant, & cum ipsa communionem seruent. Neque propriè *Auctoritatem* istam ab *Apostolica Sede* trahunt reliquæ Catholicorum Ecclesiæ, multo que minus ipsamet Ecclesia universalis, in qua est ipse Rom. Pontifex; sed à Christo, sed à Revelatione divina, quæ certos nos facit, ab una Religione & Ecclesia Catholica veritatem stare, errorem verò à cæteris societatibus, quæ sibi nomen Religionis usurpant.

Quid ergo Augustinus innuere voluit, cum dixit, Ecclesiam ab Apostolica Sede *culmen Auctoritatis* obtinuisse? Ad cognoscendam veram Christi Ecclesiam, de qua sæpè disputatum est, & adhuc disputatur adversus Hæreticos, ea semper Nota præter alias præsto fuit, ac erit, legitima videlicet in Ecclesiis Catholicis *Episcoporum successio* ab Apostolis ad ea usque tempora, quibus disputatur. At quandoquidem Romana Sedes cæteris antistat, suamque originem in dubitatione ducit ab Apostolorum Principibus: hinc Episcoporum in Romana Sede *successio* potissimum consideratur, & pro veræ Ecclesiæ Nota accipi consuevit. Quæ enim vera sit Christi Ecclesia, quæ nullos, aut nos veros habet Pastores, & Episcopos? Illi autem certè alii & illegitimi Pastores sunt, qui à nemine idoneo Pastore aut ordinationem, aut missionem, aut successionem trahunt, qui non intrarunt per ostium, neque ad Apostolos per legitimam genealogiam referre possunt potestatem, quam usurpârunt. Contrà nihil vel apud veteres evidentius erat, quàm Apostolicæ Sedis Antistites ab Apostolis per legitimam successionem atque ordinationem descendere: quare in Romana Ecclesia manifestè aderat ea veræ Ecclesiæ Nota, quæ olim desiderabatur in omnibus Hæreticorum conventiculis & adhuc desideratur in Hæreticis nostrorum temporum. Cum Apostolica Sede reliquæ Ecclesiæ Catholicæ tum doctrinæ tum Sacramentorum communionem servabant. Omnes autem simul conficiebant Ecclesiam Catholicam, five universalem, veram Christi sponsam, cujus veras & evidentes notas ne Hæretici quidem poterant negare.

En igitur quod Augustinus ait: Dubitabimus ne ejus Ecclesiæ atque ejus Religionis nos condere gremio, in qua tantum auxilium Dei, tantum profectum fructumque videmus? quam totus terrarum orbis secundum Christi promissa confiteretur? quæ cum Apostolica Sede semper consentit, atque consentit, legitimamque Episcoporum successionem in Cathedra Petri manifestissime ostendit? & quæ Hæreticis, partim plebis ipsius judicio, partim Conciliorum gravitate,



tate, partim etiam miraculorum maiestate, damnatis, culmen Auctoritatis, hoc est Auctoritatem veritatis, supra cæteras hominum societates obtinuit? Quod hic Augustinus habet, alius in locis habet; ut mirum sit Phereponum tam stupinè hic egisse. In Lib. contra Epistolam fundamenti Cap. 4. ita ille scribit: *In Ecclesia Catholica gremio me iustissimè tenet ab ipsa Sede Petri Apostoli, cui pascendas oves suas post resurrectionem Dominus commendavit, usque ad præsentem Episcopatum successio Sacerdotum.* In Ep. 161. nunc 53. contra Donatistas: *Si, inquit, ordo Episcoporum sibi succedentium considerandus est, quanto certius & verè salubriter ab ipso Petro numeramus, cui totius Ecclesiæ figuram gerenti Dominus ait: Super hanc petram ædificabo Ecclesiam meam, & portæ inferorum non vincunt eam? Petro enim successit Linus, Lino Clemens, &c. Et in Psalmo contra partem Donati: Numerate, ait, Sacerdotes vel ab ipsa Petri Sede, & in ordine illo Patrum, quis cui successit, videte. Ipsa est petra, quam non vincunt superba inferorum portæ.* Augustino præverant in hocce argumenti genere non solum Optatus Milevitanus, & Epiphanius Augustini æqualis, sed vetustissimus etiam Irenæus, qui Hæreticis frustra sollicitatis, ut originem Ecclesiarum suarum, successionemq. Episcoporum ab Apostolis ostenderent, Romanæ postea Ecclesiæ Antistites numerant ab Apostolo Petro ad sua usque tempora legitimè alterum alteri succedentes.

Sed quando placuit Pherepono Tertullianum huc advocare, hic ipse antiquissimus Scriptor Augustinum explicet. Inquit ille in Lib. de Præscript. c. 32. *Edant ergo Hæretici origenes Ecclesiarum suarum. Evolvant ordinem Episcoporum suorum, ita per successiones ab initio decurrentem, ut primus ille Episcopus aliquem ex Apostolis, vel Apostolicis viris, qui tamen cum Apostolis perseveraverit, habuerit auctorem & antecessorem. Hoc enim modo Ecclesia Apostolica census suos deferunt: sicut Smyrnæ ad Ecclesia Polycarpum ab Joanne conlocatum referet: sicut Romanorum, Clementem à Petro ordinatum: itidem &c. Constringant tale aliquid Hæretici. Videat igitur Lector, quàm nullâ necessitate, nullâque ratione Phereponus illum Augustini locum per se clarissimum, & cum tota antiquitate, imò cum aliis Augustini locis consentientem, sibi corrigendum sumpserit. Animadvertat etiam velim, Romanam Ecclesiam alibi, h. e. in Epist. 104 nunc 191. & 105. nunc 194. antoninastice appellari Apostolicam S. dem. Cæterum modestus hic Censor non ita sibi fidit, ut huiusmodi telum sibi à nullo eripiendum esse arbitretur. Quare pugnam & arma mutat adversus ipsam Apostolicam Sedem. Quod si (denuò addit)*

*Augustinus omnino scripserat Apostolicam Sedem : Quid si (deum addit) voluit Manichæos Afros adducere ad Ecclesiam Catholicam Africanam, quæ consensiebat cum Sede Romana. Sed id argumentum levisus ; nam quis promiserat Ecclesiis Apostolicis, nunquam eas à Christi doctrina aberraturas ? Nemo. Si petatur, an omnibus Ecclesiis Apostolicis quisquam singillatim promiserit immunitatem ab erroribus in doctrina Christi, nos quoque respondebimus : Nemo. Et hanc veritatem non arbitror Augustinum expectasse, ut nostris temporibus à Pherepono edoceretur. Sin autem quæratur, an eandem immunitatem pollicitus quisquam fuerit Apostolicæ Sedi Romanæ ; non est hujus loci illa quæstio. Adhuc enim extra chorum saltat Phereponus, & controversiæ statum ignorat. Non, inquam, ab Augustino tum quærebatur, an ex præcipuo Christi munere Apostolica Romana Sedes à doctrina veræ fidei nunquam aberratura fuisset ac esset. Ostendebat ille, Catholicam Ecclesiam esse verum Christi ovile, quòd omnes in eam Notæ concurrerent, per quas vel ab imperita plebe dignosci potest vera Christi Ecclesia. Ex his Notis ea conspicua fuit, quod Hæreticis legitima Episcoporum successio ab Apostolis usque non esset ; contra esset Ecclesiæ Catholicæ, uti constabat exemplo Apostolicæ Sedis, quacum reliquæ omnes Ecclesiæ Catholicæ sentiebant atque communicabant, tanquam cum unitatis centro, & Ecclesiarum omnium Principe Ecclesia. Ecclesiæ itaque Catholicæ omnes (inter quas Apostolica Sedes præcipuis prærogativis eminebat,) non hac solum Notâ, sed aliis etiam veræ Ecclesiæ Notis instructæ, eam Catholicam Ecclesiam constabant, & apertè indicabant, in qua una est veritas atque hæreditas Christi, & contra quam Inferorum portæ nunquam prævalebunt. His Notis destitutæ Hæreticorum Ecclesiæ, non nisi officinæ mendacii appellandæ fuerunt.*

Porro Phereponus, cujus plurimum interest suum Hæreticis impertiri patrociniū, tanquam levia argumenta contemnit judicium plebis, Conciliorum gravitatem, & miraculorum majestatem, quibus Augustinus ait damnatos fuisse Hæreticos. Concilia enim (ut ipse nos monet) & plebis consensus, *tam falsis favere possunt, quàm veris.* Quod est ad consensum judiciumque Christiani populi, si cum gravibus quibusdam circumstantiis & qualitatibus jungatur, firmissimum etiam potest esse veræ doctrinæ, germanæque Traditionis, indicium. Cùm nempe quispiam in Ecclesia Dei novæ & inaudita dogmata venditare inci-

incipit, quæ ipsemet populus contraria deprehendit sententiis à Majoribus acceptis, & omnium consensione dudum sacratis. Tunc à doctrina Christi & Apostolorum abhorre nupera illa inventa, plurimum persuadet populo-  
rum ipsorum consensus eadem execrantium, eorumque propolas unâ voce damnantium. Nisi enim populus Christianus aliquâ novâ superstitione imbutus demonstretur (quod vix generaliter accidere potest: ) illû per se antiquitatis, veterisque Traditionis tenacissimum, & novitati infensum esse, quotidiana experientia docet. Vix Paulus Samosatenus pestilentissimam, suam Hæresim exeruit, cùm Antiochenus populus in ipsum ejusque insaniam exarsit; neque enim sentire non poterat, quantum ab antiqua & communi Christi doctrina, sibi à primis annis tradita, abesset Samosateni fermentum. Quid autem est, quod in Arii quoque & Nestorii sententiam consentire volebat Christianum vulgus, imò eandem aversabatur atque damnabat, quanquâ multos è suis Pastoribus in adversis castris militare videret, nisi quia menti omnium infidebat aliud ab Ariano ac Nestoriano dogma, & alia omnino contraria Traditio? Cur concoquere initio Christiana plebs minimè potuisset hominum illorum doctrinam, si eam à Pastoribus dudum antea accepisset atque imbibisset, tanquam Orthodoxæ Fidei & veritati conformem? Certè Arianâ labe infecti Episcopi errorem dissimulare & fraudibus obtegere cgebantur, ne fidelium animos à se abalienarent, unde celebre illud Hilarii dictum, *sanctiores fuisse aures plebis, quàm corda Sacerdotum*: quæ verba etiam à Hieronymo repetuntur contra Joannem Hierosolymitanum. In his igitur casibus à judicio & consensu Christiani populi maximum pondus accedit Hæreticorum damnationi. Ad Concilia Catholicorum, quod attinet, jam vidimus, quanta sit, si ritè habeantur, eorum auctoritas adversus Hæreticos, cùm potissimum generalia sunt, & universam Ecclesiam repræsentant, quam stabilem æternum futuram, & nunquam in vera doctrina erraturam apertissime pollicitus est Christus. Hæc Augustino memorantur; hæc veris favere possunt, non falsis. Sed Phereponus & Hæretici nullos in rebus Fidei Judices amant, nam cùm eruditionem tantum suam, & sacras Literas in his rebus judices volunt, suum simul arbitrium fallacemque intellectum judices volunt. Eruditio est ipsis ferè Hæreticis, aded inter se discordibus; est & Catholicis. Sacras Literas in suam sententiam quisque interpretatur, hominumque infirmitate, atque malitiâ, possunt hi soli judices tam veris

favere, quàm falsis. Proinde iudices alii necessarii sunt Ecclesiæ Dei ad puritatem, veritatem, atque unionem doctrinæ tuendam. Nisi alios Iudices Christus dedisset, minus quàm ipsi homines, hominum & rerum publicarum Legislatores, suæ Ecclesiæ cavisset: minus prospexisset novi fœderis, quàm veteris regimini. Quodd si temerarius & demens foret, qui ideo in humanis rebus civilibusque controversiis Iudicem quemvis detrectaret, quodd omnis humanus Iudex tam veris favere possit, quàm falsis: quantum gravius delinquet ille, qui acquiescere suo potius iudicio velit in æternæ salutis negotio, quàm Catholicorum Conciliis ritè habitis, aliisque legitimis Ecclesiæ Iudiciis à Christo constitutis, quibus adfuturum esse Spiritum veritatis ad finem usque mundi novimus?

## CAPUT XI.

*Miracula in Ecclesia Dei patrata, à Novatoribus, & à Pherepono in dubium revocantur. Excessus prudenti Catholicos fugiendi in iis credendis. Miracula quadam certissima fuere. Stratagemata & fucus iniquè appellantur à Pherepono, cujus Sophismata in hanc rem exploduntur. Augustinus mendacio infensissimus; & Phereponi calumnia contrarium insinuantis. Nulla impostura nota, & omnia veritatis signa confluunt in miracula ab Ambrosio & Augustino narrata. Cæci Mediolanensis sanati ad Reliquias Sanctorum Gervasii & Protasii Historia expeditur ab æreis Phereponi objectionibus. Ambrosius in ea narratione fide dignissimus. Dæmones ab obsessis corporibus reverà depulsi. Phereponus sacras Literas per latus oppugnat.*

**M**iraculorum quoque majestate damnatos Hæreticos Augustinus ait. At ista pariter pro nihilo Phereponus ducit. En potentissimam rationem, cur ea Criticus noster exhibilet. *Hæc, inquit, illo ævo stratagemata erant Ecclesiastica, quibus plebecula fucus fiebat.* Ingeniosam profecto methodum, quæ se ab adversariis citò litigator expediat. Quando rationes urgent, nullusque alius exitus datur, facta ipsa, quanquam luce clariora, negantur. Inficiari  
non

non audebat Phereponus, quin solidissimum veritatis re-  
 ctæque fidei argumentum sint miracula; non enim Deus  
 pro errore mirabilia operatur, utpote qui decipere nos ne-  
 que possit, neque velit. Catholica Ecclesia miraculis etiam  
 (quod Hæreticis non contingebat) suam fidem tuebatur.  
 Ergo ab Hæreticorum patronis res ipsa neganda fuit. Et  
 quidem nihil dissimulem, non unus est Phereponus, qui  
 Ecclesiæ Catholicæ miraculis fidem detrahere conetur.  
 Socios in eo studio habet, quotquot à Catholicorum  
 communione discesserunt. Neque hunc unum locum e-  
 legit ille, quo miraculis, & Augustino miracula proferen-  
 tiæ memoranti, litem intenderet. Aliis in locis idem  
 præstitit Phereponus; neque ullam abire passus est factam  
 ab Augustino miraculorum mentionem, quam non irri-  
 deat aut carpat. Immo vir, cætera imitari solitus Eras-  
 mum suum, præterquam in sarcasmis, Comicoque genio,  
 frenos tamen severitatis tum excutit, cum ventum est ad  
 Sermonem Augustini 322. quo Pauli cujusdam ejusque  
 sororis curatio narratur ad Sancti Stephani Reliquias. Ex  
 hujusmodi narratione Comœdiam Ecclesiasticam confla-  
 vit lepidus Censor, eamque in suos Actus partitus est, tan-  
 tumque sibi postea propter ejus fabulæ inventionem pla-  
 cuit, ut suas in Augustinum Animadversiones in Biblio-  
 theca selecta ipse recensens, vix à sibi plaudendo tempera-  
 re potuerit.

Quæ sit prudentum Catholicorum sententia de mira-  
 culis, primo videamus. Fuerunt, ac æternùm erunt in ve-  
 ra Ecclesia Dei miracula vera, quæ Deus operatur per San-  
 ctos suos. Si ista cum aliis veræ Religionis atque Ecclesiæ  
 Notis conjungantur, Orthodoxæ Fidei sunt fidissimi te-  
 stes. At neque fidelibus exigenda sunt, sive quærenda; non  
 enim amplius iis indiget vera Fides & Ecclesia, ut suam ve-  
 ritatem ostendat. Neque supranaturali fide ullum crede-  
 re cogimur ex iis miraculis, quæ extra Canonicas Scriptu-  
 ras ab Historicis, sanctissimisque etiam Viris referuntur.  
 In hoc autem negotio duplex animadverti potest exces-  
 sus: alter eorum, qui nimis multa; alter eorum, qui ni-  
 mis pauca credunt. Judicio illi, temeritate isti peccant.  
 Nam exploratum est, fuisse olim, & adhuc esse, imò eo-  
 rum sobolem diu duraturam, qui miracula confinxere, si-  
 ve pravum, sive bonum in finem; aliisque plures fuisse,  
 qui sine ullo criterio atque indiscriminatim tam veris  
 quàm fictis mirabilibus adjunxere fidem, eaq; ad posteros  
 bonâ fide transmiserunt. Tum crimini, tum nimis cre-

486 DE INGENIORUM MODERATIONE  
favere, quàm falsis. Proinde iudices alii ne- cessarii sunt  
Ecclesiæ Dei ad puritatem, veritatem, atque unionem do-  
ctrinæ tuendam. Nisi alios Iudices Christus dedisset, mi-  
nus quàm ipsi homines, hominum & rerum publicarum  
Legislatores, suæ Ecclesiæ cavisset: minus prospexisset  
novi fœderis, quàm veteris regimini. Quod si temerarius  
& demens foret, qui ideo in humanis rebus civilibusque  
controversiis Iudicem quemvis detrectaret, quod omnis  
humanus Iudex tam veris favere possit, quàm falsis: quan-  
tò gravius delinquet ille, qui acquiescere suo potius judi-  
cio velit in æternæ salutis negotio, quàm Catholicorum  
Conciliis ritè habitis, aliisque legitimis Ecclesiæ Iudici-  
bus à Christo constitutis, quibus adfuturum esse Spiritum ve-  
ritatis ad finem usque mundi novimus?

---

## C A P U T X I.

*Miracula in Ecclesia Dei patrata, à Novatoribus, & à Phe-  
repono in dubium revocantur. Excessus prudenti Catholi-  
co fugiendi in iis credendis. Miracula quadam certissima  
fuisse. Stratagemata & fucus iniquè appellantur à Phe-  
repono, cujus Sophismata in hanc rem exploduntur. Augu-  
stinus mendacio insensissimus; & Phereponi calumnia con-  
trarium insinuantis. Nulla impostura nota, & omnia ve-  
ritatis signa confluunt in miracula ab Ambrosio & Augu-  
stino narrata. Cæci Mediolanensis sanati ad Reliquias  
Sanctorum Gervasii & Protasii Historia expeditur ab æ-  
reis Phereponi objectionibus. Ambrosius in ea narratione  
fide dignissimus. Demones ab obsessis corporibus reverà  
depulsi. Phereponus sacras Literas per latus oppugnat.*

**M**iraculorum quoque maiestate damnatos Hæreticos  
Augustinus ait. At ista pariter pro nihilo Phereponus  
ducit. En potentissimam rationem, cur ea Criticus noster  
exhibilet. *Hæc, inquit, illo ævo stratagemata erant Ecclesiasti-  
ca, quibus plebecula fucus fœbat. Ingeniosam profecto me-  
thodum, quâ se ab adversariis citò litigator expediat.  
Quando rationes urgent, nullusque alius exitus datur, fa-  
cta ipsa, quanquam luce clariora, negantur. Inficiari*  
non

non audebat Phereponus, quin solidissimum veritatis rectæque fidei argumentum sint miracula; non enim Deus pro errore mirabilia operatur, utpote qui decipere nos neque possit, neque velit. Catholica Ecclesia miraculis etiam (quod Hæreticis non contingebat) suam fidem tuebatur. Ergo ab Hæreticorum patronis res ipsa neganda fuit. Ecquidem nihil dissimulem, non unus est Phereponus, qui Ecclesiæ Catholicæ miraculis fidem detrahare conetur. Socios in eo studio habet, quotquot à Catholicorum communione discesserunt. Neque hunc unum locum elegit ille, quo miraculis, & Augustino miracula proferenti ac memoranti, litem intenderet. Aliis in locis idem præstitit Phereponus; neque ullam abire passus est factam ab Augustino miraculorum mentionem, quam non irrideat aut carpat. Immo vir, cætera imitari solitus Erasmus suum, præterquam in sarcasmis, Comicoque genio, frenos tamen severitatis tum excutit, cum ventum est ad Sermonem Augustini 32. quo Pauli cujusdam ejusque sororis curatio narratur ad Sancti Stephani Reliquias. Ex hujusmodi narratione Comœdiam Ecclesiasticam conflavit lepidus Censor, eamque in suos Actus partitus est, tantumque sibi postea propter ejus fabulæ inventionem placuit, ut suas in Augustinum Animadversiones in Bibliotheca selecta ipse recensens, vix à sibi plaudendo temperare potuerit.

Quæ sit prudentum Catholicorum sententia de miraculis, primò videamus. Fuerunt, ac æternùm erunt in vera Ecclesia Dei miracula vera, quæ Deus operatur per Sanctos suos. Si ista cum aliis veræ Religionis atque Ecclesiæ Notis jungantur, Orthodoxæ Fidei sunt fidissimi testes. At neque fidelibus exigenda sunt, sive quærenda; non enim amplius iis indiget vera Fides & Ecclesia, ut suam veritatem ostendat. Neque supranaturali fide ullum credere cogimur ex iis miraculis, quæ extra Canonicas Scripturas ab Historicis, sanctissimisque etiam Viris referuntur. In hoc autem negotio duplex animadverti potest excessus: alter eorum, qui nimis multa; alter eorum, qui nimis pauca credunt. Judicio illi, temeritate isti peccant. Nam exploratum est, fuisse olim, & adhuc esse, imò eorum sobolem diu duraturam, qui miracula confinxere, sive pravum, sive bonum in finem; alióque plures fuisse, qui sine illo criterio atque indiscriminatim tam veris quam fictis mirabilibus adjungere fidem, eaq; ad posteros bonâ fide transmiserunt. Tum crimini, tum nimis creduli-

dulitati isti, se perpetuò opposuere sancti Patres, Romani Pontifices, Concilia sacra, & Ecclesia universa Danielis exemplo. Veritas enim falsitate ad sui tutelam non eget; & falsa facere possunt, ut apud suspiciosos homines auctoritatem vera quoque deperdant. *Numquid Deus indiget vestro mendacio, ut pro illo loquamini dolos?* aiebat sanctus Vir Job, XIII. 7. sed & alter excessus est, ideo veris negare fidem, quia falsis deprehenduntur immixta, & æquè stultum est nimis pauca, imò nulla credere certa. Si in alterutram partem peccandum est, pietas & prudentia poscit, ut ut potius periculo nos exportamus facta credendi, quam vera negandi. Interim iudicio Critico hinc opus est, & expendenda sunt omnia, ut quantum fieri potest, miracula germana à spuriis, certa ab incertis, vera à falsis distinguatur. Proinde hinc quoque præceptum Apostoli valet 1. ad Thess. V. 21. *Omnia probate: quod bonum est, tenete. Ab omni specie mala abstinete vos.*

Accedat nunc Phereponus, & dicat, suspecta sibi & conficta videri, quæcumque miracula à Catholicorum parte narrantur. In alterum sanè excessum se ille præcipitem dabit, priore peiorem, qui & facile irreligionem auditores agat, & ab ipsis severioris Criticæ legibus improbetur. In primis enim quis adeò desipit, ut omnem Religionem suspectam habeat, & ab hominibus excogitatam putet, quòd inter tot Religiones pleræque sint hominum commenta, imò propter unam omnes adulterinæ sint atque corruptæ, & non facile sit multis veram à falsis discernere? Quis omnia antiquitatis monumenta, quis omnia facta, quæ in Historiis cum profanis tum Ecclesiasticis narrantur, pro mendaciis habeat, quòd multa iis immixta sint dubia, conficta, & falsa? Recta itaque ratio nos docet, non ideo omnes miraculorum narrationes explodendas esse, quòd quædam, imò complures inter ipsas suspicionem falsitatis ingerant. Deinde veræ Ecclesiæ cultoribus spem & facultatem etiam miracula patrandi, cum Dei gloria posceret, à Christo ipso relictam fuisse, testis est Sanctus Marcus XVI. 17. *Signa autem eos, qui crediderint, hæc sequentur: In nomine meo Dæmonia ejicient, linguis loquentur novis, serpentes tollent, &c* ut alia Evangeliorum loca præteream. Hæc & alia mirabilia per servos suos, & per omne subinde ævum, reipsa operatum fuisse Deum, docti, pii, oculati viri testantur. Quid igitur causæ esse potest, quare in dubium revocemus, imò irrideamus, sine ullo discrimine, quæcumque miracula



*etula à Catholicis facta narrantur? Stratagemata, inquit Phereponus, hac erant Ecclesiastica, quibus plebecula fucus fiebat. In Notis verò ad Lib. 9. Cap. 7. Conf. Aug. ubi refertur Inventio corporum Sanctorum Protasii & Gervasii ita is loquitur: Si hæc, aliæque hujusmodi inventiones Sanctorum cada verum, non fuissent conjunctæ cum ingenti lucro, ac emolumento eorum, quæ ea effoderunt; multi, qui calidorum hominum figmenta hæc credens ad plebeculam in officio continendam, fidem eis non facile detraberent. Tum animadvertit, ex hac inventione auctam existimationem auctoritatẽque Ambrosii, & Arianos eorũque patronam Justinam Augustam his miraculis fuisse repressos. In Notis etiam ad Epistolam 78. Sancti Augustini pag. 492. eadem recinit, ac ait: Ne quid mentiar, quanta mihi facta est fides de miraculis Christi & Apostolorum, quæ omnia veritatis indicia comitantur; tanta est de recentioribus diffidentia, cum præsertim superstitioni, & lucro, multo magis, quàm veræ virtuti propagandæ, ea servisse videam. Pappia habet pag. 594. Animadv. ad Lib. 22. Cap. 8. de Civ. Dei.*

Potissima itaque ratio, cur miracula ista Pherepono, ejusque gregariis, suspecta sint, & imposturis accenseantur, ea est, quod non sine ingenti lucro atque emolumento Auctorum fierent. Verum, si tanta vis huic argumento inest, quantam opinatur Phereponus, videat ille, qui à suspitione falsi vindicare jam possit tot miracula, quæ in Libris Canonicis, & veteris potissimum Testamenti, habentur. Vix ullum ex iis dabit ille, quod in aliquam utilitatem cedere non potuerit sive Auctorum, sive Historicorum: cum si non aliud, existimatio atque auctoritas cresceret aut ea patrantibus, aut ea pro sua Religione narrantibus. Et quis infidelis, Phereponiano ingenio, ejusque Criticæ armatus, bellum iis quoque miraculis intendere, & aut imposturæ ac impiorum stratagematum arguere non possit eorum Auctores, aut mendacii nimixve crudelitatis eorum Scriptores? Quantum vult ille clamet, se in Christi & Apostolorum miraculis omnia veritatis indicia reperire impedire non poterit, quin & in iis, & præcipue in narrationibus mirabilium antiquæ Legis, fraudem Ethnicus suspicetur, ubi legitimum suspicandæ fraudis argumentum præbeant emolumentum quæsitum, existimationis, & gloriæ aucupandæ indicia, sive suspiciones. Equidem nolo vel uno exemplo iniquam incredulorum & perditorum hominum causam juvare; sed qui Phereponus non juvet suis incautis nimiumque audacibus argumen-

tationibus , non video. Si ergo Phereponus Christianus est , à Christianorum miraculis improbandis absteineat eâ solâ temeritatis plenâ ratione,quodd ista in lucrum, aliâque emolumenta Sacerdotum vergerent. Non patitur honestas & ratio , ut sine magna causâ alienam famam atque conscientiam, tanti criminis, tantæque ignominix nota aut superstitione aspergamus. Quantò autem minus in Ambrosium & Augustinum ( quos solos nominatim Phereponus hic insectatur , & nos tueri solos volumus ) temeraria ista suspicio cadere potest ? Gravissimi ac sapientissimi viri erant. Certabat in iis cum pietate eruditio. Ignorare non poterant ; quantum flagitium in oculis foret , quantum Religioni periculum adduceret,imposturis operam dare.& mentiri,& fallere populos,quanquam pro vera doctrina confirmanda id fieret. Quæ verisimilitudo, ipsos adhuc navasse fraudibus , & dedita opera gregem sibi à Deo creditum fictis alerent prodigiis in tanta luce veritatis?

Hic tamen nos interpellat Phereponus,& pag. 559. Animadv. significat nobis, *mendacii tam inimicum non fuisse Augustinum, quàm volebat videri* Quam thesim statuit ille. postquam magnâ confidentiâ in deterio rem partem accepit quædam Augustini verba , laudantis in Enchiridio Cap. XXI. *benevolentiam*, non autem damnantis *fallaciam eorum* , qui pro salute hominis mentiuntur. Ad quæ Censor itâ scribit : *Videtur Augustinus loqui de salute eterna, ad quam nonnullis conciliandam multi tunc temporis mentiebantur, innumeris miraculis confectis, eum, ut dicebant, dumtaxat in finem, ut infideles ad fidem adducerentur. Eos non laudat Augustinus, sed facile iis ignoscit: quodd frequens, ut quidem videtur, malum esset inter Ecclesiasticos homines illius ævi.* At patiat Phereponus, nos hæc appellare, modesto planè vocabulo, interpretationes hominis parum attentò legentis, atque scribentis. Temporariam hominis salutem , non autem aternam hic intelligit Augustinus. Si hanc, ut Phereponus suspicatur, designare ille voluisset, non pro salute hominis, sed pro salute Hæreticorum, aut Hæreticorum, aut Infidelium dixisset, aut saltem non omisisset salutem appellare aternam. Apertè verò de mortali vita aliorum servanda se hic agere Augustinus innuit, cum utatur exemplo adulterii, quod peccatum esse non desinit, quanquam aliqua, nisi ad hoc ei consentiatur, appareat amando moriturus, ut ostendat, ne mendacium quidem licere, quanquam pro salute quorundam mentiamur. Hæc autem convincunt cum iis quæ de servanda hominis vita per mendacium, habet vir  
san-

sanctus in Lib. de Mendacio Cap. XIII. Deinde, quis ex istis aliisve Augustini verbis, nisi reclamante ratione, argumentari possit, Augustinum tam inimicum non fuisse mendacii, quàm volebat videri? Nemo se mendacii Augustinò magis infensum prodidit nemo doctius ipso, nemo acrius, nemo religiosius mendacia insectatus fuit, & peccata esse demonstravit, uti ejus Libri omnino testantur. Et quod spectat ad Mendacia, quæ ut Infideles ad Fidem adducerentur, tolerabilia visa fuisse Augustinò Phereponus sibi persuadet: eadem ipsa Augustinus apertè execratus est, & fugienda suavit. In Lib. contra Mendacium Cap. I. *Quid est dicere, inquit; mentiamur, ut Hæreticos mendaces ad veritatem adducamus, nisi faciamus mala, ut veniant bona?* Tum toto Libro id unum satagat, ut ostendat, nefas esse mentiri, quò consulatur æternæ hominum salutis. Imò omnium mendaciorum ea statuit esse gravissima, quæ pro Religione, & in Religione sunt. *Viderint, inquit Cap. 18. assertores defensorésque Mendacii (resilli cum Priscillianistis erat), quale genus vel qualia genera mentienti eos justificare delectet. Saltem in Dei cultu concessant non esse mentiendum; saltem ubi Dei nomen, ubi Deus testis, ubi Dei sacramentum interponitur, ubi de divina Religione sermo promittitur, sive confertur: nemo mentiamur nemo laudet, nemo doceat, & præcipiat, nemo iustum dicat esse mendacium.* Eandem doctrinam in altero Opere de Mendacio non minùs dilucidè ac nervosè tradit Cap. 10. ostendens, in rebus fidei locum esse non debere mendacio; & præter cætera hæc habet: *A doctrina Religionis atque ab eis omninò enuntiationibus, quæ propter doctrinam Religionis enuntiantur, cum illa docetur, & discitur, omnia penitus mendacia removenda sunt. Nec ulla omninò causa inveniri posse credatur, cur in rebus talibus mentiendum sit, quando nec ideo in ea doctrina mentiendum est, ut ad eam ipsam quisque faciliùs perducatur. Fracta enim vel leviter diminuta auctoritate veritatis, omnia labia remanebunt.*

Quàm vellem, hæc potiùs tam clara tam aperta considerasset Phereponus, ut quæ vera fuerit Augustini sententia, sibi constaret, quàm in dubiis illius verbis alienissimam ab Augustinò doctrinam exquisisset. Infra verò Cap. XIV. recenset S. Doctor varia mendaciorum genera, omnium quoque gravissimum vocat, quod Religioni obest. *Primum est ad evitandum capitale mendacium (sunt ejus verba) longèque fugiendum, quod fit in Doctrina Religionis, ad quod mendacium nullà conditione quisquam debet adduci.* Et Cap. XXI. idem repetit inquiens: *Ad sempiternam salutem nullus audentis est. pitulante mendacio. Non enim malis convertentium moribus ad honores*

*mores convertendus est.* En pura, en germana Augustini dogmata. Ità discipulus sentiebat, quin idem senserit & Ambrosius illius magister, non est dubitandum. Quare si velimus, tantos viros miracula confinxisse, & quidem in lucrum ac utilitatem propriam, quo nihil turpius excogitari potest: necesse & ipsos mortalium & Christianorum perditissimos, & hypocritas, & Religionis in speciem tantummodo cultores prius credere. Hæc enim universa nomina in eos conveniunt, qui tantum pro Religione studium præ se ferentes, nihil postea pensi habebant, mendaciis & imposturis operam dare, idque in sui commodum ac utilitatem facere, & Religionem præsentissimo periculo exponere, & fallere populos, ac ad superstitionem adducere, & nulla deinde ad errores populi à se corrupti auferendos, fraudis ac poenitentiae suæ vestigia relinquere, & quidem pro crimine, quod ipsi certè non ignorabant capitale, plebique perniciosissimum, sibi que à Deo sine publica poenitentia minime condonandum. Verùm quis ex meris tantum suspitionibus fallacibusque conjecturis tam abominanda ac inusitata opinetur de viris, quos nulla non admirata est ætas, doctrinâ pariter ac solidissimis virtutibus, & sanctissimo potissimum Religionis zelo, conspicuos atque spectatissimos? Quænam Criticæ Leges iniquissimis hujusmodi opinionibus faveant, equidem non video. Imò totus Criticorum chorus clamet, incredibile planè esse, hoc hominum gravissimorum genus in ea vitia deflexisse, atque ad eas artes se contulisse, quibus hominum deterrimi impiè sibi lucrum comparant, & Religionem produnt. Numquid verò hisce dolis indigebat Ambrosius *plebeculam in officio continendam*, uti Pherepon. ait? Ab ore Ambrosii totus populus Mediolan. pendebat, seque paratissimum ad dandum pro Fide Majorum servanda jugulum non semel ostenderat. Multoque minùs ad auctoritatem, atq; existimationem suam, Fidemq; Catholicam protegendam, atq; augendam hæc figmenta sibi concinnanda censuit Ambrosius. cum tanta existimatio atque auctoritas illi esset, ut ei propterea apud Imperatorem invidiam quotidie facere non cessarent Ariani. Deinde vir intrepidus, & invictâ constantiâ celebris, & mori, quàm fœdari, toties paratus, ut sese atque Ecclesiam florentissimam minis Hæreticorum eriperet, ad execrandum illud stratagemam nunquam confugere sustinuisset.

Accedit, quod miracula ab Ambrosio atque Augustino memorata nullas imposturæ notas secum adferunt; imò tot habent veritatis indicia, ut quando ea falsi postulare

aut suspicari liceat, nihil certi jam superfit in humana divi-  
 náque Historia, nihil quod fraudem & mendacium redo-  
 lere non possit. Divino monitu revelata sunt Ambrosio sa-  
 cra corpora Gervasii ac Protasii. Jussit ille in media Basilica  
 ante cancellos Sanctorum Felicis atque Naboris eruderari  
 terram, formidantibus Clericis, ne spes Ambrosii frustraretur.  
 Signa Martyribus conventia apparuerunt; deinde ipsa  
 Martyrum ossa, & sanguinis plurimum in ipso tumulo.

Cum sacra pignora transferrentur cœcus *civitatis Mediolanen-  
 si* notissimus visum, debiles non pauci salutem, ad con-  
 tactum sanctorum vestium recuperarunt, pulsiq; dæmones  
 de multorum corporibus. Totâ legatur Epist. Ambrosii 22.  
 ad Marcellinam sororem Classe I. & ubi affectus absint, ni-  
 hil à stratagemate ac fraude remotius apparebit contra  
 quam Censori videatur. Cæterum non dissimulabo, Aria-  
 nos tum temporis ad eâ evidenti luce perculsos, eâ statim  
 confugisse, ut & Martyres & miracula negarent. Facile va-  
 luit apud nostrorum temporum Novatores eorum calum-  
 nia, cum nempe statutum fuit Sanctorum reliquiis denun-  
 tiare bellum. Multo plus etiam valuit apud Pherepon, qui  
 Arianos ipsos eorumque dogmata sibi cordi plurimum  
 esse non semel prodidit. Sed juvat hic tantisper immorari,  
 dum aliqua saltem ex parte palam fiat, quàm sine ratione ac  
 pudore nunc instauretur vetusta ejusmodi canticio.

*Protasii & Gervasii Martyrum ut nomina, ita etiam sepulchra  
 incognita erant, in tantum ut supra ipsorum sepulchra ambulare non  
 omnes, qui vellent ad Cancellos Sanctorum Naboris & Felicis per-  
 venire. Utor verbis Paulini illius, qui Ambrosii vitam me-  
 moriæ prodidit, & oculatus omnium testis fuit. Illic ergo  
 reperta sunt sacra corpora. ubi fraus præcedere nisi difficil-  
 limè non potuit. Nam quis loci superficiem non noverat, ac  
 sæpè vestigiis terebat? quis dum eruderari terram cerneret,  
 signa aliqua imposturæ non collegisset? Clero ac populo  
 præsentè peracta sunt omnia. Subsecuta deinde miracula  
 Ambrosius his refert verbis, concionem ad populum ha-  
 bens: Cognovistis, imò vidistis ipsi multos à dæmonibus purgatos; plu-  
 rimos etiam, ubi vestem Sanctorum manibus contigerunt, iis, quibus  
 laborabant, debilitatibus absolutos; reparata vetusti temporis mira-  
 cula, quo se per adventum Domini Jesu gratia terris major infu-  
 derat; umbrâ quadam sanctorum corporum plerosq; sanatos cernitis.  
 Si quid sinceritatis ac bonæ fidei est, videat Phereponus,  
 qui negare ista possit. Oculis suis Mediolanensis populus  
 viderat tot ægros ac debiles pristinæ saluti divinitus resti-  
 tutos. Fidentissimè id palam Ambrosius repetit. Quis cre-  
 dat.*

dat, hæc omnia commenta, fraudes, ac illusiones fuisse? Num adeò stupidi ac bardi tum fuere populi, & ut sibi hæc obtrudi paterentur, & suosmet oculos miraculorum & curationum testes appellari audirent, quæ tamen ipsi nequaquam aspexissent? Num impudens adeò Episcopus, ut tantâ securitate coram tot testibus appellatis rem invisam visam pronuntiaret? Cæteris autem curationibus præstitit, ac illustrior fuit, uti dicebam, ab homine urbi amplissimæ notissimo depulsa cæcitas. Cùm sacra Martyrum corpora ( utar Augustini testis oculati verbis. Lib. 9. Cap. 7. Cont. ) *propalata & effusa digno cum honore transferrentur ad Ambrosianam Basilicam, non solum quos immundi vexabant spiritus confestim eisdem demonibus sanabantur, verum etiam quidam plures annos cæcus civis civitatisque notissimus, cum populi tumultuantis lætitiæ causam quæssisset, atque audisset, exiit, eoque se us duceret, suum ducem rogavit. Quò perductus, impetravit admitti, ut sudario tangeret phæretum, Quod ubi fecit, atque admovit oculis, confestim aperti sunt. Eadem repetit Aug. Lib. 22. C. 8. de Civ. Dei, illudque miraculum ait ad multorum notitiam potuisse pervenire, quia & grandis est Civitas, & ibi erat tunc Imperator, & immenso populo teste res gesta est, concurrente ad corpora Martyrum Protasii & Gervasii. Vide & Lib. de Unit Eccl. Cap. 17. At Ariani cæcum illuminatum negabant. Nempè homines in Catholicam Ecclesiam odio internecino excæcati, homines pauci numero præ immani Catholicorum testium multitudine, homines plerique in urbe Mediolanensi hospites, illuc ab Ariana Augusta perducti, qui cæcum hominem nequaquam aut non non satis perspectum habebant. Contrà Catholici innumeri, Civesque Mediolanenses, tot annos antea hominem probè agnoverant, viderant, aluerant cæcum &, luce ad Martyrum corpora repente donatum cognoscebant, videbant, affirmabant. Utri quæso parti fides adjungenda? Unquamne credibile sit, tantum populum, per tot annos, eaque potissimum occasione fuisse deceptum, ac tam diu credidisse aut cæcum, qui non erat, aut ei restituta lumina, quæ clausa tenebrisque obsita adhuc erant? Si hæc devorare queunt Hæretici, nescio quid in posterum credibile non sit, imò nescio quid amplius credendum sit.*

Porro audiamus quàm nervosè ac sapienter invidentiam Arianorum, & renovatam nunc calumniam Ambrosius ipse jam tum repulerit in laudata Epist. 22. Classe I. olim 54. *Negant, inquit, cæcum illuminatum: sed ille non negat se sanatum. Ille dicit: Video, qui non videt, ille dicit: Cæcus esse desivi, &*

*pro-*

*probat factum. Isti beneficium negant, qui factum negare non possunt. Notus homo est, publicis cum valeret mancipatus obsequiis, Severus nomine, lanus ministerio. Deposuerat officium, postquam inciderat impedimentum. Vocat ad testimonium homines, quorum antè sustentabatur obsequiis: eos indices suæ visitationis arcessit, quos habebat testes & arbitros cecitatis. Sub hæc opportunè Arianos Judæis comparat, pari impudentiâ calumniantibus atque negantibus evidentiâ Christi ac Apostolorum prodigia. Et profectò, postquam Phereponus ejusque sodales Ambrosiani cæci miraculum stratagemâ nuncupare fas putant, quomodo & increduli non idem quoque dicere sibi licitum arbitrentur de cæco Evangelico? Interrogabant, inquit Ambrosius, Judæi parentes, quomodo videt filius vester? Cum ille diceret: Cæcus cum essem, modò video. Interrogate alios, si mihi non creditis. Interrogate extraneos, ne ad stipulari mihi parentes putetis. Detestabilior istorum, quàm Judæorum pertinacia. Illi cum dubitarent, vel parentes interrogabant. Isti occultè interrogant, palam negant, jam non operi increduli, sed auctori. Verùm excusatione etiam minus digni sunt nuperi Hagiomachi, quàm veteres Arii & Eunomii sectatores. Isti enim recentiores post jam repressas evidentiâ rei illorum calumnias, ex putidis adhuc suspicionibus testatissima ea prodigia ludibriis & dolis accensere pergunt. Si locum fraus habuit in illa Inventione, in iis Martyribus, atque miraculis: quâ tam felix fraus esse potuit, ut detegi nunquam potuerit, eamque deprehendere nunquam licuerit Arianis præsentibus? Sinè multorum ope neque Inventio, neque miracula confingi potuere. Sinè totius populi conspiratione cæcus simulari non poterat subitâ oculorum luce donatus. Ariani tum rerum potiebantur; præsentibus erant; Imperatoris auctoritate in suæ hæresis patrocinium abutebatur præsens & ipsa Justina Augusta. Qui commodior locus, quodnam opportunius tempus, quò imposturam ac figmenta Ambrosii detegerent Ariani: atque æternâ ignominia Episcopum ejusque Ecclesiam operirent, suam verò fidem ab eo periculo vindicatam gloriosius extollerent? Poterant minis, tormentis, ac præmiis extorqueré veritatis confessionem à Severo, totq; aliis, quos ab Ambrosio pecuniâ corruptos dictitabant. Necessè est veritas & evidentiâ miraculorum longè fortiores fuerint, quàm Arianorum maligni conatus, atque calumniæ. Neque porro segnes in inquisitione rei ac testium fuerunt Hæretici. Isti occultè interrogant, palam negant, inquit Ambrosius. Immo tanta fuit vis & lux veritatis, ut factum ipsum negare ne*

496 DE INGENIORUM MODERATIONE  
re ne ipsos quidem Arianos potuisse, sanctus vir innuere videatur.

Quæ verò hætenus dicta, valere quoque debent pro tuenda veritate complurium aliorum prodigiorum, quæ sanctorum Martyrum & Confessorum ope variis temporibus peracta narrantur à gravissimis Episcopis, & oculatis atque incorruptis viris, & à prudentibus Historicis, quos neque ab ignorantia, neque à nimia credulitate, neque à pravis affectibus ad ea constringenda, temerèque credenda fuisse pertractos appareat. Non enim hic agitur de universis miraculis à censura vindicandis, quæ neque Ecclesiæ probavit, & quæ credere vel non credere nihil refert, & quorum non modicam partem ab hominibus nullius iudicii ac nominis, dubiæque ac subleste fidei, litteris proditam Catholici ipsi aut abjiciunt, aut sibi tam facile credendam non putant. Miracula tantum defendimus testatæ fidei, & ad sanioris Criticæ leges exacta. Ità nemo nisi petulans fidem illis prodigiis negabit, quæ Sanctus Augustinus in Lib. 22. de Civ. Dei refert, cum ex iis pleraque ab omni fraudis ac fabulæ suspitione longè absint. Alia contigisse miracula ad sanctorum tumulos atque reliquias, testantur Basilus, Gregorii duo, Nazianzenus & Nyssenus, Hilarius, Hieronymus, Chrysostomus, Isidorus Pelusiota, Basilus Seluciensis, Theodoretus, Maximus Taurinensis, Asterius Amasenus, Enzas Gazæus, ut innumeros alios Episcopos & Patres præteream. Rei seriem non ab incertis rumoribus, sed aut oculis suis ipsimet, aut ab aliis fide dignissimis testibus acceperunt. Tales Ecclesiæ procures mentitos hic omnes fuisse, & in imposturas consensisse; fidem omnem superat. Falsa ac temerè credita posteris narrasse, incredibile pariter est. Certè ab his erroribus atque criminibus suâ se auctoritate, doctrinâ, integritate vitæ, prudentiâ, ac zelo Religionis, facile ipsi defendunt, & iniquissimas Hæreticorum suspiciones avertunt.

Sed mihi temperare non possum, quin insigne illud argumentum commemorem, quo sibi visus est Pherseponus Historiam sanctorum Martyrum Protasii ac Gervasii enervare posse. Ait enim, ità Ambrosium rem describere, ut narrationem suspectam reddat. *Invenimus, inquit Ambrosius, mira magnitudinis viros duos, ut prisca ætas ferebat. Quæ verò ætas? Heroicane, postquam homines decrescere cœperunt?*

*Nam genus hoc viro jam decrescerebat Homero.*

*An etiam tribus sæculis, quæ à Christo nato ad Constantini tempora fluxerunt, grandioris erant statura homines, quàm quarto aut quin-*



*quinto seculo? An augustior erat statura Martyrum, quàm aliorum, aut major fiebat post mortem? Nemo, ut opinor, credet. At nemo etiam, ut opinor, non miretur, Phereponum Critices peritum, & non vulgaris ingenii hominem, tam levia nobis propinasse. Sed quid non facit litigandi prurigo? Quando solida argumenta desunt, verba saltem ac sophismata dentur. Ante annos propè mille, vates ille Homerus non cessavit minora corpora mortalium, quàm prisca, conqueri: sunt Plinii verba Lib. 7. Cap. 16. Nat. Hist. Id quoque Juvenalis à Pherepono citatus, Solinus, Phlegon, Sanctus Augustinus, aliique Scriptores memoriæ tradidère Virgilius etiam Lib. 12. Æneid. de ingenti saxo, quod Turnus in Æneam intorfit, hæc habet:*

*Vix illud lecti his sex cervice subirent,  
Qualia nunc hominum producit corpora tellus.*

Ea itaque opinio invaluerat, procerioris stature omnes ferè homines fuisse Heroicis, quàm subsequitis temporibus. Et fidem opinioni conciliabant corpora miræ magnitudinis subinde humi reperta, de quibus legendi Plinius ipse, Virgilius in Georg. Pausanias, Plutarchus, Gellius, & alii, imò recentiores etiam Scriptores, nam & proximè præteritis seculis eorum quædam deprehensa fuerunt. Aliqui, sed admodum rari, subinde vili, qui ad giganteam molem excreverent, iique idcirco præcæ ætatis hominibus dicebantur similes. Ad eum ergo morem respexit Ambros. Cum sacra Martyrum corpora recens effossa communem hominū staturam multum excedere vidisset, talia & ipse appellavit, qualia Præcæ ætatis corpora fuisse ferebantur? Quid ergo hîc sibi velit Phereponus, nemo facile intelligat. An Homericæ opinioni sese opponere? Id per nos ipsi liceat. Non idcirco minus verum erit, inusitatæ magnitudinis fuisse corpora Gervasii ac Protasii? Istamne sacrorum Martyrum proceritatem in dubium revocare? At innumeri Mediolanenses præter Ambrosium ejus rei testes fuerant, quibus per duos dies Martyrum ossa exposita scimus. Num dubitat, an primis tribus à Christo nato seculis ejus proceritatis homines existere potuerint? Certè Phereponum hac de re dubitare quamplurimi Historici non sinunt, atque experientia ipsa; nam raros quidem, sed tamen aliquos, seculo quovis, hujus stature homines vixisse constat. Augustinus ipse Ambrosii æqualis Lib. 11. Cap. 9. de Civ. Dei affirmat, se incredibilis magnitudinis ossa vidisse. Tum hæc addit:

*Nostriſ temporibus rari quidem, ſed nunquam ferme defuerunt, qui modum aliorum plurimum excederent.* Numquid tandem ſuſpicatur Phereponus. ab Ambroſio corporum illorum magnitudinem tanquam cœleſte prodigium atque myſterium venditatum fuiſſe? Ille hercle inſuſus & ridendus, qui Ambroſium adedò infantem atque delirum ſuſpicari audet. Quæ Martyrum ſtatura foret, & an illa major poſt mortem fieret, certè non ignorabat vir magnus, qui nempè Romæ & alibi innumera conſpexerat Martyrum oſſa. Neque ab ullo docendus erat, aliâne hominum ſtatura fuerit tribus primis Chriſtianæ Epochæ ſeculis, quàm ſeculo ſuo, cùm priſcæ dumtaxat ætati, videlicet temporibus ante Homerum tranſactis, proceritatem corporum, tanquam rem cunctis hominibus eo ævo communem, ipſe tribuat. Nullum hîc ergo Myſterium, nullum cœleſte miraculum Ambroſius conſiderat; ſed quia rarum eſſe noverat, ſæculo ſuo homines reperire tantæ proceritatis, quanta in Martyrum illorum corporibus apparuerat, raram hanc iſtorum qualitatem tacendam non putat, illâque quaſi obiter memorat. Solus cavillator alia in Ambroſii verbis ſomniare poterat; ſolus peſſimus Logicus affirmare, Ambroſium ipſum narrationem ſuam ſuſpectam reddidiſſe.

Graviora in ſpeciem videntur, ſed æquè imbecilla ſunt & confidentiæ plena reapſe, quæ poſthac ſubdit Phereponus. E dæmoniâcis ad ſacra λειψανα confluentibus, nonnulli contra Arianos, eorûmque clamârunt. Id Herculeum Ariſtarcho fulcrum eſt, ut ſub aliorum ſententia dicat, non ampliùs eſſe dubitandum, quin Ambroſius rete illud per fraudem concinnârît. *Lege, inquit, cætera, ubi torti Diaboli, cpe horum Martyrum, Arianos opportuniſſimè damnant; nec ampliùs miraberis eſſe, qui ſtratagemata hoc Ambroſianum fuiſſe cenſeant, quo plebem ſibi devinceres, Inſtinâque & Arianos perterrefaceret excogitatum* Gemina huic argumentationi ſunt, quæ ipſe alibi diſſerit; ideò e mentita appellans ad Martyrum tumulos peracta miracula, quodd iſta ſuperſtitioni propagandæ inſervirent. Verùm quidnam aliud hoc eſt, quàm obvias quæſtiones è præjudicatis opinionibus, quanquam falſis, confidentiſſimè dirimere: quod quantum à ratione abhorreat, non ità pridem edidiciſſe Phereponum ipſum arbitror? Cùm animo iſtius antea inſederit, ſuperſtitionem eſſe ſacrarum Reliquiarum cultum ( quâ in opinione reliquos Novatores concordet habet, ) imò etiam crediderit, Arianos, quamvis tot Conciliis & rationibus proſtigatos, propius ad veritatem, quàm Catholicos, acceſſiſſe non imeri-

merito se inde argumentari ita posse sibi persuasit: ergo miracula ad sanctorum Reliquias confici nequeunt; ergo divinitus extorqueri à Dæmonibus confessio non potuit adversus Arianos; ergo non nisi fraudulentis artibus Ambrosii tota illa scena peracta est. Quid, si fallacissimæ forent, ut eas esse nos reapse dicimus, præceptæ animo Phereponi opiniones? Nonne tota illius machina è vestigio ruit? & potissimum cum nulla verisimilitudo sit, ea miracula conficta fuisse, aut potuisse confingi? Nam, quod est *ad plebem sibi devinciendam*, Arianisque timorem incutiendum, jam vidimus Ambrosii auctoritatem, sapientiam, pietatem, arque constantiam tam periculosis ac impiis non indignis præfidiis; ipsumque etiamsi indignisset, non fuisse usurum ad fidem tuendam, quam sanguine & veritate, non pravis artibus atque imposturis propugnandam esse sciebat.

Ergo nudam, ac inanem, nullisque solidis rationibus stipatam, imò temerariam quoque & impiam esse, suspicionem suam, Phereponus ipse, si Criticus bonus, si Christianus est, deprehendet. Quæ enim narrationes, quæ facta vulgum veritatis amittere jam non possunt, si tantam vim habere debet hæc argumentandi ratio? Vide licet Auctori aut Historico id utilitati, atque existimationi est: ergo confictum id, falsumque est, aut certè in Auctore, sive in narrante fraudem suspicari licet. Si valere debent hujusmodi suspensiones, Ethnicorum nomine imposturæ notam pariter obijcere possit Phereponus Tertulliano, Origeni, Cypriano, Lactantio, & cæteris Christianæ Fidei defensoribus, qui confessione dæmonum in Ethnicos ipsos tam sæpè utuntur. Quid autem Scriptores illos ab hujusmodi accusatione defendit, quod similiter in Ambrosii defensionem non congruat? Deinde nonne Christi ac Apostolorum prodigia ad sanctissimæ doctrinæ veritatem confirmandam, & Christi missionem probandam adhibita fuere, ut habetur Jo. V. 36. X. 38. & XIV. 12. Mirabiliter igitur Christo, ejusque causæ prodigia per ipsum patrata inserviebant. Quid, si incredulus quispiam stratagemata & illa suspicetur, quibus Judaicam plebem sibi Christus devinceret ac Phariseos, sibi infensissimos, de auctoritatis folio deiceret; Id quidem jam faciet incredulus auctore ac præceptore Pherepono; sed iniquissimè faciet. Multò etiam magis instabit iste, nam & in Evangeliiis Marci & Lucæ dæmones mali se ab Jesu tortos conqueruntur, ejusque cœlestem potentiam fatentur, Filiamque Dei altissimi appellant. Nolebant his habere fidem peryceçissimi Judæi, quorum patrociniū quis

non videat à Pherepono incautissimè tandem susceptum , & perfidiam excusatam? Poterant enim & illi objicere adversum Christi prodigia, quæ Phereponus contra Ambrosii Historiam objecit. Sed tam illi temerè ac perperam egissent, quàm iste. Hujusmodi quippe suspiciones cum gravioribus aliis malæ fidei indiciis destituuntur, & præcipuè cum ab aliis refelluntur gravissimis bonæ fidei indiciis, id unum præstare possunt, ut in suspiciosi hominibus malignitatem, livorem, & obfirmatum contra veritatem animum prodant.

Pherepono itaque nos non injuriâ crimini vertimus quòd arma Ethnicis atque incredulis ministret. Quòd Religioni & Ecclesiæ Christianæ eripiat potentissimum illud argumentum veritatis è Christi, Apostolorum, aliorumque sanctorum hominum prodigiosis operibus petitum. Quòd suspecta faciat tum ad mortui Elisæi cadaver in veteri Fœdere peractum insigne miraculum, de quo in Lib. IV. Regum mentio habetur, tum curationum prodigia in novo Fœdere facta per Pauli sudaria ac semicinctia ægris admota, dum eadem mirabilia ad sacra quoque Martyrum ossa, testibus viris incorruptis facta, fieri ipse posse negat, virtutemque ejiciendi Dæmones, à Christo Sanctis tuis in Evangelio promissam, suspectam ipse faciat. Crimini etiam vertimus, quòd ex meris tantum ac fallacissimis suspicionibus denigrare ac lacerare famam non erubescat virorum gravissimorum, & omnium ferè Sanctorum Patrum, quos cum ille Impostores velit, nescio cui amplius in posterum credendum sit, & nesciente increduli, quid amplius putandum sit de Religione & Ecclesia Christi. Propterea prudentiæ, famæ, ac Religionis suæ melius consulisset Phereponus, si ab hisce abstinuisset, quæ quid ab ejus Critica aliis in locis sperandum sit, satis ostendunt. Sed nos jam alia expectant & vocant.



## CAPUT XII.

*Cultus Religiosus, Angelis ac beatis hominibus adhibitus, contra Phereponum defenditur. Superstitionis suspicio frustra hic à Pherepono injecta. Preces pro piis defunctis auctoritate Scriptura Sancta, Traditionisque nituntur. Non aliter sentit S. Cyprianus cui Tertullianus praeivit. Votum Sacrae Virginitatis praestantiùs, quàm Nuptia. Phereponi objectiones repelluntur. Apostoli apertum suffragium pro Dogmate isto.*

**N**ON solis Sanctorum miraculis, sed eorum etiam cultui religioso bellum indicit Batavus, sive Tigurinus Censor: quodque mirandum magis est, id facit auctore ipso, Augustino. Dixerat hic in Lib. de vera Relig. Cap. 55. de Angelis loquens: *Honoramus eos caritate, non servitute; nec eis Tempia construimus, nolunt enim sic se honorari à nobis, &c.* Phereponus ista expendenda relinquit iis, qui volunt Angelos cultu δουλείας, hoc est servitutis, coli. Videant (inquit pag. 485.) *quomodo se sentire & loqui cum Augustino, discere possint.* At quantopere cum Augustino consentiant Catholici in colendis cum beatis Angelis, tum reliquis Sanctis, ipse Phereponus nullo negotio didicisset, nili ea tantum corrogaret, quæ suo sunt consentanea ingenio. Agit hic Augustinus de illa servitute, quæ supremum Numinis cultum significat, atque à Græcis appellatur λατρεία. Non autem negat, alterum illud servitutis genus, cui δαλεία nomen est, à mortalibus exhiberi debere cœli proceribus, & certissimis Dei amicis. Audi Augustinum Lib. 10. Cap. 1. de Civ. Dei: λατρεία, inquit, nostri, ubicumque sanctarum Scripturarum positum est, interpretati sunt servitutem. Sed ea servitus, quæ debetur hominibus secundum quam præcipit Apostolus, servos dominis suis subditos esse debere: alio nomine Græcè nuncupari solet, δαλεία, verò, &c. aut semper, aut tam frequenter, ut penè semper, ea dicitur servitus, quæ pertinet ad colendum Deum, &c. Idem aliis verbis alibi scribit, sed potissimum Lib. 20. contra Faustum Cap. 21. ubi simul docet, colendos esse religioso cultu beatos Dei famulos. Illo cultu, inquit, qui Græcè λατρεία dicitur, Latine uno verbo dici non potest, cum sit quædam

*proprie Divinitati debita servitus, nec colimus, nec colendum docemus nisi unum Deum* De Sanctis verò Martyribus ità loquitur: *Colimus ergo Martyres eo cultu dilectionis, & societatis, quo & in hac vita coluntur Sancti homines Dei, &c.* Erigere Tempia, offerre sacrificium, aliàque huiusmodi, uni reservata Deo, nefas est impendere in Angelorum, Martyrumque cultum; sed aliam servitutis honorariæ speciem, quam *Dulcam* appellamus, non prohibemur, sed jubemur præstare Sanctis; quos tamen conservos Dei simul agnoscimus. Cui hoc nomen non attrideat, alio utatur, dummodo rem teneat.

Quod verò Phereponus subdit, nimirum jam Augustini ævo quædam cœpta esse fieri, quæ quanquam à prudentioribus damnatà, paulatim intromissa fuere; inquit enim idem Augustinus in Lib. 1. de Morib. Eccl. Cathol. Cap. 34. *Novi multos esse Sepulchrorum, & picturarum adoratores*; hæc, inquam, Phereponi monita, nescio quid prodesse possint Novatorum scholæ. Nam quis certò affirmare possit, Augustinum ibi de sepulchris & picturis Christianorum loqui, & non potius de Paganorum? Quod si de Christianis talia inter suos agentibus scribit Augustinus: quid mirum? Superstitio locum habere potuit ac potest in Ecclesiæ Catholicæ ritibus, ac præcipuè in Sanctorum, atque Imaginum cultu, dum fideles sint quidem, ut ipsius Augustini verbis utar. *professores nominis Christiani, sed professionis suæ vim nescientes, neque exhibentes.* Ab his arcessendam non esse doctrinam Orthodoxæ Religionis, neque existorum exemplo expendendam esse præstantiam Catholicæ Ecclesiæ, rectissimè agebat Augustinus in eo Libro. Id & nos nunc repetimus. Quod faciendum & credendum præscribit Ecclesià nostra, hoc intueri, non verò quod in ista Ecclesia sit, aut creditur ab imperitis & impiis. In eo veritas & sanctitas; in hoc superstitio & falsitas. Et reverà ipsemet Augustinus tum alibi, tum Lib. 8. Cap. ult. de Civ. Dei, Memorias, sive Sepulchra Martyrum, & eorum Reliquias honorandas esse docet, significatque apertissimè, qualis opinio induenda sit Catholicis, cum quædam in honorem cultumque Martyrum fiunt. Ea autem Augustini verba cum in oculos & ipsius Phereponi incurrerint, non sine aliqua animadversione dimittenda esse ipse iudicavit. Inquit igitur pag. 581. *A pompa, quæ ferebantur Reliquiæ, honor, qui iis genuum flexione deferretur in invocationes Sanctorum, &c. persuadebant Ethnicis Martyres colit, quasi quoddam genus inferiorum Deorum.* Tum addit, neque

Ethnicos multum à vero aberrasse , nam & Christianos nonnullos offendebat hic idem cultus. Quamobrem censet, Augustinum hinc Rhetorum more, dissimulatis his, quæ ab Ethnicis objiciebantur, respondisse. Nonnullorum Christianorum nomine , quos malè habebat Martyrum cultus, unum Vigilantium, & alterum Eunomium indicare voluisse, ac potuisse, Phereponus mihi videtur. At quæta, quæ, Christianorum pars duo homines sunt, & quales amabo, ut eorum suffragium universæ Christianorum Ecclesiæ opponi possit? Nil facilius, quàm in quacunque Republica duos, imò etiam plures invenire, quibus fastidio sint patrii mores, suæque Religionis ritus. Atqui hujusmodi fastidiosos, & audacissimos homines statim comprehensere viri sanctitate atque eruditione clarissimi, quibus certè ignotum non erat, quid esset Deo, quid beatis ejus famulis debitum, & quid foret Idolorum, Deorumque cultus.

Subit autem Censoris nostri confidentem eloquentiam demirari, quando is dissimulatam ait ab Augustino Ethnicorum hac in re accusationem, idque Rhetorum more. Nam quid aliud in eo Cap. ultimo Lib. 8. de Civ. Dei præstat Augustinus, quàm ostendere, quantum intersit inter cultum divinum hominibus mortuis ab Ethnica superstitione delatum, & religiosum honorem delatum Martyribus à Religione Christiana? Primò differre ait honorum & rituum genus; nam & Sacrificia & Delubra mortuis offerebant Ethnici, à quo tanquam à peculiari Divinitatis signo abhorrebat Christiana Respublica. Deinde ostendit, ab animo illorum differre omninò in iis ritibus atque honoribus animum istorum. Ethnici tanquam Deos veros, & adoratione uni Deo debitâ, suos mortuos prosequiebantur; Christiani cōtrà nunquam suos mortuos apotheosi dorârunt, nunquam Deos censuere; & quos honores habuere suis Martyribus, fuere quidem signa religiosæ venerationis, non autem divini cultûs, & mentis ad Latrâ propensæ. Animus autem, atque intima persuasio ea est, quæ ritus, & sermones honoris causâ conceptos ad bonum aut malum trahit. Decernere verò, qui ritus superstitioni, aut veræ pietati conveniant, quive tolerandi sint, & probandi, aut improbandi, sive non ferendi, ad Ecclesiam, & ad Apostolicam Sedem pertinet. Et hanc in rem volo Phereponus noster audiat, quid fortè Theophilus quidam Alethinus (hominem puto perquam carum Pherepono ipsi) scripserit in notulis ad Tom. 3.

Theolog. Dogm. Dionysii Petavii, Lib. 15. Cap. 2 de Incarni.  
*Ut verba, inquit, valens usu, ita & gestus, qui modò sunt civiles; modò religiosi, pro temporibus & locis, possuntque Deo colendo & hominibus aequè pro consuetudine adhiberi. At interna illa adoratio, quæ id quod colimus consideramus ut unicum ac summum Numen, propterque reveremur ac precamur, ad unum illud Numen pertinet. Sed possunt esse, & sunt alii inferiores cultus, dignitatis rei, quæ colitur, attemperati, absque idololatriæ ulla. Quod semper probè observandum. Vide & ibi Petavium.*

Augustinus ergo in eo loco postquam dixit, honorari quidem Martyres, eorumque Memorias, à Christi fidelibus: Ethnicorum accusationem atque suspicionem omnem evertit, monens, neque Sacerdotibus, neque Templis, neque Sacrificiis (quæ uni Deo tantummodo sint debita) honorari sanctos Martyres; reliqua verò venerationis signa eisdem exhibita, ex obsequio religioso, non autem ex opinione Divinitatis descendere; imò in ipsius Dei gloriam concedere, quicumque honor Sanctis defertur. Quod cum dicit, occupat unâ responsione, quidquid unquam aut objecerant, aut objicere poterant Ethnici adversus Martyrum cultum. Quacumque, ait, adhibentur religiosorum obsequia in Martyrum locis, ornamenta sunt memoriarum, non sacra, vel sacrificia mortuorum, tanquam Deorum. Dixeras supra: Honoramus memorias eorum tanquam sanctorum hominum Dei; &c. ut & celebritate & Deo vero de illorum victoriis gratias agamus, & nos ad imitationem talium coronamur adhortemur, &c. Quapropter quid objicere Ethnici potuerant, aut poterant, ut apud Christianos Polytheismum ostenderent, quod suo sermone & explicata mente Christianorum Augustinus jam non contriverit? Et ne quis Martyres saltem quasi quoddam genus inferiorum Deorum coli putaret, addidit illè: Non ipsi, sed Deus eorum nobis est Deus. Et infra: Nos itaque Martyres nostros nec divinis honoribus, nec humanis criminibus colimus, sicut colunt illi Deos suos, &c. Quod Augustinus olim pronuntiabat, nunc etiam Ecclesiæ Catholica proficetur, Idololatriæ à nostrorum temporibus hæreticis insinulata, sed ab hujusmodi calumnia vel à sincerissimis inter ipsos Hæreticos jamdudum liberata.

Ab Angelis aliisque beatis cœli civibus ad reliquos Christianos, qui decesserunt in signo fidei, & dormiunt in somno pacis, transit Phereponus noster; atque ut illis religiosum honorem habendum negat, ita istis nihil pro-

desse



desse Fidelium preces affirmat. In Lib. de Cura pro mortuis habenda auctor est Sanctus Augustinus consuevisse Christianos offerre Deo preces pro mortuis fidelibus, quod officium ipsis profuturum sperabant apud Deum. Phereponus hic insurgit, inquit: *Sed locum aliquem Scriptura, aut revelationem certam hanc in rem proferri oportuit; qui enim norat Augustinus hoc velle Deum, ut preces Ecclesia proficiat post mortem nonnullis, cum alium sit ea de re silentium, &c.* Non enim satis est, ut possis hoc fieri; quàm multa enim Deus non vult, quæ potuisset velle? Sed Augustinus laudaverat locum 2. Machab. XII. 43. ubi legimus oblatum pro mortuis sacrificium. Nihil refert: pergit enim Phereponus interrogare: *Sed ubi Lex talia sacrificia iussit, aut ubi Deus se adiuventis ab hominibus Sacris propitium fore promisit?* Peto ergo à Pherepono, utrùm sibi computentur inter Canonicas Scripturas priores duo Machabæorum Libri, an non. Si postremum, videat ille, qui tot alios divinarum Scripturarum Libros demonstrare contra gentem incredulam possit cœlo probatos. Tolle Ecclesiæ Auctoritatem atque Traditionem, ruat necesse est potissimum argumentum, quo nititur divina origo Literarum sacrarum. Sin, uti videtur, Canonicus est Pherepono is Machabæorum Liber, quem universa olim Ecclesia Canonicum habuit, & Catholica nunc habet: quid est, quòd illic non legit Phereponus hæc verba: *Sancta ergo* (sicuti Vulgata legit) *& salubris est cogitatio pro defunctis exorare, ut à peccatis solvantur?* Hinc novit Augustinus, & noscere Phereponus potuit, velle Deum, ut preces Ecclesiæ proficiat post mortem nonnullis; divino quippe oraculo probatur illa Judæ Machabæi actio, atque opinio.

Præter Scripturæ sacræ documentum illud, cui quædam alia, etiam non adedè perspicua, accenseri possunt, adhibet Augustinus auctoritatem Ecclesiæ universæ, quæ usum precum pro mortuis habet, & habendo utilem piùmque, & ab Apostolis descendente ostendit. Rursus ergo Phereponus in ista erumpit: *At quis docuerat Augustinum, à temporibus Apostolorum nullas pravas opiniones, ac consuetudines sensim irreperere potuisse? Nullum Dei legitur, hanc in rem, promissum: eademque est ratio hominum in Rempublicam Ecclesiasticam, ac in Civilem coeuntium, nec in hanc magis quàm in alteram, male consuetudines sensim irreperere possunt.* At quis docuit Phereponum, eandem esse ac fuisse rationem Civilis atque Ecclesiasticæ Reipublicæ in perversis consuetudinibus admittendis? Deinde hanc consuetudinem, qua de

agimus, esse perversam, nullumque hanc in rem legi promissum Dei? Nos jam vidimus, in Machabæorum Libris probari Deo preces & sacrificia pro mortuis. Quod si ne ullis quidem in Libris Canonicis expressa legeretur divina revelatio istius doctrinæ: attamen satis esset, Traditionem certam haberi de ista revelatione in Ecclesia Dei. At istud procul dubio revelatum fuisse, atque probatum ab Apostolis, hinc discimus, quod Augustini ævo *universa pro defunctis Ecclesia supplicare consuevit*, ut ait idem in eodem Libro. Hic autem locum habet regula celebris ejusdem Sancti Augustini Lib. 4. Cap. 24. de Baptismo contra Donatistas: *Quod universa tenet Ecclesia, nec Conciliis institutum, sed semper retentum est, nonnisi Auctoritate Apostolicâ traditum rectissime creditur.* Ab Ecclesiastica verò nimium quantum differt Civilis Respublica. Nihil ibi impensius commendatur, ac ingeritur auribus tum Episcoporum, & Cleri totius, cum reliquæ etiam plebis, quàm nihil esse innovandum, & pravas opiniones, perversasque consuetudines impediendas, atque a verruncandas, & imminere certum salutis periculum dissimulanti, silenti, & sinenti aliquid novi aut sentiri aut fieri, quod aperte aut tacite doctrinam Christi atque Apostolorum aliqua ex parte lædat. Tam religiose, tam sollicitè huic suo muneri hucusque Ecclesia Catholica respondit, ut vix nova quæpiam falsa opinio, nova aliqua mala consuetudo emerferit, quam aut Concilia, aut Romani Pontifices, aut alii Episcopi. Patres, Scriptorésque pi: atque eruditi non represserint, non damnârint. Aliter se gerit Civilis Respublica.

Et ostendat, si poris est, Phereponus ipse originem consuetudinis istius; quamvis enim quod ait: *de origine precum pro mortuis vide Joann. Fellum ad Ep. 1. Cypriani*, Lectoribus spem, aut metum ingerat hujusce originis inveniendæ; Lectores tamen se deceptos sentient, ubi ejusdem Felli notas atque argumenta pensabunt, & cum ipsis sancti Cypriani verbis conferent. De Victore quodam ait sanctus Episcopus: *Non est, quod pro dormitione ejus apud vos fiat oblatio, aut deprecatio aliqua nomine ejus in Ecclesia frequentetur.* Quid refert, quod Fellus ostendere contendat, pro Martyribus non oratum fuisse olim? Id certissimum est; at illic res minimè erat de Martyre quopiam. Nullis verò tabulis Fellus prodit, pro cæteris fidelibus cum signo fidei vitæ defunctis preces ad Deum non fuisse præstitas, neque speratum inde ipsoꝝ refrigerium. Immo idem ille Cypriani

locus

locus evidenter ostendit, preces pro fidelibus mortuis tunc in more Ecclesiæ fuisse, quando intercedit, ne pro homine illo fiant. Deinde cedo Magistrum Cypriani, Tertullianum videlicet, qui Ecclesiæ suorumque temporum hac in re consuetudinem nobis edisserat. Inquit is in Lib. de Monogamia Cap. 10. de vidua: *Enim verò & pro anima ejus (mariti) orat, & refrigerium interim adpostulas ei, & in prima resurrectione consortium, & essent annuis diebus dormitionis ejus.* In Cap. sequ. *Orabit, inquit, pro maritis tuis novo & vetere.* Quibus ex verbis intelligis, quid etiam senserit Sanctus Cyprianus, quantumque ab ejus mente abhorreat Felli sententia, & rursus quàm antiqua sit formula illa, quæ etiamnum in sacro faciendo locum refrigerii, lucis ac pacis Fidelibus Catholicis vitâ functis à Deo precamur. Et cum Tertulliani ævo, hoc est, uno aut altero sæculo post mortem Apostolorum, ista passim in Ecclesia peragerentur, ut ex aliis etiam ejusdem Tertulliani locis confirmari potest, cumque in eam rem consentiant tum Concilia, tum Græci Latinique Patres: tandem intelligere cogimur, non aliunde quàm ex Apostolica Traditione venisse hujusmodi consuetudinem. Quod si magnum & certum lucrum Ecclesiasticorum Phereponus (pro more suæ gentis) hîc objicit nobis: rogandus ille primò est, ut ostendat, hujus opinionis ope jam tum ab Augustini, Cypriani, ac Tertulliani ætate Clerum sibi quæsisisse divitias. Tum animadvertendum, aliud esse perversitatem, aut bonitatem opinionis alicujus, aliud verò lûcrum, quod ex eadem opinione educi potest: nam homines improbi tam bonâ quàm malâ doctrinâ abuti possunt in sui commodum atque utilitatem. Necesse est igitur, ut ipsam opinionem Phereponus rectâ aggrediatur, Christianoq; Dogmati contrariam ostendat: quod tamen denuntiamus, ipsi nunquam possibile futurum, quando tam antiquis legitimisque fudamentis nostra sententia nititur, & ad alia considerationis genus spectant, quæcumque aut laudandæ, aut vituperandæ consuetudines in usum istius opinionis invectæ hucusque fuerunt.

Ad hæc litem non Augustino tantum, sed universæ Catholicæ Ecclesiæ indicit Phereponus, quod apud nos majori sit in pretio ac laude studium sanctæ Virginitatis, quàm honestæ nuptiæ. Catholicam sententiam expresserat atque illustrarat Sanctus Augustinus in Lib. de sancta Virginitate. Phereponus verò in Animadversionibus ad eundem Librum pag. 563. monet, conjugium opus esse, quod

quod finè magna virtute peragi ac sustineri non possit. *Pericula enim multa imminēt conjugatis, multa tentationes incumbunt, ex quibus sese, ut Christianos decet, expedire semper non est facile.* Tum enumeratis hīsce periculis atque laboribus, subdit: *At qui cœlibem vitam agunt, nullius curam gerunt nisi sui, nec indigent tantâ virtute ad se solos sustentandos, & viam virtutis calcandam, quâ multò minoribus periculis cincta est.* Quibus ex verbis concludit, cœlibatum non solum non esse rem, quæ per se magis Deo placeat, quàm matrimonium, sed etiam esse rem minoris quàm matrimonium virtutis. Augustino autem id semper infortunii accidit, ut quæ ipse profert, Rhetoricæ tantum argutiæ sint; quæ verò Phereponus, solidissimæ omnino rationes. Quare Censor monendos Lectores tandem arbitratur his verbis: *Qui hæc probè expendiderit, non multum movebitur Rhetoricis argumentis, quæ in hoc Libro deinceps sequuntur.* Felicem hominem, cui exiguo verborum apparatu semper datur immensam discere aliorum loquacitatem.

Cùm inter Virginitatem Deo dicaram, & Christianas Nuptias comparatio instituitur, quæri potest, utrùm facilius per illam, quàm per istas, æterna salus obtineatur; deinde utrùm Virginitas ipsa per se præstantior, & gratior Deo sit, quàm Conjugium. Vide nunc amabo, quò vergant Censoris nostri verba: ad ostendendum nempe, majora esse pericula atque incommoda conjugii quàm cœlibis vitæ, maioremque idcirco esse in illo statu, quàm in isto, necessitatem virtutis. Quod cùm facit, utique strictim dicit, quod Hieronymus, Tertullianus, Basilus, Nazianzenus, Chrysostomus, alique fusissimè scripserunt, & passim experientia testatur, sed simul contra suam mentem extollit præstantiam Virginitatis, quæ eligatur intuitu Dei. Hinc enim constat, difficilius esse conjugatis, quàm Virginibus sacris, iter ad cœlum, propterea quæ præferendum esse conjugali cœlibem statum, uti faciliorem tutioremque viam ad salutem. Quod autem inquit Phereponus, majori virtute ad Conjugium opus esse, quàm ad Virginitatem: (quando hoc etiam illi daremus) nihil minuit, immo valde auget sacræ Virginitatis splendorem. Necessitas majoris virtutis in conjugatis, ut sæculi tentationes superent, cœlumque obtineant, infirmitatem prodit mediæ, videlicet conjugii, quo utuntur ad tam eximium finem consequendum. Ex multis enim itineribus, per quæ ab infelici hoc exilio ad beatissimam patriam consequendi potest, illa minus laudanda, minúsque eligenda sunt, quæ magis dubi-

dubiam faciunt consecutionem finis, facileque longius à patria deviare valent. Secus inter hominum status præferendus ille foret, per quem difficilius ad regnum Cælorum devenitur, qualis est militia, mercatura, aliæve instituta, negotii sæcularis plena, & mille periculis ac tentationibus obnoxia, majorique idcirco virtute indiga, ne salus æterna perdatur.

Audi nunc Phereponum in hæc verba loquentem : *Cælibatum non esse rem, quæ per se magis placeat Deo, quàm Matrimonium, sed eum esse demum illi gratiorem, in alterutro sit statu, qui præceptorum ejus est observantior.* Nempe non considerat homo, alioqui non hebes, eo ipso gratiorem Deo futurum, qui Virginitatem illi dicavit, non solum quòd hunc uti aptiorem divinæ legi observandæ elegerit statum, sed etiam quòd bonum animi potius quàm corporis quærat, & quòd ea, quæ sunt sæculi, repudiet, carnisque voluptatem ideo contemnat, ut spiritu promptiore ea, quæ sunt Dei meditetur ac faciat. Deinde præter illam difficilem atque laudabilem in Virginitate abstinentiã à voluptatibus venereis, considerandum est votum, animusque hominis ipsam Deo Virginitatem voventis. Hic sita virtus præstantior, hic major laus virginis. Excelso animo vilia, & periculosa, & belluina oblectamenta mundi rejicit : magnum hoc est. Majus est rejicere, ut Deo expeditius vacare possit. Confer igitur Nuptias, & sacram Virginitatem. Sunt illæ humanæ fragilitatis, atque infirmitatis subsidium, laudabile & sanctum profectò, & Christi gratiã in Matrimonii Sacramento consecratum. Votum autem Virginitatis non sine magna virtute est, immo est magna virtus. Illic delicias, siue oblectamenta quærimus, illic desideria Concupiscentiæ implentur ; hic verò fortiter superantur ipsæ carnis illecebræ, hic Pietatis simul ac Temperantiæ heroicæ vires exercentur, & castitas, mēnsque cum corpore Deo dicantur, ut eo pacto liberioribus pennis evolare homo possit ad Deum, vitamque imitari Angelorum.

Atque hæc sunt, quæ Apostolo non experientiã solum, sed cœlesti etiam prudentiã edocto in 1. Cor. VII. persuasere, ut *Virginitatis* studium Nuptiis apertissimè, neque uno in loco, præferret. *Qui sine uxore est* (inter cætera ait) *solicitus est, quæ Domini sunt, quomodo placeat Deo. Qui autem cum uxore est, sollicitus est, quæ sunt mundi, quomodo placeat uxori, & divisus est. Et mulier innupta, & virgo cogitat, quæ Domini sunt, ut sit sancta corpore & spiritu, &c.* Infra addit : *Igitur &*  
qui

*qui matrimonio jungit virginem suam, bene facit; & qui non jungit, melius facit.* Quæ verba non ignoravit ipse Phereponus, sed eludere se posse speravit, inquiens, Apostolum professum se ita loqui *propter instantem necessitatem*, h. e. propter tempora illa, quibus graves persecutiones fervebant. Nescio quas ego temopre persecutiones Phereponus ostendere posset inter Corinthios, cum certè rem præsentem, non futuram indicare videatur Apostolus per vocabulum *ἐνεστώτων*. Deinde verba illa plerique tum Græci tum Latini Interpretes aliter exponenda censent, ut nempe loquatur illic Apostolus sive de sæculi molestiis & incommodis, quæ conjugalem statum consequuntur, & *carnis tribulationes* infra appellantur, sive de angustia mortalis hujus vitæ, sive de aliis hujusmodi necessitatibus. Sed quid plura? Virginitatis præferendæ rationem non ad ullas persecutiones tunc ferventes, sed planè ad generaliore causam, quæ cuique temporì conveniat, Paulus apertè refert: nempe quia necessitates conjugalis vitæ impedimenta sunt, quominus expeditè liberèque Deo serviatur, ac placeatur. Id constat è verbis nuper laudatis. Ipse itidem Apostolus agnoscit in Virginibus sacris excellentem quandam sanctitatis speciem, quæ earum statui, non autem conjugali, convenit. Inquit enim: *& virgo cogitat, quæ Domini sunt, ut sit sancta corpore & spiritu.* Quibus verbis laudat, propriamque Virginum dicit non solum immaculatam puritatem carnis, sed etiam abstinentiam ab opere & voluptate carnali. Ceterùm negare nemo potest, quin homo conjugali vitæ addictus Deo magis interdum placeat, majorique virtute abundet, quàm alius quisquam sacræ Virginitatis cultor; uti neque negare quisquam audebit, quin temerè non nunquam, suisque viribus parum perpenlis, homines Coelibatium Deo voveant. At quorsum hæc? Non est in culpa thesaurus, si ille expiletur, qui se ad custodiendum obtulerat. Quòd si conjugato cuiquam major interdum probitas sit, quàm virgini alicui: tribuenda est hujusmodi præstantia aliis virtutibus in illo homine conjunctis, quæ faciunt, ut in conjugio sanctè inito sanctè vivatur, & salutare homini fiat ipsum conjugium. Rursus aut vitia, aut ipsarum defectus virtutum, in causa esse possunt, ne Virginitas Deo dicata meliores majorèsq; in homine fructus probitatis ferat. Verùm paribus circumstantiis positis, procul dubio Virginitas sacra, quàm conjugium, aptior atq; efficacior erit, ut quis Deo placeat, ipsaque proinde Virginitas ex ipsius Dei amore electa Deo placere plus debet, quàm Nuptiæ.

## CAPUT XIII.

*Mendacium semper malum Eius patrocinium a Pherepono susceptum positum quibusdam circumstantibus sed sine ulla valida ratione. Foci nonnulli è mendaciorum familia excludendi Phereponi calumnia dictitantis Patres tam rigide fuisse infensos mendacio, ut ipsi postea tutius mentirentur.*

**I**N Libris de mendacio, & contra mendacium, atque alibi etiam, pluribus ostendit Sanctus Augustinus, peccatum esse quodlibet mendacium, cui reverà mendacii nomen conveniat, cum nempe causâ atque intentione alterius fallendi enuntiatur falsum. Phereponus autem aliqua mendacia agnoscit, quæ culpâ careant. In Animadvers. ad Cap. 5. Lib. de Mendacio, *Ponenda sunt*, inquit, *tantum tria, quæ diximus. Arimur est, nullum esse oportere animum nocendi mendacio; alterum ejusmodi debere esse mendacium, quod nocere revetâ non possit; tertium denique, non esse aliam viam, quâ imminens malum vitetur.* Eadem repetit Phereponus in Animadvers. ad Cap. 18. Lib. contra mendacium. Et in ista quidem sententia præivere Censori nostro cum ex Ethnicis Philosophis atque Scriptoribus nonnulli, tum nonnulli etiam Christianis ex iis præcipue, qui scientiæ politicæ præcepta litteris consignârunt. Inter hosce potissimum recensere juvat duo carissima Pherepono capita, Erasmm videlicet, & Grotium, & nostris etiam temporibus Samuelem Pufendorffum in Libris *de Jure Naturæ & Gentium*. Quicumque autem ii sunt mendaciorum patroni, ita sæcularem quandam respexisse utilitatem mihi videntur, ut naturam dignitatẽque veritatis tunc oblitifuerint. Illa scilicet sublimis, ac innatâ Deo virtus, imò Deo ipsimet aded congenita, ut Deus sit ipsa veritas, delicatâ pulchritudine constat, omnẽque abhorret atque exhorrescit oppositæ falsitatis speciem. Etenim cum simul verum & falsum consistere non possint, necesse est, ut qui falsum velit, quacumque tandem è causa id velit, veritatem eodem tempore, quantum in se est, perdat, atque pessumdet. Nihil medium occurrit. Atque hinc fit, ut velle falsum in alterius hominis mente (quod

(quod profectò vult quicumque mentitur, ) idem sit ac velle veritatis necem, proptereaque velle malum eligere

Mendacium ergo intrinsecè malum est, sicuti & omne falsum est secundùm se malum, & fugiendum, ut Aristoteles ait, Ejusmodi autem cùm sit mendacium, nullo colore dealbari, melioremque naturam induere nunquam potest. Porro duplici juri mendax homo injurium se præbet, Divino, ac Naturali. Divino; Deum quippe ipsum offendit, dum veritatem ipsam, seu veracitatem mendaci linguâ lædit. Naturali; jus quippe Naturæ exigit, ut nemo sponte alterum fallat, sive in errorem inducat, nemo falsum decipiendi alterius causâ tradat, nemo sermonis humani mirabili instrumento ac præstantissimâ institutione abutatur ad labefactandam fidem in hominum commercio. Ac propterea Philosophorum nobilissimi, & plerique sanctorum Patrum, quorum dux Augustinus, omnesque Catholicæ Scholæ Theologi, nullum esse casum statuerunt, in quo mendacium, dum reverà sit Mendacium, non sit etiam malum, & culpæ infimulandus mendax non sit, quanquam ea in mentiando esse culpæ levitas interdum possit, ut ei veniam facillimè sperare liceat. Huc faciunt divinarum Scripturarum documenta, nempe Proverb. XIII. 5. *Verbum mendax justus detestabitur.* Et Proverb. XXX. 8. *Vanitatem, & verba mendacia longè fac à me.* Et Coloss. III. 9. *Nolite mentiri invicem.* Et Psal. V. 7. *Perdes omnes, qui loquuntur mendacium.* Et Ecclesiastici VII. 14. *Noli velle mentiri omne mendacium.* quod idem est ac edicere, ut nullum proferamus mendacium. Mitto alia Scripturarum loca.

Videamus nunc, quibus rationibus ducatur Phereponus in contrariam sententiam. Sed ille nullas affert. Hæc tantùm addit ad ea, quæ suprâ retulimus: *In hisce sanè circumstantiis licitum esse debet mentiri, si non illicitum sit joco mentiri, quod per Augustinum licet. Vide Cap. 2.* Utique auctor est Augustinus Cap. 2. Lib. de mendacio, joca nunquam putata fuisse mendacia; habens enim, inquit is, *evidentissimam ex pronuntiatione, atque ipso jocantis affectu, significationem animi nequaquam fallentis, etsi non vera enuntiantis.* Sed nescio, qui hinc inferre potuerit Phereponus, licitum quoque esse mentiri, positis circumstantiis à se enumeratis. Malitia mendacio infita eam habet originem & causam, quòd animus mentientis vult verum corrumpere, dicere falsum, & alterum hominem fallere. In jocis hinc animus per versus, atque inordinatus abesse potest, & plerumque reverà



revera abest; nam qui jocatur, sæpè ac sæpius alterius decipiendi voluntate caret, idque pronuntiat falsum, quod probè scit ab audientibus sive legentibus esse detegendum, & accipiendum tanquam falsum, non tanquam verum. Quare neque veritatem jocator hujusmodi lædit, neque proximum fallit; ideòque è mendaciorum numero, joca ita composita excluduntur, & culpæ notam effugiunt. Verùm in casibus à Pherepono propositis manifestissimum est, & decipi alterum, & veritatem lædi, & falsum ita enuntiari, ut mentiens directè, aut indirectè velit alterum fallere. *Ex hoc ipso, quod aliquis scienter falsum loquitur, falsitatem intendit significare; ideo completivum in definitione mendacii ponitur intentio fallendi; sed quasi materiale falsa vocis significatio.* Ita Sanctus Thomas in 3. d. 38. 9. 1. Art. 1. in corp. Mendacium igitur in iis casibus locum habet, atque aded turpitudine illa, quæ mendacium consequitur, inde excludi non potest. Sed, inquires, mendaci tunc nullus est nocendi animus, & mendacium ipsum obesse per se ipsum nequit, nullaque alia homini via restat evadendi periculi. Quis de ita mentiente queratur? Cui injuria tunc infertur? At non solum animadvertendum est, per illum semper noceri, qui mentiatur; mendax enim, quantum fert ejus actio, errorem semper & falsum in alterius ingerit aut vult ingerere mentem: sed etiam statuendum est, internam è mendacio turpitudinem ex eo non tolli, quòd sit in mentiente nocendi voluntas, neque vis nocendi in ipso mendacio; dum falsum enuntietur animo alterius fallendi. Nam ut ut concedamus, mentientem in eo casu, alterius vitæ, honori, ac rebus nihil officere, attamen juri ipsius veritatis adversatur, quam ille, quantum in se est, offendit, atque conculcat, & facit, ut in proximo pereat. Eodem pacto invisum Deo pergit esse adulterium cum scemina, quamvis ipsius vir in eam actionem consentiat, & quamvis non aliter vel ipsius vitæ periculo te eidem actioni subducere nequeas. Idem dicas de aliis operibus, aut dictis, ex sua natura atque intrinsecè malis, quæ illâ ratione minimè excusantur, quòd neque alteri noceant, neque alia sit imminentis periculi effugiendi via. Rectè propterea Aug. Quæst. 68. in Levitic. Mendacium, inquit, non possumus dicere tunc tantummodo esse, quando proximus læditur; cum enim falsum ab sciente dicitur, procul dubio mendacium est, sive illo quisquam, sive nemo lædatur.

Quod si reponas, jocos etiam dari, quibus falsiloquium

subest, atque intentio alterius fallendi : ego isthæc peccati nomine accusabo, quia tum reapse mendacia erunt, & veritati inimica. Ubi tum quæso est *evidentissima* illa ex *pronuntiacione*, atque ipso *jocantis affectu significatio animi nequaquam fallentis, etsi non vera enuntiantis*, quam Augustinus deprehendit in reliquis jocis, à se excusatis? Et reverà sentiunt complures, iique præstantes Theologi, inter quos sanctus Thomas, joca etiam, quibus mendacii nomen convenire possit, referenda esse in catalogum eulparum; modò quidem gravium, sed ferè semper levium. Ipsemet Augustinus post verba à nobis nuper recitata hæc addit : *quo genere (jocorum) utrum sit utendum perfectis animis, alia quaestio est, quam modò enodandam non suscepimus*. Quibus ex verbis intelligis, vel ipsa illa joca, quæ sancto Augustino mendacia non putantur, ejus tamen esse naturæ, ut jure dubitetur, num homini ad perfectam vitam anhelanti convenire possint. Quantò magis idem dicas de jocis intentione fallendi, & veritatis adulterandæ causâ prolatis, quæ reverà mendaciis accensenda veniunt?

Sed novam scenam, novam peripetiam repentè huc inducit Phereponus noster. Qui nobis nuper Augustinum exhibuerat nimis rigidiusculum in execrando quocumque mendacio, en eundem rursus deprehendit mendacem, & quidem basilicè. *Nec putes*, inquit Censor, *qui usque adeò abutis & necessario mendacio abhorre se discessit*, tam rigidos fuisse versatellistes, ut nunquam emolumentis causa mentirentur. Contrarium persuadent tot ficta miracula ad venerationem plebis quibusdam Ecclesiis & Basilicis conciliandam, utque Rhetoricae fictiones, &c. Neque hîc sistit acutissima Phereponi acies. Causam quoque perspexit, quare tantum odium adversus mendacium Catholici Episcopi præferrent. Si liceat, addit, id quod suspicamur proloqui, non alia de causa multi in licita mendacia, qualia descripsimus, tam acriter invehebantur, quàm ut postea in rem suam fructuosius mentirentur. Simpliciores enim homines non suspicabantur ab iis sibi fucum fieri, qui tam insensos profitebantur se mendacio. Si & nobis licet hîc, non quod suspicamur, sed quod nobis certum videtur, proloqui: dum hæc Phereponus ait, non bonum, sed perversum se prodit Criticum, ut gravioribus parcam nominibus ipsum jure convenientibus. Age enim edicat nobis suspiciosus iste vir, num inter Protestantes quoque adulterium, & reliqua libidinis experimenta, avaritia, fraus, aliæque ejusmodi scelera locum habeant, aut unquam habuerint.

buerint. Non negabit, puto; immo inter aliquot ex ipsis eorum Sacerdotibus atque Theologis, si verax esse amet, fatebitur istam pestem & olim, & nunc vigere. Atqui non dubito, quin ii quoque Theologi tum voce tum scriptis in ipsissima illa scelera invehantur. Quæ si ita sunt, quid quæso reponeret Phereponus homini Religionis nullius vinculis obligato (quales fortasse multos ipse novit sibi vicinos) dicenti, non alia de causa Protestantium Pastores, atque Theologos ea flagitia detestari, quam ut ajenis foeminis tutius abutantur, & fraudibus rem suam utilius promoveant? Rideret, irascereturve Phereponus. Nihil enim magis in comperto est, quam hujusmodi vitia & simul ab iis cognosci ac prædicari Deo rectæque rationi invisa, & nihilominus vel ab ipsis noscentibus, atque prædicantibus, vicio humanæ naturæ interdum eligi atque amari.

Eadem & Phereponus, & quisquis alius, de Augustino reliquisque Catholicis necesse est dicat. Obijciat ille nobis, quæcumque vult, miracula ficta, aliâque religiosorum hominum mendacia. In criminum istorum Auctoribus damnandis, si qui sunt, nos quoque concordēs habebit. At quo argumento persuadere tibi aliisque poterit, eum in finem mendacia quælibet, tum ab Augustino, tum ab aliis Catholicis affecto odio fuisse proscripta, ut ipsi liberius deinde atque utilius mentiri possent? Homines fuere. Quam aliam quæris causam, cur mentiti nonnunquam ex iis quidam fuerint? Scilicet meliora videmus, melioraque aliis suademus, ac deteriora sæpè nos sequimur. Cum verò mitiora semper sentire de omnibus hominibus hos jubeat recta ratio, & prohibeamur suspicionibus nullâ ratione innixis alienam gravare famam: quantum minus id nobis liceat, cum de Augustino, Episcopis, Theologis, aliisque tum sanctitate morum, tum doctrinæ soliditate eminentibus viris, sermo occurrit? Neque tanta simplicitas ac inopia mentis in Augustino ejusque similibus erat, ut mendacia detestari, simulque in Religione mentiri tutum putarent, cum unus quispiam emunctæ naris homo posset sacrilegam fraudem deprehendere, ejusque auctores exhibendos detegere. Præterea neque tanta in iis malitiæ atque iniquitatis copia excogitari potest, ut qui publicè prædicarent, uti *magnum scelus* (sunt hæc Augustini verba) & *primum genus detestabilis mendacii*, mentiri in Religione, & pro Religione, hac arte eadem sibi tutiorem utilioremque ad mentiendum viam aperirent.

rent. Demum quænam ab Augustino, illiusque similibus confecta miracula Phereponus ritè demonstret. Immo nemo acrius, quàm sanctus Augustinus (quod & fecere cæteri sancti Patres, atque Concilia) execratus est pias hujusmodi & sacrilegas fraudes. Videat igitur Phereponus, dum talia de tantis viris suspicatur, dùmque aded temerè tam horrenda illis crimina affingit, cur perversi accusatoris notâ inurendus non sit. Certè maligni declamatoris nomen non effugiet.

---

## CAPUT XIV.

*Critica Artis abusus non unus, & Pherepono potissimum familiaris. Quæ de conversione sua ad Deum Augustinus narrat, superstitionis ac fraudis iniquè insimulantur ab eodem Censore. Depulsa ab Augustino inanis gloria quasi-  
ta accusatio, à Pherepono in ipsum concinnata propter Libros Confessionum. Ejusdem Augustini virtutes & sanctitas variis Phereponi calumniis & sophismatibus erepta. In Mallio Theodoro laudando an excesserit Augustinus. Sinceritas ejusdem vindicata ab objectionibus Phereponi. Non in controversia cum sancto Hieronymo, non in cooptatione sua ad Episcopatum, non in declarando Heraclio Successore suo Augustinus peccavit.*

**S**ed quando in hanc arenam ingressi sumus, dimittendus tam facilè non est Phereponus, majorique cura exigendus est ad normam Criticæ Artis homo ille, qui inter Criticos & Criticæ Magistros non bonam quidem, sed magnam sibi jamdudum comparavit famam. Criticam hîc latiori significatione capio, quàm ab eruditis nonnullis capiatur; hoc est, criticam artem illam, studiûmque intelligo, quo alienos in literis, sive in doctrina, errores acutè investigamus, & deprehensos censoriâ virgâ percutimus. Id licitum, id honestum, id Reipublicæ perquam utile, simulque necessarium est. Nam unde tot errores, ac fabulæ, & dogmata stolidæ, nisi è Criticæ inopia? Unde recti judicii, meliorisque eruditionis restitutio, nisi è Critica restituta? Sed quasdam hujusce Artis leges ac præcepta percurramus oportet. Ejus finis est, veritatem sive  
Theo-

Theologicam, five Physicam, Historicam, &c. invenire, & falsum persequi, aliisque vitandum ostendere. Sed tam sollicitè cautèque veritas investiganda atque prodenda est, ut Christianæ simule caritatis, ut modestiæ, ut iustitiæ maxima ratio habeatur. Quamobrem à maledictis & conviciis perpetuò abstinendum; calumniæ non segnè quàm pestis fugiendæ; hominem gravem ars mimica, virulentæ irrisiones, declamationesque minimè decent; in errores verò potius, quàm in errantes dimicandum; tibi-que, vel cùm triumphas de errore deprehenso, exuenda omnis ambitio. Non ità aliorum vituperationi insistere, ut quæ in adversario laudem promerentur obliviscaris, multoque minus in illius probum retorqueas. Tum dumtaxat acri ac subirato stylo aut veniâ, aut licentiâ erit, cùm in perditos, impios, & effrontes, five iniquitatis, five impietatis sibi notæ amatores, & in apertos calumniatores, hoc est, in conclamatos aut Religionis veræ, aut veritatis, aut virtutis hostes, pugnandum erit. Cæterum placidè agere decet adversus illos, quos non perversus animus, sed humani intellectus, atque naturæ infirmitas, à bono & vero deviavit. Quo modulo si quando utendum, tum potissimum uti opus est, cùm accusandos & corrigendos suscipis magnos, celebrèsque viros; & tum quoque lenitati adjungenda reverentia erit, cùm Christianæ Religionis Patribus, & Episcopis, non doctrinæ minus quàm sanctitatis famâ per omnium ora commendatis, dicenda dies erit, veritatis causâ id exigente nonnunquam. Ità veritati laboranti simul succurras, ut neque tuæ, neque aliorum dignitati quidquam detrahatur. Si secus fiat, non perversæ tantummodo indolis, & ambitûs, & malevolentiae, aliorumque vitiis specimen dabis, sed ipsam plerumque veritatem, ut ut solertissimè quæras, in itinere perdes.

Atque hæc quidem præcipuæ forsitan leges morum in Arte Critica, quas nunc, ut puto, nihil interest rationibus, aliisque documentis confirmare atque tueri. Juvat potius experiri novis exemplis, num Phereponus se talem hic prodiderit Criticum, qualem postulat recta ratio. Narrat Augustinus Lib. 8. Cap. 12. Confess' improvisâ vocis *Tolle, lege, tolle, lege*, admonitione totum se fuisse conversum ad Deum. Primò *superstitionem Ethnicam*, ex fortuitis vocibus omnia captantem, reperit hic Phereponus. Deinde subdit, si cui singulari providentiâ divinâ id factum videatur, oportere ut ostendat, *opus fuisse ejusmodi miraculo, quo*

*Augustinus intelligere posset sibi legendam Scripturam Sacram , ut ex ea resciret, quid sibi agendum esset. Quod cum quotidie audiret à Catholicis , non videt Censor, cur confugiendum sit ad miraculum. Tandem ait, Rhetorem nostrum omnia exaggerare, quibus persuadere poterat, non agi hic de homine vulgari, sed singulari vocatione divinitus ad Ecclesiam alleto: quæ tamen ex alius calamo rectius fluxissent.* En ergo Augustinum superstitiosum, dum omnia captat; en ridendum, quod fortuitam vocem audiens, miraculum putet, atque id aggrediat, quod tam crebræ Catholicorum adhortationes obtinere ab ipso nondum quiverant; en denique Rhetorem, & callidum quidem, qui omnia exaggerat, ut se tanquam cœlestem hominem venditet.

Gratiæ Pherepono , qui non & impostorem, fictæque narrationis propolam nobis hic Augustinum exhibuerit. Sed postquam ne ipse quidem Censor eò usque progredi est ausus: oculos mentemque omnium appello, ut perspiciant, quibus oculis hunc Augustini locum Phereponus legerit. Improvisam illam vocem audit Augustinus, ignorat auctorem; & dum concupiscentiæ, divinæque gratiæ pugna in ejus corde acrius ælluaret, vocem ipsam interpretatur tanquam divinum oraculum, quo ad repetendam sacrarum Scripturarum lectionem incitetur. Parec inspirationi, perculsusque Apostoli verbis, sibi primum fortè objectis, totum se Deo exinde dicat. Hæc narratio Augustini. Quid hic quæso Rhetorici artificii? quænam exaggeratio? quænam calliditas? Lege verba Augustini. Historicam narrationem puram putam illic deprehendes; quam si veram putas, mirum est quæ accusare possis Rhetorico aliquo colore sive figmento corruptam. Sed vitio vertendum est Augustino, quod talia narret, cum hæc *rectius ex aliorum calamo fluxissent.* Ipsum Augustinum nequaquam dedecuisse hujusmodi narrationem, ille idem fatetur, qui adverbio *rectius* est usus. Multòque magis id perspiciet Lector, nihil in ea narratione inveniens, quod laudem Augustini vel leviter insinuet. Non suas illic virtutes, non sanctitatem, non miracula evidentia commemorat ille, sed fortuitam tantum vocem, unde consummata est conversio sua. dicit se acceptam retulisse singulari divinæ gratiæ auxilio. Quis hominem arguat, quod misericordias Domini in æternum cantet? Ignorare tua bona, utat Erasmi verbis in Præf. ad ipsas Confessiones sancti Augustini; *stupiditatis est; non predicare Domini benignitatem, ingratitudinis est; non expendere in utilitatem proximi, quod acceperis*

*ceperis, impietas est.* Visiones, ac revelationes propheticas, cœlo auctore, experti sunt clarissimi & sanctissimi Viri, idemque etiam evulgârunt. Vide Ignatii Martyris Epist. ad Philadelph. & Dionysii Alexandrini Epistolas apud Euseb. & Cypriani loca multa à Doduvello collecta, & Ambrosii Epistolas, ut alios omittam testes, quos benè multos in hæc & similia haberem.

Inquit autem Phereponus, non videre se, cur confugiendum hic sit ad miraculum, cum prodigio nihil opus esset, ut intelligeret Augustinus sibi legendam esse sacram Scripturam, quando toties id à Catholicis audiverat. Neque videt acutissimus iste Censor, quàm inter se differant, nôsse utilitatem ac necessitatem cœlestis illius lectionis, & ad ipsam lectionem sese reipsa convertere. Nemo nostrum ignorat, quàm periculosa sit ac misera peccatoris servitus; & non exinde tamen ad sortem honestatémque justorum consurgimus. Illud facere ad intellectum, hoc ad voluntatem spectat. Tum verò ipsa quoque voluntas vincula disrumpit ac abjicit, cum interna Dei gratia nos adjuvans concupiscentiam vincit, torpentémque animum fortiter ad se rapit. Innumeris autem modis aversos à se homines Deus ad virtutem vocat, acque perducit. Non fuerit miraculum id, quod Augustino contigit: num propterea non licuit Augustino insuetam illam ac repentinam vocem singulari providentiæ Dei tribuere, quæ illum juberet consulere Codices sacros? nunquam nefas fuit interpretari tanquam peculiare Dei munus, in ea Apostoli verba statim incidisse, quæ morbum Augustini protinus ac tandem confecêre? Imò & Christianæ pietatis est, & humilitatis, hæc ita interpretari, totumque hoc tribuere immensæ Numinis clementiæ. Atque ita faceret quicumque alius sanâ doctrinâ ac Religione verâ imbutus, & à Phereponi scholâ alienus, eodem loco fuisset, quo Augustinus, dum sibi non ab similia contigissent.

At quod magis prodit, Phereponum unicè illuc inhiare, ut quantum fieri potest, in Augustinum congerat probra, illud est, quod primo loco objecit, nempe opus hoc Augustini *redolere superstitionem Ethnicam, ex fortuitis vocibus omnia captantem.* Utique in nullius animum unquam tam delicata religio intravit, ut superstitione: n arque ethnicismum objiçendos hic putaret Augustino Ideo ethnicam aruspicinam, & omnia Gentilibus dudum usitata, neque satis adhuc medio sublata; nos execramur, quia è causis omnino incongruis ediscere se posse homo putat

futuros rerum eventus Deo soli perspectos, & curiositate perversâ ac temerariâ ad ominandum, auguriisque fidem habendam, se abripi finit, & Superos ipsos hujus delirii sui auctores sibi aliisque fingit. Quid simile in Augustini facto? Hinc tumultus concupiscentiæ, illinc dulcissima Gratiæ vox incertum & auxium faciunt. Ad inopinatam illam vocem suas aures percutientem assurgit Augustinus; eandem pro cœli causa interpretatur, ad legendas Pauli Epistolâs accurrens locum sibi opportunissimum offendit, & fructus interpretationi responderet. Curiositatem nocentem hîc mihi, si potes, inveni; aut causam prorsus ab effectu absonam, aut in interpretante stoliditatem, immo propriam aliquam ominis faciem. Compertum habemus, Deum velle nos omnes salvos facere, ipsûmque adeo quorundam salutem conversionemve curare, ut eos non internis tantum externisque stimulis, sed patentibus prodigiis ad se rapiat. Vim quoque adhibuit Saulo spiranti minas & cædem in Discipulos Domini. Alios etiam ad Episcopatum, ad Eremum, ad Monasteria, ad bonam denique frugem hujusmodi arte sollicitavit, quorum exempla si congerere huc velimus, facile abuteremur Lectorum patientiâ. Ipse Augustinus memorat hoc loco Sancto Antonio Anachoretæ similia contigisse. Quapropter et si ne tam aperta quidem sit plerumque vox cœli in hisce circumstantiis, attamen piè sapienterque ii perpetuò faciunt, qui ita omnes eventus interpretantur, ut sibi persuadeant, se per illos divinitus à peccato revocari, & ad justitiæ amorem impelli. Tantum proinde abest, ut superstitione laborârit, quod Augustinus egit, ut contra commendandus sit, quod è voce, si ita etiam vis, omnino fortuitâ, occasionem arripuerit instituendæ vitæ Christianæ. Atque utinam Augustinum in pari casu imitarentur cœlo obsequentem, quicumque eum imitantur contra cælum peccantem.

*Quid mihi est ergo cum hominibus, ut audiant Confessiones meas, &c. Sunt verba Augustini Lib. 10. Cap. 3. Confess. Ansam hinc sumit Phereponus carpendi Augustini, quod Confessionum Libros scripserit: Sunt, qui suspicentur (Censoris verba sunt) cum multa Augustino, ob priorem vitam ab adversariis, quos non paucos habuit, objicerentur, eum Confessiones hæc scripsisse, quasi Apologiam quandam obliquierem, in qua fateretur, veluti apud Deum, quod negare non poterat; cætera verò prætermittiret, aut emolliret, & quacumque ad honorem suum facerent, quasi aliud agens exaggeraret. Quæ suspiciones,*



ciones, quamvis forte iniquiores sunt, ex inusitata tamen nascuntur ratione, quâ Augustinus cum Deo garrat, atque arguatur, Rhetoricoque fucō, quo plecta sunt hæc Confessiones. Mirabar, si non & hic Rhetoricum fucum Augustino Phereponus objiceret; intercalaris quippe hæc apud illum accusatio necesse est, si ve opportuna, si ve inopportuna, sæpè recurat. Sed quinam sunt isti, quos talia de Augustino suspicari Phereponus ait? Ego neminem alium novi præter Erasimum, qui in Præfat. ad Libros Retractat. & Confess. aliqua hujusmodi suspicionum semina iniecit, inquires, Augustinum tam diligenter in Confessionum Libris vitam omnem suam depinxisse, ut iniquior aliquis suspicari possit, non prorsus absuisse humanum affectum, *κρυδοζία* seu *φιλαυτία* cuiuspiam affinem. At Erasmus ipse, quanquam homo prurientis linguæ, multus est in purgando Augustino ab ista accusatione, idque tam solidè atque ex animo facit, ut laudatorem eximium, non vituperatorem Augustini sese hic præstet. Quinam ergo sunt ii, quos non solum suspicari posse, uti Erasmus ajebat, sed reverà nunc suspicari, Phereponus fatetur, latere simul atque apparere ambitionem Augustini in Confessionibus istis? Verùm patiatur Phereponus, hic non aliorum, sed meas me quoque prodere suspensiones. Si Phereponum excipias, nemo talia de Augustino est suspicatus, si ve suspicatur. Rhetoricus iste color est, quo invidiam Augustino conflare se posse putavit Phereponus, simulque à se amoliri injustæ criminationis, malignique judicii invidiam. Nempe qui toties, atque iniquissimè, Rhetoricam Augustini culpat, subinde religioni sibi non ducit, ejus Artis coloribus abuti, ut sanctissimum & clarissimum Virum infamiâ oneret.

Habemus ipsos Confessionum Libros. Huc volo finceros judices. Ego verò nihil dubito, quin cordatus quisque sentiat ac fateatur, longè nimium abesse Augustinum eo in Opere ab inanis gloriæ siti, atque ab amore sui. Imò paucos mihi ostendas Libros, quibus in amorem Dei vehementius excitentur legentium animi atque effectus. Ad hæc passim, & minimè conquistata modestia, & germana humilitas, & fervens pietas Scriptoris elucet, ut pium quemque simul ædificare soleant, & impios convertere ad Deum possint. Nulla autem minus æqua, immo magis perfidiosa suspicio est, quàm quæ sibi fingit, Augustinum conscribere ista voluisse, partim ut nonnullis, quæ sibi objiciebantur, enarratis, cætera aut prætermittet.

mitteret aut emolliret, & partim ut quæcumque ad honorem suum facerent, quasi aliud agens exaggeraret. Necessesse est enim, qui ita suspicatur, iudicium totius antiquitatis de Augustini pietati damnet, & oculos omnium rideat, qui in ejus Libris Scriptorem sanctissimum, & pietate nulli recundum, adhuc inveniunt Deo, non hominibus, loquitur pius ille vir in Confessionibus, Deo, inquam, ut Erasmi verba describam, *confite tur. cui mentiri nec pium est, nec tutum.* Ergo Augustinus, si suspicionem Phereponianam auscultamus, credidit, se Deum atque homines decipere posse Confessionibus illis. Horret animus talia cogitare de tanto viro, & de Libris iis, qui contrarium omnino sonant. Sed ipse quoque Phereponus iniquitatem suspicionis istius tandem agnovit & confessus est; nam postquam temperare sibi non potuit, quin adderet *esse multos* (quinam quæso?) *qui φιλαυτίαν ingentem, religionis specie tectam, hinc videre se putant;* subdit tamen, hosce homines ex eorum numero esse, qui sunt *prones ad male judicandum*, & gemitiam indulgentiam potius, quam nimiam severitatem, hinc esse adhibendam. Quo verborum lenocinio, fucòque Rhetorico quid aliud vult Phereponus, quam uno eodemque tempore calumniari, & calumniatorem parum intentis oculis subducere?

Nunc autem repetendum est, ingeniis malevolis, & affectu occæcatis nihil æquè facile occurrere, quam omnia adversariorum dicta & facta in deteriorem partem accipere, & denigrare, & ridenda exhibere. Quantum id absit à *Christiana charitate, à justitia*, atque à legibus germanæ Criticæ, nemo probus atque eruditus est, qui non è vestigio intelligat. An id Phereponus ignoret, non quæram; certè se hinc ignarum hujus doctrinæ apertissime prodit. Et quod magis mirere, in hoc eodem loco Phereponus, Magistrum Evangelii agens, meminisse nos jubet, *in Evangelio, ejusque auctore Christo, quarendam esse vivendæ normam, non in hominibus.* Utique optimis suis præceptis pessimè homo iste utitur, qui tot calumniolis suspicionibus, tantòque livore famam Augustini aggreditur, iudiciũque cæterorum hominum despiciens, in eodem facinora & vitia aut prætermissa, aut emollita fingit, & hanc ipsam, aliàsque accusationes sub alieno nomine perquam subdolè proponit Neque accusationibus contentus, sannas, derisionemque adjungit, inquit, Augustinum *in usitato modo garrere cum Deo, atque argu- tari.* Sed ab hujusmodi ingeniis caveant sibi Job, David,

cæte-

cæterique Prophetæ ; non enim video quid impedire id genus homines amplius possit , quominus & iis divinis Scriptoribus cum Deo disserentibus insultent, aut exemplo sint alius, ut insultent, quando tibi jam licitum censent irridere Augustinum tam piis affectibus cum Deo colloquentem. Ego multa huc pro Augustino afferre possem ; sed tantummodo rogabo Phereponum ipsum, ut Christiano pacatôque animo legat, quidquid idem Augustinus ad alios calumniatores obtrectatoresque suos respondit variis in locis, sed potissimum Enarr. 3. in Ps. 36. & Lib. 3. contra Epistolâ Petiliani. Nisi enim tum incipiat & minus amare semetipsum, & magis revereri pietatem ac modestiam Augustini, aut unus ipse sapere dicendus erit, aut de illius ingenio erit prorsus desperandum.

Levissima tamen videantur hætenus memorata, si cum iis conferantur, quæ Criticus iste habet ad Cap. 38. Lib. 10. Confess. Miratur ( pag. 476. Animadvers. ) Augustino *in mentem non venisse, fore ut Donatistæ, Manichæi, alique ejus adversarii dicerent, eum non displicere sibi, qui tamdiu non tam apud Deum, quàm apud homines, de se & suis loquatur ; & dum gravia peccata, quæ negari non poterant, aut minutiora ambitiosè prosequitur, laudes suas intercèdè minimè omittit. Miratur etiam, eum veritum non esse ne iisdem adversariis hic desiderarent confessiones eorum, quæ baptismum ejus secuta sunt, & quæ in ejus vita habentur.* Tum laxatis habenis acriùs urget Augustini famam, inquiens, malignos homines faciliè dicere potuisse, non esse mirum, si arti Rethoricæ inter pueros venditandæ valedixit, ut majorem utilitatem, amplioresque honores in Ecclesiasticis muneribus sibi quæreret, & ambitioni suæ, atque impotenti cupiditati inserviret. Fuisse etiam, cur à Deo veniam peteret, quòd sacras Scripturas interpretari sit aggressus, & tot volumina de iis scribere, cùm necessariis subsidiis careret. Quod si paupertatem, aliàsque virtutes Augustini quisquam memorasset, iidem dixissent, partim simulatas fuisse, partim falsas; ipsùmque Augustinum iis artibus ad summam irreplisse potentiam, quibus alii illustres utuntur. Et hæc maligni illi homines dixissent, aut dicere potuissent; nam quod est ad Phereponum, quanquam is accusationes hæc proponat, teterimisque coloribus pingat, atque amplissimo sermone prosequatur, non iis tamen fidem habet. *Ad me quidem quædâ attinet* ( postrema sunt Phereponi verba ), *ut non sum credulus ejusmodi crimina-*

*nationibus: sic non diffiteor me defensiones Augustini hisce de rebus, libenter lecturum fuisse.*

Modestiam hominis hujus erunt fortè qui mirentur; ergo Rhetoricam potiùs illiusque artificia. Sed libentiùs quoque, quàm Phereponus legerem fateor, quì hæc aded ingeniosa oratio à maledicentiæ, & quidem impudentis, culpâ excusari, atque defendi possit. Nisi nos cucurbitas ille velit, sciat nos probè intelligere, Phereponum eum esse, qui hîc alienis verbis Augustinum acerbissimè criminatur, atque etiam tacitè significat, nihil magis sibi cordi esse, quàm jure vel injuriâ, opportunis atque inopportunis locis, & cum propriæ etiam famæ periculo, divexare nomen ac libros sanctissimi hujus & incomparabilis viri. Verùm quis hominem ferat tam iniquis armis insidiantem Augustino? Si ex ejus sententiâ maligni tantùm homines hæc dicere potuissent, quo nomine ipsum compellabimur, qui has accusationes & reverà struxit, & callidè proponit, atque inculcat?

Rem tamen ipsam levi brachio attingamus. Quæ hîc Augustino opponuntur, objicere potuissent Manichæi, Donatistæ aliisque ejus adversarii, si Pherepono credimus Potuissent; puto; nam quid odium & ira comminisci, & eructare non possunt? Non tamen objecerunt, quanquam irati, quanquam in Augustini vitam, nedum famam furiosè animati, quanquam aliis in ipsum accutionibus usi. Cur tanta in iis temperantia, atque modestia? Non aliâ sanè de causâ, quàm quod Hæreticis iis in mentem venire non potuit, criminationibus ejusmodi speciem aliquam veri subesse. Et cur desiderarent ab Augustino confessionem eorum, quæ post ejus baptismum secuta sunt, quando nihil audire poterant, quod in confitentis gloriam non concessisset? Novus campus carpendi Augustini Pherepono sese apperuisset, si ea quoque facta, quæ certè laude non caruissent, persecutus fuisset Augustinus. Sed ab alijs sese discat jam Phereponus. Multis criminibus objectis Augustinum Petilianus Donatista etiam invaserat. Ad eum palam hæc inter cætera vir piissimis respondebat Lib. 3. Cap. 2. contra Lit. Petil. *Jam quod sequitur, etsi mihi non audeo coaptare ut dicam, nihil enim mihi conscius sum: fidenter tamen in conspectu Dei dico, nihil eorum, quibus Petilianus tempus vitæ meæ, posteaquam in Christo baptizatus sum, criminatus est, mihi conscius sum, &c.* Infra idem repetit Cap. 10. & in suæ innocentiae testimonium fidenter appellat quoscumque suæ vitæ conscios habere poterat. *De tempore, ait, vitæ meæ, quod est*

*est post Baptismum, vobis quicumque me noſtis, ſuperfluo loquor ex eis, quæ nota eſſe hominibus poſſunt. Hi verò, qui me non noverunt, non ita iniqui eſſe debent in me, ut magis de me credant Pétiliano, quàm vobis.*

Quod eſt ad accusationem Auguſtini Scripturas ſacras interpretantis, reſpondebimus infra, uno quippe icſtu totum ſanctorum Patrum chorum, & univerſa antiquitatis ingenia, Phereponus noſter hîc ferit. Cùm verò ille, ſivè maligni neſcio qui homines Phereponi ore loquentes, niſ mirum eſſe dicunt Auguſtinum valedixiſſe exiguis Rhetoricæ Scholæ emolumentis, ut in Eccleſia, hoc eſt in ampliori theatro, uberioriſque cum fructu artem ipſam exerceret, ſuæque ambitioni lora feliciùs laxaret: ſuperfluum puto calumniæ & maledicentiæ notas in iſta accusatione conquirere, quippe id omnium oculos incurrere mihi videtur. Diceres, mirabili ingenio Auguſtinæ expellendæ famis defuturam fuiſſe rationem, niſi ad Eccleſiaſtica munia ſibi aditum aperuiſſet. Nemo eſt tam parum in Auguſtini vita verſatus, qui neſciat, quàm longè vir ille piſſimis abierit à pravis hiſce affectibus, & cur magiſterii Mediolanenſis onus abjecerit. Repetita autem Africa nihil ille antiquius habuit, quàm ſeculares curas, atque omne honorum genus effugere, ſuis facultatibus in pauperes diſtributis Monastiſcam vitam amplexus eſt, jejuniiſ, orationibus, boniſque operibus vacans, donec poſt exactum triennium in eo ſanctiſſimo vitæ inſtituto, invitus, & nihil tale cogitans ad gradum Preſbyterii ab univerſo populo raptus fuit. Epiſcopatus ſarcinam reluctans deinde ſuſcepit; quo in munere quandiu vixit, eam ſanctitatem morum, fugam divitiarum, continentiam, humilitatem, zelum, aliâſque virtutes in ſe conjunxit, ut facilè mirari debeas, diſſicillimè verò poſſis imitari.

Sed vide, qui ſe ab adeò evidenti luce Phereponus expediat. *Ea, inquit, maligni homines dixiſſent, partim ſimulationem eſſe, partim ſatis eſſe divitem, qui haberet, quod aliis largiretur, &c.* Malignos utique ac effrontes eſſe neceſſe eſt, qui talia blaterant, & quicumque alius non ſolùm iſta in Auguſtinum conſingere non erubescit, ſed etiam placido animo tantam veritatis injuriam proferre ſuſtinet. Cedo tabulas, teſtes, argumenta quibus accusationem hanc fulcias. Ciceronis verba ſunt in Orat. pro M. Coelio: *Aliud eſt maledicere, aliud accuſare. Accuſatio crimen deſiderat, rem ut deſinias, hominem ut noſet, argumento probeat, teſte conſirmet.* Hîc certè nihil habent, quo maligni criminationem conſirmet, imò

imò innumera sunt nobis, quæ accusatoribus os obstruant. Et illud in primis certum est, simulatorem virtutis, non eo pietatis, humilitatis, ac veritatis affectu scripturum fuisse, quæ ubique legimus in Augustini Libris, neque facturum quæ ab Augustino facta fuisse dubitat nemo. Sed, ut vetus verbum habet: *Nil probat calumniator, criminatur omnia*. Interest autem hominum omnium non ferre ludibrium tale veritatis, & alienæ famæ; quotus enim quisque in posterum erit bonus, pius, ac honestus, quem deicere de loco, & execrationi quorūcumque exponere non valeas, si hypocrisim ac simulationem virtutis, quando aliud non occurrit, objicere & promptum sit, & non illaudabile? Attamen habet hīc Augustinus, quo se consoletur, exemplum videlicet divini Servatoris nostri, quem paribus calumniis excipiebant olim Pharisei. Quale verò exemplum habituri sint huiusmodi Censores, quo se defendant à crimine Sycophantiæ, videant ipsi. Ego non video.

Neque parum lepida est Phereponi exceptio contra Augustini paupertatem. *Satis divitem fuisse*, inquit. *qui haberet, quod aliis largiretur, & inde tantum sibi sumeret, quantum vellet*, Honestissimæ & christianæ paupertatis ideā caret, qui hæc scribit. Dives ille profectò dicendus est, Christi sectator, qui, ut Minutii verbis utar, *non eget, qui non inhiat alieno, quē Deus dives est*. Hic, inquam, dives germanam in se paupertatem fovet; nam non opum defectus, sed animus pauperem facit. Homo videlicet nihil cupiens, necessariis tantum contentus, & parcus sibi, & in egenos effusus, & pro Christo nihil proprium possidens: ille verè est pauper. Et mirum est, qui Phereponus, ab aliis Novatoribus discedens, non solum non damnat mendicitatem Monasticam, sed eandem quoque talem exigit, ut nihil habeat pauper Evangelicus, quod aliis pauperibus distribuatur. Quasi non habuerit Christus, non habuerint Apostoli, quæ sibi ad victum atq; vestitum necessaria forent, & quæ egenis identidem dispensarent. Episcopum verò in primis hospitalem Paulus desiderat: quod fieri nequit, si nihil ei supersit in alios distribuendum. Illud etiam constat, Episcopos non Dominos, non possessores esse bonorum Ecclesiasticorum, sed ministros, atque cœconomos, eorūque caritati potissimum commendatam esse pauperum curam. *Gloria Episcopi est, pauperum inopiā providere*, inquit Sanctus Hieronymus ad Nepotian. de Vita Cler. Qua ergo ratione Phereponus & paupertatis gloriā Augustinum spoliatur, eūque non patitur aliquid habere, quo hospitem se præbeat, & aliorum indi-

indigentia succurrat? Minus autem excusandus ille mihi videtur, dum & legere potuerit, & falsi arguere non poterit, quæ de Monastico Augustini instituto, vel post Episcopatum servato, scribit eruditissimus ille Monachus Benedictinus à Congregatione S. Mauri, cui debemus novissimam vitam Augustini. Liceat mihi pauca quædam describere, quæ ille ex variis documentis collecta habet. Li. 3. Cap. 2. §. 8. *Cum Augustinus in Episcopi domo secum Clericos suos haberet, cum iisdem formam primorum Christianorum Hierosolymis degentium quibus erant omnia communia, nihil proprium, quantum poterat, sectabatur. In illius societate nulli licebat suum aliquid dicere, sed omnia omnibus erant communia; & quotquot in eam admittiebantur, hanc sibi legem sciebant impostam, &c. Sic omnes Clerici cum eo pauperes erant, simul frastolantes misericordiam Dei ex redditibus possessionum Ecclesie, vel ex oblationibus fidelium, quæ singulis pro cuiusque indigentia distribuebantur. Lege reliqua, uti & Cap. sequi 3. & 4. ubique palam fiet, quantum alienus ab omni cupiditate Augustinus foret, & quam præter jus, quamque inopportune Phereponus virtutes illius suspectas hic facere velit.*

Pergit Cenfor gnaviter quærere, ubicumque potest, Augustini crimina; & ubi non invenit, liberaliter ipse somniat, ac facit. In Animadvers. ad Lib. 1. Cap. 11. de Ordine pag. 478. vellet ille nunc exstaret Opusculum Theodori de origine & natura mundi. Cur natum sit Pherepono tale desiderium, divinent quæso eruditi. Omnia puto excogitabunt; sed germanam fortasse causam non attingent, quam tamen sincerissimè nobis Cenfor exponit. *Ex eo enim, inquit, intelligere liceret, an hic ei aduleatur (quod sanè suspicor) Augustinus pro more sæculi sui, quo, si unquam aliàs, immodica laudes in usu vulgari fuere. Votum profectò dignum tali Critico, ut si non aliunde certi, nimiumque certi essemus de illius odio atque livore contra Augustinum, facile velex hoc vestigio intelligere possemus. Et quænam tandem sunt, quæ hic Pherepono suspicionem adulationis ingessere? De Theodoro hæc scribit Augustin. Vir & ingenio, & eloquentiâ & ipsis insignibus, muneribusque fortuna, & quod ante omnia est, mente præstantissimus Theodorus, id agit, ut & nunc, & apud posteros, nulum genus hominum de litteris nostrorum temporum jure conquæatur. Dic, obsecro, quid hic feriat Lectorem vel delicatissimum? Etiam si incomparabili ingenio, studioq; litterarum non excelluisset Theodorus ille, nihilominus ea est ipsi ab Augustino tributa laus, ut neq; laudatorem prænitere, neq; laudato pudorè incutere deberet. Ad hæc non alius est hic*  
Theo-

Theodorus, quàm Fl. Manlius Theodorus qui à Claudiano & Symmacho summis extollitur laudibus, & eloquentiæ potissimum ac eruditionis gloriâ commendatur. Memorat ipse Pherepon Dissertationem Rubenii de vita istius Theodori, quo ex libello elucet, quantus vir, quantusque Philosophus ille fuerit. Sed præcipuè legendus est ejusdem insignis Panegyricus inter Claudiani Carmina. Attamen ne quid hîc dilimulem, illustrem egomet auctorem Pherepono indicare volo, hujusmodi suspicioni faventem. Is Augustinus appellatur, Episcopus Hipponensis, cujus verba sunt L. 1. C. 2. *Retrahit Discipulus et autem illic* (id est in Lib. de vita beata,) *quod Manlio Theodoro, ad quem Librum ipsum scripsi, quamvis docto & christiano viro, plus tribui, quàm deberem.* Sed hinc volo Phereponus ipse discat, num pronus ad assentandum foret Augustin. & an parum rigidus sui ipsius censor esset, quando ne hîc quidem sibi ignoscit. Æqui autem ac honesti Critici erat, ex hac potius retractatione capere consilium laudandi Augustini, quàm ex elogio illo occasionem arripere vituperandi. Quanquam quid dico? Ità me Deus amet, elogium illud retractandum Augustino non erat, cum tale sit, ut lividis tantummodo hominibus assentatorius videri possit. Et reapse ab August. improbatum minimè fuit. Retractionum verba cadunt super Librum de vita beata inscriptum ipsi Theodoro, non super elogium Theodori in Lib. 2. de Ordine insertum. Deinde nihil aliud emendare in animum induxit Augustinus, quàm quædam in Præfatione ad eum Lib. de Vita beata non satis graviter dicta, quæ cum delicata pietate non benè componi posse putabat: cujusmodi sunt: *Ad id, quod desidero* (hoc est ad obtinendam vitam beatam) *te unum intueor, teque apertissimum semper adoror, &c. Accipe, cujusmodi auxilium abs te certus expectem.* Eadem repetit infra, inquit: *Obsecro te per virtutem tuam, per humanitatem, per animarum inter se vinculum, atque commercium, ut dexteram porrigas.* Hoc autem est, ut me ames, & à me vicissim te amari credas, earumque haberi. Quod si impetravero, ad ipsam beatam vitam, cui te jam habere præsumo, parvo conatu facillimè accedam. En quæ Augustino Librum illum emendaturo non amplius ferenda videbantur. Nam ad ingenium, ac eruditionem Theodori quod attinet, nihil in eo libro August. habet, quod spongiâ indigeat, cum & in Retractionibus ipsum Theodorum *doctum & christianum virum* appellare pergat Eadèmq; de causa in retractandis Libris de Ordine obelo nullo confixit Aug. memoratum elogium Theodori confixurus, si per illud veritatem læsam animadvertisset.



Præstare tamen nolim, placitura hæc esse Pherepono, quando ne ipsi quidem *Retractionem Libri* ab eo gratiam iniere. Pag. 484. Animadv. ad Lib. 2. Cap. 29. de Genesi, *locos*, inquit, *lib. 3. de lib. Arb. in dictos prætermisiss Augustinus*, dum alios, qui multo minus torqueri poterant, explicat. Quam in re an ars aliqua fuerit, judicent alii. Candorem quidem & modestiam præ se ferunt *Retractiones*, sed debent ingenue fieri, retractatis, quæcumque falsa putantur; non paucis quibusdam exigui momenti, relictis gravioribus, ne forte adversarii objiciant se similia sentire. Sed Augustini animum noverat Deus. Tria contingere hic potuere. Primum est, falsa in Augustini Libris ea non esse, quæ nunc falsa Pherepono videntur. Proximum est, etiamsi veritati ea adversentur, Augustinum tamen id nequaquam animadvertisse. Tertium denique, animadvertisse quidem, sed noluisse retractare, atque corrigere. Catholicorum sententia est, Augustinum in doctrina *de libero Arbitrio* nequaquam aberrasse; sed quando Censori nostro, non secus ac Pelagianis tum antiquis, tum recentibus, aliter visum est, nos in iis infelicitatem ac tenebras ingenii miseremur perversam voluntatem non facile accusemus. Errant nimirum, sed se errore duci non putant. Catholicos contra in errore versari sibi persuadent Pelagiani; sed & ipsi nos contra votum nostrum cœcurire intelligant. Nam & iustitia & caritas poscunt, ut in iis similibusque quæstionibus contra animi sententiam à veritate deflexisse putetur, quisquis deflectit, nisi aliter credere nos jubeant contraria argumenta. Atque ita sane de Augustino credendum, si etiam fateantur, quibus Augustini doctrina quælibet nondum probatur. Nam quis in animum iudicat, usque adeo desipuisse, & à rationis, atque conscientie legibus deflexisse Augustinum, ut sciens prudens erraverit, erroresque in Religione tu pissimos ac perniciosissimos agnoverit quidem, sed venditare perrexerit? Necesse plane foret, virum excogitare basilice impostorem, ac postremæ iniquitatis reum.

Et tamen, si quid intelligimus, non alio collineant Phereponi tela, quàm ut Augustinum nobis exhibeant hominum nequissimum. Callidissimè nempe dubitare Censor nos vult, an ars aliqua in Augustinianis Retractionibus fuerit; ingenuitatem ibi desiderat: & Augustini animum ita in medio relinquit, ut suspicari possimus, num veritatis amore, an consilio illudendi orbis, Retractiones scripserit, videlicet ut solis exigui momenti erroribus dispunctis, eam sinceritatis famam sibi pararet, quæ fidem postea apud præsentis ac posteros conciliaret gravissimis erroribus intactis, sibi probe perspectis. Equidem non dubito, quin atrocitatem suspicionis sive calumnie istius, quisque intelligat, simulque miretur, qui Batavo, seu Helvetio homini tanta adversus Au-

gustinum confidentia esse potuerit, ubi non de opinionibus, sed de interno Augustini animo res agitur. Quas enim Criticas leges hic pro se Phereponus laudet, contra clamantibus cunctis iustitiæ, caritatis, & honestatis legibus? Quæ argumenta adhibere potest, ut crimine temeritatis atque improbitatis sese absolvat? Neque vero tam sui, atque Dialecticæ oblitum ipsum reor, ut ideo Augustinum fraude hac usum fuisse argumentetur, quia uti is potuit. Nullum crimen esset, cuius & ego reum facere Phereponum, & quemcumque alium, deinceps non possem, si vim ullam habere deberet iniqua adeo argumentandi ratio. Conscientiæ ergo suæ Phereponus consulat, redeatque illuc, ut tantummodo dicat, errasse Augustinum. Errabit vel sic quidem talia affirmans accusator, mea & omnium Catholicorum sententiâ; sed infamiam saltem evadet, quam nunc iurare dum vult Augustino, nescio qui declinare ipse jam possit.

Auctor est Augustinus in Epist. 71. olim 10. quæ est ad Hieronymum, Episcopum quemdam, quod utens Hieronymiana sacrorum Codicum interpretatione dictionem unam aliter exposuisset, quàm antiquus mos haberet, ingentes excitasse turbas in populo, ita ut *coactus demum fuerit velut mendosiâtem corrigere, volens post magnum periculum non remanere sine plebe.* Insurgit hic Phereponus, & inquit pag. 491. *Mala sane fuisset Astra plebs, quæ tantilla de causa Episcopum suum deserere parata fuit, sed videtur esse, ut probe obfecit Hieronymus, fabella Punica, qua hominem terrere voluit Hipponensis Episcopus.* Equidem in istam controversiam ægre me rapi sentio, quam non ita dirimere pro uno possum, ut alterum simul non arguam & culpem. Immo liceat mihi dicere, aliquid habeo, quod illic tam in Hieronymo, quàm in Augustino desiderem, sive statum controversiæ spectem, sive modum. Attamen quod est ad narrationem Augustini de Episcopo illo in discrimen adducto ob interpretationem Hieronymi, nihil me sollicitat, quod ipse Hieronymus ad Augustinum ea de re scribens, inquit: *Huiusmodi in Epistola tua textis fabulam: Quidam frater noster Coepiscopus, &c.* Novimus Hieronymi viri alioquin sanctissimi stylum aculeatum, stylum iratum plenum, ac potissimum dum sibi pugnat. Quid mirum si irato ferventique viro excidit, huiusmodi, exceptione se suosque Libros & utilem certe laborem tueri. Cordatus nemo propterea credat Augustinum fabellæ atque imposturæ tam gravis in Hieronymi caput auctorem. Quod vero tolerandum fuit in Hieronymo ægre ferente, optimum consilium suum pessime acceptum ab Augustino fuisse, id nescio qui nos tolerare nunc debeamus in Pherepono, quem Augustinus nusquam

quam læsit, quique non irritatus, acrius tamen quam ipse Hieronymus Augustinum accusat. Nimia nempe hominis hujus confidentia, dum ex arbitrio atque imperio fabulatorem facit virum æque pium ac doctum, & quantum ejus mores & dogmata docent, à dolis atque imposturis alienissimum. Fac etiam fuerit fabella; at æqui honestique Censoris erat Augustinum potius suspicari à ficto rumore deceptum, quam eundem venditare certissimum ipsius commentum artificem, cum præsertim alio sub cælo ea res contigisse dicatur. Sed ne fabulam quidem fuisse ubi nos contendamus, quis Phereponus contrarium ostendat? Vix etiam evincere possis, Augustinum illic agere de *cucurbita* atque *hedera*. Enimvero numquid mirum est, paratam fuisse plebem illam recedere ab Episcopo suo *tantilla de causa*? Etsi levis error futurus ille fuisset, attamen cum videretur Episcopus idem sine causa divinas adulterare Scripturas: nimio zelo adversus ipsum accendi potuit religiosa populorum cura de veteri Traditione tuenda. Jam patet, quibus diris divini Scriptores absterruerint homines, ne vel unum verbum adderent, detraherent, aut immutarent in Codicibus sacris. Patet etiam, quantopere Christianis antiquis cordi fuerit, Scripturæ sacræ exemplaria à corruptoribus tueri. Ad hæc Paulo Samosateno Antiochenus populus, Nestorio, & Iconoclastis Constantinopolitanus, Arianis populi alii summo studio resistere, ut sanctus Hilarius ævo suo diceret, *religiosiores fuisse aures Populi, quam corda Sacerdotum*. Ipse verò Hieronymus in Epistola 81. olim 18. inter Augustinianas acrem hanc accusationem delinire postea visus est, ad Augustinum rescribens, & inquit: *Si legisti librum Explanationum in senam, puto quod ridiculam cucurbitæ non recipias questionem. Si autem amicus, qui me primus gladio petiit, stylo repulsus est, sit humanitatis tuæ atque iustitiæ accusantem reprehendere, non respondentem.*

Pag. 522. Animadv. in Epist. 113. aliàs 110. Phereponus Augustinus sugillat, quod se Episcopum Hipponensem ordinari passus fuerit, vivente adhuc Valerio Civitatis illius Episcopo. Id Nicæno Canone octavo interdictum memorat; tum subdit: *Non intelligo, qui usus ipse Ecclesiæ, ex quo constabat, unum in singulis urbibus Episcopum esse oportere, non monuerit Hipponensem, hoc illicitum esse: Nam si collegam unum sibi adungere licuit, quidni & plures? Quam magnam hoc aperuit fenestram adversariis Augustini, dicendi hominem sape in utilitatem suam errasse?* Abstinuissent ab hujusmodi calumnia adversarii Augustini, quos inter nunc primas ducit Phereponus, si diligentius perpendifsent rem ipsam. Ignorabat Valerius, ignorabat Augustinus, Nicænum Canonem obstare. Cujus rei fidem facit in laudata Epistola Augustinus. Immo nihil contra Canones tunc agi

cenfuerunt alii Africæ Epifcopi , iique omnium præftantiffimi. Audi Poſſidium in Auguſtini vita Cap. 8. *Egit Valerius ſecretis literis apud (Aurelium) Primatem Epifcoporum Carthagenſem, allegans imbecillitatem corporis ſui, atque ſiquæ gravitatem, & obſecrans, ut Hipponenſi Eccleſia ordinaretur Epifcopus, quo ſua Cathedra non tam ſuccederet, ſed Conſacerdos accederet Auguſtinus.* Quæ igitur beatus Valerius optavit, & rogavit ſatagens, reſcriptio impetravit. Audi & alia Poſſidii verba : poſt quam petitionem ad viſitandum adveniente ad Eccleſiam Hipponenſem tunc Primatæ Numidiæ Megaliſio Calamænſi Epifcopo, Valerius Antilles Epifcopis, qui forte tunc aderant, & Clericis omnibus Hipponenſibus, & univerſa plebi inopinatam cunctis ſuam inſinuat tunc voluntatem, omnibusque audientibus gratulantibus, atque id fieri perficique ingenti deſiderio clamantibus, Epifcopatum ſuſcipere, contra morem Eccleſiæ, ſuo vivente Epifcopo Preſbyter Auguſtinus reſuſcitabat. Vides Auguſtinum, quanquam ignoraret, Nicæno Canone huiusmodi ordinationes prohiberi, probe tamen recogitaſſe, ab ea ordinatione abhorreſcere conſuetudinem Catholicæ Eccleſiæ, ipſumque adeo Auguſtinum obſtitiffe Epifcopis, ne ſe Epifcopum ſacerent. Sed vicit plurimum ſententia. Imò exempla ſimilium ordinationum in medium allata fuere. Dumque illis fieri ſolere ab omnibus ſuaderetur [inquit idem Poſſidius] atque id ignaro tranſmarinis, & Africanis Eccleſiæ exemplis probaretur, compulſus atque coactus ſuccubuit, & Epifcopatus curam, & majoris loci ordinationem ſuſcepit. Auguſtinus ipſe ad Paulinum Ep. 31 aliàs 34. de ſarcina Coepiſcopatus ſibi à Valerio impoſita ſcribens, hoc idem confirmat, inquiens: *Quod quidem, quia tanta ejus caritate, tantoque populi ſtudio Dominum id velle credidi, nonnullis jam exemplis præcedentibus, quibus omnis mihi excuſatio claudabatur, vehementer ſimul excuſare.*

Quem ergo errorem apertis oculis admiſſum, quam errandi voluntatem ad proprium commodum in Auguſtino demonſtres? Detrectabat ipſe honorificum munus; compulſus à Valerio, ab aliis Epifcopis, à Clero toto, ab univerſa plebe, ſe paſſus eſt vinci, annuente etiam Aurelio Carthagenſi, Africæ Primatæ. Ex iis nemo ſuſpicabatur, violatum iri propterea Canones Nicænos; & quanquam Eccleſiæ conſuetudo ſecus agendum moneret, exemplorum tamen ingeſta copia rationem omnem cunctandi & reſuſcitandi ſuſtulit. Rem ego non probo, neque ſubinde probavit ipſemet Auguſtinus, ubi intellexit, Nicænam Synodum aliter ſanxiſſe. Verum eæ tunc circumſtantiæ in Auguſtini ordinationem confluxere, ut non ſolum excuſatione dignum ille ſe præbeat, ſed iniquæ accuſationis accuſari mereatur, qui tacite nobis perſuadere cupit, Auguſtinum ſcienter atque lubenter tunc erraſſe.

quòd error ipse cederet in suam ipsius utilitatem. Cùm verò inquit Phereponus : *Sic collegam unum sibi adungere licuit, quidni & plures?* non videt homo acutus, frustra id peti, nam qui collegam, sive coadjutorem sibi adsciscebat, ea ratione movebatur, quòd ipse aut senio aut morbis ad obeunda Ecclesiastica munia ineptus jam esset, & Collegam hunc sibi successorem deligebat, consentiente Clero, populo, ipsisque Provincialibus Episcopis. Atqui unus Collega id implere valebat, quod Episcopus senescens implere amplius non poterat, atque unus Episcopo morienti successor erat dandus. Quamobrem & superfluum, & incommodum consilium fuisset plures adligere uno tempore coadjutores, nullaque necessitas, nulla potens ratio succurrisset, quæ aut suaderet, aut excusaret ut unius, ita & plurium cooptationem.

Alia tamen habet Phereponus, quæ in memorata Epist. 113. Olim 110. sibi non arrident; quippe illic Augustinus Heraclium sibi Successorem in Episcopatu designat iis verbis : *Presbyterum Heraclium mihi successorem volo.* Canonem LXXVI. Apostolorum, & Synodi Antiochenæ sub Constantio habitæ decreta hic violata Phereponus clamat; stupetque ignorasse Augustinum, illicitum hoc fuisse, cùm præsertim consensum Coepiscoporum ille non exquisierit, quem tamen exigebat Synodus Nicæna. Profecto interdixere Canones [ & jure maximo interdixere, ] ne sacri Ancistites sibi successorem deligerent, atque constituerent. Sic occursum ambitioni, & propriæ utilitatis studio, quibus affectibus occurrat interdum Episcopi indignos eligere, & Episcopis Provincialibus, Clero, ac populo libertatem electionis præripere poterant. Sed hoc ad Disciplinam spectat, eamque eligendi successoris libertatem eadem Ecclesia modo permittere, modo prohibere potest prout conducibilius videatur. Nam idem quoque periculum quandoque imminet, si Episcopi, Clerus, & populus eligant, ac si unus Episcopus, & plus contra Episcopus gregi suo, dum vivit, melius consulere interdum potest, quam plures. Illud verò dubium esse non debet, quin Augustinus optimum Successorem Ecclesiæ suæ dederit, omni ambitionis, atque utilitatis propriæ affectu sublato. Immo id unice à se præstari palam testatus est Augustinus, ut ne per *ambitiosos & contentiosos* Ecclesia Hipponensis perturbaretur post mortem suam, uti aliis in Ecclesiis acciderat. Cleri etiam, & populi duorumque Episcoporum suffragio res acta. Sed quod in primis huc facit, illud est, his temporibus nequaquam obtinuisse in Africa prohibitionem illam de Successore sibi instituendo. Suppetunt illis exempla, Immo & in nonnullis aliis Provinciis, quæ ad ferre non est hujus loci, quippe à Justello, Breveregio, Thomassino aliisque congesta. Antiochenis autem Canonibus Africa se obligari fortasse non censuit, incertumque est, an

eadem ipsi Canones Afris essent satis perspecti. Eadem diei possunt de Canone, ut ajunt, Apostolum, cui etiam alia explicatio convenire potest. Quare nemo ex Africanis Patribus ea tempestate illicitum, prohibitumve putabat, sibi idoneos eligere successores, dum Cleri, & populi consensus rogaretur, atque obtineretur, & electus Episcopalem consecrationem post eligentis mortem expectaret: quæ omnia Augustinus præstitit in eligendo sibi successore Heraclio, quem Eradium corrupti Codices appellabant.

## CAPUT XV.

*Nimius sui amor falso objectus à Pherepono sancto Augustino, cujus conatus in Pelagium ejusque errores fluxerunt ab amore unius Catholica veritatis. Ficta mansuetudo in Hereticos perperam afflicta Catholicis Episcopis. Comprimenda Hæreses vix orta, neque erroribus concedendus nimia lenitate aditus: Convicia & contumelia varia Phereponi in sanctum Augustinum. Quàm hac hominem Christianum & Criticum dedeçant. Quanto contemptu feratur ille in omnes sanctos Patres.*

**C**irciter Annum Christi 394. *Expositionem Epistola ad Romanos* elucubravit Augustinus nondum Episcopatu initiatus. Nonnulla ibi occurrunt Semipelagianis postea natis faventia, sed emendavit vir sanctus Lib. 1. Cap. 23. Retrahit. confessus, se eo tempore *nondum diligentius quassasse, nec adhuc invenisse, qualis sit electio Gratia.* Miratur Phereponus pag. 338. Animadv. qui Augustinus sponte, ac à nullo damnatus, dogmata eadem subinde fuerit execratus. Tum oculo in intima Augustini præcordia conjecto, *Si nunquam tamen, ait, exorta fuissent rixa Pelagiana, in iis sententiis mortuus esses. Imo verò fortasse nunquam ita invehitus in eas fuisset, nisi Pelagius aliquid in ejus scriptis carpsisset.* Primam verò indignandi in Pelagium occasionem Augustino fuisse subdit, quòd Pelagius Romæ dum esset, ferre non potuerit ea Augustini ad Deum verba: *Da quod jubes, & jube quod vis;* quæ in Confessionum Libris adhuc leguntur. *Hinc prima origemalis,* inquit Censor, *nam nihil magis irritabile est Scriptoris, qui pro scriptis postea, tanquam pro aris & focis pugnant.* Qui ne de nomine quidem Augustinum nosset, hæc tamen audiciens non ignoraret, quàm parum fidei debeatur accusationi

huiusmodi , ad quam nempe confirmandam nulla ratio accedit. Quis Censori huic narravit, irritatum fuisse Augustinum, & ad sententiam mutandam odio adversantis Pelagii fuisse compulsum? Nimium dictatorie ista dicuntur. Sed huius criminationis iniquitas longe melius se prodet, ubi recogites, quantum à cœco suarum opinionum amore abesset Augustinus. Nihil aliud sunt Retractionum Libri, quàm illustre argumentum ardoris illius, quo Augustinus veritati uni supra suos affectus obsequabatur. Deinde vix alium reperias, qui demissius Augustino se emendari pateretur, & mitius haberet adversarios suos, quanquam interdum procacissimos, & palam rationi ac veritati injurios. Onerare possem librum, si necessitas posceret, exemplis ejusmodi & humilitatis, & modestiæ. Denique tam parum cum veritate congruit, Augustinum in iram & odium adversus Pelagium fuisse concitatum, quod hic verba quædam Confessionum moleste tulcrit, ut cum Pelagius longe post illa tempora humanissimis literis ad Augustinum datis responsionem accepisset amicitiae plenam, Augustinus deinde necesse habuerit se purgare, quasi Hæreticum hominem supra meritum commendasset.

Quod ergo Augustinum armavit in Pelagium, Apostolicæ doctrinæ, veræque Religionis cura fuit. Eadem & armavit in Manichæos, in Donatistas, in Arianos, à veteri autem Christianorum Traditione abhorruisse dogmata Pelagii, atque Cœlestii, jam dudum ostenderunt eruditi viri, ostendit Augustinus ipse, & ejus temporis Ecclesia, quod ne ipsum quidem Pelagium fugiebat, qui non aliter quàm clanculum, & sub mille verborum ambagibus, ingentique cum simulatione suam huc illuc novitatem disseminavit. Quid faceret Augustinus zelo Domus Dei supra quamplurimos ardens? Africanæ, atque Orientales Ecclesiæ, sanctus Hieronymus, Paulinus Ambrosii discipulus, alique classicum protinus cecinerunt in erumpentem Hæresim. In publicam rem tunc & ipse Augustinus operam suam conferendam esse putavit. Quamobrem en veras causas, cur Pelagium, sive ut melius dicam, Pelagii dogmata exagitare cœpit Augustinus. Quas commentus est pro tuo arbitrio Pherponus, si nos levitatis saltem arguamus, æquo jure procul dubio agemus. Quod si Augustinus procedente tempore renuntiavit sententiis nonnullis, hisque paucis: ex ipsius testimonio, & rei evidentia constat esse factum, quod attentius subinde investigaverit cum Scripturarum sacrarum mentem, tum Ecclesiasticæ Traditionis vocem. An verò crimen est meliora discere, & melius sentire? Et numquid Augustinus pro suis sententiis tanquam pro aris & focis pugnare paratus fuit, qui sententias priores re ipsa deserere non dubitavit, statim ac veritas explorata id ab ipso exegit?

Retraſtavit quoque vīr ſanctus quoddam aliud effatum ſuum in Expoſ. Cap. VII. 19. 20. ad Rom. uti Semipelagianum. Hinc Pherepono anſa præbetur traducendi Auguſtini tanquam *ſummaſpere ſemerariū* hominis, qui ea olim ſcriberet, quæ, ut ipſe deinde contendit, in Eccleſia minime tradebantur. Quod ſi tradebantur, non capit Phereponus pag. 536. Animadv. *qui damnari petuerint quaſi novatores & exiſiales Hæretici, qui id docebant quod antea ubique docebatur, & quod cum laude ſcripſerat Auguſtinus.* Sed fruſtra invidiam Auguſtino creare, fruſtra Pelagianam novitatem tueri molitur Phereponus, parum hic ſe verſatum exhibens in Eccleſiaſtici juris œconomia, immo & in eorum temporum Hiſtoria. Eſſe poſſunt dogmata quædam adhuc inter Scriptores dubia, atque ab Eccleſia nondum calculis poſtremis definita. Hæreticum nomen alterutram partem tuentibus tunc tribuere non licet. Ubi Eccleſia ſententiam tulit, tunc aliter ſentire quàm Eccleſia, neſas eſt. Ita fuit tempus, quo ſententia de iterum baptizandis Hæreticis inter hæreticas referenda fortè non erat. Idem Semipelagianis Dogmatis accidit. Non ideoſcirco læſiſſe Fidem dicti ſunt Vincentius Lirinensis, Hilarius Arelatenſis, Caſſianus Fauſtus, Gennadius, Sidonius, aliiſque aut Lirinenses, aut Maſſilienses, quòd Semipelagianiſmum foverint. Tunc ſolùm execranda corripit eſſe eorum doctrina de initiis fidei, cùm Synodus Arauſicana expoſuit, quid hic ſentiret, ſentiendumque mandaret Eccleſia verax. Pleriſque autem è Patribus nonnulla excidiſſe videmus, quæ deinde ſacris Conciliis divina oracula promentibus minime probata fuère. Sed illi incautè, inculpatèque ita ſenſere, paratiſſimi contentire cum Eccleſia, ſi hæc in diverſam abiſſet ſententiam, & ideo illis opinionibus addiſti fuerunt, quod nondum ſatiſ diligenter exquiſierant, quid Apoſtolica de iis Traditio haberet.

Quod ergo ad Pelagianos errores attinet, eos ſua novitas in oculos omnium ineurrens execrables ſtatim fecit. Tum proptius in eorum damnationem conſenſit Eccleſia. Concilia non ſemel ab Afris Epiſcopis habita, Synodi Hieroſolymis, Dioſpoli, Romæ, Antiochiæ, aliſque in Urbibus celebratz, prætereaque Romani Pontifices, aliſque celeberrimi Patrum adverſus Pelagianum doctrinam illico anathemata exeruere. Quid miratur ergo Phereponus, quòd execrationi eſſe in Eccleſia Catholica Pelagius, ejuſque ſectatores continuò cœperint; Novam, inſuetam, atque à Traditione abhorrentem doctrinam invehere tentabat id hominum genus; deinde Eccleſiæ germanam Fidem ſtatuenti: erroresque proſcribenti reſiſtere pertinaciter non dubitavit, mentemque in errore obſervatam prodeſſe. Hic hæreſeos ſtardo; hæ cauſæ juſtiſſimæ anathematum. At Semipelagiana dogmata,



dogmata, si qua Augustinus tradidit [ nam vere Pelagiana ex ejus calamo certum est excidisse nunquam ] nondum Augustini ævo, immo ne per integrum quidem seculum ab illius morte, ea fuerunt, ut ipsorum patrocínio læderetur fides. Eidem quoque doctrinæ adhasere piissimi viri, nullo sanctitatis dispendio; quippe Traditio ab ipsis nondum satis diligenter consultata fuerat, & controversiæ omnes de Gratia liberoque Arbitrio nondum satis fuerant pertractatæ, atque Ecclesiastica Concilia quid pro certo iis de rebus affirmandum foret, nondum constituerant. Proinde incautus, & si etiam velis negligens, sed sine culpa, non autem *summopere temerarius* dici potuit Augustinus, quòd non mala fide olim docuerit, quæ postea re melius consultata correxit. Innumeræ occurrunt controversiæ adhuc ferventes, magnis piisque Auctoribus utrinque stantibus. Quandiu Ecclesia ambiguam rem in medio relinquat, quamcumque velis partem tueri licitum erit. Sic Augustinus Pelagianos Hæreticis primò non accensuit, ut patet ex ejus Serm. 294. Deinde verò pertinaces in errore, & Conciliis palam resistentes, hæresis incusavit: quod Pherepono nec novum, nec iniquum videri debebat in Animadv. ad laudatum Sermonem pag. 550. Sed quoniam illuc nostra delapsa est oratio, alia videamus, quæ Phereponus carpit in eodem Sermone.

Multi jam fuimus alibi in propugnando jure cùm Ecclesiæ, tum Principum Catholicorum adversus homines hæreticos, quos poënis castigare, reluctantesque ad meliorem sententiam incitare fas esse diximus. Phereponus audiens Augustinum ibi de Pelagianis ita loquentem: *Sustineat eos mater piis visceribus sanandos, portæ docendos, ne plangat mortuos, &c.* mellita hæc appellat, sed statim adjungit, *dehonestata fuisse sequentium temporum incredibili acerbitate, ut propemodum suspicari quis possit, mansuetudinem hanc data opera simulatam, ut major invidia miseris hominibus conflaretur, nisi cederent, utque homines imperiti magis in illos postea exardescerent.* Ut ut modestus cautusque videri & hic velit Phereponus, suspensionem hanc teterimam non sibi tribuens, sed aliis affingens, eamque illo suo propemodum temperans: non impetrabit tamen, quin ipsum tanquam atrocis calumniæ auctorem æquo jure hic postulemus. Satis ipse prodit, sibi accusationem hujusmodi probari, sibi in votis esse, ut in reliquorum mentibus radices agat. Et tamen quantum à caritate & veritate longe abeat ista suspicio, facile intelligere potuisset ipsemet Phereponus, si minori odio atque livore suas aggressus fuisset scribere Animadversiones. Placide primò erga errantes agere Ecclesia solet, & placide monet agendum. Tum si nihil miti adhortatione

proficiscitur, ipsa caritas suadet, ut aspera arripiantur, quo tandem revocentur devii in veritatis & salutis viam. Erga filios in vitia deflecentes non aliter se gerunt amantissimi patres, non aliter erga ægrotos sapientissimi Medici. Quis & parentibus, & Medicis *simulatam mansuetudinem* ea de causa adscribat, quod inutiles eorum blanditias efficaciora deinde remedia subsequantur? Et parentis & Medici loco Ecclesia est erga errantes in fide. Præterea quis Augustinum, quis certam fecerat Ecclesiam, austeritate solum vincendos erumpentes errores, ut fingenda prius mansuetudo foret? Denique nulla fere emerfit Hæresis, cui non obstiterint pari methodo Ecclesiastici Præsules, nihil aliud cupientes, quam rigore abstinere, dummodo sanarentur filii. Temere, ne dicam stulte, in his omnibus suspicaretur quispiam & animum crudelem, & fictam lenitatem.

At inquit Phereponus, ut ostendat non solum inanem non esse hanc suspicionem, sed suum quoque ipsam tulisse suffragium: *Has artes à Sacrorum Præsidiis sæpe adhibitæ nemo nescit, ejusque res insigne exemplum videmus in damnatione Donatistarum.* Talem Criticum tanta confidentia non dedecet. *Nemo nescit.* Et quibusnam quæso eruditis hæc edisserit Phereponus? Europæis non puto; Indis fortasse. Quotus enim quisque est inter nos, qui aut audierit, aut legerit, non dicam sæpe, sed semel tantum, simulatam à Catholicis Episcopis mansuetudinem erga Hæreticos, ut acerbitati, quam solam animo versabant, major deinde excusatio, & pervicacibus gravior invidia crearentur? U-nos Donatistas tanquam insigne exemplum nobis memorat Censor, eos nempe, quos tot veracibus amicitiae, patientiae, & caritatis exemplis ad unitatem Ecclesiae reducere conati sunt Catholici, ut suas ipsas Cathedras iis, etiam si è lite caderent, communes facere non dubitarint. Hæccine simulata lenitas? Nusquam fortassis, quam in Donatistarum Historia, evidentiora habeas Ecclesiasticae mansuetudinis documenta. Severissimis profecto legibus postea adversus illos actum est; sed postquam incredibilis pertinacia, & immanitas insolita ad schisma & ad errores accessere, nullumque aliud remedium supererat sanandæ furiosæ gentis.

*Profecto*, pergit dicere Phereponus, cum ejusmodi initiis minime consentiunt viginti minimum Synodorum intra paucos annos festinata, Pelagianorum dogmatum damnationes, ut Episcopis sapius ad damnandos Pelagianos adductis, nulla iniri posset amplius ratio audiendarum partium tam sæpe damnatarum. Cum enim Synodi quempiam damnarunt, honoris esse sui putant, hominem videri jure damnatum, nec patiuntur decreta sua iterum expendi. Neque primus fuit, neque postremus erit Phe-

Phereponus, qui Catholicorum Præfiliū sollicitudinem in dam-  
nandis & suffocandis, si fieri potest, nascentibus Hæresibus,  
molestè ferat, minimeque probet. Familiare hoc fuit recentio-  
rum quoque temporum Novatoribus, immo reliquis fere æta-  
tum omnium Hæreticis; idemque nascituri Hæretici conqueren-  
do sonabunt. Commodissimum sane effugium, & præsidium  
errori, si liber ipsi aditus per medios populos, per gentem ignaram  
diutius permittatur. Et certe hic quoque patronus Hæreticis  
quibuscumque deerrat, quo auctore ipsorum deliriis tum solum  
frena offerrentur, cum longe lateque diffusa, pluriumque ani-  
mis recepta, non amplius frenum pati didicissent. Oculos aperiat  
tandem Phereponus, & Catholicorum personam parumper in-  
duat. Nullus dubito, quin & ipse tunc nobiscum sentiat, ad-  
versus nascentes Hæreses armandam & muniendam protinus esse  
plebem Christi. Hoc ipsum statuere veram Ecclesiæ doctrinam,  
hoc ipsum oppositam falsi damnare, ac damnatam prodere, arma  
sunt, quæ populo sano per vigilantes Pastores ministranda novi-  
mus. Principiis obstandum est, ne sero medicina paretur. Si  
contra Ecclesiastici Præsules agerent, si secus enascenti morbo  
sefe opponerent, ministerium suum, salutemque gregis foedissime  
proderent.

Inquiat vero Phereponus: At qui putantur errores, for-  
tasse non sint: neque præcipitanda sententia, quam revocare  
nequeas; & rationibus potius, quàm edictis vincendi sunt  
contra sentientes. Quid porro aliud Phereponus dicat,  
quàm quod singuli Novatores dicere hucusque potuerunt, &  
dicere potuerunt deinceps? Ergo nullius erroribus, si audienda  
Phereponi consilia præcludendum est iter damnatione oppor-  
tuna, & res in medio relinquendæ, dum controversiâ matura,  
hoc est post multos annos, expensâ appareat, quo in lo-  
co sit veritas. Ita nimirum fiet, ut Hæreses commodissime  
serpant, & aut nunquam, aut frustra deinde anathemate per-  
cellantur. Ignorare nequit Phereponus ipse, quanta sit homi-  
num in hisce casibus pertinacia, quantumque possit antici-  
pata opinio. Perquam rarissime solis rationibus profligantur  
Hæretici. Atque utinam istius infelicitatis innumera exem-  
pla non prostarent adhuc. Quamobrem contra errores pullu-  
lantes exercenda confestim non cruenta Synodorum arma, nihil-  
que cunctandum. Quæ via cum expedita & utilis sit, præte-  
rea quoque fallere nos nequit. Nam in Catholica Ecclesia qui  
sint errores, facilè apparere potest, si videlicet nova doctrina  
ingeratur, cui obstat antiqua Ecclesiarum Traditio. Id autem  
in Pelagianorum causa plane accidit, nam ut darcemus, aliqua in ca-

consuerunt alii Africæ Episcopi, iique omnium præstantissimi. Audi Possidium in Augustini vita Cap. 2. *Egit Valerius secretè literis apud (Aurelium) Primatem Episcoporum Carthagenensem, allegans imbecillitatem corporis sui, atatisque gravitatem, & obsecrans, ut Hipponensi Ecclesia ordinaretur Episcopus, quo sua Cathedra non tam succederet, sed Consecrator accederet Augustinus.* Qua igitur beatus Valerius optavit, & rogavit satagens, rescriptio impetravit. Audi & alia Possidii verba: postquam petitionem ad visitandum adveniente ad Ecclesiam Hipponensem tunc Primatæ Numidiæ Megalio Calamenſi Episcopo, Valerius Antistes Episcopis, qui forte tunc aderant, & Clericis omnibus Hipponensibus, & universa plebi inopinatam cunctis suam insinuat tunc voluntatem, omnibusque audientibus gratulantibus, atque id fieri perficique ingenti desiderio clamantibus, Episcopatum suscipere, contra morem Ecclesiæ, suo vivente Episcopo Presbyter Augustinus recusabat. Vides Augustinum, quanquam ignoraret, Nicæno Canone huiusmodi ordinationes prohiberi, probe tamen recogitasse, ab ea ordinatione abhorre consuetudinem Catholicæ Ecclesiæ, ipsumque adeo Augustinum obstitisse Episcopis, ne se Episcopum sacrarent. Sed vicit plurium sententia. Imò exempla similium ordinationum in medium allata fuere. Dumque illi fieri solere ab omnibus suaderetur [inquit idem Possidius] atque id ignaro transmarinis, & Africanis Ecclesiæ exemplis probaretur, compulsus atque coactus succubuit, & Episcopatus curam, & majoris loci ordinationem suscepit. Augustinus ipse ad Paulinum Ep. 31 aliàs 34. de sarcina Coepiscopatus sibi à Valerio imposita scribens, hoc idem confirmat, inquiens: *Quod quidem, quia tanta ejus caritate, tantoque populi studio Dominum id velle credidi, nonnullis jam exemplis præcedentibus, quibus omni mihi excusatio clauderetur, vehementer timui excusare.*

Quem ergo errorem apertis oculis admissum, quam errandi voluntatem ad proprium commodum in Augustino demonstras? Detrectabat ipse honorificum munus; compulsus à Valerio, ab aliis Episcopis, à Clero toto, ab universa plebe, se passus est vinci, annuente etiam Aurelio Carthagenensi, Africæ Primatæ. Ex iis nemo suspicabatur, violatum iri propterea Canones Nicænos; & quanquam Ecclesiæ consuetudo secus agendum moneret, exemplorum tamen ingesta copia rationem omnem cunctandi & recusandi sustulit. Rem ego non probo, neque subinde probavit ipsemet Augustinus, ubi intellexit, Nicænam Synodum aliter sanxisse. Verum eæ tunc circumstantiæ in Augustini ordinationem confluxere, ut non solum excusatione dignum ille se præbeat, sed iniquæ accusationis accusari mereatur, qui tacite nobis persuadere cupit, Augustinum scienter atque lubenter tunc errasse, quod

quòd error ipse cederet in suam ipsius utilitatem. Cum verò inquit Phereponus : *Si collegam unum sibi adungere licuit, quidni & plures?* non videt homo acutus, frustra id peti, nam qui collegam, sive coadjutorem sibi adsciscibat, ea ratione movebatur, quòd ipse aut senio aut morbis ad obcunda Ecclesiastica munia ineptus jam esset, & Collegam hunc sibi successorem deligebat, consentiente Clero, populo, ipsisque Provincialibus Episcopis. Atqui unus Collega id implere valebat, quod Episcopus senescens implere amplius non poterat, atque unus Episcopo morienti successor erat dandus. Quamobrem & superfluum, & incommodum consilium fuisset plures adligere uno tempore coadjutores, nullaque necessitas, nulla potens ratio succurrisset, quæ aut suaderet, aut excusaret ut unius, ita & plurium cooptationem.

Alia tamen habet Phereponus, quæ in memorata Epist. 113. olim 110. sibi non arrident; quippe illic Augustinus Heracium sibi Successorem in Episcopatu designat iis verbis : *Presbyterum Heracium mihi successorem volo.* Canonem LXXVI. Apostolorum, & Synodi Antiochenæ sub Constantio habitæ decreta hic violata Phereponus clamat; stupetque ignorasse Augustinum, illicitum hoc fuisse, cum præsertim consensum Coepiscoporum ille non exquisierit, quem tamen exigebat Synodus Nicæna. Profecto interdixere Canones [ & jure maximo interdixere, ] ne sacri Ancistites sibi successorem deligerent, atque constituerent. Sic occursum ambitioni, & propriæ utilitatis studio, quibus affectibus occorreati interdum Episcopi indignos eligere, & Episcopis Provincialibus, Clero, ac populo libertatem electionis præripere poterant. Sed hoc ad Disciplinam spectat, eamque eligendi successoris libertatem eadem Ecclesia modò permittere, modò prohibere potest prout conducibilis videatur. Nam idem quoque periculum quandoque imminet, si Episcopi, Clerus, & populus eligant, ac si unus Episcopus, & pius contra Episcopus gregi suo, dum vivit, melius consulere interdum potest, quam plures. Illud verò dubium esse non debet, quin Augustinus optimum Successorem Ecclesiæ suæ dederit, omni ambitionis, atque utilitatis propriæ affectu sublato. Immo id unice à se præstari palam testatus est Augustinus, ut ne per *ambitiosos & contentiosos* Ecclesiæ Hipponensis perturbaretur post mortem suam, uti aliis in Ecclesiis acciderat. Cleri etiam, & populi duorumque Episcoporum suffragio res acta. Sed quod in primis huc facit, illud est, his temporibus nequaquam obtinuisse in Africa prohibitionem illam de Successore sibi instituendo. Suppetunt illis exempla, Immo & in nonnullis aliis Provinciis, quæ ad ferre non est hujus loci, quippe à Justello, Breveregio, Thomassino aliisque congesta. Antiochenis autem Canonibus Africa se obligari fortasse non censuit, incertumque est, an

iidem ipsi Canones Afris essent satis perspecti. Eadem dici possunt de Canone, ut ajunt, Apostolum, cui etiam alia explicatio convenire potest. Quare nemo ex Africanis Patribus ea tempestate illicitum, prohibitumve putabat, sibi idoneos eligere successores, dum Cleri, & populi consensus rogaretur, atque obtineretur, & electus Episcopalem consecrationem post eligentis mortem expectaret: quæ omnia Augustinus præstitit in eligendo sibi successore Heraclio, quem Eradium corrupti Codices appellabant.

## CAPUT XV.

*Nimius sui amor falso objectus à Pherepono sancto Augustino, cujus conatus in Pelagium ejusque errores fluxerunt ab amore unius Catholica veritatis. Ficta mansuetudo in Hæreticos perperam afflicta Catholicis Episcopis. Comprimenda Hæreses vix orta, neque erroribus concedendus nimia lenitate aditus: Convicia & contumelia varia Phereponi in sanctum Augustinum. Quàm hac hominem Christianum & Criticum dedecant. Quanto contemptu feratur ille in omnes sanctos Patres.*

**C**irciter Annum Christi 394. *Expositionem Epistola ad Romanos* elucubravit Augustinus nondum Episcopatu initiatus. Nonnulla ibi occurrunt Semipelagianis postea natis faventia, sed emendavit vir sanctus Lib. 1. Cap. 23. Retract. confessus, se eo tempore *nondum diligentius quasivisse, nec adhuc invenisse, quas sit electio Gratia.* Miratur Phereponus pag. 338. Animadv. qui Augustinus sponte, ac à nullo damnatus, dogmata eadem subinde fuerit execratus. Tum oculo in intima Augustini præcordia conjecto, *Si nunquam tamen, ait, exorta fuissent rixa Pelagiana, in iis sententiis mortuus esset. Imo verò fortasse nunquam ita invehctus in eas fuisset, nisi Pelagius aliquid in ejus scriptis carpsisset.* Primam verò indignandi in Pelagium occasionem Augustino fuisse subdit, quòd Pelagius Romæ dum esset, ferre non potuerit ea Augustini ad Deum verba: *Da quod jubes, & jube quod vis;* quæ in Confessionum Libris adhuc leguntur. *Hinc prima origemalis,* inquit Cenfor, *nam nihil magis irritabile est Scriptoribus, qui pro scriptis postea, tanquam pro aris & focis pugnant.* Qui ne de nomine quidem Augustinum nosset, hæc tamen audiciens non ignoraret, quàm parum fidei debeatur accusationi

huiusmodi , ad quam nempe confirmandam nulla ratio accedit. Quis Censori huic narravit, irritatum fuisse Augustinum, & ad sententiam mutandam odio adversantis Pelagii fuisse compulsum? Nimium dictatorie ista dicuntur. Sed huius criminationis iniquitas longe melius se prodet, ubi recogites, quantum à cæco suarum opinionum amore abesset Augustinus. Nihil aliud sunt *Retractionum Libri*, quàm illustre argumentum ardoris illius, quo Augustinus veritati uni supra suos affectus obsequebatur. Deinde vix alium reperias, qui demissius Augustino se emendari pateretur, & mitius haberet adversarios suos, quanquam interdum procacissimos, & palam rationi ac veritati injurios. Onerare possem librum, si necessitas posceret, exemplis ejusmodi & humilitatis, & modestiæ. Denique tam parum cum veritate congruit, Augustinum in iram & odium adversus Pelagium fuisse concitatum, quod hic verba quædam Confessionum moleste tulerit, ut cum Pelagius longe post illa tempora humanissimis literis ad Augustinum datis responsionem accepisset amicitiae plenam, Augustinus deinde necesse habuerit se purgare, quasi Hæreticum hominem supra meritum commendasset.

Quod ergo Augustinum armavit in Pelagium, Apostolicæ doctrinæ, veræque Religionis cura fuit. Eadem & armavit in Manichæos, in Donatistas, in Arianos, à veteri autem Christianorum Traditione abhorruisse dogmata Pelagii, atque Cœlestii, jam dudum contenderunt eruditi viri, ostendit Augustinus ipse, & ejus temporis Ecclesia, quod ne ipsum quidem Pelagium fugiebat, qui non aliter quàm clanculum, & sub mille verborum ambagibus, ingentique cum simulatione suam huc illuc novitatem disseminavit. Quid faceret Augustinus zelo Domus Dei supra quamplurimos ardeas? Africanæ, atque Orientales Ecclesiæ, sanctus Hieronymus, Paulinus Ambrosii discipulus, aliique classicum protinus cecinerunt in erumpentem Hæresim. In publicam rem tunc & ipse Augustinus operam suam conferendam esse putavit. Quamobrem en veras causas, cur Pelagium, sive ut melius dicam, Pelagii dogmata exagitare cœpit Augustinus, Quas commentus est pro suo arbitrio phereponus, si nos levitatis saltem arguamus, æquo jure procul dubio agemus. Quod si Augustinus procedente tempore renuntiavit sententiis nonnullis, hisque paucis: ex ipsius testimonio, & rei evidentia constat esse factum, quod attentius subinde investigaverit cum Scripturarum sacrarum mentem, tum Ecclesiasticæ Traditionis vocem. An verò crimen est meliora discere, & melius sentire? Et nunquid Augustinus pro suis sententiis tanquam pro aris & focis pugnare paratus fuit, qui sententias priores re ipsa deserere non dubitavit, statim ac veritas explorata id ab ipso exegit?

Retractavit quoque vir sanctus quoddam aliud effatum suum in Expos. Cap. VII. 19. 20. ad Rom. uti Semipelagianum. Hinc Pherepono ansa præbetur traducendi Augustini tanquam *summe pere temerariis* hominis, qui ea olim scriberet, quæ, ut ipse deinde contendit, in Ecclesia minime tradebantur. Quod si tradebantur, non capit Phereponus pag. 336. Animadv. *qui damnari potuerint quasi novatores & exitiales Hæretici, qui id docebant quod antea ubique docebatur, & quod cum laude scripserat Augustinus.* Sed frustra invidiam Augustino creare, frustra Pelagianam novitatem tueri molitur Phereponus, parum hic se versatum exhibens in Ecclesiastici juris œconomia, immo & in eorum temporum Historia. Esse possunt dogmata quædam adhuc inter Scriptores dubia, atque ab Ecclesia nondum calculis postremis definita. Hæreticum nomen alterutram partem tuentibus tunc tribuere non licet. Ubi Ecclesia sententiam tulit, tunc aliter sentire quàm Ecclesia, nefas est. Ita fuit tempus, quo sententia de iterum baptizandis Hæreticis inter hæreticas referenda fortè non erat. Idem Semipelagianis Dogmatis accidit. Non idcirco læsisse Fidem dicti sunt Vincentius Lirinensis, Hilarius Arelatensis, Cassianus Faustus, Gennadius, Sidonius, alique aut Lirinenses, aut Massilienses, quòd Semipelagianismum foverint. Tunc solum execranda cœpit esse eorum doctrina de initiis fidei, cùm Synodus Arausicana exposuit, quid hic sentiret, sentiendumque mandaret Ecclesia verax. Plerisque autem è Patribus nonnulla excidisse videmus, quæ deinde sacris Conciliis divina oracula promentibus minime probata fuere. Sed illi incautè, inculpateque ita sensere, paratissimi contentire cum Ecclesia, si hæc in diversam abiisset sententiam, & ideo illis opinionibus addicti fuerunt, quod nondum satis diligenter exquisierant, quid Apostolica de iis Traditio haberet.

Quod ergo ad Pelagianos errores attinet, eos sua novitas in oculos omnium ineurrens execrabiles statim fecit. Tum protinus in eorum damnationem consensit Ecclesia. Concilia non semel ab Afris Episcopis habita, Synodi Hierosolymis, Diospoli, Romæ, Antiochiæ, aliisque in Urbibus celebratæ, prætereaque Romani Pontifices, alique celeberrimi Patrum adversus Pelagianum doctrinam illico anathemata exerere. Quid miratur ergo Phereponus, quòd execrationi esse in Ecclesia Catholica Pelagius, ejusque sectatores continuò cœperint; Novam, insuetam, atque à Traditione abhorrentem doctrinam invchere tentabat id hominum genus; deinde Ecclesiæ germanam Fidem statuenti: erroresque proscribenti resistere pertinaciter non dubitavit, mentemque in errore obfirmatam prodere. Hic hæreseos stat cardo; hæ causæ justissimæ anathematum. At Semipelagiana dogmata,



dogmata, si qua Augustinus tradidit [ nam vere Pelagiana ex ejus calamo certum est excidisse nunquam ] nondum Augustini ævo, immo ne per integrum quidem seculum ab illius morte, ea fuerunt, ut ipsorum patrocinio læderetur fides. Eidem quoque doctrinæ adhærere piissimi viri, nullo sanctitatis dispendio; quippe Traditio ab ipsis nondum satis diligenter consultata fuerat, & controversiæ omnes de Gratia liberoque Arbitrio nondum satis fuerant pertractatæ, atque Ecclesiastica Concilia quid pro certo iis de rebus affirmandum foret, nondum constituerant. Proinde incautus, & si etiam velis negligens, sed sine culpa, non autem *summopere temerarius* dici potuit Augustinus, quòd non mala fide olim docuerit, quæ postea re melius consultata correxit. In numeræ occurrunt controversiæ adhuc ferventes, magnis piisque Auctoribus utrinque stantibus. Quandiu Ecclesia ambiguam rem in medio relinquat, quamcumque velis partem tueri licitum erit. Sic Augustinus Pelagianos Hæreticis primò non accensuit, ut patet ex ejus Serm. 294. Deinde verò pertinaces in errore, & Conciliiis palam resistentes, hæresis incusavit: quod Pherepono nec novum, nec iniquum videri debebat in Animadv. ad laudatum Sermonem pag. 550. Sed quoniam illuc nostra delapsa est oratio, alia videamus, quæ Phereponus carpit in eodem Sermone.

Multi jam fuimus alibi in propugnando jure cùm Ecclesiæ, tum Principum Catholicorum adversus homines hæreticos, quos pœnis castigare, reluctantisque ad meliorem sententiam incitare fas esse diximus. Phereponus audiens Augustinum ibi de Pelagianis ita loquentem: *Sustineat eos mater piis visceribus sanandos, portet docendos, ne plangat mortuos, &c.* mellita hæc appellat, sed statim adjungit, *dehonestata fuisse sequentium temporum incredibili acerbitate, ut propemodum suspicari quis possit, mansuetudinem hanc data opera simulatam, ut major invidia miseris hominibus conflaretur, nisi cederent, utque homines imperiti magis in illos postea exardescerent.* Ut ut modestus cautusque videri & hic velit Phereponus, suspicionem hanc teterrimam non sibi tribuens, sed aliis affingens, eamque illo suo propemodum temperans: non impetrabit tamen, quin ipsum tanquam atrocis calumniæ auctorem æquo jure hic postulemus. Satis ipse prodit, sibi accusationem hujusmodi probari, sibi in votis esse, ut in reliquorum mentibus radices agat. Et tamen quantum à caritate & veritate longe abeat ista suspicio, facile intelligere potuisset ipsemet Phereponus, si minori odio atque livore suas aggressus fuisset scribere Animadversiones. Placide primò erga errantes agere Ecclesia solet, & placide monet agendum. Tum si nihil miti adhortatione

proficiscitur, ipsa caritas suadet, ut aspera arripiantur, quo tandem revocentur devii in veritatis & salutis viam. Erga filios in vitia deflectentes non aliter se gerunt amantissimi patres, non aliter erga ægrotos sapientissimi Medici. Quis & parentibus, & Medicis *simulatam mansuetudinem* ea de causa adscribat, quod inutiles eorum blanditias efficaciora deinde remedia subsequantur? Et parentis & Medici loco Ecclesia est erga errantes in fide. Præterea quis Augustinum, quis certam fecerat Ecclesiam, austeritate solum vincendos erumpentes errores, ut fingenda prius mansuetudo foret? Denique nulla fere emerfit Hærelis, cui non obstiterint pari methodo Ecclesiastici Præsules, nihil aliud cupientes, quam rigore abstinere, dummodo sanarentur filii. Temere, ne dicam stulte, in his omnibus suspicaretur quispiam & animam crudelem, & fictam lenitatem.

At inquit Phereponus, ut ostendat non solum inanem non esse hanc suspicionem, sed suum quoque ipsam tulisse suffragium: *Has artes à Sacrorum Præsilibus sæpe adhibitæ nemo nescit, ejusque rei insigne exemplum videmus in damnatione Donatistarum.* Talem Criticum tanta confidentia non dedecet. *Nemo nescit.* Et quibusnam quæso eruditis hæc edisserit Phereponus? Europæis non puto; Indis fortasse. Quotus enim quisque est inter nos, qui aut audierit, aut legerit, non dicam sæpe, sed semel tantum, *simulatam à Catholicis Episcopis mansuetudinem erga Hæreticos, ut acerbitati, quam solam animo versabant, major deinde excusatio, & pervicacibus gravior invidia crearentur?* Unos Donatistas tanquam insigne exemplum nobis memorat Censor, eos nempe, quos tot veracibus amicitiae, patientiae, & caritatis exemplis ad unitatem Ecclesiae reducere conati sunt Catholici, ut suas ipsas Cathedras iis, etiam si è lite caderent, communes facere non dubitarint. Hæccine simulata lenitas? Nisi quam fortassis, quam in Donatistarum Historia, evidentiora habeam Ecclesiasticæ mansuetudinis documenta. Severissimis profecto legibus postea adversus illos actum est; sed postquam incredibilis pertinacia, & inmanitas insolita ad schisma & ad errores accessere, nullumque aliud remedium supererat sanandæ furiosæ gentis.

*Profecto*, pergit dicere Phereponus, *cum ejusmodi initiis minime consentiens viginti minimum Synodorum intra paucos annos festinata, Pelagianorum dogmatum damnationes, ut Episcopis sapius ad damnandos Pelagianos adductis, nulla iniri posset amplius ratio audiendarum partium tam sæpe damnatarum.* Cum enim Synodi quempiam damnarunt, honoris esse sui putant, hominem videri jure damnatum, nec patiuntur decreta sua iterum expendi. Neque primus fuit, neque postremus erit Phere-

Phereponus, qui Catholicorum Præsulum sollicitudinem in dam-  
nandis & suffocandis, si fieri potest, nascentibus Hæresibus,  
molestè ferat, minimeque probet. Familiare hoc fuit recentio-  
ram quoque temporum Novatoribus, immo reliquis fere ata-  
tum omnium Hæreticis; idemque nascituri Hæretici conqueren-  
do sonabunt. Commodissimum sane effugium, & præsidium  
errori, si liber ipsi aditus per medios populos, per gentem ignaram  
diutius permittatur. Et certe hic quoque patronus Hæreticis  
quibuscumque deerat, quo auctore ipsorum deliriis tum solum  
frena offerrentur, cum longe lateque diffusa, plurimumque ani-  
mis recepta, non amplius frenum pati didicissent. Oculos aperiat  
tandem Phereponus, & Catholicorum personam parumper in-  
duat. Nullus dubito, quin & ipse tunc nobiscum sentiat, ad-  
versus nascentes Hæreses armandam & muniendam protinus esse  
plebem Christi. Hoc ipsum statuere veram Ecclesiæ doctrinam,  
hoc ipsum oppositam falsi damnare, ac damnatam prodere, arma  
sunt, quæ populo sano per vigilantes Pastores ministranda novi-  
mus. Principiis obstandum est, ne sero medicina paretur. Si  
contra Ecclesiastici Præsules agerent, si secus enascenti morbo  
sefe opponerent, ministerium suum, salutemque gregis foedissime  
proderent.

Inquiat vero Phereponus: At qui putantur errores, for-  
tasse non sint: neque præcipitanda sententia, quam revocare  
nequeas; & rationibus potius, quàm edictis vincendi sunt  
contra sentientes. Quid porro aliud Phereponus dicat,  
quàm quod singuli Novatores dicere hucusque potuerunt, &  
dicere potuerunt deinceps? Ergo nullius erroribus, si audienda  
Phereponi consilia præeludendum est iter damnatione oppor-  
tuna, & res in medio relinquendæ, dum controversiâ matu-  
re, hoc est post multos annos, expensâ appareat, quo in lo-  
co sit veritas. Ita nimirum fiet, ut Hæreses commodissime  
serpant, & aut nunquam, aut frustra deinde anathemate per-  
cellantur. Ignorare nequit Phereponus ipse, quanta sit homi-  
num in hisce casibus pertinacia, quantumque possit antici-  
pata opinio. Perquam rarissime solis rationibus profligantur  
Hæretici. Atque utinam istius infelicitatis innumera exem-  
pla non prostant adhuc. Quamobrem contra errores pullu-  
lantes exercenda confestim non cruenta Synodorum arma, nihil-  
que cunctandum. Quæ via cum expedita & utilis sit, præte-  
rea quoque fallere nos nequit. Nam in Catholica Ecclesia qui  
sint errores, facilè apparere potest, si videlicet nova doctrina  
ingeratur, cui obstat antiqua Ecclesiarum Traditio. Id autem  
in Pelagianorum causa plane accidit, nam ut daremus, aliqua in ca-

con-

controversia fuisse; quæ nondum satis liquerent [ sunt enim & adhuc nonnulla , quæ ad fidem pertinere inter Catholicos non creduntur, quanquam sanctus Augustinus eas sententias foverit: ] attamen quæ præcipua erant in Pelagianis dogmatis, à Traditione aperta, & consensu Ecclesiarum abhorrere deprehensa illico fuerunt , ita ut nulla pars Catholici orbis hæsitaverit in Pelagio statim, ejusque sectatoribus damnandis. Quæ omnia eo quoque faciunt, ut Phereponum ostendant male calculos incuntem, dum ait, *cum ejusmodi iniitiis, id est cum priori mansuetudine, minime consensisse festinatam dogmatum Pelagianorum damnationem.* Nimiam perniciosam ac damnabilem lenitatem exigit hic homo, ne ferens quidem opinionibus perversis Hæreticorum theta nigrum sollicite præfigi, nullâ interim in eorum personas castigatione adhibita. Iterum dico: nihil differenda est damnatio Errorum serpentium ut cancer. Hoc poscit Christiani gregis cura, hoc semper in more fuit vel apud ipsos Hæreticos, ubi in eorum sinu cœpit aliquis nova dogmata promulgare. Dudum verò palam factum est, Ecclesiam decipi hic non posse. Sat placidi fuere, sat officio suo sunt functi Pastores, qui errantem Pelagium toties monuere, & auctoritate Scripturarum æque ac Traditionis compressum ad diverticula confugere cœgerunt, & tamdiu sustinuerunt, ut errori valediceret si vellet.

Ad alia transeamus. Parum Pherepono fuit, calumniosis suspicionibus Augustini famam impetere; conviciis quoque ac diatribis in eum sæpe ac sæpius invenitur. Ipsum modò ait in declamando probabilia sequi, non explorata, solitum fuisse ejus Academicum ingenium sibi non satis constans tribuit; modò ejus rationes ita contemnit, ut inquit; *Profectò non sophista tantum, sed propemodum ineptus haberetur, qui talia hoc sic scriberet.* Alibi addit; *Mirum est, quam Augustinus calluerit artem pauca & perspicua dogmata Philosophica aut Theologica multis verbis & obscuris dicendi, atque impediendi.* Ad hæc proletarium Interpretem appellat & Rhetorem Numidam, & Rhetorem Semiplatonicum, Critica plane imperitum, & irridendi causa, Oraculum Numidia & Philosophum Pœnum, & Aristotelem, quanquam alibi. *Carneadem Pœnum, & Carneadem nostrum* potius vocandum affirmet. Ridet Augustini Quæstiones in Evangelia, & ait: *Unde intelligere licet, finem Augustini in hisce Libris non fuisse inquisitionem veri sensus sed commentitiarum allegotarum, ad quas invidi Evangelistæ torquerentur; quam censuram acutis hisce salibus concludit: O cerebri felices, qui in tam levibus argutiis acquiescebant! En alteram alibi exclamationem non minus gravem: O felices homines, qui tantam eruditionis famam tam facile sibi pepererunt!*

Sed

*Sed Ostipites, qui talibus olim plaudebant, aut etiamnum ferid fauere! Accipe & aliam: O vacuum studiosis Scriptura Africam! O stupidos, quibus hac admirationi erant, & qui tam verbosas disputationes, ut nihil discerent, legere sustinebant! Alio loco nos monet, arguendi immodicam & iustempestivam cupiditatem, & Africanam & περιουτολογίαν obstitisse, ne Augustinus iudicio suo uteretur. Eadem alibi repetit his verbis: Si quid occurreret, quod speciosa declamatiuncula occasionem praberet, aut prabere videretur, id verò avide arripiebat, & Punica eloquentia vela pandebat. Plus etiam veneni intus habet, quàm in cortice appareat, id quod Censor idem alibi scribit. Dolendum est, inquit, Augustinum non quod verum esse accurato examine compererat, sed quod expediebat dici, & ἡγοριζώμενος apud imperitum vulgus poterat tractari, prorsulisse. A prioribus non abludit, quod animadvertit idem Criticus alio in loco inquiring: Augustinus adfuetus Platonicis argutiis, plura SÆPÈ scribis, quàm intelligi, consequentiasque passim admittit quasi veras, quæ si negentur, statim corrumpunt omnes ejus ratiocinationes; neque enim ullo modo probari possunt. His, & aliis bene multis, quæ congerere non est opus, Augustinum Phereponus liberalissime vexat, atque hoc sale perficit.*

Memini me ante paucos annos legere Librum, cui titulus est *Parthasiana*. Ejus Auctor pag. 150. de Eruditis Viris, eorumque vitiis scite agit, indicans cur id hominum genus in multorum odium incurrat, & despiciatissimum habeatur interdum. Gallicis ergo verbis optare se ille ait, ut non modestia minus quàm eruditionis gloriam in suis libris quarant, ne animæ assertent, nisi quidquid evidenter probari potest, ut lenitate invicem ac indulgentia ceteros homines antecellant, ne aliis armis se tueantur, aut alios aggrediantur, quàm rationibus, & sine felle, sine petulantia, ut tantum denique elegantia & venustatis suis in moribus prodant quantum in stylo praeclarissimorum Scriptorum, apparet, cui verisimile est respondisse etiam vitæ rationem. Quis ejusmodi viros non diligeret immo non omnibus, quæ in manu sua forent, beneficiis cumlaret? Hæc ille non graviter minus quàm verè. Cum hisce legibus atque consiliis, quæ non dubito quin probet ipse Phereponus, confer nunc Phereponianas exclamationes, convicia, diſteria in sanctum Augustinum effusa. Quod cum feceris, quam opinionem induas de homine tam impotenter ferociente in sanctissimum ac ingeniosissimum virum, omnium sæculorum ceterorumque hominum memoria commendatum? Adde: quodnam iudicium habendum foret de *Parthasianorum* Scrip-

Scriptore, si tanta asperitate, felle, ac supercilio in tam illustrem virum is, & nihil quidem ab ipso læsus, ea scriberet, quæ nunc in eundem Phereponus & scribit, & publica esse jubet? Quid si idem unusque esset *Parrhasianorum* Auctor, & Augustini conviciator Phereponus? Equidem puto longiori sermone hic opus non esse, ut appareat, quàm pessimo exemplo Phereponus lætæ fuerit ausus, quæve pœnæ homini tantâ maledicentiâ utenti apud cordatos viros debitæ sint. Neque verò is sum, qui velim præclarissimos Scriptores nullius censurâ attingi; quive errores magnorum virorum, & sanctorum potissime Patrum, dissimulatos semper cupiam, aut cœca veneratione exceptos. Non is profectò sum; Censoriam Artem probo; ingeniorum libertatem qua decet moderatione adhibitam laudo; adeoque me comparatum sentio erga Verum, Bonum, & Pulchrum, ut quidquid iis adversari mihi videatur, ne in Augustino quidem feram; & porro si res posceret, ne dissimularem quidem. At ipsi eruditorum Censuræ sunt suæ leges, est suus modus. Nunquam in Censura contumeliis aperiendæ fores; rabies, acerbitas, ac turbulentæ animorum perturbationes, & calumniæ potissimum, eliminandæ; modestia, æquitas, caritas quàm fieri potest accuratissime, & perpetuò ante oculos habendæ. Sed tum præcipuè urgent hæc leges, cùm Censura exercenda est in viros illustres, pietate spectabiles, ingenio admirandos, pluriumque seculorum consensu commendatos, & præsertim si bona fide in errorem prolapsi deprehendantur. Si secus fiat, non eos quidem risu dignos efficiemus, sed nos omnium execrationi exponemus. Quid enim aliud promereatur tanta Censoris ambitio, audacia, atque inverecundia? Cur autem has pœnas referre non debeat in Augustino tam acriter insectando Phereponus, ego sane non video.

Hic tamen familiaris est Phereponi stylus. Immo ut Augustinus habeat, unde se consoletur, reliquos sanctos Patres eidem Phereponus adjungit, omnesque uno colore denigrat, una voce exhibilat. Pag. 491. Animadv. in Epist. 71. aliàs 10. Augustini inquit, eos voluisse videri egregios *Interpretes Scripturarum, quas non intelligebant, cum ex sola versione sæpe obscura & vitiosa penderent.* In Notis ad Ep. 175. olim 90. pag. 519. Africanos Patres declamatoribus infimis accuset, eosque tanquam Criticæ prorsus imperitos irridet, quod etiam de Patribus Græcis scribit pag. 599. *Cùm constet* [sunt ejus verba] *propemodum omnes imperitos Criticæ sacræ, & infelices Scripturæ Interpretes fuisse; quidquid dicitur, qui nec eos, nec Scripturam sat studiosè legarunt.* Tum addit in Notis ad Epist. 117. de

sanctis Patribus : *Qui tam negligenter lugebant Scripturam , & tam escitanter laudabant , eos nobis quasi egregiorum Interpretum exemplaria proponi quis feras ?* Ad hæc illos passim arguit, quòd anathematum potius terrore, minisque edictorum, quàm rationibus & scientia plebem regerent, instruerent , atque in officio continerent. Suspiciatur etiam pag. 590, in Notis ad Cap. 13. Lib. 18. de Civ. Dei , multos Patrum olfecisse quidem suppositionem Sybillinorum Carminum , *sed quia rudis plebecula tam levibus capiebatur rationibus , quàm gravibus , eos arripuisse hoc argumentum . ut alia multa , quia conducebat causa , non quia verum iis videbatur.* Deinde in Notis ad Cap. 43. Libri ejusdem , quod Augustinus , aliique eorum temporum Episcopi non paterentur Hieronymianam Bibliorum interpretationem anteferri versioni τῶν LXX. dolet is , *tot ac tanta apud Veteres inveniri specimina non fidei circumspecta , & firmis rationibus nixa . sed credulitatis inconsulta , & omnia temere arripientis ; nisi quis politicam calliditatem , ut tunc loquimur , malis hac haberi.* Quæ ex re infert , *præter Christum & Apostolos , non esse quærendos magistros , in quorum auctoritate adquiescamus.* Quæ cùm audis , audire etiam tibi videris Joannem Clericum paria in Quæstionibus Hieronymianis declamantem. Sacris quoque Conciliis pag. 605. animadv. auctoritatem omnem Phereponus adimit , atque ignorantiam , factiosos affectus , & ad errandum facilitatem dictatorio more tribuit ; immo quid non tribuit ? Alia omitto , multa uno verbo conclusurus Sordent Pherepono omnes sancti Patres ; infantes sunt præ recentioribus ; nemo inter illos tolerabilis Scripturæ Interpres ; & ne ipse quidem Hieronymus hic multum eminet ; mille denique vitiis & infirmitatibus abundant , ut stulti sint , qui eorum auctoritati adquiescant , eorumque scientiam suspiciant ac ament. Ita se ille aquilam , ceteros fere omnes reputat noctuas.



## CAPUT XVI.

*In sanctorum Patrum libris distinguenda Scientia Dogmatum, Legumque Moralium, ac Pietatis, à Patergis, hoc est, à rebus ad Artes profanas spectantibus. In his nihil interest, an interdum defecerint, imperitque deprehendantur. At in illa præcipua Scientia eximii fuere, ideoque veneratione ac laude digni. Allegorica sacrarum litterarum Interpretationes non vituperanda apud sanctos Patres, & quando utiles illa, aut inutiles sint. Phereponi artes, ut Augustinum deprimat. Lumen à Cælo rogandum, ut veritas capiatur, errores evitentur, Hebraica Lingua peritia an & ubi necessaria Theologia cultoribus. Drusii & Grotii exempla Catholica Religionis veritatem confirmant.*

**S**Ed quando istam camerinam movere aggressi sumus, juvat etiam addere, quæ in Augustinum hæc potissimum de causâ Phereponus effudit. Pag. 479. miram confusionem in Libris *de Ordine* invenit, oratque Lectorem, ut conetur ex iis, quæ lib. 2. Cap. IV. habentur apud Augustinum, conflare disputationem perspicuam, & via ac ratione dispositam, quod si præstet, erit illi magnus Apollo. In Animadv. ad Quæst. in Heptateuchum pag. 530. dicam eidem grandem impingit, quod sibi versiones Aquilæ, Symmachi, aliorumque satis notas, non comparaverit, quod tot Quæstiones in sacram Scripturam proposuerit, tot etiam Libros conscripserit, necessariis destitutus subsidiis. *Credo*, inquit, *excitatum fuisse adulationibus, aut stultâ admiratione Afrorum suorum, ut non desineret dictare, dum illa dictata sua tam avidè excipi videbat. Sic homines putant se magnos ac eruditos, non quia sunt, sed quia ab aliis putantur, sumuntque inde audaciam, quæ persape male eis cedit.* Neque acerba legas in notis ad Enchiridion pag. 559. & pag. 586. & alibi ad nauseam usque. Hæc autem in unum compellere locum placuit, ut homini nulla moderatione scribenti, simulque censuræ illius petulantissimæ, uno responso obviam eamus, pacato tamen, si fieri id poterit, animo; non quod nobis spes sit vertendi ad meliora Phereponi, quem nimium æstimatione sui, aliorumque contemptu occupa-



rum video , sed ut habeant minus periti è nostris , quo vel apud se vel apud alios tueri valeant contra hujusmodi cœcos impetus veritatem , & Augustinum non minus , quàm Ecclesiam Catholicam.

Multa sunt , quæ in Libris sancti Augustini cæterorumque Patrum exquiri possunt , Grammatica videlicet , Rhetorica , Didactica , Logica , Physica , Eruditio , Linguarum peritia , Critica , Chronologia , & aliæ id genus Disciplinæ , quæ nunc excoluntur magna animi contentione à literatis hominibus. In his omnibus non negamus , immo sincerissime fatemur , reperiri posse , & revera offendi multos nonnunquam Patrum defectus , & si etiam velis postremam quandoque imperitiam. Accurata Critices scientia in plerisque desideratur ; severam Eloquentiam in nonnullis frustra quæras ; si Origenem , Hieronymum , & Epiphanium excipias , vix alium inter ipsos habebis Hebræicæ Linguae gnarum. Declamant interdum ; alibi parum rectè ratiocinantur ; Apocryphis quandoque utuntur , aliaque peccant , quæ temporibus istis , ac in tanto lumine Scientiarum & Artium , in homine Philologo aut non feras , aut saltem non laudes. Sed præter has Artes ac Scientias alia est Scientia in Libris sanctorum Patrum considerata , nempe Divinorum Dogmatum , Legumque moralium cognitio , atque traditio , per quam aut exponuntur , aut confirmantur , aut suadentur , quæ Deus per Scripturas sacras , & voce Unigeniti sui credenda atque agenda mandavit Ecclesiæ suæ , suisque fidelibus. In hac autem Scientia nos dicimus excelluisse , atque excellere illos , qui nomine sanctorum Patrum , ab Ecclesia tamen , non à vulgo , donati sunt. Intercedit quippe non exiguum discrimen inter eosdem , cum vulgò sancti Patres appellantur , quicumque Christiani Scriptores doctrina ; vel antiquitate conspicui fuerunt , ut Tertullianus , Clemens Alexandrinus , Origenes , Lactantius , Eusebius ; nos verò eos hic tantum intelligamus , quos Ecclesia ipsa probavit . atque sincere , ac erudite suæ , seu potius Apostolicæ , & Christianæ Doctrinæ testes , magistros , & iudices esse declarat , quales siue controversia sunt Athanasius , Basiliius , Nazianzenus , Nyssenius , Chrysostomus , Cyrillus Alexandrinus , Hilarius , Ambrosius , Hieronymus , Augustinus ; Leo , Gregorius , aliique similes sanctissimi æquè & doctissimi viri.

Monitos autem Lectores volo , tum in Scripturis sacris , tum in Libris Patrum , distinguendam esse materiam præcipuam & propriam , quæ ἑρμηνεύω dicitur , ab aliis rebus , quæ illic habentur præter præcipuum argumentum , & πρὸς τὸ πρῶτον dicuntur. Proprium eorum Librorum argumentum est cœlestis illa Scientia ,

per quam constat hominibus divina Revelatio, legesque omnes & consilia tum credendi, tum operandi produntur. *Parerga* sunt, quod est ad Scripturam sacram, & ad ipsos Patres, alia omnia, ex quibus hæc hominum erga Deum officia minimè pendent, cuiusmodi sunt Scientia temporum, locorum, numerorum, Astronomiæ, Linguarum, Critices, Physices, aliarumque Artium. Nihil ergo aut parum refert Christianæ rei, quod in *Parergis* interdum, & sæpe etiam, deficient Patres, dum in præcipuo negotio procedat certissimo gressu illorum chorus. Dic ergo ipsos Declamatores; id temerè plerumque dices; attamen finam te dicere, nobis sanctos Patres non esse perfectioris Eloquentiæ Magistros. Dic ignaros Criticæ, dic Physicæ imperitos, parum in Logicæ usu accuratos, in Astronomiæ, Eruditionis, & Geographiæ scientia hospites, dic plura ejusmodi. Non moramur. *Parerga* sunt isthæc in Patrum Libris, neque hinc accessit laus ipsis, neque ob eam causam tanti æstimantur, & commendantur in Ecclesia Evangelica doctrina fideliter ac religiosè ab ipsis tradita, per quam ducimur tum ad sanam fidem, tum ad perfectam morum disciplinam, ea est, quam apud sanctos Patres plurimi facimus. Linguarum, aliarumque Artium studio præstarunt utique duo proximè præterita secula, ut collati cum recentioribus Scriptoribus veteres Patres, infantes in ea eruditione (si duos excipias) nonnunquam deprehendantur. Verum nemo superavit, pauci etiam æquare possunt beatos illos viros in præcipuæ Eruditionis Christianæ Scientia, hoc est, in divinarum Dogmatum & Legum peritia. Ad hanc enim aptiores ipsi fuere, & in eandem incubuere diligentius, tum quod propiores essent Apostolis, & longius latiusque diffusam Traditionem colligere ipsis tunc facile foret, tum etiam quod iis animi virtutibus abundarent, & cœlestibus donis illustrarentur, quæ ad rectam Christianæ Doctrinæ conservationem atque intelligentiam in primis exiguntur. Perspicacia profectò ingenii, & Criticum judicium, & Linguarum cognitio, aliæque Artes, non parum conducunt, & interdum etiam necessariae sunt ad explicanda, ac intelligenda Scripturarum, divinæque Fidei *Parerga*. At ad cœlestem illam Scientiam, circa quam Scriptura facta, sicut circa materiam propriam, versatur, & quam Christus Apostolis, & per Apostolos Ecclesiæ suæ tradidit, plus conducit, magisque necessaria est ingenii utique non vulgaris assidua meditatio, animus pravis cupiditatibus & opinionibus liber, sincerus Dei amor, pietas, humilitas, aliæque virtutes, quas sanctis Patribus non defuisse Historia nos docet.

Quod si in plerisque Patrum desiderata est Hebraicæ Linguae  
pe-

peritia, quam nempe omnium maximè necessariam nonnulli clamitant ad intelligendos Codices sacros: Primò respondemus, Evangelicam Doctrinam Græcè propositam fuisse ab Apostolis ac Discipulis Christi, adeoque Græcam Linguam satis fuisse, ut divina dogmata, sacratæque Christi ac Apostolorum Leges rectè à Patribus perciperentur, ac traderentur. Secundò, quod est ad vetus Testamentum, vulgata versio τῶν LXX. ab Apostolis ipsis usurpata, & Vulgata Latinorum, satis atque abunde exhibebant omnia Scripturæ loca, quæ alicujus momentū sint sive ad imbuendos Fideles totā Scripturarum Doctrinā ac Historiā, sive ad Judæos, Hæreticosque refellendos. Quæ illic indigere videntur eā Linguarum, & Critices Scientiā, quam tantopere quidam effecerunt, *Parerga* sunt, hoc est ad Ecclesiæ ædificationem minimè necessaria. Et si qua supersunt ad Doctrinam spectantia, neque satis perspicuè in Græcum Latinumve sermonem conversa, hæc ipsa ex multis aliis locis, quæ in vulgariis Versionibus aperta sunt, illustrata, obscuritatem omnem jam posuere, & saltem de fide versionis nulla in iis locis controversia fuit; aut si fuit, ad peritos linguarum res deferretur. Quamobrem constanter affirmare licet, nullum vel de Deo, divinisque legibus, & decretis, vel de Christo, ejusque adventu, operibus, ac documentis è sacra Scriptura dictum produci posse, ad quod intelligendum, explicandum, & propugnandum non pervenerint sancti Patres, & satis non sit, ac perpetuo satis non fuerit ad ejus intelligentiam Græci aut latini textus vulgati fides.

Tertiò, experienciā ipsā constat, Judæos, Ethnicos, atque Hæreticos validissimè confutatos, & victos, & ad fidem Christi conversos eā dumtaxat Methodo ac Scientia, quæ in Patrum libris apparet, quæque nunc sordet ingeniis non tam Criticis, quàm ambitiosis. Eā quoque Methodo, eā Scientiā usi sunt Apostoli ipsi, atque Apostolorum discipuli. Nihil autem, quod sit momenti alicujus, proferri potest ex Hebraicæ Linguae, Criticesque peritia, quo non sint usi Patres Græce Latineque solum eruditi ad Christianæ Doctrinæ amplificationem, atque tutelam. Nam quæcumque à recentioribus tanto cum fastu & disceptantur, & illustrantur in Scripturis, felicius profecto, quàm præstitum olim fuerit, ea propemodum omnia nihil aliud quàm *Parerga* Scripturarum sunt, nihilque magni momenti per illa adjungitur ad illustrationem Doctrinæ, ac Religionis Christianæ. Utilia sunt, laudanda sunt, non nego; at nunquam ejus necessitatis, quam sibi nonnulli somniant. Eamque ob causam Apostoli nunquam aut præcepto aut consilio commendaverunt tanquam necessariam Christianis Hebraicæ Linguae

peritiam, & qui eos viventes ausculta-  
runt, istius aut præcepti  
aut consilii nunquam meminere. Immo  
fuere inter ipsos Christi discipulos,  
quos non novimus in eo idiomate ex-  
cultos, cum & pateat ipsos Græcâ versione τῶν LXX.  
ferè semper usos, & primos Episcopos  
ac Patres Ecclesiæ in solâ Græcâ Lin-  
gua fuisse versatos. Aliud ergo est,  
in veteri Testamento vim alicujus  
dictionis, Chronologiam, Genealogias,  
pondera, mensuras, Chorographiam,  
idiotismos, eruditionem historicam,  
aliaque id genus difficilia explicare  
diligenter, ad quod Judaicæ Linguae  
cognitio necessaria est, ibique sancti  
Patres apertè vincuntur à recentioribus;  
aliud verò est ad ædificationem  
fidelium ex iisdem sacris Codicibus  
Dogmata Fidei ac morum elicere,  
eaque secundum Christi mentem  
exponere; hic enim præcellere,  
aut saltem maximi faciendam  
esse Patrum Scientiam nos  
affirmamus, eamque solis  
vulgatis versionibus, & meditatione,  
& Traditionis collatione,  
aliisque ingenii ac animi  
virtutibus comparari potuisse.

Quartò, irascuntur quidem ac rident  
neoterici non pauci, sed immeritò,  
quod Allegoriis nimium indulgeant  
sancti Patres, dimisso  
literali sensu, qui procul dubio &  
præstat allegorico, & rem  
verè conficit in investigatione  
ac tutela veritatis contra inimicos  
Christiani aut Catholici nominis.  
Non est quod hic nos ostendamus,  
mysticè multa esse dicta in  
divinis Scripturis, sanamque  
esse, atque ab ipsis Apostolis  
exemplo comprobata methodum  
interpretandæ quoque atque  
exponendæ per Allegorias &  
Tropologias sacræ Scripturæ.  
Id esset actum agere. Ibi  
solum laude carere potest,  
aut etiam culpari, immodicus  
atque inopportunus mysticorum  
sensuum usus, & ad eos lepidè  
violenter contorquere sacras  
Historias. Quod cum contingit,  
is & ego sum, qui indignatione  
commoveor, & molestè fero  
inutilem planè laborem illum.  
Et quanquam reliquæ etiam  
Allegoriæ, vel probè deductæ,  
neque in Libris, neque in  
Concionibus sacris me  
multum afficiant, eo tamen  
confidentia nunquam  
veniendum esse sentio,  
ut cum Pherepono pag. 477.  
Animadv. dicamus: *Allegorica  
figmenta qui probet neminem  
eruditum nunc inventum iri  
puto.* Suus quippe & Allego-  
riarum est bonus usus apud  
populum, quem hujusmodi  
quoque argumentis ad officia  
pietatis, & ad reverentiam  
Mysteriorum impelli cernimus.  
Patres autem, cæterique  
veteres Episcopi, quibus  
familiare ac necessarium  
tunc erat plebi suæ explicare  
divina eloquia, allegoricos  
quoque sensus interdum  
adhibendos esse arbitrati  
sunt, quod illos etiam ad  
utilitatem populorum facere  
intelligerent. Allegoriis  
autem sunt usi iis in locis,  
in quibus & Critica subtilitas,  
& literalis sensus nihil  
per se ad informationem  
pietatis conferre videbantur,  
uti in

Historicis rebus non raro accidit; idque cò maximè placuit, quod triac Criticorum locum dumtaxat habent inter eruditos, aut inter homines in Religione discordes. Apostolus verò non uno in loco agnovit, totam Scripturam ad institutionem ac ædificationem nostram tendere. Rom. XVI. 4. *Quaecumque enim scripta sunt, ad nostram doctrinam scripta sunt, ut per patientiam, & consolationem Scripturarum, spem habeamus.* Rursus 2. Tim. III. 16. *Omnis Scriptura divinitus inspirata, utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne opus bonum instruendus.* At multa in Scripturis habentur, quæ nisi mysticè & allegoricè exponas, ad eruditionem justitiæ solo sensu literali difficilè inservire possint. Vide Augustinum in Libris de Doctr. Christ.

Quod ergo hic præ omnibus animadvertendum censeo, illud est; hisce mysticis atque allegoricis Interpretationibus tum solum indulgisse Augustinum, & reliquos propemodum Patres, cum ad populum verba faciebant, aut suas elucubrationes in institutionem & ædificationem plebis emittebant. Cum res erat adversus Hæreticos, Ethnicos, atque Judæos, tum maxima, immo unica cura iis de literalis sensu fuit, cujus vim atque necessitatem tunc omnes intelligebant. Si Allegoriis tantum productis Dogmata statuere, ac tueri se posse credidissent Patres, non immeritò nunc asperè exciperentur à Censore Pherepono. At literalis sensus arma tunc ministravit. Si quando allegoricus in ea diffidia irrepsit, uti ornamentum accessit, non autem ut argumentum veritatis; & tum solum accessit, cum aliunde confirmata valide ac evidenter fuerant Ecclesiæ Dogmata, aut cum literalis sensus aliquid sonaret à dignitate Numinis, atque à constante Fidei Doctrina dissonum. Alium testem hic nolo, quàm Augustinum ipsum in tot disputationibus susceptis contra Arianos, Donatistas, Manichæos, Pelagianos. Immo eundem audi in Epistola 48. nunc 93. ad Vincentium, Cap. 8. *Quis non impudentissime, ait, nitatur aliquid in Allegoria positum pro se interpretari, nisi habeat & manifesta testimonia, quorum lumine illustrentur obscura?* Ad hæc in Lib. de Gen. contra Manich. Lib. 1. Cap. 1. *literalem sensum, dum fieri potest, retinendum, & præferendum docet, in hæc verba scribens: Sanè quisquis voluerit omnia, quæ dicta sunt, secundum literam accipere, idest non aliter intelligere, quàm litera sonat, & potuerit evitare blasphemias, & omnia congruentia Fidei Catholica prædiscare; non solum ei non est invidendum, sed præcipuus multumque laudabilis intellectus habendus est. Lege & reliqua. Sed luculentius, quæ sua mens hic fuerit, Augustinus prodit Lib. 17. Cap. 3. de Civ. Dei. Mibi, ait,*

ficut multum videntur errare, qui nullas res gestas in eo genere literarum aliquid aliud præter id, quod eo modo gesta sunt, significare arbitrantur, ita multum audere, qui prorsus ibi omnia significationibus allegoricis involuta esse contendunt, &c. Infra addit: Hoc enim existimo, non tamen culpans eos, qui potuerint illis de quacunque re gesta sensum intelligentiæ spiritualis exsculpere, servatâ primitus dumtaxat Historia veritate. Ceterum quæ ita dicuntur, ut rebus humanis, seu divinis gestis, siue gerendis, convenire non possint: quis fidelis dubitet, non esse inaniter dicta? Atque ita Augustinus sentiebat.

Quæ profectò unicuique persuadere jam debent, nimium excessisse Phereponum, dum propter Allegorias & Linguarum inopiam, toties tantoque cum fastu insultat Augustino. Eum vero potissimum audias, pag. 476. Animadv. perpendentem hæc Augustini verba Confess. Lib. 11. Cap. 2. *O Domine perfice me, & revela mihi*, scilicet Scripturarum secreta atque obscura. Orationem hanc quidem religiosam, & dignam Episcopo agnoscit Phereponus, sed cum ea conjungendum fuisse ait studium Linguarum, quibus conscripta erat Scriptura, & comparanda cetera præsidia, quibus demum adhibitis, Scriptura intelligi potest. Sed cum ea Augustinus neglexerit, illa dumtaxat in Scriptura intellexit, quæ potuit homo linguarum & Criticæ imperitus intelligere. In ceteris æpocritæ, & Platonismum nobis pro Doctrina Apostolorum propinat, aut argutias inanes magnâ verborum pompâ nobis obtrudit. Quam verborum acrimoniam ut aliquo pacto emolliat, subdit: *Quæ non eo dico, quod eloquentiam, & acumen in rebus præferim Metaphysicis, Augustino detraham, aut quod meritis laudes minus libenter tribuam; sed quia video multos ejus auctoritate abuti, & eos præ illo contemnere, quibus nulla ratione conferri potest.* En ergo bona tandem verba impetravimus à Censore, modesto in speciem, sed fortassis acerbitate nulli secundo. Quæ enim contemptus signa atque diçteria congesterit in Augustinum, specimina superius adducta satis nos docent. Sed quæ quæso est laus ista, quæ Pherepono sibi de sua maledicentia timenti extorta esse, aut tandem excidisse videtur? Aliquid est, eloquentiam & acumen in Augustino agnoscere, postquam ejus eloquentiam & acumen toties irrissisti. Aliquid est, eum laudibus dignum fateri, quem ubicumque possis vituperandum tibi statuisti. Sed (uti nemo cordatus non fateatur] Censoris honesti atque grati erat, non minori cura atque sinceritate has edisserere laudes, quæ verè Augustino conveniant, quàm maculas in ipso, ut sibi videtur, detegere, & gran-

& grandij etiam ore incusare. Ita factum fuisset, ut non odio viri sanctissimi, sed amore veritatis videri multis posset contra eundem militare Phereponus. Saltem in ejus Censura æquitatem, ac modestiam tam sæpe desiderare non cogeremur. Omnium autem Eruditorum confessum hic appello, & peto, an non cæ sint virtutes tum intellectuales, tum morales in Libris Augustini, ut Auctorem exhibeant omnium amore ac veneratione dignissimum? Erraverit quidem; nonnulla ignoraverit; magnis quoque viris ea calamitas familiaris deprehenditur. In aliis excusamus, quod nobis condonantum vellemus. Et quanquam nefas minime sit, immo potius sit commendandum, magnorum etiam virorum errores ac defectus diligenter investigare, & interdum etiam prodere in communem utilitatem; ferendi tamen ii non sunt, qui nulla reverentia, multoque supercilio, ac ira id præstant, & propter nævos quosdam non excusatione indignos tam effuse debacchantur, ut quantum ad ipsos pertinet, reliqua ingentia merita, illustresque doctes denigrare ac penitus tollere velle videantur. Neque vero quod alii nimis laudibus extulerint Augustinum, ejusque auctoritate abutantur, tibi in oppositum excessum prorueundum est, ut vitio tuo illos sui vitii commoneas. Utrunque peccatur. Sed Augustinum præ reliquis tot virtutes commendant, tot merita illustrent, ut qui in tantis laudandi causis, ejus vituperationem unice persequi amet, jam malevolentia insignis, & iniquæ censuræ pœnas evadere apud æquitatis amantes non possit.

Repete nunc laudes à Pherepono superius tributas Hipponensi Episcopo; levissimas sane, ac nullas, dum Augustino crispas veræ Theologiæ scientiam, Scripturarum sacrarum intelligentiam, eidemque contra objicias tanquam familiares aëreas pugnas, & Platonica doctrinæ abusum, quam nempe pro Evangelicis dogmatis obtrudebat credula plebi. Nam quid atrocius de Augustino proferre possis, quando eidem violatæ Religionis Christianæ notam iniuris, & ignorantiam omnium deterimam? Post tantum dedecus nihil fere laudandum superest in Augustino. Proinde nemo non videat, meras hæc esse calumnias, cum constet, Augustinum neque tam turpiter offendisse, neque caruisse scientiæ & præsidiiis necessariis ad rectam interpretationem Christianæ Doctrinæ, sacrarumque Literarum. In Parergis exponendis negare nolim, quin quandoque Augustinus frustra sudaverit ingenio suo, eaque protulerit, quæ Criticis atque Eruditis nostrorum temporum parum, neque injuriâ, arrideant. At in notionibus veræ virtutis, in explicatione Evangelicæ veritatis, atque in tradenda illa scientia,

quam præcipuam diximus esse divinarum Scripturarum materiam, in iisque locis exponendis, quibus ista nititur, & confirmatur, aut contrarii errores damnantur: non falsò minus, quam imprudenter aberrasse dicitur Augustinus. Locum unum proferat Phereponus, quo apertum fiat, tradidisse Augustinum contraria Apostolicæ Fidei. Sed ille puto nihil aliud adferet, quam quæ ab Arianis, Socinianis, Remonstrantibus, Calvinianis, aliisque ejus gregis hominibus perperam non tam in Augustino improbantur, quam in Ecclesia Catholica. At virum, non alia quam ista Augustino obijcientem, meminisse decebat, jam millies a Catholicis protritas fuisse hujusmodi accusationes, & quamvis se victos non dent Hæretici, non id nostro, sed Hæreticorum vitio ac pertinaciâ fieri. Nostrum certe omnium ea de re judicium ita habet.

Atque hoc potissimum fuit, quod in laudatis suprâ Confessionum verbis exposcebat à Deo vir sanctus & humilis, ne à Fidei ac Morum Doctrina cœlesti aberraret unquam, dum eam in sacris Literis abditam scrutaretur. Nam ut ut in Parergis pertractandis te eruditio deficiat, atque hallucineris [quod maximis etiam viris, iisque ad miraculum Criticis, sæpe accidit, & porro accidet] neque Religio ipsa tum læditur, neque perit hominis errantis fides. Tum solum errare pessimum est, cum Fidei Morumque Doctrinam aliqua ex parte errando labefactas. Et quanquam nos quoque fateamur, validius atque efficacius per ea præsidia defendi, suaderi, confirmarique posse Religionem & Ecclesiam veram Christi; quanquam etiam non negemus, ad multa Scripturarum loca necessariam utilemque esse Linguæ Hebrææ periciam, attamen addimus non esse illam Catholico Interpreti aut homini Christiano absolutè necessariam, positis fidis versionibus, in ea parte, quæ spectat ad propriam sacrorum Codicum intentionem sive materiam. Denique animadvertendum, hanc ipsam aciem ingenii, & Criticam Artem, & reliqua præsidia, & præstantiorem methodum, neque ad Interpretationem faciendam numeris omnibus absolutam, neque ad germanam Christi Doctrinam intelligendam prodesse, nisi è Cœlo virtus interpretandi, atque intelligendi descendat. Certè Hebræorum Linguam callebat Regius Propheta, & tamen is in Psalmo 118. Deum rogat, ut ad rem tantam sibi sit præsto. *Da mihi intellectum, & scrutabor legem tuam.* Et ibidem: *Revela oculos meos, & considerabo mirabilia tua.* Et rursus: *Faciem tuam illumina super servum tuum, & doce me justificationes tuas.* Hinc sanctus Hieronymus in Epist. ad Paulinum: *Si tantus, inquit, Propheta tenebras ignorantie consitetur: qua nos putas parvulos & pene lactentes inscitia nocte circumdari?* Qua ex



re intelligat quisque Theologus precandi Dei, atque animi à vitiis purgandi necessitatem, quo intellectus ad assequendam mentem ac voluntatem Dei, suam legem proponentis, expeditus, aptusque fiat. Facilius verò, contingit, ut humiles corde, licet semidocti, quàm summè docti, sed ambitione turgentes, pravisque cupiditatibus addicti, penetrent in sacrarium cœlestis revelationis. Audi Magistrum ipsum nostrum ita ad Phariseos Legisque peritos loquentem Luc. XI. 52. *Va vobis Legisperitis, quia tulistis clavem scientiæ ipsi non introistis.*

Accedat demum experientia ipsa. Non plus olim in cognitione Christianæ Legis, tum ad Mores, tum ad Dogma spectantis, excelluere Patres, Criticæ, & Linguarum gnari, quàm reliqui Patres solis Versionibus & Traditione contenti. Catholicis verò nostræ ætatis non paucis, Phereponus, ut puto, Eruditionem, Criticam, Studiumque Orientalium Linguarum non negabit. At isti, quod est ad Dogmata Fidei ac Morum, & in præcipuis Disciplinæ Ecclesiasticæ capitibus, consonant cum antiquis Patribus, neque eos errasse agnoscunt propter ignorantiam Linguae, neque constituisse pro Christi & Apostolorum documentis somnia Platonis. Rursus qui tantum sibi de Critices Linguarumque peritiâ plaudunt, in gravissimos errores, teterrimasque Hæreses concessere, atque inde ad Catholicam veramque Fidem exurgere nequeunt, & exurgendum non putant. Quid quæso tam ambiciosa hæc scientia valet [Grammaticæ tamen potius, quàm germanæ Theologiæ speciem referens] si ab Ecclesia Orthodoxa avertit, & in maximis erroribus tam pertinaciter quiescit? Et ne nobis Romano Catholicis nos blandiri ac tribuere nimium dicant: sese gregemque omnium Hæreticorum, qui nunc in Septentrionalibus regionibus tanto numero, tanta diversitate regnant, tandem contemplantur. Non inter se minus turgidi isti Critici atque Heterodoxi pugnant, quàm cum Catholicis, & alter alterum Hæresis, & abdicatæ Evangelicæ Doctrinæ incusat. Melius, inquiunt, quàm ineruditi Patres, eruditio nostra divinas interpretatur Scripturas. Bene est; at cur dissident in præcipuis Evangelii dogmatis? Qui alter alterum non vincit? Cur non dicam gregales suos, sed ne ipsos quidem Catholicos, quanquam sinceros, & de puritate Fidei, suæque salute sollicitos, quidquam è priori sententia dimovent? Discant ergo, quid possit Critica & peritiâ Linguarum, ad intelligendam veram Christi & Apostolorum Doctrinam, discant se potius Grammaticos egregios, quàm Theologos Orthodoxos ea eruditione sæpe fieri, & tandem intelligant, se quidem in sacris Codicibus multa melius, quàm Patres exponere posse in ea eruditione, quæ ad salutem non ducit, at in præcipua ac regia sacrorum Codicum materia, quæ ad veram Fidem, salutemque deducit, plus

potuisse ac posse Ingenium Catholicum , meditatione constanti excitatum, pietate ac humilitate Cœlo carum , Traditione suffultum, & probatis ab Ecclesiâ Versionibus contentum, quàm potuerit unquam, sive possit tota Criticorum jactantia.

Accipe nunc , quid Phereponus ferat pag. 605. Animadv. ad Lib. 2. Cap. 3. de Baptis. contra Donatistas. *Si omnes , inquit omnino Africa Episcopos congregasset ad iudicium ferendum de sensu loci veteris , aut novi Testamenti , quorum nullus Hebraicè sciebat , & per pauci Græcè norant : ingens illa imperitorum multitudo ineptior erat ad rectè judicandum , quàm vir unus peritus utriusque linguæ; exempli cau.â , quàm solus Hieronymus Stridenensis , quamvis tanta non fuerit ejus peritia , quàm vulgò putatur.* Miseram planè Christi Ecclesiam, cui expectanda fuere duo proximè præterita secula , hoc est , fortunatè illi dies , qui tot nobis dedere acutissimos Criticos in Heterodoxorum cœtu, ut rectè ac sine erroris periculo interpretari posset cœlestia Legis nostræ volumina. Et si quidem Pherepono sordet ipsemet sanctus Hieronymus , quid de reliquis Patribus eidem imparibus dicendum erit ? Equidem incertus hæreo, num magis in contemptum hominum ista sententia vergat , quàm in contumeliam Dei , qui & statim ab ædificatione, & tamdiu, suam deferuit Ecclesiam , & ignorantia omnium perniciosissimæ evertendam dedit , neque inculcavit unquam per Filium suum , aut per Apostolos , Hebraicæ Linguæ necessitatem , omniumque Versionum insufficientiam ad salutem, & frustra nos hortatus fuit , ut Ecclesiam audiremus , eique Ecclesiæ immunitatem ab errore pollicitus est. At quis hæc absurda facile somniet , aut concoquat in Religione Christi ? Satis fidæ Versiones in iis , quæ ad Christianum Dogma spectant ; semper fuere ; sufficiens Eruditio in Ecclesia Dei , & quod in primis huc facit , longè latèque diffusa Traditio non sinebat errare pios , accuratosque Interpretes, quamvis in locis minime necessariis exponendis deficerent interdum nonnulli, & methodo nonnunquam minus commodâ uterentur. Quod si ex ipsis Patribus aliquis in re quapiam gravi erravit, ejus errores minime adoptavit Ecclesia, sed correxit , Traditionem & consensum reliquorum fideliter secuta.

Pergit deinde Phereponus : *Quis dubites etiam superiore seculo XVII. unum Hugonem Grotium , aut unum Joannem Druſum , rectius potuisse scripturam veteris & novi Testamenti interpretari , quàm omnes Italia ac Hispania Episcopos simul , capita conferentes?* Nolo ne vel tantillam quidem expendere, num haberet proxime præterito seculo Italia atque Hispania, qui Hebraicè & Græcè docti possent divinas rectè interpretari

Scripturas. Satiùs erit aliquid afferre in exemplaria sacrorum Interpretum nobis à Pherepono proposita. *Drusus* inter Protestantes Hebraicâ certè ac Rabbinicâ Eruditione illustris, talem se præbuit, ut vel à Catholicis Scriptoribus tulerit eximias laudes. De illo *Richardus Simonius* in sua Historia Critica paucis ingentem Panegyricum exhibet. Animus autem mihi non est, totam ejus laudem inter Grammaticæ pomœria concludere, cum & propterea *Divinus Grammaticus* apud suos audierit. Tibi liceat hominem illum Theologis etiam addere. Sed memineris etiam, in Theologicis controversiis, atque in interpretatione divinatorum Codicum supra quamplurimos è suis moderatione atque modestia excelluisse. Immo & abstinuit à subscribenda Calvinianorum suorum confessione: & Græcorum Patrum, ac Hieronymi scripta in honore habuit, & aliis in multis Catholicè sentire visus est: quæ agendi ratio homini peperit odium suorum gregalium.

Quantus vir inter eosdem Protestantes fuerit *Grotius*, nihil attinet in præsentia commemorare, ejus enim Libri ac fama tanta celebritate feruntur, ut nostro plane non indigeant elogio. Eum Arminianis totum adhæsisse, & multis erroribus ejus Libros scatere, nemo nescit: an & Socinianis in præcipuo illorum deliramento sese junxerit, non ita certum; multaque in idem argumentum *Bosluetus* v. c. scripsit. Sunt qui istius criminis notam ab ipso abstergere conantur. Verùm illud pro comperto est apud Eruditos, *Grotium* impenſe admodum inclinasse in Catholicorum partes: immo nisi mors immatura ejus consilia prævertisset, nomen suum Ecclesiæ Catholicæ daturus erat. Luculentum in hanc rem testem habemus v. c. *Henricum Valesium* in Oratione habita in funere incomparabilis viri *Dionysii Petavii* Soc. Jesu. Ita ille de eodem Petavio: *Quid non præstitit, ut clarissimum virum Hugonem Grotium ad Catholicorum communionem adduceret? Erat ille quidem minime à nobis alienus, ac pene noster; quippe qui doctrinam Tridentini Concilii in omnibus sese amplecti palam profiteretur. Id unum supererat, ut Ecclesia sacrarium ingressus communioni nostræ sociaretur; quod ille nescio quas ob causas, dum ad Catholica Fidei unitatem plurimos secum sperat adducere, consulto differebat &c.* Cum *Valesio* consonat *Petrus Jurius* in Gallico Libro, cui titulus *Ingenium Antonii Arnaldi*. Postquam dixit, *Isaacum Casaubonum*, si quid fuit, fuisse Papistam, addit, *Grotium* quoque se conjecisse in Papismum: expressè quippe is statuit in postremo Opere suo adversus Riverum, *salam sacram Scripturam nequaquam sufficere. sed opus etiam esse Traditionem sequi; atque ut percipiatur ista Traditio, confugiendum esse ad consensum veterum Scriptorum, præcipue verò certam esse viam ipsius colligendæ ex universali Concilio &c.* Illic etiam Episcopis ingentem tribuit aucto-

auctoritatem in decernenda fidei Doctrina, & præsertim Episcopo Romano, quem ad conservationem veritatis atque unitatis consulendum esse in dubiis rebus affirmat. Ad hæc testatur *Jurius*, obligasse *Grotium* fidem suam Bignonio, se post reditum è Suecia Catholicam in Ecclesiam palam ingressurum. Vide etiam peculiarem Commentationem *Grotii de Antichristo, & viam ad Pacem Ecclesiasticam, seu Annotationes ad consultationem Cassandri*, ubi quantum Romano-Catholicis assentiatur, palam fiet. Quæ res Jacobum Laurentium Calvinianæ gentis Ministrum jam olim incitavit, ut Librum emitteret, cui *Papissantis Grotii* titulum fecit. Sed Epistolas Grotianas omnium maxime hic perpendendas Lectori relinquimus, cum toties in iis edisserat *Grotius*, quæ sibi de Catholica Ecclesia foret amica opinio, & quanti à se æstimarentur & colerentur probatissimi Ecclesiæ Patres.

Atque ista quidem de *Drusio & Grotio*, non ut ea quasi ignota narrem Protestantibus, sed ut alicui è nostris non satis rerum perito subveniam, atque in nostram omnium utilitatem pauca demum ista convertam. Si *Drusus & Grotius*, quos ut divini Verbi præstantissimos Interpretes nobis objicit Phereponus, tam bene de antiquis Patribus sensere, eosque sanæ doctrinæ testes amplissimos suspexere: ergo sancti Patres in eo, quod maximi refert, hoc est in Dogmatica Theologia, atque in interpretanda coelestium Librorum doctrina, alii ex opinione *Drusii & Grotii* fuerunt, quàm nobis persuadere nunc velit Phereponus. Deinde si celebres illi duo Protestantes, quò magis Linguarum Orientalium peritia, ac eruditione excelluerunt, eo magis in sententiam & communionem Catholicæ Ecclesiæ inclinarunt: ex eorum exemplo conjicere quisque potest ac debet, quidquid sit Ecclesia nostra, & quàm sana sint illius Dogmata, in quibus sita præcipuè est Religionis veræ substantia. Intelligas etiam, quàm non contemnendi Patres, licet minus in Critica, & Linguis versati, cum eos Ecclesia ista Traditionis testes adhibeat, & in scientia Dogmatum in sacris Literis descriptorum fideles agnoscat Interpretes, & sequatur. Eamque nostram methodum, atque sententiam de Patribus placere video multis etiam eruditissimis ex ipso Protestantium numero. Vide, quæ Scriptores nonnulli Anglicanæ Ecclesiæ adhærentes de ipsis Patribus, eorumque auctoritate fateantur. Unus præcipuè ex iis mihi nominandus est Thomas Milles, qui ante paucos annos in novissima Editione Operum sancti Cyrilli Hierosolymitani contendit, sola traditione & auctoritate Patrum convinci debere nuperos Arianos, sectatoresque Socini. Quamobrem ex iisdem exemplis, quæ in medium Phereponus protulit, intehigat tandem ipse, si potis est, sine injuria Augustinum cete-

ceterosque Patres à se explodi non posse, & maledicentiam potius quam justam censuram sapere, quæcumque tanta asperitate, & sine ulla exceptione, & sine ullo rerum delectu, adversus eosdem ipse conscripsit.

## CAPUT XVII.

*An loquentibus de divinis rebus novas voces adhibere liceat, ac licuerit. Necessitate compulsi Ecclesia Patres tot quaestiones pertractarunt, ut ab Hæreticorum technis ac erroribus Catholicam veritatem liberarent. Injusta criminatio Phereponi contra Augustinum tribuentem Monica matri suæ quædam in Libris de Ordine. Iidem Libri à Pherepono nullo jure contempti. Ad Ordinem politicum spectat in Urbibus tolerare Meretrices, ne pejora mala subsequantur. A Fanatismo ac Enthusiasmo quàm longè absuerit Augustinus. Quibusdam hominibus non necessarij Codices sacra Scriptura. Sapientia Liber cur Salomoni adscriptus, & nihilominus Canonicus reputatus. Augustinus de Gothis agens in vastationes Urbis nihil dissimulavit. Alia Phereponi tela in sanctum Augustinum repulsa.*

**C**ongerere nunc juvat nonnulla alia, quæ in Phereponi Animadversionibus sparsa occurrunt. Pag. 477. ad Lib. 13. Cap. 11. Confess. auctor est, de Trinitate esse parcissimè disputandum, uti de alijs hujusmodi Mysterijs; *si enim de iis loqueremur dumtaxat, quatenus nobis sunt revelata, atque locutionibus Scripturæ contenti, ignota Deo relinqueremus, non tot essent contentiones, &c.* Paria habet pag. 561. ad Cap. 20. Libri de Agone Christiano, ubi Theologos culpat, quòd post exortas Nestorii controversias audacter explicare velint, quod nesciunt de Incarnatione Verbi: sed fusiùs hac de re mentem suam explicat pag. 600. Animadv. ad Lib. 1. cap. 4. & p. 602. ad Lib. 7. cap. 4. de Trinitate, *valde ambigüe* locutos esse Veteres de Deo uno & trino ait: id quod piaculo proximum putat. Tum laudat posteriorum seculorum Ecclesias, quæ Veterum audaciam emandarint. Nos ergo, deinde subdit, *de unitate Dei, deque Patre, Filio & Spiritu sancto ex*  
*Scripta*

*Scriptura quoque loquamur, atque sentiamus; nec putemus id posse à nobis perspicuè explicari, quod perspicuè revelatum non est, aut melius exprimi verbis nostris, quod non assequimur, quàm verbis Christi & Apostolorum, &c. Si Veteribus ignoscimus, quod de Unitate specifica divina natura in Patre, Filio & Spiritu sancto docuerunt, ne immisererdes simus in eos, qui hac de re aliter quàm nos nunc fortè sentiunt, si modò Scripturam sacram normam fidei, suam habeant, præceptorum Evangelii sint observantes, reditumque è cælo Domini nostri Jesu Christi vivos & mortuos judicaturi nobiscum præstolentur.* Qui hic loquitur, Arminianus est, & pro se ac pro Arminianis perorat, cujus Sectæ Libri & præcipuè Confessio cap. 3. & Apologia c. 3. & Limburchius variis in locis, hoc idem docent, nempe in proponendo Trinitatis mysterio abstinendum esse à vocibus, quas humana auctoritas induxit. Gratissima utique Sociniani sententia: immo Episcopius atque alii gregis illius, abstinendum quoque dixerunt à sententia & vocibus, quibus Deum unum in essentia, trinum in personis affirmamus; fidem quippe Trinitatis (si iis credimus) necessariam ad salutem non censuerunt priora tria Epochæ Christianæ secula. Iisdem numeris canentem nunc audimus Phereponum, & insultantem aliis in locis Augustino, tanquam de eodem immenso mysterio inepta narranti.

Equidem omnia quæ in Libris *de Trinitate* edisseruit sanctus Augustinus, in me non reciperem ostendere talia esse quæ unicuique placeant, cum & aliqua sint, quæ Augustinus ipsemet probasse non videtur. Sed sive elumbia sint illic argumenta, sive multiloquium, & ornamenta superflua pro dignitate inestabilis argumenti, nihilominus illud certum esse debet nobis, quod est ad nucleum dogmatis, nihil ea in re hallucinatum fuisse Augustinum, ejusque orationem à crimine audaciæ prorsus abesse: neque secus judicandum de reliquis Patribus, qui Augustinum præcessere. Inventa sunt quidem in Theologiam, de Deo uno ac trino loquentem, vocabula nonnulla, quæstionesque non paucæ, quorum nusquam expresse meminit divina Scriptura. Sed quod iis vocibus novis significatur, iisque de controversiis Ecclesiæ decrevit, veterem & Apostolicam nihilo secius Doctrinam continet, quippe ex aliis evidentibus Scripturæ placitis ritè deductum, aut per Traditionem certissimam à Christo Ecclesiæ suæ revelatum. Fecerunt autem subinde pullulantes Hæreses, grande illud mysterium variis erroribus vexantes; ut ipsi quoque Patres coacti vocabulis novis uti, scientiam divinarum rerum uberius explicarent, & ab Hæreticorum erroribus atque cavillationibus, multiplicatâ quæstionum segete, fortius tuerentur. Augustinum ipsum audi Lib. 7. cap. 4. de Trin. *Fateamur loquendi necessitate*

parta hæc vocabula, cum opus esset copiosa disputatione adversus insidias, vel errores Hæreticorum. Cum enim conaretur humana inopia loquendo proferre ad hominum sensus, quod in secretario mentis pro capiti tenet, de Domino Deo Creatore suo, sive per piam fidem, sive per qualemcumque intelligentiam, vimus dicere tres essentias, ne intelligeretur in illa summa æqualitate ulla diversitas. Rursus non esse tria quadam, non poterat dicere; quod Sabellius quia dixit, in Hæresim lapsus est, &c.

Quod verò ambiguit hæc vocabulis locuti sint Veteres, etiam si id concedere vellemus, non tamen admirationis aut accusationis iusta causa Pherepono foret. Linguarum diversitas obstabat interdum, ne Christiani unius Linguae, voces alterius, causam novarum controversiarum in Theologiam illatas, expedite intelligerent. Tum varias notiones uni atque eidem voci subijciebant nonnulli: rursusque unam rem diversis vocibus significabant alii. Sed Hæreticorum in primis arte accidit, ut *ambigua* viderentur voces, dum suam illi doctrinam aut celare, aut dealbare niterentur, ne erroris accusaretur. At collatis, & probe expensis, & in Conciliis potissimum, Catholicorum Patrum sententiis, exploratâ quoque diligentius Hæreticorum mente: demum constabat, verbis tantum, non rebus, inter se discrepare Catholicos, & dogmata per eos certissima tradi, & falli Hæreticorum novitatem. At Phereponus, abjiciendas locutiones novas de Trinitate, & iis contentos nos esse debere, quæ in Scripturis sacris habentur. Catholici quoque hoc faciendum suadent, ne novam doctrinam sub vocibus novis in Ecclesiam inferamus. Basilii, Nazianzenus, Cyrillus, ac alii complures modum ac sobrietatem laudant, in loquendo de rebus divinis, jubentque nos temperare temerariis quæstionibus. Sed cum nos cogunt Hæretici per alia verba explicare mentem ac voces divinarum Literarum, nihilque aliud quàm vetus doctrina proponitur, vel per legitima confectaria ex iisdem sacris Literis derivata, vel per accuratam investigationem è Traditione Patrum hausta: tunc licet, ac interdum etiam necesse est, nova verba à Scholis & Linguis mutuari. Filiis autem Ecclesiæ veræ uti nefas est aliquid proferre, quod sacris Scripturis adversetur; ita crimen est aut negare, aut damnare, atque rejicere quidquid ritè per Ecclesiam deducitur ex eisdem Scripturis, ac Traditione fideli. Sabellius ita unitatem Dei deprædicat, ut Trinitatem excludat. Ecce necessitas novarum vocum, ut Apostolorum Doctrina melius innotescat, & novus error profligetur. Divinitatem Filii Arius negat, sancti Spiritus Macedonius, in Christo duas naturas impiè disjungit Nestorius, pessimè confundit Eutyches: en quod Patres adigit ad locutiones novas in Theologicis usurpandas,

pandas, quo quid credendum moncat fides, clariùs intelligatur in populo.

Et fallitur Phereponus, cum dogmata hujusmodi *non perspicue revelata* ait; nam etsi non semper apertissimè verbo Dei scripto, certè revelato per Traditionem, ea omnia perspicue constant. Frustra quoque invidiam facere conatur Catholicis, quasi melius exprimi posse putemus *nostris verbis*, quod non assequimur, quàm *verbis Christi, & Apostolorum*. Id enim necessitate fit, & ad eruditionem indoctæ gentis, & ad confutationem errorum, & in hunc finem Christus Ecclesiæ suæ, ut Apostolus ait Ephes. 4. 2. *Dedit quosdam quidem Apostolos, quosdam autem Prophetas, alios verò Evangelistas, alios autem Pastores, & Doctores*. Quamobrem si divinæ essentia unitas, & divinarum personarum trinitas innituntur, ut nos contendimus, certà auctoritate Scripturæ ac Traditionis: quid est quod veniam Phereponus, nescio an Arminianis, certè Socinianis, impetrare aunc velit, præcipua hæc dogmata aut negantibus, aut recipere recusantibus? Et cum in Ecclesia Dei talia negare, immò non asserere, inexpressibile crimen Hæresis semper fuerit, uti jam doctissimi viri tum ex Catholicis, tum ex Protestantibus, & omnium novissimè Georgius Bullus Anglus contra Episcopium ostenderunt: qui nunc licentiam credendi hic, quidquid suæ tantummodò menti arridet, Augustini Censor deposcit? Si qui ex Veteribus à Catholica Sententia discrepasse videntur, iis sanè indulgendum, vel quòd minus acutè, multumque perfunctoriè, & sine dolo malo, de sublimibus mysteriis egerint, vel quòd solo usu loquendi à reliquis Christianis disenserint, itemque eandem vocibus diversis significarint, vel etiam quod iis temporibus scripserint, quibus nondum aut disputatio cum Hæreticis, aut sacra Concilia falli nescia splendentissimam faciem veritatis prætulerant. At quam quæso indulgentiam debeamus Novatoribus quibusdam ingenio suo revelationem accommodantibus, & Ecclesiæ auctoritatem, & Patrum omnium Traditionem, nunc unicuique notam, & in Conciliis stabilitam, miro fastidio, atque ambitione nostro hoc ævo despicientibus? Hoc hominum genus fugiendum clamat Apostolus. Hanc superbiam, non cautionem, damnandam esse, cum ratio recta, tum disciplina Ecclesiæ satis apertè nos docent.

Regrediamur nunc ad Augustini Libros *de Ordine*; in quibus cum vir sanctus ingenium Monicæ parentis suæ commendasset, Phereponus pag. 478. Animadv. accusationis novæ ansam arripit, inquit: *Si hæc in sermone fameliari matri dixisset Augustinus, vituperari sanè non posset, immo fortè laudaretur pietatis causâ: sed hæc nescio quomodo scribere sustinueris ad virum eruditum, atque edoc.* Legamus, quænam tandem sint immodica ista



encomia in suam matrem ab Augustino congesta. *Nobiscum* [inquit Lib. 1. cap. 1. de Ord.] *erat etiam mater nostra, cujus ingenium, atque in res divinas inflammatum animum, cum antea convictu diuturno, & diligentis consideratione prospexeram, tum vero in quadam disputatione non parva rei &c. tanta mihi mens ejus apparuerat, ut nihil aptius vera Philosophia videretur.* Necesse est nimium delicatus sit, aut nimis adversus Augustinum animatus Censor iste, quando hac de causa vituperandum putat Augustinum. Lege tot Dialogos, tot Libros excellentium virorum; similia & longè majora ubique reperies, quæ aut veritas confirmat, aut certè amor honestissimus displicere auditoribus non sinit. Quòd si Pherepono iudice vel foret laudandus Augustinus, ubi eadem suæ matri in familiari sermone dixisset: cur idem præstitisse in ediro Libro flagitium fuit? immo si falsa ea laus reputanda est, gravius peccasset filius, quod matri suæ in faciem adulatus fuisset, falsamque persuasionem bonæ annui ingessisset. Quamquam quis in ea laude sobrietatem desideret? Inquit Augustinus, se *ingenium* illud, eamque mentem, & cum *in res divinas inflammatum animum* [quæ verba sibi reticenda Phereponus non sine causa duxit] *ut nihil aptius vera Philosophia videretur.* Non exhibet ille nobis egregiam quampiam in Monica [liceat ita mihi dicere] Philosophissam, sed ejus mentem ingenio ejusmodi instructam, & ardore in res divinas ita accensam commemorat, ut aptissima esset ad veram Philosophiam. Quæ laus piis etiam nonnullis feminis nostra hac ætate convenire potest, quamvis nullam unquam Philosophiæ dederint operam. Quanto autem magis in Monicam cadere eadem laus potuit, cujus prudentiam, pietatem, & reliquias cordis & mentis virtutes sincerè expositas habemus in Confessionum Libris.

Sed inquit Phereponus, se nescire quomodo hæc scribere atque edere Augustinus sustinuerit, cum præsertim *Liber de Vita beata*, ubi eximia illa *Monica responsa* leguntur, eadem usque etiam esset: eum enim si quis legat, facile intelliget, filium præ amore matris ingenium invenisse in verbis bonæ anis, quod aliis non facile animadvertant. Nisi sit hoc abuti otio & literis, quid aliud jam erit? Censorem agere volumus, & quidquid occurrat, censoriam protinus virgam meretur. Scilicet non desunt unquam verba jurgari, & lædere cupientibus. Habemus Librum, seu Dialogum *de Vita beata*, ibique suæ sunt partes Monicæ matri. Certè videtur ignorare Phereponus, qui Dialogos contexere soleant eruditi viri. Interlocutores pro libito inducunt, lisque sine ulla culpa tribuant atque affingunt orationem moribus ac ingenio illorum conformem. Quare ne ego quidem

intelligo qui dicatur Augustinus *ingenium invenisse in verbis bonæ anus*, quando hæc eadem verba Augustino sunt tribuenda, & subtiliora melioraque Augustinus eidem suæ matri potuisset adscribere? Deinde consule ipsum Librum *de Vita beata*, intelligesque an insulsa sive vulgaria adeo sint pauca illa quæ Monicæ tribuuntur, ut ea contemnere Pherepono licuerit, immò his aliis cœptam onerare censuram: *Quæ, inquit, mulier nunc paulò liberalius educata, talia & meliora etiam aliud agens non effundat?* At nos dicimus, si qua mulier talia melioraque etiam aliud agens effunderet, qualia legimus in Libro *de Vita beata*; sique pari ardore in res divinas ferretur, ac Monica ferebatur, jure mentem quoque illius feminæ *aptissimam veræ Philosophiæ* affirmare possemus. Ceterum non ita facilè ignoscendum videtur Pherepono nostro, Monicæ ingenium, ejusque laudes confidentissimè ridenti, quasi Censori nupero ex ejus *convictu diuturno, & diligenti consideratione* constitisset, illam ingenii perspicacia caruisse, & bonam tantummodò anum fuisse dicendam. Non uno argumento deprehenderat Augustinus, quanta mens matri suæ foret. Tanto ac tam pio viro quisquis fidem sine ulla ratione, & pro solo arbitrio suo neget, non video cur impudentiæ non sit arcessendus.

Porro eodem stomacho Libros *de Ordine* Phereponus legit. Nullam quippe ibi definitionem paulò accuratorem reperit, *sed tantum Descriptiones Rhetoricas, re descriptâ sæpe obscuriores, aut ærè æquæ ac eam obscuras*: quod exemplo uno ostendere non inutile putat. Tum hæc addit: *Si talia hodie conscribillerentur, & in publicam lucem protruderentur, profectò Eruditorum plausum non ferrent, uti nec innumera inanes argutiæ, quibus hæc Opuscula scatent. Sed illo ævo verba pluris multò fiebant, quàm res ipsa: quo vitio & nostrum seculum, plus quam optandum esset, etiamnum laborat.* Bono animo volo sit Augustinus, quando Phereponus tot reos cum illo, ejusque ætate conjungit. Seculum nostrum iisdem laborat vitiis, ac seculum Augustinianum, cum tamen eruditionis gloriâ, & methodi in Literarum studiis eximie famâ commendetur, & Phereponum non unum luci dederit. Itaque tanto exemplo se consoletur Augustinus. Interim tamen nescio quàm multis Lectoribus persuasurus sit Phereponus, Opuscula illa Augustini, quanquam primos illius fœtus, verbis duntaxat, & non rebus, abundare, & innumeris, iisque inanibus argutiis ita scatere, ut nullum Eruditorum plausum pollicere sibi debeant. Equidem non ea dicere auderem absoluta, aut summè commendanda Augustini Opera, sed quidem talia affirmare ausim, ut neque Augustinum quod elucubravit, ac edi passus fuerit, neque nos si legerimus, poenitere unquam possit aut debeat. Vel ipse Phereponus illa plu-

pluris æstimasset, minusve contempsisset, nisi oblitus tunc fuisset, quæ licentia, quæ leges, qui finis sit Dialogorum Scriptori. Alioqui vel in Platonis Libris nimium habebit Phereponus, quod ridcat, atque accuset. Ego verò Censori huic non succensco, quòd exquisitam accuratamque argumentorum pertractationem in quibusque Libris desideret, sed quòd ita ab unoquoque exigat optima, ut nihil ferat, omnia flocci faciat, quæ istum pulchritudinis apicem fortè non attingerint. Lege Opuscula illa Augustini, & tu perpende, num inepta ipsa sint, an eorum Censor iniquus.

*Quid sordidius, quid inanius decoris ac turpitudinis plenius, meretricibus Leonibus, ceterisque hoc genus pestibus dici potest? Ausfer meretrices de rebus humanis, turbaveris omnia libidinibus.* Verba sunt Augustini Lib. 2. cap. 4. de Ordine. Optandum esset Augustino, ne talia unquam effudisset; adeo quippe absfona à ratione videntur Pherepono, ut pag. 479. exclamet: *Si talia hodie scriberemus, nunquam sat graves pœnas dare possemus iis, qui ea in Veteribus mirantur.* Et quidui? cum sit Augustini iudicium sequamur, rectè faciant legislatores & Principes, qui lupanaria esse patiuntur; nam præstat paucas demes pollui, quàm omnes libidinibus turbari. Audiat porro Augustinus, & quando bene filere non didicit, discat jam à Pherepono nostro consona & vera loqui. *Quantò, inquit ille, satius erat dicere, malas mulieres & libidinosos juvenes abuti libertate à Deo accepta, & alia quæ ab Eruditis nunc dici solent!* Dicat quæso Phereponus, num rara atque inaudita se narrare nobis putet, cum talia de meretricibus scribit. Equidem non puto; nam cui Christiano discendum adhuc est, peccare malas mulieres, & libidinosos juvenes, dum in vetitam luxuriam se abripi sinunt? Præterea non libidini tantum, sed cuicunque alii peccato indulgens homo, abutitur libertate à Deo accepta. Addo, me nequaquam intelligere, quid ad rem præsentem faciat animadversio Phereponi. Augustinus quærit, an ad *Ordinem* pertineat, permittere meretrices in urbibus; & Phereponus reponit, se laudaturum fuisse dicentem, id seminarum genus abuti libertate à Deo accepta: sed rem intimiùs perscrutemur. Arguere Augustinum videtur Phereponus, quasi meretriciam artem is probet; proptereaque forsitan subdit, peccare juvenes ac feminas huic libidini obsequentes. Verùm Augustino nulla alia opinio fuit, quàm sit Pherepono; quippe meretriciam artem *sordidam, turpitudinis plenam* supra ceteras appellat, & *pestibus* accenset, & *hoc hominum genus per suos mores impurissimum vitam* agnoscit. Igitur Pherepono duntaxat animus esse potuit sugillandi Augustini, quod dixerit, non malè permitti in ci-

vitatibus meretrices, idque ad *Ordinem* pertinere. At Augustinum rectissime hoc pronuntiasse, nemo negaverit, nisi qui minora mala negat esse toleranda in urbibus, quando aliter evitare majora non possunt. Hoc autem axioma politicum quisque sapiens amplectitur, & omnium maxime amplecti Pheroponus debuit, qui tantum abest ut vitia quædam hominum castigata à Principibus velit, ut vel impunè errare in Religione unicuique permittendum censeat. Quod si meretrices ab urbibus non eliminat secularis Magistratus, non idcirco earum artem licere apud Deum arbitratur. Christiana verò Lex, ejusque Doctores in illam tanquam pestem Deo planè invisam quotidie perorant: ac proinde constare potest, *Ordinis* esse, ut mala ac vitia quædam ferantur, neque politicè puniantur in hominum commercio, ne si omnia auferre velis, periculosius deinde à gravioribus malis ac vitiis Reipublicæ ordo turbetur. Quod & Medici faciunt in corpore malè sano, ipsaque fecisse videtur Judæorum Respublica, & ceteræ Nationes, non libenter quidem, sed necessitate quadam coactæ.

Pauca in Librum *de Immortalitate animæ* habet Pheroponus: ut ut tamen fiat pauca, pauciora tamen sunt, quæ Augustinus ipse Lib. 1. cap. 5. Retract. scripta reliquit, & nos repetenda hic existimamus, cum satis sint ad obstruendum os obloquenti Cenfori, qui ingenuam Augustini confessionem ac sententiam de hoc Libro dissimulare voluit. Inquit ergo Augustinus de Libro eodem: *Sed nescio quomodo me invito exist in manus hominum, & inter mea Opuscula nominatur. Qui primò ratiocinationum contorsione atque brevitate sic obscurus est, ut fatiget, cum legitur, etiam intentionem meam, vixque intelligatur à me ipso.* Ejusdem Augustini verba sunt hæc alia in Prologo ad Libros de Doctrina Christiana: *Hac tradere institui volentibus, & valentibus discere, si Deus ac Dominus noster ea, quæ de hac re cogitanti solet suggerere, etiam scribenti mihi non deneget.* Pheropono ista nequaquam probantur pag 524. Animadv. *Quamvis*, inquit ille, *bonas omnes cogitationes ad Deum, quasi ad bonorum omnium primam causam, referre debeamus; non ita tamen loquendum, quasi Deus nos afflaret, & quidquid bonum esse credimus, veluti distaret.* Tum incommoda nonnulla recenset, quæ hinc nascerentur, & quæ mirari se ait, cur in mentem Augustino non venerint. Tandem in hæc verba definit: *Profectò hodie nemo est inter Eruditos, qui velat sub nomine suo edi, quæ suggestiones divinæ ab Autore putabantur.* Quam vera sint postrema hæc verba, videant alii, quibus ignota non sit Calviniani Gregis, & Anabaptistarum, & Quakevorum, aliorumque id genus hominum Historia.

Quod nostrum est dicimus, bene hic habere doctrinam Phereponi, temporibusque istis usui esse posse, quando recentiora schismata peperere tot in Anglia, Germania, Belgio, aliisque Provinciis, *Visionarios*, ut vocant. Cavendum autem ne stulti abutantur nomine ac verbis Augustini, neve revelationes atque inspirationes tanquam cœlitus delapsas nimium credulis obtrudentes, fallant, simulque fallantur. Ceterum si Pherepono animus est, Augustinum hic tacite *Fanaticis*, ut ajunt, seu *Enthusiasticis*, accensere, eidemque saltem ex his verbis invidiam creare, nequeo quin desiderem in ejus consilio æquitatem. Nemo longius absuit, quàm Augustinus, à revelationibus venditandis; nemo luculentius expressit quàm sibi metipsi fidem haberi velet. Se quippe ille noverat non Prophetam, non Doctorem ab omni erroris periculo immunem. Non ille tantum sibi tribuebat, ut vellet sibi credi quæcumque diceret, quasi nihil non Cœlo Auctore loqueretur in interpretandis divinis Literis. Sed qui sciret ab homine privato expectandam non esse certissimam Doctrinæ Christianæ explicationem, & sitam esse immunitatem ab omni errore in unius tantummodo Ecclesiæ auctoritate: sua proinde accipi volebat, tanquam dogmata hominis, veritatem quidem quærentis, sed non auctoritate cœlesti proponentis. Vulgatissima sunt, & tamen hic referenda, quæ ille in Epist. 36. ad Fortunatianum olim CXI. scribit. *Neque enim, ait, quorumlibet disputationes, quamvis Catholicorum, & laudatorum hominum, velus Scripturas Canonicas, habere debemus, &c. Talis ego sum in scriptis aliorum, tales esse volo intellectores meorum.* Et ad sanctum Hieronymum ita scripserat Epist. 22. alias 19. *Solis Scripturarum libris didici hunc deferre honorem, ut nullum auctorem eorum in scribendo errasse aliquid, firmissime teneam. Alios autem ita lego, ut quantalibet sanctitate præpolleant, non ideo verum putem, quod ipsi ita senserunt & scripserunt.* Reliqua Augustini hac de re documenta omitto. Quamobrem tollitur suspicio omnis, voluisse unquam Augustinum aliquid novi tradere, tanquam sibi cœlitus revelatum, dicti que suis hac arte comparare certissimam fidem.

Quæ ergo mens Augustino, cum ait, *Deum ac Dominum nostrum sibi de præceptis tractandarum Scripturarum cogitanti, nonnulla suggerere consuevisse?* Nihil aliud ille vult, nisi se Deo accepta referre, quæcumque bona, utilia, ac vera eam in rem sibi adinvenisse & excogitasse videbatur. Nempe à Deo venit quidquid boni in homine nascitur; & quælibet cogitatio bona ad Deum, hoc est, ad ejus proprium ac præcipuum Auctorem, referenda est: *non enim sumus sufficientes cogitare aliquid à nobis, quasi ex nobis, sed sufficientia nostra ex Deo est.* Quæ sententia

illustrata est ab integro sanctorum Patrum choro, sed ab Augustino potissimum innumeris in locis. In iisdem Libris *de Doctrina Christiana* auctor ipse est Oratoribus sacris, ut preces ante concionem ad Deum fundant, & ab ipso deposcant, quid & quomodo dicendum; nam ut est Sap. VII. 16. *In manu illius & nos & sermones nostri, & omnis sapientia, & operum scientia & disciplina.* Ad preces tamen adiungendum esse ait studium necessarium; & hoc enim Deus exigit à nobis: quæ etiam valere puto ad retundenda Phereponi diſteria pag. 548. Animadv. ad Serm. 244. Augustini, ubi sanctum virum non sine legentium stupore quodammodo ridet, quod auxilium divinum imploraverit, cum ad populum verba faceret. Nomine itaque divinæ *suggestionis & revelationis* sibi factæ quoties utitur Augustinus, aut populum erudiens, aut Libros conscribens, id tantum sibi vult, se divino boni cujuscumque auctori tribuere, atque acceptum referre, quidquid boni ac veri calamo aut ore prolaturus est. Neque illi animus jactitandæ revelationis cujuscumque, cui fidem non habere certissimam piaculum sit; multoque minus quidquam profert tanquam novum dogma sibi à Deo revelatione peculiari detectum. Immo his ipsis verbis [quæ de Prologo ad Libros de Doctr. Christ. Phereponus sumpsit] satis prodit Augustinus, se nihil tradere supra hominis privati jus, dum humilis æquè ac modestus dubitat, num *Deus scribens sibi* ea tunc sit suggesturus, an denegaturus, quæ volentibus & valentibus discere, utilia deprehendantur.

Eadem pag. 514. Animadv. configit Phereponus hæc alia Augustini verba: *Homo itaque fide, spe, & caritate subnixus, eaque inconcussè retinens non indiget Scripturis, nisi ad alios instruendos. Itaque multi per hæc tria etiam in solitudine sine codicibus vivunt.* Itaque Augustinus Lib. 1. cap. 39. de Doctrina Christiana, ad quæ Phereponus; *Nemo, inquit, tam est peritus Scripturæ, quin indigeat codicibus, quos consulat & legat subinde. Quid si quis literas nesciat, ibi potius debet vivere, ubi leguntur, quàm in solitudine: si quis sciat, protervia est, & negligentia non ignoscenda, si codices sibi non comparet.* Tum Augustini sententiam egregio decreto percellit, inquiens: *Hæc merum enthufiasmum redolens.* Phereponum laudo, quod Scripturæ Sanctæ necessitatem atque utilitatem Christiano Populo commendet. Ne apud nos quidem ullas est, qui divinas Literas veluti summum Dei munus non extollat, nemo est, qui earum lectionem atque meditationem non suadeat; & impietate non careret, quicumque ab eo studio Christianum Gregem averteret, easque superfluas Reipublicæ Catholicæ arbitraretur. Quantum quoque in iis laudandis, & suspiciendis sedulus fuit Augustinus, tantum quoque alienus fuit à

minuenda earum utilitate. Id ostendere facile quidem, sed etiam supervacaneum foret in tanta rei evidentia. Hæc tamen generalis regula suas patitur exceptiones, nam ad consequendam vitam æternam, & ad rectè vivendum atque credendum, hominibus singulis necessaria non est divina Scriptura; interdum etiam non utilis, immo perniciosa est, non ex se ipsa, sed ex ignorantia; aut perversis hominum affectibus. Certè fuere tempora, quibus Codices sacri novæ Legis non erant, & aliquid nondum fuerat Literis divinitus commendatum. Ita nempe se habuere priores anni Christianæ Reipublicæ. Præterea diu caruere sacris Literis Provinciæ quædam Christum amplexæ, cum in earum Linguam conversæ nondum fuissent Prophetarum & Apostolorum monumenta. Audiendus est in hanc rem sanctus Irenæus Lib. 3. cap. 4. *Quid autem, inquit ille, si neque Apostoli quidem Scripturas reliquissent nobis, nonne oportebat sequi ordinem Traditionis quam tradiderunt iis, quibus committebant Ecclesias? cui ordinationi assentiunt multæ gentes Barbarorum eorum, qui in Christum credunt, sine charactere, vel atramento scriptam habentes per Spiritum in cordibus suis, & veterem Traditionem diligenter custodientes.* Infra verò addit; *Hanc fidem qui sine literis crediderunt, quantum ad sermonem nostrum barbari sunt, quantum autem ad sententiam, & consuetudinem, & conversationem propter fidem, per quam sapientissimi sunt, placent Deo, conversantes in omni iustitia & castitate & sapientia,*

Nolo hic innuere, quibus hominibus, & quomodo & quando necessaria non sit divina Scriptura, immo etiam esse possit, quibusdam conditionibus positis, perniciosa. Insistere tantummodo placet verbis sancti Irenæi. Etiam sine sacris Literis placere Deo possunt homines, dum in omni iustitia, & castitate, & sapientia versentur. Nam cur cœleste hoc eruditionis patrimonium Ecclesiæ suæ dedit Deus, nisi ut nos veritatem revocantem edoceret, eamque mutationis ac depravationis periculo eriperet, simulque nos ad amorem sui & proximi, & iustitiæ incitaret? Atqui certissimum est, vel sine lectione divinarum Scripturarum posse homines consequi id, quod per easdem tribuere Deus solet, nempe abundare fide, spe & charitate, operibusque pietatis atque iustitiæ fideliter vacare: id quotidie faciunt tot illiterati ac rudes. Bona institutio, pia meditatio, Pastorum vox, prædicatio atque Traditio non raro satis sunt homini divinâ gratia adjuto, ad placendum plus Deo, quam placeant Erudiri nonnulli in sacrarum Literarum studium perpetuo intenti. Ergo in his casibus non indigent homines Codicibus sacris quos legant, multoque minus si legere nesciant. Jam aliunde habent, quod ex eorum Librorum lectione expectare alii possunt.

Ergo iis tunc necessaria non est lectio sacrorum librorum. Quod si quis dicat: erit saltem utilis, immo necessaria quodammodo; nam fides, & spes & caritas sine meditatione cœlestium Codicum servari vix queunt: respondebimus, nunquam negasse Augustinum, quin semper utilis esse possit lectio divinatorum librorum, sed tantum ejus necessitatem negasse in hominibus jam fide, spe & caritate abundantibus. Deinde Augustinum loqui de iis, qui has virtutes *inconcusse retineant*, ac servant; nam eo saltem tempore necessitas nulla est legendæ aut audiendæ divinæ Scripturæ. Tandem cum certum sit, uti diximus, aliter quàm per lectionem Codicum sacrorum, fidem, spem & caritatem obtineri posse, certum pariter esse debet, sine eadem lectione servari ac retineri posse easdem virtutes.

Quibus ex rebus intelligas, perperam, ac intolerandâ censurâ *Entusiasmm* somnari in Augustini sententia, quasi auctor sit sanctus Doctor, nihil generaliter referre, habeatne Christianus Homo, an non habeat, legatne an non legat Scripturam sacram. *Æquivocatione* rursus non carent Phereponi verba, dum ait: *Nemo tam est peritus Scripturæ quin indigeat Codicibus, quos consulat & legat subinde.* Explicare debuit Censor, quem in finem quisque indigeat Codicibus sacris: si ad alios erudiendos; utique vera est Phereponi sententia: sed ipse ab Augustino prius didicit, ita scribente, ut vidimus: *Non indiget Scripturis, nisi ad alios instruendos.* Si ad eruditionem sui, ut rectè credat, ac rectè operetur; jam ostendimus id immeritò à Censore affirmari, cum & Augustini tempore multi homines piissimi, fide, spe & charitate subnixi, *etiam in solitudine sine Codicibus viverent*, & nostris etiam temporibus multi vixant fide, pietate, bonisque operibus conspicui, & tamen Literarum prorsus ignari. In reliquis item Phereponi verbis eadem æquivocatio latet. *Qui, nescit literis, ibi potius debet vivere, ubi leguntur sacri Codices, quàm in solitudine:* Id verum est, nisi jam inscriptam in corde suo habeat, & solícite servet legem, & doctrinam eorumdem Codicum; at eadem necessitas minimè urget, ubi jam teneat, credat, & re perficiat, quod sacri Codices tradunt, præcipiunt & suadent. Similiter *protervia & negligentia* intolerandæ damnandus continuo non est, qui Literarum gnarus *Codices sacros sibi minimè comparet*: fieri enim potest, ut hic jam ipsos legerit, & ex ipsis, aut aliunde didicerit, aut discere pergat, & soveat, & exerceat legem Dei in omni pietate atque Justitia. Tabulæ autem lapideæ, & Codices scripti eò duntaxat tendunt, ut in cordibus hominum legem veritatis & caritatis inscribant: quod cum factum est, & ea lex *inconcusse retinetur*, tum necessitas tollitur comparandi sibi Codices materiales, sine quibus nemo dubitare potest, quia



quin multi ad veram pietatem, & salutem aeternam pervenerint, atque perveniant. Itaque necessaria quibusdam non est, quanquam generaliter loquendo nunquam desinat esse utilis ex natura sua divinorum Librorum lectio.

Cap. 8 Lib. 1. de Doctr. Christ. scripserat Augustinus: *Illi duo libri, unus qui Sapientia, & alius qui Ecclesiasticus inscribitur, de quadam similitudine Salomonis esse dicuntur: nam Jesus Sirach eos scripsisse constantissime perhibetur.* Tum Retract. Lib. 2. Cap. 4. sententiam hanc suam de Auctore Libri Sapientiae corrigit, aitque se didicisse postea, non esse illum Sirachidi tribuendum. Ad hæc Pherreponus pap. 514. Animadv. *Mirum esse, ait, Episcopum tanti neminis rem tantillam ignorasse aliquandiu, quam à Catechumenis disci oportuisset. Nunquam studiose cum legerat librum, cum hæc scriberet: nam Auctor libri se non ait Jesum esse filium Sirach, sed Regem Israelis Cap. IX. 7. 8. Quodcumque ita sit, non capio, qui inter Propheticos libros censeret Opusculum, cujus Auctor præ se fert se Regem fuisse, cum minime fuerit.* Auctorem Libri Sapientiae nemo certissime novit huc usque, & variae de ipso opiniones fuere apud Veteres, quanquam plerique in Salomonem confectura ferrentur, & quidem gravissima. Quare mirum esse non debet, quod Jesum Sirachidem Augustinus quondam censuerit Libri Auctorem, aliorum famam secutus. Neque piaculum fuit id aliquandiu ignorasse, cum ne nunc quidem ad fidem spectet nosse, quis Auctor ille fuerit, & profecto incertus sit Auctor. Deinde verum quidem est, ejus Auctorem se dicere Regem, & conditorem etiam Templi, quæ certè non conveniunt Jesu filio Sirach. Attamen mirum potius esse debet, quod Pherreponus non ceperit, qui simul credere Augustinus potuerit Jesum Libri Auctorem, & Librum ipsum inter Propheticos connumerandum. Hoc intellectu assequi non difficile fuisset homini erudito, si aliud quàm causas accusandi Augustini apud Augustinum quaesivisset,

Quicumque Salomoni adjudicant Canonicum hunc Librum, certè norunt, quid ibi Cap. IX. 7. 8. legatur, & tamen alium à Salomone faciunt illius Auctorem, compertum videlicet habentes, nihil idcirco vacillare auctoritatem Propheticam Libri illius: Auctor enim, quicumque is fuit, creditus est sapientissimi Salomonis sensa, atque sententias colligisse in unum ex aliis Libris, quos elucubratos à Salomone scimus, atque deperditos, & ex iis Librum confarcinasse sub titulo *Sapientia Salomonis*. Librum quoque *Ecclesiastici* ex Ethicis Scriptionibus Salomonis per Sirachidem fuisse excerptum, verisimile videtur Eruditis: idemque de *Proverbiorum* parte conjiciunt alii. Deinde Auctor Librum

concinnare potuit sub nomine Salomonis, ejusque personam induere, ipsumque loquentem & docentem facere, quod familiare fuit antiquis Scriptoribus. Nempe Salomon omnium mortalium sapientissimus est habitus apud Hebræos. Id innuisse videtur Eusebius Cæsariensis Lib. 11. Cap. 7. Præpar. Evang. Ubi postquam Salomonis sapientiam laudavit, hæc subdit: *Εντεῦθεν ὁρμώμενος καὶ ὁ τὴν πανάρετον σοφίαν εἰς αὐτὸ προσώπων ἀναδεις, ἔφη.* Quæ ita vertere possumus Latine: *Hic ratione commotus & ille, qui omnium virtutum parentem Sapientiam sub ejus nomine exposuit, inquit, &c.* Tum aliqua citat Eusebius ex Cap. VII. 5. Libri Sapientiae. Idem sensisse videntur Origenes in Joannem Tomo 10. & sanctus Thomas, alii- que tum veterum Patrum, tum recentiorum Eruditorum, quibus incertus ille Auctor creditur sub Salomonis persona locutus. Quamobrem nulla esse Pherepono causa potuit mirandi, cur Augustinus Librum *Sapientiae* Canonicum duceret, simulque ejus auctorem olim suspicaretur filium Sirach. Non hæc pugnant invicem. Et ipse Augustinus in ea semper sententia fuit, Librum Salomoni non essetribuendum, sed à quopiam fuisse conscriptum, qui Salomonem fuerit imitatus, quare & *de quadam similitudine Salomonis esse dicebatur* à multis.

Mirari semel coepit Phereponus, tam facile nescit desinere. Itaque pag. 514. mirari pergit, qui Lib. 2. Cap. 11. de Doctr. Christ. Augustinus commendat Hebraicæ Linguae studium ad Scripturarum divinarum cognitionem, cum in Hieronymo improbarit consilium vertendi Hebraica Latine, & Septuaginta viralem veteris Instrumenti Interpretationem, divino Spiritu afflante factam crediderit. Magis etiam miratur, cur Augustinus commendato Hebraicæ Linguae studio, idem ipse neglexerit, immo cur nullus alius iis temporibus eidem Linguae operam inter Christianos dederit. Sed ne hic quidem ulla suberat justa mirandi causa. Magni versionem τῶν LXX. faciebat Augustinus, ne dicam pluris etiam quam oportebat. Porro & minime necessariam, & periculi plenam operam arbitrabatur, novam Scripturae Interpretationem ex Hebræis Codicibus deducere, & in Ecclesiam inferre, & veterem antiquare ab Apostolis & à Patribus usu receptam. Erant & aliae rationes Augustino quas certè nunc infirmas & inanes ipse etiam intelligeret, si in vivis esset, sed tunc fortes & gravissimas adeo arbitrabatur, ut intercesserit consilio suo, ne sanctus Hieronymus in proposito pergeret. Verum aliud est novam Scripturae sanctae versionem inutilem ac periculosam suspicari, aliud Hebraicæ Linguae studium cognitionemque improbare. Illud fecit Augustinus, hoc nusquam, immo & propter eruditionem ejus-  
modi

modi summo in honore habuit Hieronymum, ejusque versionem tandem deprehensam utilem sua laude non fraudavit. Auctor item fuit aliis, uti ex ejus Libris constat, ut eidem Linguae addiscendae operam darent, cum apprimè utilem cognosceret ad sacrarum Literarum perfectam intelligentiam, atque tutelam. Non edidicit ipse, quia sero ejus utilitatem intellexit, non ediscebant alii, quia ingens Magistrorum inopia erat, & à solis Judæis expectandum erat ejusmodi beneficium, quos tamen aut livor à Christi Anis alienabat, aut Christiani ipsi fugiebant, cum scandalum pusillis foret arctum cum iisdem habere commercium. Sed hæc Phereponi oculos facile fugiunt, & is potius amat suspicari interpolationes in Augustini Libris, immo ad *Academicum Ingenium Augustini, sibi non satis constans, referre hæc contrarias*, ut ille sibi fingit, ejusdem sententias.

Quod habet idem Phereponus pag. 558. animadv. ad Cap. 7. Libri de Fide & Oper. nos diu non morabitur. Ex Augustini sententia, *Qui, siquid homo veluti recte fecerit, nisi ad pietatem, quæ ad Deum est, referatur, rectum dici non oportet.* Censet Phereponus monstrum esse ex contendendi, & paradoxa defendendi libidine natum, arbitrari vel ipsas Infidelium virtutes esse peccata. Sed meminisse debuit Censor iste præter Cardinalem Norisium v. c. quem & ipse laudat, complures Catholicos luculentissimè ostendisse, quæ hic fuerit mens Augustini, alia sanè quàm Calvinus & Jansenius putarunt. Opera ergo bona in ipsis Infidelibus agnovit sanctus Doctor: agnovisse etiam videtur affectus medios inter cupiditatem & caritatem; sed ipsa illorum opera, naturaliter bona, rectè docuit tribuenda esse Deo, qui & in à se averis bonas voluntates operatur. Tu consule celeberrimos Theologos in hoc argumentum, quod etiam proximè præteritis annis piè versavit Lescius Crondermus Lib. 2. Cap. 9. in Libro, cui titulus, *Elucidatio Augustiniana de divina Gratia Doctrinae.*

*Quid est aliud quod malum dicitur, nisi privatio boni?* Verba sunt Augustini Cap. XI. Enchiridii. Hanc sententiam quamplurimis aliis in locis ab Augustino propositam Phereponus pag. 559. & 584. animadv. ineptam judicat, multis deridet, & triumphatoris in morem proculcat atque proseribit. Sed ne hic quidem placet detinere Lectorem eruditum, cum nemo nesciat, quàm anxie subtiliterque à Scholasticis Theologis, immo & ab ipsis Philosophis, agitata fuerit, & agitetur adhuc hujusmodi quæstio. Græci Latinique Patres fere omnes cum Augustino consentiunt. Nobilissimi autem ac innumeri Theologi, ipsique etiam Philosophi sentiunt, & ostendunt, *formale malitia actus moralis; seu peccati, essentialiter in privatione debita rectitudinis consistere.*

Est itidem materiale, & positivum in peccato, quod etiam agnoscunt ipsi Theologi. Porro videat Phereponus, quibus nominibus sit dignus, dum tanto contemptu, & quibusdam ratiunculis, aggredditur, & nullo negotio conterere se posse putat quæcumque validissima argumenta congesserunt tot egregii Theologi atque Philosophi, in primis vero Cartesiani, ut malum & peccatum statuunt in aliqua privatione, sive negatione ordinis ac bonitatis. Contrarium tuentur nonnulli, ac certè non sine modestia, quam tamen frustra in Pherepono quæras, controversiæ difficultatem, aut dissimulante, aut fortassis etiam minime intelligente.

Lib. I. Cap. I. de Civ. Dei hæc scribit Augustinus: *An non etiam illi Romani Christi nomini infesti sunt, quibus præter Christum Barbari pepercerunt? Testantur hoc Martyrum loca, & Basilicæ Apostolorum, quæ in illa vastatione Urbis ad se confugientes suos alienosque receperunt.* Quin ita res habuerit, nemo dubitare potest & tamen in his Augustini certissimis verbis habet Phereponus noster, quod carpat pag. 576. Animadv. *Non erat, inquit, dissimulandum hosce Barbaros fuisse Christianos, quamvis Arianæ Sectam sequerentur. Sed laudandi fuissent Hæretici, & rei admirabilis minuenta: quod simpliciter quidem Scriptor facere potuisset, sed non callidus Rhetor.* Do libens Gothos fuisse Christianos, quanquam id de Alarico quidem eorum duce constat, non autem de universa Gothorum Natione; nam & Rhadagaisus alter eorum dux, Paganorum superstitioni addictus fuerat. Do, inquam, id libens, habemus enim non unum hujus rei testem; ac cur hujus rei mentionem facere Augustinus debuit? Num ignorabant Ethnici Romani, Gothos Christianam Religionem fuisse professos? minime verò. Id vulgatissimum erat, prodideratque longè antea cognitus Romanis Alaricus, qui & ipsam Urbem non semel obsederat, & pacis fœdera cum Romanis inierat, iis etiam coactis, Imperatorem creare Attalum Arianæ Sectæ hominem, Gentilibus propterea atque Arianis ipse carus. Igitur nihil erat, cur notissimam rem dissimulare vellet Augustinus. *Sed, inquit Phereponus, laudandi erant Hæretici, & rei admirabilis minuenta.* Res erat Augustino cum Romanis captæ direptæque Urbis calamitatem tribuentibus Religionis Christianæ; non erat cum Gothis. Pepercerant Barbari Christianis æquè ac Ethnicis, qui ad Basilicas Apostolorum & Martyrum confugerant. Ergo Christi causa effugerunt pœnas præsentis exitii Gentiles Romani, non evitaturi, nisi nomen & Religio Christi Barbarorum feritatem adeo evidenter mitigasset, atque cohibuisset. Hic igitur insistit Augustinus, & ingrati animi Romanos Ethnicos arguit, qui fateri nollent se mitissime habitos non aliâ

alia de causa , quam quod sacra loca propter Christum Barbari revererentur. Quanquam verò Gothi Christiani essent , non desit tamen admiranda esse illorum mansuetudo erga Romanos. Moribus quippe barbari, immanitate feri, victoriæ ardore furentes, spem nullam relinquerant tantæ erga victos clementiæ , cum ne ipsi quidem Romani, nedum efferatæ gentes, victis parcere solerent ad Tempia inanum Deorum confugientibus.

Quod tamen animadvertas velim , Augustinus ipse hanc Barbarorum insuetam humanitatem, *misericordiam & humilitatem*, multis commemorat: quod cum facit , ceriè ipsos Hæreticos de laudando facinore laudat. Deinde Lib. V. Cap. 32. ejusdem Operis de Civitate Dei refert insignem Christianorum victoriæ de Rhadagaifo Gothorum Rege reportatam quinque ante captam ab Alarico Urbemannis. Auctor & ipse est, fuisse Rhadagaifum falsis Diis addictum , quibus etiam immolare quotidie ferebatur. Quamobrem, inquit Augustinus : *Si ille tam impius , cum tantis & tam impiis copiis Romam fuisset ingressus , cui pepercisset ? quibus honorem locis Martyrum detulisset ? in qua persona Deum timeret ? cujus non sanguinem effusum , cujus pudicitiam vellet intactam ?* Tum Romanos arguit , quod Deo non agant grâtiâs , qui cum statuisset irruptione barbarica graviore dignos mores hominum castigare , victum tamen voluit Rhadagaifum Dæmonum cultorem, ne ipsis Dæmonibus gloria, Romanis verò acerbissima clades contingeret. Deinde cum ab his Barbaris [ hoc est ab Alarico ejusque copiis ] Roma caperetur , qui contra omnem consuetudinem bellorum antecessorum ad loca sancta confugientes, Christiana Religionis reverentiâ tuerentur , ipsique Dæmonibus, atque impiorum sacrificiorum ritibus , de quibus ille præsumperat , sic ADVERSARENTUR PRO NOMINE CHRISTIANO , ut longe atrocius bellum cum iis , quàm cum hominibus gerere viderentur , &c. Quæ verba tam aperta mihi videntur, ut non dubitem, quin Phereponus ipse intelligere deum possit, non dissimulatam ab Augustino Religionem Gothorum , quamquam alioqui notissimam , & commendatum eorum facinus ab ipso fuisse: cujus tamen rei laudem ad Christum Deum tanquam ad præcipuum auctorem referendam esse prudenter monet. Sed ego fortasse ineptus , quod omnia vestigia consecrari velim Censoris nostri , qui hic tam facile Augustinum nobis exhibet veluti Rhetorem callidum. Væ Libris atque Scriptoribus, si hujusmodi nebulas excitare licet adversus illos , nam quis in uno stans pede magnus statim Criticus evadere , cum lubet , non possit ?

Ejusdem ponderis est alia Phereponi adnotatio in ea Augustini verba Lib. VII. Cap. 14. de Civ. Dei : *Si ergo Mercurius ipse*

*sermo est, etiam ipsis [Ethnicis] confidentibus Deus non est.* Quæ sic Phereponus illustrat, dicens: *Miror non timuisse Augustinum, ne sibi obijceretur, quod passim habet de Verbo; nam similis obiectio potuit fieri, responsioque Augustini pariter eludi.* Facile profectò miratur Phereponus, ejusque admirationem atque adnotationem quibusdam Gregaliis suis hic placituram mihi persuadeco. Verùm quisquis rem seriò perpendat, è vestigio intelliget, hominem hunc nihil pensi habuisse interdum quid scriberet, dum contra Augustinum scriberet. Et sanè ille ridendus, qui miratur non timuisse Augustinum, ne hic in se ipsum sua tela converterentur. Ex Augustini sententia *Mercurius* dicebatur esse hominum *sermo*. En ejus verba. *Quid si sermo ipse dicitur esse Mercurius, sicut ea qua de illo interpretantur, ostendunt. Nam ideo Mercurius, quasi medius currens dicitur appellatus, quod sermo currat inter homines medius, &c. Ideo & mercibus præesse, quia inter vendentes & ementes sermo fit medius, &c.* Quis autem sanus, & non ludens, hominum *Sermonem* nonnunquam stultum, deceptorium, & falsà narranteram, semper verò creaturæ filium, & subsistentiâ carcutem, velit appellare & credere Deum? At Catholici, cùm Dei Filium appellant *Verbum*, cui etiam nonnulli *Sermonis* vocabulum accommodarunt, *Verbum* intelligunt divinum, *Verbum Dei prolem*, *Verbum non exterius sonans & fugiens, sed interius manens*, & ex divina essentia, & ab æterno productum, & cum ipso Patre, atque in ipso Patre subsistens; *Verbum denique [ut loquar cum Auctore Libri de quinque Hæresib. quem olim Augustino tribuebant] quod melius Gracè dicitur λογος; logos quippe verbum significat, atque rationem,* ac propterea Dei Patris æterna ratio atque sapientia. Quare nihil erat, cur sibi, & sententiæ Catholicorum timeret Augustinus, dum ideo argumentatur, *Mercurium* non esse Deum, quod ipse dicatur esse *hominum sermo*; nimia quippe intercedit differentia inter hominum sermonem, & *Verbum Dei æternum, immutabile, increatum*, quod idem est ac ratio divina. Immo videas plerosque Patrum, cùm Græcorum, tum Latinorum, & Augustinum præcipuè in Libris de Trin. & in Joannis Evang. alibi, fuisse usos exemplo Verbi humani atque creati, ad explicandam aliqua ex parte rationem divini & increati Verbi. Sed simul explicarunt quàm immanè duo ista verba invicem distarent, probè nimirum intelligentes, solos Sophistas ea comparatione abuti posse contra divinam naturam Verbi cœlestis. Consule Petavium Tom. 2. Lib. 6. Cap. 2. Dogm. Theologic.

Plura alia supersunt in censoriis Phereponi Animadversionibus, quibus sua deberetur censura. Sed si persequi singula velimus, vix erit scribendi modus. Paucis ergo Orationi nostræ finem faciamus.

Quod

Quòd Augustinum, ubi opus erat, aut iusta causa occurrebat, Phereponus sibi corrigendum suscepit, moleste non ferimus, immo aliqua etiam ratione laudandum consentimus. Quòd malè toties correxerit, quòd tam impotenti odio in ipsum exarserit, quòd nullum deniq; non moverit lapidem, quo incomparabilis viri famam pro viribus prosterneret, hoc dolemus, hoc in perniciem non modò sanctæ Religionis, sed & bonarum Artium, atque Literarum tendere clamamus. Certe immodica veneratio nos in transversum agat, aut livor nos urat, si contendere velimus, nunquam Augustinum errasse, nunquam meliora tradere potuisse, nunquam scribere accuratius debuisse, Phereponum vero iniquis semper censuris adversus ipsum fuisse præliatum. Magnorum virorum in Literis lapsus ac vitia non dissimulari, tum veritati apprime gratum est, tum Religionis ac Reipublicæ interest, ne sub magnis nominibus major errori factus, nocendique licentia obveniat. Verùm & immensæ Augustini virtutes sincerius erant exprimendæ, ejusque nævi tam fuscis coloribus, tantaque bilè exaggerandi & amplificandi non erant, ut sanctissimum æque & doctissimum Episcopum, si licuisset, nativo suo splendore Phereponus omnino expoliaret. Immo si quisquam dignus erat, qui placide haberetur, is Augustinus erat, quem summa pietas atque doctrina ingeniis omnium seculorum, & Ecclesiæ veræ perpetuo commendavit. Phereponi tamen censuram inofficiosam, simul & ab æquitate alienam, quanto magis execremur, postquam, ni mea me fallit opinio, tot iniquas accusationes audivimus, & tantam segetem errorum deprehendimus in ipso Augustini Censore? Reliquum igitur est, ut homini illi meliorem ingenii & eruditionis non vulgaris usum à Deo precemur. Lectores vero moneamus, ut si minus periti sunt, ab ejus Librorum lectione abstineant, sin docti sunt, caute versentur cum Dictatore Critico. Interim vero stet ille tanquam exemplum, quid possit in inquisitione veritatis humana ratio sibi relicta sine salutaribus frænibus, de quibus uti & de juribus ingeniorum hætenus Oratio nostra pro viribus egit.

F I N I S.

























